


Xtidxcoob Dios ni  
biädinä dad Jesucrist



New Testament in Zapotec, Mitla (MX:zaw:Zapotec, Mitla)

Xtidxcoob Dios ni biädnä dad Jesucrist  
New Testament in Zapotec, Mitla (MX:zaw:Zapotec, Mitla)

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2014-04-30

---

PDF generated using Haiola and XeLaTeX on 4 Mar 2019 from source files dated 1 Mar 2019  
5cff1274-8dc3-5398-a94d-f6033bb363c9

## Contents

San Mateo . . . . .	1
San Marcos . . . . .	47
San Lucas . . . . .	76
San Juan . . . . .	125
Hechos . . . . .	160
Romanos . . . . .	205
1 Corintios . . . . .	222
2 Corintios . . . . .	239
Gálatas . . . . .	250
Efesios . . . . .	256
Filipenses . . . . .	262
Colosenses . . . . .	266
1 Tesalonicenses . . . . .	270
2 Tesalonicenses . . . . .	274
1 Timoteo . . . . .	276
2 Timoteo . . . . .	281
Tito . . . . .	285
Filemón . . . . .	287
Hebreos . . . . .	288
Santiago . . . . .	301
1 Pedro . . . . .	306
2 Pedro . . . . .	311
1 Juan . . . . .	314
2 Juan . . . . .	319
3 Juan . . . . .	320
Judas . . . . .	321
Apocalipsis . . . . .	323

## Guijtz Ni Bacuaa Mateo

### *Retoxpengoldoo Jesucrist (Lc. 3:23-38)*

<sup>1</sup> Guijtz ni rusule' laj retoxpengoldoo xten Jesucrist xi'n toDavid, xi'n toAbraham.

<sup>2</sup> Abraham gujc xtdad Isaac, Isaac gujc xtdad Jacob, Jacob gujc xtdad Judá con rebejtzni.

<sup>3</sup> Judá con Tamar gujc xczuzajn Fares con Zara. Fares gujc xtdad Esrom, Esrom gujc xtdad Aram. <sup>4</sup> Aram gujc xtdad Aminadab. Aminadab gujc xtdad Naasón. Naasón gujc xtdad Salmón. <sup>5</sup> Salmón con Rahab gujc xczuzajn Booz. Booz con Rut gujc xczuzajn Obed. Obed gujc xtdad Isaí. <sup>6</sup> Isaí gujc xtdad reii David. David con nani gujc cháäl Uriás gujc xczuzajn Salomón.

<sup>7</sup> Salomón gujc xtdad Roboam. Roboam gujc xtdad Abías. Abías gujc xtdad Asa. <sup>8</sup> Asa gujc xtdad Josafat. Josafat gujc xtdad Joram. Joram gujc xtdad Uzías. <sup>9</sup> Uzías gujc xtdad Jotam. Jotam gujc xtdad Acáz. Acáz gujc xtdad Ezequías. <sup>10</sup> Ezequías gujc xtdad Manasés. Manasés gujc xtdad Amón. Amón gujc xtdad Josías. <sup>11</sup> Josías gujc xtdad Jeconías con rebetzni cheni huij reben Israel pres lo guedx Babilonia.

<sup>12</sup> Che gudejd huij rebejnga pres Babilonia, dxejc guyu' xi'n Jeconías, Salatiel. Salatiel gujc xtdad Zorobabel. <sup>13</sup> Zorobabel gujc xtdad Abiud. Abiud gujc xtdad Eliaquim. Eliaquim gujc xtdad Azor. <sup>14</sup> Azor gujc xtdad Sadoc. Sadoc gujc xtdad Aquim. Aquim gujc xtdad Eliud. <sup>15</sup> Eliud gujc xtdad Eleazar. Eleazar gujc xtdad Matán. Matán gujc xtdad Jacob. <sup>16</sup> Jacob gujc xtdad José cháäl Marii nani gujc xnan Jesús ni birilaj Crist.

<sup>17</sup> Ni'cni gujc tzudaj xfamil reni agudejd gubi'reni lo guedxliujre che gubajni toAbram cheni gubajnliza toreii David. Tzudajza rexagdoonajc reni gudejd cheni gubajni toDavid cheni huijli reben Israel pres Babilonia. Stzudaj rexagdoonajc reni gudejd cheni biriilireni pres Babilonia che gojlli Crist.

### *Cheni gojl Jesucrist (Lc. 2:1-7)*

<sup>18</sup> Scree gujc cheni gojl Jesucrist. Abia'n xnanni, Marii, diidx guchñaani José ni gac cháälni. Per ansde xca' sa'reni, Marii agac nuxi'nni sa'csi biääd Sprit Dxan xten Dios lojni. <sup>19</sup> José com najcni te beñsa'c, di rlajzni nuro'nni Marii nez loj rebejn te niacbeereni, ni'c bejnni xhigab Guñonxhiga'tzni Marii. <sup>20</sup> Xhigabga cayujnni cheni baluiloj te xangl Dios lojni, lo bacal räjpni lojni:

—José xajg toDavid, na'c guidxejblu xca'lu Marii gacni cháällu sa'csi xi'nni nani chu najc xten Sprit Dxan xten Dios. <sup>21</sup> Che gaal xi'nni cuälajluni Jesús sa'csi laani guslaani rexpejnni lo rextojlreni.

<sup>22</sup> Guiraa redee gujc si'c te guzobj diidx ni gunii tej ni bacuaa xtidx Dios. Räjpni:

<sup>23</sup> Suu te dxapxteeb báz, sajł te xingaanni nani guirilaj: Emanuel, (lajni säloj Dios nabajn con nuure).

<sup>24</sup> Che gubajn José lo bacal, bejnne si'cni räjp xangl Dad lojni. Cua'ni Marii gujc cháälni.

<sup>25</sup> Luxh dini niembeeni si'c cháälni dxejli cheni gudejd gojl xingangalojni ni gulälajni Jesús.

## 2

### *Che biädhuii reben nanduxh ni laa remagos lojni*

<sup>1</sup> Cheni gojl Jesús nen guedx Belén xten guedx Judea, najc Herodes reii xten guedx Judea. Dxejc bidzujn rebennajn ni najc remagos, siädreni nejj cadro rliejn gubijdx, bidzujnreni guedx Jerusalén. <sup>2</sup> Rniabdiidxreni:

—¿Con reii xten reben Israel nani golgaj, ä? Nurnu abihuiinu xpajłni laadxlunu, ni'cni siopdonnuni.

<sup>3</sup> Che biejn diajg reii Herodes diidxga, gyyuduxhni yärsia' näjza guiraa reben Jerusalén. <sup>4</sup> Dxejcti batie'ni guiraa rebixhojzro ni rnibee loj rebixhojz, näjza guiraa renani ruluii xleii Moisés lo rebejn te gunabdiidxni lojreni:

—¿Caro gaal Crist?

<sup>5</sup> Laareni räjpreni:

—Nejn guedx Belén xten guedx Judea sa'csi si'c gunii niguii ni bacuaa xtidx Dios che räjpni:

<sup>6</sup> Luj guedx Belén xten guedx Judea, dilu gajc maazru huin loj reguedxro xten guedx Judea sa'csi nejn guejdxre guirii tej nani guinibee, te ni ga'p rexpenä Israel.

<sup>7</sup> Dxejcti guredx-xhiga'tz Herodes remagos te gunabdiidxni gucti biricaj bajl nani bahuiireni. <sup>8</sup> Dxejcti baxhalnireni guedx Belén, räjpni lojreni:

—Colchäj ro'c, colnabdiidxsa'c xcuent biuuxga te che abidxältuni jädniitu loä te näjza narä chaganäni.

<sup>9</sup> Che biejn diajgreni xtidx reii, sä'tireni. Bajl nani bahuiireni lagajc lajdxreni lahtis nijdni lojreni. Che bidzujnlireni cadro yu' bázga, dxejcru guzobdx bajlga. <sup>10</sup> Che bahuii remagos loj bajlga, rbalazduxhneni. <sup>11</sup> Si'c bidzujnreni. Che biu'reni nejn yu', bahuiireni lo bázga con xnanni Marii. Dxejcti bazuxhijbreni, gojreni bázga, baxhalreni rexcäl'nasa'creni bazalajzreni oor, näjza yaal näjza yalnejh. <sup>12</sup> Che agojl guibi'reni, gunixcälreni, räjp Dios lojreni:

—Na'c guibi'tu nez loj Herodes.

Dxejcti gunaazreni garenca nez yuj, gubi'reni lajdxreni.

### *Che siini Egipto*

<sup>13</sup> Che sii remagos lajdxreni, biäd te xangl Dios baluilojni lo José lo bacal, räjpni:

—Huistie, cua' biuxe're näjza xnanni, huinäreni Egipto. Ro'c guläjz che guiniäli lojlu. Sigiuil Herodes biuxe're sa'csi rlanjni ju'tnini.

<sup>14</sup> Dxejc huistiegajc José, cua'ni biuxe're näjza xnanni, lagajc yälga biriireni, siireni nez Egipto. <sup>15</sup> Ro'c guyu'reni cheni gujtli Herodes. Guiraa dee guzajc te guzobj diidx ni bacuaa niguii ni gunii xtidx Dios che räjpni: “Egiptoli guredxä xi'nä.”

### *Che guinibee Herodes gujt rebiuxbáz*

<sup>16</sup> Che gucbee Herodes abasguee remagosni, bidxechduxhni. Gunibeeni guet guiraa rebiuxniguii ni yu' tio'p ijz näjza rebiuxe' ni yu' guxiiru dxej, guideb nejn guedx Belén näjza reguejdx ni re' gabiga, si'cti redxej ni räjp remagos lojni. <sup>17</sup> Dxejc guzobj diidx ni bacuaa Jeremías ni gunii xtidx Dios che räjpni:

<sup>18</sup> Biejn xse' bejn nejn guedx Ramá, te yälhuinduxh, te yälrbexdij, yälrbexdnen: laa Raquel ni roon yejc rexi'nni.

Naaddini jäjl lajzni sa'csi agujt rexi'nni.

<sup>19</sup> Cheni gujt Herodes, dxejc lo te bacal huiluiloj xangl Dios loj José nejn Egipto.

<sup>20</sup> Räjpni:

—Huistie, cua' biuxe're näjza xnanni, gubisac nez Israel sa'csi agujt renani rlanj ju't biuxe're.

<sup>21</sup> Dxejcti huistie José, cua'ni biuxe' näjza xnanni. Gubi'reni Israel. <sup>22</sup> Luxh che biejn diajgni rnibee Arquelao guejdx Judea lacuaa Herodes, xtadni, bidxejbni nuini ro'c. Dxejc gunisac Dios lojni loj te bacal, ni'c huijni lo reguejdx xten Galilee. <sup>23</sup> Dxejc biädläjzni nejn guejdx ni laa Nazare't te si'c guzobj diidx ni bacuaa niguii ni gunii xtidx Dios cheni räjpni: “Sirilajni nazaren.”

## 3

### *Juan Bautist basule' xtidx Dios loj rebejn*

(Mr. 1:1-8; Lc. 3:1-9, 15-17; Jn. 1:19-28)

<sup>1</sup> Nejn redxejga biäd Juan Bautist lo reyubidz xten guedx Judea, ro'c cagulijdxni, <sup>2</sup> cayäjpni:

—Colgusiechljaztu rextojltu sa'csi xcälrnibee Dios abidzujungaxhni.

<sup>3</sup> Juan najc nani basä't Isaías, te niguii ni gunii xtidx Dios, cheni bacuaani: Riejn xse' te ni rbedxa' nez lo reyubijdz:

“Colguslii xnezyuj Dad, colguslii xnezyulajzni.”

<sup>4</sup> Najcw Juan xquichlajd cameii. Naliib te duguijd xque'ni. Rajwni guxha't näjza dzujn xten baseerguijxh. <sup>5</sup> Riääd reben guedx Jerusalén näj guiraa reben Judea näjza rebejn ni tre' gajxh nez ro' gueu Jordán, riädcuadiajgreni xtiidxni. <sup>6</sup> Che ruxhobdojlreni xtojlrni, rutiobnis Juanreni ro' gueu Jordán.

<sup>7</sup> Che bahuiini siääd xhidajl reben guidoo ni najc refarisee näjza ni najc resaducee, rlanjreni gutiobnisnireni, räjpni lojreni:

—La'tu benguidxduxh, najctu si'c bäl. ¿Chu baliidxtu guxuntu loj xcälrdxe'ch Dios ni siääd? <sup>8</sup> Colguibansa'c si'cni nungäjł te fiipac rebejn guliipac abasiechlajztu. <sup>9</sup> Na'c litis guntu xhigab naatu: “¿Ni nurru najcnu rexagdoe toAbram!” Rniliä lojtu, sajc xca' Dios reguijre gunni gacreni rexi'n toAbram. <sup>10</sup> Asojb guibyajg lo xlobaa reyajg, luxh guiraa reyajg nani di ninexhsa'c xcaj lojni, sidinni te checni. <sup>11</sup> Narä guliicani rustiobnisä con nis si'c te seen cheni abasiechlajztu, abaxhobdojltu. Niluxh nani siääd detzä sutiobnisni la'tu con Sprit Dxan xten Dios näjza con guiboo. Rnibeeruni loä. Bensacduxhni. Nicla xcura'chni digacdi chanää. <sup>12</sup> Aca'ni xhi cojn gusiani triuu xtenni te chuchee triuuga nen godx xtenni. Dxejcti guixhtriuuga, suze'cni guijxhga lo guiboo ni rejc par tejpas.

### *Che guobnis Jesús*

(Mr. 1:9-11; Lc. 3:21-22)

<sup>13</sup> Dxejc birii Jesús nez Galilee, bidzujñni ro' gueu Jordán cadre yu' Juan te gutiobnis Juanni. <sup>14</sup> Niluxh naaddi Juan gutiobnis Jesús. Räjp Juan lojni:

—Luj nanab gutiobnislu narä, niluxh naj alga luj siäädlu loä te gutiobnisälu.

<sup>15</sup> Dxejc räjp Jesús lojni:

—Basaan gacni si'c naj, sa'csi nanab gusoobnu guiraa ni rlanj Dios gac.

Dxejctiru batiobnis Juan Jesús.

<sup>16</sup> Cheni gulujx guobnis Jesús, birigajcni lo nis. Dxejc bixal xhaguibaa, bahuiini siädjäjt Sprit Dxan xten Dios si'c te palom, biäjtni lojni. <sup>17</sup> Dxejc xhaguibaali biejn diajgreni te xse' ni räjp:

—Dee najc xi'nä ni sanälazä. Laani rbanälazä.

## 4

### *Che huij Jesús lo reyubijdz*

(Mr. 1:12-13; Lc. 4:1-13)

<sup>1</sup> Dxejc bejn Sprit Dxan xten Dios huij Jesús nez lo reyubijdz te nejzga nuhual bendxab Jesús.

<sup>2</sup> Che gulujx bacua'n Jesús tiuu gubijdx, tiuu guxhijn, gulaanni. <sup>3</sup> Sas biääd bendxab lojni, räjpni:

—Palga guliilu Xi'n Dioslu, gunibee gac reguijre yätxtiil.

<sup>4</sup> Badzu' Jesús diidxre lojni, räjpni:

—Loj reguijtz xten Dios caj scree: “Xhet ganaxdi yältxtiil guibajn rebejn; sibajnzani con guiraa diidx nani rnii Dios.”

<sup>5</sup> Dxejcti huinä bendxab Jesús guedx Jerusalén. Gulä'pnini jiaa yejc xques guidoro. Dxejcru räjp bendxab lojni:

<sup>6</sup> —Palga Xi'n Dios luj, bitiäjs lo yujli, sa'csi scree caj loj rexquijtz Dios:

Sinibee Dios rexanglni ga'preni luj; siliäsreni luj con naareni didi gacnaj ni'lu lo reguijga.

<sup>7</sup> Badzu' Jesús diidxre lojni, räjpni:

—Caj loj rexquijtz Dios: “Na'c fallu Dad ni najc Xtioslu.”

<sup>8</sup> Stee huält huinä beṇdxab Jesús yejc te danro. Dxejcti baluiini lojni guiraa reguejdx, reguedxro ni tre' lo guedxliuj näj guiraa xcälṇasa'creni. <sup>9</sup> Dxejcti räjpni loj Jesús:

—Guiraa redee sunidxä lojlu palga guzuxhijblu nez loä te ganlu narä.

<sup>10</sup> Dxejcti räjp Jesús lojni:

—¡Huij nez rec beṇdxab! Scree caj loj rexquijtz Dios: “Dad Xtiostislu ganlu; lojtisni chulu.”

<sup>11</sup> Dxejcti gubicaj beṇdxab loj Jesús. Dxejc biääd rexangl Dios biädhuiireni Jesús.

*Gusloj Jesús cayujn xtzuunni*

(Mr. 1:14-15; Lc. 4:14-15)

<sup>12</sup> Che biejn diajg Jesús yu' Juan neṇ ladzguiib, huijni nez Galilee. <sup>13</sup> Dxejcti gudejdni guedx Nasare't, huiläjzni guedx Capernaum ni tre' gajxh nez ro' nis, nez reguejdx Zabalón con Neftalí. <sup>14</sup> Si'c gujc te guzobj diidx ni bacuaa Isaías ni gunii xtidx Dios:

<sup>15</sup> Lajdx Zabalón, lajdx Neftalí, nezyuj ni rij nez ro' nisdoo, stelaad gueu Jordán, Galilee cadro rbäjz rebejn nani di gac rexpen Israel.

<sup>16</sup> Rebejn nani rbäjz neṇ te yälčäjy abahuiireni te bajlga, luxh bajlga basanij xcäriejn renani nabajn lo xcälrdxejb, lo xpalaa yälgujt.

<sup>17</sup> Dxejcli gusloj cagulijdx Jesús, räjpni:

—Colgusiejchlajztu, colguxhobdojl te guibansa'ctu sa'csi abidzungajxh xcälṇnibee Dios.

*Che gurejdx Jesús tajp xpejn*

(Mr. 1:16-20; Lc. 5:1-11)

<sup>18</sup> Sasaj Jesús nez ro' nisdoo xten Galilee che bahuiini lo tio'p niguii. Tejni laa Simón, ni laaza Pedr. Steeni najc lagajc bejtzni, ni laa Andrés. Dzuun ni rujnreni najc rniaazreni bäjł, ni'c cacuaareni guijxh lo nisdoo. <sup>19</sup> Dxejcti räjp Jesús lojreni:

—Coltanajł narä. Naj riniaaztu bäjł, niluxh narä gunä cueedxtu rebejn.

<sup>20</sup> Lagajc dxejc basa'nreni xquijxhreni te sanajłreni laani.

<sup>21</sup> Che gudejdreni ro'c, bahuiini loj stio'p niguii, Jacob con bejtzni Juan. Yu'reni neṇ te barcw con xtadreni, ni laa Zebedeo cayunsa'creni guijxh. Dxejc gurejdx Jesúsreni.

<sup>22</sup> Lagajc dxejc basa'nreni barcw näjza xtadreni te sanajłreni Jesús.

*Cagului Jesús xhidajł bejn*

(Lc. 6:17-19)

<sup>23</sup> Sasajti Jesús guideb nez región xten Galilee, caguluiini neṇ tejga rexquidooreni. Cagusule'ni redidxcoob xten xcälṇnibee Dios. Cagusiajczani guiraa yälṇracxhuu ni rajc rebejn guejdxga, guiraa yälgujdx. <sup>24</sup> Biejn diajg reben Siria diidx xcuent ni cayujn Jesús. Sas biädñäreni guiraa rebenracxhuu ni cayajc guiraloj yälgujdx, yälṇnayan; guiraa reni rajc yejcreni, guiraa reni rajc malyälgujdx, reni rajc yälguidxbej, guiraareni abixu'ṇ tiejxhreni. Dxejcti basiajc Jesús rebejnğa. <sup>25</sup> Xhidalduxh beṇ Galilee huinajłni, näj reben reguedx Decápolis, näjza reben guedx Jerusalén, näjza reben Judea näjza rebejn ni tre' stelaad gueu Jordán.

## 5

*Yejc te dajł balijdx Jesucrist rebejn*

<sup>1</sup> Che bahuii Jesús loj reben xhidajł, huä'pni yejc te dajł. Dxejcti gubig rexpejn ni gurejdxni lojni. <sup>2</sup> Dxejc gusloj cagului Jesús reni'c, scree räjpni:

*Rebejn ni sibaalajz*

(Lc. 6:20-23)

<sup>3</sup> —Sibaalajz rebejn nani nanchee rquinduxhreni xcälṇracnäj Dios, sa'csi laareni nungäjłreni xcälṇnibee Dios.

<sup>4</sup> 'Sibaalajz rebejn nani rac-huin lajzreni xcuent rextojłreni, sa'csi sudzucaj Dios xtojłreni, susiäjłni lajzreni.

<sup>5</sup> 'Sibaalajz rebejn nani nadolajz nani rlajz guntis si'cni rnibee Dios, sa'csi sacnäj Diosreni lo xcäl'nabajnreni lo guedxliujre.

<sup>6</sup> 'Sibaalajz rebejn ni nastoocanu rliaanreni, riojlneni, sa'csi rlajzreni guibansa'ctisreni nez loj Dios, sa'csi sudeed Dios lojreni guiraa ni rniabreni.

<sup>7</sup> 'Sibaalajz rebejn nani rulasajz sa'reni, sa'csi sulasajzza Diosreni.

<sup>8</sup> 'Sibaalajz rebejn nani najc nayatis lastooreni rujnreni rexhigabsa'c xten Dios sa'csi suhuiireni lo Dios.

<sup>9</sup> 'Sibaalajz rebejn nani ruscuecdxilajz sabejnreni, sa'csi laareni sirilajreni rexi'n Dios.

<sup>10</sup> 'Sibaalajz rebejn nani rusutijp lajzreni che rusacsí bejnreni sa'csi nabansa'creni nez loj Dios, sa'csi xtenreni najc xcäl'rnibee Dios xhaguibaa.

<sup>11</sup> 'Colspaalajztu che gusacsí bejntu tilnäjnreni la'tu, guiniireni guiraloj didx-xhii xcuent xtidxä. <sup>12</sup> Colguibaalajz, colbalajz sa'csi xhaguibaali sunidxduxh Dios xcuent xtzuntu. Sigajcza basacsíreni reniguii ni gubajn galoo ni gunii xtidx Dios.

*La'tu najctu si'c sejd lo guedxliujre*

*(Mr. 9:50; Lc. 14:34-35)*

<sup>13</sup> Räjpzani:

—La'tu najctu si'c sejd lo guedxliujre. Palga di sejd gac nadzujy, ¿xho gacsacni nadzujy? ¿Xhi gun bejnni dxejc? Susälreni sejdga detz yu', suläj bejn yejcni.

<sup>14</sup> 'La'tu najctu si'c te bianij lo guedxliujre. Te guejdx nani tre' jiaa yejc te dajn, digacdi guiga'tzni. <sup>15</sup> Digacdi xcaguij te bajl dxejcti jäuuni nen te caj. Maazru huen soobni jiaa nen te gandilieer te gusänijni loj guiraa rebejn ni tre' nen yu'. <sup>16</sup> Xcäl'nabansa'ctu najc si'c te bajl loj reben guedxliuj. Suhuiireni xtzunsa'ctu dxejc siliä'preni xpala'n xtadtu ni yu' xhaguibaa.

*Ruluii Jesús xcuent leii*

<sup>17</sup> Räjpzani:

—Na'c guntu xhigab siädgudzucaá leii xten toMoisés, niclaza rediidx ni baluii redad ni gunii xtidx Dios. Xhet siäddzucaádini, narä siälä te guluiäpacni si'cni najcni. <sup>18</sup> Rniliäpac, dxejli che ni nitloj guibaa näjza guedxliuj, nicla tej letr ni caj loj leii di nit. Sajcpac guiralii ni caj lo reguijtzga. <sup>19</sup> Ni'cni chutis ni rlajz gusaan te diidx nani caj loj leii, mase te didxbäzni, luxh ruluiini gun bejn si'c, laani guxiduxh sajcn lajdx Dios guibaa. Niluxh renani rucuaadiajg xtidx leii, luxh rujnpacreni si'cni caj lo leii, ruluiizani leii, bensacduxh gacni lajdx Dios guibaa. <sup>20</sup> Ni'cni rniä lojtu, palga ditu gusa'cru xtzun Dios, ditu guibansa'cru loj reni najn xcuent xleii toMoisés, näjza loj reben guidoo ni laa farisee, dipactu jiu' lajdx Dios xhaguibaa.

*Ruluii Jesús xcuent yälrdxe'ch*

*(Lc. 12:57-59)*

<sup>21</sup> Räjpzani:

—Abiejnza diajgtu nani gunii rebengoldoo: “Na'c ju'tlu. Chutis te nani ju't sa'ni, sinärenini lo guxhtis te jäuuni nen latzguiib.” <sup>22</sup> Niluxh narä rniä chutis nani guidxechduxh lo sa'ni sijni lo guxhtis. Chutis ni guinii didxnaj lo sa'ni, sijni lo juejz. Chutis ni gäb lo sa'ni: “bennayällajz” sidejdni loj yäl'guxhtis xten Dios, sijni gabijl cadro cayejc guiboduxh.

<sup>23</sup> 'Che sanälu gojn guidoo te gusa'nlni lo bacuug, palga guinaj lajzlu yu' chu lo cadxe'chlu, <sup>24</sup> basansijc gojn xtenlu lagajc ro'c, huisiäl'xgaa diidx con sa'lu, dxejcti guibi'lu te gac gusa'nlu gojn xtenlu.

<sup>25</sup> 'Palga yu' chu rdxe'ch lojlu, basquejn basiäj'l diidx con laani lagajc cheni sasanäj'luni lonezyuj te di gutedni luj lo juejz. Luxh juejz suteedni luj loj reguixhajg te gusaüreni luj nen latzguiib. <sup>26</sup> Rniliäpac lojlu: “Dilu guirii ro'c palga dilu cue'c guiralii meel nani guiniabni lojlu.”

*Ruluii Jesús xcuent yäl'rusguee sa'ni*



<sup>27</sup> Räj pzani:

—Abiejn diajgtu guniireni galoo: “Na'c guesnäjtu gunaa nani di gac chäälto.” <sup>28</sup> Narä rniä, chutis te nani fii loj te gunaa dxejcti guisia' lajzni gunaaga, abejnni dojl nen lastooni. <sup>29</sup> Palga balojlu ladbee rujn rujnlu dojl, gulääni basälni te laad sa'csi hueenru gunijtlu te balojlu quela chää guideb tiejxhlu gabijl. <sup>30</sup> Palga naalu ladbee rujn rujnlu dojl, batiu'ni sa'csi hueenru gunijtlu te naalu quela chää guideb tiejxhlu gabijl.

*Rului Jesús xcuent yälruo'n chääl bejn*  
(Mt. 19:9; Mr. 10:11-12; Lc. 16:18)

<sup>31</sup> Räj pzani:

—Abiejn diajgtu guniireni galoo: “Chutis niguii ni rlajz guro'n chäälni, nanabtis gudeedni te guijtz nani rni abaro'nni chäälni.” <sup>32</sup> Narä rniä, niguii nani guro'n chäälni niluxh xhet dojl di bejn chäälni, niguiiga sujn gun chäälni yälgubejxh, niluxh chutis ni guchnaa gunaaga sujnzani yälgubejxh.

*Rului Jesús xcuent che ria'n diidx*

<sup>33</sup> Räj pzani:

—Abiejnza diajgtu gunii rebengool: “Che ria'nlu diidx lo Dios gunlu xhi gunlu, na'c jial lajzlu; basa'pac xtiidxlu lo Dios.” <sup>34</sup> Narä rniä, na'c gunlu juraar, nicla tej mood, nicla por xhaguibaa, sa'csi ro'c najc lajdx Dios, <sup>35</sup> nicla por loj guedxliuj sa'csi ro'c rsiuj ni'ni; nicla por guedx Jerusalén sa'csi ro'c najc guedxlajdx reiuro, <sup>36</sup> niclaza por lagajc bitiuvejclu, sa'csi digacdi guncheelu te guichyas niclaza te guichnol, nicla tej guijch. <sup>37</sup> Nanab guiniitluni: “Mbaj” o “Ajndi”. Palga yu' xhiru rniilu, bendxab najc ni rujn rniiluni.

*Chanälajzni rebejn ni rdxe'ch lojni*  
(Lc. 6:29-30)

<sup>38</sup> Räj pzani:

—Abiejn diajgtu gunii rebengool galoo: “Te baloj por ste baloj, te läjy por ste läjy, nalajznu bejn lo sa'lu si'ctis ni rujnni lojlu.” <sup>39</sup> Narä rniä, na'c tilnäjl te bejn ni bejn te cos guijdx lojlu. Palga chääzni ladbee lojlu badeed stelaad lojlu chääzni. <sup>40</sup> Palga yu' chu rlajz tilnäjl te xca'ni xcamangwlu, badeedza näj xsa'cwlu lojni. <sup>41</sup> Palga yu' chu guinibee guulu xcargwni te kilómetro, huinani tio'p kilómetro. <sup>42</sup> Nani guiniab xhi guiniabxlia'ni lojlu, badeedni. Nani guiniablaa xhi guinablaani lojlu na'c gudxoynluni lojni, na'c gäblu: “Xhetini.”

<sup>43</sup> Abiejn diajgtu gunii rebengool: “Colchanälajz sa'tu. Colguidxe'ch loj renani rdxe'ch lojtu.” <sup>44</sup> Narä rniä lojtu, colchanälajz rebejn ni rdxe'ch lojtu. Benle' yejc reni rgue lojlu. Colyejn dxunsa'c loj renani rdxe'ch lojtu. Colcuejdx, colnab loj Dios xcuent rebejn nani rdxagdijltu, rusacsireni la'tu, <sup>45</sup> te si'c gactu xi'n xtadtu ni yu' xhaguibaa nani rujn rii xcubijdxni lo rebensa'c sigajcza lo reben guijdx. Rujnzani riab nisguij lo rebensa'c sigajcza lo rebenguijdx. <sup>46</sup> Palga la'tu chanälajzta lagajctis rebejn nani rinälajz la'tu, ¿xhi gaan guntu dxejc? Najctu lagajc si'c najc rebejn ni rutie' meel ni rajx lo gubier. <sup>47</sup> Palga guiniitu: “Xchan”, lagajctis loj resa'tu, ¿xhini'c rujntu ni najc hueenru lo chutis bejn? ¿La et sigajcdiza rujn rebejn nani di gumbee Dios? <sup>48</sup> Colyajc bensa'c si'c ni najc xtadtu ni yu' xhaguibaa.

*Rului Jesús xho gudeedni gojn*

<sup>1</sup> Räj pzani:

—Na'c gusäbdiidx guntu dzunsa'c nez loj rebejn te fiitisreni xhi rujntu. Palga gusäbdiidxtu di xtadtu ni yu' xhaguibaa guniidx xhi xca'tu. <sup>2</sup> Che gudeedlu gojn, na'c güilu diidx xhi badeedlu. Na'c gunlu si'c rujn rebejn nani rusguee nen reguidoo, näjza lad nezyuj. Rujnsireni si'c te ruhuii rebejn xhi rujnreni te rliä'p rebejn xpala'nreni. Narä rniä acua'reni gaan xtenreni. <sup>3</sup> Luj che gudeedlu gojn xtenlu, na'c gacbee nicla tej xamiigwlu

xhi badeedlu, <sup>4</sup> te gac gojn xtenlu xhiga'tz. Dxejcti xtadlu ni cahuii nani bejnlu xhiga'tz, sacnäjni luj nez loj rebejn.

*Rului Jesucrist xho cueedx, guiniabni lo Dios*

(Lc. 11:2-4)

<sup>5</sup> Räjpzani:

—Cheni rbejdx, rniabtu lo Dios, na'c guntu si'c rujn rebenguidoo ni rusguee. Rchaglajzreni rniabreni lo Dios rsiuliireni nen reyu' cadre riel xtidx Dios, näjza guiraa resquuin, näjza nez ronejz te ruhuii rebejn xho rujnreni. Rniliäpac, acua'reni gaan xtenreni. <sup>6</sup> Naj luj cheni cueedx, guiniablu lo Dios, biu' nen xyu'lu. Basäuu ro' yu'ga, dxejcti xhiga'tz gunii loj xtadlu ni yu' xhaguibaa. Dxejcti xtadlu ni cahuii xhi rujnlu xhiga'tz, sacnäjni luj nez loj rebejn.

<sup>7</sup> Cheni caniitu lo Dios, na'c guinisactu balti huält rediidx nani aguniitu. Si'c rujn rebejn nani di gumbee Dios. Naareni sa'csi sanuutis rniireni xhidajl diidx balti huält, siejn diajg Dios. <sup>8</sup> Na'c guntu sigajc ni rujnreni, sa'csi anajn xtadtu xhini'c rquiintu che guiniabtuni lojni. <sup>9</sup> Ni'cni scree colguinii lo Dios:

Xtadnu ni yu' xhaguibaa dxan najc lajlu.

<sup>10</sup> Sujiääd xcälrnibeelu;

bejn si'cni rlajzlu lo guedxliujre sigajc rujnlu xhaguibaa.

<sup>11</sup> Nadxej baniidx xcu'nnu sa' ni rdaunu guira dxej.

<sup>12</sup> Basiäjł lajzlu redojl xtennu si'c riäjł lajznu redojl xten rebejn ni rujn dojl loonu.

<sup>13</sup> Na'c gusaanlu jiaabnu xhigabguijdx,

basłaa nuure lo dojl,

sa'csi xten guejblu najc yälrnibee, yälñadip näjza yälrdimbicha' par tejpas.

Sugacni si'c.

<sup>14</sup> Palga la'tu gusiäjł lajztu redojl ni rujn rebejn lojtu, xtadtu ni yu' xhaguibaa susiäjłza lajzni rextojłtu. <sup>15</sup> Palga ditu gusiäjł lajztu redojl ni rujn rebejn lojtu, sigajcza xtadnu ni yu' xhaguibaa di lajzni jiäjłza rextojłtu.

*Rului Jesús xho gucua'n bejn*

<sup>16</sup> Räjpzani:

—Che rucua'ntu na'c guntu si'c rujn rebejn nani rusguee; rumbaa lojreni te fii rebejn cagucua'nreni. Rniliä acua'reni rexgaanreni. <sup>17</sup> Niluxh la'tu, che rucua'ntu, colcuñ yejctu, colquiib lojtu <sup>18</sup> te na'c gacbee rebejn cagucua'ntu, xtadtistu suhuii cagucuanxhiga'tztu. Xtadtu ni cahuii xhi cayunxhiga'tztu suniidxni xhi xca'tu nez loj rebejn.

*Yälñasa'c ni yu' xhaguibaa*

(Lc. 12:33-34)

<sup>19</sup> Räjpzani:

—Na'c gapdajntu yälñasa'c lo guedxliujre cadre rajw reman o rribtiejn xhixtentu, niluxh richu' gubaan rolizj bejn te rbajnreni. <sup>20</sup> Hueenru ga'ptu xcälñasa'ctu xhaguibaa cadre di reman gauu, diza rexhixtentu cuibtiejn, diza regubaan jiu' te cuanreni. <sup>21</sup> Sa'csi cadre yu' xcälñasa'ctu, ro'cza naga' lastootu.

*Bianij xten tiejxhtu*

(Lc. 11:34-36)

<sup>22</sup> Räjpzani:

—Bianij xten tiejxhni najc balojni, ni'cni palga rhuisa'c balojtu, guideb tiejxhtu yu' lo bianij. <sup>23</sup> Niluxh palga rebalojtu di fisa'c, guideb tiejxhtu yu' lo nacäjy, ni'cni palga bajl nani yu' tiejxhtu dini gusanij, ðlinacäiboo najc guidebtu!

<sup>24</sup> 'Nicla te bejn di gacdi gun dzuun loj tio'p lam tejsi junt, sa'csi sibälazni tejni laga sanälajzni steeni. Digacdi guntu xtzuun Dios palga caguuiltistu xcälñasa'ctu lo guedxliujre.

<sup>25</sup> 'Ni'cni rniä lojtu, na'c chutu yärsia' por xcäl**nabajntu**, xhicha gautu, xhicha yätu, niclaza naatu xhicha lajd gajcwtu. Yäl**nabajn** sajcru lo yäl**rajw**, luxh sajcru tiejxhtu lo xhajbtu. <sup>26</sup> Col**h**uii remane' ni rtajt xhaguibaa. Direni cue'c binij, dizareni guilia' gäj**l**, dizareni cuchee xhi gaureni ne**n** yu', luxh xtadtu ni yu' xhaguibaa rudeedni xhi rajwreni. ¿Laa xhet sajcdirutu loj remane'ga, ä? <sup>27</sup> ¿Chu tej la'tu sa'csi ru'tu yärsia' sajc tiobrutu ste bo'c jiaaru?

<sup>28</sup> ¿Xhicuent runduxhtu xhigab xcuent xhajbtu? ¿Col**h**uii reguii ni tre' nesiät! ¿Xho roobreni? ¿Xho rialreni? Direni gun dzuun, dizareni guzaa xhajbreni. <sup>29</sup> Narä rniä lojtu, nicla rei**i** Salomón guideb najcwni re**x**habsa'c xtenni di nisiuchee si'c rsiuchee tej reguiiga. <sup>30</sup> Palga Dios ruj**n** rajc recuaan ni yu' nesiät ni rial nadxej luxh guixee ahuejcreni, ¿xhixh dini gunduxhru par la'tu, be**n** nani guxii rililajz? <sup>31</sup> Ni'cni na'c chutu yärsia' guntu xhigab: “¿Xhicha guidaunu, xhicha guidun**nu**, xhicha gacwnu?” <sup>32</sup> Sa'csi rebej**n** nani di gumbee Dios xhigabtisga rujnreni, caguuilreni guiraa recosga. Niluxh xtadtu ni yu' xhaguibaa anajnni xhini'c rquiintu. <sup>33</sup> Col**q**uilxgaa yäl**r**nibee xten Dios näjza yäl**n**abansa'c si'cni rlajz Dios dxejc sica'tu guiraa ni rquiintu. <sup>34</sup> Ni'cni na'c gunduxhtu xhigab xho tedtu dxej guixee. Combast tedtu trabajw nani riääd dxej con dxej.

## 7

*Na'c cubeetu sa'tu  
(Lc. 6:37-38, 41-42)*

<sup>1</sup> Räj**p**zani:

—Na'c cubeetu sa'tu te na'c**za** cubee Dios la'tu. <sup>2</sup> Sa'csi sigacni rgubeetu sa'tu, sigajc**za** sigubee Dios xhi rujntu; niluxh lagajc si'cni rutie**x**htu lo bej**n**, si'c**za** sutie**x**h Dios lojtu. <sup>3</sup> ¿Xhicuent ruhuiilu loj guij**x**h ni yu' baloj sa'lu, luxh dilu fii yagro nani yu' lagajc balojlu? <sup>4</sup> ¿Xhicuent gäblu lo sa'lu, nädon**nu** cuää guij**x**h ni yu' ne**n** balojlu, luxh dilu fii loj yagro ni yu' ne**n** balojlu? <sup>5</sup> Be**n**guijdx ni rusguee, gulä**x**gaa yagro ni yu' balojlu te gac fisa'clu te cuäälu guij**x**h nani yu' baloj sa'lu.

<sup>6</sup> Na'c guluiitu guiraa re**x**tid**x** Dios loj chutis bej**n** sa'csi yu'reni najc si'c b**ä**'cw, xlia'si rca'renini; sibi'reni, sauya'reni luj. Sigajc**za** recos sa'cru, na'c gudeed**t**uni loj chutis bej**n**, sa'csi yu'reni najc si'c cuch rbälazreni cossa'c najc**re**ni si'c cuch ni rulä**j** yej**c** xhitis xhi cos.

*Col**n**ab, col**q**uiil, col**g**usejz rolä'  
(Lc. 11:9-13; 6:31)*

<sup>7</sup> Räj**p**zani:

—Col**n**ab lo Dios te guni**i**dxni nani rniabtu. Col**q**uiilni te guid**x**äjltuni. Col**n**ii rolä', te guixal**n**i jiu'tu. <sup>8</sup> Chutis ni rniab lo Dios sica'ni nani rniab**n**i, nani rgu**i**il xhi cos nez loj Dios rdxälzani nani rgu**i**ilni; nani rusejz rolä', su**x**halzareni loj**n**i.

<sup>9</sup> ¿La yu' chu tejt**u** che guiniab xi'nni te yät**x**tiil, alga gudeedni te gu**i**j, ä? <sup>10</sup> O palga guiniabni te la' b**ä**jl, ¿la sudeedni te b**ä**l? <sup>11</sup> Palga la'tu ni najc be**n** gu**i**jdx rajc rudeedtu cossa'c loj xi'ntu, aticaxh xtadtu ni yu' xhaguibaa. Laani suni**i**dxni cossa'c loj renani guiniabni loj**n**i.

<sup>12</sup> Ni'cni guira'ti cos ni rlajz**t**u gun**n**äj bej**n** la'tu, sigajc**za** colyennä**j**reni, sa'csi si'c caj lo leii xten to**M**oisés, näjza lo di**i**dx ni bacuaa redad ni gunii x**t**id**x** Dios.

*Rolä' x**t**en yäl**n**abaj**n** najc d**ä**ä  
(Lc. 13:24)*

<sup>13</sup> Col**j**iu' nez rolä' nani najc d**ä**ä, sa'csi gulajg najc rolä', gulajg najc**za** nezyuj nani rinä bej**n** lo yäl**r**unij**t**, luxh xhidaj**l**reni riu' nejzga. <sup>14</sup> Sa'csi d**ä**ä najc rolä', d**ä**äza najc nezyuj nani rinä bej**n** nez loj yäl**n**abaj**n**, niluxh guxii najc renani rdxäl nezyujga.

*Ninexhsa'c ni rc**a**j loj te yajg rujn gumbeeni yajgga  
(Lc. 6:43-44)*

<sup>15</sup> Räj pzani:

—Colnatiro rebejn nani rlajz gusguee la'tu. Rniisireni rusule'reni xtidx Dios. Rluisi nadolajzreni si'c te xiil, niluxh direni gac. Alga si'c loob najcreni, rutie'chreni bejn si'c re'ch xiil che riädchu' loob lojreni. <sup>16</sup> Dzuun nani rujnreni sujn gumbeetureni. Anajntu di uub xcaj lo reyaguejch, diza iigw xcaj lo guechbiojb. <sup>17</sup> Ni'cni lo guiraa reyagsa'c rcaj ninexhsa'c lojni, per lo guiraa reyajg ni xhet yagsa'c di, ganax ninejxh ni di ganaxsa'c rcaj lojni. <sup>18</sup> Digacdi xcaj ninexhdxuudx loj te yajg ninexhsa'c. Di gacdiza xcaj te ninexhsa'c loj te yajg ni di gac yagsa'c. <sup>19</sup> Guiraa reyajg nani di ninexhsa'c xcaj lojni, nanab guidinni te checni. <sup>20</sup> Sigajcza sajz gumbeetu bensa'c sa'csi rujnreni dzunsa'c.

*Xhet guiraadi bejn jiu' lo xcälrnibee Dios*

*(Lc. 13:25-27)*

<sup>21</sup> Räj pzani:

—Xhet guiraadi renani rnii, “Dad, Dad”, jiu' lo xcälrnibee Dios xhaguibaa. Ganaxtis renani rujn si'cni rlajz Xtaä ni yu' xhaguibaa. <sup>22</sup> Sidzujn dxej sinii xhidajl bejn loä: “Dad, Dad, con lajlu basule'nu xtiidxlu, con lajzalu biläanu reben<sub>u</sub>dxab, con lajzalu biennu remilagwr.” <sup>23</sup> Dxej sapä lojreni: “Dina gumbeä la'tu. Colbicaj loä benlatsiaj.”

*Tio'p cimient*

*(Lc. 6:47-49; Mr. 1:22)*

<sup>24</sup> Räj pzani:

—Chutis nani rucudiajg diidx nani caniä, luxh ruzoob xtidxä, laani najc si'c te bensin nani basoob rolijzni yejc te guilaj. <sup>25</sup> Che biajb nisguij, biäjt nis gueuu, gubi' bej, bidinreni yejc yu'ga sas di yu'ga niajb sa'csi sojbni yejc guilajga. <sup>26</sup> Nani riejn diajgni xtidxä, luxh dini guzoob xtidxä najc si'c te ben guyalajz nani basoob rolijzni lo yujxh. <sup>27</sup> Che biajb nisguij, biäjt nis gueuu, gubi' beduxh bidinreni yec yu'ga. Dxej figurebä'n yu'ga. Lacti xhiroob banijt bejn<sub>u</sub>ga.

<sup>28</sup> Che gulujx gunii Jesús rediidxga, lacti bidxeloj rebejn rediidx ni baluini, <sup>29</sup> sa'csi baluini rebejn si'cpac te nani rnibee, xhet si'c ruluiidi rebejn ni najn leii.

## 8

*Rusiajc Jesús te bejn ni ral tiejxhni*

*(Mr. 1:40-45; Lc. 5:12-16)*

<sup>1</sup> Che biäjt Jesús yec dajn, xhidajl bejn huinajlni. <sup>2</sup> Dxejcti biääd te benracxhuu ni ral tiejxhni nez loj Jesús. Bazuxhijbni, räjpni:

—Dad, palga rlajzlu, sajz gusiajclu narä.

<sup>3</sup> Dxejcti basgaa Jesús naani, gudajnni dade'ga con naani, räjpni:

—Rlazä jiajclu. Siajc tiejxhlu.

Lagajc dxej gubicaj guejdx ni ral tiejxhni. <sup>4</sup> Dxejcti räjp Jesús lojni:

—Arniä, rut lojdi gäblu xhi guzajclu. Huijtis lo rebixhojz te badeed gojn ni gunii toMoisés gudeed bejn ni riajc, te fii rebixhojzga abiajclu.

*Rusiajc Jesús te xmos capitán roman*

*(Lc. 7:1-10)*

<sup>5</sup> Che biu' Jesús guedx Capernaum, bidzujn te capitán roman nani rnibee te gayuu soldaad. Gunabduxhni lo Jesús, <sup>6</sup> räjpni:

—Dad, xmosä naga' rolizä. Di gacdi guiniibni luxh cayanduxhni.

<sup>7</sup> Räjp Jesús:

—Do'o te gusiacäni.

<sup>8</sup> Dxejcti räjp capitán lojni:

—Dad, xhet sacädi; di nungäjl jiu' guejblu rolizä. Guiniitis te diidx, siacgajc xmosä.

<sup>9</sup> Narä nacäza xmos rebejn ni rnibee, niluxh rnibeäza te gayuu soldaad. Che rniä lo tejni: “Huij”, rijni. Che gäpä loj steeni: “Gudaa”, riädgajcni. Che gäpä loj xmosä: “Bejn dee”, rungajcni.

<sup>10</sup> Che biejn diajg Jesús si'c, bidxeloduxhni, räjpni loj renani siädnajlni:

—Rniliápac lojtu, nicla neñ guideb reguedx Israel dina nidxälä te bejn ni rililajz si'c rililajz dade're. <sup>11</sup> Niluxh rniä, sirii xhidajl benzijt nez ladjiaa, nez ladjiät, te jädquenäjreni Abram, Isaac, Jacoob lajdx Dios xhaguibaa. <sup>12</sup> Luxh reben Israel nani niajc xi'n Dios sijreni te laad lo yälkäy cadro soonreni, sauya'reni läjyreni, sidejdtisreni trabajw par tejpas.

<sup>13</sup> Dxejcti räjp Jesús loj capitán:

—Gubi' rolijzlu. Sigajcni huililajzlu, sigajcza gacni.

Dxejc lagajc orga bñajc xmosni.

*Rusijc Jesús xnansueegr Pedr*

(Mr. 1:29-31; Lc. 4:38-39)

<sup>14</sup> Che bidzujñ Jesús rolijz Pedr, bahuiini naga' xnansueegr Pedr, cayacxhuuni, yu'ni xliaa. <sup>15</sup> Dxejc gudajntis Jesús ñaani, birigajcni xliaaga. Dxejcti huistie nane'ga, gusloj cagudeedni xhi gau Jesús.

*Rusijc Jesús xhidajl beñ racxhuu*

(Mr. 1:32-34; Lc. 4:40-41)

<sup>16</sup> Che biu' guxhijñ, biädnäreni loj Jesús xhidajl beñ ni yu' rebenđxab lostooreni; con xtiidxni gunibeeni birii guiraa rebenđxabga. Basiajczani guiraa reben racxhuu. <sup>17</sup> Si'c bejn ni te guzojb diidx ni bacuaa todad Isaías, ni gunii xtidx Dios, che räjpni: Lagajc laani cua'ni rexcälracxhuunu, sanázani rexcälñayannu.

*Reni rlajz ninajl Jesús*

(Lc. 9:57-62)

<sup>18</sup> Che bahuii Jesús tre' xhidalduxh rebejn guideb gabi cadro suga'ni, gunibeeni tednäjni rexejñpacni stelaad ro' nis. <sup>19</sup> Dxejcti biääd te bennajn loj Jesús, räjpni:

—Mastr, sisiaäza cadrotis chäálu.

<sup>20</sup> Räjp Jesús lojni:

—Rebäjz rajpreni xpiliääreni, remane' ni rutajt xhaguibaa rajpreni xpitiääzreni, niluxh narä Xi'n Dios ni gujc Niguii dina gapä cadro gaa yecä.

<sup>21</sup> Stee rexejñpacni räjp lojni:

—Dad, basaan chaxgää ladxä te chacuatzä xtadä.

<sup>22</sup> Räjp Jesús lojni:

—Gudanajl narä. Basaan sugucua'tz resabengutreni rebejn nani najc si'c bengut sa'csi najcreni benđojl.

*Basiacdxí Jesús te beduxh*

(Mr. 4:35-41; Lc. 8:22-25)

<sup>23</sup> Che biu' Jesús neñ barcw, biu'za rexejñpacni lagajc nenga. <sup>24</sup> Dxejc huäjs te bedonduxh lo nisdoo. Lirusiääzni barcw neñ nisdoo. Luxh Jesús nagayejsni. <sup>25</sup> Dxejcti huij rexejñpacni huicuäänni, räjpreni:

—Dad, gucnäj nuure te di guetnu.

<sup>26</sup> Dxejc räjp Jesús:

—¿Xhicuent rdxejbtu, bejn ni guxii rililajz?

Dxejcti huistieni, gudidxa'ni lo bej näjza lo nisdoo, te biacdxireni. <sup>27</sup> Dxejc bidxelo-  
duxh rexejñpacni, räjpreni:

—¿Chuni'c najc niguiire? ¡Ahuilaa xho rucuadiajg bej näjza nisdoo xtiidxni!

*Rebenđxab ni yu' lajdx regadarenos*

(Mr. 5:1-20; Lc. 8:26-39)

<sup>28</sup> Che bidzujñ Jesús stelaad nisdoo cadro najc lajdx regadarenos, tio'p bejn ni yu' benđxab lastooreni biädchaglojreni Jesús. Rebejnğa riireni neñ rebaa, nialazduxhrene, ni'cni rut rajcdi rdejđ nezyujga. <sup>29</sup> Guredxa'reni räjpreni:

—¿Xhicuent siädchu'lu loonu luj ni najc Jesús Xi'n Dios? ¿La siäädlu ree te gusacs'flu nuure luxh gad gal'di xornu, ä?

<sup>30</sup> Nez te laad, zijte' cadro suga'reni, cayajp bejn xhidalro cuch. <sup>31</sup> Dxejcti gunab rebendxabga loj Jesús, räjpreni:

—Palga cuäälü nuure, basaan jiu'nu nen recuchre.

<sup>32</sup> Dxejcti räjp Jesús:

—Colchäj.

Dxejcti biriireni nen lastoo redade'ga, huichu'reni nen recuchga. Dxejcti guiragajc recuchga caguxunreni, huitejbreni ro' te guilaj, biäazreni nen nisdoo, gujttireni nen nis.

<sup>33</sup> Rebejn ni cayajp recuchga, baxunreni, huijreni lajdxreni, huiyeireni diidx guiraa ni guzajczeni näjza ni guzajc redade' ni guyu' rebendxab lastooreni. <sup>34</sup> Dxejcti guiraa rebenguejdxga huichaglojreni Jesús. Che bahuiireni lojni, gunabduxhreni lojni, jiunejzni lajdxreni.

## 9

*Basiajc Jesús te bejn nani abixu'n tiejxhni*

(Mr. 2:1-12; Lc. 5:17-26)

<sup>1</sup> Dxejcti biu' Jesús nen barcw. Gudejdni stelaad ro' nis te bidzujjni lajdxni. <sup>2</sup> Ro'c biädnäreni lojni te bejn nani abixu'n naani, ni'ni. Naga'ni lo te da'. Che bahuii Jesús lacti rililajzreni, räjpni loj benracxhuuga:

—¡Baspaa lajzlu xi'nä! Agubicaj rextojllu.

<sup>3</sup> Dxejcti gaii bennajn ni ruluii xleii Moisés cayujnreni xhigab ensilaareni, caniyaj dee Dios con rextiidxni. <sup>4</sup> Dxejc gucbegajc Jesús xhi xhigab cayujnreni, dxejc räjpni lojreni:

—¿Xhicuent cayujntu xhigabguijdx nen lastootu? <sup>5</sup> ¿Con ni najc guyasiru? Guiniä lo te bejn: “Agubicaj rextojllu”, o guiniä lo te bejn: “Huistie, guzaj.” <sup>6</sup> Dec gunä te gacbeetu Xi'n Dios ni gujc Niguii rajp yälrnibee lo guedxliujre te gudzucajni dojl.

Dxejcti räjpni loj benracxhuuga:

—Huistie, cua' xta'lu, huij rolijzlu.

<sup>7</sup> Dxejcti huistie benracxhuuga, siini rolijzni. <sup>8</sup> Che bahuii rebejn lojni, bidxelo-duxhreni, gulä'preni xpala'n Dios, ni badeed yälrnibeega loj rebejn.

*Che gurejdx Jesús Mateo*

(Mr. 2:13-17; Lc. 5:27-32)

<sup>9</sup> Dxejcti birii Jesús cadro basiajcnii benracxhuu, sä'tini. Dxejc bahuiini loj te dade' ni laa Mateo. Sobga'ni loj te yagxhiil cadro rbej reni ruquijx xcuent guiraloj. Dxejc räjp Jesús lojni:

—Gudanajl narä.

Dxejcti huisuni, sanajlni Jesús.

<sup>10</sup> Cheni sobga' Jesús lo mex cayajwreni rolijz Mateo, biäädza xhidajl rebejn nani ruquijx xcuent guiraloj, ni najc rebejn ni di gac xpen Israel, gurejzarenii lo mex näj Jesús näjza reni najc rexpejnpacni. <sup>11</sup> Che bahuii reben guidoo, ni laa refarisee, xhi cayujn Jesús, räjpreni loj rexpejnpac Jesús:

—¿Xhicuent raunäj xmastrtu rebejn nani ruquijx xcuent reyuj näjza rebejn ni di gac xpen Israel?

<sup>12</sup> Che biejn diajg Jesús xhi guniireni, räjpni lojreni:

—Rebejn nani nadaan dini guiquiin chu gusiajcnii, niluxh rebejn racxhuu ni'c rquiinreni chu gusiajcreni. <sup>13</sup> Colchäj te colchaseed xhi säloj diidxre ni caj loj reguijtz: “Yäl'rulaslajz rlazä, dina rlazä guniidxtu guidxaa löä.” Sa'csi narä dina niädtedxä rebensa'c, narä siädtedxä rebendojl te gusiechlajzreni.

*Gunabdiidxreni xcuent yälrucua'n*

(Mr. 2:18-22; Lc. 5:33-39)

<sup>14</sup> Dxejcti biääd rexpejnpac Juan loj Jesús räjpreni:



—Nuure con refarisee rcua'nnu xhidal huält, ¿xhicuent di rexpejn̄paclu gucua'n, ä?

<sup>15</sup> Räj̄p Jesús lojreni:

—Che ruchnaa te bi'n, ¿xhixh rac-huin lajz regolnejdx laga suga' bi'n con laareni? Palga yu' xhi sac bi'nga, dxejc sii soonreni, sucua'nreni.

<sup>16</sup> Rut gundi remiend te ladbiejw con te la' ladcoob sa'csi sixu'n ladcoobga, sutiäjsruni ladbiejwga, sajc xhiroobru cadro biräjsga. <sup>17</sup> Niclaza gac guida' bincoob nen̄ reguidbiejw, sa'csi reguidbiejw siräjsni dxejc sixe' bin, sinijtza reguijdgä. Ni'cni nanab guida' bincoob nen̄ reguidcoobza, te si'c nicla tejreni di nit.

*Xindxa'p Jairo näjza gunaa nani gudajn̄ xhajn̄ Jesús*

*(Mr. 5:21-43; Lc. 8:40-56)*

<sup>18</sup> Laḷ ni caniini rediidxga, biäd te dade' ni rnibee nen̄ guidoo xten rexpejn̄ Israel. Bazuxhijbni nez loj Jesús räj̄pni:

—Entis gujt xindxa'pä. Gudaa, badzuub naalu yejcn̄i te guibansacni.

<sup>19</sup> Dxejcti huisu Jesús, sanäni Jairo. Näj rexpejn̄pacni sanajlrenini. <sup>20</sup> Luxh guyu' te gunaracxhuu nani agujc tzubitio'p ijz cayajcni yälguidxbäii. Bidzuj̄nni nez dejt̄z Jesús, gudaj̄nni ro' xhajbni, <sup>21</sup> sa'csi bejn̄ni xhigab nen̄ lastooni: “Palga sajc canätis ro' xhajbni, siacä.” <sup>22</sup> Dxejc gubiré Jesús bahuiini loj gunaaga, dxejc räj̄pni:

—Gulecdxilajzlu xindxa'pä. Yäl̄rililajz xtenlu abasiajclu.

Luxh lagajc dxejc bjaic gunaaga.

<sup>23</sup> Cheni biu' Jesús rolijz dade' nani rnibee nen̄ xquidoo rexpen̄ Israel, bahuiini rebejn̄ ni roḷ bizej näjza xhidajl rebejn̄ ni cabedxa' cayoon, li te bieȳ cayajc, dxejc <sup>24</sup> räj̄pni loj rebejn̄ga:

—Colguibicaj. Nagayejstis dxa'pga, gajd̄ni guet.

Dxejc rebejn̄ga alga ruxhiznäjn̄reni Jesús. <sup>25</sup> Cheni abirii rebejn̄ nen̄ yu', biu' Jesús, gunaazni naa dxape', dxejc huistie dxape'ga. <sup>26</sup> Dxejcti bire'ch diidxga guiraa nen̄ reguejdx ni tre' nejzga.

*Basiajc Jesús tio'p lotiä'p*

<sup>27</sup> Che birii Jesús ro'c, huinajl tio'p bejn̄ni nani di fii. Rbedxa'reni roonreni räj̄preni:

—Balaslajz nuure, Xi'n toDavid.

<sup>28</sup> Che bidzuj̄n̄ Jesús cadro caya'n̄ni, gubigreni lojni. Dxejcti gunabdiidx Jesús lojreni, räj̄pni:

—¿La rililajztu sajc gunä ni rniabtu?

Redade'ga basejc diidx, räj̄preni:

—Sajc gunluni, Dad.

<sup>29</sup> Dxejcti gudaj̄nni balojreni, räj̄pni:

—Sugacni si'cpacni rililajztu.

<sup>30</sup> Lagajc dxejc bixal balojreni. Sas räj̄ppac Jesús lojreni:

—Arniä, na'c chayeitu diidxre, te rut gacbeedi xhi guzajctu.

<sup>31</sup> Cuantsi biriireni ro'c guslojreni cagutie'chreni diidx xcuent Jesús guideb gabi nen̄ reguejdxga.

*Basnii Jesús te gop*

<sup>32</sup> Che biriireni cadro bjaic baloj rebejn̄ga, biäd sgaii bejn̄ biädnäreni te gop loj Jesús. Yu' xp̄rit beñdxab nen̄ lastoo bejn̄ga. <sup>33</sup> Che barilaagw Jesús xp̄rit beñdxab nen̄ lastoo bengopga, guslogajcni caniini. Rdxeloduxh rebejn̄ räj̄preni:

—Gajdpacnu guihuii sa' redzuunre lajdx rexpejn̄ Israel.

<sup>34</sup> Dxejc reben̄ guidoo ni najc refarisee, räj̄preni:

—Rbääni rexpr̄it beñdxab con yäl̄rnibee xten beñdxabro.

*Rulaslajz Jesús rebejn̄*

<sup>35</sup> Gudejd Jesús guiraa reguedxro nájza reguedxbáz, basule'ni xtidx Dios nen reguidoo xten rexpejn Israel. Basääbni diidx xten xcälrnibee Dios. Basiajczani guiraloj yälracxhuu, guiraloj yälgujdx ni rajc bejn nen reguejdxga. <sup>36</sup> Che bahuiini loj reben xhidajl biaduxhni rebejn sa'csi rdebya' lajzreni, rac-huin lajzreni, najcreni si'c najc rexiiil nani di ga'p baxtoor. <sup>37</sup> Dxejcti räjpni loj rexpejnpacni:

—Guliipac xhidalduxh ben guedxliuj di gan xtidxä, luxh guxii najc reni guluiireni; najcni si'c gäjł ni agojl guilia', niluxh ruti mos ni guilia'ni. <sup>38</sup> Colnab lo Dad nani najc xtenni guedxliujre te guxhalni rebejn ni sajc guluii reben guedxliujre, gacreni si'c mos ni rlia' gäjł.

## 10

*Gule Jesús guitzubitio'p rexpejnpacni*  
(Mr. 3:13-19; Lc. 6:12-16)

<sup>1</sup> Dxejcti gurejdxni guitzubitio'p rexpejnpacni, badeedni yälrnibee lojreni te guri-laagwreni rexprit bendxab lastoo bejn nájza te gusiajcreni guiraloj yälgujdx nájza yälracxhuu.

<sup>2</sup> Laj reguitzubitio'p rexpejn ni guleni najc: Simón, ni laaza Pedr; Andrés bejtz Simón; Jacob xi'n Zebedeo; Juan bejtz Jacob; <sup>3</sup> Felipe; Bartolomé; Tomás; Mateo, ni najc colectoor; Jacob, xi'n Alfeo; Lebeo ni rniireni Tadeo; <sup>4</sup> Simón, te bejn ni yu' loj recananita; Judas Iscariote, nani bateed Jesús ladznaa rebejn nani rdxe'ch lojni.

*Baxhal Jesús rexpejnpacni gutie'chreni diidx*  
(Mr. 6:7-13; Lc. 9:1-6)

<sup>5</sup> Guitzubitio'p rebejnre baxhal Jesús. Baliidxnireni räjpni:

—Na'c cháätu nez cad yu' rebejn ni di gumbee Dios. Na'c jiu'tu lajdx reben samaritan. <sup>6</sup> Colchäxgaa lo rexpejn Israel nani agunijt nen dojl. <sup>7</sup> Colchäj, colzäbdiidx lo rebejn, colye'tz lojreni xcälrnibee Dios abidzungenaxh. <sup>8</sup> Colgusiaj ben racxhuu, colgusiaj tiejxh rebejn ni ral guejch tiejxhreni, colguspajn bengut. Colgurilaagw xprit bendxab lastoo rebejn. Ligaj cua'tu yälrnibee, ligajza colyejn dzuun.

<sup>9</sup> Räjzpni:

—Na'c chanätu oor, niclaza pla't, niclaza coobr nen xdojdälto, <sup>10</sup> niclaza gujxh na'c chanätu lo nejz. Na'cza chanätu tio'p xhajbtu, nicla gura'ch, nicla baston sa'csi bejn ni rujn dzuun nungäjł xca'ni xhi gauni.

<sup>11</sup> Räjzpni:

—Che guidzujntu xhitis te guedxro, xhitis te guedxbáz, colquiil te bensa'c. Rolijztisni coljia'n dxejli ni jiunejztu guejdxga. <sup>12</sup> Cheni jiu'tu nen yu', colnii xtidx Dios lo rebejn. <sup>13</sup> Palga najcreni bejn ni numbee Dios, sujia'n yälrbexilajz loj rebejn. Niluxh palga direni gac bensa'c, naaddireni xca'reni xtidx Dios, suguibi' yälrbexilajzga lojtu, coljiunejz ro'c. <sup>14</sup> Palga direni gusaan jiu'tu rolizreni, palga di rlajzreni gucuadiajreni xtiidxtu, dxej coljiunejz roliz bejn, o coljiunejz guejdxga, dxej colcuijb guxhuj ni'tu si'c te seen gulälazreni xtidx Dios. <sup>15</sup> Rniliápac lojtu, dxej ni gun Dios xcälguxhtisni, te yälguxhtisoru gun Dios rebejn, quela yälguxhtis ni gujc reben guedx Sodoma náj Gomorra.

*Yälrusacsí ni siääd*

<sup>16</sup> Räjzpni:

—¡Colhuiire! Narä suxhalä la'tu si'c xile' nez loj reloob, ni'cni colgacnasinduxh si'c najc te bäl, colyajcza nadolajz si'c te palom. <sup>17</sup> Colnatiro rebejn sa'csi suteedreni la'tu ladznaa rexcuxhtisreni, siguijnzareni la'tu nen xquidooreni. <sup>18</sup> Sinázareni la'tu nez loj regubier, nez loj rereii xcuent rextidxä, te gusule'tu xtidxä nez lojreni nájza nez loj rebejn nani di gumbee Dios. <sup>19</sup> Cheni chanäreni la'tu nez loj reguxhtis, na'c guntu xhigab xho guiniitu, niclaza guntu xhigab xhicha ni'c guiniitu, sa'csi lagajc Dios suniidx diidx



guiniitu orga. <sup>20</sup> Sa'csi et la'ditu ni guinii dxejc, Sprit xten Xtadtu Dios ni yu' nen lastootu, laani guinii nen lastootu.

<sup>21</sup> 'Luxh rebejn suteedreni lagajc bejtzreni ladznaa reni ju'treni. Redad suteedreni lagajc xi'nreni, rexi'n bejn sidxe'chzaren lo xcuzejnreni te ju't bejn xcuzejnreni.

<sup>22</sup> Guiraa rebejn guedxliuj sidxe'chreni lojtu xcuent xtidxä. Nani chanuu lo xtidxä dxej lultli, ni'c sujn gaan yäl'nabajn par tejpas. <sup>23</sup> Che guirinajlreni la'tu te gusacsireni la'tu nen te guejdx, colguxun ro'c, colchäj stee guejdx. Rniliä lojtu, ditu gun gaan tedtu guiraa reguejdx xten rexpejn Israel ansde jiäd Xi'n Dios ni gujc Niguii.

<sup>24</sup> 'Di te bejn ni casieedgaj benroru lo xmastrni, diza te mos gac benroru lo xlamni.

<sup>25</sup> Te bejn ni casieed, rsieedruni te gacni si'c najc xmastrni, sigajcza rujn mos, riuni xtidx xlamni te gacni si'c najc xlamni. Palga rbälajreni Beelzebú nani rnibee bendxab, ¿xho direni cuälajza Beelzebú rexi'nni, ä?

*Chuni'c nanab guidxejbni*

(Lc. 12:2-9)

<sup>26</sup> Räjpzani:

—Ni'cni na'c guidxejbtu rebejn, sa'csi anajntu xheti te cos ni niäuu lojni ni di guidzujn dxej guixal lojni, te fii chutis bejn lojni. Xhetiza te cos xhiga'tzdi ni di guidzujn dxej siejn diajg bejn xcuentni. <sup>27</sup> Diidx nani rniä lojtu guxhijn, colguiniini che nianij lo guedxliuj. Rediidx nani rniä chigaj rodiajgtu, colguiniini dip, jiaali colzuj, guredxa' te jiejni. <sup>28</sup> Na'c guidxejbtu renani rugu't bejn, sa'csi direni gun gaan ju'treni xaim bejn. Colguidxejbru nani rugu't tiexh bejn näjza xaim bejn nen gabijl.

<sup>29</sup> '¿La di bejn guto' tio'p manbáz ni rutajt por te centaab, ä? Luxh racbee Xtadnu ni yu' xhaguibaa che riajb tejni lo yuj. <sup>30</sup> Näjza rexquidxejclu nagab tebgajreni. <sup>31</sup> Ni'cni rniä na'c guidxejbtu; sajcrutu lo te chinaa manbáz ni rutajt.

*Renani rusule' xtidx Jesucrist nez loj rebejn*

(Lc. 12:8-9)

<sup>32</sup> Räjpzani:

—Chutis renani rusule' xtidxä nez loj rebejn, narä siniäza xcuentni nez loj xtadä ni yu' xhaguibaa. <sup>33</sup> Guiraa renani di gusule' xtidxä nez loj rebejn, sigajcza narä dina guiniä xcuentni nez loj xtadä ni yu' xhaguibaa.

*Rlia' Jesús sa' bejn*

(Lc. 12:51-53; 14:26-27)

<sup>34</sup> Räjpzani:

—Na'c guntu xhigab siädnaä yäl'rbedxilajz lo reben guedxliujre, xhet yäl'cuedxidi ni siädnaä, yäl'rdxagdijl siädnaä. <sup>35</sup> Narä siädnaä yäl'rdxagdijl te bi'n con xtadni; te dxa'p con xnanni; te gulijzni con xnansueegrni. <sup>36</sup> Ni'cni lagajc resa'tu ni yu' rolijztu sidxe'chreni lojtu.

<sup>37</sup> 'Nani sanälajzru xtadni, xnanni, luxh narä dini chanälajz, digacdi gacni xpenä; nani sanälajzru xingaanni o xindxa'pni, di gacdiza gacni xpenä. <sup>38</sup> Nani di guu xcrujzni, nalajznu tedni trabajw, jiädnajlni narä, di gacdi gacni xpenä. <sup>39</sup> Nani guidxäl xcäl'nabajnni lo guedxliujre, sunitni yäl'nabajn xhaguibaa. Luxh nani gunijt xcäl'nabajnni lo guedxliujre xcuent rextidxä, sidxälni yäl'nabansa'c xhaguibaa.

*Gaan nani xca'ni*

(Mr. 9:41)

<sup>40</sup> Räjpzani:

—Nani guniidx rolijzni jia'ntu, runiidxzani rolijzni jia'nä; luxh nani ruscuääz narä rolijzni, rolijzni ruscuääzzani Gueb Dios nani baxhal narä. <sup>41</sup> Nani guscuääz te niguii ni rnii xtidx Dios rolijzni sa'csi baxhal Dios niguiiga, sica'za bejnnga lagajc gaan ni xca' niguii ni rnii xtidx Dios. Nani guscuääz te beñsa'c rolijzni sa'csi beñsa'cni, sica'zani lagajc gaan

ni xca' bensa' cga. <sup>42</sup> Chutis nani gudeed mase te xhijgtis nis niäliuj xcuentä lo rebixue're, rniliápac lojtu, direni gunijt, sica'pacreni nani nungäj] xca'reni.

## 11

*Renani baxhal* Juan Bautist loj Jesús  
(Lc. 7:18-35)

<sup>1</sup> Che gulujx baluui Jesús rexpejn̄pacni xho gunreni dzuun, dxejcti biriini ro'c te saluiini, chasule'ni diidx lajdx rexpejn̄pacni.

<sup>2</sup> Juan yu' nen̄ latzguiib. Che biejn diajgni xhi cayujn Jesús, baxhal̄ni tio'p xpejn̄pacni <sup>3</sup> te huinabdiidxreni:

—¿La luj ni najc Crist ni jiääd, ä?, o ¿la silääznu chu stee bejn̄?

<sup>4</sup> Dxejcti badzu' Jesús diidxre räjpni:

—Colchäj, colye'tz loj Juan recos nani riejn diajgtu, näjza recos nani ruhuiitu. <sup>5</sup> Reni di fii, ruhuiireni; reni di sa, arsiajreni, reni ral̄ tiejxhni, abiajc tiejxhreni; reni di jien diajg, ariejn diajgreni; rebengut, ahüäjzreni, gubansacreni. Dxejcti loj rebejn̄ proob nani cabäjz xcäl̄racnäj Dios cagusule'reni xtidx Dios ni ruslaa bejn̄ nen̄ dojl̄. <sup>6</sup> Chicbaa renani di jieed narä.

<sup>7</sup> Cheni sii rebejn̄ga gusloj Jesús canii loj rebejn̄ xcuent Juan:

—¿Chuni'c huihuiitu nez loj reyubijdz? ¿La te biquii ni rusniib bej, ä? <sup>8</sup> ¿Xhini'c huihuiitu? ¿Te bejn̄ ni sucheduxh, ä? Ni najntu rebejn̄ nani sucheduxh rbäjzreni roliz rereii. <sup>9</sup> La'tu ¿xhicuent huijtu ro'c? ¿Te fiitu te niguii ni rnii xtidx Dios, ä? O'n. Rniliä lojtu, luxh dini gac bejntis ni rnii xtidx Dios; beñroruni. <sup>10</sup> Laa Juan nani rusä't ni bacuaa lo reguijtz cadro caj scree:

Narä suxhalä te niguii nani guinii xtidxä nez lojlu;

laani susucheeni nezyuj nezlojlu.

<sup>11</sup> Guliipac rniä, loj guiraa rexingaan xten gunaa, nicla tejni gajd guiricaj ni najc te bensacduxh loj Dios si'c ni najc Juan Bautist. Niluxh bejn̄ nani najc beñ huinru lo xcäl̄rnibee Dios xhaguibaa, bejn̄ga maazru sajcn̄i loj Juan.

<sup>12</sup> 'Cheni gucli dxej ni gusloj rusule' Juan Bautist diidx najli, yu'duxh reni rlanjpac jiu'reni lo xcäl̄rnibee Dios ni yu' xhaguibaa con yäl̄rdxe'ch, sas reni nadxecha' rlanjreni cuäxuuni xcäl̄rnibee Dios. <sup>13</sup> Guiraa reniguii ni gunni xtidx Dios näjza xleii Moisés, gunixgaareni recos ni churu gac, galooli hasta che biäädli Juan Bautist. <sup>14</sup> Palga rlanjztu chalilajztu, lagajc Juan najc Elías, niguii xten Dios nani bia'n diidx jiääd. <sup>15</sup> Nani sobdiajg diidx, gucua diajgni.

<sup>16</sup> ¿Xhicojn guntebloä rebejn̄ nani tre' naj, ä? Najcreni si'c najc rebixue' nani rguijtz nez lo guii cadro rdo', rbejdxreni lo sa'reni, <sup>17</sup> rniireni: “Biel̄nu bizej te guya'tu luxh ditu nuya'. Dxejcti biel̄nu redij ni nabaduxh luxh dizatu nioon.” <sup>18</sup> Sa'csi che biääd Juan dini niajw dizani niä', luxh räjp rebejn̄ najcni te xpejn̄ bendxab. <sup>19</sup> Dxejcti biälä narä, Xi'n Dios ni gujc Niguii, rauä, rä'ä dxejcti räjp rebejn̄: “Niguiire rauxha't, rätejzani bin, najcni xamigw rebendojl̄ näjza reniguii ni ruquijx xcuent reyuj ni rajx lo gubier.” Luxh loj rebejn̄ ni najc xpejn̄ Dios yuduxh xcäl̄najn̄ Dios, ni'cni baxhal̄ni guiro'p rebejn̄re.

*Reguejdx gualajz*  
(Lc. 10:13-15)

<sup>20</sup> Dxejcti gusloj Jesús gudil̄näjn̄i rebenguejdx cadro benduxhni remilaagwr, sa'csi naaddireni gusiechlajzreni xtoj̄lreni, sanuutis nabaj̄nreni nen̄ dojl̄. Dxejcti räjpni:

<sup>21</sup> —¿Gunatiru guedx Corazín! ¿Gunatiro guedx Betsaida! Paru nen̄ guedx Tiro näjza guedx Sidón niajc remilaagwr nani gujc guedx lajdxtu, cadxejli nusiejch lajzreni xtoj̄lreni, cadxejli niajcwreni nen̄ godx, nidäáb cobdäj yejceni. <sup>22</sup> Luxh rniä lojtu: che guidzuj̄n dxej ni gun Dios xcäl̄guxhtisni, sidejdrutu castiigw loj rebejn̄ ni guläjz guedx Tiro näjza guedx Sidón. <sup>23</sup> Luj guedx Capernaum di gunlu xhigab chäslu xhaguibaa; jiäjt nen̄ baa jiajblu, sa'csi paru nen̄ guedx Sodoma niajc sa' remilaagwr nani gujc

guedxlajdxlu, pet najli tresijc guejdxga. <sup>24</sup> Luxh rniä lojtu, dxej ni gun Dios xcälguxhtisni, trabajwduxhru tedtu loj rebejn Sodoma.

*Coltaa loä, te gusilajztu*  
(Lc. 10:21-22)

<sup>25</sup> Laa dxejcnj räjp Jesús:

—Rliä'pä xpala'nlu Xtadä, Dad xten xhaguibaa näjza guedxliuj, sa'csi bacua'tzlu recosre lo rebennajn, lo rebejn ni racbee, te baluiiluni loj rebennadolajz ni najc si'c biuxbäz. <sup>26</sup> O'n. Guliini, Xtadä, sa'csi rujnlu xhigab si'c najc hueen gacni.

<sup>27</sup> Guiraa recosre abaniidx Xtadä loä, rutru numbeedi xingaanni; xtadtisni rumbeeni. Rutruza numbeedi xtadni, xtebtis xingaanni, näjza loj renani gudeed xingaanni gumbee xtadni. <sup>28</sup> Coltaa loä guiraatu nani abadxajg, nani rsina', narä sunidxä yälrusilajz lojtu. <sup>29</sup> Colguisieed guntu dzuun si'cni ruluiätu. Colhuii xho runä, xho nacä nadolajz, dizana gacä bennayedxlajz nen lastoä, ni'cni sidxäl xaimtu yälrusilajz. <sup>30</sup> Sa'csi guyasi najc xtzunä ni ruluiätu, dizani gac naganduxh.

## 12

*Rutie' rexpejn Jesús triuu dxej ni rusilajzreni*  
(Mr. 2:23-28; Lc. 6:1-5)

<sup>1</sup> Che sasaj Jesús nez loj reyuj cadro naga' triuu, luxh dxejga najc dxej ni rusilajz rexpejn Israel, calaan rexpejnpacni, guslojreni calädxa'reni doj lo triuu te cayajwrenini.

<sup>2</sup> Che bahuii reben guidoo ni laa farisee, räjpreni loj Jesús:

—Ahuii xho rujn rexpejnpaclu dzuun nani di nungäjil gunreni dxej nani rusilajz bejn.

<sup>3</sup> Luxh laani räjpni lojreni:

—¿La gajdtu goļ xhi caj loj reguijtz xcuent ni bejn toDavid che gulannäjni rexpejnni, ä? <sup>4</sup> Biu'reni xquidoo Dios, gudajwreni yätxtiil nani di nungäjil gauni, nicla laani, niclaza rebejn nani sanäni, sa'csi yätxtiilga rebixhojztis rajwni. <sup>5</sup> O ¿la gajdtu goļ lo reguijtz xten leii cadro caj xcuent rebixhojz, ä? Laareni riu'reni nen reguidoo dxej ni rusilajz bejn, rujnreni xtzunreni niluxh xhet doļdi rujnreni. <sup>6</sup> Narä rniä lojtu, ree suga' tej nani sajcro loj guidooga. <sup>7</sup> Paru niacbeetu xhi säloj dee: “Yälrusilajz rlazä, xhet yälrejtdi guidxaa”, dıtu nucuaquij redee ni xhet bejndi. <sup>8</sup> Sa'csi narä Xi'n Dios ni gujc Niguii rnibeä dxej ni rusilajz rebejn.

*Niguii ni rxu'n naani*  
(Mr. 3:1-6; Lc. 6:6-11)

<sup>9</sup> Che birii Jesús ro'c, biu'ni te xquidobäzreni. <sup>10</sup> Ro'c suga' te bejn ni gubijdz te naani. Luxh sa'csi caguuilreni xho gucuaquijreni Jesús, gusloj canabdiidxreni lojni, räjpreni:

—¿La rusaan leii gusiajcnj beņracxhuu dxej ni rusilajz bejn, ä?

<sup>11</sup> Badzu' Jesús diidxre lojreni, räjpni:

—Chutejtu ni rajp te xiil niluxh palga guitejbni nen bisie che gal dxej ni rusilajz bejn, ¿xhixh dini cuää xiilga nen bisie, ä? <sup>12</sup> Sacduxhru te bejn loj te xiil, ni'cni susaan leii gun bejn dzunsa'c dxej nani rusilajz bejn.

<sup>13</sup> Dxejcti räjpni loj dade'ga:

—Baslii naalu.

Che basliinini, dxejc biajc naani, gujcnj tebloj si'c najc stelaad naani. <sup>14</sup> Dxejcti birii reben guidoo ni laa farisee, bachagsa'zarenı te bia'nreni diidx ju'treni Jesús.

*Diidx ni guniireni xcuent Jesús*

<sup>15</sup> Che gucbee Jesús xhi xhigab cayujnreni, biriini ro'c. Xhidajl bejn sanajlni, dxejc basiajc Jesús guiraa rebenracxhuu. <sup>16</sup> Dxejc räjpni lojreni:

—Na'cpac gäbreni chu najcni.

<sup>17</sup> Si'c gujc te gusojb diidx ni gunii Isafas ni gunii xtıdx Dios che räjpni:

<sup>18</sup> Deeni najc xmosä nani aguleä, laani sanälazä, laani rbanälazä, sudedä sprit xtenä lojni te gusule'ni yälguxhtis xtenä lo guedxliuj.

<sup>19</sup> Dini tilnäj bejn, dizani cuedxa';  
rudza jiejni diajgni xse'ni lad nezyuj.

<sup>20</sup> Dini qui'ch nicla te nijt ni cabiejc,  
dizani gusuii te duxiil ni cayujn guxh,  
dxejli che gunni gaan guinibeeni yälguxhtis.

<sup>21</sup> Lajtisni sustioob lastoo reben ni digac xpejn Israel.

*Rucuaquijreni Jesús rajpni yälrnibee xten bendxab*  
(Mr. 3:19-30; Lc. 11:14-23; 12:10)

<sup>22</sup> Dxejcti biädnäreni loj Jesús te bejn ni di fii, dizani guinii, yu' te bendxab lastooni.  
Dxejcti basiajc Jesúsni, te gujc guniini, te gujcaz bahuini. <sup>23</sup> Guiraa rebejn bidxelojreni,  
räjpreni:

—¿Xhaa laa Xi'n toDavidni, ä?

<sup>24</sup> Che biejn diajg reben guidoo ni laa farisee rediidxga, räjpreni:

—Bejnre rbää rebendxab con yälrnibee xten Beelzebú ni rnibee loj rebendxab.

<sup>25</sup> Che gucbee Jesús xhi xhigab cayujnreni, dxejc räjpreni:

—Guiraa yälrnibee nani rlia' sa'ni sinitloj; te guedxro sigajc te famil nani rlia' sa'reni,  
nani ridilnäj sa'reni, sinitlojreni. <sup>26</sup> Sigajca palga bendxab rbää sabendxabni, silia'  
sa'reni, dxejc ¿xho gac chanuu xcälrnibeereni? <sup>27</sup> Palga narä rbää rebendxab con  
yälrnibee xten Beelzebú, ¿chu xcälrnibee rajc rbää rexpejntu bendxab, ä? Ni'cni lagajc  
laareni suluiireni xhet laadi rujntu xhigab. <sup>28</sup> Palga narä rbää rebendxab con Xpirt xten  
Dios, guliipacni abidzujn xcälrnibee Dios lojtu.

<sup>29</sup> 'Bahuilaare. ¿Xho gac jiu' te bejn cuan rolijz te bendaan, xho gac cuanni xhixten  
bejnga, palga dini gulibxgaani bendaanga? Che abiliib bejnga, sajc cuanni rehxixten  
bejnga.

<sup>30</sup> 'Nani xhet yu'di xladä, rdxe'chni loä. Nani di jädnajl narä, rutie'chni reni siädnajl  
narä.

<sup>31</sup> 'Ni'cni rniä guira'ti dojl, guira'ti yälrusguee xte bejn sajc gusiäj] lajzni xtebtis  
yälrniyaj Sprit Dxiän xten Dios di Dios gusiäj] lajzni. <sup>32</sup> Chutis ni guinii xhi te diidx  
yälrniyaj Xi'n Dios ni gujc Niguii sajc gusiäj] lajzni, luxh chutis ni guiniyaj Sprit Dxiän  
xten Dios, di Dios gusiäj] lajzni, nicla lo guedxliujre, niclaza xhaguibaa.

*Sajc gumbeetu bejn xcuent diidx ni rniireni*  
(Lc. 6:43-45)

<sup>33</sup> 'Palga nasa'c te yajg sicaj ninexhsa'c lojni, per che di yajg gac yagsa'c, xho xcaj  
ninexhsa'c lojni. Ni'cni huenliisi siembeetu te yajg che fiitu xho najc ninejxh ni rcaj lojni.

<sup>34</sup> Sa' la'tu benguijdx ni najc si'c te bäl niälásduxh, ¿xho gac guiniitu te didxsa'c?, ni ro'  
bejn rniitis rexhigab ni yu' nen lastoo bejn. <sup>35</sup> Te bensa'c rniini didxsa'c, sa'csi ganax  
xhigabsa'c yu' nen lastooni, te benguijdx rniitisni cosguijdx sa'csi ganax xhigabguijdx  
yu' nen lastooni. <sup>36</sup> Narä rniäza, guiraa redidxguijdx nani rni bejn sudeedreni cuent lo  
Dios cheni gunni yälguxhtis, <sup>37</sup> sa'csi lagajc rextiidxlu sujn guinii Dios najclu bensa'c,  
lagajc rextiidxlu sujn gunijtlu lo Dios.

*Rebenguijdx rniab te milagwr si'c te seen*  
(Mr. 8:12; Lc. 11:29-32)

<sup>38</sup> Dxejcti rebejn ni ruluii xleii toMoisés näjza reben guidoo ni laa farisee, räjpreni loj  
Jesús:

—Mastr, nuurnu rlajznu guihuiinu te seen; bejn te milagwr te fiinuni.

<sup>39</sup> Badzu' Jesús diidxre, räjpreni:

—Rebenguijdx ni rusguee rniab te seen, niluxh xhetru seendi fiireni xseentis Jonás,  
dade' ni gunii xtidx Dios. <sup>40</sup> Sa'csi lagajc si'cni guyu' Jonás xque' te bälro chon dxej,  
chon yääl, si'cza chu Xi'n Dios ni gujc Niguii nen lastoo guedxliuj chon dxej, chonza  
yääl. <sup>41</sup> Cheni gac yälguxhtis xten Dios pet sistie rebejn ni siääd Nínive te fiireni gac  
yälguxhtis rebejn ni tre' lo guedxliuj naj, niluxh säjb rebejn Nínive abanijt rebejnre sa'csi

reben Nínive basiejch lajzreni, bia xtojłreni che basule' Jonás xtidx Dios lojreni. Luxh nani yu' lojtu naj, sacduxhruni loj Jonás. <sup>42</sup> Nájza rein xten reben sur sistieni te fiini gac yálguxhtis rebejn ni tre' lo guedxliujre naj, niluxh nájzani sájbn abanijtreni. Sa'csi laani zitduxh biriini te biádcuadiajgni reyálnajn xten Salomón, luxh nani yu' lojtu naj nanduxhruni loj Salomón.

*Te spritdxuudx ni rbisac*

(Lc. 11:24-26)

<sup>43</sup> Rájpzani:

—Cheni rii te spritdxab nen lastoo te bejn, ricanzajni nez lo reyubijdz, ritiilni cadro gusilajzni, per cad rdxáldini. <sup>44</sup> Dxejcti rujnni xhigab, naani, guibisacá cadro biriá. Cheni rbisacni ro'c, rdzujnni si'c rdzujn te bejn nen te yu' ni naya nenni, naliobsa'cni, sucheeni, luxh rut rbájzdi ro'c. <sup>45</sup> Dxejcti rijni, rixiini sgajdz sprit nani najc nadxuudxru lojni te jiádláznájrenini nen lastoo bejnga. Dxejcti rxhinduxhru bejnga lojni gujcn galoo. Sigajcza gac rebejn ni tre' lo guedxliujre naj.

*Xnan Jesús con rebejtzni*

(Mr. 3:31-35; Lc. 8:19-21)

<sup>46</sup> Lał ni caninájni rebejn, bidzujn xnanni con rebejtzni, suga'reni rolä' rlajzreni guiniireni lojni. <sup>47</sup> Dxejcti biáád tej ni rájp loj Jesús:

—Xnanlu nájza rebejtzlu suga' rolä' rlajzreni guininájreni luj.

<sup>48</sup> Laani badzu'ni diidx lo bejnga rájpn:

—¿Chuni'c najc xnanä? ¿Chuni'c najc rebetzä?

<sup>49</sup> Dxejcti basgaani naani nez loj rexpejnpacni, rájpn:

—¿Redee najc xnanä redeeza najc rebetzä! <sup>50</sup> Chutis nani rujn si'cni rnibee Xtaďä ni yu' xhaguibaa ni'c najc betzä, ni'c najc bisianä, ni'cza najc xnanä.

## 13

*Xcuent bejn nani rbe'c binij*

(Mr. 4:1-9; Lc. 8:4-8)

<sup>1</sup> Lagajc dxejga birii Jesús royu'ga, huicuene nez ro' nisdoo. <sup>2</sup> Xhidalduxh bejn bire' cadro suga'ni, sas biu'ni nen te barcw, ro'c gurejni. Dxejcti rebejn gurej nez lo plaii.

<sup>3</sup> Dxejc gusloj cagului Jesús con recuent, rájpn:

—Colcuadiajg. Birii te dade' ni rbe'c binij te cue'cni binij. <sup>4</sup> Lał ni cabe'cni binij yu' binij ni bitejb gajxh nez ro' nesuij, biáád remane' ni rutajt, sas gudajwreni binijga. <sup>5</sup> Yu' binij ni bitejb nez nen reguij cadro guxii yu' yuj. Gulengajc binijga sa'csi direni nibej jiät nen yuj. <sup>6</sup> Che birii gubijdx, bigolreni sa'csi xhetiza xlobaani, dxejc gubijdzni. <sup>7</sup> Yu'za binij ni bitejb nen reguejch. Che guroob reguejchga, dini nusaan niroob regájle', gubijdzitireni. <sup>8</sup> Guyu' binij ni gurej lo reyusa'c, ro'c gucduxhni. Yu' binij cuaj te gayuu, yu'za binij cuaj gayojnni, yu'za ni cuaj galbitzuuni loj cade tej binij ni gurej. <sup>9</sup> Nani rsobdiajg diidx gucuadiajgni diidxre.

*Xhi pajr najc recuent xten Jesús*

(Mr. 4:10-12; Lc. 8:9-10)

<sup>10</sup> Dxejcti gubig rexpejnpacni, gunabdiidx lojni, rájpreni:

—¿Xhicuent rusule'lu diidx loj rebejn con recuent?

<sup>11</sup> Dxejcti badzu' Jesús diidx rájpn lojreni:

—Sacnáj Dios la'tu te gabeetu recos xhiga'tz xten xcälrnibee Dios xhaguibaa, luxh laareni digacdi gabeerenini. <sup>12</sup> Chutis ni arajp yálracbee, sica'runi te gapruni yálracbee. Sas nani guxii rájp yálracbee, guiraa yálracbee ni rájpn sibicaj. <sup>13</sup> Ni'cni rniä lojreni con recuent sa'csi mase cadxelojreni, direni fii, mase cacuadiajgreni di diajgreni jiejn, xhet racbeedireni. <sup>14</sup> Laareni najcreni si'c te soob diidx ni gunii Isaías, dade' ni gunii xtidx Dios, che rájpn:

Siejn diajgpactu, niluxh xhetliidi gabeetu,

sidxelojfactu, niluxh ditu fii.

<sup>15</sup> Sa'csi guyalajz rebejnre, lastooreni najc si'c te guij, di diajgreni jiejn, luxh niäuzä balojreni, didi fisa'creni con balojreni, didi jiejnza diajgreni, didi gacbeeza lastooreni, didi gusiejch lajzreni guibi'reni loä te gusiaca lastooreni.

<sup>16</sup> 'La'tu colguibalaznäj balojtu sa'csi rhuisa'ctu, riensa'cza diajgtu. <sup>17</sup> Rniliápac, xhidajl redade' ni gunii xtidx Dios, näjza xhidajl bensa'c rlazduxh nuhüii sa' recos ni cahüitu, luxh direni nuhüini, rlaizreni niejn diajgreni sa' rediidx nani cayejn diajgtu, luxh di diajgreni niejnüni.

*Rusule' Jesús xcuent bejn ni rbe'c binij*  
(Mr. 4:13-20; Lc. 8:11-15)

<sup>18</sup> 'Colcuadiajg xhi säloj xcuent bejn nani rbe'c binij. <sup>19</sup> Rebejn nani rucuadiajg diidx xten xcälrnibee Dios, niluxh direni gacbeeni, najcreni si'c najc binij nani bitejb nez ro' nesuyj; riääd bendxab rudzucajni rediidx nani biu' nen lastooni. <sup>20</sup> Rebinij nani bitejb nez nen reguij, najc si'c rebejn nani rucuadiajg diidx, gustli rca'reni diidxga, <sup>21</sup> luxh guxii yu' xlobaani, direni sutijp. Che rdejdröni trabajw, che rdxe'ch bejn lojreni, sa'csi rucuadiajgreni xtidx Dios, rusiejch lajzreni, rbälazni diidxga. <sup>22</sup> Rebinij nani gurej nen reyaguejch säloj rebejn nani rucuadiajg rextidx Dios rujnröreni te gunreni dzuun te ga'preni yäl'nasa'c ni yu' lo guedxliujre. Dxejcti rexcäl'nasa'c xten guedxliujre rusgueereni. Guiraa recosre rutau lo xtidx Dios nen lastoo rebejnre, dini gusaan gac te cosechsa'c nen lastoo rebejnre. <sup>23</sup> Dxejc rebinij nani rtejb lo reyusa'c, ni'c najc si'c rebejn nani rucuadiajg xtidx Dios, nani racbee diidxga, nani rutie'ru sa'reni te racxhidajlreni. Yu' bejn ni najc si'c binij ni gujc te gayuu; yu' bejn ni najc si'c binij ni gujc gayojn; yu'za bejn ni najc si'c binij ni gujc galbitzuu.

*Xcuent triuu cadro guyu' cuanguejch*

<sup>24</sup> Dxejc bij Jesús stee cuent, räjpni:

—Xcälrnibee Dios xhaguibaa najc si'c te bejn nani gule'c ganax triusa'c lo xyujni. <sup>25</sup> La<sub>l</sub> nagaguejs bejn<sub>ga</sub>, biääd te bejn nani rdxe'ch lajz loj xpaxhuaan binijga, biädle'cni bedz cuanguejch lo xtriuu bejn<sub>ga</sub>, dxejcti sääni. <sup>26</sup> Cheni gulejn triuuga, birii doj lojni, dxejc biricaj näjza cuanguejch ro'c. <sup>27</sup> Dxejcti räjp remos lo xlamreni; “Dad, ¿la et ganax triusa'c di gule'clu, ä? ¿Caxh bazaj cuanguejchre?” <sup>28</sup> Räjp xlamreni: “Te bejn ni rdxechlajz loä biädle'cchani.” Dxejcti gunabdiidx rexmosni räjpreni: “¿La rlaiz guejblu cholädxanu recuanguejchga, ä?” <sup>29</sup> Dxejc räjp xlamreni: “Na'c, sa'csi che guiliäädxtu cuanguejchga, nägajcza triuu guiliäädxtu. <sup>30</sup> Colsaan tioobreni tebloj. Che guire' cose'ch, dxejc guinibeä remos gutiexgaareni cuanguejch, guliibrenini gacni ters, dxejcti checni. Dxejcti sajc gutie'reni triuu chucheeni nen yu'.”

*Xcuent bedz muxhtas*  
(Mr. 4:30-32; Lc. 13:18-19)

<sup>31</sup> Bijza Jesús stee cuent räjpni:

—Xcälrnibee Dios xhaguibaa najcni si'c te bedz muxhtas nani cue'c te bejn lo xyujni. <sup>32</sup> Gulii bejdzga najc bäze'ru loj guiraa rebejdz, per che roob yajgga, rajcni guroobru loj guiralii recuaan, rajcni te yagro, luxh riääd remane' ni rutajt riädyujn xpitiäazreni lo xajcw yajgga.

*Xcuent levaduur*  
(Lc. 13:20-21)

<sup>33</sup> Bijzani stee cuentre, räjpni:

—Xcälrnibee Dios xhaguibaa najc si'c levaduur nani rugu'ch te gunaa lo chon mediid arin, dxejc ni'c rusaguijni guideb cojbga.



*Xhicuent baluii Jesús ganaxtis con cuent  
(Mr. 4:33-34)*

<sup>34</sup> Baluii Jesús guiraa rebejn ganaxtis con recuent, xhetiru stee mood nuluiini, ganaxtis con cuent guniini lojreni. <sup>35</sup> Si'c bejnni te guzobj xtidx dade' ni gunii xtidx Dios che bacuaani lo reguijtz, räjpni:  
Suiyä diidx con recuent,  
suiyä diidx xcuent recos ni naga'tz che bencheeli Dios guedxliuj.

*Rusule' Jesús xcuent cuanguejch nen triuu*

<sup>36</sup> Dxejcti basadiidx Jesús rebejn, biu'tini nen yu' cadre bire' rexpejn pacni lojni, räjpreni lojni:

—Basule' loonu xcuent cuanguejch ni guyu' loniaa.

<sup>37</sup> Räjp Jesús lojreni:

—Bejn nani rbe'c retriusa'c, najc Xi'n Dios ni gujc Niguii; <sup>38</sup> loniaaga najc guedxliuj; retriusa'c najc rebejn nani najc xpejn Dios, nani rucuadaiajg xtiidxni; recuanguejchga najc rebejn ni najc xpejn bendxab. <sup>39</sup> Bejn nani rdxe'ch lajz najc lagajc bendxab. Cose'ch säloj che nitloj guedxliuj; reni gutie' cose'ch najc rexangl Dios. <sup>40</sup> Sigacni guire' recuanguejch te chääni lo guiboo te checni, sigajcza gac che gac fis guedxliuj. <sup>41</sup> Xi'n Dios ni gujc Niguii suxhał rexangl ni te jädgutie'reni, te jädlääreni lo xcälrnibeeni guiraa renani rujn riajb bejn nen dojl, näjza reni rujn cosguijdx. <sup>42</sup> Susälreni rebejn ga nen te or cadre cayecduxh. Ro'c sonduxhreni, sauya'reni läjyreni. <sup>43</sup> Dxejcti rebej sa'c sidimbicha'reni si'c gubijdx lo xcälrnibee Xtadreni. Palga sobdiajgtu, colgucuadaigsa'c.

*Te cossacduxh ni naga'tz*

<sup>44</sup> Räjzpzeni:

—Si'cza xcälrnibee Dios xhaguibaa najc si'c te cossacduxh ni naga'tz lo te yuj loniaa. Bidxäl te dade'ni, luxh bacuatzsacnini. Dxejcti rbalajzni, huijni, huito'ni guiraa xhixtenni te rajpni meel siini yujga.

*Perl nani sacduxh*

<sup>45</sup> Räjzpzeni:

—Xcälrnibee Dios xhaguibaa najcza si'c najc te dad rapduxh nani caguiil perlsa'c te siini. <sup>46</sup> Che bidxäl ni te perlsa'c, tejni sacduxh, bato'ni guiraa xhixtenni te gusiini perlga.

*Guijxh ni rniaaz bäjl*

<sup>47</sup> Räjzpzeni:

—Xcälrnibee Dios xhaguibaa najcza si'c te guiijxh ni rusäl bejn lo nis te rniaazreni guiraloj cuaa bäjl. <sup>48</sup> Cheni agudxajni, rbäärenini nez ro' nisdoo, te ro'c rbereni loj rebäjl. Rebäjl ni najc hueen rucheeni nen te dxijm; nani di gac hueen rusälrenini te laad. <sup>49</sup> Si'cza gac che gac fis guedxliuj; sirii rexangl Dios te sudzucajreni rebenguijdx lo rebensa'c. <sup>50</sup> Dxejcti susälreni rebenguijdx nen te or cadre cayecduxh; ro'c sonduxhreni, sauya'reni läjyreni.

*Te ben rajp*

<sup>51</sup> Dxejcti gunabdiidx Jesús lojreni, räjpni:

—¿La racbeetu guiraa ni cania lojtu, ä?

Dxejcti räjpreni:

—O', racbeenuni Dad.

<sup>52</sup> Dxejcti räjpni lojreni:

—Cheni rsieed te bejn nani najn leii xcuent yälrnibee xten Dios xhaguibaa, najcni si'c te lam nani rajc rbää lo rexcäl nasa'cni recos ni nacoob, näjza recos bieju.

*Jesús lo guedx Nazare't*

*(Mr. 6:1-6; Lc. 4:16-30)*

<sup>53</sup> Che gulujx basule'ni recuentre, biriini ro'c, sääni. <sup>54</sup> Huijni lagajc lajdxni. Ro'c gusloj caguluiini nen xquidobäzreni ro'c. Dxejcti rdxeloduxh reben ro'c, räjpreni:

—¿Caro bisieedni reyäl'najre? ¿Xho rajc rujnni remilagwr? <sup>55</sup> ¿La et laadi dee ni najc xi'n carpinteer, ä? ¿La et Mariidi najc xnanni? Dee ni najc bejtz Jacobo, José, Simón con Judas. <sup>56</sup> Luxh rebisiajnni rbäjzreni lo guejdxre. ¿Cacharo bisieedni guiraa nani caguluini?

<sup>57</sup> Dxejcti cayujnreni xhigab chugan la guliini, dxejc räjp Jesús lojreni:

—Guiraa rebejn rinälajz te niguii nani rnii xtidx Dios, biädla reben lajdxpacni direni jiu xtiidxni.

<sup>58</sup> Ni'c dini niujn xhidal milagwr ro'c sa'csi direni chalilajz xtiidxni.

## 14

### *Che gujt Juan Bautist*

(Mr. 6:14-29; Lc. 9:7-9)

<sup>1</sup> Lagajc neñ redxejga Herodes, ni laaza tetarcarca, biejn diajgni diidx xcuent ni cayujn Jesús. <sup>2</sup> Dxejc räjpni lo rexmosni:

—Dee najc Juan Bautist. Pet agubansacni lo rebengut, ni'cni rajpni yäl'nibee te rujnni remilagwr.

<sup>3</sup> Si'c gunii Herodes sa'csi laani basäuuni Juan neñ latzguiib. Niluxh gunibeeni biliibni con caden neñ latzguiib xcuent Herodías, ni gujc chää bejtzni Felipe. <sup>4</sup> Bidxe'chni sa'csi räjp Juan lo Herodes:

—Et laadi rujnlu rbäznäjlu chää bejtzlu.

<sup>5</sup> Rlajz Herodes nugu'tni Juan, luxh rdxejbni rebenguejdx, sa'csi guiraareni rniireni Juan najc te niguii ni rnii xtidx Dios. <sup>6</sup> Dxejc che gojl laj Herodes gujc lanij, birii xindxa'p Herodías te baya'ni nez loj regolnejdx. Luxh sa'csi bidxaglazduxh Herodes baya'ni, <sup>7</sup> räjpni loj gunaaga:

—Gunab xhitis ni rlajzlu, sa'csi gudix lazä gunidxä ni guiniabtislu.

<sup>8</sup> Dxejcti gunaaga, abalijdx xnannini, räjpni lo Herodes:

—Loj te platón baniidx bitiujejc Juan Bautist.

<sup>9</sup> Diidxga benhuin lastoo reii Herodes, per sa'csi abia'n diidx, niluxh abiejn diajg rebejn, gunibeeni gudeedreni nani guiniab gunaaga. <sup>10</sup> Dxejcti gunibeeni biru' yejc Juan Bautist neñ latzguiib. <sup>11</sup> Sas biäd'näreni yejcn lo te platón, badeedrenini loj gunaaga. Dxejcti gunaaga badeednini lo xnanni.

<sup>12</sup> Dxejcti bidzujn rexpejn Juan sanäreni togoolga te huicua'tzrenini. Dxejcru huisa'nreni diidx loj Jesús.

### *Bayaan Jesús gaii mil bejn*

(Mr. 6:30-44; Lc. 9:10-17; Jn. 6:1-14)

<sup>13</sup> Che biejn diajg Jesús xhi guzajc Juan, xtebni huä'pni neñ te barcw huijni stee laad nez lo reyubijdz. Che gucbee rebejn caro sääni, huinajlreni Jesús lo yuj. Guiraa neñ reguejdxga biriireni. <sup>14</sup> Che birii Jesús neñ barcw, bahuiini loj xhidalduxh bejn, dxejc balazlajznireni, basiajcn rebejn nani racxhuu. <sup>15</sup> Cheni acayu' guxhijn, gubig rexpejnpacni lojni räjpreni:

—Rut rbäjzdi nez lo reyubijdzre, niluxh agudxej naj. Basadiidx rebejn te jiireni nez rerench te chasiireni xhi gaureni.

<sup>16</sup> Räjp Jesús:

—Xhicuent jiireni. La'tu colgudeed xhi gaureni.

<sup>17</sup> Dxejcti räjpreni:

—Xhetru rajpdinu ree. Gaiitis yätxtiil näjza tio'p bäj rajpnu.

<sup>18</sup> Laani räjpni:

—Coltanäni ree.

<sup>19</sup> Dxejcti gunibeeni gurej rebejn lo guixa'. Dxejcti cua'ni guigaii yätxtiil näjza guiro'p bäj, guläsni lojni xhaguibaa, badeedni xquixhtios lo Dios, dxejcti gula'ni reyätxtiil. Badeednini loj rexpejnpacni. Dxejcti rexpejnpacni gudisrenini loj reben xhidajl. <sup>20</sup> Guiraareni gudajw, gudxaj xque'reni. Dxejcti batie'reni yätxtiilbiujy nani



bia'n. Si'cti tzubitio'p dxijm gudxajni. <sup>21</sup> Renani gudajw najcreni si'cti gaii miḷ niguii, xhet näjdi regunaa niclaza rebiuux bigab.

*Gusaj Jesús lo nisdoo*

(Mr. 6:45-52; Jn. 6:16-21)

<sup>22</sup> Sas gunibee Jesús biu' rexpejn̄pacni neḅ barcw te ganidreni tedreni stee lad nis laḅni casadiidxni rebejn̄. <sup>23</sup> Che gulujx basadiidxni rebejn̄, huä'p Jesús yecdajn te xtebni guninäjni Dios Xtadni. Che gojl guxhijn̄, ro'c sugaxteb Jesús. <sup>24</sup> Luxh barcw galäii lo nis sasaj. Cagusnibduxh reol̄ barcw, liriääzni lo nis sa'csi cabi' beduxh cadre sääreni. <sup>25</sup> Rsildooru gubig Jesús, bidzuj̄nni lojreni, siädsajni lo nisdoo. <sup>26</sup> Che bahuii rexpejn̄pacni siädsajni lo nisdoo, bidxejbreni, räjpreni:

—Col̄huii te fantasmni —guredxa'reni sa'csi bidxebduxhreni.

<sup>27</sup> Dxejc gunii Jesús lojreni, räjpni:

—Na'c guidxejbtu, laa naräni; col̄sutijp lastootu.

<sup>28</sup> Dxejcti gunii Pedr lojni, räjpni:

—Dad, palga lujni, gunibee jiälä lojlu nez lo nisre.

<sup>29</sup> Räjp Jesús:

—Gudaa pues.

Dxejcti birii Pedr neḅ barcw gusajni lo nis te sääni nez loj Jesús. <sup>30</sup> Che bahuii Pedr beduxh ni cabi', bidxejbni, dxejc gusloj cayääzni neḅ nisdoo. Guredxa'ni, räjpni:

—Dad, j̄gulää narä!

<sup>31</sup> Lagajc dxejc gunaaz Jesús naani, räjpni loj Pedr:

—Guxii rajplu yäl̄rililajz. ¿Xhicuent guctio'p lajzlu?

<sup>32</sup> Che huä'preni neḅ barcw, guläzgjajc bej. <sup>33</sup> Dxejcti renani sää neḅ barcw bazuxhibreni nez loj Jesús räjpreni:

—Guliipacni najclu Xi'n Dios.

*Basiajc Jesús reben̄ racxhuu guedx Genesare't*

(Mr. 6:53-56)

<sup>34</sup> Che gudejdreni lo nis, bidzuj̄nni nez lo reyuj xten Genesare't. <sup>35</sup> Che biembee reben̄ ro'cni, batie'chreni diidx guideb gabi lajdxreni. Dxejcti biädnäreni guiraa reben̄ racxhuu lojni. <sup>36</sup> Gunabduxhreni gusaanni can̄reni ro' xhajbtisni. Dxejcti guiraa renani gudajn xhajbni, biajcreni.

## 15

*Nani ruxhin̄ bejn̄*

(Mr. 7:1-23)

<sup>1</sup> Dxejcti gubig gaii rebejn̄ nani ruluii leii näjza rebejn̄ guidoo ni laa farisee. Siädreni guedx Jerusalén, räjpreni loj Jesús:

<sup>2</sup> —¿Xhicuent di rexpejn̄paclu jiu xcostrumbr rebengool? ¿Xhicuent direni gusoob yäl̄rdiib̄ naareni che rajwreni?

<sup>3</sup> Badzu'ni diidx, räjpni:

—¿Xhicuent di la'tu gusoobzatu xtidx Dios? Dee alga riurutu rexcostumbrtu. <sup>4</sup> Dios gunibeeni xho guntu che räjpni: “Gojp xpala'n xtadlu, xnanlu”, näjza “Nani guiniyaj lo xtadni o loj xnanni, suguetni.” <sup>5</sup> Luxh la'tu rniitu saj̄c gäb chutis bejn̄ loj xtadni o loj xnanni: “Digacdi gacnäätu sa'csi guiraa ni rapä abadedäni lo Dios.” <sup>6</sup> Luxh chutis ni guinii si'c, xhetru nanabdi gacnäjni xtadni o xnani. Si'c ni cabälaztu rextidx Dios te gac chanuutu rexcostumbrtu. <sup>7</sup> j̄Bejn̄ ni rusguee najctu! Laaca gunii Isaías, bejn̄ nani gunii xtidx Dios xcuenttu cheni räjpni:

<sup>8</sup> Reben̄guejdxre con ro'reni rliä'preni xpala'nä niluxh lastooreni zijt suga' nez loä.

<sup>9</sup> Xlia'si raj̄nni narä, sa'csi ruluiireni si'c xtidxä reyäl̄rnibee xten reben̄ guedxliuj.

<sup>10</sup> Dxejcti gurejdxni rebejn̄, räjpni lojreni:

—Colcuadiajg, colyabee. <sup>11</sup> Nani riu' ro' bejn di guxhin bejn̄ga, sanga nani rii ro' bejn̄ga ni'cni ruxhin bejn̄ga.

<sup>12</sup> Dxejcti rexpejn̄pacni gubig lojni, räjpreni:

—¿La najnlu bidxe'ch rebejn̄ farisee che biejn diajgreni diidx ni guniilu?

<sup>13</sup> Dxejc laani räjpni:

—Xhitis yajg nani di Xtadä ni yu' xhaguibaa nusuj siliädx'a'ni guideb xlobaani.

<sup>14</sup> Colgusaanreni; lotiä'preni, ruluiireni nezyuj lo salotiä'preni. Luxh palga te ben lotiä'p guluii canejz chää stee lotiä'p, guiro'preni sitejbreni nen te gueed.

<sup>15</sup> Räjp Pedr loj Jesús:

—Basule' cuentre loonu.

<sup>16</sup> Räjp Jesús:

—¿La näjza la'tu ditu gacbee, ä? <sup>17</sup> ¿La ditu gacbee guiraa ni rajw bejn ru' xque'ni, dxejcti che rdejdn̄i xque'ni, abigo'n̄ni? <sup>18</sup> Niluxh diidx nani rii ro' bejn, nen lastoo bejn r̄iini; dee ni ruxhin bejn. <sup>19</sup> Sa'csi nen lastoo bejn rii rexhigabguijdx xten rebejn̄ ni rugu't sa'ni; xten rebejn̄ ni rusguee gunaa; xten rebejn̄ ni rusguee chää sa'ni; xten rebejn̄ ni rbajn; xten rebejn̄ ni rnii didxxhii lo sa'ni; xtenza rebejn̄ ni rutijl sa'ni. <sup>20</sup> Laa sa' recosre ni ruxhin bejn. Che dini gusoob recostumbr xte yälrdiib naani, di ni'c guxhin bejn.

*Te gunazit nani huililajz xtidx Jesús*

(Mr. 7:24-30)

<sup>21</sup> Biriiti Jesús ro'c, sääni nez región xten Tiro näjza Sidón. <sup>22</sup> Nejzga rbäjz te gunaa cananee, cabedxa'ni biädni lo Jesús, räjpni:

—Dad, xi'n toDavid, balaslajz narä. Xindxa'pä yu' xpej bendxab lastooni, niluxh cagusacsíduxhn̄ni.

<sup>23</sup> Xhet räjpdi Jesús lojni. Dxejcti biädnduxh rexpejn̄pacni lojni, räjpreni:

—Barilaagw gunaare, didi rbedxa'ni siädnajl̄ni luj.

<sup>24</sup> Dxejcti räjp Jesús lojni:

—Dios baxhal narä lojtis xpen̄ Israel nani agunij̄t nen̄ dojl̄.

<sup>25</sup> Dxejcti gubig gunaaga, bazuxhijbni nez loj Jesús, räjpni:

—Dad, gucnäj narä.

<sup>26</sup> Dxejc räjp Jesús lojni:

—Di gac hueen xca' bejn̄ xcuxtiil rexi'n̄ni gusäl̄nini lo rebä'cw.

<sup>27</sup> Dxejc räjp gunaaga lojni:

—Guliini Dad, näjza rebä'cw rajw te la' yätxtiil ni rtejb lo mex xten xpaxhuaanni.

<sup>28</sup> Dxejcti räjp Jesús lojni:

—Nane', lacti guroob najc xcäl̄rililajzlu. Sugac si'cni rlajzlu.

Lagajc dxejc bñajc xindxa'pni.

*Basiajc Jesús xhidal ben racxhuu*

<sup>29</sup> Birii Jesús ro'c gudejdn̄i nez ro' nisdoo ni laa Galilee. Huäpgajcni yejc te dajn, ro'c gurejni. <sup>30</sup> Xhidajl bejn̄ bidzuj̄n cad sobga'ni. Siädnäreni reben̄ ni rajc ni'ni, reben̄ ni najc lotiä'p, reben̄ gop, reben̄ ni xheti naani, näjza xhidaltro ben̄ racxhuu, bidzun̄näjreni nez loj Jesús. Dxejcti basiajcn̄ireni. <sup>31</sup> Ni'cni lacti bidxeloduxh reben̄ xhidajlga che bahuiireni rnii regop, riajc reni xheti naani, rsiaj reni rajc ni'ni, ruhuii relotiä'p, dxejc rliä'preni xpala'n Xtios rexpen̄ Israel.

*Badeed Jesús xhi gudajw tajp mil bejn*

(Mr. 8:1-10)

<sup>32</sup> Gurejdx Jesús rexpejn̄pacni räjpni lojreni:

—Riaä rebejn̄re sa'csi agujc chon̄ dxej yunäjreni narä luxh xhet ca'direni gaureni. Di rlazä guxhaläreni jiireni rolizreni palga gajdreni gau didi guidxajgreni lo nezyuj.

<sup>33</sup> Dxejcti räjp rexpejn̄pacni lojni:

—¿Xho guidxäl̄nu xhi gau reben̄ xhidajlre nez lo reyubijzre cadre rut rbäjzdi, ä?

<sup>34</sup> Räjp Jesús lojreni:

—¿Bal yätxtiil ca'tu?

Räjpreni:

—Gajdztisni, näjza gaii bälbäze'.

<sup>35</sup> Sas gunibee Jesús cue rebejn lo yuj. <sup>36</sup> Dxejc cua' Jesús guigajdz yätxtiilga näjza rebäjl, badeedni xquixtios lo Dios dxejc gula'ni reyätxtiilga näjza rebäjlga badeednireni loj rexpejn<sub>pacni</sub>. Dxejcti laareni gudisreni yätxtiilga con rebäjlga lo rebejn xhidajlga. <sup>37</sup> Guiraareni gudajw, gudxaj xque'reni. Che gulujx gudajwreni, batie'reni reyätxtiil ni bia'nga, gudxaj gajdz dxijmni. <sup>38</sup> Renani gudajwga najc si'cti tajp mil bejn, niluxh xhet näjdi regunaa niclaza rebiuux bigab. <sup>39</sup> Dxejcti basadiidx Jesús rebejn, biu'tini nen barcw te gudejdni lo nisdoo nez región xten Magdala.

## 16

*Reben* guidoo ni laa farisee näjza saducee rniabreni te milagwr si'c te seen

(Mr. 8:11-13; Lc. 12:54-56)

<sup>1</sup> Refarisee näjza resaducee bidzuj<sub>reni</sub> lo Jesús, gunabreni gunni te milagwr, gudeedni te seen ni rien xhaguibaali. Niluxh cagusguesireni, sa'csi rlajzreni guiga' Jesús. <sup>2</sup> Dxejc badzu' Jesús diidxre räjpni lojreni:

—Che rajl gudxaj, rniitu: “Saru gac te dxej guixee sa'csi naxniaa xhaguibaa.” <sup>3</sup> Che rajl rsil rniitu: “Etladi gac te dxej nadxaj sa'csi naxniaa xhaguibaa niluxh tre' za.” Xhoxh numbeetu xhi säloj reseene ni rien xhaguibaa, luxh ditu gumbee xhi säloj reseene xcuent redxajre, nalajznu recos ni cayajc. <sup>4</sup> Reben guijdxre, reben gualajz rniab te senro, te milagwr, luxh dirureni fii stee milagwr; suhuiitisreni xsen Jonás.

Dxejcti basa'n Jesúsreni ro'c, sä'tini.

*Levaduur xten refarisee*

(Mr. 8:14-21)

<sup>5</sup> Che gudejd rexpejn<sub>pacni</sub> stelaad nisdoo biäl-lajzreni ninäreni yätxtiil. <sup>6</sup> Dxejcti räjp Jesús lojreni:

—Bacuadijg, colnati levaduur xten refarisee näjza resaducee.

<sup>7</sup> Dxejcti bejnreni xhigab nen lastooreni: “Si'c caniini sa'csi dinu niopnä yätxtiil.”

<sup>8</sup> Luxh gucbee Jesús xhigabga, dxejc räjpni lojreni:

—¿Xhicuent rujntu xhigab xhet yätxtiildi ca'tu, ä? ¿Huinuxh najc xcälirililajztu! <sup>9</sup> ¿La gajdtu gacbee? ¿La diza lajztu guinaj che gudisä gaii yätxtiil gudajw gaii mil bejn, ä? ¿Bal dxijmni batie'tu, ä? <sup>10</sup> ¿La diza lajztu guizaj che gudisä gajdz yätxtiil gudajw tap mil bejn, ä? ¿Bal dxijmni batie'tu? <sup>11</sup> ¿Xhicuent ditu gacbee et yätxtiildi cagusä'tä cheni caniä lojtu colnati levaduur xten refarisee näjza resaducee?

<sup>12</sup> Dxejcru gucbeerene dini niäjp: “Colnati levaduur xten yätxtiil.” Laani caniini: “Colnaáti yäl<sub>ruluii</sub> xten refarisee näjza resaducee.”

*Bicäjp Pedr Jesús najc Cristpac*

(Mr. 8:27-30; Lc. 9:18-21)

<sup>13</sup> Che bidzuj<sub>reni</sub> Jesús región xten Cesarea xten guedx Filipo, gunabdiidx Jesús loj rexpejn<sub>pacni</sub>, räjpni:

—¿Chu naj rebejn nacä narä Xi'n Dios ni gujc Niguii?

<sup>14</sup> Laareni räjpreni:

—Yu'reni naj luj najclu Juan Bautist; yu'zareni rnii luj najclu Elías, peta sgaiireni rnii luj najclu Jeremías o stee niguii ni rnii xtidx Dios.

<sup>15</sup> Dxejcti räjpni lojreni:

—La'tu, ¿chuni'c rniitu nacä?

<sup>16</sup> Dxejc räjp Simón Pedr:

—Luj najclu Crist, Xi'n Dios nani nabaj<sub>reni</sub>.

<sup>17</sup> Badzu' Jesús diidxre, räjpni:

—Chicbaalu, Simón Pedr, xi'n Jonás, sa'csi xhet bejndi baluui dee lojlu, Xtradäti ni yu' xhaguibaa baluuiini lojlu. <sup>18</sup> Narä rniä lojlu, luj najclu Pedr, nani säloj: “Te guij.” Sa'csi sibäxtiejlu guidxagsa'za renani rililajz xtidxä, niluxh che guetreni, direni nitloj. <sup>19</sup> Narä gunidxä yälrnibee lojlu te gulijdxlu rebejn nani ahuliilajz xtidxä. Xhitis ni gusaanlu gunreni, o xhitis ni dilu gusaan gunreni, susoob Dios xtiidxlu.

<sup>20</sup> Dxejcti gunibee Jesús rutlojdi gäb rexpejn<sub>pacni</sub> laani najc Guejb Crist.

*Gunii Jesús xho guetni*

(Mr. 8:31-9:1; Lc. 9:22-27)

<sup>21</sup> Lagajc dxejc gusloj cagusule' Jesús diidx lo rexpejn<sub>pacni</sub>, guniini lojreni xho nanabpac chääni guedx Jerusalén te ro'c tedni trabajwduxh ladz<sub>naa</sub> rebengool xten guidoo, ladz<sub>naa</sub> rebixhojz, näjza rebejn ni najn xleii Moisés. Guniizani sugu'trenini, niluxh ni riojn dxej sibansacni lo rebengut.

<sup>22</sup> Dxejcti huinä Pedr Jesús te laad, gusloj cadi<sub>lnäjnini</sub>, räjpni:

—¡Gacnäj Dioslu, Dad! ¡Gurniälojlu gaclu si'c!

<sup>23</sup> Dxejc gubiré Jesús, räjpni lo Pedr:

—¡Gubicaj loä bendxab! Na'c rusiejytislu loä. Luj dilu gun xhigab xten Dios, alga xhigab xten rebenguedxliuj rujnlu.

<sup>24</sup> Dxejcti räjp Jesús loj rexpejn<sub>pacni</sub>:

—Palga yu' chu tejtü r<sub>lajz</sub> guirinajl narä, sucuälazni lagajc laani, suguuni xcrujz<sub>ni</sub>, nalajznu tedni trabajw, sujiäd<sub>najlni</sub> narä. <sup>25</sup> Sa'csi nani r<sub>lajz</sub> gunni gaan xcäl<sub>nabajjni</sub>, sunij<sub>tnini</sub>. Luxh nani runij<sub>t</sub> xcäl<sub>nabajjni</sub> por narä, sidxäl<sub>ni</sub> xcäl<sub>nabajjni</sub> par tejpas. <sup>26</sup> Sa'csi ¿xhi gaan gun te bejn palga ga'pni guideb guedxliuj, luxh nit xaimni lo Dios, ä? o ¿la yu' xhi gudeed bejn te siini xaimni? <sup>27</sup> Sa'csi narä Xi'n Dios ni gujc Niguui siälä lo yä<sub>lr</sub>dimbicha' xten Xtradä con rexang<sub>lni</sub>, dxejcti siguixä tebgaj bejn si'ctis ni gujc xtzuunni. <sup>28</sup> Rniliápac lojtu, loj reni tre' ree naj, yu'reni di guet dxejli ni fixgaareni jiälä narä Xi'n Dios ni gujc Niguui lo xcäl<sub>rnibeä</sub>.

## 17

*Chuni'c najc guroob*

(Mr. 9:2-13; Lc. 9:28-36)

<sup>1</sup> Che gudeed xho'p dxej, huinä Jesús Pedr, Jacobo, con Juan betz Jacobo, xtebreni huijreni jiaa yejc te dajn. <sup>2</sup> Dxejcti nez lojreni bidxaa xho rujn lojni. Lojni gusloj rdimbicha' si'c gubijdx; xhajbni gujc nolbäj si'c te bajl. <sup>3</sup> Dxejc bahuigajcreni loj Moisés näjza loj Elías, cayujyreni diidx con Jesús. <sup>4</sup> Dxejcti räjp Pedr loj Jesús:

—Dad, ¡huenduxh suga'nu ree! Palga r<sub>lajz</sub>lu, saj<sub>c</sub> jiennu chon<sub>u</sub> yuguijxh, tejni gac xten guejblu, steeni gac xten Moisés, steeni gac xten Elías.

<sup>5</sup> La<sub>lni</sub> canii Pedr, biäjt te za ni rdimbicha' guideb gabireni; ne<sub>n</sub> zaga biejn te xse' ni räjp:

—Dee najc xi'nä ni sanälazä, ruspaduxhni lazä, col<sub>cuadiajg</sub> xtiidxni.

<sup>6</sup> Che biejn diajg rexpejn<sub>pac</sub> Jesús diidxga, bazuxhijbreni, basajbreni lojreni lo yuj, bidxebduxh<sub>reni</sub>. <sup>7</sup> Dxejcti gubig Jesús lojreni, batzuubni <sub>naani</sub> yejcreni, räjpni:

—Col<sub>chasulii</sub>, na'c rdxejbtu.

<sup>8</sup> Che guläs lojreni, lojtis Jesús bahuiireni, rutru suganäjdini.

<sup>9</sup> Cheni sayäjtreni yejc dajnga, gunibee Jesús lojreni, räjpni:

—Rutlojdi gäbtu xhini'c bahuiitu dxejli ni guibansacä narä Xi'n Dios ni gujc Niguui lo rebengut.

<sup>10</sup> Dxejcti gunabdiidx rexpejn<sub>pacni</sub> lojni:

—¿Xhicuent rnii rebejn ni najn xleii Moisés ganid Elías nanab jiääd, ä?

<sup>11</sup> Badzu' Jesús diidxre, räjpni:

—Guliini siädxgaa Elías, laani gunsa'cni guira'ti, <sup>12</sup> niluxh narä rniä lojtu, abiääd Elías, di rebejn nienbeeni, luxh bennäjrenini si'ctis ni rlajzreni, basacsíduxhrenini. Sigajcza gunnäjreni narä Xi'n Dios ni gujc Niguii, susacsíduxhreni narä.

<sup>13</sup> Dxejcti gucbee rexpejnpacni caniini xcuent Juan Bautist.

*Jesús basiajc te biuux ni guyu' xpej bendxab*

(Mr. 9:14-29; Lc. 9:37-43)

<sup>14</sup> Cheni bidzujnreni cadro tre' xhidajl bejn, gubig te bejn lojni bazuxhibni, dxejc räjpni:

<sup>15</sup> —Dad, balaslajz xinä sa'csi laani cayacxhuuni, rajcni yälguidxbej, rusacsíduxh yälgujdxgani, yu' huält rtejbni lo guiboo yu' huält rtejbni lo nis. <sup>16</sup> Biädnäáni loj rexpejnpacku, luxh di niajcdi nusajcnenini.

<sup>17</sup> Jesús badzu' diidxre lojreni räjpni:

—Benguijdx, bejn ni di chalilajz, ¿gucli yu'ä lojtu? ¿Cati gac gunä huant la'tu? ¿Coltanä biuuxga ree!

<sup>18</sup> Dxejcti gudilnäj Jesús bendxab ni yu' lastoo biuuxga, gunibeeni biriini, lagajc dxejc biajc biuuxga.

<sup>19</sup> Dxejc guninäj rexpejnpacni Jesús te laad, gunabdiidxreni räjpreni:

—¿Xhicuent di niajcdi nibäanu bendxab nen lastoo biuuxga?

<sup>20</sup> Jesús räjp lojreni:

—Sa'csi la'tu guxiduxh rililajztu. Rniliä lojtu, paru najc yälrlilajz xtentu si'cti te bejdz muxhtas, sajc gäbtu loj dajn rec: “Gubicaj ro'c, gudejd stelaad”, luxh sibicaj dajnga. Palga rililajzpacku, xhetliidi yu' ni di gacdi guntu. <sup>21</sup> Niluxh sa' bendxabre, dini guirii palga ditu guiniabduxh lo Dios, gucua'nzatu.

*Jesús rusule' stehuält xho guetni*

(Mr. 9:30-32; Lc. 9:43-45)

<sup>22</sup> Lalni sasajreni nez región xten Galilee, räjp Jesús:

—Suteedreni narä Xi'n Dios ni gujc Niguii ladznaa rebendojl te gusacsíreni narä.

<sup>23</sup> Niluxh sugu'treni narä, dxejc ni riojn dxej sibansacä lo rebengut.

Che biejn diajgreni diidxga, guc-huinuxh lajzreni.

*Gudijxni impuest xten guidoo*

<sup>24</sup> Che bidzujn Jesús näjza rexpejnpacni guedx Capernaum, biääd rebejn ni rusquijx xcuent guidoo lo Pedr, gunabdiidxreni lojni, räjpreni:

—¿La di xmastrtu quiix impuest xten guidoo?

<sup>25</sup> Räjp Pedr:

—Rguijxnini.

Che biu' Pedr nen yu', ganid Jesús gunii lojni, räjpni:

—¿Xhi rchalolu, Simón? ¿Chuni'c rusquijx rebejn ni rnibee lo guedxliujre? ¿Chuni'c rguijx reimpuent, recuyo't? ¿Reben lajdxreni o rebenzajt?

<sup>26</sup> Badzu' Pedr diidxre räjpni:

—Rebenzajt.

Räjp Jesús:

—Ni'cni di rexi'nreni quiixni. <sup>27</sup> Luxh te di guidxe'chreni, huij ro' nisdoo, bacuaa ansuel, gulää bäjł ni guiniazngaalu. Ro' bäjłga sidxällu te melpla't ni sajl te chatijxlu impuest xcuentä näjza xcuentlu.

## 18

*¿Chuni'c sajcru lajdx Dios xhaguibaa?*

(Mr. 9:33-37; Lc. 9:46-48)

<sup>1</sup> Laa dxejcti gubig rexpejnpac Jesús lojni te gunabdiidxreni:

—¿Chuni'c sajcru lajdx Dios xhaguibaa?

<sup>2</sup> Dxejcti gurejdx Jesús te biuxbáz, bazujnini nez galäiireni, <sup>3</sup> dxejc räjpni:

—Rniliápac lojtu, palga ditu gusiechlajztu, palga ditu gac nadolajz si'c te biuxbáz, ditu jiu' lajdx Dios xhaguibaa. <sup>4</sup> Ni'cni chutis bejn nani gac nadolajz si'c biuxe're, laani gac ni sajrcu lajdx Dios xhaguibaa. <sup>5</sup> Chutis ni riu te sa' biuxe're, sa'csi rinälajzni narä, lagajc narä riuni.

*Riezw jiajbni nen dojl*  
(Mr. 9:42-48; Lc. 17:1-2)

<sup>6</sup> Räjzani:

—Chutis ni gudzucaj lo xnezyuä te sa' biuxe're ni ahuililajzni xtidxä, maazru huen niliib te guij xten molin dojb yejni, chatejbni loj nisdoo, palga gunni jiajb tej reni'c lo dojl. <sup>7</sup> Proobza guedxliuj sa'csi yuduxh xhigabguijdx lojni. Sa'csi nanabpac chu xhigabguijdx. Gunatiro, bejn ni ruzobloj rehxigabguijdxre, ni rujn riajbza lo dojl reni rililajz xtidxä, ni najc si'c biuxe're.

<sup>8</sup> Palga ni'lu o naalu gun jiajblu lo dojl, batiu'ni. Hueenru jiu'lu lo xcäl'nabajn Dios nitiujnglu o natiujnglu lacuaa jiilu con guiro'p ni'lu o guiro'p naalu lo balduxh ni rejc par tejpas. <sup>9</sup> Palga te balojlu rujn riajbzu lo dojl, gulääni. Hueenru jiu'lu lo xcäl'rnibee Dios najclu lotiä'p lacuaa chu guiro'p baloj chazäl'reni luj lo balduxh ni rejc par tejpas.

*Xcuent xiil ni gunijt*  
(Lc. 15:3-7)

<sup>10</sup> Räjzani Jesús lojreni:

—Colnatiro, andi cuälaztu rebejn ni najc si'c biuxbázre ni sasaj lo xnez Dios, sa'csi rexangl Dios ni cahuiireni, guiraatis dxej yu'reni loj Dios. <sup>11</sup> Sa'csi Xi'n Dios ni gujc Niguii biääd te guslaani rebejn nani agunijt nen dojl.

<sup>12</sup> Räjzani:

—¿Xho rhuiitu? Palga rajp te bejn te gayuu xiil, dxejc nit tejni, ¿laa dini gusaan stabitzubigaaga ni yu' nen gurajl te chatiilni xile' ni gunijt, ä? <sup>13</sup> Luxh palga guidxäl'ni xile'ga, rniliä lojtu, sibalazduxhruni xcuent xile'ga luxh guxiiru guibanäj lajzni xcuent rexiil nani di ninijt. <sup>14</sup> Sigajcza Xtadnu ni yu' xhaguibaa di rlajz nit lo Dios nicla tej reni ahuililajz xtiidxni, ni najc si'c biuxbázre.

*Xho gunnäjlu bejzlu*  
(Lc. 17:3)

<sup>15</sup> Räjzani:

—Palga gun bejzlu te cosguijdx lojlu, guninäjni xtebtislu, gojs lojni xhi dojl bejn ni lojlu. Palga saru gucuadiajgni xtiidxlu, abiäj] lajztu. <sup>16</sup> Palga naaddini gucuadiajgni, dini jiu xtiidxlu, dxejc huinä stee o stio'p bejn chaninäjluni, te guiraa ni guiniitu jiejn diajg rebejnga, te arajplu tio'p o choñ testiigw. <sup>17</sup> Palga di bejzlu gucuadiajg xtidx rebejnga, luxh dizani jiu xtiidxreni, nen guidoo huile'c xquejlu loj rebejn ni ricuadiajg xtidx Dios. Palga dizani jiu reben guidoo, sugacni nez lojlu si'c te benguijdx ni di gumbée xtidx Dios o si'c rebejn nani rusquijx loj rebejn nani ruto'.

<sup>18</sup> Ni'cni rniliápac lojtu, guiraa yäl'guxhtis xten bejn ni di gusiechlajz xtoj]reni ni guntu lo guedxliuj, si'c jia'nni xhaguibaa; guiraa redojl] nani gusiäj] lajztu lo guedxliuj sa'csi basiechlajz beñdojl]ga, si'cza jia'nni xhaguibaa.

<sup>19</sup> Sigajcza rniä lojtu, palga tio'ptu tejsi xhigab guntu xhini'c guiniabtu lo Dios, che guiniabtuni lo Dios, Xtadä ni yu' xhaguibaa suniidxni ni rniabtu lojni. <sup>20</sup> Sa'csi cadrotis nadxagsa' tio'p o choñ bejn sa'csi rinälajzreni narä, anasuga'ä galäii rebejnga.

<sup>21</sup> Dxejcti gubig Pedr loj Jesús, gunabdiidxni:

—Dad, ¿palga gunijt betzä loä, bal huält nanab gusiäj] lazä? ¿La sajl gajdzli huält, ä?

<sup>22</sup> Badzu' Jesús diidxre lojni räjzani:

—Dina guiniä gajdztis huält, rniä gayonbidzuu huält, nalajznu si'ctiza huält basiäj] lajzlu.

*Xcuent tio'p bejn ni nazäb meel*



<sup>23</sup> Xcäl̄rnibee Dios xhaguibaa najc si'c te reii ni rlanj gunni cuent lac nazääb rexmosni lojni. <sup>24</sup> Agusloj cayujnni xcuentni chela bidzunnäjreni te mos ni nazääb balti mil lojni. <sup>25</sup> Luxh mosre xhet rajpdini te quiixni rexti'n̄ni, ni'c gunibee reii guido'ni si'c sclav, nājza chäälni, nājza rexi'n̄ni, nāgajcza guiralii xhixtēni, te gaxh xti'n̄ni. <sup>26</sup> Dxejcti mosga bazuxhijbni loj xlam̄ni, gunabduxhni lojni, rāj̄pni: “Guläzsijc tiop-choñ dxej, Dad, te gac quixä xti'nä.” <sup>27</sup> Dxejcti lam̄ga balazlajzni xmosni, badzucajni guiraa ni nazääb mosga lojni, baslaanini. <sup>28</sup> Cheni birii mosga rolizj xlam̄ni, bidxaagni stee samosni ni nazääb bale'si beex lojni. Gunaaznini, baxhiya'ni yejn̄ni, dxejc rāj̄pni: “Gudijxga ni nazääblu loä.” <sup>29</sup> Dxejcti ste mosga bazuxhijbni lojni, rāj̄pni: “Guläzsijc. Siguixäca guiraa ni nazääb lojlu.” <sup>30</sup> Luxh steega naaddini, alga huisäugacni samosni neñ latzguiib te bejn̄ni gaan gudijxni guiraa ni nazääbni. <sup>31</sup> Cheni bahuu sgaii mos xhini'c bejn̄ni, gucnaduxhlajzreni, huiye'tzreni lo xlam̄reni xhi huiyejn̄ni. <sup>32</sup> Dxejcti gurejdx xlam̄reni mosga, rāj̄pni lojni: “¡Mos guijdx! Narä badzucä di'n ni nazääblu loä, sa'csi gunabduxhlu loä. <sup>33</sup> Si'cza niunnäjlu sa'lu, nulazlajzluni sigajc ni balazlazälu.” <sup>34</sup> Sas lacti bidxechduxh lam̄ga, gunibeeni biäuuni te gudijxni guiragajc ni nazääbni lo xlam̄ni.

<sup>35</sup> Baluux Jesús cuentga, rāj̄pni:

—Sigajcza gunnäj Xtadä ni yu' xhaguibaa guiraa rebejn̄ ni di gusiällajzpac guiraa redojl̄ ni rujn resa'ni lojni.

## 19

*Jesús ruluii xcuent yäl̄ru'ro'n sa'ni*

*(Mr. 10:1-12; Lc. 16:18)*

<sup>1</sup> Che gulujx gunii Jesús recuentre, biunejzni Galilee, huijni lo región xten Judea, stelaad gueu Jordán. <sup>2</sup> Xhidajl bejn̄ birinajl̄ni, ro'c basiajcn̄i rebenracxhuu, <sup>3</sup> dxejc gubig referisee lojni, rlanjreni gusguesireni Jesús ni'c rāj̄preni lojni:

—¿La sajc guro'n te niguii chäälni che rlanj̄tisni, ä?

<sup>4</sup> Badzu' Jesús diidxre lojreni, rāj̄pni:

—¿La gajdtu goj lo reguijtz nani bacuaa toMoisés cadro caj xho benchee Dios bejn̄ galooli: “Niguii nājza gunaa bencheenireni”? <sup>5</sup> Guniiza Moisés: “Ni'cni gusaan niguii xtadni con xnanni te xca'ni chäälni, dxejc dirureni gac tio'p, tejtis bejn̄ najcreni.” <sup>6</sup> Ni'cni dirureni gac tio'p, anajcreni tejtis bejn̄, digacdi guilia' rebejn̄ lo sa'ni nani abachagsa' Dios lo sa'ni.

<sup>7</sup> Dxejcti gunabdiidxreni lojni, rāj̄preni:

—¿Xhicuent gunibee Moisés gudeed niguii te guijtz lo chäälni te si'c gac guro'n̄ni gunaaga, ä?

<sup>8</sup> Rāj̄p Jesús lojreni:

—Sa'csi najc lastootu si'c te guij, ni'c basaan toMoisés baro'n niguii chäälni, niluxh galodoo et si'cti gujcn̄i. <sup>9</sup> Luxh rniä lojtu, niguii nani gusaan chäälni, luxh xhet dojl̄di bennäj chäälni stee niguii, dxejcti guchnaani ste'ca gunaa, rujnni dojl̄. Sigajcza niguii ni guchnaa gunaaga ni abaro'n chäälnini, rujnza niguiiga dojl̄.

<sup>10</sup> Dxejc rāj̄p rexpejn̄pacni lojni:

—Palga si'c najc xcuent niguii con chäälni, hueenru na'c guchnaani.

<sup>11</sup> Jesús rāj̄p lojreni:

—Xhet guiraadi bejn̄ rajc gacbee rediidxre, rebej̄ntis ni rudeed Dios te xcäriensa'c ni'ctis racbee. <sup>12</sup> Yu' xhicuent digacdi guchnaa niguii: yu'reni digacdi guchnaa sa'csi si'c gojl̄reni; yu'reni digacdi guchnaa sa'csi baxhiñ sabejn̄reni; yu'zaren̄i digacdi guchnaaren̄i sa'csi rlanj̄reni gunreni xtzuuntis Dios. Nani rajc racbeeni rediidxre, sugacbeenireni.

*Biäd̄näreni rebiuux loj Jesús*

*(Mr. 10:13-16; Lc. 18:15-17)*

<sup>13</sup> Dxejcti biädñäreni rebiuxe' loj Jesús te gudzuubni ñaani yejcreni, guiniabni lo Dios xcuentreni. Luxh rexpejn̄pacni gudilñäj rebejn̄ ni siädñä rebiuxe'ga. <sup>14</sup> Dxejc räjp Jesús lojreni:

—Colgusaan guibig rebiuxe' loä, na'c gudxojn̄tureni, sa'csi xcäl̄rnibee Dios xhaguibaa najc xten reni nadolajz si'c najc rebiuxe're.

<sup>15</sup> Che gulujx badzuubni ñaani yejc rebiuxe', biunejzni ro'c.

*Te beñ* ni rajp guninäj Jesús

(Mr. 10:17-31; Lc. 18:18-30)

<sup>16</sup> Dxejc biääd te bi'n lo Jesús, gunabdiidxni lojni; räjpni:

—Mastr sa'c, ¿xhini'c nanab gunä te xca'ä yäl̄nabajn̄ lo Dios par tejpas?

<sup>17</sup> Dxejc räjp Jesús lojni:

—¿Xhicuent rniilu maestr sa'c narä? Diostis najc sa'c. Per par rlajzlu xca'lu yäl̄nabajn̄ lo Dios, bazoob rextidx Dios ni caj lo xleii Moisés.

<sup>18</sup> Dxejcti räjp bi'nga lojni:

—¿Xhi rediidxga?

Dxejc räjp Jesús lojni:

—Na'c ju'tlu, na'c guesñäjlu bejn̄ nani di gac chäällu, na'c cuanlu, na'c guiliäslu didxxhii xcuent bejn̄. <sup>19</sup> Bazoob xtidx xtdadu con xnanlu, huiñälajz sa'lu si'cni sanälajzlu lagajc luj.

<sup>20</sup> Dxejcti räjp bi'nga lojni:

—Guiraa rediidxre runä che nacáli biuux. ¿Xhiruxni'c riäädx gunä?

<sup>21</sup> Dxejc räjp Jesús lojni:

—Palga rlajzlu gaclu bensa'c lo Dios, huij, bato' guiraa ni rajplu, dxejc gudisni lo reben̄proob, dxejc xhaguibaa sapduxhlu xhixtenlu. Dxejcti gudaä te jiädñajllu narä.

<sup>22</sup> Cheni biejn̄ diajg bi'nga rediidxre, guc-huinduxh lajzni sa'csi rajpni xhidalduxh xhixtenni.

<sup>23</sup> Sas Jesús räjp loj rexpejn̄pacni:

—Rniliápac lojtu, naganduxh jiu' te beñ rajp loj xcäl̄rnibee Dios. <sup>24</sup> Rnisacä lojtu, guyasiru ted te cameii neñ baloj te guux; naganduxhru jiu' te bejn̄ ni rajp lo xcäl̄rnibee Dios.

<sup>25</sup> Che biejn̄ diajg rexpejn̄pacni rediidxre, bidxeloduxhrene, dxejc canabdiidx loj sa'reni:

—¿Chuni'c sajc jiu' lo xcäl̄rnibee Dios?

<sup>26</sup> Dxejc bahuidzu'tz Jesús lojreni, räjpni:

—Naganduxh gun rebejn̄ dee, Diostis sajc gun guiraloj.

<sup>27</sup> Dxejcti Pedr räjp lojni:

—Nuurnu basa'nnu guiraa xhixtenu te siopnalnulu. ¿Xhini'c jia'pnu ro'c?

<sup>28</sup> Jesús räjp lojreni:

—Rniliápac lojtu, la'tu ni biädñajltu narä, che guscobä guiraa recos cheni cueä narä, Xi'n Dios ni gujc Niguii, lo yagxhil cadre guinibeä lo guiraa reben̄ guedxliuj, la'tu ni siädñajltu narä sibejzatu lo tzubitio'p yagxhil te guinibeetu loj guitzubitio'p guejdx xten rexpejn̄ Israel. <sup>29</sup> Luxh guiraa rebejn̄ ni basa'n rolijzni o rebejtzni, o rebisiajnni, o xtadni, o xnanni, o chäällni, o xi'nni, o rexhujni, te siädñajlñi narä, rebejn̄ga sajc te gayuu huält locni gojpni, nägajc ga'preni xcäl̄nabajn̄ Dios par tejpas. <sup>30</sup> Rebejn̄ nani rchalo najcreni ben̄roru lo sa'reni nez loj Dios, reni'c gac bejn̄ ni guxii sajc nez loj Dios. Rebejn̄ nadolajz ni di guchalo sajcrureni lo sa'reni, reni'c sajcrureni nez loj Dios.

## 20

*Xcuent reni rujn̄ dzuun*

<sup>1</sup> Räjzpñani:

—Xcäl̄rnibee Dios najc si'c te bejn̄ ni najc baxhuaan xten te renchro. Rsildooru biriini te satiilni mos gun dzuun lo xyujni, lo reyaguub. <sup>2</sup> Che bidxälñi gaii mos, bachaagni diidx.



Bia'nreni diidx quixnireni te denaar tebdxej cade tej remosga. Dxejc baxhañnireni loj xyujni sayujnreni dzuun. <sup>3</sup> Birisacni, satiilni sgaii mos si'cti rcagaa, rsil. Bidxaagni sgaii bejn ni xhet cayujndi, suga'sireni nez lo guui. <sup>4</sup> Räjpnij lojreni: “Näjza la'tu colchayujn dzuun lo xyuä. Narä siguixä si'cni riäj] xca'tu.” Sä'ti rebejnnga lo dzuun. <sup>5</sup> Birisac dade' si'cti läiidxej, birisaczani si'cti rcachon gudxej. Bidxaagni sgaii bejn, sigajcza räjpnij loj rebejnnga. <sup>6</sup> Dxejc si'cti rcagaii birisacni, huijni lo guui. Ro'c bidxälñi sgaii bejn ni xhet cayujndireni, suga'sireni nez lo guui. Dxejc räjpnij lojreni: “¿Xhicuent suga'tu ree guideb dxej xhet cayujnditu?” <sup>7</sup> Dxejc räjpreni lojni: “Sa'csi rut siädtildinu te choyennu dzuun.” Dxejcti räjpnij lojreni: “Näjza la'tu colchayejn dzuun lo xyuä. Narä siguixsa'cätu.” <sup>8</sup> Che biu' guxhijñ, räjpnij lam lo mos ni rnibee remos: “Gurejdx remos te quixlureni. Gudixxga reni biu' gudxejru lo dzuun. Lult gudijx reni biu' ganid lo dzuun.” <sup>9</sup> Dxejc ganid biu' remos ni agudxej biu'reni lo dzuun. Cade tejreni cua' te denaar, si'cni rca' ni rujn dzuun guideb dxej. <sup>10</sup> Cheni biu' reni biu' lo dzuun rsildoo, bejnreni xhigab sica'rureni meel, per sigajcza laareni cua'reni te denaar cade tejreni. <sup>11</sup> Che cua'reni xcuentreni gusloj cadxe'chreni lo baxhuaan xten dzuunga. <sup>12</sup> Räjpreni: “Redee ni biu' lult lo dzuun pet teb ortis bejnreni dzuun, luxh gudijxlureni sigajcni gudijxlu nuurnu, luxh biennu dzuun guideb dxej, luxh biennu dzuun lo yälñanlaa.” <sup>13</sup> Dxejc räjpnij lamga lo tejreni: “Xamigwä, xhet cosguijdxdi cayunä lojlu. ¿La xhet bia'ndinu diidx te denaar quixälu tebdxej? <sup>14</sup> Huij, cua' xmeellu. Narä rlazä quixä bejnre ni biu' lult sigajc ni gudixä lojlu. <sup>15</sup> ¿La di gacdi gunä si'ctis ni rlazä con xmelä? ¿O rdexchlajzlu loä sa'csi nacä hueen, ä?” <sup>16</sup> Ni'cni reni biäd lult sajcreni tebloj con reni biäd ganid, luxh reni biäd ganid sajcreni tebloj con reni biäd lult.

*Gunisac Jesús xho guetni*  
(Mr. 10:32-34; Lc. 18:31-34)

<sup>17</sup> Che sasaj Jesús lo nezyuj sääni Jerusalén, huinäni rexpejnñpacni te laad te räjpnij lojreni:

<sup>18</sup> —La'tu ruhuiitu sosaanu nez guedx Jerusalén. Ro'c narä, Xi'n Dios ni gujc Niguui, siabä ladznäa reni rnibee lo rebixhojz, näjza lo rebejn ni najn leii. Laareni sinibeereni guetä. <sup>19</sup> Suteedreni narä ladznäa rebenzijt te cubeereni narä quiinreni narä, dxejc gucuaareni narä lo cruzj. Luxh ni riojn dxej, sibansacä loj rebengut.

*Ni gunab xnan Jacoob näjza Juan*  
(Mr. 10:35-45)

<sup>20</sup> Dxejcti gubig xnan Jacoob näjza Juan, xi'n Zebedeo loj Jesús. Bazuxhijbni nez loj Jesús, te gunabni lo Jesús. <sup>21</sup> Gunabdiidx Jesús lojni:

—¿Xhini'c rlanjzlu?

Räjpnij gunaaga lojni:

—Che jiu'lu lo xcälñnibeelu, gunibelaa cue tej rexi'nä xladbeelu, steeni cue xladbäjgwlu.

<sup>22</sup> Dxejc räjpnij Jesús:

—¿Ditu gan xhini'c rniabtu! ¿La sajcedtu yälrsacsí sa'ni tedä? ¿La sajcedtu trabajwduxh sa'ni nanab tedä?

Dxejc räjpreni:

—Sajcednuni.

<sup>23</sup> Dxejcti räjpnij Jesús lojreni:

—Guliipacni. Sidedxgaatu trabajw, sidedxgaazatu yälrsacsí. Et narädi cueä reni cue xladbägwä o xladbeä. Xtadä ni yu' xhaguibaa alaguleni rebejnnga.

<sup>24</sup> Che biejn diajg stzuu rexpejnñpac Jesús, bidxe'chreni loj guiro'p rexi'n nane'ga.

<sup>25</sup> Dxejc gurejdx Jesús reni, räjpnij:

—La'tu najntu xho rujn regubier ni rnibee lo rebenzijt, rnibeereni rebejnnga si'c xlamreni. Luxh reni najc rebenro lojreni runnäjreni rebejnnga si'ctis ni rlanjzreni. <sup>26</sup> Et si'cni gunditu la'tu loj rebejn. Chutis rlanjgac beñro lojtu, nanab gunni dzuun gacnäjni

guiraliitu si'c te mos. <sup>27</sup> Luxh chutis tejtü ni rlanj guiliä'p xpala'nni, nanab gacni si'c xmos lo guiraliitu. <sup>28</sup> Sigajcza biääd Xi'n Dios ni gujc Niguii. Dini niniab mos chu lojni, alga laani najc xmos bejn, badeedzani lagajc yäl'nabajn xtenni te gudijxni baslaani xhidal bejn ni yu' lo dojl.

*Jesús rusiajc tio'p lotiä'p*  
(Mr. 10:46-52; Lc. 18:35-43)

<sup>29</sup> Che gojl guiriireni guedx Jericó, xhidalduxh bejn sanajlni. <sup>30</sup> Dxejcti sobga' tio'p bejn ni di fii cuä' nez yuj. Che biejn diajgreni sadejd Jesús ro'c, gusloj cabedxa'reni:

—Dad, Xi'n toDavid, balazlajz nuurnu.

<sup>31</sup> Gudilnäjä rebejnreni, te gusäuren i ro'reni. Luxh laaren i dipru guredxa'reni:

—jDad, Xi'n toDavid, balazlajz nuurnu!

<sup>32</sup> Dxejc guzudxi Jesús, gurejdxni reni di fii, räjpni lojreni:

—jXhini'c rlanjtu gunä?

<sup>33</sup> Räjpreni lojni:

—Dad, rlaaznu guixal balojnu te gac fiinu.

<sup>34</sup> Dxejc balazlajz Jesúsreni, gudajjni balojreni. Sas biacgajc balojreni, gujc bahuiireni, sanajltireni Jesús.

## 21

*Biu' Jesús guedx Jerusalén*  
(Mr. 11:1-11; Lc. 19:28-40; Jn. 12:12-19)

<sup>1</sup> Cheni Siäddzungenajxhreni guedx Jerusalén, bidzujjnreni te guedxbäz ni laa Betfagé, cuä' dajn ni laa Oliib. Baxhal Jesús tio'p xpejnpacni, <sup>2</sup> räjpni lojreni:

—Colchäj loj guedxbäzre ni tre' nez lojtu. Ro'c guidxältu te burgunaa caduu näjza teburhuin. Colguxhecni, coltanäni loä. <sup>3</sup> Palga yu' chu naa: “jXhini'c rujntu?”, colye'tz lojni: “Dad caquiinnini terate'. Suxhalgajcnini.”

<sup>4</sup> Luxh guiraa dee gujc te guzobj diidx ni gunii dade' nani bacuaa xtidx Dios agujc xchero, che räjpni:

<sup>5</sup> Colye'tz loj reni rbäjz guedx Siön, bahuii xreiilu siääd lojlu,

nadolajzni bijbni te burbäz, te burbäz, xi'n man ni rujn dzuun, ni ruu cargw.

<sup>6</sup> Dxejcti huij rexpejnpacni, bejnreni si'c gunibee Jesús gunreni. <sup>7</sup> Biädnäreni burga näjza burbäz xi'nni. Gudixhreni xhajbreni detz burbäzga, dxejc gubijb Jesús burbäzga. <sup>8</sup> Xhidalduxh bejn tre' ro'c, luxh yu' reni gudixh xhajbreni lo nez yuj, peta sgaiireni batiu' balajg te gudixhreni rebalajg lo nez yuj cadre ted Jesús. <sup>9</sup> Rebejn ni nijd, näjza reni siääd dejtzn gusloj cabedxa'reni, räjpreni:

—jXchej guibajn Xi'n toDavid! jChicbaa ni siääd xcuent Gueb Dios! Rliä'pnu xpala'n Guejblu Dios.

<sup>10</sup> Cheni biu' Jesús nen guedx Jerusalén, guiraa reben guejdxga gusloj camojm, yu'reni canabdiidxreni loj sa'reni:

—jChucha najc bejnre?

<sup>11</sup> Yu'zaren i räjp:

—Dee najc Jesús, niguii ni rusule' xtidx Dios. Guedx Nazare't xten Galilee siäädni.

*Basia Jesús guidoro*  
(Mr. 11:15-19; Lc. 19:45-48; Jn. 2:13-22)

<sup>12</sup> Dxejc biu' Jesús nen guidoro xten Dios, guläani guiraa rebejn ni caguto' näjza rebejn ni casii. Barexhättni remex xten reni ruchaa meel xten rebejn, näjza reyagxhil xten reni ruto' repalom. <sup>13</sup> Dxejc räjpni lojreni:

—Loj reguijtz ni bacuaa rebengaloo caj: “Sirilaj xquidoä yu' xten yälrbejdx, yälrniab loj Dios.” Niluxh la'tu abejntuni xpiliäa gubaan.

<sup>14</sup> Lagajc nen\_ guidooga, gubig loj Jesús gaii bejn\_ ni di fii näjza gaii bejn\_ ni rsiacoj, luxh basiajcnireni. <sup>15</sup> Cheni bahuii reni rnibee loj rebixhojz, näjza reni najn leii remilagwr ni bejn Jesús, luxh biejnza diajgreni xho cabedxa' rebiuxe' caniireni: “Rliä'pnu xpala'nlu Xi'n toreii David”, bidxe'ch rebixhojzga. <sup>16</sup> Dxejc räjpreni loj Jesús:

—¿La riejn diajglu xhi caniireni, ä?

Badzu' Jesús diidxre lojreni räjpni:

—O'n, riejn diagäni. ¿La gadtu goļ lo reguijtz ni bacuaa te dade' ni gunii xtidx Dios? Ro'c caj xcuent redee, cadre caj rediidxre:

Abejnlu goļ rebiuux näjza rebäznite' dij ni rliäpsa'cpac xpala'n Dios.

<sup>17</sup> Dxejcti basaan Jesúsreni, biunejzni ro'c sääni guedxe' ni laa Betania, ro'c gudejdni yääl.

*Te yag iigw ni gubijdz*

*(Mr. 11:12-14, 20-26)*

<sup>18</sup> Cheni bara yääl, rsilru gubisac Jesús guedx Jerusalén. Laļ ni sääni, gusloj calaanni. <sup>19</sup> Bahuiini loj te yag iigw cuä' nezyuj. Gubigni gajxh ni' yajgga, per xhet ninejxhdi bidxälni, ganaxhtis balajg caj lo yajgga. Dxejc räjp Jesús lo yajg iigwga:

—¿Nuncru xcaj nicla tej ninejxh lojlu!

Dxejcti gubidzgajc yajgga. <sup>20</sup> Cheni bahuii rexpejn\_pacni, bidxeloduxhrenei, gunabdiidxreni loj Jesús:

—¿Xhi cuent gubidzgajc yajgga?

<sup>21</sup> Räjp Jesús lojreni:

—Rniliäpac lojtu, palga chalilajzpacu, luxh ditu gun tio'p lajztu, xhet ganaxdi sa' cosre guntu, palga gäbtu lo te dajn: “Gubicaj ro'c, gusuj galäii nisdoo”, si'c gacni.

<sup>22</sup> Guiraa ni guiniabtu loj Dios, palga chalilajzpacu, suniidxnini.

*Xcäl\_rnibee Jesús*

*(Mr. 11:27-33; Lc. 20:1-8)*

<sup>23</sup> Dxejcti biu' Jesús nen\_ guidoro, dxejc laļ ni caguluiini rebejn\_ gubig reni rnibee loj rebixhojz näjza rebengool, gunabdiidxreni lojni:

—¿Xhi yäl\_rnibee rajplu ni'cni rajc rujnlu recosre? ¿Chuni'c baniidx yäl\_rnibeere lojlu?

<sup>24</sup> Badzu' Jesús diidxre lojreni räjpni:

—Sigajcza narä gunä te yälgunabdiidx lojtu; palga sajc gudzu'tu diidxga loä, dxejc guiniä lojtu chuni'c baniidx yäl\_rnibee te runä recosre. <sup>25</sup> ¿Chuni'c gunibee gutiobnis Juan ni rutiobnis? ¿La Dios o la beņ guedxliuj?

Dxejc gusloj cayäjp lo sa'reni, palga jie'tznu Dios gunibeeni, dxejc sinajni loonu, ¿xhicuent ditu nililajz xtiidxni? <sup>26</sup> Palga jie'tznu bejn\_ guedxliuj gunibeeni, dxejc sixa't rebejn\_ yejcnu sa'csi guiraareni rililajzreni Juan najc te Dade' ni gunii xtidx Dios. <sup>27</sup> Dxejc räjpreni loj Jesús:

—Dinu guidon.

Dxejc räjp Jesús lojreni:

—Sigajcza narä dina guiniä caro siääd yäl\_rnibee te runä guiraa recosre.

*Te dade' ni guyu' tio'p xi'nni*

<sup>28</sup> Jesús räjp lojreni:

—Guidon xho guichalootu diidxre. Te dade' guyu' tio'p xi'nni. Räjpni loj xingangalojni: “Xi'nä, nadxej chayujnlu dzuun cadre care' uub.” <sup>29</sup> Dxejc badzu' xi'nni diidx lojni, räjpni: “Di rlazädi cha'a.” Luxh che gojł ste ra't, basiejch lajzni säätini sayujnni xtzun xtadni. <sup>30</sup> Dxejc räjp dade'ga lo stee xi'nni: “Xi'nä, nadxej chayujnlu dzuun.” Dxejc badzu' xi'nni diidxre, räjpni: “Mbaj, dad, sia'ä.” Luxh dini nij. <sup>31</sup> Loj guiro'preni, ¿chuni'c bejn si'cni rlajz xtadni?

Dxejc räjpreni:

—Xingangalooni.

Dxejcti räjp Jesús lojreni:

—Rniliápac lojtu, reni ruquijx guiraloj, nájza regunabdxab ganidreni jiu'reni lojtu loj xcäl̄rnibee Dios,<sup>32</sup> sa'csi Juan ni rutiobnis biäd̄luini la'tu xho guibajntu, luxh ditu nililajz xtiidxni. Biädla reni ruquijx guiraloj, nájza regunadxab huililazduxhrene xtiidxni. Niluxh la'tu bahuiitu guiraa recosga, ditu nusiechlajz te nililajztu xtiidxni.

*Xcuent remosguijdx*

(Mr. 12:1-12; Lc. 20:9-19)

<sup>33</sup> ¡Colcuadiajg stee cuentre! Guyu' te dade' ni najc baxhuaan xten te renchro, gule'cni yaguub loj xyujni, bateedni bazaa guideb gabi yujga. Gudäänni te gueed te gujcni te tanc te chuchee nisuubga che rxii reuub. Bencheezani te yu' ni najc jiaaro te ro'c cue te ni fii guideb loj xyujni. Badedlaani yujga loj gaii bejn̄ ni rujn dzuun, sä'tini te biaj zijtro. <sup>34</sup> Che agojl guire' cose'ch baxhal̄ baxhuaanga gaii xmosni loj xyujni te chaxiireni cose'ch ni riäjl xca' baxhuaanga. <sup>35</sup> Dxejc reni biannäj yujga gunaazreni remosre, gudijnreni tejni, bagu'treni steeni, bacuaareni guij yejc steeni. <sup>36</sup> Dxejc baxhalsac baxhuaanga sgaii mos. Niluxh reni biannäj yujga sigajcza bennäjreni remosga.

<sup>37</sup> 'Dxejcti bejn̄ baxhuaanga xhigab: “Maazru huen guxhalä xi'nä; sucuadiajgrureni xtiidxni.” <sup>38</sup> Cheni bahuiireni lo xi'n baxhuaan xten yujga, bejn̄reni xhigab: “Deeni jiannäj yujre; do'o guigu'tnuni te jiannänu yujre.” <sup>39</sup> Dxejcti gunaazrenini, guläärenini te laad, dxejc bagu'trenini.

<sup>40</sup> Dxejc gunabdiidx Jesús räjpni:

—Che jiäd̄ baxhuaan xten yujga, ¿xhi gunnäjni rebejn̄ nani biannäj xyujni?

<sup>41</sup> Dxejc räjpreni loj Jesús:

—Dini gulazlajz rebenguijdxga, sugu'tnireni, sudedlaani xyujni loj ste'ca bejn̄ nani gudeed cose'ch ni riäjl xca'ni che gal̄ guire' cose'chga.

<sup>42</sup> Dxejcti räjp Jesús lojreni:

—¿La gajdtu goļ lo reguijtz nani bacuaa dade' nani gunii xtidx Dios galoo? Rediidxre caj ro'c:

Guij nani gulälaz reni runchee yu',  
cua' Dios lagajc guijga gudixhnini squiin yu',  
sajcruni loj guiraa reguij.

Dee bejn̄ Gueb Dios, luxh rdxeloduxhnu dzunrore ni bejn̄ni.

<sup>43</sup> 'Ni'cni rniä lojtu, sibicaj xcäl̄rnibee Dios lojtu, sidejdni loj rebejn̄ nani gudeed ni riäjl xca' xcäl̄rnibee Dios, nalajznu renani chalilajzpac xtiidxni. <sup>44</sup> Luxh xcuent guijga: nani jiajb lo guijga, silia'ni, per nani guitejb guijga yejcni, li siujyni, gacni däj.

<sup>45</sup> Che biejn̄ diajg reni rnibee lo rebixhojz nájza refarisee recuent ni canii Jesús, gucbeerene cagusä'tni lagajc laareni. <sup>46</sup> Rlajzreni niniaazrenini, per bidxejbreni rebejn̄ sa'csi salilajz rebejn̄ najc Jesús bejn̄ ni rniä xtidx Dios.

## 22

*Xcuent yäl̄ruch̄naa*

<sup>1</sup> Guslosac canii Jesús lojreni con recuent, räjpni:

<sup>2</sup> —Xcäl̄rnibee Dios najc si'c te reii ni bejn̄ te sa' te guch̄naa xi'n̄ni. <sup>3</sup> Baxhal̄ni rexmosni te saxiireni regolnejdx chääreni sa', niluxh rebejn̄re di rlajzdireni. <sup>4</sup> Dxejc baxhalsacni rexmosni, räjpni: “Colye'tz loj reni abidon̄, agujc comiid. ¡Abagutä balti gonsa'c, gonguro! Anacchee guira'ti yäl̄rajw. Col̄taa.” <sup>5</sup> Niluxh reni abidonga di niu xtiidxreni. Tejni sahuui rexyujni, steeni sää lo rexnegosni, <sup>6</sup> dxejcti sgaii reni niajc biooz gunaazreni rexmos reii, basacsíreni remosga, sas bagu'trenini. <sup>7</sup> Che biejn̄ diajg reiiga, bidxe'chduxhni, baxhal̄ni rexsoldaadni te sagu'treni guiraa rebenguijdxga, te saze'czareni guejdx cadro rbäjzreni. <sup>8</sup> Dxejcti räjpni loj rexmosni: “Guiraa dee anacchee, di nungäj̄l jiäd̄ru reni abidon̄. <sup>9</sup> Colchäj, pues, lo resquiin lo nezyuj, colcujdx chutis bejn̄

ni guidxaagtistu.” <sup>10</sup> Birii rexmosni, sääreni lo nezyuj. Dxejc bachagsa'reni guiraatis bejn ni bidxaagreni, reni najc benguijdx sigajc reni najc beñhween te gudxaj rolizj reiiga.

<sup>11</sup> 'Dxejc biu' reii biädhuiini loj rebiooz. Bahuiini loj te bejn ni sobga' ro'c, luxh xhet xhablanijdini najcwni. <sup>12</sup> Dxejc räjp reii lojni: “Xamigwä, ¿xho bejnlu biu'lu ree luxh xhet xhablanijdilu najcwlu?” Dxitis sobga' bejnnga, xhet rniidini. <sup>13</sup> Dxejc räjp reii loj rexmosni: “Colguliib ni'ni näjza naani, colsäl'ni detzyu' cadre nacäy te ro'c gonduxhni chubejli reläjyni.” <sup>14</sup> Sa'csi xhidajl najc reni bidon luxh guxii najc reni bibe.

*La sajc quiixni impuest*

(Mr. 12:13-17; Lc. 20:20-26)

<sup>15</sup> Dxejcti sii refarisee, bia'nreni diidx siguilreni xho gunijt Jesús te diidx te guiga'ni. <sup>16</sup> Ni'c baxhalreni gaii xpejnreni näjza gaii bejn ni nadxaag Herodes te räjpreni loj Jesús: —Mastr, anajnnu rniilu ganax didxlii, ruluiizalu xtiidxpac Dios, luxh dilu jiu xhi rni rebejn, sa'csi dilu cue bejn ni sajcro lo stee bejn. <sup>17</sup> Gunii loonu, pues: ¿La laaca najc quiixnu impuest lo César ni rnibee loonu o et laadi?

<sup>18</sup> Dxejc gucbee Jesús xhet laadi xhigab cayujnreni neñ lastooreni, dxejc räjpni lojreni: —¿Benguijdx! ¿Xhicuent rlajztu guquiiltu narä? <sup>19</sup> Colguluii te meel löä.

Dxejc badeedreni te meel ni laa denario. <sup>20</sup> Che bahuii Jesús loj meelga, gunabdiidxni lojreni, räjpni:

—¿Chuni'c caj lo meelre?

<sup>21</sup> Dxejc räjpreni:

—Loj César.

Dxejc räjp Jesús lojreni:

—Colgudeed lo César ni riäj' xca' César, colgudeedza lo Dios ni riäj' xca' Dios.

<sup>22</sup> Che biejn diajgreni rediidxre, bidxeloduxhreni. Dxejc basaanrenini, sä'tireni.

*Canabdiidxreni xho gac che guibansac rebejn*

(Mr. 12:18-27; Lc. 20:27-40)

<sup>23</sup> Lagajc dxejga bidzujn gaii reni laa saducee, reni di chalilajz sibansac bejn loj rebengut. Gubigreni loj Jesús, gunabdiidxreni, <sup>24</sup> räjpreni:

—Mastr, si'c naj toMoisés, palga yu' te bejn ni abachnaa, luxh ruti xi'nni che guetni, riäj' guchnaa bejtzni biuudga te chu xi'nreni xcuent bejtzni. <sup>25</sup> Mbaj. Loonu yu' gajdz niguii ni najc bejtz sa'reni. Betzgoolga bachnaa, dxejc gujtni, luxh di xi'nni niu'. Basa'nni chäälni lo bejtzni. <sup>26</sup> Sigajcza gusajc ni ro'p bejtzni; sigajcza gusajc ni riojn bejtzni. Si'c huinuu gujc che basa'li guigajdz bejtzga. <sup>27</sup> Sas che gujt guiraareni, näjza gunaaga gujt. <sup>28</sup> Che guibansac rebejnnga lo rebengut, ¿chu tej lo rebejtzga gac chäälpac gunaaga, ni guiraareni bachnaareni gunaaga?

<sup>29</sup> Dxejcti badzu' Jesús diidxre lojreni, räjpni:

—Et laadi rujntu xhigab sa'csi ditu gacbee xtidx Dios niclaza xcuent xcäl'rnibee Dios.

<sup>30</sup> Ni che guibajn rebengut, diru yäl'ruchnaa chu, diruza bejn gudeed rexindxa'preni guchnaa. Dxejc sajcreni si'c rexangl Dios ni yu' xhaguibaa. <sup>31</sup> Dxejc xcuent yäl'rbansac loj rebengut, ¿la gajdtu goj reguijtz ni bacuaa toMoisés che räjp Dios xcuent retoxtad-golddoonu: <sup>32</sup> “Narä nacä Xtios Abram, Xtios Isaac, näjza Xtios Jacoob”, ä? Dios di gac Xtios bengut, Xtioistis rebejn ni nabajn najcni.

<sup>33</sup> Che biejn diajg rebejn xtidx Jesús, bidxeloduxhreni diidx ni ruluiini.

*Diidx ni maazru sajc*

(Mr. 12:28-34)

<sup>34</sup> Che gucbee refarisee basäu Jesús ro' resaducee, bidojpreni, bachaagreni diidx. <sup>35</sup> Dxejc tejreni nani najn leii, rlajzni guquiilni Jesús ni'c gunabdiidxni lojni räjpni:

<sup>36</sup> —Mastr, ¿xhi diidx ni gunibee Dios sajcro lojreni caj lo leii?

<sup>37</sup> Räjp Jesús lojreni:

—Nani rni sree: “Huinälajz Dad Xtioslu guideb lastoolu, guideb xaimlu, näjza guidebgajc xcäriejnlu.” <sup>38</sup> Diidxre ni gunibee Dios najc ni sajcro, luxh ganidni siädni

loj rextidx Dios. <sup>39</sup> Ni ro'pga sigajcza najcni: “Huinälajz resa'lu sigajc ni sanälajzlu lagajc luj.” <sup>40</sup> Guiro'p remandamientre nanab te guzoob bejn guiraa rediidx ni bacuaa toMoisés näjza ni bacuaa redade' nani gunii xtidx Dios.

*¿Chu xi'n najc Crist?*

(Mr. 12:35-37; Lc. 20:41-44)

<sup>41</sup> Lałni tre' refarisee, gunabdiidx Jesús lojreni, räjpni:

<sup>42</sup> —¿Xhi rujntu xhigab xcuent Crist? ¿Chu xi'n najcni?

Räjpreni lojni:

—Laani najc xajg toDavid.

<sup>43</sup> Räjp Jesús lojreni:

—¿Xhicuent räjp David “Xtadä” lojni che basanij Sprit Dxaan xten Dios lastooni? Ni'c bacuaa toDavid rediidxre:

<sup>44</sup> Dad Dios räjp lo Xtadä,

gurej xladbeä lał ni gudzugä guiraa reni rdxe'ch lojlu ladzni'lu.

<sup>45</sup> Palga lagajc David rnii: “Dad” lojni, ¿xho mood najcni xi'nni?

<sup>46</sup> Dxejc rut gujcdi badzu' nicla te diidx lojni, luxh dxejliga rutru gojpdı xhi diidx niniabdiidxrureni lojni.

## 23

*Rucuaquij Jesús refarisee näjza rebejn nani najn leii*

(Mr. 12:38-40; Lc. 11:37-54; 20:45-47)

<sup>1</sup> Dxejc räjp Jesús loj reben xhidaalga näjza loj rexpejn pacni:

<sup>2</sup> —Rebejn ni najn leii näjza refarisee rajp yäl najn te gusule'reni xleii Moisés. <sup>3</sup> Ni'cni colguzoob guiraa rextiidxreni, na'c guntu sa' recos ni rujnreni, sa'csi laareni rniireni xhini'c guntu, dxejcti lagajc laareni direni gun ni rnibeereni guntu. <sup>4</sup> Rnibeereni gun rebejn cos naganduxh ni najc si'c te cargw naduxh ni di gac guu bejn, per laareni nicla con te bicuenaareni direni gusniibni. <sup>5</sup> Guiraa recos ni rujnreni, rujnrenini te fiitis rebejn. Rchaglajzreni rcaj lo cuajsureni näjza roxhajgwreni recaje' cadre yu' tla' guiijt ni caj xtidx Dios lojni. Rustioolzareni xi' xhajbreni. <sup>6</sup> Rlajzreni ganidreni tedreni lo mex che gal te lanij; rlajzreni cuereni lo rebancw ni suga' delant nen reguidobäz. <sup>7</sup> Sigajcza rlajzreni guchagro' bejn naareni nez lo guii, guiniiza rebejn “Mastr” lojreni.

<sup>8</sup> Na'c gusaantu guinii rebejn “Mastr” lojtu, sa'csi tejtisni yu' ni najc Mastr, laani najc Crist. Peta la'tu guiraatu najctu tejsi sa'tu. <sup>9</sup> Na'c guiniitu “Xtadä” loj te ben guedxliuj sa'csi yu' tejtis ni najc Xtadtu, ni'c najc Dios ni yu' xhaguibaa. <sup>10</sup> Na'cza gusaantu guiniireni lojtu “Mastr” sa'csi yu' tejtis Mastr, ni'c najc Crist. <sup>11</sup> Ni yu' si'c mos lojtu ni'c najc benroru loj resa'ni. <sup>12</sup> Sa'csi chutis ni rchaloni najcni benro lo sa'ni, ni'c sustuiyä lojni, chutis ni najc nadolajz loj Dios, ni'c sunäni benro lo sa'ni.

<sup>13</sup> ¿Proobzatu remastr xten leii näjzatu refarisee, najctu benguijdx! Sa'csi rudxojntu jiu' rebejn loj xcäl rnibee Dios. Lagajc la'tu ditu jiu' luxh dizatu gusaan jiu' rebejn ni rlajz jiu'.

<sup>14</sup> ¿Proobzatu remastr xten leii näjzatu refarisee, najctu benguijdx! Sa'csi rudzucajtu roliz renanbiuud lałsi cabedx canabduxhtu lo Dios, naatu gusguetu bejn si'c. Sa'csi rujntu scree, siabduxh fis xten Dios yejctu.

<sup>15</sup> ¿Proobzatu remastr xten leii näjzatu refarisee, najctu benguijdx! Zijt rijtu lo renezyuj näjza lo nisdoo te guntu gaan guchaa mase tejtis bejn xmoodni te ganni Dios si'c rajntuni. Luxh che ahuililajz bejnga xtiidxtu, rujntuni tio'p huält maazru te xi'n gabijl loj ni najctu.

<sup>16</sup> ¿Proobzatu, najctu si'c lotiä'p, rlajztu guluiitu nezyuj! La'tu ni rnii palga te bejn guiniliipac xtiidxni guzä'tni guidoro, xhet sajcdi xtiidxni. Palga guiniliipacni guzä'tni oor ni yu' nen guidoo, dxejc sii rniliini dxejc nungäjł guzoobni xtiidxni. <sup>17</sup> ¿Ben nayääl, benlotiä'p! ¿Xhini'c sajcrı? ¿La oor la guidoro ni rundxaan oorga? <sup>18</sup> Rniizatu: “Palga te



bejn guiniliipacni guzä'tni lo bacuug ni yu' nen guidoro, di xcuendi xtiidxni. Luxh palga yu' chu guiniliipac guzä'tni gojn ni dzuub lo bacuug, dxejc sii rniliipacni dxejc nungäjil gusoobni xtiidxni.”<sup>19</sup> ¡Ben nayääl, ben lotiä'p! ¿Xhini'c sajcrú? ¿La gojn o la bacuug nani rundxan gojnga, ä? <sup>20</sup> Nani ruzä't lo bacuug che rniliipacni, et ganaxdi lo bacuug ruzä'tni, näjza guiraa ni tre' lo bacuug ruzä'tni. <sup>21</sup> Ni ruzä't guidoro che rniliipacni, et ganaxdi guidoro ruzä'tni, näjza Dios ni rbäjzza nen guidoro ruzä'tni. <sup>22</sup> Sigajcza ni ruzä't guibaa che rniliipacni caguzä'tzani yagxhilo xten Dios näjza lagajc Dios ni sobga' ro'c.

<sup>23</sup> ¡Proobzatu remastr xten leii näjzatu refarisee, najctu benguijdx! Bedzxtiil, anis näjza comin ni rajptu, rudeedu lo Dios tej tantga yejc cade te tzuu, niluxh ditu jiu ni sajcrú lo xtidx Dios, cadre caj xcuent yäl'nabanya, yäl'rulazlajz, näjza yäl'rillilajz. Deeza ni riäjilpac guntu laj ni cayujnzatu steega. <sup>24</sup> ¡La'tu, lotiä'p ni rlajz guluii nezyuj! Riutu rediidx ni guxii sajcrú, niluxh rediidx ni sacduxh ditu jiuni, najctu si'c bejn ni rbää te rex lo xpla'tni dxejcrú räjmni te cameii.

<sup>25</sup> ¡Proobzatu remastr xten leii näjzatu refarisee, najctu benguijdx! Rusiatu detz bas näjza pla't luxh nen ni najc-dxuudx. Sigajcza la'tu riuduxhtu recostumbr, luxh lastootu guidxa yäl'gubaan näjza yäl'rdxe'chlajz. <sup>26</sup> Farisee ni najc lotiä'p: gudibxgaa nen bas näjza nen pla't, dxejc näj dejtznii sajcrú naya.

<sup>27</sup> ¡Proobzatu remastr xten leii näjzatu refarisee, najctu benguijdx!, sa'csi najctu si'c rebaa ni nacchesa'c; nolbäjreni, saru rluuini, luxh nenreni guidxa dzujt xte bengut näjza bäl'yudx. <sup>28</sup> Sigajcza najctu la'tu. Saru rujn lojtu, rchalo rebejn najctu bensa'c, niluxh lastootu guidxa yäl'rusguee näjza yäl'guyalajz.

<sup>29</sup> ¡Proobzatu remastr xten leii näjza refarisee, najctu benguijdx! Runcheetu xpaar edade' ni gunii xtidx Dios galoo, rusucheezatu ro' xpaar rebejn ni gujc bensa'c, <sup>30</sup> dxejc rniitu: “Paru nibajnnu nen redxer ni gubajnnu retoxtadgoldoonu dinu niacnäj reni bagu't edade' ni gunii xtidx Dios.” <sup>31</sup> Lagajc con rediidxre rcäjptu najctu rexajg renani bagu't edade' nani gunii xtidx Dios. <sup>32</sup> ¡Colguscuääz guntu sa' recos ni guläxtiej retoxtadgoldootu!

<sup>33</sup> ¡La'tu ni najc si'c bäl, la'tu ni najc si'c te bitiiääz guidxa bäl'nialajz! ¿Xho guntu te na'c chäätu gabijl par tejpas? <sup>34</sup> Ni'cni, guxhalä rexpenä ni guinii xtidxä, näjza bennajn, näjza mastr. Luxh yu'reni sugu'ttu sucuaatureni lo cruzj; yu'zarenii siguijntu nen reguidobäz, sirinajlturenii guejdx por guejdx. <sup>35</sup> Si'cza yejctu jiajb xtiejn guiraa rebennadolajz ni bagu't bejn xchejli to Abel ni gujc nadolajz, xchejliza Zacarías, xi'n Berequías, ni bagu'ttu nen guidoro gajxh lo bacuug. <sup>36</sup> Rniliäpac lojtu, dojl xten guiraa recosga siajb yejc rebejn ni tre' lo guedxliuj naj.

*Jesús biin xcuent guedx Jerusalén*

*(Lc. 13:34-35)*

<sup>37</sup> Räjzpa Jesús:

—¡Jerusalén, Jerusalén! Xpejnlu rugu't edade' ni rnii xtidx Dios, rucuaazarenii guij yejc rebejn ni ruxhal Dios te gusule'reni xtiidxni lojtu. ¡Balti huält rlazä nutie'ä la'tu si'cni rutie' guidco'c rexquidbäzni nen xhigani, per ditu nicäjb! <sup>38</sup> Colhuii xho jianxteb xquidootu cuälazrenini. <sup>39</sup> Rnixgää lojtu, naj dirutu fii loä, dxejli che guiniitu: “Benle' Dios nani siääd xcuentni.”

## 24

*Jesús räjp sibijl guidoro*

*(Mr. 13:1-2; Lc. 21:5-6)*

<sup>1</sup> Birii Jesús nen guidoro te asiini, dxejc gubig rexpejn pacni lojni, gusloj caguluiireni reyuduxhga lojni. <sup>2</sup> Dxejc räjp Jesús lojreni:

—¿La ruhuiitu guiraa reyu're? Rniliäpac nicla tej guij di jia'n yejc sa'ni ree; guiragajc reyu're sibijl.

*Cos ni guluiloj gac fis**(Mr. 13:3-23; Lc. 21:7-24; 17:22-24)*

<sup>3</sup> Dxejcti huijreni yejc te dajn ni laa Oliib. Che gurej Jesús ro'c, biääd rexpejn<sub>pacni</sub> lojni te xhiga'tz gunabdiidxreni lojni:

—Rlaaznu guiniilu loonu guc gac guiraa recosre. ¿Xhi seen guluiloj ameer jiäädlu näjza che ameer nitloj guedxliuj?

<sup>4</sup> Dxejc räjp Jesús lojreni:

—¡Colnatiro te rut gusgueedi la'tu! <sup>5</sup> Sa'csi su' xhidajl reni jiääd, naareni: “Narä nacä Crist”, luxh susgueerani xhidajl bejn. <sup>6</sup> Siejn diajgtu xcuent cadro cayajc guer, näjza xcuent cadro rlajz chu guer, na'c guidxejbtu sa'csi si'c nungäj<sub>l</sub> gac, niluxh gajd gal<sub>di</sub> nitloj guedxliuj. <sup>7</sup> Sa'csi siäjs te nación sidilnäj<sub>ni</sub> stee nación; te yäl<sub>rn</sub>ibee sujn guer con stee yäl<sub>rn</sub>ibee, luxh su' gubijn, su' yäl<sub>g</sub>uijdx, su'za xuduxh xhidajl lajt. <sup>8</sup> Luxh guiraa redee cuäxtiejtis retribajwduxh ni churu chu.

<sup>9</sup> Dxejc gutedreni la'tu ladz<sub>naa</sub> rebendoj<sub>l</sub> te gusacsireni la'tu, te gugu'tzareni la'tu, luxh guiraa rebejn sidxe'ch lojtu sa'csi sanälajz<sub>tu</sub> narä. <sup>10</sup> Nen redxejga, xhidajlreni sibälaz xcäl<sub>rl</sub>ililajzreni, sidxe'ch lo sa'reni, suto' sa'reni lo sa'reni. <sup>11</sup> Dxejc siricaj xhidajl bejn ni rusguee, gäbreni xcuent Dios rniireni, luxh susgueerani xhidajl bejn. <sup>12</sup> Sa'csi lacti suduxh yällatsiaj lo guedxliuj, diru bejn chanälajz sa'ni. <sup>13</sup> Dxejcti bejn ni chasanäj xnezyujtis Dios, ni'c sun gaan xca'ni yäl<sub>n</sub>abaj<sub>n</sub> par tejpas. <sup>14</sup> Luxh sisiule' xtidx Dios guideb lo guedxliuj te gacbee guiraa rebejn guedxliuj xtiid<sub>xni</sub>; dxej<sub>cru</sub> jiääd fis xten Dios.

<sup>15</sup> 'Cheni fiitu asobga' te benguidxduxh nen<sub>u</sub> yu' ni najc dxan nen<sub>u</sub> guidoro, si'cni gunixgaa toDaniel ni gunii xtidx Dios gacni, bejn ni go<sub>l</sub> dee sugacbeeni nani rol<sub>ni</sub>, <sup>16</sup> dxejc renani rbäjz lo guedx Judea, suguxun<sub>reni</sub> gucuat<sub>z</sub>lojreni nen<sub>u</sub> dajn. <sup>17</sup> Bejn ni niä'p yejc xyu'ni dxejga di gal<sub>di</sub> jiäjt<sub>ni</sub> te chalääni xhixt<sub>enni</sub> nen<sub>u</sub> xyu'ni; <sup>18</sup> bejn nani cayuj<sub>n</sub> dzuun lo niaa, na'c guibi'ni niclaza chaxhiini xhajb<sub>ni</sub>. <sup>19</sup> ¡Proobza regunaa ni nuxi'n, näjza reni cagusiä' báz nen<sub>u</sub> redxejga! <sup>20</sup> Colnabduxh loj Dios xhet nendi redxej ni cayacnalduxh<sub>di</sub> nanab guxun<sub>ditu</sub>, niclaza dxej che rusilajz bejn. <sup>21</sup> Sa'csi su' trabajwduxh nen<sub>u</sub> redxejga, sa'ni gajd bejn fii dxejli ni guzobloj guedxliuj, luxh che tedni, diru guibi' chuni. <sup>22</sup> Luxh palga di Dios gutiu' yejc redxejga, nicla tej bejn di laa. Luxh suti' Dios yejc redxejga sa'csi rinälajz<sub>ni</sub> reni aguleni.

<sup>23</sup> 'Nen redxejga palga yu' chu naa lojtu: “Colh<sub>uii</sub>, aree Crist”, o “Colh<sub>uii</sub> ani arec”, na'c chalilajztuni. <sup>24</sup> Siääd xhidajl niguii ni rusguee, gäbreni najcreni crist; sidzuj<sub>n</sub>za rebejn ni rusguee ni gäb xtiid<sub>xpac</sub> Dios rusule'reni; luxh sujnreni remilagw<sub>r</sub> sujnzareni senro, parsi gusgueerani, susgueduxh<sub>reni</sub> rebejn, niluxh rlajzreni gusgueezareni rebejn ni agule Dios, ni rililajz xtiid<sub>xni</sub>. <sup>25</sup> Agunixgää lojtu xhini'c gac. <sup>26</sup> Ni'cni palga naareni lojtu: “Bah<sub>uii</sub>, a crist yu' nez lo reyubijdz”, na'c chäätu; o palga naareni: “A crist suga' nen<sub>u</sub> yu're”, na'c chalilajzt<sub>ureni</sub>. <sup>27</sup> Sa'csi si'cni guideb xhaguibaa rien<sub>u</sub> che rdinya' ladjiaa näjza ladjiätli, si'cza suhuiitu loä, Xi'n Dios ni gujc Niguii, cheni jiälsacä lo guedxliuj. <sup>28</sup> Ni najntu cadro naga' te mangut, ro'c re' regolbetz.

*Cheni jiädsac Xi'n Dios ni gujc Niguii**(Mr. 13:24-37; Lc. 21:25-33; 17:26-30, 34-36)*

<sup>29</sup> Räjpzani:

—Cuantsi ted guiraa retribajwduxh, sicäjy lo gubijdx, diruza bäi gusanij, sitejbza rebajl ni yu' xhaguibaa, sinibduxhza guideb xhaguibaa. <sup>30</sup> Dxejcti suhuiireni xhaguibaa seen xten Xi'n Dios ni gujc Niguii, luxh guiraa rebejn ni rbäjz nen<sub>u</sub> guiraa reguejdx lo guedxliujre, sonduxh<sub>reni</sub> suhuiireni siääd Xi'n Niguii lo reza xhaguibaali. Siäädni con yäl<sub>rn</sub>ibee näjza yäl<sub>rd</sub>imbichaduxh. <sup>31</sup> Dxejc suxhal<sub>ni</sub> rexangl<sub>ni</sub> con te trompet ni guscuedxa'reni dipduxh te guire' guiraa rebejn ni aguleni lo guidajp lajd squiin guedxliuj, guideb lo guedxliuj näjza xhaguibaa.

<sup>32</sup> ¡Colguisieed ni rul<sub>uii</sub> yajg iigw! Che naren renaani che cabääni be'n, asiääd bäi curex, <sup>33</sup> sigajcza cheni fiitu cayajc guiraa recosre, sacbeetu asiädgajxh fis, rolä'li



abidzujñni. <sup>34</sup> Rniliápac lojtu, guiraa redee sajc laḷ ni nabajñ gaii rebejñ ni suga' ree naj. <sup>35</sup> Guibaa nájza guedxliuj sinitloj, niluxh xtidxä di nitloj.

<sup>36</sup> 'Rut najndi xhi dxej, xhior gacni, nicla rexangl Dios, niclaza Xi'n Dios; Dad Diostis najñ.

<sup>37</sup> 'Sigajcni gujc neñ redxej che gubajñ toNoé, si'cza gac che jiälä Xi'n Dios ni gujc Niguui. <sup>38</sup> Neñ redxe galoo, cheni gajd nisguiduxhga jiajb, rebejñ ni nabajñ dxejc cayajwreni, cayä'reni, caguchnaareni, cagudeedza bejñ xindxa'preni guchnaa, dxejli cheni biu' Noé neñ barcwro. <sup>39</sup> Direni niacbee xtiidxni; cheni biäädli nisguiduxh ni sanä guiraareni dxejcru gucbeereni. Sigajcza gacni che jiälsacä narä Xi'n Dios ni gujc Niguui. <sup>40</sup> Neñ redxejga palga cayujñ tio'p bejñ dzuun lo niaa tejni guibee, steeni sia'n. <sup>41</sup> Palga cayo't tio'p gunaa xobniil, tejni guibee, steeni sia'n.

<sup>42</sup> 'Ni'cni col̄susiñ, sa'csi ditu gan xhi dxej jiääd Dad xtentu. <sup>43</sup> Col̄ganchee, paru niacbee baxhwaan xten yu' cor̄ yääl niääd gubaan ni siädlan rolijzni, nisiusiñni dxejc, dini nusaan niu'ni rolijzni te cuanni. <sup>44</sup> Ni'cni col̄susiñza la'tu, sa'csi siääd Xi'n Dios ni gujc Niguui lagajc or ni ditu gun xhigab jiäädni.

#### *Xcuent te mossa'c nájza te mosguijdx*

*(Lc. 12:41-48)*

<sup>45</sup> '¿Chuni'c najc mossa'c ni ruzoob diidx, ni basannäj xlamñni rebejñ ni yu' rolijzni te gudeedni xhi gaureni ä? <sup>46</sup> Chicbaa mos ni saru cayujñ xtzuunni che guidzujñ xlamñni.

<sup>47</sup> Rniliápac lojtu, lam̄ga susa'nni sa' mosga te fiini guiraa xhixtenni. <sup>48</sup> Dxejc palga mosga di gusoob xtidx xlamñni, gunni xhigab: “Sacladuxh guibi' xlamä”, <sup>49</sup> dxejc guisloj cagusacsíni resamosni, guislojni gaunäjni, yänäjni rebengu. <sup>50</sup> Dxejc sidzujñ xlamñni dxej che dini gun xhigab jiäädni, luxh or ni dini gan guidzujñni. <sup>51</sup> Dxejc siguinduxhni mosguijdxga, surilaagwnini te guidxagsa'ni sabenguixdxni, dxejc sonduxhni, chubejli reläjyni.

## 25

#### *Xcuent tzuu gunaa*

<sup>1</sup> Räjpa Jesús:

—Pues xcäl̄rnibee Dios najc si'c tzuu gunadxa'p nani cua' xcandilse'treni te huijreni te sa'. <sup>2</sup> Gaii regunaaga nasin, sgaiireni nayääl. <sup>3</sup> Reni nayäälga sanäreni xcandilreni, niluxh direni nica' sijn se't. <sup>4</sup> Niluxh reni nasinga sanäreni sijn se't te guze'creni neñ xcandilreni. <sup>5</sup> Sa'csi bi'nga di nidzungaj, gunaa bacal̄ regunadxa'pga, gudiejstireni. <sup>6</sup> Dxejc si'cti garol yääl, biejn te xse' ni räjpa: “Bi'n asiääd, col̄chäj, col̄chachaglojni.” <sup>7</sup> Guiraa regunaare huistieguxunreni, dxejc bensa'creni xcandilreni, te cuaguijreni. <sup>8</sup> Dxejc guigaii regunayääl räjpreni loj reni nasin: “Col̄gunidxlaa te bo'c se't gusanijnu xcandilnu, sa'csi arlajzni jiuini.” <sup>9</sup> Dxejcti regunanasin räjpreni lojreni: “Digac dini gal̄ nicla par nuurnu nicla par la'tu. Col̄chäj cadro ruto'reni se't col̄chazii xse'ttu.” <sup>10</sup> Lal̄ni sasii guigaii regunaa-nayäälga se't, bidzujñ bi'n. Regunaa-sin̄ ni cabäjz bi'n biunäjrenini lo sa', biäuuti ro lä'. <sup>11</sup> Cheni bidzujñ regunayäälga, räjpreni: “Dad, Dad, baxhal ro lä'.” <sup>12</sup> Dxejc räjpreni lojreni: “Rniliápac lojtu, dina gumbeätu.”

<sup>13</sup> Dxejc Jesús räjpreni lojreni:

—Col̄susiñza, sa'csi ditu gan nicla xhi dxej nicla xhi or siääd Xi'n Dios ni gujc Niguui.

#### *Xcuent lam̄ ni badeed meel*

<sup>14</sup> 'Xcäl̄rnibee Dios xhaguibaa najc si'c te bejñ ni agojl guirii chääni zijt te biaj. Gurejdxni rexmosni, badeedni meel lojreni.

<sup>15</sup> 'Lo tejni badeedni si'cti gaii miḷ meel, lo steeni badeedni si'cti tio'p miḷ, dxejc steeni cua' te miḷ. Loj tejgani badeedni si'cti ni rujñni xhigab sajc gunnäjreni dzuun, dxejcti biriini xpiajni. <sup>16</sup> Ni cua' gaii miḷ meel bejñ te dzunro, bejñni gaan sgaii miḷ meel. <sup>17</sup> Sigajcza ni cua' tio'p miḷ meel, bejñni gaan stio'p miḷ. <sup>18</sup> Dxejcti ni cua' te miḷ meel, huicua'tzni xmeel xlamñni neñ te gueed ni gudäänni lo yuj.

<sup>19</sup> 'Gudejdti balti bäii, dxejc gubi' xlam remosga, bejnii cuent loj guiraareni. <sup>20</sup> Che bidzujñ ni cua' gaii miñ meel, bidzunnäjni sgaii miñ meel ni bejnii gaan, räjpni loj xlamni: "Dad, baniidx guejblu gaii miñ loä. Aree sgaii miñ meel ni benä gaan." <sup>21</sup> Räjp xlamni lojni dxejc: "Hueenca, mos hueen najclu, rusoobzalu xtidxä. Sa'csi gujclu bensa'c con te cos báz, naj sunidxä guinibeelu xhiroobru. Biu' loä, bibalaznäj narä." <sup>22</sup> Che bidzujñni ni cua' tio'p miñ meelga, räjpni loj xlamni: "Baniidx guejblu tio'p miñ meel loä, aree stio'p miñ meel ni benä gaan." <sup>23</sup> Räjp xlamni lojni: "Mbaj. Mos hueen najclu rusoobzalu diidx. Sa'csi gujclu bensa'c con te cosbáz, naj sunidxä guinibeelu xhiroobru. Biu' loä, bibalaznäj narä." <sup>24</sup> Che bidzujñ mos ni cua' te miñ meel, räjpni lo xlamni: "Dad, ananä najclu te bejn ni di gulazlajz; rca'lu cose'ch cadre dilu nibe'c binij, rutojpszalu cadre dilu nutie'ch binij. <sup>25</sup> Ni'cni bidxebä, huicua'tzä xmeellu nen yuj. Niluxh axh aree xmeellu." <sup>26</sup> Dxejc räjp xlamni lojni: "¡Mos guijdx, mos ploj! Najnlu rca'ä cose'ch cadre dina nibe'cä binij, rutopä cadre dina nutie'chä binij. <sup>27</sup> Riäjñ nisa'nlu xmelä nen te bancw te che nibi'ä nicasacä xmelä con xi'nni ni niujni gaan." <sup>28</sup> Dxejc räjpni loj reni suga' ro'c: "Colgudzucaj te miñ meel ni ca'ni colgudeedni loj ni rajp tzuu miñ meel. <sup>29</sup> Sa'csi loj ni rajp sudedäru, niluxh ni xhet rajpdi sudzucaä tudxe'n nani rajpni." <sup>30</sup> Dxejc räjpni: "Colca' mosre ni xhet sajcdi, colguzälñi lo yälñacäy, cadre chu yälñronduxh, näjza yälñrajw reläjy bejn."

### *Yälñuxhtis xten reguejdx*

<sup>31</sup> 'Che jiädsac Xi'n Dios ni gujc Niguui con yälñrdimbicha' xtenni, siädnäni rexangl Dios. Dxejc sibejni lo tron ni rdimbicha' xtenni te guinibeeni. <sup>32</sup> Dxejc sideojp nez lojni guiraa reben guedxliuj. Dxejc sibeni lojreni, silia'ni sa'reni si'c rujn te baxtoor cheni rbeni rexiil loj redxib, te rlia'reni loj sa'reni. <sup>33</sup> Suzujni rexiil xladbeeni dxejc redxib xladbäjgwni. <sup>34</sup> Dxejc säjb reii loj reni suga' xladbeeni: "Coltaa, la'tu ni benle' Xtaä. Coljiu' lo yälñnibee ni guc-chee cheni guzoblojli guedxliuj. <sup>35</sup> Sa'csi che calanä la'tu baniidx xhi gudauä, che cayolä, la'tu baniidx xhi gu'ä. Che cuanzaä si'c te benzijit, la'tu banidxlaatu cadre bia'nä. <sup>36</sup> Che xheti xhabä, la'tu baniidxni, che gucxhuä, la'tu biädhuiitu narä, che guyu'ä nen latzguiib, biädhuiitu narä." <sup>37</sup> Dxejc sinii reni suga' xladbeeni, säjbreni: "Dad, ¿guc bahuiinu gulaanlu, baniidxnu xhi gudajwlu? ¿Guc bahuiinu cayojllu, baniidxnu xhi gu'lu? <sup>38</sup> ¿Guc bahuiinu najclu si'c te benzijit, baniidxnu cadre bianlaalu, o biäädx xhajblu, baniidxnu xhi gojtlu? <sup>39</sup> O ¿guc bahuiinu cayacxhuulu, o yu'lu nen latzguiib, biophuiinu lojlu?" <sup>40</sup> Dxejc reiiga säjb lojreni: "Rniliápac lojtu, xhitis xhi bejntu loj te rexpenä ni rnii xtidxä mase proobreni, lagajc loä bejntu recosga."

<sup>41</sup> 'Dxejc säjpszani loj reni suga' ladbäjgwni: "Colguibicaj loä, benguijdx, colchäj lo balduxh ni cayejc par tejpas ni cayejc par bendxab ni rnibee näjza rexpendxabni. <sup>42</sup> Sa'csi gulanä, luxh ditu nuniidx xhi niauä; biolä, per ditu nuniidx xhi niä'ä; <sup>43</sup> cuanzaä si'c te benzijit, luxh ditu nunidxlaa cadre nia'nä, biädxza xhabä, niluxh ditu nuniidx xhi niacwä; gucxhuä, guyu'äza nen latzguiib, niluxh ditu niädhuii loä." <sup>44</sup> Dxejc laareni säjbreni: "Dad, ¿guc bahuiinu calaanlu, o cayojllu, o canzajlu si'c te benzijit, o cayäädx xhajblu, o cayacxhuulu, o yu'lu nen latzguiib, luxh dinu niacnäjl?" <sup>45</sup> Dxejc säjb reiiga lojreni: "Rniliápac lojtu, loj xhitis ni ditu niacnäj rebejn ni rililajz xtidxä, mase proobreni naräni ditu niacnäj." <sup>46</sup> Dxejcti sij rebejnre lo yälñrusacsí par tejpas, per rebejn ni nadolajz, ni agule Dios, sijreni lo xcälñabajñ Dios par tejpas.

## 26

### *Bejnreni xhigab xho guiniaazreni Jesús*

(Mr. 14:1-2; Lc. 22:1-2; Jn. 11:45-53)

<sup>1</sup> Che gulujx gunii Jesús rediidxre, räjpni loj rexpejnñpacni:

<sup>2</sup> —Anajntu stio'p dxejtis cayäädx gac lanij ni laa pascw. Luxh suteedreni narä, Xi'n Niguui ladzñaa reni gucuua narä lo cruz.

<sup>3</sup> Dxejc bidojp rebejn ni rnibee rebixhojz, näjza remastr xten leii, näjza rebengool lo rexpejn Israel. Lo xle' Caifás, ni rnibee loj rebixhojz, bidojpreni. <sup>4</sup> Ro'c bachaagreni diidx xho guiniaazreni Jesús con yälrusguee, te ju'trenini. <sup>5</sup> Luxh räjpreni lo sa'reni:

—Na'c jiennuni nejn redxe lanij, te di gun rebejn bieiduxh.

*Te gunaa ni biädnä perfum*

(Mr. 14:3-9; Jn. 12:1-8)

<sup>6</sup> Che yu' Jesús guedx Betania, rolijz Simón te bejn ni basiajncni che ral tiejxhni, <sup>7</sup> ro'c gubig te gunaa lojni, ca'ni te vasguij ni laa onix, guidxani te perfum ni sajc melro. Che sobga' Jesús lo mex, bachajni perfum yejc Jesús. <sup>8</sup> Che bahuii rexpejn pacni xhi cayujnni, bidxe' chreni, gusloj cayäjpreni:

—¿Xhicuent casälxlia'ni perfumga? <sup>9</sup> Perfumre niajc nido'ni, nirii xhidajl meel lojni te niacnäjni rebenproof.

<sup>10</sup> Biejn diajz Jesús xhi caniireni, dxejc räjpni lojreni:

—¿Xhicuent cadxe' chnäjtü gunaare? Ni te coshueen najc dee nani bejnni loä. <sup>11</sup> Ni guirasi dxej su' rebejn ni xhet rajpdi lojtu, peta narä guxii dxej su'ä lojtu. <sup>12</sup> Nani bejn gunaare che bachajni perfumre guideb lagaa tiexhä, najcni par guzucheeni narä te guiga'tzä. <sup>13</sup> Rniliápac lojtu, cadrotis gusule'reni xtidxä lo guideb guedxliuj, sujyreni diidx xcuent ni bennäj gunaare narä, te guinaj lajzreni gunaare.

*Judas bato' Jesús*

(Mr. 14:10-11; Lc. 22:3-6)

<sup>14</sup> Dxejc lo retzubitio'p rexpenpac Jesús birii tej ni laa Judas Iscariote, huininäjni rebejn ni rnibee loj rebixhojz, <sup>15</sup> räjpni:

—¿Lac guniidxtu loä te gutedä Jesús ladznaatu?

Dxejc badeedreni galbitzuu melpla't lojni. <sup>16</sup> Dxjecli caguil Judas xho gutedni Jesús lojreni.

*Lult xchej xten Jesús*

(Mr. 14:12-25; Lc. 22:7-23; Jn. 13:21-30; 1Co. 11:23-26)

<sup>17</sup> Primer dxej lanij, dxej ni rajwreni yätxtiil ni di saguij, gubig rexpejn pacni loj Jesús, räjpreni lojni:

—¿Caro rlajzlu chozucheeni te gaulu xchej xten lanipascw?

<sup>18</sup> Dxejc räjpni lojreni:

—Colchäj lo guejdx rolijz te dade', colye'tz lojni: “Si'c naj Dad mastr: Asiäddzungajxh xorni, ni'cni rolijzlu gaunäjni rexpejn pacni xchej lanipascw.”

<sup>19</sup> Bejnti rexpejn pacni si'cni gunibee Jesús gac, bazucheereni xchej xten pascw.

<sup>20</sup> Che biu' guxhijn, sobga' Jesús lo mex con retzubitio'p xpejn pacni. <sup>21</sup> Laļ ni cayajwreni räjpni lojreni:

—Rniliá lojtu, yu' tejtü ni guto' narä.

<sup>22</sup> Dxejc guc-huinuxh lajzreni, räjpreni lojni:

—Dad, ¿andi naräni?

<sup>23</sup> Dxejcti räjp Jesús lojreni:

—Ni gaunäj narä nejn tejtis pla't, laa ni'cni guto' narä. <sup>24</sup> Xi'n Dios ni gujc Niguii sajc si'ctis ni caj loj guijt zten Dios, per gunatiro bejn ni guto'ni. Huenru na'c niajl bejn ga.

<sup>25</sup> Dxejcti gunii Judas, ni caguto' Jesús, räjpni:

—Mastr, ¿andi naräni?

Jesús räjp lojni:

—O'n, lujni.

<sup>26</sup> Laļ ni sobga'reni cayajwreni, guläs Jesús yätxtiil, badeedni xquixtios lo Dios, dxejcti gula'nini, badeednini loj rexpejn pacni, räjpni:

—Coltajw; dee najc si'c tiexhä.

<sup>27</sup> Dxejc guläsni te vas, badeedni xquixtios lo Dios, dxejcti badeednini loj rexpejn<sub>pacni</sub>, räjpni:

—Guiraatu colyä', <sup>28</sup> sa'csi dee najc si'c xtienä; ni'cni riannää la'tu te didxcoob, luxh rejnre sixe'ni xcuent xhidajl bejn te guslaanireni nen dojl. <sup>29</sup> Luxh rniä lojtu, diruna yä'ä nis nani rii yejc uub, dxejlini yänäsacātu lo xcäl<sub>rnibee</sub> Dios, Xtadä.

*Räjp Jesús sibälaz Pedroni*

(Mr. 14:26-31; Lc. 22:31-34; Jn. 13:36-38)

<sup>30</sup> Che gulujx bilreni te dij, biriireni, sääreni lo dajn ni laa Oliib. <sup>31</sup> Dxejc räjp Jesús lojreni:

—Guiragajctu sactio'p lajztu xcuentä, susa'ntu narä naguxhijn sa'csi lo reguigtz xten Dios caj scree: “Sugu'treni baxtoor dxejc sire'ch rexiil.” <sup>32</sup> Dxejc cheni guiba<sub>nsacä</sub> lo rebengut, ganidä cha'ä región Galilee, dxejcti jiädna<sub>jltu</sub> narä.

<sup>33</sup> Dxejc räjp Pedr loj Jesús:

—Masque guiraareni cuälazlu, narä dina cuälazälu.

<sup>34</sup> Dxejc räjp Jesús lojni:

—Rniliä<sub>pac</sub> lojlu, lagajc guxhijnre, nicla gajd guidgaii cuedxa', luxh luj alagulälazlu narä cho<sub>n</sub> huält.

<sup>35</sup> Räjp Pedr loj Jesús:

—Masque riäjl guetnäälu, dina cuälazälu.

Dxejc sigajcza gunii guiraa rexpejn<sub>pacni</sub>.

*Gurejdx-gunab Jesús loj Dios nen Getsemaní*

(Mr. 14:32-42; Lc. 22:39-46)

<sup>36</sup> Dxejcti bidzujn Jesús näjza rexpejn<sub>pacni</sub> te lajt ni laa Getsemaní, räjpni lojreni:

—Col<sub>cuésijc</sub> ree la<sub>l</sub> ni cuedx-guiniabä lo Dios.

<sup>37</sup> Dxejc sanäni Pedr näjza guiro'p xi'n Zebedeo, luxh gusloj cayachuinduxh lajzni, cayu'zani yärsiaduxh. <sup>38</sup> Dxejc räjpni lojreni:

—Te yäl<sub>huinduxh</sub> yu' lastoä; astoocanu agojl guetä. Col<sub>jia</sub>'n ree, col<sub>tie</sub>'ch baca<sub>l</sub> lojtu.

<sup>39</sup> Dxejc guzaj Jesús stla', guzuxhijbni dxejc basajb lojni lo yujli, gusloj cabedx-canabni lo Dios:

—Xtadä, palga saj<sub>cni</sub>, basanlaa tedcaj trabajwduxhre ni tedä, te na'c tedäni. Xhet si'cdi ni rläzä gacni; si'cpacni rläjzlu gac, si'c gacni.

<sup>40</sup> Dxejcti gubi'ni cadro suga' guichon<sub>repejn<sub>pacni</sub></sub>, che bidzuj<sub>nni</sub> ro'c, nagayejsreni. Räjpni lo Pedr:

—¿La di niaj<sub>cdi</sub> nutie'chtu baca<sub>l</sub> lojtu nicla tebor, ä? <sup>41</sup> Col<sub>guibajn</sub>, col<sub>nab</sub> lo Dios te na'c jiaj<sub>btu</sub> nen dojl. Guliipacni, lastootu nadip, niluxh tiej<sub>xhtu</sub> rdxajg.

<sup>42</sup> Gubi' Jesús stehuält, gurejdx-gunabni loj Dios, räjpni:

—Xtadä, palga digacdi tedcaj tedä trabajwre, sugacni si'ctis ni rläjzlu gacni.

<sup>43</sup> Dxejc gubisacni, bidxäl<sub>ni</sub> rexpejn<sub>pacni</sub>, nagayejsreni sa'csi yuduxh baca<sub>l</sub> lojreni. <sup>44</sup> Basaannireni, dxejc sä<sub>sacni</sub>, gurejdx-gunabni lo Dios ni riojn huält, gunisacni lagajc rediidx ni guniini galoo. <sup>45</sup> Dxejc huij<sub>ni</sub> cadro suga' rexpejn<sub>pacni</sub>, räjpni lojreni:

—¡Naj sii, col<sub>guejs</sub>, col<sub>gusilajz</sub>! Abidzuj<sub>n</sub> or ni gutedreni Xi'n Dios ni gujc Niguii ladz<sub>naa</sub> rebendojl. <sup>46</sup> ¡Col<sub>chastie</sub>, col<sub>cho</sub>'! col<sub>huii</sub>! Asiääd nani guted narä ladz<sub>naa</sub> rebendojl.

*Gunaazreni Jesús sanärenini pres*

(Mr. 14:43-50; Lc. 22:47-53; Jn. 18:2-11)

<sup>47</sup> La<sub>l</sub>ni canii Jesús bidzuj<sub>n</sub> Judas, nani najc tej retzubitio'p xpejn<sub>pacni</sub>. Bidzunnä<sub>jni</sub> xhidalduxh bejn ni ca' espaad, ni ca' garo't, najcreni xpejn<sub>reni</sub> rnibee rebixhojz, näjza xpejn<sub>rebengool</sub> xten rexpejn<sub>Israel</sub>. <sup>48</sup> Judas, ni bato' Jesús, abadedxgaani te seen lojreni räjpni:

—Nani guchagro'ä, ni'c najc laani; col<sub>guiniazgajcni</sub>.

<sup>49</sup> Dxejc gubigni loj Jesús, räjpni:

—Xchan, Dad Mastr.

Dxejc bachagro'ni lojni. <sup>50</sup> Jesús räjp lojni:

—Xamigwä, ¿xhi siäädlu?

Dxejcti gubig rebejn lojni, gunaazrenini.

<sup>51</sup> Per tej reni suganäj Jesús gulääni te spaad, batiu'ni diajg te mos xten rebixhojz ni rnibee. <sup>52</sup> Dxejc räjp Jesús lojni:

—Guluchee xspaadlu loj xse'ni. Guiraa reni rucuanäj con spaad, lagajc con spaad guetreni. <sup>53</sup> ¿La ditu gan sajca guiniabä lo Xtaä, luxh laani suxhalgajcni gayonbitzubitio'p mił xanglni gacnäjä narä? <sup>54</sup> Dxejc xho gac soob diidx ni caj lo reguijtz xten Dios ni rnixgaa riäjł gac guiraa recosre lagajc si'cni cayajcni.

<sup>55</sup> Dxejc räjp Jesús loj rebejn xhidajlga:

—¿La siädnaü spaad näjza garo't te guiniaaztu narä astoocanu nacä si'c te gubaan? Ni guirasi dxej gureä galäiitu, baluiäü nen guidoro, luxh ditu niniaaz narä. <sup>56</sup> Niluxh guiraa recosre cayajc te soob rediidx ni caj lo reguijtz ni bacuaa redade' ni gunii xtidx Dios.

Dxejcti guiraa rexpejn pacni basanxtebreni Jesús, baxunreni lojni.

### *Jesús nez loj rebixhojz*

(Mr. 14:53-65; Lc. 22:54-55, 63-71; Jn. 18:12-14, 19-24)

<sup>57</sup> Reni gunaaz Jesús huinänini nez loj Caifás, ni rnibee loj guiraa rebixhojz, bidzujnreni cadro abidojg guiraa rebejn nani ruluii leii näjza rebengool xten xpejn Israel. <sup>58</sup> Dxejcti zit-zijt biädnajl Pedr rebejn ga, bidzujnlireni lole' xten bixhojz ni rnibeega. Ro'c biu'ni, gurenäjni rexquixhajg bixhojzga te ro'c bia'nni te fiini xhini'c gac.

<sup>59</sup> Reni rnibee rebixhojz, näjza rebengool con guiraa reni rajp yälrnibee gusloj caguiilreni xhitis te diidx, masque xhet guliidini, te gucuaquijreni Jesús te guinibeereni guetni. <sup>60</sup> Niluxh xhet bidxäldireni, luxh gubig xhidajl bejn, guniireni xhidajl didx-xhii xcuent Jesús. Dxejcti bidzujn tio'p dade' ni gunii didx-xhii, <sup>61</sup> räjpreni:

—Niguiire gunii scree: “Narä sajca gutzulä guidoro xten Dios, sajca gunchesacäni nen choñ dxej.”

<sup>62</sup> Dxejc gusulii dade' ni rnibee lo rebixhojz, räjpni loj Jesús:

—¿Xhicuent xhet rniidilu, ä? ¿Xhini'c canii reniguiire cagucuaquijreni luj?

<sup>63</sup> Niluxh dxitis suga' Jesús. Dxejcti räjp dade' ni rnibee loj rebixhojz lojni:

—Rnibeä guiniliilu, guiniliipaclu con laj Gueb Dios nani nabajn. Gunii don, ¿la luj najc Crist, Xi'n Dios?

<sup>64</sup> Jesús räjp lojni:

—Lagajc guejblu naj si'c. Niluxh empac rniä lojtu, desde najli suhuiitu cueä narä Xi'n Dios ni gujc Niguii xladbee Dios ni rnibee, suhuiizatu jiälä lo reza ni tre' xhaguibaa.

<sup>65</sup> Dxejc batiäjs dade' ni rnibee loj rebixhojz xhajbni, räjpni:

—¿Niguiire aguniyajni Dios con xtiidxni! ¿Xhiru testiigw rquiinnu? Abiejn diajgtu didxyaj xtenni. <sup>66</sup> ¿Xhi rchalotu?

Dxejc basejreni diidx:

—¿Abiga'ni! Riäjł guetni.

<sup>67</sup> Dxejc batiobxhejnreni lojni, gudijnrenini. Yu'reni gudajp lojni, <sup>68</sup> räjpreni lojni:

—Palga najclu Crist, gunii chuni'c gudijnlu.

### *Di Pedr nicäjp numbeeni Jesús*

(Mr. 14:66-72; Lc. 22:56-62; Jn. 18:15-18, 25-27)

<sup>69</sup> Lał ni cayajc reni'c, Pedr sobga' lole'. Dxejc gubig te dxape' ni rujn dzuun ro'c, räjpni lojni:

—Näjza luj cuansanäjlu Jesús, ni siääd nez Galilee.

<sup>70</sup> Per di Pedr nicäjp nez loj guiraareni, räjpni:

—Dina ganä xhini'c caniilu löä.

<sup>71</sup> Asii Pedr nez ro' puert, che bidxaagni stee dxape' ni rujn dzuun ro'c. Dxape're räjp loj reni suga' ro'c:

—Näjza dade're cuansanäj Jesús ni siäd Nazare't.

<sup>72</sup> Dxejc basguee Pedr stehuält, räjpni:

—Rniliápac dina gumbeä dade'ga.

<sup>73</sup> Che gojl sterate', gubig reni suga' ro'c loj Pedr, räjpreni:

—Guliini; näjza luj najclu te xpejn̄ni; huenliisi riejn diidx ni rniilu.

<sup>74</sup> Dxejcti guslojni cagueni, caguzä'tni Dios, räjpni:

—Dipacna gumbeä niguiiga.

Guniitisi si'c, chela guredxa' te guidgaii. <sup>75</sup> Dxejcru banalajz Pedr rediidx ni gunii Jesús lojni che räjpni: “Che gajdli guidgaii cuedxa', choñ huält alaguniilu dilu gumbee narä.” Dxejc birii Pedr ro'c, gusloj cayonduxhni.

## 27

### *Batedreni Jesús loj Pila't*

(Mr. 15:1; Lc. 23:1-2; Jn. 18:28-32)

<sup>1</sup> Che bianij lo guedxliuj, guiraa reni najc rebixhojz ni rnibee näjza rebengool xten rexpejn̄ Israel bia'nreni diidx xho gunreni ju'treni Jesús. <sup>2</sup> Baliibrenini, guläärenini ro'c, huisa'nrenini loj Poncio Pila't, ni najc gubernadoor.

### *Xho gujt Judas*

<sup>3</sup> Dxejcti Judas, ni bato' Jesús, che bahuiini bacuaquijreni Jesús, basiejch lajzni, guc-huin lajzni, dxejc huidzu'ni galbitzoo meel pla't loj rebixhojz ni rnibee näjza loj rebengool. <sup>4</sup> Räjpni:

—Banitduxhä lo Dios sa'csi bato'ä te bejn̄ ni xhet bejndi.

Dxejc räjpreni lojni:

—Xhixh gunnu. Ni'c najc xcuentlu; lujti najn.

<sup>5</sup> Dxejc bacuaa Judas meelga lo yuj neñ guidoro, biriitini ro'c. Sas huijni, baliibni te duu guejn̄ni, gojlni lo te yajg, ro'cti gujtni.

<sup>6</sup> Rebixhojz ni rnibee batojpreni meelga, räjpreni:

—Di gac di guizäl̄nu meelre neñ caj gojn sa'csi najcni xcuent xtejn̄ te bejn̄.

<sup>7</sup> Dxejc bia'nreni diidx con meelga siireni te la' yuj xten te dade' ni runchee guejs te ro'c gucua'tzreni rebenzajt. <sup>8</sup> Ni'cni najli rniireni yujga: “Yurejn̄”. <sup>9</sup> Si'c gusojb diidx ni gunii Jeremías, dade' ni gunii xtidx Dios galoo che räjpni: “Cua'reni galbitzoo melpla'tga si'cti basoob rexi'n Israel sajc bejn̄ga. <sup>10</sup> Con meelga guziireni yuj lo bejn̄ ni runchee guejs, sigacni gunibee xtadnu Dios.”

### *Gusuj Jesús nez loj Pila't*

(Mr. 15:2-5; Lc. 23:3-5; Jn. 18:33-38)

<sup>11</sup> Bidzun̄näjreni Jesús loj Pila't ni najc gubernadoor. Dxejc gunabdiidxni, räjpni lo Jesús:

—¿La luj najc reii xten rexpejn̄ Israel, ä?

Räjp Jesús lojni:

—Najcni si'cni najlu.

<sup>12</sup> Lañi cabe'c rebixhojz ni rnibee näjza rebengool rexquej Jesús xhetliidi guniidi Jesús.

<sup>13</sup> Dxejc räjp Pila't lojni:

—¿La di diajglu jiejn guiraa rediidx ni caniireni cagucuaquijreni luj, ä?

<sup>14</sup> Per xhetliidi diidxdi basejc Jesús, nicla xcuent tejsi diidx ni bacuaquijrenini. Ni'cni bidxeloduxh gubernadoorga.

### *Gunibeereni guet Jesús*

(Mr. 15:6-20; Lc. 23:13-25; Jn. 18:38-19:16)



<sup>15</sup> Nen redxe lanij rajpreni costumbr ruslaa Pila't tej bejn ni cue rebejn loj reni yu' nen latzguiib. <sup>16</sup> Nen redxejga guyu' te bejn ni säab xtiidxni ni laa Barrabás. <sup>17</sup> Cheni tre' guiraareni ro'c, gunabdiidx Pila't lojreni:

—¿Chuni'c rlajztu guslaá, la suslaá Barrabás o Jesús ni laa Crist?

<sup>18</sup> Sa'csi najn Pila't rdxe'chlajzreni lo Jesús, ni'c bateedrenini lojni.

<sup>19</sup> La| ni sobga' Pila't lo yajgxiil cadro rujnni yälguxhtis, baxha| cháälni diidx lojni, räjpni:

—Xhet gundilu dade'ga ni xhet bejndi, sa'csi nuchej nadxuudx gunixcalä xcuentni.

<sup>20</sup> Niluxh rebixhojz ni rnibee näjza rebengool baquiilreni rebejn te gunabreni laa Barrabás, näjza te guet Jesús. <sup>21</sup> Dxejcti gunii gubernadoor stehuält, räjpni lojreni:

—¿Chu tej loj guiro'preni rlajztu guslaá?

Dxejc guredxa'reni, räjpreni:

—¡Barrabás!

<sup>22</sup> Gunabdiidx Pila't, räjpni:

—¿Xhi gunnäá Jesús ni laaza Crist?

Guiraareni guredxa':

—Bacuaani lo crujz.

<sup>23</sup> Dxejc räjp Pila't lojreni:

—¿Xhi latsiaj bejnni?

Niluxh laareni guredxa'rureni, räjpreni:

—¡Bacuaani lo crujz!

<sup>24</sup> Che bahuui Pila't xlia'si caniini, alga gusloj rebejn cayujn te bieiduxh, cua'ni nis, gudiibni naani nez lojreni, räjpni:

—Dina xcaquiä xtiejn bejnre ni xhet bejndi. La'tu colhuiu xho guntu. Xcuenttitu najcni.

<sup>25</sup> Dxejc guiraa rebejnga badzu' diidxre, räjpreni:

—Suxcaquijnu xtiejnni, nuurnu näjza rexi'nnu.

<sup>26</sup> Dxejc baslaa Pila't Barrabás, dxejc gunibeeni gudijnreni Jesús dxejc bateednini ladznaa rebejn te gucuaarenini lo crujz.

<sup>27</sup> Dxejc huinä resoldaad xten gubernadoor Jesús lo pretoor, yu' cadro rujnreni yälguxhtis, ro'c batojpreni guiraa resa'reni. <sup>28</sup> Dxejc gulääreni xhajnbi, bashuajcwrenini te lad xniaa. <sup>29</sup> Dxejc bencheereni te coron guejch, basälrenini yejcní, basälreni te yabixijl naani, xladbeeni, sas bazuxhijbreni nez lojni guslogajc caguxhisnäjrenini, räjpreni:

—¡Collä'p xpala'n reii xten rexpejn Israel!

<sup>30</sup> Sas batiobxhejnreni lojni, cua'reni yabixijlga te ni'c batiäjlreni yejcní. <sup>31</sup> Che gulujx baxhiznäjrenini, gulääreni lad xniaa ni najcwni. Dxejc bashuacwsacrenini lagajc xhajnbi, sanätirenini te xcajni lo crujz.

### *Bacuaareni Jesús lo crujz*

(Mr. 15:21-32; Lc. 23:26-43; Jn. 19:17-27)

<sup>32</sup> Cheni sariireni, bidxaagreni te bejn ni siäd guedx Cirene, laani Simón, basguureni dade'ga xcrujz Jesús.

<sup>33</sup> Che bidzujnreni te lajt ni laa Gólgota, nani säloj: dan Calabeer, <sup>34</sup> ro'c badeedreni bin nu'ch cuanlaa te gu' Jesús. Te bocbäztisni gu'ni, dxejc naaddiruni niä'nini.

<sup>35</sup> Cheni abacuaareni Jesús lo crujz, gudzujt resoldaad yejc xhajnbi, te si'c gudisreni xhajn Jesús cua'reni, te si'c guzobj diidx xten te dade' ni gunii xtidx Dios. <sup>36</sup> Gurejtireni ro'c, gusloj canäjreni Jesús. <sup>37</sup> Yejc crujzga bacuaareni te guijt con letirro. Lo guijtza rcaj xhini'c najc xtoj| nani cayejt. Lo guijtza caj: “Dee najc Jesús reii xten rexpejn Israel.”

<sup>38</sup> Näjza tio'p gubaan cuaj lo stio'p crujz con laani. Tejni cuaj lo te crujz xladbee Jesús, steeni cuaj xladbäjgwni. <sup>39</sup> Luxh renani sadejd nejzga guniyajreni Jesús, cagusniibreni yejcní, <sup>40</sup> cayäjpreni lojni:



—Ja'äl! Luj ni nutiexhlu guidoo, luxh chontis dxej niunchesacluni; palga gulii najclu Xi'n Dios, biäjt loj crujzga.

<sup>41</sup> Näjza rebixhojz ni rnibee, näj remastr xten leii, baxhiznäjrenini räjpreni loj sa'reni:

<sup>42</sup> —Baslaani xhidajl bejn, xhoxh di gacdi guslaani lagajc laani. Palga najcni reii xten rexpejn Israel, sujiäjtne lo crujz nanaj te chalilajznu xtiidxni. <sup>43</sup> Huinälajzni Dios, naj suguslaa Diosni palga sanälajz Diosni; ni najni: “Narä nacä Xi'n Dios.”

<sup>44</sup> Regubaan ni caj lo recrujz sigajcza guniyajreni Jesús.

### *Che gujt Jesús*

(Mr. 15:33-41; Lc. 23:44-49; Jn. 19:28-30)

<sup>45</sup> Dxejcti bicäy guidob guedxliuj läidxej hasta rcachon gudxej. <sup>46</sup> Si'cti rcachon gudxej guredxa' Jesús dipduxh, räjpni:

—Elí, Elí, ¿lama sabacatani? —dee säloj: Xtiozä, Xtiozä, ¿xhicuent gulälazlu narä?

<sup>47</sup> Yu' reni suga' ro'c, che biejn diajgreni räjpni si'c, räjpreni:

—Cabejdx Dade're Elías.

<sup>48</sup> Baxungajc tejreni, huica'ni te sponj, bahuajdxnini loj binagr, bacuaanini yejc te biquii te badzugni binargra ro' Jesús. <sup>49</sup> Dxejc reni tre' ro'c räjp:

—Basaan; guidon la siäd Elías te guslaanini.

<sup>50</sup> Dxejc guredxaduxh Jesús stehuält, baslaatini xpriitni. <sup>51</sup> Lagajc orga biräsa' ladro ni zäab neñ guidoro, gujcnio'p la' jiaali hasta lo yuj. Gujc te xuro, sas gusuj bej reguiro.

<sup>52</sup> Dxejc gubica' reguij ni niäuu ro' rebaa, luxh gubansac xhidajl xpejn Dios ni gujt aguc xchej. <sup>53</sup> Dxejcti, che huäjs Jesús lo rebengut, biriireni neñ baa, baluilojreni lo xhidajl bejn ni rbäz guedx Jerusalén.

<sup>54</sup> Dxejc capitán xten resoladaad näjza resoladaad ni canäj Jesús, che bahuiireni xuduxh näjza guiraa recos ni gujc ro'c, bidxejbreni, räjpreni:

—Guliipacni najc dade're Xi'n Dios.

<sup>55</sup> Zijtru tre' xhidajl regunaa ni biädna'jl Jesús che biriini nez Galilee te bahuiireneni. Cadxelojtisreni guiraa ni cayajc ro'c. <sup>56</sup> Tej regunaaga najc Marii Magdalen, steeni najc Marii xnan Jacoob näjza José, steeni najc xnan rexi'n Zebedeo.

### *Huicua'tzreni Jesús*

(Mr. 15:42-47; Lc. 23:50-56; Jn. 19:38-42)

<sup>57</sup> Che gojl gudxej, bidzujn te benrajp ni siäd guedx Arimatea; laani José. Näjza dade'ga najc tej reni birinajl Jesús. <sup>58</sup> Huij dade'ga loj Pila't, gunabni tiejxh Jesús. Dxejc gunibee Pila't gudeedrenini lojni. <sup>59</sup> Cua'ti José tiejxh Jesús, batejbnini neñ te bariadya, <sup>60</sup> huitixhnini neñ xpaapacni. Nacoob baaga, gojnni bidäänni cuä' te guilaj. Dxejc basäuni ro' baaga con guiro, dxejcti siini. <sup>61</sup> Sobga'za Marii Magdalen näjza stee Marii nez loj baa, bahuiireni biga'tzni.

### *Xhi räjp resoladaad ni cuanäj xpa' Jesús*

<sup>62</sup> Che gudejd dxej xten ni gulec-cheereni lanij, bara yääl bidojp rebixhojz ni rnibee näjza rebejn ni laa refarisee, bidzujnreni loj Pila't, <sup>63</sup> räjpreni lojni:

—Dad, banaj laaznu xhi räjp bejn ni rusgueere. Räjpni: “Che ted chon dxej sibansacni loj rebengut.” <sup>64</sup> Ni'c baxha' chu chacanäj ro' baaga dxejli guisa' chon dxej, te di chää rexpejnpacni chaläärenini tiejxhni, dxejc gäbreni loj rebejn: “Agubansacni loj rebengut.” Yälrusgueega sajc cuentroru loj ni gujc ganid.

<sup>65</sup> Räjp Pila't lojreni:

—La'tu rajptu te cuaa soldaad; colchäj, basäutzut'z ro' baaga si'ctis ni sajc guntu.

<sup>66</sup> Dxejcti sääreni, basäutzut'zreni ro' baaga; con resoladaad bacuaarenini te seii lojni te rut faldini. Dxejc basa'nreni resoladaad canäj ro'c.

### *Sibansac Jesús loj rebengut*

(Mr. 16:1-8; Lc. 24:1-12; Jn. 20:1-10)

<sup>1</sup> Che gudejd sabd, dxej ni ruzilajz rexpejn̄ Israel, che gusloj cayänij lo guedxliuj te jiu' stee xmaan, bidzujn̄ Marii Magdalen̄ näjza stee Mariiga, siädhuiireni lo baa. <sup>2</sup> Luxh alagujc te xuro ni basniib lo yuj, sa'csi biääd te angl xten Dios xhaguibaali te badzucajni guij ni niäuu ro' baaga, dxejc gurejni yejc guijga. <sup>3</sup> Rdimbichaduxhni si'c najc che rdinya', luxh xhajbni najc nolbäj si'c najc yejc ni riajb. <sup>4</sup> Che bahuii resoldaadni, bichebduxhreni, sädiidxreni, gujcreni si'c bengut. <sup>5</sup> Dxejc räjp guixhajg xte Diosga loj regunaa:

—Na'c guidxajtbtu. Ananä caguiiltu Jesús ni cuaj lo cruz. <sup>6</sup> Rutini ree sa'csi agubansacni sigajc ni najni. Coltahuii cadro gojtni. <sup>7</sup> Colguxun̄, colchaye'tz loj rexpejn̄pacni agubansacni loj rebengut. Luxh naj agunijdni lojtu sääni región xten Galilee. Ro'c suhuiitu lojni. Dee najc diidx ni rniä lojtu.

<sup>8</sup> Dxejcti rusquenduxh regunaaga, biriireni ro' baaga. Cadxajbreni, cabalazduxhzareni sanäreni diidx loj rexpejn̄pac Jesús. <sup>9</sup> Chela bidxaagreni Jesús lo nejz, räjpni: “Xchan”, lojreni. Sas gubigreni loj Jesús, bazuxhijbreni, gudääzreni guenni'ni, gojn̄renini. <sup>10</sup> Dxejc räjpni lojreni:

—Na'c guidxajtbtu. Colchanä diidx loj rexpenä, chääreni región Galilee, sa'csi ro'c suhuiireni löä.

#### *Rediidx ni räjp resoldaad*

<sup>11</sup> Lałni sää regunaaga, bidzujn̄ gaii soldaad ni huicanäj ro' baa lo guejdxga, huisa'nreni diidx lo rebixhojz ni rnibee xcuent guiraa ni guzajc ro' baaga. <sup>12</sup> Dxejc rebixhojz ni rnibee bachagsa'zareni con rebengool te bia'nreni diidx gudeedreni xhiroob meel lo resoldaad, <sup>13</sup> räjpreni lojreni:

—Scree colye'tz lo rebejn̄: “Lał ni nagayesnu, canäjnu ro' baa, biääd rexpejn̄pac Jesús guläxhiga'tzreni tiejxhni.” <sup>14</sup> Palga jiendiajg gubernadoor dee, siohuiinuni te di yu' xhi gunni la'tu.

<sup>15</sup> Dxejcti cua' resoldaad meel, bejnreni si'cni räjp rebixhojz. Luxh si'c bire'ch diidx loj guiraa rexpen̄ Israel. Najli canisijcreni si'c.

#### *Baxhal̄ Jesús rexpejn̄pacni*

(Mr. 16:14-18; Lc. 24:36-49; Jn. 20:19-23)

<sup>16</sup> Dxejcti sää retzubiteeb xpejn̄pac Jesús lo región Galilee, lo dajn cadro bia'n Jesús diidx guidxaagnireni. <sup>17</sup> Cheni bahuiireni loj Jesús, bazuxhijbreni, gojn̄renini, per yu' reni ractio'p lajzreni. <sup>18</sup> Dxejc gubig Jesús lojreni, guninäjnireni, räjpni:

—Arapä guiraa yälrnibee xhaguibaa näjza lo guedxliuj. <sup>19</sup> Ni'cni, colchäj, guideb guedxliuj colchagajn̄ bejn̄ gac xpenä, colgutiobnisreni, con laj Gueb Dios, näj laj Xi'n Dios näjza laj Sprit Dxan xten Dios. <sup>20</sup> Colguluiireni gusoobreni guiraa rediidx ni guinibeä. Luxh lagajc narä suganää la'tu guiraa redxaj, dxejli che nitloj guedxliuj. Sugacni si'c.

## Diidx Xcuent Jesucrist Nani Bacuaa San Marcw

### *Baluu Juan ni rutiobnis*

(Mt. 3:1-12; Lc. 3:1-9, 15-17; Jn. 1:19-28)

<sup>1</sup> Scree gusloj diidx xcuent Jesucrist, Xi'n Dios. <sup>2</sup> Si'cni bacuaa toIsaías, ni gunii xtidx Dios, che räjp Dios:

Bahuii gan, guxhalä ni chanä xtidxä,  
ganidni chääni lojlu te guzucheeni xnezyujlu.

<sup>3</sup> Riejn xse' ni rbedxa' nez loj reyubijdz:

“Colyunsa'c xnezyuj Dad,  
colslui rexnezyulajzni.”

<sup>4</sup> Biricaj Juan ni rutiobnis nez loj reyubijdzga. Räpgajcni nanabpac gusiechlajzreni, tiobnisgajczeni, te jia xtojreni. <sup>5</sup> Riädcuadiajg xhidajl reni rbäjz Judea, näjza reni rbäjz guedx Jerusalén. Dxejcti cheni ruxhobdojreni lo Dios, rustiobnis Juanreni nen gueu Jordán.

<sup>6</sup> Xhajt Juan nacchee con guichlajd cameii, xsindoorni nacchee con guijd, niluxh gadajwni guxha't näjza dzunbäserguijxh. <sup>7</sup> Caguluiini rebejn, räpgajcni:

—Detzä siääd tej nani sajcro loä, nani nicla di nungäj surloä, cuää xcura'chni. <sup>8</sup> Narä abatiobnisä la'tu con nis, biädla laani guxhalni Sprit Dxaan xten Dios te cuääzni nen lastootu. Si'c gustiobnis nani jääd detzä la'tu.

### *Batiobnis Juan Jesús*

(Mt. 3:13-17; Lc. 3:21-22)

<sup>9</sup> Dxejc, nen redxejga, birii Jesús guedx Nasare't ni yu' Galilee. Dxejcro batiobnis Juan Jesús nen gueu Jordán. <sup>10</sup> Che birii Jesús nen nis, bahuiini bixal guibaa. siädäj sprit Dxaan xten Dios yejcti si'c te palom. <sup>11</sup> Dxejcti guibaali bejn xse' te ni räjp:

—Luj najclu xi'nä ni sanälazä; rbanälazduxhälü.

### *Bateed bendxab prueb Jesús*

(Mt. 4:1-11; Lc. 4:1-13)

<sup>12</sup> Sas baxhal sprit Dxaan xten Dios Jesús lo reyubijdz. <sup>13</sup> Dxejc guyu' Jesús ro'c tiuu dxej, guyu'ni cadro yu' reman. Sas gudiil bendxab nani rnibee, nani laa Satanás, xho niujnni te nusoob Jesús xtiidxni. Dxejcro biäd reangl xten Dios, biädhuiireneni.

### *Gusloj Jesús xtzuumni*

(Mt. 4:12-17; Lc. 4:14-15)

<sup>14</sup> Basälreni Juan nen latzguiib. Dxejcti huij Jesús nez Galilee, huiluini xtidx Dios.

<sup>15</sup> Dxejc räjp Jesús:

—Abidzuj dxej, luxh yälrnibee xten Dios abidzuj gajxh. Colsiejch lajztu, colchalilajz xtidx Dios.

### *Gurejdx Jesús tajp bejn ni rniaaz bäl*

(Mt. 4:18-22; Lc. 5:1-11)

<sup>16</sup> Sasajti Jesús nez ro' nis xten Galilee, che bahuiini lo Simón näjza loj Andrés bejtz Simón. Cazälreni xquijxhreni lo nis, sa'csi rniaazreni bäl. <sup>17</sup> Dxejc räjp Jesús lojreni:

—Coltanajl narä, te gunä cuedxtu bejn lacuaa ni guiniaaztu bäl.

<sup>18</sup> Lagajc dxejc basa'nreni rexquijxhreni, sanätirenini.

<sup>19</sup> Dxejc gusaj Jesús sche'n, sas bahuiini loj Jacoob näj Juan, rexi'n Zebedeo. Cayunsa'creni xquijxhreni nen xcanuuren. <sup>20</sup> Guredxgajcni guiro'preni, dxejcti laareni basa'nreni xtadreni Zebedeo nen canuu, näjza rexmosni, sanätirenini Jesús.

*Te bejn nani guyu' bendxab nen lastooni*

(Lc. 4:31-37)

<sup>21</sup> Bidzujntireni guedx Capernaum. Dxej cru sabd, dxej ni rusilajz rexpen Israel, biu' Jesús nen guidobáz xten rexpen Israel. Dxejcti baluii Jesús rebejn ni tre' ro'c.

<sup>22</sup> Bidxelojni rebejn xtiidxni, sa'csi caguluiinireni si'cpac te ni rnibee, xhet si'c di remastr xten leiidi. <sup>23</sup> Nen xquidobázreni yu' te bejn yu' te bendxab nen lastooni. Bendxabga guredxa', rájpní:

<sup>24</sup> —Jesús, ni siäd Nazare't, ¿xhicuent riu'lu loonu? ¿La siädgunitlojlu nuunu? Narä numbeälu, luxh nanä luj najclu bendxan ni siäd lo Dios.

<sup>25</sup> Dxejcti guidixa' Jesús lo bendxabga, rájpní lojni:

—Basäuu ro'lu, birii nen lastoo niguiire.

<sup>26</sup> Sas bendxabga batienguij niguiiga, luxh cabedxa'ni biriini nen lastoo niguiiga.

<sup>27</sup> Bidxejbti guiraareni, canabdiidx loj sa'reni:

—¿Xhi dee? ¿Xhi dzuun nacoobre ruluiini? Niguiire rnibeeni näj rebendxab, luxh ruzoobreni xtiidxni.

<sup>28</sup> Di niacäa guchee rebejn guideb nez Galilee xhi rujn Jesús.

*Basiajc Jesús xnan suegr Pedr*

(Mt. 8:14-15; Lc. 4:38-39)

<sup>29</sup> Che biriireni xquidobáz rexpejn Israel, huinä Jesús Jacob näj Juan rolizj Simón näjza Andrés. <sup>30</sup> Luxh xnan suegr Simón naga', yu'ni xliaa. Dxejc rájpreni lo Jesús:

—Cayacxhuuni.

<sup>31</sup> Dxejcti gubig Jesús lojni, gunaazni naani, guläsnini; lagajc dxejc biriini xliaa. Dxejc gusloj cayunireni.

*Xhidajl benracxhuu basiajc Jesús che huääz gubijdx*

(Mt. 8:16-17; Lc. 4:40-41)

<sup>32</sup> Che huääz gubijdx, luxh abiu' guxhijn, biädnäreni guiraa rebenracxhuu loj Jesús, näjza renani yu' bendxab nen lastooni. <sup>33</sup> Luxh guideb guejdxga bidojp ro' yu'ga.

<sup>34</sup> Basiajc Jesús xhidajl renani rajc garen-garen yälguijdx. Niluxh gulääzani xhidajl bendxab, niluxh dini nusaan ninii rebendxabga, sa'csi najnreni chu najcni.

*Baluii Jesús nez Galilee*

(Lc. 4:42-44)

<sup>35</sup> Che bara yääl, cäyru bistie Jesús, biriini säani te laad cadro ruti bejn. Ro'c cabejdx-canabni loj Dios. <sup>36</sup> Dxejcti Simón näj resa'ni huitiilreni Jesús. <sup>37</sup> Che bidxälrenini, rájpreni lojni:

—Guiraa rebejn caguiillu.

<sup>38</sup> Dxejc rájp Jesús lojreni:

—Colcho' reguejdx ni yu' gajxh, te gusuleä xtidx Dios ro'c. Par ni'cpac biälä.

<sup>39</sup> Dxej cru cuansaj Jesús guideb nez Galilee, caguluiini xtidx Dios nen reguidobáz xten rexpejn Israel. Gunibeezani birii rebendxab nen lastoo xhidajl rebejn.

*Basiajc Jesús te bejn ni ral tiejxhni*

(Mt. 8:1-4; Lc. 5:12-16)

<sup>40</sup> Gubig te benracxhuu ni ral tiejxhni loj Jesús, bazuxhijbni. Dxejcti rájpní lojni:

—Narä nanä saj c gusajclu narä palga rlajzlu.

<sup>41</sup> Balaslajz Jesús benracxhuuga, gunaazni naani, räpgajcni:

—Rläzä jiajclu. Biajc naj.

<sup>42</sup> Cheni guniini scree, biacgajc benracxhuuga. <sup>43</sup> Dxejcti gulunejz Jesús bejnğa. Per räpxgaani lojni:

<sup>44</sup> —Ahuiire, rutlojdi guiniilu dee. Huilui tiejxhlu lo bixhojz. Badedgajc lo Dios nani rájp to Moisés gudeed bejn lo Dios si'c te seen, te gacbee rebejn abiajclu.

<sup>45</sup> Dxejc säa bejnğa. Sas gusloj cayujyni diidx lo rebejn xcuent guiraa nani gujcní. Ni'cni diru niajcdi niu' Jesús nicla tej guejdx. Cansajni te laad cadro ruti bejn. Niluxh guiranejz rii rebejn, siädhuiireni Jesús.

## 2

*Basiäjc Jesús te bejn ni di guniib*

*(Mt. 9:1-8; Lc. 5:17-26)*

<sup>1</sup> Che agudejd balti dxej, biusac Jesús nen guedx Capernaum. Dxejcti biejn diajg rebejn arbäjnzi. <sup>2</sup> Bidopgajc xhidalduxh bejn. Gudxaj nen yu'. Nicla rolä' di niajl nisiujreni. Dxejcti caguluii Jesús xtidx Dios lo rebejn. <sup>3</sup> Dxejcti bidzujn tajp bejn, nuureni te bejn ni digacti guiniib; siädnärenini lo Jesús. <sup>4</sup> Luxh di niajcdi nidzujnreni cadro suga' Jesús, sa'csi yu' xhidajl bejn ro'c. Ni'c baxhalreni yejc yu' nejj cadro sujni. Dxejcru cadro baxhalreni basiäjtreni da' ni naga' benracxhuuga lojni. <sup>5</sup> Che bahuii Jesús rililajzreni, dxejc räjpni loj benracxhuuga:

—Xi'nä, agubicaj rextojllu.

<sup>6</sup> Sas gaii bejn ni ruluii leii ni sobga' ro'c bejnreni xhigab nen lastooreni, naareni: <sup>7</sup> “¿Xhicuent rni niguiire scree? Caniyajni Dios; rut rajcdi rudzucaj dojl. ¡Dioctis rajc rudzucaj dojl!” <sup>8</sup> Dxejcti gucbegajc Jesús xhi xhigab cayujnreni. Dxejc räjpni lojreni:

—¿Xhicuent rujntu xhigab si'c nen lastootu? <sup>9</sup> ¿La guyasiru gäbni loj benracxhuure: “Agubicaj rextojllu”, o la gäbni: “Huistie, cua' xta'lu, gusaj”? <sup>10</sup> Baj naj, te gantu rajc rudzucaj Xi'n Dios, nani gujc Niguii, dojl lo guedxliujre, caniä loj benracxhuure:

<sup>11</sup> —Lojlu rniä, ¡Huistie, cua' xta'lu, huij rolizlu!

<sup>12</sup> Lagajc dxejc huistie benracxhuuga, guläzni xta'ni, biriini ro'c nez loj guiraareni. Ni'cni bidxelo guiraareni. Dxejc gulä'preni xpala'n Dios, räjpreni:

—Gajdpacnu guihuii sa' dzuunre.

*Gurejdx Jesús Leví*

*(Mt. 9:9-13; Lc. 5:27-32)*

<sup>13</sup> Dxejcru gubisac Jesús ro' nis xten Galilee, luxh che bidojp guiraa rebejn lojni, baluiini xtidx Dios lojreni. <sup>14</sup> Sasaj Jesús che bidxaagni Leví, xi'n Alfeo. Sobga'ni cadro rusquijxni rebejn. Dxejc räjp Jesús lojni:

—Gudanajl narä.

Sas huisuni, sanajltini Jesús.

<sup>15</sup> Dxejc sobga' Jesús cayajwni rolizj Leví. Luxh sobganäj Jesús xhidajl reni rusquijx, näjza rebendojl ni di chasanäj leii, näjza rexpejn pacni, lo mex. Xhidajlreni tre', luxh sanajlreni Jesús. <sup>16</sup> Dxejcru rebejn ni ruluii leii näj refarisee, che bahuiireni cayaunäjni renani rusquijx näjza rebendojl, räjpreni loj rexpejnpac Jesús:

—¿Xhicuent rbenäj xmastrtu reni rusquijx näj rebendojl, luxh raunäjnireni, ränäjnireni?

<sup>17</sup> Che biejn diajg Jesús xhi caniireni, räjpni lojreni:

—Renani nadip nadaan di guiquiin doctoor, per reni racxhuu rquiin doctoor. Dina niädtedxä rebeñsa'c, biädtedxä rebendojl, te gusiech lajzreni.

*Gunabdiidxreni loj Jesús xcuent yälrucua'n*

*(Mt. 9:14-17; Lc. 5:33-39)*

<sup>18</sup> Cagucua'n rexpejn Juan näj rexpejn refarisee, renani najc rebenguidoo loj guedx Israel. Dxejc biääd gaii bejn loj Jesús, gunabdiidxreni lojni räjpreni:

—¿Xhicuent cagucua'n rexpejn Juan näj rexpejn refarisee luxh rexpejn pacu loj gucua'n?

<sup>19</sup> Dxejcti räjp Jesús lojreni:

—¿La rucua'n rebejn ni rdon chää cadro ru' yälruhnaa che meer suga' bi'n? Che meer suga' bi'n lojreni, direni gucua'n. <sup>20</sup> Per sidzujn dxej sibicaj bi'n lojreni, dxejc sii sucua'nreni.

<sup>21</sup> 'Rut rucuaadi tla' ladcoob loj tla' ladyux, sa'csi ladcoob rxu'nni luxh rutiäjzni ladyuxga, dxejc xhiroobruni räjs. <sup>22</sup> Rutza rusäldi bin ni gajd guilaj nen guidyux ni abigaa. Sa'csi bin ni gajd guilajga sutiäjsni guiidga che guilajni, luxh sinijt binga näjza guiidga. Ni'cni nanab gusalni bincoob nen guidcoobza.

*Batojþ rebejn* ni rinajl Jesús triuu sabd

(Mt. 12:1-8; Lc. 6:1-5)

<sup>23</sup> Te sabd, dxej ni rusilajz rexpejn Israel, sasaj Jesús nez loj reyuya'n. Sas gusloj rexpejnþacni caläädx doj lo triuu. <sup>24</sup> Dxejc räjp refarisee, renani najc benguidoo loj guedx Israel, loj Jesús:

—Arniä, ¿hicient rujn rexpejnþaclu dzuun ni di guchaag gunni nen dxej ni rusilajznu, ä?

<sup>25</sup> Dxejcti räjp Jesús lojreni:

—¿La gajdtu gol nani bejn toDavid te huält, laani näj resa'ni, ä? Che biäädx xhi gauureni, gulaanreni. <sup>26</sup> Biu' David nen xyu' Dios cheni guyu' toAbiatar loj Dios. Abiatar sajcro loj rebixhojz ni guyu' nen xquidoo rexpejn Israel. Dxejc gudajw toDavid reyätxtiil ni dzuub ro'c. Badeedzanini gudajw rebejn ni yunäjni. Luxh rebixhojztis rajc rajw yätxtiilga.

<sup>27</sup> Räjpza Jesús lojreni:

—Dios bejn dxe sabd sa'csi najnni naquinpac gusilajz bejn. Dini niujn sabd te gapda bejnni. <sup>28</sup> Ni'cni narä, Xi'n Dios ni gujc Niguii, näjza sabd rnibeä.

### 3

*Niguii ni nabijdz te naani*

(Mt. 12:9-14; Lc. 6:6-11)

<sup>1</sup> Biu' Jesús stehuält nen xquidobäz rexpejn Israel. Ro'c yu' te niguii nani nabijdz te naani. <sup>2</sup> Niluxh ro'c cagula'tz rebejn Jesús don la susiajcni niguiiga sabd, dxej ni rusilajz rexpejn Israel, sa'csi rlajzreni cue'creni xquejni loj nani rnibee rexpejn Israel. <sup>3</sup> Dxejc räjp Jesús lo niguii nani nabijdz naani:

—Huistie, guzuj galäiire.

<sup>4</sup> Dxejcti gunabdidxgajcni loj gaii rebejnþga, räjpni:

—¿La laaca gunni dzunza'c, o la dzunguijdx, sabd, ä? ¿La suslaani yälþnabajn, o la sugu'tni?

Luxh laareni biacdxireni. <sup>5</sup> Dxejc nadxe'ch bahuii Jesús lojreni, luxh guc-huin lajzni, sa'csi guc najd lajzreni. Dxejc räjp Jesús loj niguiiga:

—Baslii naalu.

Dxejcti basliini naani. Biajctini. <sup>6</sup> Dxejcro biunejz refarisee. Guslogajcreni caguchaa-greni diidx con reni nadxaag Herodes, te don xho ju'treni Jesús.

*Xhidajl bejn* bire' ro' nis

<sup>7</sup> Jesús näjza rexpejnþacni sääreni ro' nis, luxh xhidajl bejn Galilee birinajlni. <sup>8</sup> Che gojnreni redzunro ni rujn Jesús, xhidajlreni biääd. Yu'reni birii Judea, yu'reni birii guedx Jerusalén, yu'reni birii Idumea, yu'zaren birii nejz stelaad gueu Jordán, biriizaren nez guedx Tiro, näj nez guedx Sidón, biädhuiireni loj Jesús. <sup>9</sup> Ni'cni räjp Jesús loj rexpejnþacni quiilreni te canuu, te na'c gutää rebenþhidaalgani. <sup>10</sup> Abasiajc Jesús xhidajl beþracxhuu, ni'cni guiraasi beþracxhuu caxa't lojni, te canreni te jiajcreni. <sup>11</sup> Niluxh che rhuii rebenþxab lojni, ruzuxhijbreni lojni. Dxejcti rbedxa'reni räjpreni:

—Luj najclu Xi'n Dios.

<sup>12</sup> Dxejcti Jesús gudidxa' lojreni te na'c niäjbreni chu najcni.

*Gule Jesús tzubitiop bejn* loj reni rinajlni

(Mt. 10:1-4; Lc. 6:12-16)

<sup>13</sup> Birii Jesús sääni lo te dajne' cadre gurejdxni renani rlajzni cueni. Gubigtireni lojni. <sup>14</sup> Dxejcti guleni tzubitio'preni te sanäjreni laani, te guxhålnireni chaluiireni xtidx Dios; <sup>15</sup> te ga'preni yälþnibee te gusiajcreni beþracxhuu, te cuääzaren rebenþxab. <sup>16</sup> Retzubitio'p bejn ni gule Jesús najc: Simón, ni gulälajzani Pedr. <sup>17</sup> Dxejcti Jacoob con Juan, rexi'n Zebedeo, gulälaj Jesús Boanerges. Con xtiidxnu sälojni bejn ni nasesya', si'c guzii. <sup>18</sup> Näj Andrés, Felipe, Bartolomé, Mateo, Tomás, Jacoob xi'n Alfeo, Tadeo, Simón, ni



di guidxejb rnigajc, <sup>19</sup> náj Judas Iscariot, ni bato' Jesús loj reni rdxechlajz lojni. Sá'tireni roliz te dade'.

*Yälrniyaj loj Sprit Dxaan xte Dios*

(Mt. 12:22-32; Lc. 11:14-23; 12:10)

<sup>20</sup> Dxejc bidopsac rebenxhidaalga; nicla niajc niaunäj Jesús rexpejn pacni. <sup>21</sup> Che biejn diajg resa' Jesús dee, biädxhiirenini, sa'csi naareni, yejcní cayajc.

<sup>22</sup> Rebejn ni rulúi leii ni birii guedx Jerusalén bidzujnza lo Jesús, dxejc räjpreni:

—Beelzebú, nani rnibee rebenxhab, yu' nen lastoo niguiire. Niluxh nani rnibee rebenxhab rudeed yälrnibee lo Jesús te cuääni benxhab.

<sup>23</sup> Dxejc gurejdx Jesús rebejn ga, bijyni te cuent ni rulúi lojreni, räjpni:

—¿Xho gurilaagw benxhab lagajc sabenxhabni? <sup>24</sup> Palga rebejn xten te yälrnibee la'reni, luxh tilnäj te cuaani ste cuaaga, di yälrnibeega chu xchej. <sup>25</sup> Palga te famiñ rdilnäj lagajc sa'ni, di famiñ ga chu xchej. <sup>26</sup> Palga benxhab nani rnibee tilnäj lagajc laani, di xcälrnibeeni chu xchej, sa'csi ni'c gun luuxni.

<sup>27</sup> 'Rut gacdi jiu' roliz te niguidaan, cuanni xhixhtenni, palga dini gulibxgaani, si'ctis saj cuanni xhixhtenni.

<sup>28</sup> 'Rniliápac lojtu guiraa dojl nájza yälrniyaj xten rebejn saj jia. <sup>29</sup> Nani guiniyaj Sprit Dxaan xten Dios, digacdi guibicaj rextolñi, anuutisni xtolñi par tejpas.

<sup>30</sup> Räjpni si'c sa'csi caniireni yu' benxhab nen lastooni.

*Xnan con rebetzhuin Jesús*

(Mt. 12:46-50; Lc. 8:19-21)

<sup>31</sup> Dxejcru bidzujn xnan Jesús, náj rebetzhuinni. Direni niu', baxhaltisreni chu huitejdxni. <sup>32</sup> Rebejn ni sobga' gabi Jesús räjpreni lojni:

—Xnanlu náj rebejtzlu suga' ro lä', caguuilreni luj.

<sup>33</sup> Dxejcti räjp Jesús lojreni:

—¿Chu reni'c najc xnanä náj rebetzä?

<sup>34</sup> Bahuigajcni loj renani sobga' gabini, dxejc räjpni lojreni:

—Redee najc xnanä, rebetzä. <sup>35</sup> Chutis ni rujn ni rñajz Dios, ni'c najc betzä, bisianä, nájza xnanä.

4

*Xcuent niguii ni sale'c binij*

(Mt. 13:1-23; Lc. 8:4-15)

<sup>1</sup> Suga' Jesús ro' nis guslosac caguluiini xtidx Dios, luxh bidojp xhidajñ bejn cadre suga'ni. Xhidalduxh najcreni, ni'cni biu' Jesús nen te canuu ni suga' ro' nisga. Dxejcti gurejni nenga, biääd guiraa bejn bia'ntireni ro' nis. <sup>2</sup> Dxejc baluiinireni guiraloj, ganax cuent ni rulúi guniini. Che caguluiini, räjpni lojreni:

<sup>3</sup> —Gucua diajgtu dee. Guyu' te niguii. Biriini sale'cni binij. <sup>4</sup> Che guslojni cabe'cni, yu' lajt biajb binijga cuä' nezyuj. Sas biääd reman xhaguibaa, gudajwreni binijga. <sup>5</sup> Stee lajt biajb binijga nen guij cadre xheti xhidajñ yuj. Binijga gulengajcni, sa'csi xheti xhidajñ yuj ro'c. <sup>6</sup> Dxejc, sa'csi lo jiaa yu' xlobaani, che birii gubijdx, bigolñi, gubijdztni. <sup>7</sup> Stee lajt biajb binijga nen yaguejch. Dxejcti biroob reyaguejchga, luxh bejnreni balaa loj binijga, ni'cni gujcní ganax bilii. <sup>8</sup> Per stee lajtga biajb binij lo yusa'c. Gulejn reyäjñga, guroobreni, gucsa'creni. Yu'reni cuaj galbitzúu xob, yu'reni cuaj gayojñ xob, yu'zarení cuaj tegayuu xob.

<sup>9</sup> Dxejc räjpni lojreni:

—Chutis ni rñajz guisieed, sucua diajgni.

<sup>10</sup> Che asii xhidajñ bejn, rebejn nani suga' gajxh cadre suganäj Jesús guitzubitio'p xpejn pacni gunabdiidx lo Jesús xhi säloj cuentre. <sup>11</sup> Dxejc räjp Jesús:

—Dios abejñ gacheetu te gantu xho najc yälxhiga'tz xten xcälrnibee Dios nani najc xhiga'tz najñi. Niluxh lo ste'ca bejn con cuenttis rñiä guiraa recosre, <sup>12</sup> te mase cahuiireni

direni gumbee, te mase cayiejn diajgreni, direni gacbee. Scree gacni, te na'c gusiejch lajzreni, te na'c guibicaj xtojłreni.

<sup>13</sup> Rāj pzani lojreni:

—¿La ditu gacbee cuentre? ¿Xhocha gacbeetu xhidajlru cuent? <sup>14</sup> Niguiire nani sale'c binij najc si'c te nani ruluii xtidx Dios. <sup>15</sup> Yu' bejn ni najc si'c binij ni biajb cuä' nezyuj: riejn diajgreni xtidx Dios nani ruluii bejn. Dxejc che jiejn diajgreni xtidx Dios, riäd Satanás rbägajcni xtidx Dios ni yu' nen lastooreni. <sup>16</sup> Yu'za rebejn ni najc si'c binij ni biajb nen reguij, renani che jiejn diajgreni xtidx Dios, rbaa lajzreni rca'reni diidxga. <sup>17</sup> Niluxh direni nisiudzu'tz, sa'csi guxii huilii lajzreni. Che rdej dreni trabajw o che rusacsí bejnreni xcuent xtidx Dios, rusaanreni xtidx Dios. <sup>18</sup> Yu'zarenii najc si'c binij ni biajb nen yaguejch, riejn diajgreni xtidx Dios, <sup>19</sup> dxejc che ru'rurenii yärsia' xcuent recos guedxliujre, rsia' lajzreni ga'preni meel, rlajzreni ga'prurenii guiraloj recos, dxejc riu' redee nen lastooreni, rusäuuni lo xtidx Dios, xlia'si biejn diajgreni xtidx Dios. <sup>20</sup> Yu'za bejn ni riejn diajgreni xtidx Dios, rlii lajzreni diidxga, xhet xlia'ti biejn diajgreni xtidx Dios. Najcreni si'c binij ni biajb loj yusa'c. Yu' rebejn ni najc si'c nani cuaj galbitzuu xob lojni, yu'za rebejn ni najc si'c nani cuaj gayojn xob lojni, yu'za rebejn ni najc si'c nani cuaj tegayuu xob lojni.

*Xhet yuchetzu'tzdi ni di guidzujn dxej sisäbdiidx*

*(Lc. 8:16-18)*

<sup>21</sup> Rāj pza Jesús lojreni:

—¿La riäd nātu te bajl te suuni dejtz te alm, o nen te loon, ä? ¿La xhet nanabdi suuni jiaa te guzanijni, ä? <sup>22</sup> Xhet yuchetzu'tzdi ni di guidzujn dxej sisäbdiidx. Xhetiza xhicos naga'tztis. Naga'tzni naj, niluxh sidzujn dxej sule'ni. <sup>23</sup> Pal yu' chu rlajz guiseed, sucuadiajgni.

<sup>24</sup> Rāj pza Jesús lojreni:

—Colyxunxgaa xhigab rediidx ni riejn diajgtu. Nani rusältu loj xhigabtu, ni'cza guniidx Dios xca'tu, luxh sisiojbru yejc ni xca'tu. <sup>25</sup> Renani rajp che'n yäl najn, lojreni sudeedru Dios yäl najn. Luxh renani xhetru rusäldi loj xhigabreni, sudzucaj Dios yäl najn nani rajpreni.

*Xcuent binij ni roob*

<sup>26</sup> Guniiza Jesús lojreni:

—Yäl rnibee xten Dios najc si'c rsiajc te niguii che rbe'cni binij lo yuj, <sup>27</sup> dxejc yäl riguesni, rdxee ristieni, dxejcti rliejn binijga, luxh di niguiiga gan xho roobni. <sup>28</sup> Acanajn yujga rajc binij lojni. Galoo rii cuane'ga, sas rii doj lojni. Dxejcru rdxaj bejdz'e nen dojga. <sup>29</sup> Dxejcti che aguyajl bedze'ga, ruxhalni chu ritiuagni, sa'csi abidzujn dxej ni guidojpni.

*Xcuent bedz muxhtas*

*(Mt. 13:31-32; Lc. 13:18-19)*

<sup>30</sup> Rāj pza Jesús:

—¿Xhini'c najc si'c najc xcäl rnibee Dios? ¿Xhi te cuent guiniinu te guiluiinuni? <sup>31</sup> Si'c te bedz muxhtas ni rbej loyuj, si'c najcni. Bedz muxhtas najcni bedz baze'ru loj guiralii bedze' ni yu' loj guedxliuj. <sup>32</sup> Dxejc che agurejni, roobni, rajcni yagroru loj recuaan. Dxejcti roob rexajcwni te rajc rujn reman xhaguibaa xpitiääzni nen xpałaani.

*Si'c baluii Jesús ganax con cuent*

*(Mt. 13:34-35)*

<sup>33</sup> Si'c ruluii Jesús rebejn xtidx Dios guniini xhidal cuent sa' redee, si'ctis ni rajc racbeereni. <sup>34</sup> Con recuent ni ruluiitis gunii Jesús lojreni. Niluxh lo rexpejn pacni basule'ni guiraa recuentre.

*Rusiadxi Jesús bej näj nisdoo*

*(Mt. 8:23-27; Lc. 8:22-25)*

<sup>35</sup> Lagajc gudxejga räjpni loj rexpejn pacni:

—Colcho', chonnu stelaad nis xten Galilee.

<sup>36</sup> Basa'ntireni rebejn, sanätireni Jesús nen canuu cadro sobgajcni. Dxejcti sgaii canuu sanajlni. <sup>37</sup> Chela gubi' te beduxh, gusloj cayu' nis nen canuuga. Cadxaj canuuga nis.

<sup>38</sup> Nagayejs Jesús dejtz canuuga, nagayejsni. Bacuäänreni Jesús, räpgajcreni lojni:

—Dad mastr, ¿la dilu jiu siääznu nen nis, ä?

<sup>39</sup> Dxejc huistie Jesús, gudidxa'ni lo bejga, räjpzani lo nis:

—Guredxi.

Guläzgjajc bej, biacdxini. <sup>40</sup> Räjp Jesús loj rexpejn pacni:

—¿Xhicuent cadxebduxhtu? ¿La ditu chalilajz xtidxä, ä?

<sup>41</sup> Luxh laareni bidxelojreni, räjpreni loj sa'reni:

—¿Chucha dee ni rnibee bej con nis, luxh ruzoobreni xtiidxni?

## 5

*Nigui Gadara ni yu' bendxab nen lastooni*

(Mt. 8:28-34; Lc. 8:26-39)

<sup>1</sup> Bidzujntireni stelaad ro' nisga, lo yuj xten Gadara. <sup>2</sup> Si'ctis ni birii Jesús nen canuu, biädgjajc te niguii lojni ni birii nen rebiliää cadro rga'tz bengut. Yu' bendxab nen lastoo niguiiga. <sup>3</sup> Rbäjzni nen rebiliääga luxh rut rajcdi rucuaduuni, nicla con cadenguiib.

<sup>4</sup> Xhidajl huält agacbacuaduureni ni', naa niguiiga con cadenguiib, luxh litis batiuugni recadenguiibga, rut rajcdi rusiacdxini. <sup>5</sup> Si'ctis canzajni, dxej, yääl. Rbedxa'ni nen redajn, nen rebiliää, luxh cagutiuugni tiejxhni con reguij. <sup>6</sup> Che bahuiini loj Jesús zijtru, baxunni huichaglojni Jesús, bazuxhijbni lojni. <sup>7</sup> Dxejcti rbedxaduxhni, räjpni:

—¿Xhicuent siäädlu loä, Jesús, Xi'n Dios ni yu' jiaro? Rniabä lojlu nez loj Dios na'c gusacsilu narä.

<sup>8</sup> Sa'csi agac cayäjb Jesús lojni:

—Luj, bendxab, birii nen lastoo niguiiga.

<sup>9</sup> Dxejcti gunabdiidx Jesús räjpni:

—¿Chu laalu?

Dxejc räjpni:

—Narä laä Legión, nani säloj xhidalro, sa'csi xhidajl najcnu.

<sup>10</sup> Sanuutis canabni lo Jesús na'c guxhalni rebendxabga ste'ca guejdx. <sup>11</sup> Ro'c tre' xhidalduxh cuch cuä' dane'ga, cayajwreni. <sup>12</sup> Dxejc gunab rebendxabga loj Jesús, räjpreni:

—Baxhal nuure loj recuchre te jiu'nu nen lastooreni.

<sup>13</sup> Dxejcti basaan Jesúsreni. Biriiti rebendxabga nen niguiiga, dxejc biu'reni nen lastoo recuchga. Yu' si'cti tiop mił cuch ro'c. Baxun recuchga, dxejc birolreni ro' guilaj, bitejbreni nen nis, gujttireni nen nisga.

<sup>14</sup> Renani cayajp recuchga baxunreni, huiyeiireni diidxga nen guejdx, näjza loniaa. Dxejc biäd bejn biädhuii nani gujc ro'c. <sup>15</sup> Che bidzujnreni cadro suga' Jesús, bahuiireni loj niguii nani guyu' rebendxabga nen lastooni. Sobga'ni ro'c, najcwni xhajbni luxh nasa'c yejcn. Niguiire najc nani guyu' bendxab ni laa Legión nen lastooni. Bidxejbtie rebejn nani bahuii lojni. <sup>16</sup> Dxejcro rebejn ni bahuii xhi gujc ro', huiyeiireni diidx xho guzajc niguiire nani guyu' bendxab nenni galoo, näjza nani guzajc recuch. <sup>17</sup> Dxejc gusloj canabreni loj Jesús jiunejzni.

<sup>18</sup> Che biu' Jesús nen canuu, niguii nani guyu' bendxab nen lastooni gunabni loj Jesús, räjpni:

—Huinä narä.

<sup>19</sup> Per di Jesús nusaan nijni. Räjp Jesús lojni:

—Huij rolizlu, lo resa'lu. Huiyeii diidx lojreni xho bennäj Dadlu, näjza xho balaslajzni luj.

<sup>20</sup> Sä'ti niguiiga, gusloj cayujyni diidx nen reguejdx xten Decápolis xho bennäj Jesúsni. Guiraa rebejn bidxeloj.

*Xindxa'p Jairo nájza gunaa ni bahual* xhajt Jesús  
(Mt. 9:18-26; Lc. 8:40-56)

<sup>21</sup> Che bidzunsac Jesús stelaad ro' nisga nen canuu, bidzujn xhidalduxh bejn cadre suga'ni. Bia'nti Jesús ro' nisga. <sup>22</sup> Dxejcru biääd te niguii nani laa Jairo, ni rnibee nen xquidobáz rexpen Israel. Che bahuiini loj Jesús, bazuxhijbni lojni. <sup>23</sup> Canabpacni lojni, rájpn:

—Xindxapä'ä acayejt. Gudaa, guzujlu naalu yejcn, te jiajcn, te guibajjni.

<sup>24</sup> Sanäti Jesús bejnga. Xhidajl bejn sanajlni, luxh cagutäärenini. <sup>25</sup> Loj rebenxhidaalga yu' te gunaa ni agujc tzubitio'p ijz racxhuuni yälguidxbäii. <sup>26</sup> Agudedduxhni trabajw, abahuii xhidajl doctoorini. Xlia'si abanijtni guiraa nani rajpni, luxh xhet racnäjdini, alga rxuuruni. <sup>27</sup> Sa'csi biejn diajgni xhini'c canii rebejn xcuent Jesús, gubig gunaaga nez dejt Jesús, guideb nen rebejn, bahualni xhajt Jesús. <sup>28</sup> Cayujnni xhigab, naani: “Palga narä falä xhajtisni, siacä.” <sup>29</sup> Lagajc dxejc guläjz caxe' xtiejnni, gucbeeza tiejxhni abirii xcälracxhuuni. <sup>30</sup> Gucbegajc Jesús yu' chu abasiajcn. Gubiregajcn nen rebenxhidaalga, rájpn:

—¿Chuni'c bahual xhabä?

<sup>31</sup> Dxejcru rájp rexpejn pacni lojni:

—Rhuuilu benxhidaal cagutäälü, luxh naalu: “¿Chuni'c bahual xhabä?”

<sup>32</sup> Sas cahuii Jesús nez ree, nez rec, te fiini loj nani bahualni. <sup>33</sup> Dxejc bidxejb gunaare, racejsni, sa'csi gucbeeni xhini'c gujcn. Dxejc biäädni, bazuxhijbni loj Jesús, räbliini loj Jesús guira'ti ni bejn. <sup>34</sup> Dxejc rájp Jesús lojni:

—Xindxa'pä, abiajclu sa'csi huililajzlu. Gulecdxi lajzlu, huij rolijzlu, abiajxc xcälracxhuulu.

<sup>35</sup> Canisijc Jesús si'c che bidzujn renani birii rolijz dade' ni rnibee nen xquidobáz rexpejn Israel. Rájpreni:

—Agujt xindxape'lu. ¿Xhicuent rusieedrulu Dad mastr?

<sup>36</sup> Dxejc che biejn diajg Jesús nani caniireni, rájpn lo dade'ga:

—Na'c guidxejblu. Bililajztis.

<sup>37</sup> Luxh dini nusaanru nij chu ninäni, Pedrtis näj Jacob näjza Juan bejtni. <sup>38</sup> Che bidzujnni rolijz dade'ga, bahuii Jesús biey ni cayujn rebejn ni rbedxa' roon. <sup>39</sup> Biu'tini rájpn:

—¿Xhicuent rujntu si'c? Gajd dxape're guet. Nagayejssini.

<sup>40</sup> Alga baxhiznäjrenini. Dxejc gunibee Jesús birii guiraa rebejnga. Dxejcti huinäni xcuzajn dxape'ga con renani sanäni. Biu'reni cadre naga' dxape're. <sup>41</sup> Gunaazni naa dxape'ga, dxejc rájpn:

—Talita cumi —nani säloj con xtiidxnu: Dxape', lojlu rniä, huistie.

<sup>42</sup> Dxejcti huistiegajc dxape'. Tzubitio'p ijz yu' dxape'ga. Bidxeloduxh rebejn ni bahuii guläs Jesús dxape'ga. <sup>43</sup> Dxejc balijdx Jesús reni te rut lojdi chaye'tzreni xhini'c gujc. Gunibegajcn gudeedreni xhi gauu dxape'ga.

## 6

*Che guyu' Jesús Nazare't*  
(Mt. 13:53-58; Lc. 4:16-30)

<sup>1</sup> Dxejcru birii Jesús ro'c, huijni lajdxni, sanázani rexpejn pacni. <sup>2</sup> Che bidzujn sabd, dxej nani rusilajz rexpejn Israel, gusloj caguluiini nen xquidobáz rexpejn Israel. Bidxeloj xhidajl bejn nani biejn diajg rextiidxni, rájpreni:

—¿Caro bisieed niguiire guiraa recosre? ¿Xhi yälnejnre cua'ni ni'c rajc rujnni rextzunduxh Dios con naani? <sup>3</sup> ¿La xhet laadi carpinteer, xi'n Marii, bejtz Jacob, näj José, näj Judas, näjza Simón dee, ä? ¿La xhet reedi rbäjz rebisianhuinni?

Luxh bidxechlajzreni lojni. <sup>4</sup> Dxejc rájp Jesús lojreni:

—Catis rinälajzreni te ni nii xtidx Dios. Lajdxtisni, lagajc loj resa'ni, rolijztisni, ro'c rut rinälajzdini.

<sup>5</sup> Luxh di niajcdi niujn Jesús xhidajl milaagwr ro'c. Tiopchontis benracxhuu basiajnci, bazujni naani yejcreni. <sup>6</sup> Bidxelo Jesús sa'csi di lajzreni nilii. Caguluiitini nen guiraa reguejdx'e' ni ria'n gajxh nejzga.

*Baxhal* Jesús tzubutio'p bejn ni rinajlni chaluiireni xtidx Dios

(Mt. 10:5-15; Lc. 9:1-6)

<sup>7</sup> Dxejcru gurejdxni guitzubutio'p xpejn'pacni. Gusloj caguxhalni tiopgajreni; badeedzani yäl'rnibee lojreni te guinibeereni loj rebendxab. <sup>8</sup> Gunibeeni xhet chanädi-reni lo nejz, ganaxhtis te yajg te sanäjreni. Di nungäj'l chanäreni nicla bisiuud, nicla yätxtiil, niclaza meel nen dobdäjl. <sup>9</sup> Nungäj'lza xcaj gura'ch ni'reni, nägajc ga'preni tejtis gamangw, xhet tio'pdini. <sup>10</sup> Dxejcti räjpni lojreni:

—Cadrotis jiu'tu nen te guejdx, col'jia'n nen tejtis yu' guiraa redxej ni chutu guejdxga.

<sup>11</sup> Palga yu' te guejdx cadro direni gusaan jiu'tu luxh di rlanjreni cuadiajgreni diidx ni sanätu, col'rii guejdxga, col'cuijb guxhuj ni'tu si'c te seen te gacbeereni xhet laadi bejnreni. Rniliápac lojtu, guxiiru trabajw ted reben Sodomä näj reben Gomorra quela rebejn ni yu' guejdx cadro direni gusaan jiu'tu.

<sup>12</sup> Dxejc biriireni, sääreni. Cayäbgajcreni nanabpac gusiejch lajz rebejn. <sup>13</sup> Gulääzarenäni xhidajl bendxab dxejcti gudääbreni se't yejc xhidajl benracxhuu, luxh biajcreni.

*Xcäl'gujt Juan ni rutiobnis*

(Mt. 14:1-12; Lc. 9:7-9)

<sup>14</sup> Herodes najc nani rnibee dxejc. Biejn diajgni xpala'n Jesús, sa'csi guiralii rebejn calä'p xpala'nni. Dxejc räjp Herodes:

—Juan nani rutiobnis ahuäjs loj rebengut, ni'c rajc rujnni remilagwre.

<sup>15</sup> Sgaii bejn räjp:

—Laa Elías ni gunii xtidx Diosni.

Sgaiireni räjp:

—Laa te bejn ni rnii xtidx Dios, o sa' te rebejn ni gunii xtidx Dios agujc xchero.

<sup>16</sup> Che biejn diajg Herodes si'c, räjpni:

—Laa Juan dee, nani gunibeä biru' yejnci, luxh naj agubansacni loj rebengut.

<sup>17</sup> Sa'csi lagajc Herodes gunibee biga' Juan, dxejc bacuaduurenini con cadenguiib nen latzguiib, xcäl'nasa'c Herodías. Herodías gujc chääl Lib, bejtz Herodes, dxejc cua' Herodes gunaaga si'c chääl'ni. <sup>18</sup> Räjp Juan loj Herodes:

—Xhet laadi rbäznäjlu chääl bejtzlu.

<sup>19</sup> Ni'cni rdexchlajz Herodías loj Juan, luxh rlanjzni ju'tnini, luxh di niajcdini <sup>20</sup> sa'csi rdxejb Herodes Juan, sa'csi najnni be'nsa'c, bendxan najc Juan, ni'cni dini nusaan niujn Herodías latsiajni. Mase dini gacbesa'c ni rnii Juan, rucuaadiagsa'cni xtiidxni. <sup>21</sup> Niluxh guyu' xmood Herodías. Che gojl laj Herodes, bayaanni rexpejn'ni ni rnibee, näjza rebejn nani sajc nez región Galilee. <sup>22</sup> Dxejcti biu' xindxa'p Herodías cadro cayajwreni, baya'ni nez lojreni. Bidxaglazduxh Herodes näjza rexpioozni baya' gunaaga, xindxa'p Herodías. Dxejc räjp Herodes lo gunaaga:

—Gunab ni rlanjztslu loä, narä sunidxäni.

<sup>23</sup> Dxejcru räplii Herodes lojni:

—Sunidxä xhitis ni guiniablu. Mase gala' yuj ni rnibeä.

<sup>24</sup> Biriitini nen yu', huiye'tzni loj xnanni, räjpni:

—¿Xhini'c guiniabä lojni?

Dxejc räjp xnanni lojni:

—Gunab yejc Juan ni rutiobnis lojni.

<sup>25</sup> Huigajcni loj reii, sas gunabni lojni, räjpni:

—Rlazä gunidxgajclu loä yejc Juan ni rutiobnis. Nen te pla't baniidx yejnci.

<sup>26</sup> Dxejcti guc-huinuxh lajz Herodes, sa'csi abadeedni xtiidxni lojni, luxh sa'csi abiejn diajg renani sobganäjni lo xmexni, ni'c dipac rlanjzni nudxojnni nani gunab gunaaga lojni.

<sup>27</sup> Baxhal'gajc reii te soldaad ni rcanäj ro'c, baxhal'nini, te chaxiini yejc Juan. <sup>28</sup> Ni'c huij,

dxejcti bagu'tni Juan nen latzguiib, biädnätini yejc Juan nen te pla't. Badeedtinini loj gunaaga. Dxejcti gunaaga badeednini loj xnanni.

<sup>29</sup> Che biejn diajg rexpejn<sub>pac</sub> Juan si'c, biädläsreni togoolga. Dxejcti bacua'tzrenini nen te baa.

*Bayaan Jesús gaii mil bejn*

(Mt. 14:13-21; Lc. 9:10-17; Jn. 6:1-14)

<sup>30</sup> Che gubi' renani baxhal Jesús, bijreni diidx guiraa ni bejnreni nájza ni baluiireni.  
<sup>31</sup> Dxejc räjp Jesús lojreni:

—Col<sub>ta</sub>, xtebnu cho<sub>nnu</sub> cadro rut rbäjzdi, guisilaaznu tudxe'n.

Räjp Jesús si'c sa'csi yu' xhidajl bejn ni sää, ni siääd, nicla gal gauureni. <sup>32</sup> Dxejcti sääreni nen te canuu cadro rut rbäjzdi. <sup>33</sup> Bahuii xhidajl bejn sääreni, biembeereni Jesús. Dxejc xhidajlreni huini' ro'c, xhidajl guejdx biriireni, ganidreni bidzuj<sub>nn</sub>reni loj Jesús nájza rexpejn<sub>pac</sub>ni, dxejcti bidojpreni lojni. <sup>34</sup> Birii Jesús nen canuu, bahuiini loj ben<sub>x</sub>hidaalga. Dxejc balazlajznireni, sa'csi najcreni si'c rexiil ni ruti baxtoor xtenreni. Dxejc gusloj caguluiniireni giralolj. <sup>35</sup> Che gojl gudxej, gubig rexpejn<sub>pac</sub>ni lojni, räjpreni:

—Rut rbäjzdi ree, luxh agudxej naj. <sup>36</sup> Baxhal rebejn te chääreni lo reguejdx, nájza rerench, te chasiireni yätxtiil gauureni sa'csi xheti xhi gauureni ree.

<sup>37</sup> Dxejc räjp Jesús lojreni:

—La'tu col<sub>deed</sub> xhi gauureni.

Dxejc räjpreni loj Jesús:

—¿Xhixh sajl tiop gayuu meel yätxtiil chosiinu gauu guiraa reben<sub>x</sub>hidajlre?

<sup>38</sup> Dxejcti räjp Jesús lojreni:

—¿Bal yätxtiil rajptu? Col<sub>chahuii</sub>.

Che gojnreni balni dxejc räjpreni:

—Gaii yätxtiil, nájza tiop bäj.

<sup>39</sup> Dxejcru gunibee Jesús räjpreni loj guiraa rebejn:

—Col<sub>cuej</sub> xcua-xcuaatu loj guixhaya'.

<sup>40</sup> Sas gurej xcua-xcuaareni. Yu' lajt gurej tegayuureni, yu' lajt gurej garol gayuureni.

<sup>41</sup> Dxejcti cua' Jesús guigaii yätxtiilga nájza guiro'p bäjlgä, bahuiini xhaguibaa, badeedni xquixhtios loj Dios. Dxejcti gula'ni yätxtiil nájza guiro'p bäj, badeednini loj rexpejn<sub>pac</sub>ni te badeedrenini loj guiraa reben<sub>x</sub>hidaalga. <sup>42</sup> Dxejc gudajw guiraareni, gudxaj xque'reni. <sup>43</sup> Dxejcru batojpreni tzubitiop dxij<sub>m</sub> guidxadoo yätxtiil nájza bäj ni bia'n.

<sup>44</sup> Luxh loj guiraa rebejn ni gudajw yu' si'cti gaii mil niguii.

*Guzaj Jesús loj nis*

(Mt. 14:22-27; Jn. 6:16-21)

<sup>45</sup> Gunibee Jesús jiu' rexpejn<sub>pac</sub>ni nen canuu, chägajcreni Betsaida, ni tre' dejtz nis stelaad, la<sub>lni</sub> cagusadiid<sub>x</sub>ni rebejn. <sup>46</sup> Che gulujx basadiid<sub>x</sub>nireni, sääni nen redane', sanabni lo Dios. <sup>47</sup> Cheni acayu' guxhij<sub>n</sub>, yu' rexpejn<sub>pac</sub>ni nen canuu galäi<sub>i</sub> nis la<sub>l</sub> ni suga' Jesús xtebni ro' nis. <sup>48</sup> Dxejcti bahuii Jesús abadxajgreni cagusajreni xcanuureni, sa'csi säbduxh bej. Bejga rulanaareni nez dejtzreni stehuält. Dxejcru che acara yääl, gusaj Jesús loj nis, huijni cadro sasajreni, r<sub>l</sub>ajzni ninij<sub>d</sub>ni lojreni. <sup>49</sup> Dxejc che bahuiireni sasaj Jesús loj nis, naareni pet te ben<sub>m</sub>alni, ni'c guredxa'reni. <sup>50</sup> Guiraareni bahuiireni lojni, bidxebduxh<sub>reni</sub>. Sas gunigajcni lojreni, räjpni:

—Col<sub>sutijp</sub> lajz<sub>tu</sub>. Laa naräni. Na'c guidxej<sub>btu</sub>.

<sup>51</sup> Dxejcti huä'p Jesús nen canuu cadro yu'reni. Lagajc dxejc biacdxi bej, luxh laareni bidxeloduxh<sub>reni</sub>, <sup>52</sup> sa'csi direni niacbee xhini'c bennäj Jesús reyätxtiil. Guc najd lajzreni, ni'c direni niacbee.

*Basiajc Jesús reben<sub>rac</sub>xhuu nen guedx Genesare't*

(Mt. 14:34-36)



<sup>53</sup> Gudejdreni lo nis, bidzujnreni lo yuj xten Genesare't. Ro'c bacuaduureni canuu ro' nis. <sup>54</sup> Che biriireni nen canuu, biembegajc rebejn Jesús, <sup>55</sup> dxejcti birii rebejn guideb nejzga. Guslojti siädnäreni benracxhuu loj Jesús, naga' rebenracxhuuga lo da'. Cadrotis riejn diajgteni yu' Jesús riädnäreni rebenracxhuu. <sup>56</sup> Niluxh cadrotis rij Jesús, nen reguedxbäz, nen reguedxro, näjza loj rerench, rguixhreni rebenracxhuu cadre rajc guii. Dxejcti rniabreni loj Jesús te gac caanreni xhajn, niluxh biajc guiralii renani gudajn xhajn Jesús.

## 7

*Nani runijt lastoo bejn*  
(Mt. 15:1-20)

<sup>1</sup> Dxejcti refarisee, renani najc benguidoo loj guedx Israel, näjza gaii rebejn ni ruluii leii, renani birii Jerusalén, bidojpreni loj Jesús. <sup>2</sup> Bahuiireni cayajw gaii rexpejn pac Jesús, luxh canii rebejn nacdxuudx naareni (dee säloj direni quiiib naareni si'ctis ni rdiib naa reben lajdxreni). Ni'cni guniyajreni rexpejn pac Jesús. <sup>3</sup> (Guiraa rebejn xten Israel, näjza refarisee, sasanäj nani baluii rebengool ni yu' guedx Israelreni. Direni gauu palga direni quiiib naareni balti huält. <sup>4</sup> Che rbi'reni rijreni lo guii, rguibsa'creni naareni, lojreni, ni'reni, dxejcti rajc rajwreni. Niluxh guyu' xhidajl costumbr ni sasanäjruren, luxh yu' mood rguibreni rextrastreni näjza rexplooreni, näjza rextrastguiibreni, näjza rexloonreni.) <sup>5</sup> Dxejc gunabdiidx refarisee näjza rebejn ni ruluii leii loj Jesús, räjpreni:

—¿Xhicuent di rexpejn pacu gun si'cni baluii rebengool, niluxh rajwreni guideb nacdxuudx naareni?

<sup>6</sup> Dxejcti gunii Jesús lojreni räjpni:

—¡Ben guijdx! Laaca gunii Isaías xcuenttu che guniini xtidx Dios. Scree cajni loj guijtz: Guejdxre sanälajz narä con rextiidxni, niluxh lastooreni zitro suga' loä.

<sup>7</sup> Xlia'si ruzuxhijbreni, sa'csi direni chanälajz narä.

Ruluiireni si'c xtiidx pac Dios nani rnii rebejn.

<sup>8</sup> Rusa'ntu xleii Dios, sasanädzu'tztu costumbr nani baluii rebengool. Rdibsa'c rexploortu, rextrasttu, luxh rujnzatu xhidajlru cos sa' redee.

<sup>9</sup> Räjpza Jesús lojreni:

—Rusa'ntu xtidx Dios te risanäjtu recostumbr xtentu. <sup>10</sup> Sa'csi räjp Moisés: “Huinälajz xtadlu con xnanlu.” Räjpzani: “Suju'tpactu nani gudzubde yejc xtadni o yejc xnanni.”

<sup>11</sup> Niluxh la'tu rniitu sajc gäb bejn loj xtadni o loj xnanni: “Dina gapä xhi cojn gacnäälü” (nani säloj, abadedä guira'ti loj Dios). <sup>12</sup> La'tu ditu gusaan gunru bejn por xtadni nicla por xnanni. <sup>13</sup> Si'c rbälaztu xtidx Dios, te sasanäjtu recostumbr nani ruluiitu, luxh xhidajl cos sa' dee rujntu.

<sup>14</sup> Gurejdx Jesús guiraa rebejn, dxejc räjpni loj guiraareni:

—Colcuadiajg, colyacbee xtidxä. <sup>15</sup> Rexhicos yälrajw ni rajw bejn, dini gunijt bejnga, rediidx ni rii nen lastoo bejn, näjza recos ni rujn bejn, ni'c runijt bejnga. <sup>16</sup> Pal yu' chu rlajz guisheed, sucuadiajgni.

<sup>17</sup> Dxejcti gula'reni loj rebenxhidaal, biu'reni nen yu'. Dxejc gunabdiidx rexpejn pacni loj Jesús xhi säloj cuent ni guniini. <sup>18</sup> Basejc Jesús diidx lojreni, räjpni:

—¿La näjza la'tu xheti xcäriejntu? ¿La di'tu gacbee xhitis yälrajw nani riu' nen bejn digacdi gunijtni lastoo bejn, ä? <sup>19</sup> Sa'csi dini jiu' nen lastooni; riu'ni xque'ni, rdejdtini.

Si'c guniini te baluiini guira'ti xhicos najc naya. <sup>20</sup> Dxejc räjpni:

—Rediidx ni rii nen lastoo bejn, näjza recos ni rujn bejn, ni'c sii runijt lastoo bejn.

<sup>21</sup> Sa'csi nen lastoo rebejn rii rexhigabguijdx, näjza yälresnäjä chääl sa'ni, yälresnäjä ni xhet najcdi chääl, yälrugut sa'ni, <sup>22</sup> yälgubaan, yälrlajzni ga'pni xhixhten bejn, yällatsiaj, yälrusgueeni, yäl xheti xtujy lojni, yälrdxechlajz, yälrudzubde sa'ni, yäl nayechlajzni, yälguyalajz. <sup>23</sup> Guiraa reyällatsiajre nen lastoo bejn riireni, luxh reni'csi runijt bejn.

*Tej guna Sirofenicia ni bililajz xtidx Jesús*  
(Mt. 15:21-28)

<sup>24</sup> Dxejc biriini ro'c, sääni nez guedx Tiro näjza nez Sidón. Ro'c bia'nni nen te yu' sa'csi di rlajzni niacbee rebejn caro yu'ni, niluxh di niajcdi niuxhiga'tztisni. <sup>25</sup> Biengajc diajg te gunaa ro'c yu' Jesús. Xindxape' gunaaga yu' bendxab nen lastooni. Bidzujn gunaaga, bazuxhijbni lo Jesús. <sup>26</sup> Gunaaga rnii griegw, najcni ben Sirofenicia. Gunabni lojni guinibeeni guirii bendxabga nen lastoo xi'nni. <sup>27</sup> Dxejc räjp Jesús lojni:

—Basaan gauxgaa rebuux, sa'csi xhet laati gudzucajni xcuxtiil rebuux te gudeednini loj rebä'cw.

<sup>28</sup> Dxejc gunii gunaaga, räjpni loj Jesús:

—Yo, Dad. Näjza rebäcue' ni suga' nen mex rajw nani rtejb ro' rebuux.

<sup>29</sup> Dxejcti räjp Jesús lojni:

—Laaca nliilu. Huij rolizlu. Abirii bendxab nen lastoo xindxape'lu.

<sup>30</sup> Luxh che bidzujn gunaare rolizni, a dxape' naga' lo da'. Gucbegajc gunaaga abirii bendxab nen lastoo dxape'ga.

*Basiajc Jesús te bengop*

<sup>31</sup> Dxejcru birii Jesús stehuält lo rexyuj guedx Tiro, gudejdni nez Sidón näjza rexyuj Decápolis. Bidzujntini ro' nis xten Galilee. <sup>32</sup> Biädnä gaii bejn te niguii ni nacua't diajgni lo Jesús. Digacdiza guinisa'c niguiiga. Biäd nabreni lo Jesús nusujni naani yejc niguiiga. <sup>33</sup> Dxejcti badzucajnini loj rebejn. Baquitzgajcni rebicueñani nen diajgni, dxejcru batiobxhejni, gudajntini lujdxni. <sup>34</sup> Bahuiini xhaguibaa, bazaa lajzni, dxejc räjpni:

—¡Efata! —nani säloj bixal.

<sup>35</sup> Dxejcru bixalgajc rediajgni, gubangajc lujdxni, gunisa'cni. <sup>36</sup> Dxejcti gunibee Jesús rutlojdi gäbreni, per che räjpni lojreni si'c, laareni batie'churenini diidxga.

<sup>37</sup> Rdxeloduxhreni, räjpreni:

—Guira'ti laaca rujnni; ruxhalni diajg rediagcua't, luxh rusniini regop.

## 8

*Bayaan Jesús tajp mil bejn*  
(Mt. 15:32-39)

<sup>1</sup> Nen redxejga bidojp xhidalro bejn, luxh xheti xhigauureni. Dxejc gurejdx Jesús rexpejn pacni ni rinajlni, räjpni lojreni:

<sup>2</sup> —Rulazlazä rebejnre, sa'csi naj rajc chon dxej tre'reni loä, luxh xhet yu'di gauureni.

<sup>3</sup> Niluxh palga guxhaläreni rolizreni, xliajzreni, sidxajgreni lo nejz; sa'csi yu' renani zijtru siädreni.

<sup>4</sup> Dxejcru räjp rexpejn pacni lojni:

—¿Caro chaca'nu yätxtiil te cha xque' rebejnre ree, cadre rut rbäjzdi?

<sup>5</sup> Sas gunabdiidx Jesús lojreni:

—¿Bal yätxtiil rajptu?

Dxejcru räjpreni:

—Gajdztisni.

<sup>6</sup> Gunibee Jesús gurej rebenxhidaalga loj yuj. Sas cua'ni guigajdx yätxtiilga, badeedni xquixhtios lo Dios, gula'ni reyätxtiilga. Dxejc badeednini loj rexpejn pacni te guteedrenini loj rebenxhidaal. Bateedtireni yätxtiilga lo rebenxhidaalga. <sup>7</sup> Rajpzareni gaii bälbäz, dxejcti badesac Jesús xquixhtios lo Dios, gunibeeni bateedzareni rebälbäzre loj rebenxhidaalga. <sup>8</sup> Dxejc gudajwreni, gudxaj xque'reni. Dxejc batojp rexpejn pac Jesús gajdz dxijm reyätxtiil näj rebäj l dxuc ni bia'n. <sup>9</sup> Niluxh renani gudajwga najceni si'cti tajp mil bejn. Dxejcti basadiidxnireni. <sup>10</sup> Biunägajc Jesús rexpejn pacni nen canuu, biädreni nez Dalmanuta.

*Gunab refarisee te senro loj Jesús**(Mt. 16:1-4; Lc. 12:54-56)*

<sup>11</sup> Biääd refarisee, renani najc rebenguidoo loj guedx Israel, guslojreni cayeinäjreni Jesús. Canabreni gunni te senro nani Diostis ni yu' guibaa sajc gun. Cagula'tzsireni, don xhi gunni. <sup>12</sup> Dxejcti bazaa lajz Jesús nen lastooni, räjpni:

—¿Xhicuent rlajz rebejn ni nabajn naj fii gac resenro xten Dios? Rniliápac lojtu, di rebejn ni nabajn naj fii nicla tej sen xhaguibaali.

<sup>13</sup> Dxejcti basa'nnireni ro'c, biusacni nen canuu, sä'tini stelaad nisga.

*Levaduur xten refarisee**(Mt. 16:5-12)*

<sup>14</sup> Biallajzreni nica'reni yätxtiil, luxh xhetliidi sanädireni. Tejtis yätxtiil nuureni nen canuu. <sup>15</sup> Cagulijdx Jesús rexpejn pacni, räjpni lojreni:

—Col̄susin, col̄nati levaduur xten refarisee, col̄natiza levaduur xten Herodes. (Nalajznu, xtiidxreni najc si'c levaduur.)

<sup>16</sup> Dxejcti cayeinäj sa'reni diidx xcuent nani gunii Jesús lojreni, dxejc räjpreni:

—Sa'csi dinu jia'p yätxtiil, ni'c rniini scree.

<sup>17</sup> Che gucbee Jesús xhini'c caniireni, räjpni:

—¿Xhicuent rniitu: “Sa'csi dinu jia'p yätxtiil”? ¿La gajdtu fii, la gajdtu gacbee? ¿La lajtis nacnajd lastootu? <sup>18</sup> ¿La yu' balojtu, luxh ditu fii? ¿La sojb diajgtu luxh di diajgtu jiejn? ¿La dilajztu guizaj? <sup>19</sup> Che gula'a guigaii yätxtiil te gudajw gaii mil niguii, ¿bal dxijm yätxtiil biujy batojptu?

Sas räjpreni lojni:

—Tzubitio'pni.

<sup>20</sup> —Che gula'a guigajdz yätxtiil te gudajw tajp mil bejn, ¿bal dxijm yätxtiil biujy batojptu?

Sas räjpreni:

—Gajdzni.

<sup>21</sup> Dxejc räjpni lojreni:

—¿La gajdtu gacbesa'c xhi benä?

*Basiajc Jesús te lotiä'p Betsaida*

<sup>22</sup> Bidzunäj Jesús rexpejn pacni guedx Betsaida. Dxejc biädnäreni te lotiä'p loj Jesús, gunabreni loj Jesús caanni bejnga. <sup>23</sup> Dxejc gunaazni naa lotiä'pga, guläänini nen guejdx. Che batiobxhejn ni nen rebalojni, basugajcni naani yejc baloj lotiä'pga, gunabdidxgajc Jesús:

—¿La yu' xhi rhuiilu, ä?

<sup>24</sup> Luxh che bahuii bejnga räjpni:

—Rhuiä sasaj rebejn, luxh si'c yajg rhuiä lojreni.

<sup>25</sup> Basusac Jesús naani yejc rebaloj bejnga. Dxejc bejn Jesús bahuii bejnga. Biajctini, zijtru gujc bahuisa'cni lo guiraa rebejn. <sup>26</sup> Dxejcti baxhal Jesúsni rolijzni, räjpni:

—Basquejn, huijga rolijzlu, na'c jiu'lu nen guejdx, na'c gäblu xhi gujclu lo rebejn ni yu' nen guejdx.

*Basule' Pedr Jesús najc Crist**(Mt. 16:13-20; Lc. 9:18-21)*

<sup>27</sup> Birinäj Jesús rexpejn pacni lo reguejdx ni ria'n nez Cesarea xten Filipo. Lalni sasajreni lo nejz räjp Jesús loj rexpejn pacni:

—¿Chuni'c rnii rebejn nacä narä?

<sup>28</sup> Sas räjpreni lojni:

—Yu'reni rnii najclu Juan ni batiobnis, yu'zarenen rnii najclu Elías, yu'zarenen rnii najclu te rebejn ni gunii xtidx Dios.

<sup>29</sup> Dxejc räjpni lojreni:

—¿La'tu a'? ¿Chuni'c rniitu nacä narä?

Dxejc bazejc Pedr diidx, räjpni lojni:

—Luj najclu Crist.

<sup>30</sup> Dxejcti räjp Jesús lojreni:

—Rutlojdi gäbtu chu nacä.

*Gunii Jesús xho guetni*

(Mt. 16:21-28; Lc. 9:22-27)

<sup>31</sup> Dxejcti gusloj Jesús caguluiini rexpejn<sub>u</sub>pacni, räjpni:

—Narä nacä Xi'n Dios, ni gujc Niguii. Nanabpac tedä trabajwduxh. Sibälaz rebengool ni najc guxhtis nen<sub>u</sub> guedx Israel narä, näjza renani rnibee loj rebixhojz, näjza rebejn<sub>u</sub> ni ruluii leii: sugu'treni narä, luxh ni riojn<sub>u</sub> dxej guiba<sub>n</sub>sacä lo rebengut.

<sup>32</sup> Guyasi guniini rediidxre. Sas huinä Pedr Jesús telaad, dxejc räjpni loj Jesús:

—Na'c guiniilu si'c.

<sup>33</sup> Dxejc batzuré loj Jesús, bahuiini loj rexpejn<sub>u</sub>pacni. Dxejc gudil<sub>n</sub>äjni Pedr räjpni:

—Gubicaj loä, Satanás, luj dilu gun xhigab xten Dios, xhigab ni rujn rebejntis rujnlu.

<sup>34</sup> Dxejc gurejdxni reben<sub>x</sub>hidaal con reni najc xpejn<sub>u</sub>pacni, räjpni lojreni:

—Palga yu' chu rlajz gac xpenäpac, sucuääz gunni ni rsia' lajzni gunni, sutedni trabajw si'c tej ni caj lo cruiz, sujiädna<sub>j</sub>lni narä. <sup>35</sup> Sa'csi nani rlajz gus<sub>l</sub>aa xcäl<sub>n</sub>abaj<sub>n</sub>ni, sunijtni xcäl<sub>n</sub>abaj<sub>n</sub>ni. Luxh nani runijt xcäl<sub>n</sub>abaj<sub>n</sub>ni xcäl<sub>n</sub>asa'c narä, xcäl<sub>n</sub>asa'c xtidxä, siliaapac xcäl<sub>n</sub>abaj<sub>n</sub>ni. <sup>36</sup> Xlia' ga'p bejn<sub>u</sub> guiraloj lo guedxliujre palga nitni lo Dios par tejpas. <sup>37</sup> Xhet gacdi gudeed bejn<sub>u</sub> te guiba<sub>n</sub>näjni Dios. <sup>38</sup> Nani guituinäj narä con rextidxä <sub>n</sub>aj, cheni najc rebejn<sub>u</sub> be<sub>n</sub>doj<sub>l</sub>, narä, Xi'n Dios nani gujc Niguii, situinäzani che jiädnaä reangl xten Dios che jiälää lo xcäl<sub>r</sub>dimbicha' Xtaä.

## 9

<sup>1</sup> Dxejc räjp Jesús lojreni:

—Rniliäpac lojtu, yu'reni suga' ree nani di guet fixgaareni abiääd xcäl<sub>r</sub>rnibee Dios.

*Gubixhlo Jesús garenca*

(Mt. 17:1-13; Lc. 9:28-36)

<sup>2</sup> Che gudejd xho'p dxej, Jesús cua' Pedr, näj Jacob, näjza Juan, laatisreni huinäni yejc te danro. Ro'c gubixhlojni garenca lojreni. <sup>3</sup> Gusloj rdimbicha' rexhajn<sub>i</sub>, gujc xhajn<sub>i</sub> nolbäj. Rut rajcti rusquijtz lajd lo guedxliujre si'c biquijtz xhajn<sub>i</sub>. <sup>4</sup> Dxejc baluiiloj Elías näjza Moisés lojreni, cayuinäjreni Jesús diidx. <sup>5</sup> Sas räjp Pedr loj Jesús:

—Dad, laaca dxunnu ree. <sub>n</sub>aj jiennu cho<sub>n</sub> yuguixa', tejni xtenlu, steeni xten Moisés, steeni xten Elías.

<sup>6</sup> Si'c guniini sa'csi nicla niacbeeni xhini'c guiniini, sa'csi cadxebduxh<sub>r</sub>eni. <sup>7</sup> Dxejc biääd te za bejn balaa yejcreni. Nen<sub>u</sub> zaga biejn xse' te ni räjp:

—Dee najc xi'nä nani sanälazä, colcuadiajg xtiidxni.

<sup>8</sup> Che batzuré lojreni, bahuiireni rutru suganäjti Jesús, xtebtis Jesús suga'.

<sup>9</sup> Che siädjiäjtreni dajnga, gunibee Jesús rut lojdi guiniireni xcuent ni bahuiireni, guiba<sub>n</sub>xgaasi Xi'n Dios nani gujc Niguii lo rebengut. <sup>10</sup> Basälcheereni rediidxre nen<sub>u</sub> lastooreni. Dxej<sub>r</sub>u canabdiidx lo sa'reni xhicha säloj guiba<sub>n</sub>sacni lo rebengut. <sup>11</sup> Sas gunabdiidxreni lojni, räjpreni:

—¿Xhicuent rni remastr xten leii naquiinpac jiädxgaa Elías?

<sup>12</sup> Dxejcti bazej<sub>c</sub>ni diidx lojreni, räjpni:

—Guliireni siädxgaapac Elías, luxh sunsa'cni guira'ti xhi cos. <sub>n</sub>aj a', ¿xhicuent caj lo guijtz xcuent Xi'n Dios ni gujc Niguii, sidej<sub>d</sub>ni trabajwduxh, rutza jjudini? <sup>13</sup> Luxh narä rniä lojtu, abiääd Elías, luxh bennäjreni si'ctis ni rlajzreni, si'cpac ni caj loj guijtz ni rusule' xcuentni.

*Basiaj<sub>c</sub> Jesús te biuux ni guyu' be<sub>n</sub>dxab nen<sub>u</sub> lastooni*

(Mt. 17:14-21; Lc. 9:37-43)

<sup>14</sup> Che asiädreni cadre tre' sgaii rexpejn<sub>pac</sub> Jesús, bahuiireni loj xhidalro bejn ni tre' lojreni, luxh cayeinäj rebejn ni ruluu leiireni. <sup>15</sup> Che bahuii guiraa rebejn loj Jesús, bidxeloduxh<sub>reni</sub>, baxun<sub>reni</sub>, huiye'tzreni xchan lojni. <sup>16</sup> Dxejc gunabdiidx Jesús lojreni:

—¿Xhini'c rusieinäjtu laareni?

<sup>17</sup> Sas gunii tej reni yu' lo benxhidaalga, räjpni:

—Dad, ree siädnaä xi'nä lojlu, yu' bendxab nen lastooni, nani rujn najcni gop.

<sup>18</sup> Cheni rniaaznini, rutienta'ni xi'nä, luxh riduxh bitzun ro'ni, näjza rauya'ni ro'ni, luxh cabijdzni. Aräpä loj rexpejn<sub>pac</sub>lu cuääreni bendxabga, niluxh di niajcdi nibäärenini.

<sup>19</sup> Dxejcti gunii Jesús lojreni, räjpni:

—La'tu, bejn ni di chalilajz, ¿gucli chu'ä lojtu te chalilajztu? ¿Gucli gusieedtu narä? ¿Coltanäni loä!

<sup>20</sup> Dxejc biädnäreni biuuxga lojni. Che bahuii bendxab lo Jesús, basnijni bi'nga, basälta'tinini lo yuj. Sädiidxni, luxh carii bitzun ro'ni. <sup>21</sup> Gunabdiidx Jesús loj xtadni:

—¿Gucli rajcni si'c?

Dxejc räjp dade'ga:

—Che gujclini biuxbäz. <sup>22</sup> Balti huält rusäl<sub>nini</sub> lo guiboo näjza lo nis te ju'tnini. Palga yu' xhi gac gunlu, balazlajz nuunu, gucnäj nuunu.

<sup>23</sup> Sas räjp Jesús lojni:

—¿Xhicuent rniabdiidxlu la sajc gacnäälü? Xhitis sajc gac par nani rililajz.

<sup>24</sup> Guredxa' xtad bi'nga, räjpni:

—¿Rililazä! Gucnäj narä te chaliiru lazä.

<sup>25</sup> Che bahuii Jesús bixa't xhidajl bejn lojni, gudidxa'ni lo bendxabga räjpni lojni:

—Bendxab ni rujn gop, narä canibeä, birii nen lastoo bi'nga. Na'cru chulu nen lastooni.

<sup>26</sup> Dxejcro guredxa' bendxabga, luxh basnibzejsni bi'nga, dxejcro biriini nen lastooni. Astoo te bengut bia'n bi'nga ro'c. Xhidajl rebejn räjp:

—Agujtni.

<sup>27</sup> Dxejc gunaaz Jesús naa bi'nga guläsnini. Guzuliiti bi'nga. <sup>28</sup> Dxejcti che abiu' Jesús nen yu', gunabdiidx rexpejn<sub>pac</sub>ni lojni:

—¿Xhicuent di niajcdi nibäänu bendxabga?

<sup>29</sup> Dxejc räjp Jesús lojreni:

—Di gacdi cuäätu sa' bendxabre palga ditu cuedx-guinab lo Dios, palga ditu gucuanx-gaa.

*Gunisac Jesús xho guetni*

*(Mt. 17:22-23; Lc. 9:43-45)*

<sup>30</sup> Dxejc biriireni ro'c, gudejdreni Galilee. Luxh di rlajz Jesús niacbee rebejn sadejdreni nejzga, <sup>31</sup> sa'csi caguluiini rexpejn<sub>pac</sub>ni. Cayäjpni lojreni: “Xi'n Dios ni gujc Niguii sidejdni ladznaa rebejn, niluxh sugu'trenini. Che guiza' chon dxej gujtni, sibajnni stehuält.” <sup>32</sup> Niluxh laareni direni niacbee xhini'c guniini, bidxej<sub>zb</sub>areni niniabdiidxreni lojni.

*¿Chuni'c sajcro?*

*(Mt. 18:1-5; Lc. 9:46-48)*

<sup>33</sup> Bidzujntireni Capernaum. Che biu'ni nen yu' räjpni lojreni:

—¿Xhini'c cagusiejy<sub>tu</sub> lo nejz?

<sup>34</sup> Dxejc xhet guniitireni, sa'csi laareni cagusieinäj sa'reni lo nejz don chuni'c sajcro lojreni. <sup>35</sup> Sas gurej Jesús, dxejc gurejdxni guitzubio'p xpejn<sub>pac</sub>ni, räjpni lojreni:

—Palga yu' chu rlajz gasajcro lojtu, sugacxgaani si'c te nani xhet sajcti, sugunzani xtzuun chutis.

<sup>36</sup> Dxejcti cua'ni tej biuxbäz, huinänini galäiireni. Dxejc gudääzni biuxbäzga, räjpni lojreni:

<sup>37</sup> —Chutis ni gacnäj te rebiuxe're sa'csi rinälajzni narä, sacnäjni narä, luxh nani gacnäj narä, xhet narätis gacnäjtni, näjza xtadä nani baxhal narä racnäjni.

*Nani di guiniyaj nuunu, xladnu yu'ni*

(Lc. 9:49-50; Mt. 10:42)

<sup>38</sup> Dxejcti gunii Juan räjpni lojni:

—Bahuiinu lo te bejn ni rbää benḁxab con xcälrnibee lajlu, niluxh dini sanäj nuunu. Sas huiye'tznu lojni na'c gunni si'c sa'csi dini sanäj nuunu.

<sup>39</sup> Dxejc räjp Jesús lojni:

—Na'c gudxojuḁntu gunni si'c sa'csi bejn nani rujn milagwr con xcälrnibee laä digacdi guiniyagajcni narä. <sup>40</sup> Nani di guidxagdiḁl nuunu, xlaadnu yu'ni. <sup>41</sup> Rniliápac lojtu, chutis ni guniidx te bas nis lojtu sa'csi najctu xpejḁpac Crist, siguijx Diosni xcuent nani bejnni.

*Nani rujn jiajb bejn lo dojl*

(Mt. 18:6-9; Lc. 17:1-2)

<sup>42</sup> 'Chutis ni gusiu' tej rebiuxe' ni rililajz narä nen dojl, sugal te guimolin yejnni dxejcti gucuaarenini lo nisdoo. <sup>43</sup> Palga tej naalu gun gunlu dojl, batiu'ni: hueenru natiujnglu chaläjzlu cadro yu' Dios quela sojb guiro'p naalu gusalreni luj gabijl, loj bajl ni di jiuui, <sup>44</sup> cadro diza xpisiujgreni guet, diza bajl jiuui. <sup>45</sup> Luxh palga tej ni'lu gun gunlu dojl, batiu'ni: hueenru natiujnglu chaläjzlu cadro yu' Dios quela sojb guiro'p ni'lu luxh cháälu gabijl, lo bajl ni di jiuui, <sup>46</sup> cadro di xpisiujgreni guet, diza bajl jiuui. <sup>47</sup> Luxh palga tej balojlu gun gunlu dojl, gulääni: hueenru cháälu cadro rnibee Dios natiä'p lojlu quela sojb guiro'p balojlu cháälu gabijl, <sup>48</sup> cadro di xpisiujgreni guet, diza bajl jiuui.

<sup>49</sup> 'Si'cni rloj sejd yejc xhi cos yälrajw, si'cza guiloj bajl yejc guiraareni. Guilojza sejd lo guira'ti ni rdeed bejn lo Dios. <sup>50</sup> Hueen najc sejd, luxh palga agudejd yälḁnazij yejcn, ¿xho guntu te gacsacni nadzij? Colyajc nadzij la'tu, colguibannäsa'c sa'tu.

## 10

*Baluu Jesús xcuent rälrurō'n sa'ni*

(Mt. 19:1-12; Lc. 16:18)

<sup>1</sup> Dxejcru birii Jesús ro'c huijni nez Judea näjza nez ro' gueu Jordán stelaad. Ro'c bidojp xhidajl bejn lojni stehuält, sas guslosacni caguluinireni si'ctis ni ruluiinireni.

<sup>2</sup> Sas refarisee, renani najc rebenguidoo loj guedx Israel, gubigreni loj Jesús, cagula'tzreni Jesús. Ni'c gunabdiidxreni, räjpreni:

—¿La laaca gun niguii gusaan cháälni, ä?

<sup>3</sup> Dxejc laani bazejcn diidx, räjpni lojreni:

—¿Xhini'c gunibee Moisés guntu?

<sup>4</sup> Dxejcru räjpreni:

—Moisés basaan gudeedni te guitz gusaan cháälni che guro'nni.

<sup>5</sup> Dxejc Jesús räjp lojreni:

—Sa'csi guyaa lajztu, ni'cni bacuaa Moisés diidxga lojtu. <sup>6</sup> Niluxh che birixtiej ben guedxliuj, “niguii con gunaa benchee Diosreni.” <sup>7</sup> “Ni'cni te niguii siriini loj xtadni, loj xnanni te cuäznäjni cháälni. <sup>8</sup> Niluxh renani gujc tiop bejn sajcreni si'c tejsi bejn”, dirureni gac tiop bejn, si'c tejsi bejn gacreni. <sup>9</sup> Na'c gudzucaj bejn lo sa bejnni nani abachaag Dios lo sa'ni.

<sup>10</sup> Che biu'reni nen yu' gunabdiidxsac rexpejḁpacni lojni xcuent rediidxre. <sup>11</sup> Dxejc räjpni lojreni:

—Chutis niguii ni gusaan cháälni, sas guchḁaani ste'cani, rujnni dojl. <sup>12</sup> Niluxh palga gunaa guro'n cháälni sas guchḁaani ste'ca niguii, rujnzani dojl.

*Gunab Jesús gunle' Dios yejc rebiuxbäz*

(Mt. 19:13-15; Lc. 18:15-17)

<sup>13</sup> Biädnäza rebejn biuxbäz lojni te gutzuub Jesús naani yejcreni, sas guididxa' rexpejḁpacni lojreni. <sup>14</sup> Che bahuii Jesús xhi cayujn rexpejḁpacni, bidxe'chni räjpni lojreni:



—Colsaan jiäd rebiuxbäz loä. Na'c gudxojnitureni, sa'csi xcälrnibee Dios najc xten reni najc nadolajz si'c najc biuxbäz. <sup>15</sup> Rniliäpac lojtu, chutis ni rlanj jiu' lo xcälrnibee Dios nanab guzobdiajgreni xtidx Dios si'c ruzobdiajg rebiuxe' xtidx xtadreni. Palga dini gun si'c, dini jiu' lo xcälrnibee Dios.

<sup>16</sup> Dxejcti gudääz Jesús rebiuxbäz, bazujzani naani yejcreni, gunab Jesús gunle' Dios yejcreni.

*Te bi'n ni rapduxh guninäy Jesús*

*(Mt. 19:16-30; Lc. 18:18-30)*

<sup>17</sup> Che birii Jesús loj xnejzni, ruxun te niguii biäd lojni, bazuxhibni. Dxejcti gunabdiidx niguiiga lojni räjpni:

—Dad, bensa'c, ¿xhini'c gunä te xca'a yäl nabajñ par tejpas?

<sup>18</sup> Sas räjp Jesús lojni:

—¿Xhicuent rniilu loä bensa'c? Tejtisni najc bensa'c; Diostis najc bensa'c. <sup>19</sup> Najnlu xhini'c gunibee Dios gunni: “Na'c guesnäjlü chääl sa'lu, na'c ju'tlu, na'c cuanlu, na'c gusgueelu chutis, na'c cuäälü yejc xhixten sa'lu, huinäälajz xtadlu, xnanlu.”

<sup>20</sup> Dxejc räjp niguiiga lojni:

—Dad, guiraa redee cayunä cheni gucäli bi'n.

<sup>21</sup> Che bahuii Jesús lojni, huinäälajznini, räjpni lojni:

—Tejtis nani cayäädx gunlu. Huij, huito' guiraa xhixtenlu, badeed xcuentni loj rebejn nani diga'p, dxejcti guniidx Dios xhidajl xhi ga'plu xhaguibaa. Gudanajl narä, mase tedlu trabajw.

<sup>22</sup> Dxejc che biejn diajgni diidxre, guc-huin lajzni, xhet laadi yu'ni siini, sa'csi naclenduxh xhixtenni yu'.

<sup>23</sup> Dxejc bahuii Jesús guideb gabi lojreni, räjpni loj rexpejn pacni:

—Naganduxh jiu' rebejn nani yu'duxh xhixtenni lo xcälrnibee Dios.

<sup>24</sup> Dxejc bidxelo rexpejn pacni che biejn diajgreni rextiidxni. Dxejc räjp Jesús lojreni stehuält:

—¡Aiitu xi'nä!, lacti naganduxh gusaan renani sanälajz xhixtenni guinibee Diosreni.

<sup>25</sup> Guyasiru ted te camei ni' te guux quela gusaan te bejn ni yuduxh xhixtenni guinibee Diosni.

<sup>26</sup> Dxejc bidxeloduxh reni, räjpreni lojni:

—¿Chuxhni'c sajc laa lo dojl?

<sup>27</sup> Dxejc bahuii Jesús lojreni, räjpni:

—Bejn digacdi guslaa sabejn ni, Diostis rajc ruslaa bejn lo dojl, sa'csi Dios rac rujñ guira'ti.

<sup>28</sup> Sas gusloj Pedr cayäjp lojni:

—Naj nuure ahuilälaznu guira'ti te siopnajl nu luj.

<sup>29</sup> Dxejc räjp Jesús:

—Rniliäpac lojtu, chutis nani cuälaz rolijzni, rebejzni, rebisiajn ni, xtadni, xnanni, chääl ni, rexi'nni, rexyujni, xcäl nasa'c narä, näjza xcäl nasa'c xtidx Dios, <sup>30</sup> sica'ni lo guedxliujre te gayuu huält xhidajl ru. Sica'ni rolijzni, rebejzni, rebisiajn ni, xnanni, rexi'nni, rexyujni. Sisiunajl reni ni naj, dxejc xhaguibaa sica'ni yäl nabajñ par tejpas. <sup>31</sup> Xhidajl rebejn nani sajc lo guedxliujre xhet sajc direni xhaguibaa; niluxh rebejn nani xhet sajc di lo guedxliujre, xhaguibaaru gasajc reni.

*Gunisac Jesús diidx xho guetni*

*(Mt. 20:17-19; Lc. 18:31-34)*

<sup>32</sup> Dxejcru sasaj Jesús, nijdni lo rexpejn pacni sääreni Jerusalén, luxh cadxelojreni. Cadxejbza rebejn nani sanajl reni. Dxejcti guläsac Jesús rexpejn pacni lo rebejn, gusloj cayäjpni lojreni guira'ti nani sacni. <sup>33</sup> Räjp Jesús:

—Sionnu Jerusalén, luxh narä, Xi'n Dios nani gujc Niguii, sidedä ladzṇaa rebixhojz nani rnibee näjza rebejn ni ruluii leii. Luxh sinibeereni guetä. Suteedreni narä lo rebenz-ijz nani digac xpejn Israel. <sup>34</sup> Suxhisnäjreni narä, siguijnreni narä, sutiobxhejnzareni loä, dxejcru sugu'treni narä. Che riojn dxej sibansacä.

*Gunab Jacob näjza Juan te yälṇasa'c*  
(Mt. 20:20-28)

<sup>35</sup> Dxejcti gubig Jacob näjza Juan, rexi'n Zebedeo, räjpreni lojni:

—Dad, rlaaznu gunlaalu nani guiniabnu lojlu.

<sup>36</sup> Dxejc räjp Jesús lojreni:

—¿Xhini'c rlaiztu gunä xcuent la'tu?

<sup>37</sup> Räjpreni:

—Cue tejnu cuä'lu ladbee, xteenu cue cuä'lu ladbärgw che acanibeelu.

<sup>38</sup> Dxejc räjp Jesús lojreni:

—Ditu gan xhini'c rniabtu. ¿Xhixh sajc yätu nani yä'ä? ¿Xhixh sajcza guirobnistu si'cni guirobnisä? Nalajznu, xhixh sajc tedtu trabajw nani tedä narä.

<sup>39</sup> Sas räjpreni lojni:

—Sajc tednuni.

Dxejc räjp Jesús lojreni:

—Guliini sajc yätu nani yä'ä, luxh guirobnistu si'cni guirobnisä narä. <sup>40</sup> Te cue tejtju ladbee xtenä steetu cue xladbärgwä, xhet xtenä dini te gunidxäni. Rebejn nani agule Dios, reni'c cue xladbeä, xladbärgwä.

<sup>41</sup> Luxh che biejn diajg stzuureni bidxe'chreni loj Jacob näjza loj Juan. <sup>42</sup> Sas gurejdx Jesúsreni, räjpni lojreni:

—La'tu najntu renani rnibee lo rebejn nani digac xpejn Israel, rdxaglaiz gasajcrueni lo rebejn. Luxh rebejn ni sajc rnibeduxhreni lo rebejn. <sup>43</sup> Xhet si'cni guntu la'tu. Chutis nani rlaiz gasajcru lojtu, riäjł gacni mos lojtu. <sup>44</sup> Luxh chutis la'tu nani rlaiz gasajcru, riäjł gacni xmos guiraatu. <sup>45</sup> Di Xi'n Dios ni gujc Niguii niääd, te ga'ptisni mos, biäädzani te quiixni con xcälṇabajṇni te laa xhidajł bejn lo dojl.

*Basiajc Jesús Bartimeo, ni natiä'p lojni*  
(Mt. 20:29-34; Lc. 18:35-43)

<sup>46</sup> Dxejcti biäädreni Jericó. Che birii Jesús ro' guedx Jericó con rexpejn pacni näjza rebenxhidaal, cuä' nezyuj sobga' Bartimeo, xi'n Timeo. Natiä'p lojni. Ro'c cabääni gojn.

<sup>47</sup> Che biejn diajgni laa Jesús ni siääd Nasare't ni sadejd ro'c, guslojni rbedxa'ni, räjpni:

—Jesús, xi'n David, balazlajz narä.

<sup>48</sup> Xhidajłreni gudidxa' lojni, te jiäuu ro'ni. Dxejc laani dipru rbedxa'ni räjpni:

—Xi'n David, balazlajz narä.

<sup>49</sup> Dxejc guzudxi Jesús, gunibegajcni gucrejdx niguiiga.

Gurejdxreni lotiä'pga, räjpreni lojni:

—Basutijp laizlu, gusulii, luj cabejdxni.

<sup>50</sup> Sas rołca xhablajzni gudixhni, huisuliini, biäädṭini lo Jesús. <sup>51</sup> Dxejc räjp Jesús lojni:

—Naja', ¿xhini'c rlaizlu gunä?

Dxejc räjp lotiä'pga loj Jesús:

—Dad, rlazä gunlu fiä.

<sup>52</sup> Dxejcti räjp Jesús lojni:

—Huij, abiajclu sa'csi rililajzlu.

Lagajc dxejc gujc bahuiini. Sanajłtini Jesús lo nejz.

<sup>1</sup>Cheni sadzujnreni gajxh Jerusalén, gudejdreni nen reguedx Betfagé nájza nen guedx Betania nez cuá' dajne' ni laa dan Oliib. Baxhal Jesús tiop xpejnpacni, <sup>2</sup>räjpni lojreni:

—Colchäj guedxe' ni ria'n nez lojtu. Che guidzujntu ro' guejdxga, sidxältu te bure' ni caduu. Gajd bejn cuibni. Colxhecni, coltanägajcni. <sup>3</sup>Palga yu' chu naa lojtu: “¿Xhicuent rujntu si'c?” Colye'tztis: “Dad caquiinni.” Dxejc suxhalgajcni bure'ga ree.

<sup>4</sup>Säätireni ro'c. Dxejcru ronejz bidxälreni te bure' caduu ro' te lä'. Dxejcti baxhecrenini. <sup>5</sup>Gaii bejn ni tre' ro'c räjp lojreni:

—¿Xhicuent caguxhectuni?

<sup>6</sup>Dxejc räjpreni loj rebejnğa si'cni räjp Jesús lojreni gäbreni. Basangajc rebejnğa sanäreni bure'ga. <sup>7</sup>Dxejcru biädnäreni bure'ga loj Jesús. Badzuubreni xhablajzreni dejtz bure'ga. Gubijbti Jesús bure'ga. <sup>8</sup>Xhidajlza bejn gudixh xhablajzreni lo nezyuj, sgaiireni gudi'ch balajg lo reyajg te gudixhrenini lo nezyuj.

<sup>9</sup>Rebejn ni nijd lojni náj reni sanajl dejtzni guredxa'reni, räjpreni:

—¿Colguiliä'p xpala'nni! Coldeed xquixhtiooz loj Dios sa'csi baxhalni nani siääd xcuentni. <sup>10</sup>Coldeed xquixhtiooz loj Dios sa'csi agubiré xcälrnibee toxtadnu David. ¿Colguiliä'p xpala'n Dios ni yu' jiaro!

<sup>11</sup>Dxejcti biu' Jesús nen guedx Jerusalén. Biu'zani nen guidoro. Che bahuii Jesús guira'ti ni cayajc nenga, sanäni guitzubitio'p xpejnpacni, sääreni Betania sa'csi agudxej.

*Batzubde Jesús yejc te yagiigw ni xhet cajdi lojni*

(Mt. 21:18-19)

<sup>12</sup>Che bara yääl, biunejzreni Betania. Dxejcti gusloj calaan Jesús, <sup>13</sup>bahuiini zijt sojb te yag iigw caj balajg lojni. Sas gubigni, bahuiini don gaxäjsi caj iigw lojni. Xhet bidxäldini lojni; balajgtis caj lojni, sa'csi xhet xtiempdi iigw dxejc. <sup>14</sup>Sas gunii Jesús räjpni loj yag iigwga:

—Rutru gauudi ninejxh ni rcaj lojlu par tejpas.

Biejnza diajg rexpejnpacni.

*Gulää Jesús renani ruto' náj renani rsii nen guidoo*

(Mt. 21:12-17; Lc. 19:45-48; Jn. 2:13-22)

<sup>15</sup>Dxejcti bidzujnreni guedx Jerusalén. Biu' Jesús nen guidoro. Gusloj cabääni renani ruto' náj renani rsii nen guideoga. Niluxh batiejxhni rexmex renani ruchaa meel, nájza reyagxhil xten renani ruto' paloom. <sup>16</sup>Diruni nusaan nidednäjreni xhicos nez nen guideoga. <sup>17</sup>Dxejc caguluiinireni, räpgajcni lojreni:

—¿La et screedi caj loj guijt? “Xyu'ä sirilaj yu' cadre rminab guiraa rebenguedxliuj lo Dios.” La'tu abejntuni si'c xpiliää gubaan.

<sup>18</sup>Rebixhojz ni rnibee nájza remastr xten leii biejn diajgreni nani gunii Jesús. Sas gudiilreni xho ju'trenini, sa'csi rdxejbreni Jesús, sa'csi guiraa rebejn rdxejoj rextidx Jesús. <sup>19</sup>Che biu' guxhijn, birii Jesús guejdxga.

*Gubijdz yagiigw ni bidzubde*

(Mt. 21:20-22)

<sup>20</sup>Che bara yääl gudejdreni, bahuiireni agubijdz guideb yagiigw, náj rexlobaani.

<sup>21</sup>Dxejc banaj lajz Pedr, räjpni loj Jesús:

—Dad, bahuii yagiigw nani batzubdelu yejcn, agubijdzni.

<sup>22</sup>Dxejcti gunii Jesús räjpni lojni:

—Colchalilajz Dios. <sup>23</sup>Rniliápac lojtu, chutis nani gäb loj dajnre: “Gubicaj, bitejb loj nisdoo”, luxh dini guntio'p lajzni, chalilajztisni scree gac nani guniini, sajcpac nani guniini. <sup>24</sup>Ni'cni rniä lojtu, xhitis nani guiniabtu lo Dios che rninäjntuni, colchalilajz xca'tuni, dxejc sica'tuni. <sup>25</sup>Luxh che guiniabtu Dios, palga yu' chu loj rdxechlajztu, colsiäjłza lajztu, te nájza Xtadtu nani yu' xhaguibaa gusiäjłza rextojłtu. <sup>26</sup>Palga ditu gusiäjł lajztu con resa'tu, diza Xtadtu nani yu' xhaguibaa gusiäjł lajzni rextojłtu.

*Yäl̄rnibee xten Jesús**(Mt. 21:23-27; Lc. 20:1-8)*

<sup>27</sup> Sas bidzunsacreni guedx Jerusalén. Laḷ ni sasaj Jesús nen̄ guidoro, rebixhojz nani rnibee, nájza rebejn̄ ni ruluii leii, nájza reguxhtis gubig lojni. <sup>28</sup> Rájpreni lojni:

—¿Xhi yäl̄rnibee rajplu, ni'c rujnlu redzuunre? ¿Chu baniidx yäl̄rnibee rujnlu redzuunre?

<sup>29</sup> Dxejc rájp Jesús lojreni:

—Guiniabdidxáza lojtu. Col̄tzu'ni loä, dxejcti guiniäza xhi yäl̄rnibeere rapä ni'c runä redzuunre. <sup>30</sup> ¿Chu baxhaḷ Juan ni batiobnis? ¿La Dios o la rebejn̄? Col̄nii loä n̄aj.

<sup>31</sup> Dxejcti gunii loj sa'reni, rájpreni:

—Palga jie'tznu “Dios”, naani “¿xhicuent ditu nililajz xtiidxni?” <sup>32</sup> Diza niacti niäjbreni “rebejn̄” sa'csi rdxejbreni reben̄xhidaal, sa'csi guiraa rebejn̄ huililajz Juan gujc te bejn̄ ni guniipac xtidx Dios.

<sup>33</sup> Dxejcti guniireni, rájpreni loj Jesús:

—Dinu guidon.

Sas rájp Jesús lojreni:

—Dizana guiniä xhi yäl̄rnibeere rapä runä redzuunre.

## 12

*Te xcuent rebenguijdx ni rbázlaa**(Mt. 21:33-46; Lc. 20:9-19)*

<sup>1</sup> Dxejcti gusloj caguseed Jesús rebejn̄ con recuent ni ruluii, rájpn̄i:

—Yu' te bejn̄ bazuj yaguub loj xyujni, bejnzani bazaani, dxejcru gudäänni te lajt cadro jiä't uubga. Dxejcti bejn̄ni te yu' jiaa, te ro'c cue nani ga'p lo xyujni.

'Badedlaatinini loj gaii bejn̄, sä'tini zijt. <sup>2</sup> Che bidzujn̄ xpäii uub, baxhaḷ baxhuaan uubga te xmosni loj rebejn̄ ni rbázlaa ro'c, te xca'ni uub nani riäjḷ xca' bejn̄ga. <sup>3</sup> Dxejc rebejn̄ ni rbázlaa ro'c gunaazreni mosga, gudijnrenini, luxh bazejcrenini siini ganaxni.

<sup>4</sup> Dxejcru baxhaḷ baxhuaanga stee mos lojreni. Niluxh laareni bacuaareni guijni, gudil̄guijdxreni yejc mosga, xho rniajni gubi'ni. <sup>5</sup> Dxejc baxhaḷ bejn̄ga stee mos, dxejc bagu'trenini. Baxhaḷni xhidajlrureni. Gaii gudil̄guijdxreni, sgaiini bagu'treni.

<sup>6</sup> Yu'za tejtis xi'nni, luxh sanälajznini. Por lult nájza xi'nni baxhaḷni, naani: “Siucareni xi'nä.” <sup>7</sup> Dxejc rebejn̄ nani rbázlaa ro'c rájp loj sa'reni: “Dee najc laa ni jiannäj ree. Col̄taa, guigu'tnuni, te xca'nu yujre.” <sup>8</sup> Sas gunaazrenini, bagu'trenini. Guläätirenini lo yujga.

<sup>9</sup> ¿Xhicha gun baxhuaan yaguubga rebejn̄re? Siäädni luxh sugu'tni rebejn̄re, dxejcti gudeedni yujga loj ste'ca bejn̄.

<sup>10</sup> ¿La gajdtu goḷ guijt̄z ni rnii scree?

Guij nani guläcaj renani runchee yu',

ni'c agujc mastr ni guzuj galoo.

<sup>11</sup> Dad xtennu bejn̄ scree, cos sacduxhni nezlojnu.

<sup>12</sup> Dxejc rlajz reguxhtis nani bacuadiajg cuentre niniaaz Jesús, sa'csi gucbeerreni laareni cacuaa Jesús diidxre. Sa'csi bidxejbreni reben̄xhidaal, ni'c basa'nrenini, sä'tireni.

*Diidx xcuent reimpuet**(Mt. 22:15-22; Lc. 20:20-26)*

<sup>13</sup> Dxejcti baxhaḷreni gaii xpejn̄ refarisee nájza gaii xpejn̄ Herodes loj Jesús te gula'tzreni don xho gac guiniaazreni Jesús. <sup>14</sup> Dxejcti biäädreni, rájpreni lojni:

—Dad, nadonnu luj najclu te bejn̄ ni rnii. Par luj guiraasi bejn̄ sajc tebloj, sa'csi dilu fii la sajc bejn̄ o la xhet sajc̄di bejn̄. Luj ruluiipaclu xhini'c rlajz Dios gun bejn̄. ¿La laaca quiix bejn̄ reimpuet lo xcubieer César o la xhet laadi? ¿La guidiixnu o la dinu guidiix?

<sup>15</sup> Dxejcti laani gucbegajcni rujnsireni si'cni rniabdiidxreni. Rájpn̄i lojreni:

—¿Xhicuent runnäjtu narä scree? Col̄tanä te meelga loä, te fiä lojni.

<sup>16</sup> Badeedtireni te meel lojni, dxejc rájpn̄i lojreni:

—¿Chu yejc caj lojni, chu laj caj lojni?

Dxejc räjpreni:

—Xten César.

<sup>17</sup> Dxejc räjp Jesús lojreni:

—Coldeed nani najc xten César loj César; coldeedza nani najc xten Dios loj Dios.

Baschelojni rebejnğa con xtiidxni.

*Yäl̄rniabdiidx xcuent yäl̄rbansacni lo rebengut*

*(Mt. 22:23-33; Lc. 20:27-40)*

<sup>18</sup> Sas biädhuii resaducee loj Jesús. Resaducee najc rebejn nani rnii di rebengut guibansac. Dxejc gunabdiidxreni lojni, räjpreni:

<sup>19</sup> —Dad, xleii Moisés ruluii loonu, palga guet te niguii luxh gusa'nni chääl̄ni ruti xi'nni, nanabpac xca' bejtzni chääl̄ni, te chu xi'nni con laani lacua niu' xi'n tobejtzni.

<sup>20</sup> Guyu' gajdz niguii, bejtz najcreni. Sas cua' niguigalooga chääl̄ni. Che gujtni ruti xi'nni.

<sup>21</sup> Dxejcti cua' ni rojpga gunaaga. Che gujtni, rut gajcdi xi'nni. Si'cza gusajc ni riojnğa.

<sup>22</sup> Si'cza guläznäj gunaaga guigajdzreni. Per nicla tej reni di xi'nreni niu'. Dxejcti gujtzta gunaaga. <sup>23</sup> Guigajdzreni guläznäjreni gunaare. Cheni guibansacreni lo rebengut, ¿chu chääl̄ gacni?

<sup>24</sup> Dxejc bazejc Jesús diidx lojreni, räjpni:

—Et laadi rniitu, sa'csi ditu gumbesa'c rextidx Dios nani bacuaa reniguii lo gujtz, dizatu gumbee yäl̄rnibee xten Dios. <sup>25</sup> Che guibansacreni loj rebengut, direni guchnaa, rutza gudeedtireni te guchnaareni. Niluxh sajcreni si'c najc rexangl Dios nani yu' xhaguibaa. <sup>26</sup> Palga canabdiidxtu la rbansac rebengut, ¿la di lajztu guisaj biłtu guijtz ni bacuaa Moisés? Moisés bacuaa nani gunii Dios lojni nen bajl, räjpni: “Narä nacä Xtios Abraham, Xtios Isaac, Xtios Jacob.” <sup>27</sup> Palga Dios najc Xtios rebejnre, direni gac bengut, nabañäjreni Dios. Et laadi najc xhigabtu.

*Yäl̄rnibee ni sajcru*

*(Mt. 22:34-40)*

<sup>28</sup> Dxejcru bidzujn tej rebejn ni najn leii, biejn diajgni xhi caniireni, biejnza diajgni laaca gunii Jesús lojreni. Dxejcti gunabdiidxni loj Jesús:

—¿Xhi mandamient sajcru lo guiraareni?

<sup>29</sup> Dxejc räjp Jesús lojni:

—Mandamient nani sajcru loj guiraareni najc dee: “Bacuadiajg luj, guejdx xten Israel, Dad Xtiosnu, Dad tejtis najcni. <sup>30</sup> Chanälajzlu Dad Xtioslu guideb lastoolu, naj xaimlu, naj guideb xcäriejnlu, najza guideb xcäl̄nadiplajzlu.” <sup>31</sup> Sigajcza najc mandamient ni rojpga: “Huinälajz sabejnlu si'ctis sanälajzlu lagajc luj.” Redee najc remandamient nani sajcru loj guiraareni.

<sup>32</sup> Dxejcti räjp bejnğa ni najn leii lojni:

—Laaca guniilu Dad. Tejtis najc Dios, luxh ruti chu stee najc si'c laani. <sup>33</sup> Luxh sacduxh chanälajz bejn Dios guideb lastooni, naj xcäriejn̄ni, najza xaimni, naj guideb xcäl̄nadiplajzni, luxh chanälajzni resabejn̄ni sigajc laani. Redee sajcru loj ni rujn bejn che rudeedreni gojn lo Dios.

<sup>34</sup> Che bahuii Jesús laaca guniini, räjpni lojni:

—Guxii cayääd̄x te jiu'lu loj xcäl̄rnibee Dios.

Sas rutru biajxhdi gunabdiidx loj Jesús.

*Chu xi'n najc Crist*

*(Mt. 22:41-46; Lc. 20:41-44)*

<sup>35</sup> Che caguseed Jesús nen guidoro, räjpni:

—¿Xho mood rnii rebejn ni najn leii Crist najc xi'n David? <sup>36</sup> Sprit Dxan xten Dios basnii David che bacuaani:

Räjp Dios loj Dad xtenä:

“Gurej ladbee xtenä, che gudzugäli reni rdxe'ch lojlu.”

<sup>37</sup> Palga lagajc David räjp: “Dad, xtenä”, che guniini xcuent Crist, ¿xhoxh najc Crist xi'n David?

Rebenxhidaal nani yu' guejdxga bacuadiagsa'creni xtiidxn.

*Gule'c Jesús xquej remastr xten leii*

(Mt. 23:1-36; Lc. 11:37-54; 20:45-47)

<sup>38</sup> Lalni caguseedni rebejn, räjpni lojreni:

—Col̄susin, na'c gu'chtu loj rebejn ni ruluii leii. Laareni rlajz sanäj reladsiool xtenreni. Rdxaglajzreni rnii bejn lojreni nez lo reguii. <sup>39</sup> Rlajzzareni cuereni cadro rbej renani saj cru nen reguidoo näjza cadro ru' relanij. <sup>40</sup> Rudzucajzareni xhixten rebiuud, rniizareni xhidalduxh diidx che rojreni le', te rusäuureni loj rebejn. Castigwroru gac redee.

*Gojn xten te biud proob*

(Lc. 21:1-4)

<sup>41</sup> Dxejcti gurej Jesús cuä' caj cadro rusäl bejn gojn. Cahuiini cagusäl rebejn meel nen cajga. Xhidajl reni rajp cagusäl xhidajl meel nenga. <sup>42</sup> Che biääd te biud proob, basäl̄ni tiop melbäz ni saj si'cti tej centaab. <sup>43</sup> Dxej cru gurejdx Jesús rexpejn̄pacni, räjpni lojreni:

—Rniliäpac lojtu, biud proobre basäl̄ xhidajlru lo guiraa renani basäl̄ nen cajre, <sup>44</sup> sa'csi guiraareni abasäl̄ che'nsi xhixtenreni. Luxh gunaare basäl̄ guiraa nani rajpni. Ni'ctis najc nani gaunäjni.

## 13

*Gunii Jesús sibijl̄ guidoo*

(Mt. 24:1-2; Lc. 21:5-6)

<sup>1</sup> Cheni sariireni nen̄ guidoro, räjp tej rexpejn̄pacni lojni:

—Dad, bahuii lacti reguij, lacti reyu'.

<sup>2</sup> Dxejcti räjp Jesús lojni:

—¿La rhuilu loj reyu're? Nicla tej guij dijia'n dzuub yejc sa'ni, guiraliireni sire'ch.

*Recos ni gac che ameer nitloj guedxliuj*

(Mt. 24:3-28; Lc. 21:7-24; 17:22-24)

<sup>3</sup> Dxejc sobga' Jesús yejc dajne' ni laa dan Oliib, cahuiini nez ro' guidooga. Che sugaxhtebreni, gunabdiidx Pedr näj Jacoob näjza Juan näjza Andrés lojni, räjpreni:

<sup>4</sup> —Gunii loonu, ¿guc gac dee? ¿Xhi guihuiinu te gacbeenu asiäddzungajxh soob guiraa rediidxre?

<sup>5</sup> Dxejcti gusloj gunii Jesús lojreni, räjpni:

—Col̄huii, te rut gusgueedi la'tu, <sup>6</sup> sa'csi xhidalduxh bejn jiääd con laä, gäbreni: “Narä nacä Crist”, luxh rniisireni si'c, susguezareni xhidajl bejn.

<sup>7</sup> 'Che jiejn diajgtu yu' guer näj yäl̄nadxeeb xten guer, na'c guidxejbtu. Nanabpac gacni; et dxejcdi nitloj guedxliuj. <sup>8</sup> Säjs nación̄ yejc sanacion̄ni, näj yäl̄rnibee yejc sayäl̄rnibeeni. Xhidajl lajt saj xu, siliaanza bejn, luxh säjs rebejn̄ yejc sa'ni. Redee najc ni guisloj guidxejb, gachuinza lajzni.

<sup>9</sup> Dxejc la'tu col̄susin sa'csi sutedreni la'tu ladz̄naa reguxhtis, siguijnzareni la'tu nen̄ reguidoo. Sacrejdxtu lo regubieer näjza loj rereii xcäl̄nasa'c narä, te si'c gac guiniitu xtidxä lojreni. <sup>10</sup> Nanabpac guirechxgaa xtidx Dios loj guiraa reben̄ guedxliuj. <sup>11</sup> Che guiniaazreni la'tu, che chanäreni la'tu loj reguxhtis, na'c gunxgaatu xhigab xhi diidx guiniitu. Col̄nii nani jiäjtis yejctu dxejc, sa'csi xhet la'ditu ni guinii, Sprit Dxaan xten Dios ni guinii. <sup>12</sup> Luxh suto' bejn lagajc bejtzni te guet bejtzni. Suto'za dad lagajc xi'nni. Säjs rebiuux yejc rexcusajnni te guet reguzajnga. <sup>13</sup> Sidxechlajz guiraa rebejn̄ lojtu sa'csi najctu xpenä; nani ted guiraa retrabajwre, ni'c gudeed Dios xcäl̄nabajnni.

<sup>14</sup> 'Che fiitu loj nani najc yäl̄rdxechlajz, nani najc yäl̄runitloj, nani gunii Daniel ni gunii xtidx Dios. Che fiitu nani suga' cadro di nunyäl̄j suuni, dxejcti suguxun̄ renani yu' nez Judea chääreni nez nen̄ redajn. (Nani goj̄ guijtzre sugacbeenini.) <sup>15</sup> Bejn̄ nani suga' yejc yu' na'c jiäjt̄ni jiu'ni nen̄ te yu' xca'ni gaii xhixt̄enni. <sup>16</sup> Nani yu' loj n̄iaa, di gal̄ jiäjt̄



te xca'ni xhablajzni. <sup>17</sup> ¡Aii! Xhiza nalas chu regunaa ni nuu báz, luxh renani rusiä' xi'nni, neñ redxejga. <sup>18</sup> Colnab loj Dios na'c sactu scree neñ rebäinajl. <sup>19</sup> Neñ redxejga su' trabajwduxh, nani gajd chu che bencheeli Dios guedxliuj, luxh diruni chu, dxejctis chuni. <sup>20</sup> Paru di Dad gusia'tz redxejga, nicla tej bejn di laa. Susia'tzni redxejga sa'csi sanälajzni rexpejni nani aguleni.

<sup>21</sup> 'Dxejc palga yu' chu naa lojtu: "Colhuii, aree Crist", o "Colhuiire, ani suga' rec", na'c chalilajztuni. <sup>22</sup> Sa'csi su' bejn nani rniisi najcni Crist. Su'za reniguii nani rniisi rniireni xcuent Dios. Sujnzareni milaagwr, te gusgueerene, te palga sajcn, rrajzreni gusgueelireni renani agule Dios. <sup>23</sup> Ni'cni la'tu colsusin; agunixgaä lojtu guira'ti ni gac.

*Xho gac che jiääd Xi'n Dios ni gujc Niguii*

(Mt. 24:29-35, 42-44; Lc. 21:25-36)

<sup>24</sup> 'Neñ redxejga, cheni luux retrabajwduxhga, sicäy lo gubijdx, luxh diru bäii gusanij. <sup>25</sup> Sitejb rebalxhaguibaa, sinibsejs recos nani nasnäy rebalxhaguibaa. <sup>26</sup> Dxejcti suhuii rebejn loä, Xi'n Dios nani gujc Niguii, siälä neñ reza guideb yälrnibeduxh xtenä, näjza xcäl'dimbicha'ä. <sup>27</sup> Dxejcti guxhlgacä rexanglä jiädtojpreni renani guleä guideb lo guedxliuj, cat nalooli guedxliuj näjza cadre nalooli guibaa.

<sup>28</sup> 'Colguisieed nani ruluii yagiigw. Cheni rii rebäte' lojni luxh che rcaj balajg lojni, acaxhnajntu bäii gusguij asadzungajxh. <sup>29</sup> Sigajcza, che fiitu acayajc recosre, sacbeetu asiädgaxhä, ameer guidzunä. <sup>30</sup> Rniliápac lojtu, rebejn ni nabajn dxejc, direni nitloj, fixgaareni gac recosga. <sup>31</sup> Sinitloj guibaa näjza guedxliuj, rextidxä di nitloj.

<sup>32</sup> 'Naj, rut najndi guc gac recosga, nicla rexangl Dios ni yu' xhaguibaa, niclaza narä Xi'n Dios, Xtadätis najn.

<sup>33</sup> 'Colhuii, colsusin, colnab loj Dios, sa'csi ditu gan guc guidzujn redxejga. <sup>34</sup> Dee najc si'c najc te bejn ni birii sää zijt. Che gajdlini guirii, badeedni xtzun rexmosni, luxh gunibeezani susin nani canäj rolä'. <sup>35</sup> Si'cza colsusin, sa'csi ditu gan guc jiääd baxhuan yu'ga, la jiäädni gudxej, o la jiäädni garol yääl, o la cäy, o la jiäädni rsil. <sup>36</sup> Colsusin, te di guiga'tu nagayejstu che guidzujni. <sup>37</sup> Rediidx nani rniä lojtu, loj guiraa rebejn rniäni: colsusin.

## 14

*Ruchaagreni diidx te guiniaazreni Jesús*

(Mt. 26:1-5; Lc. 22:1-2; Jn. 11:45-53)

<sup>1</sup> Riäädx tiop dxej guidzujn lanij, dxej ni ruzaa lajzreni gulaareni ladznaa reEgipto. Neñ redxejga rajwreni yätxtiil nani di saguij. Rebixhojz nani rnibee neñ guidoo xten rexpejn Israel näj rebejn ni ruluii leii rrajzreni niniaazreni Jesús con yälrusguee, te nugu'trenini.

<sup>2</sup> Dxejcti räjpreni lo sa'reni:

—Na'c jiennu scree neñ redxelanij, te na'c gun benguejdx biey.

*Te gunaa ni basäl se't yejc Jesús Betania*

(Mt. 26:6-13; Jn. 12:1-8)

<sup>3</sup> Yu' Jesús Betania, rolijz Simón, nani guyu' guejch ni ral tiejxhni. Che sobga'ni lo mex, biääd te gunaa ca' te bo'tguij yu' setnard nenñi. Rlianexhduxhni, sacduxhni. Dxejc gudi'chni yejn bo'tguijga, te basälni se'tga yejc Jesús. <sup>4</sup> Yu'za gaiireni ro'c ni bidxe'ch, räjp loj sa'reni:

—¿Xhicuent banijtni setnejxhga? <sup>5</sup> Paru nido' se'tga, nijni si'cti choñ gayuu denar, te nica' meelga rebejn ni xhet rajpdi meel.

Luxh caguidxa'reni loj gunaaga.

<sup>6</sup> Dxejc räjp Jesús lojreni:

—Colsaanni, ¿xhicuent rudxoijntu nani cayujn gunaare? Cos sacduxh dee bennäjni narä. <sup>7</sup> Guideb ni guibajntu, su' rebejn nani xhet rajpdi lojtu, luxh che rrajztu sajc gacnäjtoreni. Narä et xchejdi chu'ä lojtu. <sup>8</sup> Gunaare abejnni nani gujctis bejnñi. Abaslanexhxgaani tiexhä, te chää tiexhä neñ baa. <sup>9</sup> Rniliápac lojtu, cadrotis guidzujn

xtidx Dios, guideb lo guedxliuj, siniizareni xcuent nani bejn gunaare, te guinaj lajzreni gunaare.

*Rlajz Judas guto' Jesús*  
(Mt. 26:14-16; Lc. 22:3-6)

<sup>10</sup> Dxejcti huij Judas Iscariot, nani najc tej retzubitio'p xpejn̄pac Jesús, loj rebixhojz nani rnibee te guto'ni Jesús lojreni. <sup>11</sup> Che biejn diajg rebixhojz xtiidxni, bibalajzreni. Räjpreni sudeedreni meel lojni. Dxejcti caguuil Judas xho guto'ni Jesús.

*Gudauxchej Dad con rexpejn̄pacni*  
(Mt. 26:17-29; Lc. 22:7-23; Jn. 13:21-30; 1Co. 11:23-26)

<sup>12</sup> Biu'ti xmaan che rajwreni yätxtiil ni di saguij. Dxej lanijga, rugu'treni xiil, te ruzaa lajzreni dxej ni gulaareni ladz̄naa reEgipto. Räjprexpejn̄pacni loj Jesús:

—¿Caro rlajzlu chosucheenu te gauulu nadxej, dxelaniy?

<sup>13</sup> Dxejcbaxhal̄ni tiop rexpejn̄pacni, räjpreni lojreni:

—Col̄chäj nen̄ guejdx, ro'c guidxaagtu te niguii ni nuu te re' nis. Col̄chanajl niguiiga.

<sup>14</sup> Cadro jiu'ni colye'tz loj bejn̄ ni najc rolizni ro'c: “Naj Dad mastr, ¿con yu' cadro ria'n rebiooz, cadro gaunäjni rexpejn̄pacni nadxej, dxelaniy?” <sup>15</sup> Dxejcti guluiini lojtu te yu' ni sojb jjaaliga yejc sa'ni, ni asuchexгаа nenni. Colyujn xhi guidaunu ro'c.

<sup>16</sup> Sas huij rexpejn̄pacni, bidzuj̄reni nen̄ guejdxga. Bidxälreni te yu' si'cni räjpre Jesús lojreni. Ro'c bejn̄reni xhi gudajwreni dxelaniy.

<sup>17</sup> Che huääz gubijdx, bidzun̄äj Jesús guitzubitio'p xpejn̄pacni. <sup>18</sup> Lal̄ni sobga'reni lo mex cayajwreni, räjpre Jesús lojreni:

—Rniliápac lojtu, tej la'tu ni cayaunää, suto'ni narä.

<sup>19</sup> Dxejcti gusloj cayac-huin lajzreni, räjpre tebgajreni lo Jesús:

—¿La naräni?

Räpgajc steeni:

—¿La naräni?

<sup>20</sup> Dxejcti guniini, räjpreni lojreni:

—La tej retzubitio'p, tej ni cayajw loj xpla'tä. <sup>21</sup> Sa'csi narä Xi'n Dios nani gujc Niguii, sia'a, si'cpacni caj loj xtiidx Dios, per xhiza nalajz niguii ni guto' narä. Huentejti na'c niajl niguiire.

<sup>22</sup> Lal̄ni cayajwreni, cua' Jesús yätxtiil, badeedzani xquixhtiooz loj Dios dxejcb gula'nini, badeednini lojreni. Dxejcti räjpreni:

—Col̄ca' yätxtiilre. Dee najc si'c tiexhä.

<sup>23</sup> Cuagajcni te bas. Che abadeedni xquixhtiooz loj Dios, badeednini lojreni, gu' guiraareni nen̄ basga. <sup>24</sup> Dxejcti räjpre Jesús lojreni:

—Dee najc si'c xtienä ni ruluii diidx ni biä'nnu, nani guixe' xcuent xhidajl rebejn̄.

<sup>25</sup> Rniliápac lojtu, diruna yä'a bin nani rii yejc uub, dxejli yä'äni stehuält loj xcäl̄rnibee Dios.

*Gunii Jesús sinii Pedr dini gumbeeni*  
(Mt. 26:30-35; Lc. 22:31-34; Jn. 13:36-38)

<sup>26</sup> Che gulujx bil̄reni te dij xten Dios, biriireni, sääreni nez dajne' ni laa dan Oliib. <sup>27</sup> Dxejrcru räjpre Jesús lojreni:

—Guiraatu sibälaztu narä naguxhij̄n, sa'csi si'c cajni lo guijtz: “Sugu'tä baxhtoor luxh suxun̄ rexiil.” <sup>28</sup> Che guibansacä loj rebengut, ganidä cha'a Galilee, dxejcti jiiädtu.

<sup>29</sup> Dxejcb räjpre Pedr loj Jesús:

—Palga guiraareni cuälazlu, narä dina cuälazälu.

<sup>30</sup> Dxejcb räjpre Jesús lojni:

—Rniliápac lojlu, lagajc guxhij̄re, nicla gajd guidgaii cuedxa' tiop huält, luj aguiniilu chon̄ huält dilu gumbee narä.

<sup>31</sup> Luxh laani sanuutis xtiidxni, räjpreni:

—Cadro guetlu setäza, dina guiniä dina gumbeälu.

Luxh guiraa rexpejn̄pacni gunii si'c.

*Gunab Jesús loj Dios che yu'ni Getsemani*

(Mt. 26:36-46; Lc. 22:39-46)

<sup>32</sup> Dxejcti bidzuj̄n̄reni te lajt cadro laa Getsemani. Dxejc räjpni loj rexpejn̄pacni:

—Col̄cuej ree lāni chanabä lo Dios.

<sup>33</sup> Dxejcru sanäni Pedr näj Jacoob näjza Juan. Dxejc gusloj cayac-huinduxh lajzni, luxh cayu'ni yälrsiaduxh. <sup>34</sup> Dxejc räjpni lojreni:

—Cayac-huinduxh lazä, an sugu'tni narä. Col̄jia'n ree, col̄tie'ch bacal.

<sup>35</sup> Sas gusajni tla', bazuxhijbni lo yuj, dxejcti gunabni lo Dios don la niajc nidedcaj nani sacni dxejc. <sup>36</sup> Räjpni:

—Abba, xtadä, luj rajc rujnlu guira'ti: badzucay retrabajwre loä. Xhet si'cni rlazädi narä, bejn si'cni rlazzlu luj.

<sup>37</sup> Dxejc biädni gunaaznireni nagayejsreni. Dxejc räjpni lo Pedr:

—Simón, ¿la nagayejslu? ¿La nicla te rate' diniajcdi nutie'chlu bacal? <sup>38</sup> Col̄tie'ch bacal, col̄nab lo Dios, te na'c guntu dojl. Lastootu rlazj gutie'chtu bacal, luxh tiejxhtu abadxajg.

<sup>39</sup> Huij Jesús stehuält, binabni loj Dios, guniini lagajc rediidx ni guniini galoo. <sup>40</sup> Dxejcti biädsacni cadro tre'reni, gunazsacnireni nagayejsreni, sa'csi yuduxh bacal lojreni. Luxh direni nidxäl xhi niniireni lojni. <sup>41</sup> Ni riojn̄ huält biädni, dxejc räjpni lojreni:

—Agojl col̄guejs, col̄silajz, agujc, abidzuj̄n̄ or ni ted Xi'n Dios ni gujc Niguii ladz̄naa rebendojl. <sup>42</sup> Col̄chastie, col̄cho'. Asiäddzungajxh ni guto' narä.

*Gunaazreni Jesús*

(Mt. 26:47-56; Lc. 22:47-53; Jn. 18:2-11)

<sup>43</sup> Canisijcni scree, che bidzuj̄n̄ Judas, ni najc te retzubitio'p xpejn̄pacni, siädni xhidajl bejn̄. Ca'reni spaad, ca'reni yajg biriireni lo rebixhojz nani rnibee, näjza rebejn̄ ni ruluii leii, näjza rebengool nani najc guxhtis. <sup>44</sup> Niluxh nani ruto' Jesús abadeedni te seen lojreni, räjpni:

—Nani guchagro'ä, ni'c najc laani. Col̄naazni, col̄yaptzu'tzni te si'c chanätuni.

<sup>45</sup> Che bidzuj̄n̄ Judas, gubigni loj Jesús, räjpni lojni:

—Dad, Dad.

Sas bachagro'nini. <sup>46</sup> Dxejcru gunaazreni Jesús ro'c.

<sup>47</sup> Dxejc tej reni suga' ro'c, gulää xspaadni, gudil̄guijdxni xmos bixhojz nani sajrcru, batiu'ni diajgni. <sup>48</sup> Dxejc räjp Jesús loj rebejn̄:

—¿La siädxhiitu narä con spaad näjza garo't si'c rixiitu te gubaan? <sup>49</sup> Guiraa dxej guyu'ä lojtu nen̄ guidoo, caguluiätu xtidx Dios luxh ditu niniaaztu narä. Scree cayajcni, te soob diidx ni caj lo reguijtz.

<sup>50</sup> Dxejcru rexpejn̄pacni gulälazrenini, baxun̄tirenini.

*Bi'n nani baxun̄*

<sup>51</sup> Sanajlza te bi'n Jesús, nadejbni ganaxhtis te bariaad. Si'c gunaazrenini. <sup>52</sup> Dxejcti baxun̄ni, libasa'nni bariaadga, sä'tini xhabääl̄ni.

*Suga' Jesús loj reguxhtis*

(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup> Dxejc biädni Jesús loj bixhojz ni sajrcru. Bidojp rebixhojz nani rnibee, näj rebengool ni najc guxhtis, näjza rebejn̄ ni ruluii leii. <sup>54</sup> Luxh Pedr zijt zijt sanajl̄ni Jesús. Che bidzuj̄n̄tini lo xle' bixhojz ni sajrcru, gurenäjni rebejn̄ nani rajp ro'c, cagucha' lajzni lo bajl.

<sup>55</sup> Rebixhojz nani rnibee, näjza guiraa rebengool ni najc guxhtis, caguil̄reni xhi tej xquej Jesús nidxälreni, te nugu'treni Jesús, xhet bidxäl̄direni. <sup>56</sup> Xhidajl bejn̄ gunii didxxhii, räjpreni et laadi rujn Jesús, niluxh di xtiidxreni nile', sa'csi garen garen guniireni. <sup>57</sup> Dxejc huisulii gaii bejn̄ ni guniireni stee didxxhii xcuent Jesús, räjpreni:

<sup>58</sup> —Nuunu biejn diaagnu guniini: “Sutiexhä xyu' Dios ni guc-chee con naa rebejn, luxh chontis dxej guncheä steeni, ni nac-chee et con naadi rebejn.”

<sup>59</sup> Nicla si'c di xtiidxreni nile', sa'csi garen garenza guniireni.

<sup>60</sup> Dxejcti huisulii bixhojz ni sajcru galäi guiraa rebejn, gunabdiidxni loj Jesús räjpni: —¿La digacdi guiniilu xhi guiniilu xcuent requej ni cabe'c reniguiire, ä?

<sup>61</sup> Laani niäuutis ro'ni, xhet guniidini. Dxejcti gunabdidxsac bixhojz ni sajcru lojni, räjpni:

—¿La luj ni najc Crist, xi'n Dios nani rliä'p bejn xpala'nni, ä?

<sup>62</sup> Dxejcti räjp Jesús lojni:

—Naräni. Suhuiitu loä, Xi'n Dios nani gujc Niguii, sobga'ä xladbee Dios ni rnibee, siäläza nen reza ni tre' xhaguibaa.

<sup>63</sup> Dxejcru bixhojz ni sajcruga, batiäjsni tla' xhajbni, räjpni:

—¿Xhi jienrunu guidiilnu diidx xcuentni? <sup>64</sup> Abiejn diajgtu xho guniyajni Dios. Naja', ¿xhi najtu?

Dxejcti guiraareni räjp nungäjlpac guetni.

<sup>65</sup> Dxejc yu' reni gusloj cagutiobxhejn lojni, luxh basäuureni lojni, dxejc huääzrenini, räjpreni lojni:

—Gunii, ¿chuni'c huääzlu?

Luxh renani canäjni gudajp lojni.

#### *Gunii Pedr dini gumbee Jesús*

(Mt. 26:69-75; Lc. 22:56-62; Jn. 18:15-18, 25-29)

<sup>66</sup> Dxejc suga' Pedr lo yuj, nez lo le'ga, che biääd te xcriaad bixhojz ni sajcru. <sup>67</sup> Luxh bahuiini cagucha' lajz Pedr, cadxelojni lojni. Dxejcti räjpni:

—Näj luj nadxaaglu Jesús ni siääd Nazare't.

<sup>68</sup> Dxejc Pedr basgueeni, räjpni:

—Dina gumbeäni. Dizana ganä xhini'c caniilu.

Dxejcti biriini sääni ro' suaan. Dxejcti guredxa' guidgaii. <sup>69</sup> Dxejc bahuisac criaadga lojni, räjpni loj renani suga' ro'c:

—Niguiire najc laa tejreni.

<sup>70</sup> Luxh laani basgueeni stehuält. Che gojl stera't, räpsac renani suga' ro'c loj Pedr:

—Guliipacni näj luj najclu tejreni, sa'csi beñ Galileelu, luxh guyasi riejn rniilu si'c rnii reben Galilee.

<sup>71</sup> Dxejc gusloj canii Pedr:

—Dios gun castiigw narä palga xhet guliidi ni caniä. Dios najc testiigw, dina gumbeä niguii nani caniitu.

<sup>72</sup> Dxejcti barojp huält guredxa' guidgaii. Dxejc banalajz Pedr nani räjp Jesús lojni: “Che gajdli guidgaii cuedxa' tiop huält, luj gacla chon huält aräjplu dilu gumbee narä.”

Dxejc guslojni cayoonni.

## 15

#### *Suga' Jesús loj Pila't*

(Mt. 27:1-2, 11-14; Lc. 23:1-5; Jn. 18:28-38)

<sup>1</sup> Che bara yääl bidxaag sa' rebixhojz ni rnibee, näj rebengool ni najc guxhtis, näjza rebejn ni ruluii leii, näjza guiralii reguxhtis. Dxejcti gusloj cachaagreni diidx xho gunreni. Baliibreni Jesús, sanätirenini, niluxh badeedrenini loj Pila't. <sup>2</sup> Dxejc gunabdiidx Pila't loj Jesús räjpni:

—¿La luj ni najc reii xten rexpejn Israel, ä?

Räjp Jesús lojni:

—Si'cni guiniilu, si'c najcni.

<sup>3</sup> Dxejc gusloj rebixhojz nani rnibee cabe'c rexquej Jesús. <sup>4</sup> Gunabdidxsac Pila't lojni:

—¿Xhet rniidilu ä? Ahuii lacti xquejlu cabe'creni.

<sup>5</sup> Bidxeloj Pila't sa'csi nicla si'c xhetru guniidi Jesús.

*Gunibeereni guet Jesús*

(Mt. 27:15-31; Lc. 23:13-25; Jn. 18:38-19:16)

<sup>6</sup> Dxelanijpac ruslaa Pila't tej rebejn ni yu' latzguiib. Ruslaani chutis te ni rniab rebejn. <sup>7</sup> Lo rebejn ni yu' latzguiib nadxaag te niguii ni laa Barrabás. Bagu'tni te bejn che nu'chni lo te cuaa bejn ni gudilnäj gubieer. <sup>8</sup> Dxejc bidojp xhidajl bejn loj Pila't, gunabreni lojni gunni si'ctis rujnni casob lanij. <sup>9</sup> Dxejc gunabdiidx Pila't lojreni, räjpni:

—¿La rlanjtu guslaá reii xten rexpejn Israel, ä?

<sup>10</sup> Sa'csi gucbegajcni rdexchlajz rebixhojz loj Jesús, ni'c bateedrenini lojni. <sup>11</sup> Ni'cni baquuilza rebixhojz ni rnibee rebenxhidaal te gäbreni lo Pila't:

—Baslaa Barrabás loonu lacuaa ni guslaalu Jesús.

<sup>12</sup> Dxejc räjp Pila't lojreni stehuält:

—¿Xhini'c rlanjtu gunnää nani rniitu reii xten rexpejn Israel?

<sup>13</sup> Dxejcru guredxa'reni:

—¿Bacuaani lo cruzj!

<sup>14</sup> Dxejc räjp Pila't lojreni:

—¿Xhini'c xhet laati bejnni?

Dxejcti laareni rbedxa'rureni:

—¿Bacuaani lo cruzj!

<sup>15</sup> Baslaati Pila't Barrabás, sa'csi rlanjz ni nuspaani lajz rebenxhidaal. Che gulujx gunibee Pila't, bia Jesús. Bateedti Pila't Jesús loj rexsoldaadni, te xcajni loj cruzj.

<sup>16</sup> Dxejc huinä rexsoldaadni Jesús nen Pretoor, yu' cadro rujnreni yälguxhtis, ro'c batojpreni guiraa resa'reni. <sup>17</sup> Dxejcti bashuajcwreni Jesús te lad moraad, bencheereni te coron guejch basälreni yejcn. <sup>18</sup> Guslogajc caguxhi näjrenini, caniireni lojni:

—¿Colguiliä'p xpala'n reii xten rexpejn Israel!

<sup>19</sup> Batiäjlneni te yabixhijl yejcn, batiobxhejnreni lojni, luxh guzuxhijbreni te rajnrenini. <sup>20</sup> Che gulujx basacsireni Jesús, gulääreni lad moraad ni najcwni, sas bashuajcwrenini xhajbpacni. Gulägajczeni Jesús te cuaarenini lo cruzj.

*Bacuaareni Jesús loj cruzj*

(Mt. 27:32-44; Lc. 23:26-43; Jn. 19:17-27)

<sup>21</sup> Te niguii ni laa Simón, ni siääd Cirene, sadejd ro'c, bazajni lo nejz. Niguiire najc xtd Alejandro näjza Rufo. Che sadejdn nejzga, la fuerz basguurenini xcruzj Jesús.

<sup>22</sup> Dxejcti huinäreni Jesús cadro laa Gólgota, nani säloj: dan Calabeer. <sup>23</sup> Ro'c badeedreni lo Jesús bin nani nu'ch mir lojni, dxejc laani naaddini niä'ni binga. <sup>24</sup> Che gulujxti bacuaareni Jesús loj cruzj, gudzujtreni yejc rexhajn, te don xhini'c xca' tejgareni.

<sup>25</sup> Agujc chon or gulejn gubijdx che bacuaareni Jesús lo cruzj. <sup>26</sup> Letreer cadro bacuaareni xtojlni scree bejnrenini: “Reii xten rexpejn Israel.” <sup>27</sup> Bacuaazareni lo stiop cruzj tiop gubaan, tejni xladbee Jesús, xtee xladbäjgwni. <sup>28</sup> Dxejc guzobj diidx ni caj loj guijtznani rni: “Loj rebenguijdx bigabni.”

<sup>29</sup> Luxh renani sadejd nejzga guniyajreni Jesús, cagusniibreni yejcreni, räjpreni lojni: —Jaa! Luj nutiejxhlu guidoo luxh chontis dxej niunchesacluni. <sup>30</sup> Naj baslaa lagajc luj, biäjt loj cruzjga.

<sup>31</sup> Näjza rebixhojz ni rnibee, näj rebejn ni rului leii, baxhiznärenini, räjp loj sa'reni: —Ste'ca bejn ruslaani, xhoxh digacdi guslaani lagajc laani. <sup>32</sup> Naj sujiäjt Cristre, reii xten rexpejn Israel, lo cruzj te guihuiinu, te chalilaaaznu.

Näj regubaan ni caj lo cruzj guniyajzareni Jesús.

*Xcälgujt Jesús*

(Mt. 27:45-56; Lc. 23:44-49; Jn. 19:28-30)

<sup>33</sup> Che gojl läidxej, bicäy si'cti chon or. <sup>34</sup> Che gudejd chon orga, guredxa' Jesús dipro, räjpni con xtiidxni:

—Eloi, Eloi, ¿lama sabactani? —dee säloj: Xtiozä, Xtiozä, ¿xhicuent gulälazlu narä?

<sup>35</sup> Biejn diajg gaii bejn ni suga' ro'c räjpni si'c, dxejc räjpreni:

—Colcuadiajg, Elías cabejdxni.

<sup>36</sup> Sas baxun tejni, bahuajdxni te sponj loj binagr. Dxejcru basälñini yejc te yabixhijl, badeednini loj Jesús te yänini, räbgajcni:

—Colgusaan guihuiinu don la siädläjd Elíasni loj cruiz.

<sup>37</sup> Dxejcru guredxaduxh Jesús, gujttini. <sup>38</sup> Dxejc lajd ni najl nen guidoro biräjsni, gujcnj tiop la', jiaali lo yujli. <sup>39</sup> Suga' capitán nani rnibee te gayuu soldaad nez loj Jesús, luxh che bahuiini xho guredxa' Jesús scree näj xho gujtni, räjpni:

—Guli'pacni, niguiire najc Xi'n Dios.

<sup>40</sup> Suga'za gaii gunaa, zijt cadxelojreni. Lojreni yu' Marii Magdalen, näj Marii, xnan Jacob ni najc huinru, näjza José, näjza Salomee. <sup>41</sup> Che guyu' Jesús Galilee birinajl regunaare Jesús, luxh bahuiirenini. Yu'za xhidajlru regunaa ni biädñajl Jesús che biädñi Jerusalén.

### *Biga'tz Jesús*

*(Mt. 27:57-61; Lc. 23:50-56; Jn. 19:38-42)*

<sup>42</sup> Biu' gudxhijñ, luxh najcni dxe bispr che rusucheereni par sabd, dxej ni rusilajz rexpejn Israel. <sup>43</sup> Biäd José ni siäd Arimatea, najcni te rebejn ni sajc loj reguxhtis. Näjza laani cabäjzni xcälñibee Dios. Guideb yälñabajn gunabni tiexh Jesús lo Pila't. <sup>44</sup> Bidxelo Pila't alagujt Jesús, sas gurejdxni capitán ni rnibee tej gayuu soldaad, gunabdiidxni lojni la balagujt Jesús. <sup>45</sup> Che räjp capitánga lojni agujt Jesús, dxejc badeed Pila't tiexh Jesús loj José. <sup>46</sup> Agusii José te bariaad, luxh che gulätñi Jesús lo cruiz, batejbnini nen bariaadga. Dxejc gudixhni Jesús nen te biliää ni caj cuä' te guilaj, dxejcru batzugini te guiro ro' biliääga. <sup>47</sup> Bahuii Marii Magdalen näj Marii xnan José cadro biga'tz Jesús.

## 16

### *Huäjz Jesús loj rebengut*

*(Mt. 28:1-10; Lc. 24:1-12; Jn. 20:1-10)*

<sup>1</sup> Che gudejd sabd, dxej ni rusilajz rexpejn Israel, Marii Magdalen näj Marii xnan Jacob näjza Salomee gusii setnejxh te chatääbreni se'tga tiexh Jesús. <sup>2</sup> Che biu' xmaan, rsildooru, che calejn gubijdx, biädñreni ro' xpaani. <sup>3</sup> Cayäjp loj sa'reni:

—¿Chu gudzucaj guiroga ro' xpaani te jiu'nu?

<sup>4</sup> Che gudixhlojreni, bahuiireni alagubicaj guijga, luxh najcni te guiroduxh. <sup>5</sup> Che biu'reni nen biliääga, bahuiireni lo te bi'n sobga' ladbee nen biliääga. Najcw bi'nga te ladmol ni najc siool. Dxejc bidxejb regunaaga. <sup>6</sup> Dxejcti räjp bi'nga lojreni:

—Na'c guidxejbtu. Caguiiltu Jesús ni siäd Nazare't, nani cuaj lo cruiz. Rutiruni ree. Agubajñni lo rebengut, coltahuii cadro gudixhreni tiejxhni. <sup>7</sup> Colchäj, colchaye'tz lo rexpejñpacni, loj Pedr, ganidla Jesús guidzujñ Galilee, dxejcti guidzujñtu. Ro'c fiitu lojni, si'cni guniini lojtu.

<sup>8</sup> Biriitireni ro' biliääga, racsejlsireni sa'csi cadxejbreni. Rut lojdi guniidireni sa'csi cadebduxhreni.

### *Baluiloj Jesús loj Marii Magdalen*

*(Jn. 20:11-18)*

<sup>9</sup> Gubajn Jesús loj rebengut rsildooru che biu' xmaan. Baluilojni galoo loj Marii Magdalen, nani agacgulääni gajdz bendxab nen lastooni. <sup>10</sup> Dxejcti huij Marii Magdalen, huiye'tzni loj renani cuansañ Jesús, renani cayac-huin lajzni, cayoonreni. <sup>11</sup> Che biejn diajgreni ahuäzsac Jesús lo rebengut, luxh Marii abahuii lojni, di lajzreni nilii.

### *Baluiloj Jesús loj tiop xpejñpacni*

*(Lc. 24:13-35)*

<sup>12</sup> Ste'ca najc Jesús baluilojni loj tio'p renani sasaj sääreni lo nejz. <sup>13</sup> Dxejcti gubi'reni, huiye'tzreni loj sgaiiga, luxh nicla xtidx reni'c di lajzreni nilii.



*Baxhal* Jesús repost

(Mt. 28:16-20; Lc. 24:36-49; Jn. 20:19-23)

<sup>14</sup> Lult baluilojni loj guitzubiteebreni che sobga'reni lo mex. Gudidxa' Jesús lojreni, sa'csi di lajzreni nilii luxh guyaa lajzreni. Di lajzreni nilii xtidx renani bahuii loj Jesús che gubangajcni loj rebeṅgut. <sup>15</sup> Räjṗ Jesús lojreni:

—Cołchäj guideb lo guedxliuj, colnii xtidx Dios lo guiraa rebejṅ. <sup>16</sup> Nani chalilajz luxh tiobnisni, siliaani loj dojl; biäda nani di lajzni chalii sinijtni lo dojl. <sup>17</sup> Niluxh remilagwre jiannäj renani chalilajz: sibääreni beṅdxab xcuentä; siniireni ste'ca diidx; <sup>18</sup> guiniaazreni bäl con ṅaareni; masque yäreni xhicos ni rugu't bejṅ, xhet gacdireni; susujreni ṅaareni yejc rebeṅracxhuu luxh siajc rebeṅracxhuu.

*Huä'p Jesús xhaguibaa*

(Lc. 24:50-53)

<sup>19</sup> Gulujxti gunii Dad Jesús si'c lojreni. Dxejc huäjsni sääni xhaguibaa. Ro'c huicueni cuä' Dios ladbee. <sup>20</sup> Dxejcti laareni bire'chreni, guniireni xtidx Dios guiranejz. Lagajc Dadga gucnäjreni, bejnni milagwr te gucbee bejṅ laapac xtidx Dios ni caniireni. Sugacni si'c.

## Rediidx Nani Bacuaa Lucas Xcuent Jesucrist

### *Xhicuent bacuaa Lucas rediidxre*

<sup>1</sup> Xhidajl bejn abacuaa lo guijtzcxcuent guiraa redzuun ni gujcz nez loonu te cuäxne-jzreni redzuunga <sup>2</sup> si'cpac ni biääd rediidxga loonu. Rebejn nani bahuiloj guiraa recosre cheni guslojlireni, näjza reni gucnäj basule' xtidx Dios najc renani basule' rediidxga loonu. <sup>3</sup> Luxh sa'csi abilä, abahuiloä, abenduxhä xhigab xcuent guiragajc ni gusajc che gusoblojlini, ni'c runä xhigab laaca gucuaä rediidxre, xnejz-xnejzni lo guejblu, Dad Teófilo, <sup>4</sup> te gacbesa'c guejblu ni najc didxlii xcuent guiraa rediidx ni abisieed guejblu.

### *Te xangl Dios gunii xho gaal Juan ni rutiobnis*

<sup>5</sup> Cheni gujcz Herodes reii xten región Judea, guyu' te bixhojz ni laa Zacarías, ni nadxaag lo rexpejn Abías. Chäälni laa Elisabe't, ni najcza te xagdoobixhoz Aarón. <sup>6</sup> Guiro'preni najcreni nadolajz nez loj Dios, rusoobreni xtidx Dios näjza xleii Dios, ni'c digacdi gucuaquij bejnreni xcuent nicla tej dojl. <sup>7</sup> Luxh ruti xi'nreni, sa'csi chäälni digacdi chu xi'nni. Luxh guiro'preni anajcreni bengool.

<sup>8</sup> Te dxej, laj ni cayujn Zacarías dzuun nen guidoro si'c bixhojz nez loj Dios, <sup>9</sup> dxejcz con daad bibee chuni'c jiu' nen yudxan xten guidoro te guze'creni yaal si'cni najc costumbr xten rebixhojzga. Dxejcz si'c gulereni Zacarías gunni. <sup>10</sup> Laaj ni caguze'cni guxhyaal, suga' guiraa rebejn lo xle' guidoro, cabedx-canabreni lo Dios. <sup>11</sup> Dxejcti baluiloj te xangl Dios lo Zacarías, suliini ladbee lo dxan cadro cayejc guxhyaal. <sup>12</sup> Che bahuii Zacarías lo xangl Dios, di jien xhi gunni, lacti bidxebduxhni. <sup>13</sup> Sas xangl Dios räjp lojni:

—Na'c guidxejblu, Zacarí, sa'csi Dios abiejn diajgni xtiidxlu, luxh su' te xi'n chääl, Elisabe't; cuälajluni Juan. <sup>14</sup> Sibalazduxhlu, siroob lastoolu; xhidajl bejn sibalajz sa'csi gaalni, <sup>15</sup> sa'csi benro gac xi'nlu nez loj Dios. Dini yä bin, nicla maxcaal. Sibäjz Sprit Dxan xten Dios nen lastooni cheni gaallini. <sup>16</sup> Sujnni gusiechlajz xhidajl rexpejn Israel, guibi'reni lo Gueb Dios. <sup>17</sup> Juanre sinijdni loj Dad, sujni lagajc xhigab, sajpni lagajc yälrnibee ni gojpcprofe't Elías, te che jiejn diajgreni xtiidxni susiechlajz redad, susiäjlzarenini diidx con rexi'nreni. Sigajcza rebejn ni di gusoob xtidx Dios sisieedreni gusoobreni xtidx Dios, te si'c jiädsucheeni lastoo rebejn te chalilajzreni xtidx Dad ni jiääd.

<sup>18</sup> Gunabdiidx Zacarí loj anglga, räjpni:

—¿Xho mood gacbeä guliilu? Sa'csi anacä bengol, sigajcza chälä.

<sup>19</sup> Dxejcti räjp anglga lojni:

—Narä nacä Gabriel, runä dzuun lo Dios. Laani baxhalni narä te guininää luj, jiädnääd didxhuenre lojlu. <sup>20</sup> Luxh naj, sa'csi dilajzlu nilii xtidxä, sia'nlu gop, digacdiru guiniilu, cheni gaalli xi'nlu sinisacul. Rextidxä sisiojcb che guidzujn dxej che riäjlgacni.

<sup>21</sup> Laajni cayajc dee, cadxeloj rebejn ni suga' nez ro' yudxan cabäjzreni guirii Zacarí sa'csi cayaclaani nen yudxan. <sup>22</sup> Che birii Zacarí, di niajcdiru niniini loj rebejn; dxejcz gucbeereni yu' xhi cosro bahuiini nen yudxan xten guidoo. Dxejcz con seen guninäjni rebejnnga, sa'csi xheti xse'ni te niniini.

<sup>23</sup> Che gulujx bejnini dzuun nen guidoro, gubi'ni rolijzni. <sup>24</sup> Che gudejd redxej dxejcti bazen nuu Elisabe't, chäälni, báz, gaii bäii diruni niri rolijzni. Bejnini xhigab, räjpni: <sup>25</sup> “Si'c bejn Dad Dios narä naj, gucnäjni narä te diru bejn cuälaz narä sa'csi ruti xi'nä.”

### *Biäddeed te xangl Dios diidx lo Marii gaal Jesús*

<sup>26</sup> Che gudejd xho'p bäii, baxhal Dios xanglni Gabriel lo te guedx Galilee ni laa Nazare't, <sup>27</sup> te chahuiini te dxapxteeb ni laa Marii. Agojcti xtiidxni te guchnaani te dade' ni laa José. Dade're najc xagdooboreii David. <sup>28</sup> Biu' anglre cadro sobga' dxape'ga, räjpni lojni:

—Xchan, dxa'p ni sanälajz Dios, ni agule Dios loj guiraa regunaa. Dios gacnäjl. Abenle' Dioslu loj guiraa regunaa.

<sup>29</sup> Luxh che bahuiini lo xangl Dios bidxelojni lo rextiidxni, rujnni xhigab: “¿Xhicuent caniini si'c loä?” <sup>30</sup> Dxejc räjp xangl Dios lojni:

—Na'c guidxejblu, Marii; agule Dios luj. <sup>31</sup> Bacuadiajg diidx. Suulu báz, su' te xi'nlu. Che gaalni guirilajni Jesús. <sup>32</sup> Laani sajcní te bejn ni sacduxh. Sirilajzani Xi'n Gueb Dios ni yu' xhaguibaro. Gueb Dios sujn gacni reii sigajc ni gujc toxtadgoldooni David, <sup>33</sup> te tejpas guinibeeni loj rexi'n Israel, luxh dipac xcälrnibeeni nitloj.

<sup>34</sup> Dxejc gunabdiidx Marii lo xangl Dios, räjpni:

—¿Xho mood gac dee? Ni dxapxteeb narä, gajd narä gumbeä niguii.

<sup>35</sup> Badzu' xangl Dios diidxre lojni, räjpni:

—Sprit Dxián xten Dios siääd lojlu, xcälrnibee Gueb Dios ni yu' xhaguibaa suhuajcwni luj si'c te za. Ni'cni báz ni gaal sajcní te bejndxián, sibälaj bejnni Xi'n Dios. <sup>36</sup> Nájza sa'lu Elisabe't su' te xi'nni luxh anajcní te bejngool; ni'cni gunaa nani najreni digacdi chu xi'nni agujc xho'p bäii nuuni báz. <sup>37</sup> Xheti te cos ni naganduxhtej nez loj Dios —räjp Xangl Dios.

<sup>38</sup> Dxejcti räjp Marii:

—Narä nacä xmos Xtadnu Dios; mbaj, sugunnäj Dios narä si'ctisni gunii gueblu loä. Dxejcti biunejz angl xten Dios lojni, sä'tini.

#### *Bihuii Marii lo Elisabe't*

<sup>39</sup> Neñ redxejga, basquejn Marii sääni lo te guejdx ni tre' neñ redajn xten Judea. <sup>40</sup> Biu'ni roliz Zacarí, guniini xtidxbee loj Elisabe't.

<sup>41</sup> Che biejn diajg Elisabe't guniini, biniib xi'nni xque'ni, gudxaj Sprit Dxián xten Dios lastoo Elisabe't. <sup>42</sup> Dxejc dipduxh guniini räjpni:

—Abenle'ru Gueb Dios luj loj guiraa regunaa. Abenle'zani xi'nlu. <sup>43</sup> ¿Chu narä te siädhuii xnan Xtioozä narä? <sup>44</sup> Biejntis diagä xtiidxlu, bibalazgajc xi'nä, biniibni xque'ä. <sup>45</sup> Sibaa lajzlu, luj ni huililajz sisiojbpac nani gunii Xtadnu Dios.

<sup>46</sup> Dxejc räjp Marii:

Xaimä rliä'p xpala'n Xtadnu Dios.

<sup>47</sup> Rbalazduxhza lastoä xcuent Dios ni ruslaa narä lo dojl.

<sup>48</sup> Sa'csi agule Dios narä,

nacä te mos gunaa ni xhet sajcdi,

luxh najli sinii rebejn nájza reni churu chu lo guedxliuj,

chicbaani loj guiraa regunaa.

<sup>49</sup> Sa'csi Gueb Dios ni rajp guiraa yälrnibee abejn xhidajl cosro loä, dxanduxh najc lajni.

<sup>50</sup> Dini cuääz gulasajzni guiraa rebejn ni riu xtiidxni, reni rajnni.

<sup>51</sup> Xhidajl cosnagajn abejnni con lagajc naani,

abatie'chni renani rustioob lastooreni rliä'p lagajc xpala'nreni.

<sup>52</sup> Abasajbni reni rnibee,

per rebejnadolajz bejnni gacreni beñro.

<sup>53</sup> Bachajni xque' reni calaan,

badeedni ganax cossa'c,

niluxh badzu'ni rebejn ni yu' xhixtenreni xhet badeed dini lojreni.

<sup>54</sup> Gucnäjni nación xten xpejn Israel, ni najc xmos Dios.

Di lajzni niäl nulasajznireni

<sup>55</sup> sa'csi si'c bia'nni diidx con retoxtadgoldoonu,

sinuu gulazlajzni toAbram nájza rexagdooni par tejpas.

<sup>56</sup> Dxejc bia'n Marii roliz Elisabe't si'cti choñ bäii, dxejc gubisacni rolizjni.

#### *Che gojl Juan ni rutiobnis*

<sup>57</sup> Che baza' xpäi Elisabe't, dxejc gojl xpäzni te báz niguiini. <sup>58</sup> Dxejc bidzujñ rexpisinni nájza resa'ni biädhuiireni guiro'preni che gucbeerene lacti hueen gujc Dios con laani. Bibalaznäjrenini. <sup>59</sup> Che gudejd xhujn dxej, huinäreni baze'ga chuni bee. Rlajz rebejn nirilaj baze'ga si'c laa xtadni, Zacarí. <sup>60</sup> Niluxh xnanni räjp:

—Na'c, guirilajpacni Juan.

<sup>61</sup> —¿Xhicuent? —räjpreni—. Ruti xfamillu ni laa si'c.

<sup>62</sup> Dxejcti gunabdiidxreni con seen lo xtað bāze'ga te gacbeereni xho rlanjni guirilaj bāze'ga. <sup>63</sup> Xtaðni gunab te la' guijtz, dxejc bacuaani: “Lajni najc Juan.” Dxejc guiraareni bidxelojreni. <sup>64</sup> Luxh lagajc dxejc gujc gunii Zacaríi stehuält, dxejc guslojni calä'pni xpala'n Dios. <sup>65</sup> Bidxeloduxh rexpisijnreni xhini'c gujc ro'c. Luxh bire'ch diidx xcuent recosre guideb nen redajn xten Judea. <sup>66</sup> Guiraa reni biejn diajg rediidxga gusloj cayujnreni xhigab, dxejc gunabdiidxreni loj sa'reni:

—¿Chuchani'c gac biuxe'ga?

Si'c guniireni sa'csi huenliisi abenle' Diosni.

### *Dij ni bil Zacarí*

<sup>67</sup> Dxejcti biääd Sprit Dxañ xten Dios nen lastoo xtaðni Zacaríi, gusloj caniini rediidx ni badeed Dios lojni, räjpni:

<sup>68</sup> Guiliä'pnu xpala'n Dios, Xtios rexpejn Israel, sa'csi abiäðhuiini loonu, ni najcnu rexpejnni, te siäðguslaani nuurnu nen dojl.

<sup>69</sup> Abaxhalni loonu te bejn ni rajp yälrusladuxh bejn nen dojl.

Najcni te rexagdo toxmosni David.

<sup>70</sup> Lagajc si'cni badeed Dios gunii redade' ni bacuaa xtiidxni lo guijtz galoo:

<sup>71</sup> Suslaani nuurnu loj reni rdxe'ch loonu,

näjza ladzñaa rebejn ni gulälaz nurnu.

<sup>72</sup> Te gulaslajzni retoxtadgoldoonu, te soob diidx ni bia'nni con rebejnga.

<sup>73</sup> Scree bia'nni diidx con toxtadgoldoonu, Abram:

<sup>74</sup> Suslaani nuurnu ladzñaa rebejn ni rdxe'ch loonu,

te na'c guidxeebnu chunu lojni gusoobnu xtiidxni,

<sup>75</sup> con yälñabansa'c näjza yälğuxhtis guiraa redxej ni guibajnnu.

<sup>76</sup> Luxh luj, bāze', sirilajlu dade' nani rnii xtidx Gueb Dios ni yu' xhaguibaa,

sa'csi sinijdlu lo Dad te gusucheelu rexnezyulajzni,

<sup>77</sup> te gunlu gacbee rexpejnni xho gac laani lo dojl,

te gac guibicaj xtojlni.

<sup>78</sup> Sa'csi Dios sanälajz bejn,

näjza rulaslajzni bejn ni'cni xhaguibaali suxhalni xi'nni te jiäðnäni te dxecoob,

<sup>79</sup> te gusanijni lo rebejn ni nabajn lo yälxcäy xten dojl,

näjza rebejn ni nabajn lo xpala yälğujt,

te guluiini xho sánu lo xnez yälrbecdxilajz.

<sup>80</sup> Dxejc gunís biuxe'ga, guyuduxh xcäriejnni xcuent recos xten Dios. Gubajnni nez loj reyubidz cheni bidzujnli dxej che baluilojni loj rexpejn Israel, che gusloj cagusule'ni xtidx Dios.

## 2

### *Che gojl Jesús*

(Mt. 1:18-25)

<sup>1</sup> Nen redxejga, gunibee Augusto César xcaj laj rebejn guideb guedxliuj lo xquijtzni.

<sup>2</sup> Ni'c nacobguc yälbigabre cheni najc Cirenio gobernador xten Siria. <sup>3</sup> Guiraa rebejn nanab chääreni lagajc lajdxreni te ro'c guigabreni. <sup>4</sup> Ni'cni birii José guedx Nazare't Galilee, te huijni Judea, lo guedx Belén, cadre gojl toDavid, sa'csi najc José xagdo toDavid. <sup>5</sup> Huinäni Marii, nani guchñaani, huijreni guedx Belén te ro'c guigabreni. Luxh nuu Marii báz. <sup>6</sup> Lalsi yu'reni guedx Belén, bidzujn dxej ni gaal xi'n Marii. <sup>7</sup> Ro'c gojl xi'n galooni, dxejc batejbnini te xzuudni. Dxejc gudixhnini cadre rusälreni guijxh rajw reguidxaa sa'csi xhetiru yu' xcalaareni jia'nreni.

*Rexangl Dios nájza rebaxtoor*

<sup>8</sup> Gajxh guejdxga guyu' gatii baxtoor cayajpreni xhiilreni lo niaa guxhijn. <sup>9</sup> Chela baluiloj te xangl Dios, luxh bianij guideb gabireni con yälrdimbicha' xten Dios, dxejc bidxebduxhrene. <sup>10</sup> Sas anglga räjp lojreni:

—Na'c guidxejbtu, narä siädnaá lojtu te didxsa'c ni suspalajz guiraa ben guedxliuj. <sup>11</sup> Nadxej gojl nen guejdx xten toDavid, tej ni guslaa bejn nen dojl, laani najc Crist ni najc Dad. <sup>12</sup> Dee najc te seen lojtu, sidxäلتu baze'ga nadejbni nen te xzuudni, naga'ni cadro rusälreni guijxh rajw reguidxaa.

<sup>13</sup> Lagajc dxejc guideb gabi anglga baluiloj naclejx xangl Dios, gulä'preni xpala'n Dios, räjpreni:

<sup>14</sup> Collä'p xpala'n Dios ni yu' xhaguibaali.

Suchu yälrbecdxilajz lo reben guedxliuj ni balazlajzni.

<sup>15</sup> Che gubi' rexangl Dios xhaguibaa, gusloj rebaxtoor canii loj sa'reni:

—Colcho' guedx Belén colchohui ni guzajc ro'c ni gunii Xtadnu Dios loonu.

<sup>16</sup> Rusquenduxhrene sääreni, dxejc bidxälreni Marii nájza José nájza baze' ni naga' nen cadro rusälreni guijxh rajw reguidxaa. <sup>17</sup> Cheni bahuiireni loj rebejnnga, bijreni diidx xhi räjp rexangl Dios lojreni xcuent baze'ga. <sup>18</sup> Niluxh guiraa reni biejn diajg rediidxre bidxeloduxhrene xtidx rebaxtoorga. <sup>19</sup> Niluxh Marii gulucheeni guiraa rediidx ni biejn diajgni nen lastooni, rujntisni xhigab xcuent rediidxga. <sup>20</sup> Dxejcti rebaxtoorga gubisacreni cayolreni, calä'pzareni xpala'n Dios xcuent guiraa rediidx ni biejn diajgreni nájza ni bahuiireni sa'csi guiraani gujc si'cni räjpreni lojreni.

*Cheni huinäreni Jesús chuni bee*

<sup>21</sup> Che gudejd xhujn dxej, huinäreni baze'ga chuni bee, dxejc gulälajrenini Jesús, lagajc laj ni räjp xangl Dios loj Marii guirilajni galooli guuni bázga.

<sup>22</sup> Che basa' redxej ni gac naya te nan si'cni gunibee toMoisés loj xquijtzni, huinäreni baze'ga guedx Jerusalén, nen guidoro gunabreni gacnäj Diosni par tejpas. <sup>23</sup> Bejnreni scree sa'csi caj lo guijtz xten Dios: “Guiraa rexingangaloo xten bejn guilia'tu lo sa'reni te gunreni xtzunä”, räjp Dios. <sup>24</sup> Bidzujnreni ro'c ca'reni te gojn si'cni rnibee rexquijtz Dios: “Tio'p gugue' o tio'p palombáz.”

<sup>25</sup> Nen redxejga, nen guedx Jerusalén rbäjz te dade' ni laa Simeón. Najcni te bensacduxh, randuxhni Dios, cabäjzni jiäd te bejn ni guslaa rexpejn Israel. Rbäjz Sprit Dxaan xten Dios nen lastoo Simeón. <sup>26</sup> Sprit Dxaan abejn gacbeeni dini guet ansde fiini loj Crist ni guxhal Dios. <sup>27</sup> Dxejcti räjp Sprit Dxaan xten Dios lojni chääni guidoro. La'ni yu'ni nen guidoo, bidzujn José con Marii, biädnäreni báz Jesús, te gunnäjreni Jesús nani rnibee xtidx Dios gunreni. <sup>28</sup> Dxejc gudääz Simeón baze'ga, gusloj calä'pni xpala'n Dios, räjpni:

<sup>29</sup> Dad, asajc gusaanlu guetä con yälrbecdxilajz, sa'csi abasooblu nani bia'n diidx gunnäjlu xmoslu.

<sup>30</sup> Sa'csi abahuiloä nani siädguslaa nuurnu nen dojl,

<sup>31</sup> ni abasujlu nez loj guiraa reben guedxliuj.

<sup>32</sup> Laani najc bianij ni susanij loj rebejn ni di gac xpejn Israel, nájza nani gac xpala'n rexpejnlu guedx Israel, lajdxlu.

<sup>33</sup> Bidxeloj José nájza xnan Jesús rediidx ni canii Simeón xcuent baze'ga. <sup>34</sup> Dxejc benle' Simeón yejcreni, dxejc räjpni lo Marii xnan Jesús:

—Bahuii gan; baze're biäd te loj rexpejn Israel chu reni sibälaz xtiidxni, te chuza reni sililajz xtiidxni. Laani gacni te seen nani sibälaz bejn, <sup>35</sup> te si'c jienloj xhi xhigab rujn cade tej rexpejn Israel nen lastooreni. Dxejcti par luj sajcnii asdoo chääz te spaad lastoolu, sa'csi gac-huinduxh lastoolu.

<sup>36</sup> Suga'za te nane' ni laa Ana ro'c, rniini xtidx Dios xcuent recos ni churu gac. Najcni xindxa'p Fanuel, ni najc famil xten Aser. Anajcni bengolduxh. Bachnaani che najcni dxaphuin, luxh gajdztis ijz guläznäjni chäälni che bia'nni biuud. <sup>37</sup> Najcni te gunabiuud ni yu' tajbitajp ijz. Diruni guirii guidoro, ro'ctis yu'ni dxej, yäl te yu'tisni lo Dios con

yälrucua'n näjza yälrbedx-rniab lo Dios. <sup>38</sup> Che gubigni lojreni lagajc dxejc, badeedni xquixtios lo Dios sa'csi abidzujn tej ni guslaa rebejn lo dojl. Dxejc gusloj caniini diidx xcuent báz Jesús loj guiraa renani cabäjz yälruslaa xten Jerusalén.

*Che gubi'reni guedx Nazare't*

<sup>39</sup> Che gulujx bejn xcuzajnni guiraa recos ni caj lo xquijtz Dios gunreni, gubisacreni Galilee, lo guedx Nazare't, lajdxreni. <sup>40</sup> Gunís biuxe'ga, guc nadaanni, guc nasinruzani sa'csi cayacnäj Diosni.

*Che biu' Jesús guidoro*

<sup>41</sup> Casob ijz rij rexuzajjn Jesús guedx Jerusalén te rinäreni te gojn xten lanij paschw. <sup>42</sup> Che basa' Jesús tzubitio'p ijz, huij guiraareni guedx Jerusalén si'c najc costumbr gac lanijga. <sup>43</sup> Che gulujx lanijga, gubisacreni. Bia'n Jesús guedx Jerusalén, luxh nicla xnanni niclaza José direni niacbee bia'nni. <sup>44</sup> Bejnreni xhigab pet siädsanäjni rebeñsa'ni. Si'c guzajreni tebdxej, dxejc gudiilrenini loj resa'reni, näjza loj reni rumbeereni, <sup>45</sup> direni nidxälni. Dxejc gubisacreni guedx Jerusalén te huitiilrenini ro'c.

<sup>46</sup> Chon dxej gudiilrenini dxejc bidxälrenini nen guidoro, sobga'ni nez galäi rebejn ni najn leii, cacuadiajgni xtiidxreni, cayujnzani yälgunabdiidx lojreni. <sup>47</sup> Luxh guiraareni cacuadiajg xtiidxni, cadxeloduxhreni yäl'najn xtenni, näjza rediidx ni cagudzu'ni lojreni. <sup>48</sup> Che bahuii rexuzajnni lojni, bidxelojreni. Dxejc räjp xnanni lojni:

—Xi'nä, ¿xhicuent bennäjlu nuurnu scree? Narä näjza xtaclu cayunduxhnu xhigab caguuilnu luj nezree, nezre'c.

<sup>49</sup> Dxejcti räjp Jesús lojreni:

—¿Xhicuent caguuiltu narä? ¿La ditu gan riäjł gunä xtzun Xtadä, ä?

<sup>50</sup> Luxh laareni direni niacbee rediidx ni guniini lojreni.

<sup>51</sup> Dxejcti gubinäjnireni guedx Nazare't, sanuuni rusoobni xtiidxreni. Luxh Marii gulucheetisni guiraa recosre nen lastooni. <sup>52</sup> Duurtis gunís Jesús, caroobruza xcäl'najnni. Sanälajz Diosni, sanälajzza guiraa rebejnni.

### 3

*Yälrusule' Juan ni rutiobnis*

(Mt. 3:1-12; Mr. 1:1-8; Jn. 1:19-28)

<sup>1</sup> Nen redxej cheni agujc tzuun ijz najc Tiberio César reii, Poncio Pila't najc gobernador xten Judea; Herodes najc gobernador xten Galilee; Felipe, bejtz Herodes najc gobernador xten Iturea näjza Traconite; Lisianas najc gobernador xten Abilinia. <sup>2</sup> Lagajc nen redxejga Anás näjza Caifás najc rebixhojzro xten guidoro guedx Jerusalén. Nen redxejga biääd xtidx Dios lo Juan, xi'n Zacarí cheni rbäjzni nez lo reyubijdz. <sup>3</sup> Ni'c cuanzaj Juan guideb nez reyuj xten gueu Jordán, ro'c basule'ni xcuent yälrusiechlajz, yälrobnis ni nanab gunreni te gudzucaj Dios xtojłreni. <sup>4</sup> Si'cni caj lo xquijtz Isaías, dade' ni gunii xtidx Dios, cadro räjpni:

Riejn xse' te ni rbedxa' nez loj reyubijdz:

“Colyunsac xnezyuj Dad, colslíi rexnezyulajzni.”

<sup>5</sup> Guiraa cadro sojb gueed sidxe'ni,

guiraa relom sibiicajreni,

guiraa renezyuj ni xhet naliidi, siliireni,

guiraa renezyudxuudx, sacsa'creni.

<sup>6</sup> Dxejcti guiralii bejn suhii loj nani guxhal Dios.

<sup>7</sup> Che bahuii Juan siääd xhidalduxh bejn te guirobnisreni, räjpni lojreni:

—¿La'tu benguijdx ni najc si'c bäl'nialajz! ¿Chuni'c balijdxtu guxuntu loj xcälrdxe'ch Dios ni siädgajxh, ä? <sup>8</sup> Colguchaa xmoodtu te si'c fii bejn guliini abasiechlajztu. Na'c cuentis rniitu lagajc nen lastootu “Abram najc xtadnu”, sa'csi narä rniä lojtu, sajc xca' Dios reguijre te con laareni guncheeni bejn gac rexagdo toAbram. <sup>9</sup> Aguiyayj naga' cuä' xlobaa reyajg; ni'cni guiraa reyajg nani di ninexhsa'c xcaj lojni, sidinreni te checreni.



<sup>10</sup> Dxejcti gunabdiidx rebejn lojni, räjpreni:

—¿Xhini'c nanab jiennu?

<sup>11</sup> Dxejc badzu' Juan diidxre räjpni:

—Ni rajp tio'p xhajn, sugudeedni tejni lo bejn ni xhet rajpdi. Sigajcza gun reni rajp xhi gaureni, quisrenini loj ni xheti xhi gauni.

<sup>12</sup> Näjza gaii bejn nani rusquijx xcuent reimpuest bidzujn lojni te guirobnisreni, dxejc gunabdiidxreni lo Juan räjpreni:

—Dad, mastr, ¿xhini'c nanab jiennu?

<sup>13</sup> Räjp Juan lojreni:

—Na'c gusquijxtu bejn maazdi ni nungäjł quiixreni.

<sup>14</sup> Näjza gaii resoldaad gunabdiidx lojni räjpreni:

—¿Nurnu a'? ¿Xhini'c nanab jiennu?

Dxejc räjpni lojreni:

—Na'c guchejbtu bejn; na'c gäbtu chale'ctu xcälquij bejn ni xhet bejndi parsi guniidxreni meel lojtu; colbalaznäj nani rujntu gaan.

<sup>15</sup> Cadxeloj rebejn, cayujnreni xhigabduxh, naareni, “pet Juan najc Crist ni jääd.”

<sup>16</sup> Dxejc badzu' Juan diidxre, räjpni loj guiraa rebejn:

—Guliipac rutiobnisä la'tu con nis, luxh siäd tej ni sajcro loä, nani nicla gac surloä, cuää xcura'chni. Laani sutiobnisni con Sprit Dxan xten Dios te cuääzni nen lastootu näjza con guiboo, sa'csi rajpruni yälrnibee loä. <sup>17</sup> Aca'ni pal te gusiani triuu te cuääni triusa'c lo guijxh te cucheeni triuu nen ngodx xtenni, dxejcti reguixhtriuuga suze'cnini lo bajl ni rej par tejpas.

<sup>18</sup> Rediidxre näjza xhidajl yälrulijdx gunii Juan te basule'ni redidxcoob loj rebejn.

<sup>19</sup> Näjza lo Herodes ni najc gobernadoor basule' Juan diidx, gudilnäjnini sa'csi xhet laadi cayujnni, sa'csi rbäznäjni Herodías, chääl bejtzni Felipe, näjza xcuent sgaii dojl ni bejnini.

<sup>20</sup> Di Herodes niu xtidx Juan, alga bejnini stee dojl, basälni Juan nen latzguuib.

### *Che gurobnis Jesús*

(Mt. 3:13-17; Mr. 1:9-11)

<sup>21</sup> Che batiobnis Juan rebejn, näjza Jesús birobnis. Cheni cabedx-canabni lo Dios, bixal xhaguibaa, <sup>22</sup> dxejc biäj Sprit Dxan xten Dios si'c te palom, bidzujnni cadro suga' Jesús. Dxejc xhaguibaali biejn xse' te ni räjp:

—Luj, najclu xi'nä ni sanälazä. Rbanälazduxhä luj.

### *Resa' Jesús*

(Mt. 1:1-17)

<sup>23</sup> Yu' Jesús galbitzuu ijz che gusloj cayujnni dzuun ni badeed Dios gunni. Rchalo rebejn najcni xi'n José, xi'n Elí. <sup>24</sup> Elí gujc xi'n Matat. Matat gujc xi'n Leví. Leví gujc xi'n Melqui. Melqui gujc xi'n Jana. Jana gujc xi'n José. <sup>25</sup> José gujc xi'n Matatías. Matatías gujc xi'n Amós. Amós gujc xi'n Nahum. Nahum gujc xi'n Esli. Esli gujc xi'n Nagai. <sup>26</sup> Nagai gujc xi'n Maat. Maat gujc xi'n Matatías. Matatías gujc xi'n Semei. Semei gujc xi'n José. José gujc xi'n Judá. <sup>27</sup> Judá gujc xi'n Joana. Joana gujc xi'n Resa. Resa gujc xi'n Zorobabel. Zorobabel gujc xi'n Salatiel. Salatiel gujc xi'n Neri. <sup>28</sup> Neri gujc xi'n Melqui. Melqui gujc xi'n Adi. Adi gujc xi'n Cosam. Cosam gujc xi'n Elmodam. Elmodam gujc xi'n Er. <sup>29</sup> Er gujc xi'n Josué. Josué gujc xi'n Eliezer. Eliezer gujc xi'n Jorim. Jorim gujc xi'n Matat. <sup>30</sup> Matat gujc xi'n Leví. Leví gujc xi'n Simeón. Simeón gujc xi'n Judá. Judá gujc xi'n José. José gujc xi'n Jonán. Jonán gujc xi'n Eliaquim. <sup>31</sup> Eliaquim gujc xi'n Melea. Melea gujc xi'n Mainán. Mainán gujc xi'n Matata. Matata gujc xi'n Natán. <sup>32</sup> Natán gujc xi'n David. David gujc xi'n Isai. Isai gujc xi'n Obed. Obed gujc xi'n Booz. Booz gujc xi'n Salmón. Salmón gujc xi'n Naasón. <sup>33</sup> Naasón gujc xi'n Aminadab. Aminadab gujc xi'n Aram. Aram gujc xi'n Esrom. Esrom gujc xi'n Fares. Fares gujc xi'n Judá. <sup>34</sup> Judá gujc xi'n Jacob. Jacob gujc xi'n Isaac. Isaac gujc xi'n Abraham. Abraham gujc xi'n Taré. Taré gujc xi'n Nacor. <sup>35</sup> Nacor gujc xi'n Serug. Serug gujc xi'n Ragau. Ragau gujc xi'n Peleg. Peleg gujc xi'n

Heber. Heber gujc xi'n Sala. <sup>36</sup> Sala gujc xi'n Cainán. Cainán gujc xi'n Arfaxad. Arfaxad gujc xi'n Sem. Sem gujc xi'n Noé. Noé gujc xi'n Lamec. <sup>37</sup> Lamec gujc xi'n Matusalén. Matusalén gujc xi'n Enoc. Enoc gujc xi'n Jared. Jared gujc xi'n Mahalaleel. Mahalaleel gujc xi'n Cainán. <sup>38</sup> Cainán gujc xi'n Enós. Enós gujc xi'n Set. Set gujc xi'n Adán. Adán gujc xi'n Dios.

## 4

*Che biricaj bendxab loj Jesús*

(Mt. 4:1-11; Mr. 1:12-13)

<sup>1</sup> Jesús, sa'csi rbájz Sprit Dxan xten Dios lastooni, biunejzni gueu Jordán, dxejc huinä Sprit Dxan xten Diosni lo reyubijdz. <sup>2</sup> Ro'c bia'nni tiuu gubijdx, tiuu guxhijñ. Ro'c bidzujñ bendxab ni rnibee te rlanjni gunni gusoob Jesús xtiidxni. Luxh calaan Jesús, sa'csi gajdni gau guiraa neñ redxejga. <sup>3</sup> Dxejc rájp bendxab lojni:

—Palga guliilu Xi'n Dioslu, gunibee gac reguijre yätxtiil.

<sup>4</sup> Badzu' Jesús diidx lojni rájpni:

—Acáj loj reguijtz xcuent Dios: “Xhet ganaxdi yätxtiil gun sajc guibajñ bejñ, nájza guiraa diidx nani rnii Dios sujn guibajñ bejñ.”

<sup>5</sup> Dxejcti huinä bendxab Jesús jiaa yejc te dajn. Teratbäztis baluilojni guiraa reguedxro ni tre' lo guedxliuj. <sup>6</sup> Dxejc rájp bendxab lojni:

—Nará sunidxä guiraa yälrnibee nájza reyäl'nasa'c ni yu' loj reguejdxga sa'csi xtenä guiraareni, luxh sajc gudedäni lo chutis ni rlazä. <sup>7</sup> Palga luj suzuxhijblu loä, guiliä'plu xpala'nä, guiraani sajc xtenlu.

<sup>8</sup> Dxejc Jesús badzu' diidx, rájpni lojni:

—Acáj loj xquijtz Dios: “Dad Xtioostislu ganlu, luxh lojtisni chulu gunlu dzuun.”

<sup>9</sup> Dxejcti huinä bendxabni lo guedx Jerusalén, huinänini jiaa yejc xques guidoro. Dxejc rájp bendxab lojni:

—Palga guliilu najclu Xi'n Dios, gutiäjs lo yuj <sup>10</sup> sa'csi si'c caj loj rexquijtz Dios: Suxhañ Dios rexanglni te ga'preni luj,

<sup>11</sup> guiniaazreni luj didi jiajblu lo guij.

<sup>12</sup> Badzu' Jesús diidx lojni, rájpni:

—Cajza lo rexquijtz Dios: “Na'c fallu Dad ni najc Xtioozlu.”

<sup>13</sup> Che baluux bendxab rextiidxni, gubicajni lo Jesús sa'csi dini niujn gaan nusoob Jesús xtiidxni. Guläjzni guidzujñ stee dxej te gusacsíruni Jesús.

*Gusloj Jesús cayujñ xtzuunni*

(Mt. 4:12-17; Mr. 1:14-15)

<sup>14</sup> Dxejc gubi' Jesús lo rexyuj Galilee rájpni yälrnibee xten Sprit Dxan. Bire'ch diidx xcuentni guiraa neñ reguejdx ni tre' nejzga. <sup>15</sup> Ruluiini neñ reguidobäz luxh guiraa rebejñ rliä'p xpala'nni.

*Jesús guyu' guedx Nazare't*

(Mt. 13:53-58; Mr. 6:1-6)

<sup>16</sup> Dxejcti huij Jesús guedx Nazare't cadre gulaani. Che gojl dxej ni rusilajz rexpejñ Israel, biu'ni neñ guidobäz sigajc ni rujnpacni, dxejc huisuliini te bilni <sup>17</sup> reguijtz xten Dios. Badeedreni lojni guijtz ni bacuaa Isafás; cheni baxhalni guijtzga, bidxälni cadre rnii scree:

<sup>18</sup> Sprit Dxan xten Dios suganäj narä,

sa'csi agule Dios narä te gusule'ä xtidxcoobni lo rebenproob.

Baxhalni narä te gusiacä lastoo renani di lastooreni cuedxi,

te gusule'ä yälruslaa lo rebejñ ni yu' lo dojl,

te gusiacä baloj reben lotiä'p, te guslaá reben ni cadejd trabajw,

<sup>19</sup> te gusule'ä abiu' ijzsa'c che rulaslajz Dios rebejñ.

<sup>20</sup> Dxejc basäu Jesús reguijtzga, badeednini loj bejn ni cayacnäy nen\_ guidooga, dxejc gurejni. Sa'csi guiraa rebejn\_ ni sobga' nen\_ guidooga cahuidzu'tzreni lojni, <sup>21</sup> gusloj guniini, räjpni lojreni:

—Lagajc nadxej guzobj\_ rediidx ni caj lo reguijtzre nez loj guiraatu.

<sup>22</sup> Guiraareni sarú guniireni xcuent Jesús, bedxeloduxhzareni redidxsaruduxh ni guniini lojreni. Gunabdiidxreni loj sa'reni, räjpreni:

—¿La et xi'ndi José dade're, ä?

<sup>23</sup> Dxejc räjp Jesús lojreni:

—Siniipactu rediidxre loä: “Doctoor, basiajc lagajc luj”; siniizatu loä: “Recos ni biejn diajgnu bejnlu nez guedx Capernaum, lagajc recosga bejn nez ree cadro najc lajdxlu.”

<sup>24</sup> Dxejc huinuu xtiidxni, räjpni lojreni:

—Rniliápac lojtu, nicla tej redade' ni rnii xtidx Dios, di reben\_ lajdxreni jiu xtiidxni.

<sup>25</sup> Luxh rniliä lojtu, che gubajn\_ Elías lo guedxliuj, guyu' xhidajl\_ gunabiuud guedx Israel che di nisguij\_ niajb\_ chon\_ ijz garol, dxejc guyu' yälrianduxh\_ guideb\_ guejdxga. <sup>26</sup> Luxh di Dios nuxhal\_ Elías rolijz\_ nicla tej regunabiuud ni guläjz\_ guedx Israel, alga baxhalnini lo benzijt\_, rolijz\_ te gunabiuud ni rbäjz\_ Sarepta, gajxh\_ guedx Sidón. <sup>27</sup> Sigajcza che gubajn\_ Eliseo lo guedxliuj, guyu' xhidajl\_ ben\_ racxhuu ni ral\_ tiejxhrene guedx Israel, luxh dini nusiajc\_ nicla tejreni, alga basiajcni\_ dade' ni laa Naamán, ni siäd te guedxzij\_ ni laa Siria.

<sup>28</sup> Che biejn diajg\_ reni sobga' nen\_ guidoo rextidx Jesús, bidxechduxhrene, <sup>29</sup> huisuliireni, guläärenini nen\_ guejdxga. Dxejc huinärenini yejc\_ dajn\_ cadro tre' guejdxga\_ cadro yu' te balaro, te ro'c\_ rlazreni\_ nustejbrenini. <sup>30</sup> Dxejc Jesús sigaj\_ gudejdni galäiireni, sä'tini\_ ste'ca\_ lajt.

*Gulää Jesús ben\_dxab lastoo te dade'*

*(Mr. 1:21-28)*

<sup>31</sup> Dxejc huij Jesús guedx Capernaum, te guejdx\_ xten Galilee. Ro'c\_ gusloj\_ cagusule'ni diidx\_ loj rebejn\_ che gojl\_ dxej\_ ni rusilajz\_ rexpejn\_ Israel. <sup>32</sup> Bidxeloduxhrene\_ xtiidxni\_ sa'csi rusule'ni\_ si'c te bennajn, si'c te ni rnibee.

<sup>33</sup> Nen\_ guidooga suga' te dade' ni rbäjz\_ te ben\_dxab\_ nen\_ lastooni. Guredxa'ni <sup>34</sup> räjpni: —¡Aii! ¡Basaan\_ nurnu! ¿Xhicuent\_ riädchu'lu\_ loonu Jesús ni siäd\_ Nasare't? ¿La siädlu\_ te gunitlojlu\_ nuurnu, ä? Narä\_ numbeälu, nanä\_ najclu\_ Xin D\_xan Dios.

<sup>35</sup> Gudidxa' Jesús lo ben\_dxabga, räjpni lojni:

—Basäu ro'lu, birii\_ lastoo\_ niguiire.

Dxejcti\_ ben\_dxabre\_ basäl\_ niguiiga\_ lo yuj\_ nez loj guiraareni, dxejc\_ biriini\_ nen\_ lastoo dade'ga, per\_ xhet\_ bejndini\_ dade'ga. <sup>36</sup> Bidxeloduxh\_ rebejn\_ga, dxejc\_ gusloj\_ caniireni lo sa'reni, räjpreni:

—¿Xhi\_ diidx\_ najc\_ redee? Bahuii\_ xho\_ rnibee\_ dade're\_ reben\_dxab\_ con\_ yäl\_rnibee, luxh\_ rusoob\_ reben\_dxab\_ xtiidxni, riireni\_ lastoo\_ bejn.

<sup>37</sup> Dxejc\_ gusäb\_ xtidx\_ Jesús lo guiraa\_ reguejdx\_ ni tre' guideb\_ gabi\_ guejdxga.

*Rusiajc Jesús xnan\_ xueerg\_ Pedr*

*(Mt. 8:14-15; Mr. 1:29-31)*

<sup>38</sup> Birii\_ Jesús\_ guidobäz, huijni\_ rolijz\_ Simón. Dxejc\_ naga' xnan\_ sueerg\_ Simón, cayacxhuuni, yu'ni\_ xliaduxh. Sas\_ gunabduxhrene\_ lojni\_ te gusiajcni. <sup>39</sup> Gubig\_ Jesús loj\_ nane'ga, gudidxa'ni\_ xliaaga, luxh\_ lagajc\_ orga\_ biriini\_ xliaa. Dxejc\_ huistiegajcni, gusloj\_ cayujjni\_ mandaad, cahuiinireni.

*Rusiajc Jesús xhidajl\_ yäl\_racxhuu*

*(Mt. 8:16-17; Mr. 1:32-34)*

<sup>40</sup> Lal\_ ni cayäaz\_ gubijdx, guiraa\_ reni\_ rajp\_ ben\_racxhuu\_ ni rajc\_ garen\_ garen\_ yäl\_racxhuu\_ biädnäreni\_ rebejn\_ga\_ lo Jesús. Dxejc\_ laani\_ batzuubni\_ naani\_ yejc\_ teygareni, dxejc\_ biajc\_ reben\_racxhuuga. <sup>41</sup> Loj\_ reben\_racxhuuga, yu'reni\_ birii\_ reben\_dxab\_ nen\_ lastooreni, rbedxa'reni\_ räjpreni:

—Luj\_ najclu\_ Xi'n\_ Dios.

Luxh Jesús gudiĵnĵni rebeĵdxab, dini nusaa niniireni sa'csi laareni najnreni najcni Crist ni cabĵzreni.

*Rusule' Jesús xtidx Dios*  
(Mr. 1:35-39)

<sup>42</sup> Che bianij, biriini lo guejdx, huijni te lajt cadro rut rbĵzdi. Niluxh gudiil rebeĵni, dxejc bidzujĵreni cadro suga'ni. Rlajzreni nuscuĵĵzrenini te di nuiini. <sup>43</sup> Dxejc Jesús rĵjp lojreni:

—Nanab cha'a chasule'ĵ rextidx xcuent xcĵrnibee Dios xhidajlruza guejdx, ni'cni baxhalpac Dios narĵ.

<sup>44</sup> Dxejc si'ctis cuanzaj Jesús basule'ni xtidx Dios neĵ guiraa reguidobĵz neĵ reguejdx xten Galilee.

## 5

*Che gunaazreni xhidajl bĵjl*  
(Mt. 4:18-22; Mr. 1:16-20)

<sup>1</sup> Cheni suga' Jesús ro' nis ni laa Genesare't, gubig xhidajl beĵ lojni te jiejn diajgreni xtidx Dios. <sup>2</sup> Dxejc bahuii Jesús tio'p barcw ni suga' ro' nisga, rud yu'di neĵreni sa'csi rebeĵ ni rnĵaz bĵjl abiriireni neĵ rebarcw te caguiibreni xquijxhreni ro' nisga. <sup>3</sup> Dxejc biu' Jesús neĵ te barcw ni najc xten Simón, dxejc gunab Jesús chĵĵ barcwga lo nis te la', te guibicajni ro' yuj. Dxejc gurej Jesús neĵ barcwga, ro'cli guslojni caguluiini rebeĵ. <sup>4</sup> Che gulujx xtiidxni, rĵjpni loj Simón:

—Huinĵ barcw cadro jĵĵtru, colcuaa xquijxhtu lo nis te guinĵaztu bĵjl.

<sup>5</sup> Rĵjp Simón lojni:

—Mastr, guideb yĵĵl biennu dzuun, luxh dinu ninĵaz nicla tej bĵjl, niluxh naj agunibeelu gusĵlsacnu guijx lo nis.

<sup>6</sup> Cheni basĵlreni xquijxhreni lo nis, gunaazreni xhidalduxh bĵjl, dxejc guslojli carĵjs xquijxhreni. <sup>7</sup> Dxejc beĵnreni seen loj resa'reni ni yu' neĵ stee barcwga te jĵĵdyacnĵreni. Bidzujĵtĵreni, bachajreni guiro'p barcw. Gudxaduxh rebarcw, ameer niĵĵzreni neĵ nis.

<sup>8</sup> Che bahuii Simón Pedr recosre, bazuxhibni nez loj Jesús, dxejc rĵjpni:

—Gubicaj loĵ Dad, sa'csi narĵ nacĵ te beĵdojl.

<sup>9</sup> Si'c gunii Simón sa'csi bidxejb laani nĵza guiraa rebeĵ ni yunĵni sa'csi gunaazreni xhidalduxh bĵjl. <sup>10</sup> Nĵza Jacob nĵza Juan, rexi'n Zebedeo, ni runnĵ Simón dzuun, nĵzarenĵ bidxejbreni. Per Jesús rĵjp lo Simón:

—Na'c guidxejblu, najli gusloj cuedxlu beĵ lacuaa ni guinĵazlu bĵjl.

<sup>11</sup> Dxejc, che bidzujĵreni rebarcw ro' nis, basa'nreni guiraa xhixtenreni, te sanajlreni Jesús.

*Basĵjc Jesús te beĵ ni ral tiejxhni*  
(Mt. 8:1-4; Mr. 1:40-45)

<sup>12</sup> Cheni guyu' Jesús tej reguejdx, bidzujĵ te beĵ lojni ni rajc lepra te yĵlguidxduxh ni ral tiejxhni. Che bahuiini loj Jesús, bazuxhibni, basajbni lojni lo yuj, rĵjpni lojni:

—Dad, palga rlajzlu, saj c gusĵajclu narĵ.

<sup>13</sup> Dxejc batzuub Jesús nĵani yejĵni rĵjpni lojni:

—Rlazĵ jĵajclu. Susĵacĵlu.

Che guniini rediidxre, biacgajc beĵ racxhuuga. <sup>14</sup> Dxejĵti gunibee Jesús lojni rut lojdi gĵbni xhi guzajĵni. Rĵjpni lojni:

—Huijtis lo bixhojz te fiini lojlu, huisa'nza gojn xcuent ni biĵajclu si'cni rnibee xleii Moisĵs, te filoj rebeĵ abĵajclu.

<sup>15</sup> Luxh xpala'n Jesús sanuutis cayĵpruni, guixe-guixee care'ch diidx xcuentni. Rdojpza xhidalduxh beĵ te gucudĵajgreni xtidx Jesús nĵza te gusĵajĵni yĵlracxhuu xtenreni. <sup>16</sup> Yu'za huĵlt riunejz Jesús rijni relajt cadro ruti rebeĵ, te ro'c rbedx-rniabni lo Xtradni Dios.

*Basiajc Jesús te bejn* ni digacdi guiniib  
(Mt. 9:1-8; Mr. 2:1-12)

<sup>17</sup> Te dxej la<sup>l</sup>ni caguluiini rebejn, nejzga sobga' gaii farisee najza gaii bejn ni ruluii leii garen-garen reguejdx, siäädreni guideb nez reguejdx xten Galilee, najza región Judea, najza guedx Jerusalén. Dxejc huenliisi rluiloj suganäj xcäl<sup>r</sup>nibee Dios Jesús te rajc russiaj<sup>c</sup>ni reben<sup>r</sup>racxhuu. <sup>18</sup> Dxejc bidzuj<sup>n</sup> gaii dade' nuureni lo te lonbáz te bejn ni di gacdi guiniib, r<sup>l</sup>ajzreni gusu'renini ne<sup>n</sup> yu' te quixh<sup>r</sup>renini nez loj Jesús. <sup>19</sup> Niluxh direni nidxäl canejz niu'reni sa'csi nadädu<sup>x</sup>h ro'c sa'csi tre' xhidaj<sup>l</sup> rebejn. Dxejc huäpnäjrenini yejc yu'ga, badzucajreni gaii tej, dxejc basajbreni xloon ben<sup>r</sup>racxhuuga yejcli yu'ga te gujc bidzuj<sup>n</sup>ni nez loj Jesús. <sup>20</sup> Che bahuii Jesús yäl<sup>r</sup>rililajz xtenreni, räjpni loj ben<sup>r</sup>racxhuuga:

—Dade', agubicaj xtoj<sup>l</sup>lu.

<sup>21</sup> Dxejc rebejn ni ruluii leii najza refarisee gusloj cayujnreni xhigab, naareni: “¿Chucha niguiire ni caniyajni Dios con rextiidxni? Ruti te bejn ni sajc gudzucaj xtoj<sup>l</sup> rebejn, Diostis rudzucaj dojl.”

<sup>22</sup> Dxejc gucbee Jesús xhi xhigab cayujnreni, ni'c räjpni lojreni:

—¿Xhicuent rujntu xhigab si'c ne<sup>n</sup> lastootu? <sup>23</sup> ¿Xhini'c najc guyasiru guiniini: “Agubicaj rextoj<sup>l</sup>lu”, o guiniini: “Huistie, guzaj”, ä? <sup>24</sup> Mbaj naj, suluiä nez lojtu Xi'n Dios ni gujc Xi'n Niguii rajp yäl<sup>r</sup>nibee, yäl<sup>n</sup>adip lo guedxliujre te gudzucajni xtoj<sup>l</sup> rebejn.

Dxejc räjpni lo bejn<sup>g</sup>a ni digacdi guiniib:

—Lojlu rniä, jhuistie, guläs xloonlu, huij rolijzlu!

<sup>25</sup> Lagajc dxejc nez lojreni huistiegajc bejn ni digacdi guiniib, guläsni xlooni cadro naga'ni, dxejc siini rolijzni, calä'pni xpala'n Dios.

<sup>26</sup> Guiraareni rdxeloduxh<sup>r</sup>eni recosga, dxejc guslojreni calä'preni xpala'n Dios, rdexjblireni räjpreni:

—Abihuiinu cosro, cos ni guidxeloj bejn nadxej.

*Rbejdx Jesús Leví*

(Mt. 9:9-13; Mr. 2:13-17)

<sup>27</sup> Che gudejd gulujx recosre, birii Jesús ro'c. Dxejc bahuiini lo te bejn ni rusquijx xcuent impuest, nani laa Leví. Sobga'ni lo te mex cadro rusquijxni impuest; ro'c bahuii Jesús lojni. Räjp Jesús lojni:

—Gudanajl narä.

<sup>28</sup> Dxejc huisu Leví, basa'nni guiraa recosga, dxejc sanajlni Jesús.

<sup>29</sup> Dxejc bejn Leví te lanij rolijzni par Jesús. Biääd xhidaj<sup>l</sup> bejn ni rusquijx xcuent impuest najza sgaii bejn; sobganäjnireni lo mex. <sup>30</sup> Dxejcti refarisee najza rebejn ni ruluii leii guslojreni cayeinäjreni rexpejn<sup>pac</sup> Jesús, räjpreni:

—¿Xhicuent raunäjtu, ränäjtu rebejn ni rusquijx impuest najza rebendoj<sup>l</sup>, ä?

<sup>31</sup> Dxejc badzu' Jesús diidxre, räjpni lojreni:

—Rebejn ni nadaan di guiquiin te doctoor, ganaxtis rebejn nani racxhuu rquiinreni te doctoor. <sup>32</sup> Dina niädtedxä rebe<sup>n</sup>sa'c, narä biädtedxä rebendoj<sup>l</sup> te gusiechlajzreni.

*Gunabdiidxreni loj Jesús xcuent yäl<sup>r</sup>rucua'n*

(Mt. 9:14-17; Mr. 2:18-22)

<sup>33</sup> Dxejc gunabdiidx rebejn<sup>g</sup>a loj Jesús, räjpreni:

—¿Xhicuent lacti rucua'n rexpejn<sup>n</sup> Juan najza rexpen<sup>n</sup> refarisee, lacti rbedx-rniabreni loj Dios; niluxh rexpejn<sup>n</sup>paclu alga rajwreni, rä'reni?

<sup>34</sup> Badzu' Jesús diidxre lojreni, räjpni:

—¿La sajc gucua'n rebejn ni yu' lo te sa' la<sup>l</sup>ni yunäjreni bi'n, ä? <sup>35</sup> Niluxh sidzuj<sup>n</sup> dxej cheni sibicaj bi'n lojreni, dxejc sii sucua'nreni.

<sup>36</sup> Guniiza Jesús cuentre lojreni, räjpni:

—Rut rucuaadi te remiend ladcoob loj te ladyujxh, sa'csi che rxu'n ladcoob rutiäjzni ladyujxhga, dxejc xhiroobruni guiräjs, luxh diza ladcoob guchaag lo ladyujxh. <sup>37</sup> Di gacdi gusal<sup>n</sup>i bincoob ne<sup>n</sup> te guidbiejw sa'csi bincoobga sutiäsy'a'ni guidbiejwga dxejc sixe'

binga, sixij<sub>n</sub>za guidbiejwga. <sup>38</sup> Ni'cni nanab gusal<sub>n</sub>i bincoob ne<sub>n</sub> guidcoob si'c sigucheeza guiro'preni. <sup>39</sup> Luxh nicla tej bej<sub>n</sub> ni agu' bin ni yu' agujc xchej r<sub>l</sub>ajz yä bincoob, sa'csi säj<sub>n</sub>ni: “Bin ni yu' agujc xchej najc huenru.”

## 6

*Rutie' rexpej<sub>n</sub>* Jesús triuu dxej nani rusilajzreni

(Mt. 12:1-8; Mr. 2:23-28)

<sup>1</sup> Te dxej ni rusilajz rexpej<sub>n</sub> Israel sasaj Jesús näjza rexpej<sub>n</sub>pacni nez loj reyuj cadro naga' triuu. Dxejc, sa'csi calaanreni gusloj calääd<sub>x</sub>reni doj lo triuu te cayajwrenini.

<sup>2</sup> Dxejc gunabdiid<sub>x</sub> gaii refarisee ni najc be<sub>n</sub>guidoo, räjpreni lojreni:

—¿Xhicuent rujntu dzuun ni di nungäjl guntu che rajl dxej ni rusilajznu?

<sup>3</sup> Dxejc räjp Jesús lojreni:

—¿La gajdtu go<sub>l</sub> loj reguijtz xhi bejn toDavid cheni calannäj<sub>n</sub>i rebej<sub>n</sub> nani sanäni, ä? <sup>4</sup> Biu'ni ne<sub>n</sub> xquidoo Dios, gudajw<sub>n</sub>i yätxtiil nani di nungäjl gau bej<sub>n</sub> sa'csi xtebtis rebixhojz rajc rajw<sub>n</sub>i, luxh badeedni yätxtiilga gudajw resa'ni.

<sup>5</sup> Räjpza Jesús lojreni:

—Sigajcza narä, Xi'n Dios ni gujc Niguii, rnibeä dxej ni rusilajztu.

*Niguii ni nabijdz* naani

(Mt. 12:9-14; Mr. 3:1-6)

<sup>6</sup> Che goj<sub>l</sub> stee dxej ni rusilajz rexpej<sub>n</sub> Israel, biu'ni ne<sub>n</sub> te guidobäz, dxejc guslojni caguluiini rebej<sub>n</sub>. Lagajc ro'c sobga' te dade' ni nabijdz naani ladbee. <sup>7</sup> Dxejc remastr xten leii näjza refarisee cagula'tzreni te don la susiaj<sub>n</sub>i bej<sub>n</sub>ga dxej ni rusilajzreni, sa'csi caguiilreni xho gucuaquijreni Jesús. <sup>8</sup> Niluxh laani naj<sub>n</sub>ni xhi xhigab cayujnreni, dxejc guniini lo dade' ni nabijdz naani, räjpni:

—¡Huisulii! ¡Gudaa nez galäiire!

Dxejc huisulii bej<sub>n</sub>ga, gubigni lojni. <sup>9</sup> Dxejc räjp Jesús lojreni:

—Rlazä guiniabdixä lojtu dee: ¿Xhini'c najc huen gunni che rajl dxej ni rusilajznu? ¿La te dzunsa'c o la te dzunguijdx? ¿La gacnäj<sub>n</sub>u bej<sub>n</sub> laa xcäl<sub>n</sub>abaj<sub>n</sub>ni o la gudzucajnu yäl<sub>n</sub>abaj<sub>n</sub>ni, ä?

<sup>10</sup> Che gulujx bahuii Jesús loj guiraa rebej<sub>n</sub> ni tre' guideb gabini, räjpni loj bej<sub>n</sub> ni nabijdz naani:

—¡Baslii naalu!

Dxejc bej<sub>n</sub>ni si'c, luxh biacgajc naani. <sup>11</sup> Dxejc bidxechduxh rebej<sub>n</sub> ni tre' ro'c, gusloj canabdiid<sub>x</sub>reni lo sa'reni xhi gunnäjreni Jesús.

*Gule Jesús guitzubitio'p* rexpej<sub>n</sub>pacni

(Mt. 10:1-4; Mr. 3:13-19)

<sup>12</sup> Ne<sub>n</sub> redxejga, huij Jesús loj te daj<sub>n</sub> te huininäj<sub>n</sub>i Xtadni Dios. Ro'c gudejdni yääl cabedx-canabni lo Dios. <sup>13</sup> Che bianij lo yuj, gurejdxni rexpej<sub>n</sub>ni. Ro'c guleni tzubitio'preni te gacreni xpej<sub>n</sub>pacni. Gulälaj<sub>n</sub>ireni reapost. <sup>14</sup> Renani guleni najc Simón ni gulälaj<sub>n</sub>i Pedr; Andrés, bejtz Simón; Jacob; Juan; Felipe; Bartolomé; <sup>15</sup> Mateo; Tomás; Jacob xi'n Alfeo; Simón ni nagab loj rexpen cananista; <sup>16</sup> Judas, bejtz Jacob; näjza Judas Iscariote ni guto' Jesús loj rebixhojz.

*Ruluii Jesús xhidajl* bej<sub>n</sub>

(Mt. 4:23-25)

<sup>17</sup> Che biätnäj Jesúsreni yejc dajnga, guzudxireni yejc te danbäz sa'csi suga' xhidajl bej<sub>n</sub> ro'c. Siäädreni guiraa nez reguedx Judea, näjza guedx Jerusalén näjza reguejdx ni tre' gajx nisdoo Tiro con Sidón. Rebej<sub>n</sub>ga bidzuj<sub>n</sub>reni te gucuadijg<sub>n</sub>reni xtidx Jesús, te gusiajczanireni xcäl<sub>r</sub>acxhuureni. <sup>18</sup> Guiraa ni rdejdzä trabajw yu' be<sub>n</sub>dxab ne<sub>n</sub> lastooreni näjza reni'c biajc. <sup>19</sup> Guiraa rebej<sub>n</sub> r<sub>l</sub>ajz caan Jesús, sa'csi rusiaj<sub>n</sub>i guiraareni con xcäl<sub>r</sub>rneeni.



*Balijdx Jesús rebejn*

(Mt. 5:1-12)

<sup>20</sup> Dxejc bahuui Jesús loj rexpejn<sub>pacni</sub> räjpni lojreni:

—Chicbaatu, bejn nani xheti xhixtentu, sa'csi xtentu najc cadro rnibee Dios xhaguibaa.

<sup>21</sup> 'Chicbaatu, bejn nani calaan naj, sa'csi suniidx Dios lojtu nani rniabtu.

'Chicbaatu, bejn nani roon naj sa'csi susiäjl Dios lajztu dxejcru suxhijztu.

<sup>22</sup> 'Chicbaatu, bejn nani rdxechlajz bejn lojtu, rbääreni la'tu te laad, rniyajreni la'tu, luxh rbälazreni lajtu si'c te cos guijdx sa'csi rililajztu xtidx Xi'n Dios ni gujc Niguii.<sup>23</sup> Colguibalajz nen redxejga, na'c gac-huin lastootu sa'csi sunidxduxh Dios xhi xtentu xhaguibaa. Sigajcza basacsí retoxtadgoldooreni rebejn nani gunii xtidx Dios galoo.<sup>24</sup> 'Probe'zatu, la'tu benrajp, sa'csi agojptu xcäl'nasa'ctu, xcäl'rbalajztu lo guedxliujre.<sup>25</sup> 'Probe'tu nani rajp guiralajz xhixtentu naj, sa'csi sidejdtu yäl'rliaan.

'Proobzatu ni ruxhijztu naj, sa'csi sonduxhtu sidejdtu yäl'huinduxh, yäl'nalas.

<sup>26</sup> 'Probe'tu palga rliä'p rebejn xpala'ntu naj, sa'csi si'c bejn retoxtadgoldooreni rebejn ni gunii didx-xhii lacuaa niniireni xtiidxpac Dios.*Chanälajzni rebejn* nani rdxe'ch lojni

(Mt. 5:38-48; 7:12)

<sup>27</sup> Räjpszani:—La'tu ni cacuadiajgtu rextidxä rniä diidxre lojtu: colchanälajz rebejn ni rdxe'ch lojtu, colyujn dzunsa'c loj rebejn ni rdxechlajz lojtu. <sup>28</sup> Benle' yejc rebejn ni rgube la'tu. Gunab lo Dios xcuent rebejn ni rcuaquij la'tu. <sup>29</sup> Palga yu' chu rlajz quiin te laad lojlu, badeedza stelaad quiinni. Palga yu' chu gudzucaj xhablojiaalu, badeedza näj xcamangwlu xca'ni. <sup>30</sup> Xhitis ni guiniabreni lojlu, badeedni; ni gudzucaj te xhi xtenlu lojlu, na'c guiniabsacluni lojni. <sup>31</sup> Sigajc ni rlajzlu gunnäj bejn la'tu, si'cza la'tu colyennäj bejn.<sup>32</sup> 'Palga la'tu sanälajztistu rebejn nani sanälajz la'tu, xlia'sini, sa'csi sigajcza rujn rebendojl. <sup>33</sup> Palga guntu hueen lojtis rebejn ni rujn hueen lojtu, xhet laadi cayujntu, sa'csi sigajcza rujn rebejn ni nabajn nen dojl. <sup>34</sup> Palga gudedlaatu lojtis reni rujntu xhigab gunidxsacni lojtu, ¿xhi cos hueen rchalotu rujntu? Ni rebendojl rudedlaazareni loj rebejn ni najnreni siguixsac ni nasääbreni. <sup>35</sup> La'tu, nanab chanälajztu rebejn ni rdxe'ch lojtu, guntu hueen lojreni, gudedlaatu loj rebejn, na'c gunlojtu xcasactu recos ni rudedlaatu, te si'c guroob gac nani guzalajz Dios lojtu; te si'c gactu xi'n Gueb Dios ni nabajn xhaguibaa. Sa'csi si'cza najc Dios huenduxh loj reni di gudeed xquixtios lojni, näjza loj rebendojl. <sup>36</sup> Colgulaslajz resa'tu si'c rulaslajz Xtadnu Dios guiraa rebejn.*Colgulaslajz sa'tu*

(Mt. 7:1-5)

<sup>37</sup> Räjpszani:—Na'c guntu yälguxhtis nani rujn bejn, naatu xhet laadi rujnni; te na'cza gun Dios yälguxhtis rextojltu. Na'c gucuaquijtu bejn te sigajcza di Dios gucuaquij la'tu. Colgusiäjl-lajz dojl ni rujn sa'tu, te si'cza gusiäjl-lajz Dios rextojltu. <sup>38</sup> Colgudeed loj bejn ni rquiinreni te si'cza guzalajz Dios ni rquiintu. Suniidxreni xca'tu te mediid guidxadoo, sibetijp ni yu' nenni, cupe'tlini gusal'reni nen xpolstu. Dios suniidx lojtu lagajc con mediid ni rudeedtu loj rebejn.<sup>39</sup> Guniiza Jesús stee cuent räjpni:—¿La sajz guluii te ben lotiä'p nez yuj lo stee ben lotiä'p, ä? ¿La di guiro'preni guitejb nen te gueed, ä? <sup>40</sup> Te bejn ni casieed di gacdi guisieedruni loj ni najn xmastrni. Te bejn, che agulujx bisieedni, sajcn si'cni najc mastr xtenni.<sup>41</sup> '¿Xhicuent cahuiilu guixhe' ni yu' baloj bejtzlu, luxh dilu fii yagro ni yu' balojlu?<sup>42</sup> O, ¿xho mood gäblu lo bejtzlu: “Guidon cuää guixhe' ni yu' balojlu”; luxh dilu gacbee

yu' te yagro balojlu, ä? ¡Benguijdx! Guläxгаа yagro ni yu' balojlu, dxejc sajc fisa'clu te cuäälü guixhbäz ni yu' baloj bejtzlu.

*Ninexhsa'c ni rcaj loj te yajg sujn gumbeeni yajg*

(Mt. 7:17-20; 12:34-35)

<sup>43</sup> Räjpzani:

—Xheti te yagsa'c ni rudeed ninejxh ni xhet sajcđi, xhetiza te yajg ni xhet sajcđi ni rudeed ninexhsa'c. <sup>44</sup> Sa'csi tebgaj reyajg ruseñlojni xhi yajgni xcuent ninejxh ni rcaj lojni. Di bejn gutie' iigw lo reyaguejch, diza bejn gutiu' uub lo te yag balagrejñ. <sup>45</sup> Rebeñsa'c rnii didxsa'c, sa'csi xhigabsa'c yu' neñ lastooni. Niluxh rebenguijdx rnii ganax didxguijdx sa'csi xhigabguijdx yu' neñ lastooni, sa'csi ro'ni rnii nani yu' neñ lastooni.

*Tio'p bejn ni benchee tio'p yu'*

(Mt. 7:24-27)

<sup>46</sup> Räjpzani:

—¿Xhicuent rniitu loä: “Dad, Dad,” luxh ditu gun nani rniä guntu? <sup>47</sup> Guiniä lojtu chuni'c najc si'c bejn ni riääd loä, rucuađajgni xtidxä luxh rusoobni xtidxä. <sup>48</sup> Najcni si'c te bejn ni benchee rolijzni, ganid gudääñni jiät, dxejcti bejnñi cimient yejc te guilaj. Cheni biäjt nisro ro' gueuu, bidijn nisro cuä' yu'ga, luxh nicla nusniibnini, sa'csi yu'ga sobgadzu'tz yejc te guilaj. <sup>49</sup> Niluxh reni rcuađajg xtidxä, dxejc direni guzoob xtidxä, najcreni si'c te bejn ni bejn xyu'ni loj yujxh, dini niujñ cimient xten yu'ga. Dxejcti biäjt nisro, bidijnñi cuä' yu'ga, dxejc li gurebä'n yu'ga, gunitlojtini.

## 7

*Basajc Jesús xmos te beñ roman ni rnibee*

(Mt. 8:5-13)

<sup>1</sup> Che gulujx gunii Jesús loj rebejn, huijni te guejdx ni laa Capernaum. <sup>2</sup> Ro'c yu' te beñ roman ni rnibee, yu' te mos lojni, luxh sanälazduxhni mosga. Cayacxhuduxh mosga, ameerli guetni. <sup>3</sup> Che biejn diajg capitán cagusä'treni Jesús, baxhalgajcni gaii bengool lo rexpejn Israel te chagajñreni Jesús jiädni te gusajcni xmos dade'ga. <sup>4</sup> Che gubigreni loj Jesús, gusloj gunabduxhñeni lojni, räjpñeni lojni:

—Dade're najc beñsa'c, nungäjñ gacñäjñluni <sup>5</sup> sa'csi sanälajzni lajdx rexpejn Israel, luxh lagajc laani gunibee guc-chee xquidobäznu.

<sup>6</sup> Dxejcti huinä Jesúsreni. Cheni siäddzungajxhñeni royu', baxhal capitánga gaii xamiigwni, gäbreni loj Jesús:

—Si'c naj capitán: “Di rlazä gutalä xtzuunlu. ¿Chu narä te jiu'lu rolizä? Xhet sacädi. <sup>7</sup> Ni'c dina niapä baloor te lagajc narä niädganä guejblu, sa'csi rajplu yälñribeduxh niluxh narä rut nacädi. Ni'cni gunibeetis jiajc xmosä, luxh laani siacgajcni. <sup>8</sup> Sa'csi narä nacä xmos rebejn ni rnibee, luxh rnibeäza loj resoldaad. Che gäpä lo tejni: Huij rec, rijni; che gäpä loj steeni: Gudaa ree, riädni; che gäpä loj xmosä: Bejn dee, rungajcñini.”

<sup>9</sup> Che biejn diajg Jesús rediidxre, bixeloduxhñi, gubiréni loj rebejn ni siädñajñni, räjpñeni lojñeni:

—Rñiliápac lojtu, nicla lo rexpejn Israel gajdna guidxälä te bejn ni rililajzduxh si'c ni rililajz capitánre.

<sup>10</sup> Che gubi' rebejn ni huij loj Jesús rolijz capitán, bahuiireni abiajc xmosni.

*Baspañsac Jesús xi'n te gunabiuud*

<sup>11</sup> Neñ redxejga, huij Jesús te guejdx ni laa Naín. Huinäni rexpejnñpacni näjza xhidajñ bejn ni sanajñni. <sup>12</sup> Che bidzujñni gajxh ro' guejdxga, bahuiini sacua'tzreni te bengut, te bi'n ni najc xtebtis xi'n te gunabiuud. Xhidalduxh bejn sacua'tzñi. <sup>13</sup> Che bahuii Jesús loj gunabiuudga, biani nane'ga, räjpñeni lojni:

—¡Na'c roonlu!

<sup>14</sup> Dxejc gubig Jesús lo rebejn ni sanä bengutga, dxejc guzudxi reni nuu bengutga. Dxejc räjp Jesús loj bengutga:

—¡Bi'n!, narä rniä lojlu; ¡Huistie!

<sup>15</sup> Dxejc huistie bengutga, sobga'ni guslojni caniini. Dxejc badeed Jesúsni lo xnanni.

<sup>16</sup> Che bahuiireni xhini'c gujc, bidxejbreni, bidxeloduxhreni, guslojreni calä'preni xpala'n Dios, räjpreni:

—Te niguisacduxh ni rnii xtidx Dios abidzujn nez loonu.

Caniizareni:

—Lagajc Guejb Dios abiädhuii rexpejñni.

<sup>17</sup> Dxejc bire'ch diidx xcuent Jesús guideb nez reguedx Judea näjza guiraa reguejdx ni tre' nejzga.

*Xpejn Juan ni rutiobnis huinabdiidx loj Jesús*

*(Mt. 11:2-19)*

<sup>18</sup> Rexpejñpac Juan ni rutiobnis bij rediidxga lojni che yu'ni latzguiib. <sup>19</sup> Dxejc baxhalni gaiireni lo Jesús te sanabdiidxreni: “¿La guliipac najclu Crist ni jiääd o sibäjznu chu stee bejn, ä?” <sup>20</sup> Dxejcti gubig rexpejn Juan loj Jesús, räjpreni:

—Juan ni rutiobnis baxhal nuurnu te guiniabdiidxnu lojlu: “¿La luj najc Crist ni jiääd o la sibäjznu chu stee bejn?”

<sup>21</sup> Lagajc dxejc che bidzujñreni, basiajc Jesús xhidajl bejn ni rajc garen-garen yälguijdx, ni yu'za rebenđxab lastooreni, basiajczani baloj ni di fii. <sup>22</sup> Dxejcti badzu' Jesús diidxre, räjpni:

—Colchaye'tz lo Juan guiraa ni abahuiitu näjza ni abiejn diajgtu. Colye'tz lojni: “Relotiä'p ruhuisac; rebencoj rsiasa'c; reben ni ral guejdx tiejxhni, abiajc tiejxhni; rediagcua't riensac diajgreni; rebenğut, agubansacreni; luxh loj rebenproob nani cabäjz xcälracnäj Dios riejn diajgreni rsiule' xtidx Dios xcuent xho laa bejn lo dojl. <sup>23</sup> Chicbaa nani rumbee narä, nani di cuälaz narä.”

<sup>24</sup> Cheni sii rexpejn Juan, gusloj Jesús caniini xcuent Juan loj rebejn, räjpni:

—¿Chuni'c huihuiitu nez lo reyubijdz? ¿La te nijt ni rusniib bej, ä? <sup>25</sup> ¿Xhini'c huihuiitu? ¿Te bejn ni sucheduxh, ä? La'tu najntu rebejn ni sucheduxh näjza reni nabaṅsa'c, rolijz rerei yu'reni. <sup>26</sup> ¿Chuxhni'c biriitu huihuiitu? ¿Te niguii ni rnii xtidx Dios, ä? O'n, rniliä lojtu, luxh te ni sacduxhru loj guiraa reniguii ni rnii xtidx Dios. <sup>27</sup> Juan najc niguii ni ruzä't rexquijtz Dios cadre caj scree:

Narä guxhalä te niguii nani guinii xtidxä, te nidni lojlu, te laani guzucheeni xnezyujlu nez lojlu.

<sup>28</sup> Rniliäpac, loj guiraa rexingaan regunaa, nicla tejni gajd guiricaj ni najc te bensacduxhru nez loj Dios si'c najc Juan ni rutiobnis. Niluxh nani guxiiru sajc lo xcälrnibee Dios ni jiääd, sajcruni loj Juan.

<sup>29</sup> Che biejn diajg rebejn näjza reni rusquijx impuest rextiidxni xcuent Juan, gubeerene rujn Dios yälğuxhtissa'c, sa'csi abatiobnis Juanreni. <sup>30</sup> Niluxh refarisee näjza rebejn ni ruluii leii gulälazreni nani niujn Dios par laareni, sa'csi direni nicäjb nutiobnis Juanreni. <sup>31</sup> Räjpza Jesús lojreni:

—¿Xhocha guiniä najc rebejn nani tre' naj? <sup>32</sup> Najcreni si'c rebiuxbäz nani rguijt nez lo guii cadre rdo', rbedxa'reni loj sa'reni, rniireni: “Bielnu te bizej te guya'tu, niluxh ditu nuya'. Bielzanu te dij ni nabaduxh dxejcti dizatu nioon.” <sup>33</sup> Sa'csi che biääd Juan, dini niauxha't, dizani niä' bin, luxh räjpju: “Yu' benđxab lastooni.” <sup>34</sup> Dxejcti biälä narä, Xi'n Dios ni gujc Niguii, rauä, rä'ä. Dxejc räjpju: “Bahuiilaare, dade're rauxha't, rä'zani, najcni xamiigw rebenđojl näjza rebejn ni rusquijx reimpuet xten gubier.” <sup>35</sup> Ni'cni xcälñajn Dios huenliisi rienloj loj dzuun ni rujn rebejn ni najn.

*Jesús huij rolijz Simón ni najc farisee*

<sup>36</sup> Dxejc tej refarisee gunii loj Jesús, räjpni:

—Jiäädlu rolizä te guidaunu.

Dxejc huij Jesús rolizni, ro'c gurejni lo mex. <sup>37</sup> Rbäjz te gunagubejxh lo guejdxga. Che biejn diajgni satajw Jesús rolizj fariseega, bidzunnäjni te bo't guidxa se't nejxh, luxh bo'tga najc si'c onix, botsa'cni. <sup>38</sup> Che biu' gunaaga, bidzujjni lo ni' Jesús, guslojni cayoonni. Con nisbee caguiibni ni' Jesús, dxejc caguspjdzni ni'ni con xquidxejnci. Dxejc bachagro'ni ni'ni bazaazani setnejxhga ni' Jesús. <sup>39</sup> Che bahuii farisee ni gurejdx Jesús rolizni, recosre, bejn ni xhigab: “Palga gulii najc niguiire Xi'n Dios, sacbeeni chu najc nájza xho najc gunaare ni cagajn ni'ni, sacbeezani najcni te gunadojduxh.” <sup>40</sup> Dxejc gunii Jesús loj fariseega, räjpnj:

—Simón, yu' xhi rlazä guiniä lojlu.

Dxejc räjpnj fariseega lojni:

—Guniini, Dad mastr.

<sup>41</sup> Dxejc räjpnj Jesús lojni:

—Tio'p bejn nazäab meel lo te bejn ni rudedlaa meel. Tej reni nazäab si'cti gaiigayuu meel. Steeni nazäab si'cti tiubitzuu meel. <sup>42</sup> Cheni di niajcdi niguijxreni xti'nreni, basiäl lajzni xti'n guiro'preni. Naj gunii loä, ¿chu tejreni sianälajzru dade'ga, ä?

<sup>43</sup> Badzu' Simón diidxre lojni, räjpnj:

—Rchaloä bejn ni nazääbru lojni.

Dxejc räjpnj Jesús:

—Laaca rniilu.

<sup>44</sup> Dxejc gubiré Jesús, bahuiini loj gunaaga. Dxejc räjpnj loj Simón:

—¿Bahuii loj gunaare! Che biu'ä rolizlu, dilu nuniidx nis te nidiib ni'ä. Per gunaare gudibnäjni ni'ä nisbee ni birii balojni, dxejc baspijdzni ni'ä con xquidxejnci. <sup>45</sup> Dilu nuchagro' narä, luxh laani cheli biu'ä ree, gajdni cuääz guchagro'ni ni'ä. <sup>46</sup> Dilu nusäl se't yecä, niluxh laani basälni se't ni rlianexhduxh ni'ä. <sup>47</sup> Ni'cni rniä lojlu, dojl xten gunaare, luxh xhidalduxh najcreni, abadzucaj Dios redojlga sa'csi huenliisi sanälajzni Dios. Luxh rebejn ni rudzucaj Dios guxii xtojlreni, guxiiza sanälajzreni Dios.

<sup>48</sup> Dxejcti räjpnj loj gunaaga:

—Agubicaj rextojllu.

<sup>49</sup> Dxejc rebejn ni sobga' lo mex con laani, che biejn diajgreni rediidxre, gusloj canii lo sa'reni, räjpreni:

—¿Chuchani'c najc niguiire, ni'cni rudzucajlini xtojl bejn, ä?

<sup>50</sup> Räjpnj Jesús loj gunaaga:

—Agulaalu lo xtojl lu sa'csi ahuililajzlu; huij naj, bascuexi lajzlu.

## 8

### *Regunaa ni gucnäj Jesús*

<sup>1</sup> Dxejcti gusloj huij Jesús guiraa reguejdx nájza rerench, cagusule'ni xtidx Dios, caguluiini xcuent xcälrnibee Dios loj rebejn. Sanäni rexpejn pacni <sup>2</sup> nájza gaii gunaa ni abasiajnci, agulääni rebendxab lastooreni, nájza basiajnci xcälgujdxreni. Tej ni laa Marii ni laaza Magdalen, ni gulää Jesús gajdz bendxab nen lastooni. <sup>3</sup> Stee gunaa laa Xuan, ni najc chääl Chuza, ni ruhuii xhixten Herodes. Stee gunaa laa Susan. Guyu'za sgaii gunaa. Guiraa reni'c rudeed lagajc xhixtenreni te rio' recos ni rquiinreni.

*Xcuent bejn ni rbe'c binij*

*(Mt. 13:1-9; Mr. 4:1-9)*

<sup>4</sup> Dxejcti bire' xhidajl bejn lojni ni birii xhidajl reguejdx. Lojreni gunii Jesús con te cuent ni ruluii, räjpnj:

<sup>5</sup> —Birii te bejn sale'c binij. Cheni cabe'cni binij, yu' binij ni bitejb cuä' nezyuj. Che sadejd rebejn baläjreni yejc binijga, biäädza remane' ni rutajt xhaguibaa, gudajwrenini. <sup>6</sup> Yu'za lajt bitejb binijga nen reguij cadro xheti xhidajl yuj. Che gulejn binijga, gubidzgajnci sa'csi xheti xcojp ro'c. <sup>7</sup> Yu'za lajt bitejbni nez nen reyaguejch. Che gulejn, di reyaguejch nusaan niroob gäjlgä. <sup>8</sup> Yu'za lajt bitejb binijga lo yusa'c, ro'c gucduxhni. Cheni guroobni, yu' binijga gujc te gayuu xob loj teja binij ni gule'c dade'ga.

Che gulujx guniini scree, dxejc guniini dip räjpni:

—Palga sajc gucuadiajgtu rediidxga, colcuadiagsa'cni.

*Xhicuent gunii Jesús recuent*

(Mt. 13:10-17; Mr. 4:10-12)

<sup>9</sup> Dxejcti gunabdiidx rexpejn̄pacni lojni räjpreni:

—¿Xhi säloj cuentre?

<sup>10</sup> Dxejc räjpni lojreni:

—Lojtu ni najc rexpejn̄ä suniidx Dios yäl̄naj̄n te gacbeetu reyäl̄xhiga'tz xten xcäl̄rnibeeni. Loj chutis stee bejn̄, siniä recuent lojreni te mase cadxelojreni, direni fisa'c, luxh mase cacuadiajgreni, direni gacbesa'c.

*Rusule' Jesús xcuent ni rbe'c binij*

(Mt. 13:18-23; Mr. 4:13-20)

<sup>11</sup> Räjpszani:

—Scree säloj cuentre, rebinīj najc si'c xtidx Dios. <sup>12</sup> Binij ni biajb lo nezyuj najc si'c rebejn̄ ni rucuadiajg xtidx Dios. Dxejc riäd̄d bendxab, riäd̄dzucajni rediidxga lastooreni te na'c chalilajzreni xtidx Dios, te na'cza laareni lo dojl̄. <sup>13</sup> Binij ni biajb nen̄ reguij najc si'c rebejn̄ ni rucuadiajg xtidx Dios, rbaalajzreni; per sa'csi xheti xlobaareni, näl̄ajznu, direni gandzu'tz xtidx Dios, rililajzreni te bo'c, per che rsacsí rebejn̄reni, rbäl̄azreni xtidx Dios. <sup>14</sup> Binij ni biajb nen̄ reyaguejch najc si'c rebejn̄ ni rucuadiajg xtidx Dios, per lāl̄ ni sanuureni xnejzreni, rijia'nreni lo recos guedxliuj, lo yäl̄nasa'c ni ruhuiireni, näjza rujn̄reni si'ctis ni rlajz tiejxhreni. Reni'c rujn̄ runijtreni xtidx Dios, ni'cni direni guzooob xtidx Dios, direni chanuu te gunreni xtzunsa'c Dios. <sup>15</sup> Binij ni riajb lo reyusa'c najc si'c rebejn̄ nani rucuadiajg xtidx Dios, ni rililajz diidxga guideb te lastoya ni najc hueen. Randzu'tzreni xtidx Dios, dxejc rudeedreni te yäl̄nasa'c, nalajznu ruzoobreni xtidx Dios, rujn̄reni xtzunsa'c Dios.

*Xhet yu'di ni naga'tz par tejpas*

(Mr. 4:21-25)

<sup>16</sup> Räjpszani:

—Ruti te bejn̄ ni rucuaguuj te bajl dxejc rusäuni te caj yejc bajlga, dizani gusujnini dejt̄z te loon. Alga rusoobnini nen̄ candilieer loj te mex te guzanījni guideb nen̄ yu'ga te reni jiu' fiireni lo bajlga. <sup>17</sup> Xhet yu'di ni yuchetzu'tzdi ni di guidzuj̄n̄ dxej guiluiini; xhet yu'diza ni naga'tz naj̄ ni di guidzuj̄n̄ dxej gacbee bejn̄ni.

<sup>18</sup> 'Ni'cni colcuadiagsa'c diidx; sa'csi guiraa rebejn̄ ni rajp yäl̄racbee, sajprureni yäl̄naj̄n. Luxh reni di ninuu nucuadiajg xtidx Dios, lojni sibicaj näj ni abacuadiajgni, ni rchaloni naj̄ni.

*Xnan Jesús con rebejt̄zni*

(Mt. 12:46-50; Mr. 3:31-35)

<sup>19</sup> Dxejc bidzuj̄n̄ xnan Jesús näjza rebejt̄zni cadre suga'ni, niluxh di niajcdi nibigreni lojni sa'csi tre' xhidalduxh bejn̄ ro'c. <sup>20</sup> Dxejcti huisa'n te bejn̄ diidx loj Jesús, räjpni:

—Xnan guejblu näjza rebejt̄z guejblu suga' rolä', luxh rlajzreni fiireni lo guejblu.

<sup>21</sup> Badzu' Jesús diidxre lojreni, räjpni:

—Xnanä näjza rebetzä najc rebejn̄ ni rucuadiajg, ni ruzoobza xtidx Dios.

*Basiacdx̄i Jesús te beduxh*

(Mt. 8:23-27; Mr. 4:35-41)

<sup>22</sup> Te dxej biu' Jesús näjza rexpejn̄pacni nen̄ te barcw. Dxejc räjpni lojreni:

—Colcho' stelaad ro' nistre.

Basyu'reni barcw lo nis, sä'tireni. <sup>23</sup> Cheni sadejdreni galäīi nisga, gudiejs Jesús nen̄ barcw. Dxejc gubi' te beduxh lo nisga, luxh sa'csi lacti nadip ro' bejga, gusloj cayu' nis nen̄ barcw, ameerli jääz barcwga lo nis. <sup>24</sup> Dxejcti huicuäänreni Jesús, räjpreni lojni:

—¡Mastr! ¡Mastr! ¡Cayääznu lo nis!

Che gubaj<sub>n</sub>ni, huistieni, dxejc gudidxa'ni lo bejga näjza lo nis ni cayäsjaaa. Dxejc guläjz bejga, guredxiza nisga. <sup>25</sup> Dxejc räjpni lojreni:

—¿Con xcälirililajztu, ä?

Per laareni bidxejbreni, bidxeloduxhreni, canabdiidxreni lo sa'reni:

—¿Chuni'c najc niguiire te rnibeeni bej näjza nis, luxh rusobdiajg bej näjza nis xtiidxni?

*Te be<sub>n</sub> Gadara ni guyu' rexsprit be<sub>n</sub>dxab lastooni*

*(Mt. 8:28-34; Mr. 5:1-20)*

<sup>26</sup> Bidzujntireni lo yuj xten Gadara ni tre' stelaad ro' nis nez loj reyuj xten Galilee. <sup>27</sup> Cheni biäjt Jesús ne<sub>n</sub> barcw baläjni lo yuj, gubig te bej<sub>n</sub> ni siääd guejdxga lojni. Agujc xchej yu' rebe<sub>n</sub>dxab ne<sub>n</sub> lastooni. Dini gacw xhajnbi, dizani cuääz ne<sub>n</sub> yu', alga rbäjzni cadro yu' rebaa. <sup>28</sup> Che bahuiini loj Jesús bazuxhijbni nez lojni, guredxa'ni räjpni:

—¿Xhicuent riädchu'lu loonu, luj, Jesús Xi'n Gueb Dios ni rbäjz xhaguibaa? Rniabduxhä lojlu, na'cru gusacsflu nuurnu.

<sup>29</sup> Guniini rediidxre sa'csi canibee Jesús guirii rebe<sub>n</sub>dxabga ne<sub>n</sub> lastoo bej<sub>n</sub>re. Agujc xchero cazob rniaaz rebe<sub>n</sub>dxabga bej<sub>n</sub>ga ruliib rebej<sub>n</sub> ni'ni, naani con cadenguiib te guilibdzu'tzni, te xhet gundini bej<sub>n</sub>. Niluxh laani rutiugya'ni recaden, dxejc rebe<sub>n</sub>dxabga rinärenini nez lo reyubijdz. <sup>30</sup> Jesús gunabdiidx lojni, räjpni:

—¿Chu laalu?

Dxejc badzu'ni diidxre loj Jesús räjpni:

—Legión najc laä.

Si'c guniini sa'csi xhidalduxh najc rebe<sub>n</sub>dxab ni yu' ne<sub>n</sub> lastooni. <sup>31</sup> Dxejc gunabduxhreni loj Jesús na'c guxhalsacnireni cadro biriireni. <sup>32</sup> Lagajc dxejc suga' xhidajl cuch cayajwreni guixa' lagajc nejzga lo te bala'. Dxejc gunab rebe<sub>n</sub>dxabga loj Jesús te gusaanni jiu'reni ne<sub>n</sub> recuchga. Che cuäj<sub>n</sub> Jesús, <sup>33</sup> birii rebe<sub>n</sub>dxabga ne<sub>n</sub> lastoo dade'ga, biugajczeni ne<sub>n</sub> recuchga. Che biu'reni ne<sub>n</sub> recuch, baxu<sub>n</sub> recuchga bitejbreni ro' te bala', dxejc biajbreni lo nis, ro'cti gujtreni.

<sup>34</sup> Baxu<sub>n</sub> reni cayajp recuchga che bahuiireni xhini'c gujc ro'c, huisa'nreni diidx lo rebenguejdxga näjza lo rebe<sub>n</sub> rench. <sup>35</sup> Dxejc biädhuui rebej<sub>n</sub> xhini'c gujc ro'c. Che bidzujntireni cadro suga' Jesús, bahuiireni loj bej<sub>n</sub> ni birii be<sub>n</sub>dxab lastooni. Sobga'ni cuä' ni' Jesús, najcwni xhajnbi, luxh xhetru rajcdi yej<sub>n</sub>ni; dxejc bidxebduxh rebej<sub>n</sub>ga. <sup>36</sup> Sas reni bahuiloj xho guj<sub>n</sub>ni, bijreni diidx xho basiaj<sub>n</sub> Jesús bej<sub>n</sub> ni guyu' rebe<sub>n</sub>dxabre lastooni. <sup>37</sup> Dxejc guiraa rebe<sub>n</sub> Gadara näjza reguejdx ni tre' nejzga, gunabreni jiunejz Jesús ro'c sa'csi cadxebduxhreni. Ni'cni biu' Jesús ne<sub>n</sub> barcw te gubisacni nejz cadro siäädni. <sup>38</sup> Dade' ni birii rebe<sub>n</sub>dxab lastooni gunabni lo Jesús gusaanni chanajlnini, niluxh Jesús gunibee jia'nni, räjpni lojni:

<sup>39</sup> —Gubi' rolijzlu te güilu diidx recosro ni bej<sub>n</sub> Dios xcuent luj.

Dxejc sääni, batie'chni diidx guideb lo guejdxga xhi bennäj Jesúsni.

*Xindxa'p Jairo näjza te gunaa ni gudajn xhajn Jesús*

*(Mt. 9:18-26; Mr. 5:21-43)*

<sup>40</sup> Che gubi' Jesús stelaad nis, bibalajz rebej<sub>n</sub> gubi'ni, sa'csi cabäjzpacreni guibisacni. <sup>41</sup> Dxejc bidzuj<sub>n</sub> te bej<sub>n</sub> ni laa Jairo, ni rnibee te guidobäz, bazuxhijbni nez loj Jesús, gunabni chanänini rolijzni <sup>42</sup> sa'csi yu' tejtis xindxa'pni. Yu'ni tzubitio'p ijz, luxh cayacxhuuni, ameerli guetni. Lalsi sää Jesús rolijzni, birinajl xhidalduxh bej<sub>n</sub>ni, catäälirenini.

<sup>43</sup> Loj rebej<sub>n</sub>ga nadxaag te gunaa ni agujc tzubito'p ijz cayacxhuuni, cayajcni yälguidxbäii. Xlia'si abanijtni guiraa xhixtenni cua' renani rujn remeed. <sup>44</sup> Gubig gunaaga dejt<sub>n</sub> Jesús te gudaj<sub>n</sub>ni ro' xhajnbi. Lagajc dxejc biacgajcni.

<sup>45</sup> Dxejcti gunabdiidx Jesús räjpni:

—¿Chuni'c najc ni gudajn narä, ä?

Guiraa rebej<sub>n</sub> räjp:



—Dinu gan.

Räjpza Pedr:

—Mastr, ni yu'lu galäii reben<sub>n</sub> xhidajl, luxh cagutäälireni luj. ¿Xhicuent rniabdiidxlu: “¿Chu gudajn narä?”

<sup>46</sup> Räjppac Jesús lojni:

—Yu' chu gudajn narä, sa'csi gucbeä yu' chu basiajc xcäl<sub>n</sub>rñibeä.

<sup>47</sup> Che gucbee gunaaga anajn Jesús gudajnni xhajnbi, bidxejbni, racsejslini gubigni loj Jesús, bazuxhijbni lojni. nez loj guiraa rebejn<sub>n</sub> räjpni xhicuent gudajnni xhajnbi näjza xho biacgajcni.

<sup>48</sup> Dxejc räjp Jesús lojni:

—Huij. Gulecdxilajzlu, xinda'pä. Abiajclu sa'csi huililajzlu.

<sup>49</sup> La<sub>n</sub>ni canii Jesús si'c bidzuj<sub>n</sub> te bejn<sub>n</sub> ni siäd roliz Jairo, ni rnibee te guidobäz. Räjpni loj Jairo:

—Agujt xindxa'plu. Na'cru gutajllu xtzuum Dad Mastr.

<sup>50</sup> Che biejn diajg Jesús rediidxga, räjpni loj Jairo:

—Na'c guidxejblu. Huililajztis te jiac xindxa'plu.

<sup>51</sup> Che bidzuj<sub>n</sub>reni rolizni, xtebtis Pedr, Jacoob, Juan näjza xcuzajn dxape'ga biunäjni nen<sub>n</sub> yu'ga. Peta rebejn<sub>n</sub> ni siädnajlni bia'nreni rolä'. <sup>52</sup> Cayonduxh guiraa rebejn<sub>n</sub> ni sobga' nen<sub>n</sub> yu'. Dxejc Jesús räjp lojreni:

—Na'c roontu, gajd dxape're guet, nagayejstisni.

<sup>53</sup> Alga baxhiznäjnreni, sa'csi anajnreni agujt dxape'ga. <sup>54</sup> Dxejcti gunaaz Jesús naa dxape'ga, dip guniini, räjpni lojni:

—jDxape', huistie!

<sup>55</sup> Dxejc gubansac dxape'ga, huistiegajcni. Dxejc gunibee Jesús gudeedreni xhi gauni.

<sup>56</sup> Bidxeloduxh rexcuzajnni. Per gunibee Jesús na'c güireni diidx xhini'c gujc ro'c.

## 9

*Ruxha* Jesús guitzubitio'p rexpejn<sub>n</sub>pacni

(Mt. 10:5-15; Mr. 6:7-13)

<sup>1</sup> Batie' Jesús guitzubitio'p rexpejn<sub>n</sub>pacni te badeedni yäl<sub>n</sub>rñibee lojreni te cuääreni reben<sub>n</sub>racxhuu. <sup>2</sup> Baxha<sub>n</sub>ireni te gusule'reni diidx xcuent xcäl<sub>n</sub>rñibee Dios näjza te gusajczeni reben<sub>n</sub>racxhuu. <sup>3</sup> Dxejc räjpni lojreni:

—Xhet chanäditu lo nejz, nicla baston, nicla bols, nicla yätxtiil, nicla meel; na'cza chanätu tio'p xhajtbtu; tejtisni chanätu. <sup>4</sup> Chutis roliz bejn<sub>n</sub> cadre guidzujntu, ro'c coljia'n cheni guiriilitu lo guejdxga. <sup>5</sup> Palga direni gusaan jiu'tu rolizreni, che jiunejztu lo guejdxga, colcuijb guxhuj ni'tu si'c te seen direni nililajz xtiidxtu.

<sup>6</sup> Dxejc biriireni sääreni garen-garen reguejdx, cagusule'reni xtidx Dios, cagusiajczareni reben<sub>n</sub>racxhuu cadrotis rdzuj<sub>n</sub>reni.

*Xho gujt Juan ni rutiobnis*

(Mt. 14:1-12; Mr. 6:14-29)

<sup>7</sup> Che biejn diajg Herodes ni rnibee guiraa ni cayujn Jesús, guyu'ni yärsia', dini gan xho gunni xhigab, sa'csi yu' reni canii laa Juan ni agubansac lo rebengut. <sup>8</sup> Sgaiireni canii abaluiloj Elías. Yu'zareni canii pet laa stee niguii ni gunii xtidx Dios galoo ni agubansac.

<sup>9</sup> Per räjp Herodes:

—Lagajc narä gunibeä biru' yejc Juan ni rutiobnis, ¿chuchani'c najc niguiire ni riejn diagä xhidajl didxro xcuentni?

Dxejc rlajzpac Herodes fii lojni.

*Bayaan Jesús gaii mi* bejn<sub>n</sub>

(Mt. 14:13-21; Mr. 6:30-44; Jn. 6:1-14)

<sup>10</sup> Che gubi' rexpejn<sub>n</sub>pacni, bijreni diidx loj Jesús xhini'c bejnreni. Sas huinä Jesúsreni te lajt cadre ruti bejn<sub>n</sub>, gajxh te guejdx ni laa Betsaida. <sup>11</sup> Che gucbee rebejn<sub>n</sub> caro sääreni,

huinajlrenini bidxälrenini. Che siädreni lojni huichaglojnireni, sas gusloj cagusule'ni lojreni xcuent xcälrnibee Dios. Basiajczani rebejn ni cayacxhuu.

<sup>12</sup> Che gusloj cayääz gubijdx, gubig rexpejn<sub>pacni</sub> loj Jesús, räjpreni lojni:

—Gojs loj rebejnre, agojl jiireni te chatiilreni xhi gaureni, näjza cadre tedreni guxhijn lo rerench, neñ reguedxbäz, sa'csi ree xhet yu'di.

<sup>13</sup> Dxejcti räjp Jesús loj rexpejn<sub>pacni</sub>:

—¡La'tu colgudeed xhi gaureni!

Dxejc räjpreni lojni:

—Xhet rajpdinu, gaiitis yätxtiil näjza tio'p bäjl. Ni'ctis yu' palga dinu chasiiru xhi gau reben<sub>re</sub> xhidajlre.

<sup>14</sup> Luxh najc rebejn<sub>ga</sub> si'cti gaii miñ niguii. Dxejc räjp Jesús loj rexpejn<sub>pacni</sub>:

—Colyejtz lojreni cuereni xcua-xcuaareni, si'cti tiuubitzugajreni te cuaa.

<sup>15</sup> Si'c bejnrenini, sas gurej guiraa rebejn<sub>ga</sub> si'c. <sup>16</sup> Dxejc cua' Jesús gaii yätxtiilga näjza tio'p bäjlga, guläsni lojni xhaguibaa, badeedni xquixtios lo Dios xcuent yälrajwga. Che gulujx badeedni xquixtios gula'ni reyätxtiilga näjza rebäjlgga, dxejc sanuutis badeednini loj rexpejn<sub>pacni</sub> te gudisrenini loj rebejn<sub>ga</sub>. <sup>17</sup> Guiraa reben<sub>re</sub> xhidaalga gudajw, gudxaj xque'reni. Dxejcti batojpreni ni bia'n bachajreni tzubitio'p dxijm yätxtilbiujy näjza bälbiujy ni bia'n.

*Gunii Pedr Jesús najc Crist*

(Mt. 16:13-19; Mr. 8:27-29)

<sup>18</sup> Te dxej lañi cabedx-canab Jesús lo Dios, xtebni näjza rexpejn<sub>pacni</sub>, gunabdiidxni lojreni, räjpni:

—¿Chuni'c rnii rebejn<sub>re</sub> nacä?

<sup>19</sup> Dxejc räjpreni lojni:

—Yu'reni rnii najclu Juan ni rutiobnis; yu'zareni rnii najclu Elías; sgaiireni rnii najclu stee niguii ni gunii xtidx Dios galoo ni agubansac.

<sup>20</sup> Dxejc gunabdiidxni lojreni, räjpni:

—¿La'tu a? ¿Chuni'c rniitu nacä?

Dxejc räjp Pedr lojni:

—Luj najclu Crist Xi'n Dios ni cabääznu.

*Jesús rnixgaa xho guetni*

(Mt. 16:20-28; Mr. 8:30-9:1)

<sup>21</sup> Dxejc gunibee Jesús lojreni, räjpni:

—Na'c gäbtu si'c lo rebejn<sub>re</sub>.

<sup>22</sup> Räjpszani lojreni:

—Nanab ted Xi'n Niguii trabajwduxh; rebengool xten guidoo, näjza rebixhojz, näjza rebejn<sub>re</sub> ni ruluii xleii Moisés sibälazreni narä, naareni dina gacä Crist ni cabääznu. Sugu'treni narä Xi'n Dios ni gujc Niguii, niluxh sibansacä ni riojn<sub>re</sub> dxej.

<sup>23</sup> Dxejc räjpni loj guiraareni:

—Palga chu tejt<sub>re</sub> r<sub>re</sub>lajz guirinajl narä, nanab jiällajzni xhixt<sub>re</sub>nni, te guixe-guixee guntisni nani gudedä gunni. <sup>24</sup> Sa'csi nani r<sub>re</sub>lajz guiniazdzu'tzni xcäl<sub>re</sub>nabaj<sub>re</sub>nni, sunij<sub>re</sub>t<sub>re</sub>ni yäl<sub>re</sub>nabaj<sub>re</sub> lo Dios; luxh nani runij<sub>re</sub>t<sub>re</sub> xcäl<sub>re</sub>nabaj<sub>re</sub>nni xcuent xtidxä, sica'ni yäl<sub>re</sub>nabaj<sub>re</sub> par tejpas. <sup>25</sup> Sa'csi ¿xhi gaan gun te bejn<sub>re</sub> palga xca'ni guideb guedxliuj, luxh gunij<sub>re</sub>t<sub>re</sub>ni xcäl<sub>re</sub>nabaj<sub>re</sub>nni lo Dios? <sup>26</sup> Niluxh nani g<sub>re</sub>it<sub>re</sub>uinäj narä näjza xtidxä, sigajcza narä, Xi'n Dios ni gujc Niguii, situinäzani cheni jiälä si'c reii guideb yäl<sub>re</sub>rdimbicha' xten X<sub>re</sub>tadä näjza rexang<sub>re</sub>lni. <sup>27</sup> Guliipac rniä lojtu, yu' gaii reni suga' ree, ni di guet, suhuixgaareni xcäl<sub>re</sub>rnibee Dios.

*Bachaa xho rluiloj Jesús*

(Mt. 17:1-8; Mr. 9:2-8)

<sup>28</sup> Gudejdti xhuj<sub>re</sub> dxej gunii Jesús diidxre, dxej<sub>re</sub>cru huinä Jesús Pedr näjza Jacobob näjza Juan, huijreni jiaa yej<sub>re</sub> te daj<sub>re</sub>n te guredx-gunabni loj Dios. <sup>29</sup> Lañi cabedx-canab Jesús lo

Dios, bidxaa xho rului lojni; dxejc xhajbni gujc nolbäj, rdimbicha'lini. <sup>30</sup> Biricajza tio'p dade' caninäjnreni. Redade'ga najc toMoisés näjza Elías. <sup>31</sup> Rdimbicha'za redade'ga. Caninäjnreni Jesús xcuent xho guetni guedx Jerusalén. <sup>32</sup> Luxh Pedr näjza resa'ni guyuduxh bacal lojnreni; che bire'ch bacal lojnreni bahuiireni lo yäldimbicha' xten Jesús näjza loj guiro'p redade' ni caninäjni. <sup>33</sup> Cheni agojl jiunejz redade'ga loj Jesús, räjp Pedr loj Jesús:

—Dad, Mastr, huenduxh suga'nu ree. Basaan jiencheenu choṇ yue', tejni par luj, tejni par Moisés, steeni par Elías.

Luxh di Pedr gaan xhini'c caniini. <sup>34</sup> Laṇni caniini si'c, bire' te za gusloj cayäjt yejcreni, dxejc bidxejbreni che biu'reni neṇ zaga. <sup>35</sup> Dxejcti bejn diajgreni neṇ zaga te xse' te ni gunii, räjpni:

—Dee najc Xi'nä ni sanälazä, colcuadiajg xtiidxni.

<sup>36</sup> Che gulujx guniini rediidxga, bahuiireni sugaxteb Jesús. Dxejc niäutis ro'reni neṇ redxejga, rut lojdi bijreni diidx xcuent ni bahuiireni ro'c.

*Basijc Jesús te biuux ni guyu' beṇdxab lastooni*

(Mt. 17:14-21; Mr. 9:14-29)

<sup>37</sup> Barayääl cheni biäjtreni yejc dajnga, xhidalduxh bejn cabäjz Jesús. <sup>38</sup> Dxejcti te dade' ni nadxaag rebejnṅa guredxa'ni, räjpni loj Jesús:

—Mastr, balaslajz narä, gudahuii xi'nä, sa'csi xtebtisni najcni xinganä. <sup>39</sup> Luxh beṇdxab rniaazni, sas ruscuedxa'nini, rajcni si'c yälguidxbej, rbääni bitzun ro'ni, rusacsíduxhnini, luxh dini gusaanni. <sup>40</sup> Agunabä loj rexpejnṅpaclu nibääreni beṇdxabga, luxh di niajcdini.

<sup>41</sup> Dxejc badzu' Jesús diidxre, räjpni:

—jBejn ni di chalilajz, beṅguijdx! ¿Gucli chunäätu, gucli gunä huant la'tu? jGudanä xi'nlu ree!

<sup>42</sup> Dxejc che cabig biuuxga lojni, basälta' beṇdxabga biuuxga lo yuj, sas gusloj cayajcni si'c yälguidxbeduxh. Dxejc gudidxa' Jesús loj beṇdxabga, basiacgajcni biuuxga, dxejc badeednini lo xtadni. <sup>43</sup> Guiraa rebejn bidxeloduxh yälrnibeduxh xten Dios.

*Rni Jesús stehuält xho guetni*

(Mt. 17:22-23; Mr. 9:30-32)

Laṇni cadxeloj rebejn lo recos ni bejn Jesús, räjpni loj rexpejnṅpacni:

<sup>44</sup> —Colcuadiajgsa'c rediidxre, na'cza jällajztureni, sa'csi sutedreni narä Xi'n Dios ni gujc Niguii ladzṅaa rebejn.

<sup>45</sup> Niluxh di rexpejnṅpacni niacbee xhi säloj rextiidxni, sa'csi Dios bacua'tznini lojnreni te di niacbeerenini. Bidxejbzarenini niniabdiidxreni loj Jesús xhi säloj rediidxga.

*Chuni'c sajcru*

(Mt. 18:1-5; Mr. 9:33-37)

<sup>46</sup> Guslojza rexpejn Jesús canabdiidx lo sa'reni:

—¿Chuchani'c sajcru loonu?

<sup>47</sup> Per gucbee Jesús xhi xhigab cayujnreni. Dxejc cua'ni te biuxbäz, bazujnini cuä'ni, <sup>48</sup> räjpni lojnreni:

—Chutis ni xca' te biuxe' sa'csi sanälajzni narä, naräni rca'ni luxh ni rca' narä, rca'ni xtadä ni baxhaṇ narä. Ni najc maazru nadolajz lojtu, ni'c najc ni sajcru.

*Nani di guiniyaj nuurnu, xladnu yu'ni*

(Mr. 9:38-40)

<sup>49</sup> Dxejc räjp Juan loj Jesús:

—Mastr, bihuiinu loj te bejn ni rbää rexpeṇdxab neṇ lastoo bejn con xcälrnibee lajlu. Dxejc rie'tznu lojni na'cru gunni si'c, sa'csi dini sanäj nuurnu.

<sup>50</sup> Dxejc räjp Jesús lojnreni:

—Na'c gudxojtuni, sa'csi nani di guiniyaj nuurnu, xlaadnu yu'ni.

*Jesús gudidxa' loj Jacoob näjza Juan*

<sup>51</sup> Che siäddzujn redxej ni chää Jesús xhaguibaa, bejn ni xhigab chääpacni guedx Jerusalén. <sup>52</sup> Baxhalni gaii bejn gunijd lojni chääreni te guejdx xten Samaria te satiilreni cadro jia'nreni ro'c. <sup>53</sup> Luxh rebejn samaritan di rlajzreni gudedlaareni te lajt cadro jia'nreni, sa'csi najnreni chääreni guedx Jerusalén. <sup>54</sup> Che biejn diajg Jacoob näj Juan, tio'p xpejn pacni, si'c, sas räjpreni loj Jesús:

—Dad, ¿La rlajzlu guinibeenu jiäjt guiboo xhaguibaali te guze'cni guiraa rebenguejdxga si'cni bejn Elías?

<sup>55</sup> Dxejc bahuui Jesús lojreni, gudidxa'ni lojreni, räjpni:

—Ditu gaan chuni'c rnibee lastootu. <sup>56</sup> Sa'csi narä Xi'n Dios ni gujc Niguui dina niälä te gudzucaä xcäl nabajn rebejn. Narä biälä te guslääreni lo dojl.

Dxejcti huijreni garenca guejdx.

*Reni rlajz nirinajl Jesús*

(Mt. 8:19-22)

<sup>57</sup> Lalni sääreni lo nezyuj, biäd te bejn gunii loj Jesús, räjpni:

—Dad, narä rlazä jiädnalä guejblu cadrotis chää guejblu.

<sup>58</sup> Dxejc badzu' Jesús diidxre lojni, räjpni:

—Rebäjz rajp xpiliääreni, remane' ni rutajt rajp xpitiääzreni, niluxh narä Xi'n Dios ni gujc Niguui, dina gapä nicla te lajt cadro guscugä yecä.

<sup>59</sup> Dxejcti räjp Jesús lo stee bejn:

—Gudanajl narä.

Luxh laani räjpni:

—Dad, basaan suchacua'tz xgaä xtadä, dxejcru jiädnalä guejblu.

<sup>60</sup> Dxejc räjp Jesús lojni:

—Basaan suchacua'tz rebejn ni najc si'c bengut, resabengutreni. Per luj, huij, huisule' diidx xcuent xcäl rnibee Dios.

<sup>61</sup> Dxejc räjp steeni lojni:

—Dad, rlazä jiädnalälu, niluxh basanxgaa chasadixä resa'ä ni tre' rolizä.

<sup>62</sup> Dxejc räjp Jesús lojni:

—Nani ruzuj naani yejc garaad, dxejc rudzuré lojni ruhuiini nez dejtzn di gacdi gunni dzuun lo xcäl rnibee Dios.

## 10

*Ruxhal Jesús regayonbitzoo*

<sup>1</sup> Che gulujx reni'c, gule Jesús gayonbitzoo bejn, baxhalnirenio tio'pgajreni te basnijdnirenio lojni loj reguejdx cadro nanab tedni. <sup>2</sup> Räjpni lojreni:

—Guliipacni, cayacduxh cose'ch, niluxh guxii najc rebejn ni gun dzuun gutie'nini. Ni'cni colguiniab lo baxhuaan xten cose'ch te guxhalni xhidajlru bejn ni gun dzuun gutie' xcose'chni. <sup>3</sup> Colchäj la'tu; colhuii xho ruxhalä la'tu si'c xiil galäii recuyo't sa'csi sunnäjreni la'tu si'ctisni rlajzreni. <sup>4</sup> Na'c chanätu ngodx, niclaza guijxh, niclaza xcura'chtu, luxh na'c sudxitu guininäjtu bejn lo nejz. <sup>5</sup> Cheni jiu'tu roliz te bejn, ganiddoo colye'tz: “Sucuedxilajz reni rbäjz ree.” <sup>6</sup> Palga najcni te bejn ni rdxagljaz yälrbecdxilajz sia'n xcälrbecdxilajz ro'c, luxh palga dini gac, sibi' xcälrbecdxilajz lojt. <sup>7</sup> Coljia'n lagajc roliz bejn cadro guidzujntu. Ro'c coltajw, colyä'za xhitis ni guniidxreni, sa'csi nani rujn dzuun, riäjł xca'ni xcuent dzuunga. Coljia'n tejtis lajt dxejtis ni chutu lo guejdxga. <sup>8</sup> Xhitis te guejdx ni jiu'tu, palga jiurenio la'tu, colgajw xhitis ni guniidxrenio lojt. <sup>9</sup> Colgusajc rebenracxhuu ni yu' ro'c, colye'tz lojreni: “Abidzujngajxh xcäl rnibee Dios.” <sup>10</sup> Palga jiu'tu te guejdx cadro di rlajzrenio gucuadijgrenio xtiidxtu, colrii lo nezyuj, ro'c colye'tz lojreni: <sup>11</sup> “Guxhuj xten lajdxtu ni rcay ni'nu, rudzu'nuni nez lojt si'c te seen sa'csi ditu nililajz xtiidxnu. Colgacbee dee, abidzujngajxh xcäl rnibee

Dios lojtu.” <sup>12</sup> Ni'cni rniliápac lojtu, che gac fis xten Dios, nalasru gac fis xten Dios lo guejdxga loj ni gujc guedx Sodoma ni guyu' galoo.

*Reguejdx ni di niu xtidx Jesucrist*

(Mt. 11:20-24)

<sup>13</sup> Rájpzani:

—¡Probe'tu beñ guedx Corazín! ¡Probe'zatu beñ guedx Betsaida! Paru nuhúii rebenzijt ni gubajñ guedx Tiro nájza Sidón remilaagwr ni benä nez lojtu, pet gucli nusiechlajzreni, niajcwreni ladnagas, nibejzarení lo cobdáj si'c te seen abasiechlajzreni. <sup>14</sup> Che gun Dios fis rextojl rebeñ guedxliuj, guxiiru gac xfis Dios lo rebenzijt ni gubajñ guedx Tiro nájza Sidón. Fisroru gun Dios reguedx Corazín nájza Betsaida. <sup>15</sup> Luxh luj guedx Capernaum, rchalolu siájslu xhaguibaa, alga siajblu gabijlli, cadre gaclu fisro xten Dios.

<sup>16</sup> Rájpzani lo rexpeñpacni:

—Ni riu xtiidxtu, laa xtidxä ni riuni. Nani di jiu xtiidxtu, laa xtidxä ni dini jiu. Luxh ni di jiu xtidxä, laa xtiidx ni baxhal narä ni dini jiu.

*Rbi' regayonbitzúu*

<sup>17</sup> Che gubi' regayonbitzúu beñ nani baxhal Jesús, rbaduxh lajzreni, rájpreni:

—Dad, nájza rebenxab rusobdiajg xtiidxnu che rusä'tnu lajlu.

<sup>18</sup> Rájps Jesús lojreni:

—O'n. Ni'cni narä bahuiä che gunijt xcälrnibee beñdxab, bitejbni xhaguibaa si'c bianij xten guzii. <sup>19</sup> Colgacbee. Narä runidxä yälrnibee lojtu te guläjtu yejc bäl nájza yejc naxejb; runidxäza yälrnibee te guntu gaan lo xcälrnibee beñdxab. Xhetliidi gun daan la'tu. <sup>20</sup> Na'c guibalajztistu sa'csi rusobdiajg rebenxab xtiidxtu; colguibalajzru sa'csi acuaj lajtu lo xquijtz Dios xhaguibaa.

*Bibalajz Jesús*

(Mt. 11:25-27; 13:16-17)

<sup>21</sup> Lagajc dxejc bibalaznáj Jesús Sprit Dxan xten Dios, dxejc rájpní lo Dios:

—Rliä'pä xpala'nlu Xtadä ni rnibee xhaguibaa nájza guedxliuj, sa'csi bacua'tzlu xnezyujlu lo reben nanduxh, per baluülu xnezyujlu loj rebeñ ni najc nadolajz si'c te biuxbáz. O'n, Xtadä, sa'csi si'c rlanjzlu gunlu.

<sup>22</sup> 'Guiraa recosre abaniidxlu loä Xtadä. Dadtis najn chuni'c najc Xi'nni, rutru najndi chu najcni. Rutza najndi chuni'c najc Guejblu Xtadä, xtebtis narä ni najc Xi'nlu, con rebeñ ni rlazä gumbee luj.

<sup>23</sup> Dxejc bahuii Jesús loj rexpeñpacni, rájpní lojtisreni:

—Chicbaa la'tu nájza renani ruhúii guiraa nani cahuilojtu. <sup>24</sup> Sa'csi rniliä lojtu, balti redade' ni gunii xtidx Dios galoo, baltiza rereii rlanjz nuhúiiireni guiraa ni cahuilojtu, niluxh direni nuhúiiini. Rlanjzreni niejn diajgreni rediidxre ni cayejn diajgtu, luxh di diajgreni niejnii.

*Xcuent te beñhuen ni siääd Samaria*

<sup>25</sup> Dxejc huisulii te maestr xten leii, huininäjni Jesús, rlanjzni nuxhiidni Jesús lo xtiidxni, gunabdiidxni lojni:

—Dad, Mastr, ¿xhini'c nanab gunä te guibanñää Dios par tejpas?

<sup>26</sup> Sas rájps Jesús lojni:

—¿Xhini'c caj lo guijtz xten leii? ¿Xho rolluni?

<sup>27</sup> Dxejc badzu'ni diidxre, rájpní:

—Chanälajzlu Dad, Xtioslu guideb lastoolu, guideb xaimlu, guideb xtijplu, nájza guideb xcäriejnlu. Huinälajzza resa'lu si'ctis ni sanälajzlu lagajc luj.

<sup>28</sup> Dxejc rájps Jesús lojni:

—O'n, laaca rudzu'lu diidx. Palga gunlu si'c, sajplu yälñabajñre.

<sup>29</sup> Per maestr xten leii, rlanjzni nidedbiani ni'cni gunabdiidxni loj Jesús rájpní:

—¿Chuni'c najc resa'ä?

<sup>30</sup> Dxejc räjp Jesús lojni:

—Te beṅ laadxnu birii guedx Jerusalén, sääni guedx Jericó. Dxejc lo nezyuj biricaj gaii gubaan, gulajnreni guiraa xhixtenni, näjli xhajbni ni najcwni. Sas gudijnreneni, basa'nreneni ro'c, guxii cayäädx nugu'trenini. <sup>31</sup> Gudejd te bixhojz ni siääd laadxnu, sazaj lagajc nezyujga, cheni bahuiini lojni, alga gudejdni stee laad, sä'tini. <sup>32</sup> Gudejdza te levita, bejn ni rujnza dzuun neṅ guidoo. Che bidzujṅni cadro naga' bejṅga, gudejdni stelaad, sä'tini. <sup>33</sup> Dxejcti te beṅ Samaria, laṅni sääni biaj, gudejdni nezyujga, bidzujṅni cadro naga' bejṅga. Che bahuiini lojni, balaslajznini. <sup>34</sup> Gubigni loj bejṅga, basälṅni se't näjza bin loj bejn ni nadxälgujdx, dxejc batejbnini te la' lajd. Dxejc bascuibnini dejtz lagajc xmanni, huinänini cadro rudedlaareni yu', ro'c cuanäjnini. <sup>35</sup> Che bara yääl, guläani tio'p meel badeedni lo baxhuaan yu'ga. Dxejc räjpni: “Cuanälaa bejṅre; palga gunijtrulu, siguixätini lojlu che guibi'ä.”

Sä'tini.

<sup>36</sup> Dxejc räjp Jesús lo mastr xten leii:

—¿Chu tej lo guidxonṅ rebejṅga najc si'c sa' xten dade' ni biajb ladzṅnaa gubaan?

<sup>37</sup> Dxejc räjpni loj Jesús:

—Ni balaslajz bejṅga.

Dxejc räjp Jesús lojni:

—Huij te sigajcza chayejnlu.

*Bidzujṅ Jesús roliz Mart näjza Marii*

<sup>38</sup> Laṅni huinuu xnezyujni, bidzujṅni te guejdx. Ro'c bidxaagni te gunaa ni laa Mart ni huinänini rolizni. <sup>39</sup> Yu' te bäjl Mart ni laa Marii, luxh laani gurejni cuä' ni' Jesús te cacuadiajgni xtiidxni. <sup>40</sup> Mart cagusquejṅni cayujṅni xhi gaureni. Sas gubigni loj Jesús, räjpni lojni:

—¿La dilu jiu rusanxteb bälä narä te xtebä cayunä remandaad? ¿Gojs lojni gacnäjni narä!

<sup>41</sup> Dxejc räjp Jesús lojni:

—Mart, Mart, cayuduxhlu yärsia', riulu xhidajl cos, <sup>42</sup> luxh yu' tejtis ni nanabpac. Agule Marii ni najc huenru, rut sajcdi gudzucajnini lojni.

## 11

*Rului Jesús xho guiniabni lo Dios*

(Mt. 6:9-15; 7:7-11)

<sup>1</sup> Te huält cabedx-canab Jesús loj Xtadni Dios, suga'ni te lajt. Che gulujx cabedx-canabni, gunii te xpejṅpacni lojni, räjpni:

—Dad, baluii nurru xho cuedx-guiniabnu lo Dios, si'c baluii Juan ni batiobnis rexpejṅpacni.

<sup>2</sup> Dxejc räjp Jesús lojreni:

—Che cuedx-guiniabtu lo Dios, scree colṅni:

Xtadnu ni yu' xhaguibaa,

suchä'p xpala'nlu, sujiääd xcälṅnibeelu.

Sugac si'ctisni rlajzlu gac lo guedxliuj si'cpac rajcni xhaguibaa.

<sup>3</sup> Guira dxej baniidx xcu'nnu si'ctis ni rquiinnuni.

<sup>4</sup> Basiäjṅ lajzlu redojlṅ xtenu si'cni riäjṅ lajznu redojlṅ ni rujn rebejṅ loonu.

Na'c gusaanlu jiajbnu lo xcälṅnibee bendxab.

Basṅlaa nuurnu lo dojlṅ.

<sup>5</sup> Dxejc räjpza Jesús lojreni:

—Paru tejtü yu' te xamiigwni, luxh guidzujṅni rolizni garol yääl, gäbni: “Xamigwä, banidxlaa choṅ yätxtiil, <sup>6</sup> sa'csi bidzujṅ te xamigwä rolizä ni bazaj biaj, luxh xhet ra'pädi te gudedä xhi gauni.” <sup>7</sup> Xhixh sinii ni naga' neṅ xyu'ni, gäbni: “Na'c riädctie'chlu bacal loä. Niäu rolä' luxh rexi'nä naga' cuä'ä, digacdi chästieä te gunidxä xhi gunidxä lojlu.”

<sup>8</sup> Rniliä lojtu, mase dini chastie te gudeednini sa'csi najcni xamiigwni, sistieni, sudeedni



nani rquiintisni te na'cru gutie'chni bacadni. <sup>9</sup> Sigajcza rniä lojtu, palga guiniabtu xhi guiniabtu, sica'tuni. Palga chatiiltu xhi chatiiltu, sidxältuni. Palga chasejztu rolä', suxhalreni rolä' lojtu. <sup>10</sup> Sa'csi chutis ni rniab, rca'ni nani rniabni; chutis ni rguuil xhi cos, rdxälhini; nani rusejz rolä', suxhalzareni lojni.

<sup>11</sup> 'Paru tejtü ni najc dad, jiääd te xi'ntu guiniabni te yätxtiil lojtu, ¿la sudeedtu te guij, ä? O palga guiniabni te bäjl, ¿la sudeedtu te bäl, ä? <sup>12</sup> O palga guiniabni te tzutbejt, ¿la sudeedtu te naxejb, ä? <sup>13</sup> Palga la'tu, ni najc bendojl, rajc rudeedtu cossa'c loj rexi'ntu, aticaxh Dios ni yu' xhaguibaa sudeedni Sprit Dxan xtenni loj renani rniabni lojni.

*Rucuaquijreni Jesús, rniireni rajpni yälrnibee xten bendxab*

(Mt. 12:22-30; Mr. 3:19-27)

<sup>14</sup> Gulää Jesús te bendxabgop lastoo te bejn. Che birii bendxabga lastoo bejnga, guslogajc canii bejnga, dxejc bidxeloduxh reben xhidaalga. <sup>15</sup> Dxejc yu' reni räjp:

—Niguiire rbää rebendxab con yälrnibee xten Beelzebú ni rnibee loj rebendxab.

<sup>16</sup> Sgaiireni rlajz guquuilrenini, ni'c canabreni gunni te seen ni siääd xhaguibaali. <sup>17</sup> Niluxh laani gubeeni xhi xhigab cayujnreni dxejc räjpni lojreni:

—Xhitis gubieer ni rlia' sa'ni lo sa'ni, luxh tilnä j te cuaani stee cuaaga, di gaclaa sinijt gubierga lo guedxliuj. Palga te famil rdilnä j lagajc sa'ni, di gaclaa sinitloj familga. <sup>18</sup> Palga guiliä' sa' rebendxab, ¿xho mood chanuu xcälrnibeereni? Dee rniä sa'csi la'tu rniitu narä rbää rebendxab con lagajc yälrnibee xten Beelzebú. <sup>19</sup> Palga si'c najcni, ¿chuni'c rudeed yälrnibee loj rexpejntu te rbääreni bendxab? Lagajc laareni ruluii xhet laadi rujntu xhigab. <sup>20</sup> Palga narä rbää rebendxab con xcälrnibee Dios, ni'cni rululoj abidzujn xcälrnibee Dios lojtu.

<sup>21</sup> 'Cheni suga' te bendaan, ca'ni guuib, canäjni rolizjni, rutliidi ruhualdi rehxixtenni.

<sup>22</sup> Niluxh che jiääd stee ni nadipru lo bendaanga, rudxagdijlnini, rujnni gaanni, dxejc rudzucajni xquibni ni badeed yälbendaan lojni, dxejc sajc chanäni guiraa rehxixtenni.

<sup>23</sup> Reni xhet yu'di xladä, rdxe'chreni loä. Ni di gutopnä j narä, rutie'chni.

<sup>24</sup> Räjpzani:

—Cheni rii te bendxab nen lastoo te bejn, ricansajni nez lo reyubidz, caguuilni cadro gusilajzni. Che cad rdxäldini, rujnni xhigab, naani: “Guibisacä rolizä cadro biriä.”

<sup>25</sup> Cheni guibi'ni, rdxälni lastoo bejnga si'c te yu' ni entis gulujx bilioobni, suchesa'cni.

<sup>26</sup> Dxejcti rixiini sgajdz bendxab ni rujnru latsiaj lojni. Dxejc riu'reni nen lastoo bejnga, dxejc nalasru ria'n bejnga loj ni gujcni galoo.

*Chicbaa renani riu xtidx Dios*

<sup>27</sup> La j ni canii Jesús rediidxre, te nane' ni yu' lo reben xhidaalga dipli guniini, räjpni:

—¿Chicbaa nan ni biädñalu guedxliuj! Chicbaaza nani baslaa luj.

<sup>28</sup> Luxh laani räjpni:

—Xhet si'cdi najcni; chicbaaru rebejn ni rucua diajg xtidx Dios, ni ruzoobza xtiidxni.

*Rebenguijdx rniab te milagwr si'c te seen*

(Mt. 12:38-42; Mr. 8:12)

<sup>29</sup> Sanuutis cadojp rebejn gabi Jesús, dxejc guslojni caniini, räjpni:

—Rebejn ni yu' naj benguidxduhrene, rniabzareni te milaagwr si'c te seen; niluxh xhetru seendi fiireni, seentis xten Jonás, dade' ni gunii xtidx Dios galoo fiireni. <sup>30</sup> Lagajc si'c ni gujc Jonás te seen loj rebejn guedx Nínive, si'cza narä, Xi'n Dios ni gujc Niguii, gacä te seen lo rebejn ni nabajn naj. <sup>31</sup> Cheni guidzujn dxej ni gac fis sistie te nane' ni gujc rein lo reyuj ni tre' ladbä jgw, sucuaquijni rebejn ni tre' guedxliuj naj sa'csi laani biriini zitduxh te bacua diajgpacni yälñajn xten Salomón. Ree suga' galäiitu tej ni sacduxhru lo Salomón, <sup>32</sup> luxh ditu chalilajz xtiidxni. Rebejn ni gulä jz guedx Nínive sisiunä j rebejn ni nabajn naj nen redxer ni gac fis. Dxejc sucuaquijreni rebejn ni nabajn naj sa'csi laareni, che huinäli Jonás xtidx Dios lojreni, basiechlajzreni, basa'nreni xtojreni. Ni suga' lojtu naj sajcruni lo Jonás, niluxh ditu jiu xtiidxni.

*Ni rusanij xcäriejn bejn*  
(Mt. 5:15; 6:22-23)

<sup>33</sup> Räjpzani:

—Rut rucuaguijdi te bajl, te gusujnini te lat xhiga'tz, niclaza nen te caj. Susujni bajlga jiaa te rajc ruhuisa'c chutis ni riu' nen yu'. <sup>34</sup> Balojlu najc si'c bajl xten xcäriejnlu. Palga ruhuisa'c balojlu, guideb xcäriejnlu yu' si'c bianij. Palga rajc balojlu dilu fisa'c, guideb xcäriejnlu yu' si'c lo nacäyj. <sup>35</sup> Gunatiro te di gac xpianijlu yälñacäyj. <sup>36</sup> Palga guideb xcäriejnlu yu' bianijtis, xheti te lajt nacäyj, sajc fisa'clu guira'ti, si'c najc che rusanij te bajl nen yu'.

*Rucuaquij Jesús refarisee näjza rebejn* ni najn leii  
(Mt. 23:1-36; Mr. 12:38-40; Lc. 20:45-47)

<sup>37</sup> Che gulujx gunii Jesús, biädgajñ te farisee Jesús chääni rolizni te chatajwni. Sä'tireni. Che biu' Jesús, gurejni lo mex. <sup>38</sup> Bidxeloj fariseega sa'csi dini niguiib naani si'cpac caj lo xleii Moisés gunreni te gaureni, sa'csi rujnreni xhigab si'c racnayareni lo Dios. <sup>39</sup> Dxejcti räjp Jesús lojni:

—La'tu ni najc refarisee, rguibtu nez dejtz te bas näjza te pla't, niluxh la'tu guidxa lastootu yälgubaan näjza yällatsiaj. <sup>40</sup> ¡Ben nadduxh! ¿La ditu gacbee? Nani benchee dejtzni, bencheeza nenni. <sup>41</sup> Colyajc nadolajz, colyacnäj rebejn con ni rniitu, dxejc guiraa recos sajc naya par la'tu.

<sup>42</sup> ¡Probe'zatu, ben farisee! Rudeedtu lo Dios tej lo tejga tzuu ni rajptu: rudeedtu bedzxtiil näjza ruud, näj guiraa recuane' ni rajptu lo le', niluxh ditu jiu xcälguxhtis Dios näjza xcälñälajz Dios. Dee nanab guntu ganid, luxh na'cza gusaantu guntu ni alacayujntu par Dios.

<sup>43</sup> ¡Proobza la'tu reben farisee! Rchagljaztu rbejtu lo reyagxhil xten rebejn ni sajc nen reguidobäz; rchagljaztu saru rnii rebejn “xchan Dad” lojtu che rijtu lo guii.

<sup>44</sup> ¡Probe'zatu! La'tu najctu si'c rebaa ni di guzen, rsiaj rebejn yejc cadre naga'reni luxh direni gan.

<sup>45</sup> Dxejcti badzu' tej rebejn ni ruluii leii diidxre lojni, räjpni:

—Dad mastr, che rniilu rediidxre, rniyajlu nuurnu.

<sup>46</sup> Dxejc räjp Jesús lojreni:

—¡Probe'za la'tu rebejn ni ruluii leii! Sa'csi rnibeetu gun rebejn recos naganduxh ni najc si'c te cargw naduxh ni di gacdi guu bejn. Luxh la'tu di rlanjtu faltuni nicla con te bicuenabäztu.

<sup>47</sup> ¡Proobzatu! Sa'csi runcheetu xpaa redade' ni gunii xtidx Dios galoo, luxh najctu rexajg renani bagu't redade'ga. <sup>48</sup> Ni'cni najnpactu xhi gusajcreni, rchagljaztu redzuun ni bejn retoxtadgoldootu; si'cza gunnäjtu narä sa'csi laareni bagu'treni redade'ga, dxejc la'tu runcheetu xpaareni.

<sup>49</sup> Ni'cni gunii Dios, sa'csi yuduxh xcälñajnni, räjpni: “Suxhalä reniguii ni guinii xtidxä näjza reapost, luxh sugu'treni gaiireni, susacsízareni sgaiireni.” <sup>50</sup> Loj rebejn ni nabajn naj siniab Dios gudeedreni cuent xcuent xtiejn guiraa redade' ni gunii xtidx Dios ni bagu'treni cheni guc-cheeli guedxliuj. <sup>51</sup> Guislojni xtiejn toAbel, näjza xtiejnli Zacarías ni bagu'treni galäii nez lodxan nen guidoro. Ni'cni rniä lojtu, siniab Dios cuent xten xcälgujt guiraareni loj rebejn ni nabajn naj.

<sup>52</sup> ¡Probe'za la'tu, rebejn ni ruluii leii! Sa'csi rniitu la'tistu rajptu yälñajn, luxh di rlanjtu chalilajztu xtidx Dios, dizatu gusaan chalilajz rebejn ni rlanj chalilajz xtidx Dios.

<sup>53</sup> Cheni räjp Jesús rediidxre, bidxe'ch rebejn ni ruluii leii näjza refarisee lojni. Dxejc guslojreni canabdiidxreni xhidalduxh diidx, <sup>54</sup> te cagula'tzreni don la sajc guiga'ni lo xhitis te diidx ni guiniini.

<sup>1</sup> La<sub>l</sub> ni caniini, bidojp xhidajl mi<sub>l</sub> bejn ro'c, calaro'li sa'reni. Dxejc gusloj canixgaa Jesús loj rexpejn<sub>pacni</sub>, räjpni lojreni:

—Colnati levaduor xten refarisee, rusgueereni rniitisreni xhidajl diidx luxh direni gunni. <sup>2</sup> Sa'csi xheti xhi niäu lojni ni di guxal lojni luxh xheti xhi naga'tz ni di jienloj. <sup>3</sup> Ni'cni guiraa ni guniitu lo nacäy, sienni lo bianij xten dxej. Luxh ni gunii xhiga'tztu nen reyu' ni niäudzu'tz, sibedxa'renini rediidxga yejcli reyu'.

*Chuni'c nanab guidxejbtu*

(Mt. 10:28-31)

<sup>4</sup> Räjpszani:

—Rniä lojtu, xamigwä, na'c guidxejbtu rebejn ni sajc ju't tiejxhtu, dxejc xhetru sajcdi gunreni. <sup>5</sup> Guiniä lojtu chuni'c nanab guidxejbtu. Colguidxejb nani che abadzucajni yäl<sub>nabajn</sub> rajpni yäl<sub>rnibee</sub> gusal<sub>ni</sub> la'tu gabijl lo bajl ni cayejc par tejpas. Ni'csii colguidxejb.

<sup>6</sup> 'Anajntu sajc jio' gatii mane' tio'p melbäz, luxh di Dios jiällajz nicla tej remane'ga. <sup>7</sup> Rexquidxejcti abigab tebgajni. Na'c guidxejbtu; la'tu sajcrutu loj xhidajl remane'ga.

*Reni riembee Jesús nez loj rebejn*

(Mt. 10:32-33; 12:32; 10:19-20)

<sup>8</sup> Räjpszani:

—Rniä lojtu, guiraa rebejn nani rcäjp rililajzni xtidxä nez loj rebejn, narä Xi'n Dios ni gujc Niguü sicäpä najcni xpenä nez loj rexangl Dios. <sup>9</sup> Luxh reni di guicäjp rililajzni xtidxä nez loj rebejn, sigajcza sunnäáni nez loj rexangl Dios xhaguibaa.

<sup>10</sup> 'Chutis ni guinii te didxnaj xcuentä, susiäjllajz Dios laani. Niluxh chutis ni guiniyaj Sprit D<sub>xan</sub> xten Dios, di Dios gusiäjllajz xtojlni.

<sup>11</sup> 'Cheni chanäreni la'tu nez loj reben guidobäz o nez loj reguxhtis, na'c guntu xhigab xhi gudzu'tu diidx o xhini'c guiniitu, <sup>12</sup> sa'csi che guidzujn or ni guiniitu, Sprit D<sub>xan</sub> xten Dios suluüni xhini'c guiniitu.

*Reyäl<sub>nasa</sub>'c rusajb bejn nen dojl*

<sup>13</sup> Te niguii ni nadxaag rebejn xhidaalga räjpni loj Jesús:

—Dad, Mastr, gojs lo betzä guniidxni gala' xhixtenä ni basa'n toxtadnu loonu.

<sup>14</sup> Dxejc räjp Jesús lojni:

—Dade', ¿chuni'c gule narä gunä yäl<sub>guxhtis</sub> o gacä abogaad lojlu, ä?

<sup>15</sup> Dxejc räjsac Jesús lojreni:

—Colnatiro, colgantzu' te di r<sub>lajztistu</sub> ga'ptu yäl<sub>nasa</sub>'ctis sa'csi xcäl<sub>nabajn</sub> bejn dini gac yäl<sub>rajptis</sub> xhidajl xhi cos.

<sup>16</sup> Dxejcti bij Jesús te cuent, räjpni lojreni:

—Guyu' te be<sub>n</sub> rapduxh. Racduxh cose'ch lo rexcäjlni. <sup>17</sup> Dxejcti gusloj bejn<sub>ni</sub> xhigab: “¿Xhocha gunä? Dina gapä cadre cucheä recose'ch.” <sup>18</sup> Sas bejn<sub>ni</sub> xhigab: “Ananä xhini'c gunä. Gudzulä reyu' cadre r<sub>gucheä</sub> recose'ch, te gustiobä reyu'ga, te ro'c cucheä guiraa recose'ch näjza rehxixtenä.” <sup>19</sup> Dxejcti siniä lo lastoä: “Lastoä, agulucheelu xhidajl xhi cos, sajlni xhidajl ijz. Basilajz naj, gudajw, gu', bibalajz.” <sup>20</sup> Dxejc räjp Dios lojni: “¿Ben najd! Lagajc guxhij<sub>re</sub> siniabä xaimlu. ¿Dxejca'? ¿Chu xca' guiraa recos ni gulucheelu?” <sup>21</sup> Si'c sisiajc guiraa rebejn ni r<sub>guiiltis</sub> xcäl<sub>nasa</sub>'creni lo guedxliujre, niluxh xhet rajpdireni loj Dios.

*Rcanäj Dios rexi'nni*

(Mt. 6:25-34)

<sup>22</sup> Che gojl stera't, räjp Jesús loj rexpejn<sub>pacni</sub>:

—Ni'cni rniä lojtu, na'c rujntu xhigab xcuent xho guibajntu o xhini'c gautu te guibajntu, niclaza xcuent lajd ni gacwtu. <sup>23</sup> Yäl<sub>nabajn</sub> sajcruni lo yäl<sub>rajw</sub>; tiejxhni sajcruni lo lajd ni rajcw bejn. <sup>24</sup> ¿Colhuii rebaloo! Direni cue'c binij, dizareni gutojp cose'ch, dizareni ga'p nicla yu' nicla te cadre chuchee cose'ch, per rudeed Dios xhi

rajwreni. ¿La xhet sajcdirutu loj rebalooga, ä? <sup>25</sup> Luxh ¿Chu tejtü palga runduxhni xhigab sajctioobruni sgarol metr? <sup>26</sup> Palga di gacdi guntu nicla te cosbáz, ¿xhicuent ru'tu yärsia' xcuent xhi stee cos?

<sup>27</sup> ¡Colhüii xho rga' reguino'ch! Direni gun dzuun, dizareni gun lajd lo dzujb, luxh rniä lojtu, nicla reii Salomón con guiraa xcäl'nasa'cni, dini nisiuchee si'c rsiuchee reguiiga. <sup>28</sup> Palga rusuchee Dios recuaan ni rga' lo niaa, ni rial nadxej, luxh guixee-huijdx, che agubijdzni, rejcní lo däj, aticaxh Dios suniidx xhi gacw la'tu, ¡bejn nani guxii rililaj! <sup>29</sup> Ni'cni rniä na'c runtejtü xhigab xho quiiltu xhini'c gautu, xhini'cza yätu, na'c chutistu yärsia'. <sup>30</sup> Si'ctis rujn rebenguedxliuj guideb xtijpreni rguilreni rexhicosre. Niluxh xtadtu ni yu' xhaguibaa anajnni xhini'c rquiintu. <sup>31</sup> La'tu colquiiltis xcäl'rnibee Dios, dxejcti laani suniidxzani guiraa recos ni rquiintu.

*Yäl'nasa'c ni yu' xhaguibaa*

(Mt. 6:19-21)

<sup>32</sup> Räjpzani:

—La'tu ni najc rexilä'ä, na'c guidxejbtu, sa'csi rbaali lajz Dios, aguleni la'tu te la'tu guntu yäl'guxhtis lo xcäl'rnibeeni. <sup>33</sup> Colguto' xhixtentu, colgudeedni loj rebejn ni caquinduxhni, te si'c guntu te bols ni di jiuixh, te chu yäl'nasa'c nenni xhaguibaa cadro di gubaan jiu' niclaza xcabäj rexhicos. <sup>34</sup> Sa'csi cadro rajptu xcäl'nasa'ctu, ro'cza yu' lastootu.

*Nanab susintu*

<sup>35</sup> Räjpzani:

—¡Colsusin! ¡Colhualguj rebajl! <sup>36</sup> Colyujn si'c remos ni cabäjz guibi' xlamreni ni säa te sa', te cheni guibi'ni guxhalgajcreni rolä'. <sup>37</sup> Chicbaa remos ni susin che guibi' xlamreni. Rniliápac lojtu, lagajc xlamreni sajcwni xhajnbi sibe'cni rexmosni lo mex, dxejc lagajc laani sudeedni xhi gaureni. <sup>38</sup> Mase guidzujnni garol yääl, mase guidzujnni cäjyru, palga guidxälni arexmosni susin, ¡chicbaa remosga! <sup>39</sup> Colyacbeepac, paru gacbee baxhuaan xten yu' xhi or guidzujn gubaan rolizni, dini gusaan guxhalreni rolizni te cuanreni xhixtenni. <sup>40</sup> Näjza la'tu colsusin, sa'csi or ni ditu gun xhigab jiädni, sidzujn Xi'n Dios ni gujc Niguii.

*Te mos guijdx*

(Mt. 24:45-51)

<sup>41</sup> Dxejc gunabdiidx Pedr lojni, räjpní:

—Dad, ¿la lootisnu rujylo cuentre o la najcni par guiraa rebejn?

<sup>42</sup> Dxejc räjpn Jesús lojreni:

—¿Chuni'c najc mos hueen, mos nasin, ni rusannäj xlamni guiraa rexmosni te gudeedni xhi gaureni che gal oor, ä? <sup>43</sup> Chicbaa mosga palga laaca cayujnni che guibi' xlamni. <sup>44</sup> Rniliápac lojtu, lamga sudeed guiraa rexhixtenni te xcanäj mosgani. <sup>45</sup> Per palga gun mosga xhigab nen lastooni: “Saclaa guibi' xlamä”, sas guislojni gusacsíni resamosni, gunaa sigajc niguii, dxejc guisloj gauni, yäni, soozni; <sup>46</sup> sibi' xlamni te dxej ni xhet cabäjzdinini, or ni dini gun xhigab guidzujnni. Dxejc sii sudeedni te castigwro lojni, sutiäjlni te duu dejtzní dxejc sinibeeni jiini, guidxaagni rebejn ni di gusobdiajg diidx.

<sup>47</sup> Mosga ni najn xhini'c rlanj xlamni gac, luxh dini susin, dizani guzoob xtiidxní, sutiälduxhreni duu dejtzní. <sup>48</sup> Niluxh mos ni di gan xhi rlanj xlamni gac, ni'c rujnni redzuun ni di xlamni guidxagljaz gac, guxiiru castiigw gacni. Reni rca' xhidajl, xhidajlza riäjg gudeedreni; loj reni rca' yäl'rnibeduxh, xhiroobza siniabni lojni.

*Rlia' Jesús bejn lo sa'ni*

(Mt. 10:34-36)

<sup>49</sup> Räjpzani Jesús:

—Narä biälä te gucuaguiä guedxliujre; ¡malaii alagusloj cayejcni! <sup>50</sup> Niluxh nanab tedä te yäl'robnis ni säloj te trabajwduxh, ni'c cayuduxhä yärsia' cheni chale'lini.

<sup>51</sup> ¿La rujntu xhigab biälä te jiädnäá yälrbedxi loj guedxliuj, ä? Rniä lojtu, dini gac si'c. Alga biälä te guilia'ä bejn lo sa'reni. <sup>52</sup> Silia' sa' te famil; loj gaiireni, sidxe'ch chonreni loj tio'preni, luxh tio'preni sidxe'chza lo chonreni. <sup>53</sup> Silia' sa'reni; sidxe'ch dad lo xingaanni, luxh xingaanga sidxe'chza lo xtadni; nane' sidxe'ch lo xindxa'pni, luxh xindxa'pga sidxe'chzani lo xnanni; nansuegr sidxe'chni lo xculijzni, luxh gulijzga sidxe'ch lo xnansuegrni.

*Reseen xten retiemp*

(Mt. 16:1-4; Mr. 8:11-13)

<sup>54</sup> Caniiza Jesús lo reben xhidajlga, räjpni:

—Cheni rhuiitu räjs reza nez lad jiät, rniitu: “Siajb nisguij.” Luxh riabjni. <sup>55</sup> Che rbi' bej nez lad danbägw, rniitu: “Sacnala nadxej”, luxh si'c rajcni. <sup>56</sup> ¿Bejn ni rusguee! La'tu racbeetu xhi säloj reseem ni rien lo guedxliuj näjza xhaguibaa, ¿xhicuent ditu gan xhi säloj retiemp ni dxunnu naj, ä?

*Basiäj* diidx con rebejn ni rdxe'ch lojlu

(Mt. 5:25-26)

<sup>57</sup> Räjpzani:

—¿Xhicuent ditu quuil lagajc la'tu xhini'c najc hueen, xhini'c najc laaca te guntuni? <sup>58</sup> Sa'csi palga yu' chuni'c chale'c xquejlu lo guxhtis, lañi sanäni luj ro jusgaad, basiäj diidx con laani lo nejj, te na'c chanäni luj lo reguxhtis, sa'csi dxejc reguxhtis sutedreni luj lo reguixhajg te gusäureni luj nen latzguiib. <sup>59</sup> Luxh rniä lojlu, dilu guirii ro'c hasta gusa'lu quixlu guiraa lojreni.

## 13

*Colgusiejch lajztu te di guettu*

<sup>1</sup> Lagajc dxejc, gubig gaii reni huisa'nreni diidx loj Jesús xcuent gaii ben Galilee ni bagu't Pila't nen guidoo, bagu'chni xtiejnreni con xtiejn reman ni siädnäreni si'c gojn lo Dios. <sup>2</sup> Sas räjp Jesús lojreni:

—¿La rujntu xhigab si'c gusajc reben Galileega sa'csi najcrureni bendojl lo rebejn lajdxreni? <sup>3</sup> Narä rniä, dini gac si'c. Palga di'tu gusiechlajz sigajcza sejt guiragajctu. <sup>4</sup> O xcuent guitzumbichon rebejn nani gujt che gubixh te or ni laa Siloé yejcreni, ¿La rujntu xhigab najcrureni ben dojl lo rebejn ni rbäjz guedx Jerusalén, ä? <sup>5</sup> Narä rniä, dini gac si'c. Palga di'tu gusiechlajz, sigajcza sejt guiragajctu.

*Xcuent te yag iigw*

<sup>6</sup> Dxejcti gusloj bij Jesús te cuent ni ruluiini lojreni, räjpni:

—Te dade' gojp te yagiigw ni basujni lo xyujni. Sas huihuiini don la caj ninejxh lojni. Luxh xhet ninejxhdi bidxälni. <sup>7</sup> Dxejc räjpni loj bejn ni canäj xyujni, agujc chon ijz siädtilä ninejxh lo yajgre, luxh xhetini. Batin yajgre. ¿Xlia'si sujni lo yuj! <sup>8</sup> Luxh xmosni räjp lojni: “Dad, basaanni steb ijz, gusläá yuj ni'ni, gusälä abonni. <sup>9</sup> Palga xcaj ninejxh lojni steb ijz, laaca, palga dini xcaj, dxejc guitinnuni.”

*Rusiajc Jesús te gunaa*

<sup>10</sup> Te dxej ni rusilajz rexpejn Israel caguluii Jesús nen te guidobäz. <sup>11</sup> Ro'c suga' te nane' ni agujc tzunbichon ijz racxhuuni. Bendxab caguscoodni, niluxh di gacdi suliiini. <sup>12</sup> Che bahuii Jesús lojni, gurejdxnini, dxejc räjp Jesús lojni:

—Gunaa, abasaan yälguijdxga luj.

<sup>13</sup> Che basujni naani yejcnini, lagajc dxejc gujc gusulii nane'ga. Dxejc guslojni calä'pni xpala'n Dios. <sup>14</sup> Luxh dade' ni rnibee guidobäz bidxe'chni sa'csi basiajc Jesús nane'ga che najcni dxej ni rusilajzreni, ni'c gusloj cayäjpni loj rebejn:

—Xho'p dxej sajc gun bejn dzuun; nen redxejga sajc jiädtdu te jiajctu, per na'c jiädtdu dxej ni rusilajz rexpejn Israel.

<sup>15</sup> Dxejc badzu' Jesús diidxre, räjpni lojni:



—¡Ben rusguee! ¿La di chutis tejtú guxhec xconni o xpurni te chanänini yäni nis, mase najcni dxej ni rusilajz bejn, ä? <sup>16</sup> Luxh nane're najc te xagdoó toAbram, nani numbee Dios, ni agujc tzunbichon ijz baliib benḁxabni, ¿la digacdi guixecni lo xcälguijdxni mase najcni dxej ni rusilajz bejn, ä?

<sup>17</sup> Che gunii Jesús rediidxre, bianxtujy rebejn ni rdxe'ch loj Jesús, luxh rebenḁ xhidaalga cabalazduxhrenei sa'csi cayujn Dios redzunro nez lojrenei.

*Xcuent bedz muxhtas*  
(Mt. 13:31-32; Mr. 4:30-32)

<sup>18</sup> Ni'cni räjp Jesús lojrenei:

—¿Xhocha najc xcälrnibee Dios? ¿Xhicha cojn guiniä najcni tebloj? <sup>19</sup> Najcni si'c te bedz muxhtas ni rbe'c te bejn lo xyujni. Luxh che guiroobni, rajcni te yagro. Dxejc riääd remane' ni rutajt siädynunchee xpitiäazni loj rexhajcwni.

*Xcuent cojb ni rusaguij*  
(Mt. 13:33)

<sup>20</sup> Guniiza Jesús stehuält te gacbeerenei xho guire'ch rextidx Dios. Räjpni lojrenei:

—¿Xhicha cojn guntebloä xcälrnibee Dios? <sup>21</sup> Najcni si'c levaduú ni rugu'ch te gunaa lo chonḁ mediid arinḁ, luxh rusaguijni guiraa cojbga.

*Dää rolä' cadre jiu'ni xhaguibaa*  
(Mt. 7:13-14, 21-23)

<sup>22</sup> Huinuu Jesús xnejzni sääni guedx Jerusalén. Laḁni sadejdni reguejdx näjza rerench caguluiini rebejn. <sup>23</sup> Dxejc gunabdiidx te bejn lojni, räjpni:

—Dad, ¿la guxii najc rebejn ni caḁaa loj rextojḁrenei, ä?

Dxejc räjpni lojrenei:

<sup>24</sup> —Dää rolä' cadre jiu' bejn xhaguibaa. Ni'cni coltip lajztu te jiu'tu ro'c, sa'csi xhidajl bejn rlajz jiu'reni ro'c, niluxh direni gun gaan. <sup>25</sup> Cheni abasäu baxhuaan xten yu' rolä', dxejc la'tu ni suga' detz yu' guisloj gusejstu rolä', guiniitu: “Dad, baxhal-laa rolä’”, dxejc laani sudzu'ni diidx, siniini: “Dina ganä caro siäädту.” <sup>26</sup> Dxejc guislojtu guiniitu: “Bidxunnäänu, bidaunäänu, bidunnäänu luj, baseedlu nuurnu lo xnezyuunu.” <sup>27</sup> Dxejc siniini lojtu: “Rniliä lojtu, dipacnä gumbeä la'tu. Coljij guiraatu, benḁlatsiaj.” <sup>28</sup> Dxejcti sonduxhtu, chubejli läjyту che fiitu abiu' toAbram, con toIsaac, con toJacoob, näjza guiraa redade' ni gunii xtidx Dios, suga'reni lo xcälrnibee Dios xhaguibaa, luxh la'tu di gacdi jiu'tu. <sup>29</sup> Dxejga sidzujnḁ xhidajl benḁzijt ni siääd ladjiaa, ladjiat, ladbäjgw, näjza ladbee, te jiu'reni lo xcälrnibee Dios xhaguibaa, ro'c sibejzareni lo mex. <sup>30</sup> Luxh yu' reni rujntu xhigab guxii sajcreni naj, sacduxhrenei dxejc. Yu'za reni rchalotu sacduxh naj, xhet sajcdireni dxejc.

*Jesús biin xcuent quedx Jerusalén*  
(Mt. 23:37-39)

<sup>31</sup> Lagajc dxejga, bidzujnḁ gaii refarisee, räjpreni lojni:

—Huij, biunejz ree, sa'csi Herodes rlajz ju'tlu.

<sup>32</sup> Dxejc laani badzu'ni diidxre lojrenei, räjpni:

—Gojz lo bäjzga, benḁ rusguee: “¡Bahuii! cabää rebenḁxab lastoo rebejn, cagusiaca rebejn ni racxhuu nadxej näjza guixee, luxh huijdxli guluxä xtzunä.” <sup>33</sup> Niluxh mase si'c gacni nanab chanuä xnezyuä nadxej näjza guixee, huijdx, sa'csi di gacdi guet te dade' ni rnii xtidx Dios ste'ca guejdx, guejdxḁtis Jerusalén sajc guetni.

<sup>34</sup> ‘¡Probe'tu, la'tu benḁ Jerusalén! Rugu'ttu redade' ni riädni xtidx Dios lojtu, rucuaazatu guij yejc rebejn ni ruxhalḁ Dios lojtu. Balti huält rlazä nuchagä sa'tu si'c ruchagsa' te guidco'c rexquidbäzni lajd xhigani, niluxh ditu nicäjp. <sup>35</sup> Bahuii xho bianxteb xquidootu. Ni'cni arnixgaä lojtu, dirutu fii loä cheni guidzujnḁli dxej ni guiniitu loä: “Chicbaa ni siääd xcuent Dios.”



## 14

*Rusiajc Jesús te bejn ni guidxa guiij*

<sup>1</sup> Che gojl te dxej ni rusilajz rexpejn Israel, huitajw Jesús rolijz tej ni rnibee loj refarisee. Cagula'tz gaii refarisee, guidon xhini'c gun Jesús, <sup>2</sup> sa'csi nez loj Jesús suga' te dade' ni guidxa guiij tiejxhni. <sup>3</sup> Dxejc gunabdiidx Jesús lo rebejn ni ruluii leii nájza lo refarisee, rájpnj lojreni:

—¿La sajc gusiajcnj te benracxhuu dxej ni rusilajz bejn o la di gacdini?

<sup>4</sup> Per laareni dxitis suga'reni, niäutis ro'reni. Dxejc cua' Jesús benracxhuuga, basiajcnj, gunibeezani biunejzni. <sup>5</sup> Dxejc rájpnj loj refarisee:

—Chu la'tu ni rajp te bur o te gon, palga jiajbni nen te bisie, ¿la ditu chalägajcnj mase najcnj dxej ni rusilajz bejn, ä?

<sup>6</sup> Dxejc di niajcnj nudzu'reni diidx lojni.

*Reni bidon chää sa'*

<sup>7</sup> Cheni bahuii Jesús xho rchaglajz rebejn rbereni latsa'c te cuereni cuä' rebejnro, bijni te cuent ni ruluii lojreni, rájpnj:

<sup>8</sup> —Cheni guidontu chäätu te sa', na'c guntu te cuetu cuä' rebenro, te di guidzujn te benroru lojlu, <sup>9</sup> dxejc jiäd bejn ni cayujn lanij, naani lojlu: “Badeed cue dade're ro'c.” Dxejc situjylilu chacuelu ste'ca lajt lo le'li. <sup>10</sup> Maazru hueen, cheni guidonlu chäälu te sa', huicue lo mex ni zuj lo le' te che guidzujn bejn ni cayujn lanij, naani lojlu: “Xamigwä, guda cuelu nen yu' cadro rbej rebenro.” Si'c sä'p xpala'nlu nez loj guiraa rebejn ni sobganäjlu lo mex. <sup>11</sup> Sa'csi ni rlajz chä'p xpala'nni nez loj rebejn, sianxtujyni nez lojreni. Luxh bejn ni najc nadolajz, sä'p xpala'nni nez loj guiraa rebejn.

<sup>12</sup> Rájpzani loj bejn ni cagudeed xhi gaureni:

—Cheni gunlu te lanij o gutedlu bejn lo xmexlu, na'c cueedxtislu reexamigwlu con rebejtzlu, con resa'lu, niclaza rexpisnlu ni najc ri'cw, sa'csi laareni sigajcza sibejdxreni luj che gunreni te lanij, luxh si'c agudijxreni ni badeedlu lojreni. <sup>13</sup> Che gunlu te lanij, alga gurejdx rebenproob, rebencoj, nájza rebenlotiä'p, <sup>14</sup> dxejcti siba lajzlu sa'csi laareni di gacdi gunidxsacreni ni badeedlu lojreni; luxh si'c siguixsac Dios ni bejnlu che gal dxej ni guibansac rebejn loj rebengut.

*Xcuent te laniro*

<sup>15</sup> Che biejn diajg tej reni sobga' lo mex, rájpnj loj Jesús:

—Chicbaa rebejn ni gau yätxtiil cadro rnibee Dios.

<sup>16</sup> Dxejc rájpnj Jesús lojni:

—Guyu' te dade' ni bejn te laniro rolijzni. Gunibeeni bidon xhidajl bejn te jiäd-taunäjrenini. <sup>17</sup> Che bidzujn or ni gaureni, baxhal dade'ga te xmosni chatejdxni rebejn ni abidon, rájpnj lojreni: “Colchäj, asuchee lo mex.” <sup>18</sup> Dxejc guiragajcreni gusloj cayäjb di gacdi chääreni. Tejni rájpnj: “Entis gusiä te la' yuj, luxh naj nanab chahuiä xho najcnj. Goslaa di gacdi jiälä.” <sup>19</sup> Steeni rájpnj: “Gusiä gaii nejs gon, luxh nanab chahuiä xho rujnreni dzuun. Goslaa di gacdi jiälä.” <sup>20</sup> Steeni rájpnj: “Entis bachnaä ni'cni di gacdi jiälä.” <sup>21</sup> Che gubi' mosga, badeedni diidx lo xlamni xhi rájpnj rebejnnga lojni. Dxejc bidxechduxh lamga, rájpnj lo xmosni: “Basquejn huij ladnezyuj nájza ladnezyuj däa, gudanä rebenproob, rebencoj, rebenlotiä'p, rebennatiujnc.” <sup>22</sup> Si'c bejn mosga. Che gubi'ni rájpnj lo xlamni: “Dad, abenä si'c ni gunibeelu, luxh lajtru yagxhiil.” <sup>23</sup> Dxejc rájpnj lamga lo xmosni: “Huij lo renezyuj ni sii loj reguedxziyt, gudanäj rebejn ni guidxaaglu nejzga, te cha bejn rolizä. <sup>24</sup> Rniliä lojtu, nicla tej reni bidon ganid di gau xhuej nani benä.”

*Ni nanab gunni te chanajlni Crist*

<sup>25</sup> Lal sasaj Jesús lo nejz, xhidalduxh bejn sanajlni. Dxejc gubiréni, gusloj cayäjpni lojreni:

<sup>26</sup> —Palga yu' chu tej ni jiäd loä, ni di cuälaz xtadni, xnanni, chäälni, rexi'nni, rebejtzni, nájza rebisiajnni, nágajcza xcäl nabajnni, di gacdi gacni te rexpänä. <sup>27</sup> Palga

yu' chutis tej ni di rlaiz tedni trabajw te jiädnaļni narä, di gacdi gacni te rexpenäpac. <sup>28</sup> Chu tejtū ni rlaiz gun te yuro, ni di gunxgaa xhigab lacti meel chanä yu'ga, te guidon la sajc guluuxnini. <sup>29</sup> Didi cheni abejni recimient, di gacdi guluuxnini, dxejc guiraa reni fii lojni suxhiznäjnreni, <sup>30</sup> säjpreni: “ǰBahuilaare! Bejnre gusloj bencheeni te yu' per di niajcdi nuluuxnini.” <sup>31</sup> ǰChu te reii ni gun xhigab chachagdijl̄ni stee reii, ni di gunxgaa xhigab don laa sajc gunni gaan con tzuu miļ soldaad loj stee reii ni siäd con gajl̄ miļ soldaad, ä? <sup>32</sup> Palga di gacdi gucuanäjnini, che gacbeeni zijtli siäd stee reiga, suxhaļni te xpejn̄ni chanab yäl̄rbedxi lojni. <sup>33</sup> Ni'cni palga chutis tejtū di gusaan rexhixteni te jiädnaļni narä, di gacdi gacni te rexpenäpac.

*Che diru sejd gac nadzujy*

(Mt. 5:13; Mr. 9:50)

<sup>34</sup> Rājzani:

—Huen najc sejd. Per cheni diruni gac nadzujy, ǰxho gacru gac nadzujyni? <sup>35</sup> Xhetru sajcdini, nicla te chääni loj yuj, niclaza te chääni lo abon. Gusältis bejn̄ sejdga. Reni rlaiz gucuađiajg xtidxä, sucuađiasa'creni.

## 15

*Xcuent xiil ni gunijt*

(Mt. 18:10-14)

<sup>1</sup> Guiraa reni rusquijx impuest näjza rebendojļ cabigreni loj Jesús, te cuadıajgreni rextiidxni. <sup>2</sup> Refarisee näjza rebejn̄ ni ruluii lei gusloj camojmreni, rājzani:

—Bejn̄re rusaan rbig rebendojļ lojni, luxh raunājzanireni.

<sup>3</sup> Dxejcti bij Jesús cuent ni ruluiire lojreni, rājzani:

<sup>4</sup> —Chutejtū ni rajp tegayuu xiil, palga chanijtni tejni, ǰla dini gusaan stapbitzuubigaa rexiilni lo niaa te chatiilni xile' ni gunijt, hasta guidxällinini, ä? <sup>5</sup> Luxh che guidxällinini sibaduxh lajzni, dxejc sutzuubnini ro xhajcwni. <sup>6</sup> Che guidzujn̄ni rolizni sutojpn̄ni rexamiigwni näjza rexpisinni te gäbni lojreni: “Colguibalaznäj narä sa'csi abidxälä xile' ni gunijt.” <sup>7</sup> Rniä lojtu, sigajcza su'ru yäl̄rbalajz xhaguibaa xcuent tejtis bejn̄ ni guibig lo Dios ni gusiechlajz xtojļni quela xcuent tapbitzubigaa bejn̄ ni di guiquiin gusiechlazreni xtojļreni.

*Xcuent meel ni gunijt*

<sup>8</sup> Rājzani:

—Sigajcza te gunaa ni rajp tzuu meel, palga chasäl̄ni tejni, ǰla dini gusanij te bajl te gu-loobni neņ yu' hasta guidxällinini, ä? <sup>9</sup> Luxh che guidxällinini, sutojpn̄ni rexamiigwni näjza rexpisinni, säjzani lojreni: “Colguibalaznäj narä sa'csi abidxälä meel ni gunijt.” <sup>10</sup> Rniäza lojtu, sigajcza sibalajz rexangl̄ Dios xhaguibaa xcuent te bendojļ ni rusiechlajzni.

*Te bejn̄ ni baxun te xi'nni*

<sup>11</sup> Dxejc bijza Jesús cuentre lojreni:

—Guyu' te dade' ni yu' tio'p xingaanni. <sup>12</sup> Dxejc xi'nni ni najc huinruga, rājzani lo xtadni: “Dad, baniidx yäl̄nasa'c nani nungäjļ xca'a.” Sas badeed xtadni xerensni.

<sup>13</sup> Di niacaa, balsi dxej gudejd, chela bato' xinhuinni guiraa xhixteni, dxejc sääni, bidzujn̄ni te guedxizjt. Ro'c banijtni guiraa xmeelni lo recosguijdx. <sup>14</sup> Che abanijtni guiraa xhixteni, biäd te gubinduxh guedxizjtga cadre yu'ni. Sas guslojzani calaanni.

<sup>15</sup> Dxejc huitiilni dzuun lo te benguejdxga. Baxhaļ bejn̄gani te huigajpn̄ni cuch lo xyuj dade'ga. <sup>16</sup> Luxh calanduxhni bejn̄ni xhigab malaii sajc gauni recuaan ni najc si'c lia ni cayajw recuch, niluxh rut badeedi xhi niajwni. <sup>17</sup> Laļ ni cadejdni trabajwga, bianij xcäriejn̄ni bejn̄ni xhigab, naani: “Balti rexmos xtadä rausa'c, ria'nru xhi gaureni. Luxh narä ree calanduxhä, ameerli guetä. <sup>18</sup> Guibi'älis ladxä, rolizj xtadä, gäpä lojni, Dad, banitä lo Dios näjza lojlu. <sup>19</sup> Diru nungäjļ guirilaä xi'nlu. Cua' narä si'c te xmoslu.”

<sup>20</sup> Dxejc gunazgajcni nejz te gubi'ni rolizj xtadni.

'Cheni zijtru siäädni, bahuii xtdni lojni. Dxejc balaslajznini, ruxunlini, huichaglojnini, sas gudääznini, bachagro'ni lojni. <sup>21</sup> Dxejc räjp xi'nni lojni: “Dad, abanitä lo Dios näjza lojlu. Diru nungäjł guirilaä xi'nlu.” <sup>22</sup> Per räjp xtdni loj rexmosni: “Coltanä te ladsa'c, colshuajcwnini xi'nä, colgusäl te niil bicuenaani, xcajza te gura'ch ni'ni. <sup>23</sup> Coltanä te biser ni guro' colgu'tni. ¡Colsquejn te guidaunu, jienu te lanij! <sup>24</sup> Sa'csi xi'näre abenä xhigab gujtñi, luxh naj si'cni agubansacni, gunijtni niluxh naj abidxäjłni.” Dxejc guslojreni bejnreni te lanij.

<sup>25</sup> 'Lal ni cayajc dee, xingangalooni cayujñ dzuun lo niaa. Che gubi'ni, siäddzungajxhni rolizni, che biejn diajgni cayel rolizni, caguya'zareni. <sup>26</sup> Dxejcti gurejdxni te mos, gunabdiidxi lojni xhi cayajc royu'. <sup>27</sup> Dxejc räjp mosga lojni: “Gubisac bejtzlu, luxh xtdlu gunibee gujt te biser guro' te gac lanij sa'csi nadaanni gubi'ni.” <sup>28</sup> Dxejc bidxe'ch xingangalooni. Naadtini jiu'ni rolizni. Che gucbee xtdni naadtini jiu'ni, bihuii xtdnini te gunabni jiu'gani. <sup>29</sup> Dxejc räjpni lo xtdni: “¡Bahuilaa! Agujc xchej cayunä dzuun lojlu, luxh rusobdiagä guiraa xtiidxlu, per nicla tej huält gajdlu guniidxi nicla te dxibe' loä te gunä te lanij con rexamigwä. <sup>30</sup> Luxh naj ni abidzujñ xi'nlure, ni banijt xmeellu con regunadxab, xhoxh bagu'tlu te biser guro' te cayujñlu xlanijni.” <sup>31</sup> Dxejc räjp xtdni lojni: “Xi'nä, sugagajclu loä, luxh guiraa ni rapä najc xtenlu. <sup>32</sup> Niluxh naj riäjłpac jienu lanij, guibalaaznu, sa'csi bejtzlu ni benä xhigab agujt, agubi'ni naj, najcni si'cni gubansacni; gunijtni, naj abidxäjłni.”

## 16

### *Xcuent te ni rnibee loj remos*

<sup>1</sup> Dxejc cayujyza Jesús stee cuent loj rexpejn pacni, räjpni:

—Guyu' te beñrajp ni guyu' lojni te ni rnibee loj rexmosni. Dxejc biääd reni badeedreni diidxi lojni, räjpreni: “Bejn ni rnibee loj rexmoslu xhetlaadi cayujñni cagunijtni rexhixtenlu.” <sup>2</sup> Dxejcti gurejdx xlamnini, räjpni lojni: “¿Xhi dee ni riejñ diagä caniireni xcuentlu, ä? Naj guniidxlu loä cuent xte xtzuunlu, sa'csi dirulu chanuu guinibeelu lo rexmosä.” <sup>3</sup> Dxejc bejñga bejn xhigab: “¿Xhichani'c gunä naj ni gudzucaj xlamä dzuun loä? Dina ga'pä yälrstijp te gunä dzuun lo niaa, luxh situjyä chanabä gojn. <sup>4</sup> Ananä xhini'c gunä te che dirunä ga'pä dzuun, sibejdx rexamigwä narä rolizreni.” <sup>5</sup> Dxejcti gurejdxni tebgajreni rebejn ni nazäab lo xlamni, dxejc räjpni loj ni bidzuxgaa: “¿Lac nazääblu lo xlamä?” <sup>6</sup> Dxejc räjpni: “Nazäbä si'c te gayuu baril se't.” Dxejc räjpni lojni: “Basquejn, cua' guijtzre, bacuaa tiubitzuutis baril nazääblu lojni.” <sup>7</sup> Dxejc gunabdiidxi loj steeni, räjpni: “¿Luj a'? ¿Lac nazääblu lo xlamä?” Dxejc räjpni lojni: “Te gayuu dximro triuu.” Dxejc räjpzani: “Aree xquijtzlu; bacuaa tajtis dximro.” <sup>8</sup> Bidxeloj xlamni, gulä'pni xpala'n beñgujdxga ni gunibee sa'csi bisinni bejnni recosga. Dxejc räjpza Jesús, rebejn ni di gumbee xtidx Dios nadxällajzreni lo rextzuunreni con sa'reni loj rebejn ni arumbee xtidx Dios.

<sup>9</sup> 'Rniä lojtu, colquiil rexamiigwtu con reyälñasa'c ni räjpñ loj guedxliujre, te che abaraj xhixtentu, sica' Diostu xhaguibaa cadre yu' roliztu par tejpas.

<sup>10</sup> 'Renani runsa'c dzuun lo te dzunbäz, sajca gunsa'cni dzuun lo te dzunro, luxh reni di gacdi gunsa'c dzuun lo te dzunbäz, di gacdi gunsa'cni dzuun lo te dzunro. <sup>11</sup> Ni'cni palga xhetlaadi cuarälñajtu reyälñasa'c xten guedxliuj, xho guniidxi Dios reyälñasa'c xtenni lojtu! <sup>12</sup> Palga xhetlaadi cuarälñajtu xhixten bejn, ¿chu guniidxi lojtu ni gac xtenpactu, ä?

<sup>13</sup> 'Nicla tej mos di gacdi gunni dzuun lo tio'p lam, sa'csi sidxe'chni lo tejni, steeni sinälajzni o susobdiajgpacni xtidx tejni, sibälazni steeni. Di gacdi gun bejn xtzun Dios lal ni sanälajztisni xcälñasa'cni.

<sup>14</sup> Mbaj naj, refarisee, sa'csi rhaglaxduxhrene meel, cacuadiagdu'tzreni xtiidxi, dxejc caguxhisnäjreni Jesús. <sup>15</sup> Dxejcti räjp Jesús lojreni:

—La'tu najctu bejn ni ruhuii rebejn lojtu, naareni bensacduxhtu, niluxh acanajn Dios xhi xhigab rujntu nen lastootu. Sa'csi guiraa ni rchalojtu najc yalnascduxh, guiraa ni'c rbixhlajz Diosni.

*Xleii Moisés con xcälrnibee Dios*

<sup>16</sup> Räjpzani:

—Dxejli ni biääd Juan ni rutiobnis, guyu' xleii Moisés, näjza xtidx redade' ni gunii xtidx Dios. Cheni biääd Juan gusloj rsule' didxsa'c xcuent xcälrnibee Dios, ni'cni xhidajl bejn cagusutijp lajzni te jiu'reni loj yälrnibeega.

<sup>17</sup> Per guyasiru nitloj xhaguibaa näjza guedxliuj quela di jialoj guiralii rediidx ni bacuaa Moisés; nicla tej diidxga di nitloj.

*Ruluii Jesús xcuent ruŕo'n sa' bejn*

(Mt. 19:1-12; Mr. 10:1-12)

<sup>18</sup> Räjpzani:

—Palga guŕo'n te bejn chäälŕni, dxejc guchnaani stee gunaa, rujnni dojl, luxh nani ruchnaa te gunaa ni abaro'n chäälŕnini, niguiiga rujnzani dojl.

*Te benrajp näjza Lázaro*

<sup>19</sup> Räjpzani:

—Guyu' te benrajp ni rchaglajz rajcwni ganax reladsacduxh, luxh guixe-guixee rujnni laniro. <sup>20</sup> Guyu'za te benproob ni laa Lázaro ni rniab gojn, ricueni ro xlä' benrajpga, yu' guejdx ni rgaadz tiejxhni. <sup>21</sup> Rlajzni maläii xho gunni gauni nani rtejb loj xmex benrajpga, luxh direni gusaan. Dxejc rebä'cw siääd rilejp loj reguejdx ni rgaadz ni guidxa tiejxhni. <sup>22</sup> Guyu'ti te dxej gujt benproobga, biädläs rexangl Dios xaimni, huinärenini cadro yu' Abram xhaguibaa. Dxejcti näjza benrajpga gujt, huicua'tztirenini. <sup>23</sup> Che yu'ni gabijl cadro rij guiraa rebendojl, ro'c cadejdni trabajwduxh. Dxejcti guläŕni lojni, bahuiini zitduxh cadro suganäj Abram Lázaro. <sup>24</sup> Dxejcti guredxaduxh benrajpga, räjpni lo Abram: “;Xtadä Abram! Balazlajz narä, baxhał Lázaro guhuajdxni yejc bicuenaani nis te gusiäljuyjni ludxä, sa'csi ree cadedä trabajwduxh lo guiboo.” <sup>25</sup> Luxh räjp Abram lojni: “Xi'nä, basaa lajzlu che gubajŕlu lo guedxliuj gojplu guira'ti xhixtenlu, luxh sigajcza Lázaro gudejdni trabajwduxh. Per naj ree casilajzni, naj luj cadejdlu trabajwduxh. <sup>26</sup> Luxh di gacdi jääd Lázaro ro'c, sa'csi yu' te baladuxh ni rlia' sa'nu, te mase rlajz bejn guirii ree te tedreni lojlu ro'c, di gacdini. Di gacdiza ted reni yu' ro'c te jäädreni loonu.” <sup>27</sup> Dxejcti räjp benrajpga lojni: “Rniabduxhä lojlu, xtadä, baxhałlaa Lázaro chääni rolizj xtadä, <sup>28</sup> sa'csi ro'c yu' gaii betzä, te chalijdxni laareni, te gusiechlajzreni, te di näjza laareni jäädreni ree cadro rdejđ bejn trabajwduxh.” <sup>29</sup> Dxejc räjp Abram lojni: “Aräjpreni guijt cadro caj xleii Moisés näjza xtidx redade' ni gunii xtidx Dios, sugusobdiajgreni rediidxga.” <sup>30</sup> Luxh benrajpga badzu' diidxre, räjpni lojni: “Gulii dad Abram, per palga chäs te bejn loj rebengut, chani lojreni, dxejc sii pet susiechlajzreni.” <sup>31</sup> Dxejc räjp Abram lojni: “Palga direni gusobdiajg xtidx to Moisés näjza xtidx redade' ni gunii xtidx Dios, dizareni chalilajz xtidx te bejn ni guibansac loj rebengut.”

## 17

*Riesgw jiajbni lo dojl*

(Mt. 18:6-7, 21-22; Mr. 9:42)

<sup>1</sup> Räjĵ Jesús loj rexpejŕpacni:

—Siäädpac recos ni gun jiajb bejn lo dojl. Proobza bejn ni rujn riajb bejn lo dojl. <sup>2</sup> Maaz guliibni te guij xten molin guejnni, gusäl bejnni lo nisdoo cadro jäätro quela gunni jiajb rexi'nä ni ahuililajz xtidxä. <sup>3</sup> ;Cölsusiŕ!

'Palga gun bejtzlu dojl lojlu, balijdxni. Palga gusiechlajzni, basiäjł diidx con laani. <sup>4</sup> Masque gajdz huält nen teb dxej gunni dojl lojlu, palga jäädniini lojlu gajdz huält, naani: “Xhet laadi benä, basiäjł lajzlu”, basiäjł lajz con laani.

*Bastioob xcälrlililaznu*

<sup>5</sup> Gunii rexpejn pacni lo Jesús, räjpreni:

—Dad, baniidxru yälrlililajz loonu.

<sup>6</sup> Dxejc räjp Jesús lojreni:

—Palga rajptu yälrlililajz, mase najcni si'cti te bedzbäz xten muxhtas, sajc gäbtu lo yagro rec: “Biliädxa' ro'c, guzuj galäii nisdoo”, susobdiajg yajgga xtiidxtu.

*Ni riäj] gun te mos*

<sup>7</sup> Räj pzani:

—¿Chu tejtü ni rajp te mos ni riga'n o ni rigajp rexquidxaani ni gäbni lojni che guibi'ni lo niaa: “Biu'ga, gurej lo mex te gaulu”? <sup>8</sup> Dini gäb si'c. Niluxh säjpnü lojni: “Bachaa xhajblu. Bejn xhi gauä, gudanäni loä. Che luux gauä, yä'ä, dxejc sajc gauzalu, yäzalu.”

<sup>9</sup> Dini gudeed xquixtios lo mosga sa'csi rujnni recos ni gunibeeni sa'csi si'c riäj] gunni.

<sup>10</sup> Sigajcza la'tu, che luux guntu guiraa redzuun ni guniä guntu, riäj] guiniitu lo Dios: “Najcnu mos ni xhet sajcdi, nani riäj] jiennu, ni'ctis biennu.”

*Basiajc Jesús tzuu bejn ni ral tiejxhrene*

<sup>11</sup> Lal ni sasaj Jesús nez guedx Jerusalén, gudejdni loj región Samaria näjza región Galilee. <sup>12</sup> Che biu'ni tej reguejdxga, huichagloj Jesús tzuu bejn ni rajc te yälguijdx ni ral tiejxhrene, niluxh zijtru guzujreni. <sup>13</sup> Dxejc rbedxa'reni räjpreni:

—Jesús, Dad, Mastr, balaslajz nuurnu.

<sup>14</sup> Che bahuii Jesús lojreni, räjpni lojreni:

—Colchäj, te fii rebixhojz abiajctu.

Lal ni sääreni, bia tiejxhrene. <sup>15</sup> Dxejc tejreni, che bahuiini abiajcnü, gubiguxunni, cabedxa'ni calä'pni xpala'n Dios. <sup>16</sup> Bazuxhijbni nez loj Jesús, basajbni lojni lo yuj cagudeedni xquixtios loj Jesús. Luxh bejnre najc te benzijt, te ben Samaria. <sup>17</sup> Dxejcti räjp Jesús lojni:

—¿La et tzuudi najc reni biajc, ä? ¿Con sgaarenü? <sup>18</sup> ¿La rutru gubi'di loä te guiliä'preni xpala'n Dios, xtebtis benzijtre, ä?

<sup>19</sup> Dxejc räjp Jesús loj bejnre:

—¿Huisulii, huij! Abiajclu sa'csi huililajzlu.

*Xho guidzujn xcälrnibee Dios*

(Mt. 24:23-28, 36-41)

<sup>20</sup> Dxejc, sa'csi agunabdiidx refarisee loj Jesús guc guidzujn xcälrnibee Dios, badzu'ni diidre, räjpni lojreni:

—Di xcälrnibee Dios guidzujn con seen ni sajc fiitu. <sup>21</sup> Diza bejn naa: “Bahuii, aniree”, o “Anirec”, sa'csi abidzujn xcälrnibee Dios lojtu.

<sup>22</sup> Dxejc räjp Jesús lo rexpejn pacni:

—Sidzujn dxej rlanjgatu fiitu te dxej sa' ni chu che jiädsac Xi'n Dios ni gujc Niguii, luxh ditu fiini. <sup>23</sup> Luxh siniireni lojtu: “Aniree”, o “Anirec”, per na'c chäätü, na'cza chanajltu reni rihuii. <sup>24</sup> Sa'csi sigajc ni rien che rdinya' te laad xhaguibaa hasta stelaad xhaguibaa, si'cza gac che jiälä narä, Xi'n Dios ni gujc Niguii, che gal dxej guibi'ä.

<sup>25</sup> Luxh ganiddoo sidedä trabajwduxh, sa'csi sibälaz reben guedxliuj ni tre' naj narä.

<sup>26</sup> Si'cni gujc nen redxey cheni gubajn toNoé, si'cza gac nen redxey che jiälä narä, Xi'n Dios ni gujc Niguii. <sup>27</sup> Nen redxey ni gubajn toNoé gudajwreni, gu'reni, bachnaareni, badeedzarenü xindxa'preni guchnaa bejn, bidzujnli dxej cheni biu' toNoé nen barcwro ni bencheeni. Dxejc biäd nsguiduxh, gujt guiraa reben dojl, guzääbreni lo nis. <sup>28</sup> Sigajcza gujc nen redxey ni gubajn toLo't: gudajwreni, gu'reni, gusiireni, bato'reni, gule'creni binij, bencheezarenü rolizreni. <sup>29</sup> Niluxh cheni birii Lo't lo guedx Sodoma, biajb guiboo xhaguibaali, näjza te däj ni rudxuii, gunitlojti guiraa rebejn dojl, huejcreni. <sup>30</sup> Sigajcza gac nen redxey cheni jiälä narä, Xi'n Dios ni gujc Niguii.

<sup>31</sup> Dxejga, palga yu' chu niä'p yejc yu', diru galädi jäjtni te chaläani rehxixtenni ni yuchee nen yu'; palga yu' chu suga' nezjiät, di galdiruni guibi'ni rolizni. <sup>32</sup> Colgusnaj



lajztu xhi gujc cháäl toLo't. <sup>33</sup> Ni rlaiz ga'p xcälñabajñni lo guedxliujre, sunijtnini, nani gunijt xcälñabajñni lo guedxliujre xcuent rextidä, xcälñabajñni rajpni xhaguibaa.

<sup>34</sup> 'Rniä lojtu, guxhijnga ni jiälä lo tio'p reni naga' lo te da', cháä tejni, steeni jia'n. <sup>35</sup> Lo tio'p gunaa ni cayo't, cháä tejni, steeni jia'n. <sup>36</sup> Lo tio'p bejn ni yu' lo niaa, cháä tejni, steeni jia'n.

<sup>37</sup> Che biejn diajgreni rediidxre, gunabdiidxreni lojni, räjpreni:

—Dad, ¿caro gac recosre?

Badzu' Jesús diidxre, räjpni:

—Cadro naga' te mangut, ro'c rdojp regolbetz.

## 18

### *Xcuent te gunabiuud con te juejz*

<sup>1</sup> Bijza Jesús te cuent ni rului lojreni, te guisheedreni xho riagl cuedx-guiniabreni lo Dios lacuaa gac-huin lajzreni, <sup>2</sup> räjpni lojreni:

—Te guejdx guyu' te juejz ni di chalilajz xtidx Dios, dizani jiu rebejn. <sup>3</sup> Lagajc guejdxga guyu' te gunabiuud. Guixe-guixee rijni lo juejz, rniabni lojni gunni yälguxhtis lo bejn ni rdxe'ch lojni. <sup>4</sup> Balti dxej naadti juejzga gun yälguxhtisga. Dxejcti bejn ni xhigab, naani: “Mase dina guidxebä Dios, dizana jiuä rebejn, <sup>5</sup> sa'csi gunabiuudre sanuutisni siädni löä, abasiedliini narä, gunälis yälguxhtis xten gunaaga, te di chanuutis riädgusieedni narä.”

<sup>6</sup> Dxejc räjp Jesús lojreni:

—Riejn diajgtu xtidx juezguijdxga, <sup>7</sup> Naj ¿xho di Dios, ni najc hueen, gucuadiajg xtidx rexi'nni ni rbedx-rniab lojni dxej-yääl? Di gaclaa gunni yälguxhtis xcuent reni aguleni.

<sup>8</sup> Ni'cni rniä lojtu, sungajcni yälguxhtis par laareni. Luxh che guibi' Xi'n Dios ni gujc Niguii, ¿la sidxälni bejn ni rililajz xtiidxni lo guedxliuj?

### *Xcuent te farisee con te ni rusquijx impuest*

<sup>9</sup> Bij Jesús stee cuent ni rului loj rebejn ni rluiisi najc bensa'c, ni rchalo xhet sajcdi resabejnreni. Räjpni:

<sup>10</sup> —Tio'p dade' huij guidoo te huinabreni lo Dios. Tej ni najc farisee, steega najc te dade' ni rusquijx impuest. <sup>11</sup> Sulii fariseega lañ ni canabni lo Dios, räjpni: “Dad, Dios, runidä xquixtios lojlu sa'csi dina gacä si'c najc rebejn ni najc gubaan, ni najc beñ nadiplajz, ni najc bendojl, dizana gacä si'c najc bejnre ni rusquijx impuest. <sup>12</sup> Rucua'nä tio'p huälte nen te xmaan, luxh rudedä te tzuu lo te beex loj guiraa ni runä gaan.” <sup>13</sup> Niluxh bejn ni rusquijx impuest, zijtru suga'ni, dini guiliäs lojni xhaguibaa. Catiälñaatisni lastooni, caniini lo Dios, räjpni: “Dad, Dios, ¡balaslajz narä, nacä te bendojl!” <sup>14</sup> Rniliäpac lojtu, ni rusquijx impuest rbaali lajzni gubi'ni rolizni sa'csi badzucaj Dios rextojñi, niluxh di Dios nudzucaj rextojl beñ farisee. Sa'csi guiraa rebejn ni rlaiz guiliä'p lagajc xpala'nni, susanxtiuju Diosreni, dxejc reni di rlaiz guiliä'p lagajc xpala'nreni, siliä'p Dios xpala'nreni.

### *Benle' Jesús yejc rebiuxbäz*

(Mt. 19:13-15; Mr. 10:13-16)

<sup>15</sup> Yu'reni siädnä repxiuxbäzreni lo Jesús te guzujni naani yejcreni. Che bahuii rexpejn pacni si'c, gusloj cadildiidxreni con rebejn te na'c jiädnäreni rebiuxe'. <sup>16</sup> Dxejc gurejdx Jesúsreni, räjpni lojreni:

—Colgusaan jiädä rebiuxe' löä, na'c gudxojujntureni, sa'csi xcälñabee Dios najc xten reni najc nadolajz si'c rebiuxbäze're. <sup>17</sup> Rniliäpac lojtu, chutis ni rlaiz jiu' lo xcälñabee Dios nanab gusobdiajgreni xtidx Dios si'c rusobdiajg rebiuxe' xtidx xtadreni. Palga dini gun si'c, dini jiu' lo xcälñabee Dios.

### *Te bi'n ni rajp xhidajl xhixtenni*

(Mt. 19:16-30; Mr. 10:17-31)

<sup>18</sup> Te bi'n ni rnibee gunabdiidx lo Jesús, räjpni:



—Dad, mastrsa'c, ¿xhini'c nanab gunä te xca'ä yälñabajñ par tejpas?

<sup>19</sup> Dxejc räjp Jesús lojni:

—¿Xhicuent rniilu narä: “Mastrsa'c”? Rutru najcdi bensa'c, xtebtis Dios. <sup>20</sup> Anajñlu xho najc remandamient ni caj lo xleii Moisés: “Na'c guesnäjlgu gunaa ni di gac chäällu; na'c ju'tlu bejn; na'c cuanlu, na'c guiniilu didx-xhii xcuent bejn; bazoob xtidx xtaclu, xnanlu, bahuiizareni.”

<sup>21</sup> Dxejc räjp bi'nga lojni:

—Guiraa remandamient rusobä cheni gucäli biuux.

<sup>22</sup> Che biejn diajg Jesús xtiidxni, räjpni lojni:

—Tejtis cayäädx gunlu. Bato' guiraa rexhixtenlu, gudisni loj rebejn ni xhet rajpdi dxejc sajplu xcälñasa'clu xhaguibaa. Dxejc gudanajl narä.

<sup>23</sup> Che biejn diajg bi'nga rediidxre, guc-huinduxh lajzni, sa'csi najcni te bejn ni rapduxh. <sup>24</sup> Dxejc rdxelojti Jesús lojni, guc-huinza lajzni räjpni:

—Naganduxh jiu' rebenrajp lo xcälñabee Dios. <sup>25</sup> Guyasiru ted te camei ni' te guux lo ni jiu' rebenrajp lo xcälñabee Dios.

<sup>26</sup> Reni biejn diajgni rediidxre, räjpreni:

—¿Chuxhni'c sajc laa lo dojl, palga si'c najcni?

<sup>27</sup> Dxejc räjp Jesús lojreni:

—Guira'ti ni di gacdi gun rebejn, guyasi rajc rujñ Diosni.

<sup>28</sup> Dxejc räjp Pedr lojni:

—Dad, nuurnu abasa'nnu guiraa rexhixtenu te siopnalnu luj.

<sup>29</sup> Dxejc badzu' Jesús diidxre lojni, räjpni:

—Rniliápac lojtu, chutis ni gusaan rolijzni näjza rex cuzajñni, rebejtzni, chäälni, xi'nni xcuent xcälñabee Dios, <sup>30</sup> sica'ni xhiroobru lo guedxliujre, luxh sica'ni yälñabajñ par tejpas.

*Rusule' Jesús stehuält xho guetni*

(Mt. 20:17-19; Mr. 10:32-34)

<sup>31</sup> Gurejdx Jesús rexpejñpacni te laad, te räjpni lojreni:

—Naj chonnu guedx Jerusalén cadre nanab soob rediidx nani bacuaa dade' ni gunii xtidx Dios galooli xcuent Xi'n Dios ni gujc Nigui. <sup>32</sup> Sutedrenini ladzñaa rebenzajt, suxhizñajrenini, susacsírenini, sutiobxhejñlireni lojni, <sup>33</sup> luxh che luux quiinrenini, dxejc sugu'trenini, luxh ni riojñ dxej sibansacni loj rebengut.

<sup>34</sup> Dxejc laareni direni niacbee rediidxre, dizareni gan xhini'c caniini, sa'csi najcreni diidx ni di gacdi gacbeereni.

*Rusijc Jesús te beñ lotiä'p*

(Mt. 20:29-34; Mr. 10:46-52)

<sup>35</sup> Cheni sadzujñ Jesús te guejdx ni laa Jericó, sobga' te beñ lotiä'p ro' nezyuj, canabni gojn. <sup>36</sup> Che biejn diajgni cadejd xhidajl bejn lo nezyujga, gunabdiidx beñ lotiä'pga xhini'c cayajc. <sup>37</sup> Dxejc räjpreni:

—Jesús ni siääd Nazare't cadejdni nezga.

<sup>38</sup> Dxejc guredxa'ni räjpni:

—¡Jesús, xi'n toDavid, balaslajz narä!

<sup>39</sup> Rebejn ni nijd lojreni gudilñajreni beñ lotiä'pga te jiäu ro'ni, niluxh laani dipru guredxa'ni, räjpni:

—¡Xi'n toDavid, balaslajz narä!

<sup>40</sup> Dxejc guzudxi Jesús ro'c, gunibeeni jiädñareni bejñga lojni. Che bidzujñni lojni, gunabdiidx Jesús lojni, räjpni:

<sup>41</sup> —¿Xhini'c rlajzlu gunnäá luj?

Badzu' beñ lotiä'pga diidxre, räjpni:

—Dad, rlazä jien löä.

<sup>42</sup> Dxejc räjp Jesús lojni:

—¡Sujien balojlu! Abiajclu sa'csi huililajzlu.

<sup>43</sup> Lagajc dxej, biengajc lojni, calä'pni xpala'n Dios, huinajlni Jesús. Luxh guiraa rebejn ni bahuii xhi guzajcni, gulä'pzareni xpala'n Dios.

## 19

*Huij Jesús roliz te bejn* ni laa Zaqueo

<sup>1</sup> Dxejc biu' Jesús guedx Jericó, sadejdzani guejdxga. <sup>2</sup> Ro'c rbäjz te benrapduxh, ni laa Zaqueo, ni rnibee lo reni rusquijx xcuent impuest. <sup>3</sup> Rlajz Zaqueo fiini loj Jesús te gumbeenini, per digacdi fiini lojni sa'csi najcni te benxhate', luxh xhidajl bejn siädsaj guideb gabi Jesús. <sup>4</sup> Ni'c baxunni gunijdni lojreni, huä'pni lo te yajgro ni suga' gajxh nez cadro ted Jesús te si'c saj fiini loj Jesús. <sup>5</sup> Che gudejd Jesús nejzga, guläsni lojni jiaa, bahuiini cadro sobga' bejnre. Dxejc räjpni lojni:

—Zaqueo, basquejn biäjt ro'c, lagajc nadxej rlazä chajia'nä rolizlu.

<sup>6</sup> Dxejcti biätguxun Zaqueo lo yajgga, rbalazduxhni huinäni Jesús rolizni. <sup>7</sup> Che bahuii guiraa rebejn xhi gujc, gusloj camojmreni, direni jiulajz, räjpreni:

—Jesús sajia'n roliz te bendojl.

<sup>8</sup> Dxejcti huisulii Zaqueo, räjpni loj Jesús:

—Bahuilaare, Dad, gala' xhixtenä gudedä loj rebenproob; luxh palga yu' chu loj cua'ä xhixtenni con yälrusguee, sudzu'ä lojni tajp huält si'cti ni cua'ä.

<sup>9</sup> Räjp Jesús lojni:

—Lagajc nadxej gubicaj xtojllu näjza xtojlni reni rbäjz rolizlu, sa'csi guliipac najclu te xagdoo toAbram. <sup>10</sup> Pues Xi'n Dios ni gujc Niguii biädtil rebendojl te guslaani rebejnnga ni gunijt nen dojl.

*Xcuent tzuu meel*

<sup>11</sup> Lał ni cagucuaiajgreni xtidx Jesús, bijzani te cuent ni ruluii, sa'csi asiäddzujn-gajxhreni guedx Jerusalén, luxh laareni rujnreni xhigab sisloj guinibee Jesús si'ctisni guidzujnni guejdxga. <sup>12</sup> Dxejc räjpni lojreni:

—Guyu' te bejn, benrajpni, huijni te guejdx zijtro te gacni reii, dxejc guibisacni.

<sup>13</sup> Che gajdni guirii, gurejdxni tzuu xmosni, te badeedni lo tebgajreni te melpla't ni sacduxh, räjpni lojreni: “Colyujn dzuun con meelre che guibisacäli.” Sä'tini. <sup>14</sup> Per reben lajdxni dipacreni guichagljaz bejnnga, ni'c baxhalreni gaii bejn te saye'tzreni: “Di rlazdinu gacni xreiinu.” <sup>15</sup> Luxh empac gujcni reii, dxejc gubisacni lajdxni. Che bidzujnni gurejdxni rexmosni ni badeedni meel cua'reni, te gacbeeni lac bejn tejpgareni gaan. <sup>16</sup> Ni bidzujn ganid räjpni lojni: “Dad, xmeellu bejn gaan stzuu meel.” <sup>17</sup> Dxejc räjp reii lojni: “Hueenca, luj najclu te mossa'c, sa'csi laaca bejnlu dzuun lo te dzunbäz, naj sunidxä guinibeelu loj tzuu guejdx.” <sup>18</sup> Bidzujn stee mos lojni, räjpni: “Dad, xmeellu bejn gaan gaii meel.” <sup>19</sup> Dxejcti räjpni lojni: “Luj guinibeelu loj gaii guejdx.” <sup>20</sup> Bidzujnti stee mos lojni, räjpni: “Dad, aree xmeellu, guluchedzu'tzäni nen te baii <sup>21</sup> sa'csi bidxebä guejblu, sa'csi najc guejblu te ben nadiplajz, rutojp guejblu cadro di guejblu nuzuj, luxh rliäs guejblu cose'ch cadro di guejblu nibe'c.” <sup>22</sup> Dxejcti räjp reii lojni: “¡Mosguijdx! lagajc ro'lu birii diidx ni gunälu yälguxhtis. Palga najnlu nacä te ben nadiplajz, najnlu rutopä cadro dina nusuä, najnlu rliäsä cose'ch cadro dina nibe'cä, <sup>23</sup> xhicuent dilu nisa'n xmelä nen te bancw te che nibi'ä nica'a xmelä nägajc xi'n meelga?” <sup>24</sup> Dxejc räjpni loj reni suga' ro'c: “Colgudzucaj meelga lojni, colgudeedni loj ni rajp tzuu meel.” <sup>25</sup> Laareni räjpreni: “Dad, per laani arajpni tzuu meel.” <sup>26</sup> Dxejc badzu' reii diidxre lojreni, räjpni: “Ni'cni rniä, reni rajp, sica'rureni, niluxh reni di ga'p lojreni sibicaj guiraa recosbäz ni rajpreni. <sup>27</sup> Luxh xcuent reni rdxe'ch loä, ni di rlaz niacä reii lojreni, coltanäreni ree, colgugu'treni nez loä.”

*Che biu' Jesús guedx Jerusalén*

(Mt. 21:1-11; Mr. 11:1-11; Jn. 12:12-19)

<sup>28</sup> Che gulujx guniini guiraa rediidxre, huinuuni xnejzni, sääni nez lo guejdx Jerusalén.  
<sup>29</sup> Che asadzungajxhni reguejdx ni laa Betfagé nájza Betania, gajxh lo dajñ ni laa Oliib, baxhalni tio'p rexpejn̄pacni, <sup>30</sup> räjpni lojreni:

—Colchäj lo guejdx' ni suga' lad rec. Che guidzujntu, guidxäلتu caduu te bur̄ huin ni gajd bejn̄ cuib. Colguxhecni, coltanäni ree. <sup>31</sup> Palga yu' chu guiniabdiidx lojtu: “¿Xhicuent caguxhectuni?” colye'tz lojni: “Dad caquiinnini.”

<sup>32</sup> Sä'ti rexpejn̄pacni nani baxhalni, bidxälreni manga sigajctisni räjp Jesús. <sup>33</sup> Cheni caguxhecreni bure'ga, rexpaxhuaan bure'ga räjp lojreni:

—¿Xhicuent caguxhectu bure'ga, ä?

<sup>34</sup> Dxejc badzu'reni diidxre, räjpreni:

—Sa'csi caquiin Dadni.

<sup>35</sup> Sas huinäreni bure'ga loj Jesús, gudixhreni xhajn̄breni dejtzn̄i, te gubijb Jesúsni.

<sup>36</sup> Guideb cadro gudejd Jesús gudixhreni xhajn̄breni lo nezyuj cadro tedni. <sup>37</sup> Cheni ameer guidzujn̄ni bajaad xten dan Oliib, gusloj cabaa lajz guiraa rebejn̄, rbedxa'lireni calä'preni xpala'n Dios sa'csi bahuiireni guiraa remilagwr ni bejn̄ni. <sup>38</sup> Räjpreni:

Chicbaa reii ni siääd xcuent Xtadnu Dios te guinibeeni loonu.

Sucuedxilajz guiraa reni yu' guibaa, chä'p xpala'n Dios xhaguibaali.

<sup>39</sup> Dxejc gaii refarisee ni suga' galäii rebejn̄, räjpreni loj Jesús:

—Mastr, gudidxa' lo rebejn̄ ni siädnaillu te na'cru guiniireni si'c.

<sup>40</sup> Dxejc Jesús räjp lojreni:

—Rniliä lojtu, palga redee gusaü ro'reni, sibedxa' reguijre.

<sup>41</sup> Che bidzujn̄ni gajxh, che bahuiini guedx Jerusalén, biin Jesús xcuent guejdxga, <sup>42</sup> räjpni:

—¿Maläii gabeelu, masque nen̄ redxejre, xhini'c sajc guniidx yälrbexdilajz lojlu! Per naj naga'tzni, luxh digacdi fiilu lojni. <sup>43</sup> Sidzujn̄ dxejga lojlu, cheni jääd reni rdxe'ch lojlu sujn̄reni si'c te guralyuj guideb gabilu, nez lojlu sigajc nez dejtzu sisiujreni.

<sup>44</sup> Susälta'reni luj lo yujli. Sugu'treni rebejn̄ ni rbäjz ro'c, luxh nicla gusaanreni cuib te guij yejc sa'ni sa'csi dilu niembee dxej ni biääd Dios biädhuilu.

*Rusia Jesús nen̄ guidoro*

(Mt. 21:12-17; Mr. 11:15-19; Jn. 2:13-22)

<sup>45</sup> Dxejcti biu' Jesús nen̄ guidoro, guslojni cabääni rebejn̄ ni caguto' nájza reni casii.

<sup>46</sup> Dxejc räjpni lojreni:

—Loj rexquijtz Dios caj rediidxre: “Rolizä sajc te yu' cadro jäädnahtu lo Dios”, niluxh la'tu abejntuni si'c te biliää xte gubaan.

<sup>47</sup> Guixe-guixee caguliii Jesús nen̄ guidoro, luxh reni rnibee loj rebixhojz nájza rebejn̄ ni ruluii leii, nájza rebengool xte guejdxga caguilreni mood te ju'treni, <sup>48</sup> luxh direni nidxäjł xho niujnreni sa'csi guiraa rebejn̄ cacuadiagdu'tzreni xtiidxni.

## 20

*Xcäl̄rnibee Jesús*

(Mt. 21:23-27; Mr. 11:27-33)

<sup>1</sup> Te dxej suga' Jesús nen̄ guidoro, caguluiini rebejn̄, cagusule'zani diidx xcuent xho guibicaj xtojłreni, che bidzujn̄ reni rnibee loj rebixhojz nájza rebejn̄ ni ruluii leii nájza rebengool, <sup>2</sup> räjpreni lojni:

—¿Xhi yäl̄rnibee rujnlu recosre? ¿Chu baniidx yäl̄rnibeega lojlu?

<sup>3</sup> Dxejcti räjp Jesús lojreni:

—Narä sigajcza gunä te yäl̄gunabdiidx lojtu, colgudzu' diidxre loä, <sup>4</sup> ¿chuni'c baxhal Juan te gutiobnisni rebejn̄? ¿La Dios o la rebejn̄, ä?

<sup>5</sup> Niluxh laareni guslojreni canabdiidx lo sa'reni, räjpreni:

—¿Xhichani'c jie'tznu? Palga jie'tznu Dios baxhalni, dxejc naani loonu: “¿Xhixhcient ditu ninilajz xtiidxni?” <sup>6</sup> Palga jie'tznu: “Rebejn baxhalni”, guiraa rebejn sucuaa guij yejcnu, ju'tlireni nuurnu sa'csi laareni rujnpacreni xhigab gunii Juan xtidx Dios.

<sup>7</sup> Dxejc badzu'reni diidxre, räjpreni:

—Dinu guidon chuni'c baxhal Juan te biädtiobnisni.

<sup>8</sup> Dxejc räjp Jesús lojreni:

—Dizana guiniä xhi yälrnibee rapä te runä recosre.

#### *Xcuent remosguijdx*

(Mt. 21:33-44; Mr. 12:1-11)

<sup>9</sup> Dxejc gosloj canii Jesús loj rebejn, bijni cuentre lojreni, räjpni:

—Guyu' te bejn bazuj yaguub lo xyujni. Dxejc badedlaanini lo gatii bejn chääreni meed, sä'tnini zijt, gucladuxhni ro'c. <sup>10</sup> Che bidzujn dxej ni guidojp cose'ch, baxhalni te xmosni sanab cose'ch ni riäj xca'ni. Per laareni gudijnreni mosga, xhetliidi badeedreni chanäni lo xpaxhuaan yujga. <sup>11</sup> Dxejcti baxhalni stee mos lojreni. Dxejc sigajcza gudijnreni, gudijnreni, luxh xhetza badeedireni lojni, ganaxni gubi'ni lo xlamni. <sup>12</sup> Dxejcti baxhalni ni riojn mos lojreni, per sigajcza gudinduxhreni, barilaagwreni.

<sup>13</sup> Dxejc bejn baxhuaanga xhigab, naani: “¿Xhichani'c gunä? Suxhalä xi'nä ni sanälazä; che fiireni lojni, pet siureni xtiidxni.” <sup>14</sup> Dxejc che bahuii reni go'n-meed lo xi'nni, dxejc räjpreni lo sa'reni: “Laa deeni gac xtenni reyujre. Do'o guigu'tnuni te nuurnu xca'nu yujre gacni xtennu.” <sup>15</sup> Dxejcti barilaagwreni lo yujga, sas bagu'treni.

Dxejc gunabdiidx Jesús lojreni, räjpni:

—¿Xhichani'c gunnä xpaxhuaan yujga reben guijdxre, ä? <sup>16</sup> Sidzujnni, sugu'tni guiraa reni cayujn dzun-meed lo yujga, dxejc sudeedni yujga lo garenca bejn.

Che biejn diajgreni rediidxre, räjpreni:

—¿Na'c gusaan Dios gacni si'c!

<sup>17</sup> Bahuii Jesús lojreni, dxejc räjpni:

—¿Xhixhni'c caj lo guijtz ni bacuaa redade' ni gunii xtidx Dios galoo? Ro'c cajni:

Guij nani guläcaj renani runchee yu',

ni'c agujc guisa'c ni guzuj galoo.

<sup>18</sup> Chutis ni jiajb yejc guijga, sianduxhni, per nani jiajb guijga yejcnu siujypacni, li däj gacni.

#### *Xcuent reimpuet*

(Mt. 21:45-46; 22:15-22; Mr. 12:12-17)

<sup>19</sup> Reni rnibee loj rebixhojz, näjza reni ruluii leii rlajzreni guiniaazreni Jesús lagajc orga, sa'csi gucbeerreni lojreni gunii Jesús cuentre, luxh xhet bejndireni sa'csi rdxejbreni rebejn. <sup>20</sup> Dxejc cagula'tztisreni, baxhalreni gatii bejn te gunsireni si'c ni najceni bendxan, te gucuadiajgreni xtiidxni don gaxäjssi guiga'ni lo te diidx te gutedreni lo yälguxhtis, yälrnibee xte gubernadoor. <sup>21</sup> Dxejc gunabdiidxreni lojni, räjpreni:

—Dad, Mastr, nadonnu laaca rnii guejblu, laaca ruluii guejblu, luxh di guejblu fixгаа la yu' chu najc bejn, ruluisa'c guejblu xnez lo Dios. <sup>22</sup> Gunilaa loonu, ¿la laaca guidiixnu reimpuet loj xcubieer César o la xhet laadini, ä?

<sup>23</sup> Sas gucbegajc Jesús cayujnsireni yälgunabdiidxga, dxejc räjpni lojreni:

—¿Xhicuent runnäjtu narä scree? <sup>24</sup> Baluii löä te xmeeltu. ¿Chucha yejc caj lojni, chucha laj caj lojni?

Dxejc räjpreni:

—Xten César.

<sup>25</sup> Dxejc räjpni lojreni:

—Coldeed lo César nani najc xten César; coldeedza lo Dios nani najc xten Dios.

<sup>26</sup> Luxh direni niujn gaan niga'ni loj nicla te diidx ni guniini nez loj rebejn. Rdxelotjtsreni lo rextiidxni, biäuti ro'reni, guzudxireni.

*Rniabdiidxreni xcuent yälrbansac lo rebengut*  
(Mt. 22:23-33; Mr. 12:18-27)

<sup>27</sup> Dxejc huij gaii resaduceos huihuiireni loj Jesús. Di resaduceos chalilajz rbansac bejn lo rebengut. Ni'cni gunabdiidxreni loj Jesús, <sup>28</sup> räjpreni:

—Dad, Mastr, basa'n Moisés guijt z loonu, lojga caj: “Palga guet te bejn, gusaanni chäälni ruti xi'nni, nanabpac xca' bejtzni gunaaga te chu xi'nni con laani xcuent tobejtzni.” <sup>29</sup> Guyu' gajdz niguii, bejtz najcreni. Sas cua' niguigalooga chäälni. Che gujtni ruti xi'nni. <sup>30</sup> Dxejcti cua' ni rojpga gunaaga. Che gujtni, rutiza xi'nni. <sup>31</sup> Sigajcza guzajc ni riojnga. Si'cza guläsnäj gunaaga guigajdzreni. Guiraareni gujt, nicla tejreni di xi'nreni niu'. <sup>32</sup> Dxejcti näj gunaaga gujt. <sup>33</sup> Guigajdzreni guläsnäjreni gunaare, ni'cni, che guibansacreni lo rebengut, ¿chu chäälgacni, ä?

<sup>34</sup> Dxejc räjp Jesús lojreni:

—Lo guedxliujre ruchnaa rebejn, rudeedzaren i xindxa'preni ruchnaa. <sup>35</sup> Niluxh rebejn ni agule Dios te chääreni xhaguibaa, näjza te guibansacreni loj rebengut, di reni'c guchnaa, dizaren i gudeed xindxa'preni guchnaa, <sup>36</sup> sa'csi diru gac guetreni, anajcreni si'c najc rexangl Dios. Laaren i najc xi'n Dios sa'csi abaspansac Diosreni. <sup>37</sup> Moisésli basule' xcuent ni rbansac reben loj rebengut che bacuaani diidx xcuent yajg ni gurebajl. Ro'c gurejdxni Dios räjpni: “Xtios Abram, Xtios Isaac, näjza Xtios Jacob”, ni'cni nabajnpacreni lo Dios. <sup>38</sup> Sa'csi di Dios gac Xtios rebengut; najcni Xtios rebejn ni nabajnpacreni par tejpas, sa'csi par laani guiraa rebejn nabajnpacreni.

<sup>39</sup> Dxejc gaii reni ruluii leii badzu'reni diidxre, räjpreni lojni:

—Mastr, laaca guniilu.

<sup>40</sup> Sa'csi diruren i niajx niniabdiidxruren i lojni.

*Chu xi'n najc Crist*

(Mt. 22:41-46; Mr. 12:35-37)

<sup>41</sup> Dxejcti räjp Jesús lojreni:

—¿Xho mood rniireni Crist najc xi'n toDavid, ä? <sup>42</sup> Ni lagajc toDavid bacuaa lo reguijtz ni laa reSalmo:

Dad Dios räjp lo Xtadä:

<sup>43</sup> “Gurej xladbeä cheni guidzujnli dxej ni gudzugä guiraa ni rdxe'ch lojlu te gacbeereni luj rnibeelu guira'ti.”

<sup>44</sup> ¿Xho mood gacni xi'nni palga rnii toDavid lojni “Dad”?

*Rucuaquij Jesús reni ruluii leii*

(Mt. 23:1-36; Mr. 12:38-40; Lc. 11:37-54)

<sup>45</sup> Guiraa rebejn cagucua diajg che räjp Jesús loj rexpejnpacni:

<sup>46</sup> —Colyajp cuidaad reni ruluii leii, sa'csi rdxaglajzreni rajcwreni lajd siool, rlanjreni saru guinii guiraa rebejn “xchan” lojreni, rlanjreni jiu bejnreni nez loguii, rlanjreni cuereni lo reyagxhilsa'c nen reguidobäz, näjza cadre rajc lanij. <sup>47</sup> Rudzucajzaren i rehxixten regunabiuud, dxejc rolneni rele' siolduxh che rniabreni lo Dios te fii rebejn, te naa bejn najcreni bendxan, luxh lojreni suxhal Dios te castigwroru.

## 21

*Gojn xten te gunabiuud*

(Mr. 12:41-44)

<sup>1</sup> Nen guidoro bahuii Jesús cagusäl rebenrajp gojn nen te guijn cadre rdojp gojn.

<sup>2</sup> Bahuiizani lo te gunabiuud, lacti proobni. Basälni xcojnni nen guijnga, tio'ptis melbäz basälni. <sup>3</sup> Dxejc räjp Jesús:

—Rniliäpac lojtu, gunabiuud proobga basälruni loj guiraa reni casäl gojn, <sup>4</sup> sa'csi guiraa reddec ni cagusäl xcojnni casälreni tudxe'nsi xmeelreni, niluxh gunaare loj xcälproobni, basälni guiragajc ni rajpni te jio' xhi gauni.

*Räjp Jesús sibijl guidoro*  
(Mt. 24:1-2; Mr. 13:1-2)

<sup>5</sup> Yu' reni cayujy diidx xcuent guidoro, räjpreni:

—Lacti sacruduxh rienni sa'csi guisa'c naccheeni, suchenäjzani xhidajl recossa'c ni badeed bejn si'c gojn.

Dxejc gunii Jesús lojreni, räjpni:

<sup>6</sup> —Sidzujn dxej sibijl guiralii ni cahuiitu, nicla tej guij di jia'n yejc sa'ni, guiragajcni sibijl.

*Reseen ni chu che nitloj guedxliuj*  
(Mt. 24:3-28; Mr. 13:3-23)

<sup>7</sup> Dxejc gunabdiidx rexpejn pacni lojni, räjpreni:

—Dad, Mastr, ¿guc gacni? ¿Xhi seen chu che gac recosga?

<sup>8</sup> Räjp Jesús lojreni:

—¿Colsusin te na'c gusgueereni la'tu! Sa'csi xhidajl reni jiäd sinii: “Narä nacä Crist”, o “Asiädgajxh redxej che jiädni”, per na'c chalilajztu xtiidxreni, na'cza chanajltureni.

<sup>9</sup> Luxh che jiejn diajgtu cayajc guer cadilnäj sa' bejn, na'c guidxejbtu, sa'csi ganid recosga gac, luxh gad gal di nitloj guedxliuj.

<sup>10</sup> Dxejc sanuu cayäjpni lojreni:

—Säjs te nación, sucuanäj stee nación, näjza te ladx bejn sucuanäj stee lajdx bejn.

<sup>11</sup> Sajcza xuro, su' gubijnd, su'za yälguijdx nez ree nez rec. Luxh xhaguibaali sien guiraloj ni ruchejb näjza seenro.

<sup>12</sup> Luxh ganid gac recosre, siniaazreni la'tu, sirinajlreni la'tu, sutedreni la'tu trabajw. Sutedreni la'tu lo reben guidobäz, susälzarenı la'tu nen latzguiib, sinäzarenı la'tu nez loj reii näjza gubernadoor sa'csi rinälajztu xtidxä. <sup>13</sup> Luxh guiraa dee sajctu te gac gusule'tu xtidxä lojreni. <sup>14</sup> Na'c gunxgaatu xhigab nen lastootu xhini'c guiniitu lojreni,

<sup>15</sup> sa'csi narä sunidxä diidx guiniitu, sunidxäza yäl najn lojtu te digac gudzu'reni diidx lojtu niclaza gacdi guiniyajreni xtiidxtu. <sup>16</sup> Näjza rex cuzajntu sibire lojtu, suto'reni la'tu, sigajcza rebejztu, resa'tu, rexamiigwtu, luxh yu'tu sugu'treni. <sup>17</sup> Guiraa rebejn guedxliuj sibälaz la'tu sa'csi rinälajztu xtidxä. <sup>18</sup> Niluxh ni'cla tej xquidxejctu di nitloj. <sup>19</sup> Luxh palga sutijptis lajztu, sajptu yäl nabajn par tejpas.

<sup>20</sup> Che fiitu tre' xhidajl soldaad guideb gabi guedx Jerusalén colyabee abidzujn dxej ni guibijl ni. <sup>21</sup> Dxejc reni yu' guedx Judea, nanab guxunreni chacuatzlojreni nen redajn; reni yu' guedx Jerusalén, nanab jiunejzreni ro'c; reni suga' lo niaa, na'c guibi'reni lo guejdxga, <sup>22</sup> sa'csi nen redxejga sujn Dios fis lo guejdxga te soob rediidx ni caj lo reguijtz xten Dios. <sup>23</sup> Probe'za regunaa ni nuu bäz nen redxejga, näjza regunaa ni ca' bäz, sa'csi su' yälhuinduxh lo guedxliuj, näjza fis ni gun Dios loj rebejnga. <sup>24</sup> Yu'reni guet lo guer, yu'zarenı chää pres, sijrenı balti guedxzijt. Dxejc rebenzijt sinibee guedx Jerusalén che guiza'li redxej ni gusaan Dios guinibee rebejn ni di gac xpejn Israel.

*Cheni jiäd Xi'n Niguii*  
(Mt. 24:29-35, 42-44; Mr. 13:24-37)

<sup>25</sup> Räjzani:

—Dxejc su' seen lo gubijdx näjza lo bäii, näjza loj rebajle' ni yu' xhaguibaa. Luxh lo renacion guedxliuj su' rebejn yärsia', di jien xhi gunreni, sidxebduxhreni sa'csi siejn diajgrenı chubeduxh lo nisdoo, säsduxh nis ni räjs lo nisdoo. <sup>26</sup> Sitiol rebejn xcuent yälrdxebduxh che gunrenı xhigab xhicharuni'c gac lo guedxliuj, sa'csi näj guideb guibaa sinibsejs. <sup>27</sup> Dxejcti suhuiireni lo Xi'n Dios ni gujc Niguii, siädni lo te za guideb xcälrnibeenı, näjza yälrdimbichaduxh. <sup>28</sup> Che guisloj gac recosre, colsutijp lajztu, colguiliäs yejctu, colguibalajz sa'csi asadzujn dxej gusilajztu.

<sup>29</sup> Guniizani stee cuent lojreni, räjpni:



—¿Colhuii lo yagiigw nájza lo guiraa reyajg! <sup>30</sup> Che fiitu acabääni be'n, colyacbee lagajc la'tu, abidzungajxh bäii nisguij. <sup>31</sup> Sigajcza che fiitu agusloj cayajc recosre, colyacbee asiäddzujñ xcälñibee Dios.

<sup>32</sup> 'Rniliápac lojtu, guiraa recosre sajc ansde guet rebejn ni yu' naj. <sup>33</sup> Guibaa nájza guedxliuj sinitloj, rextidxä dini nitloj.

<sup>34</sup> '¿Colsusin lagajc la'tu! Na'c gusaantu cha lajztu yälrausa'c, yälrä', yälga'ptu xhixtentu, dxejc ditu gacbee che bidzujñ dxejga. <sup>35</sup> Sa'csi si'c sidzujñ dxejga loj guiraa reben guedxliuj. <sup>36</sup> Colsusin, colbejdx, colguiniabtis lo Dios, te gac laatu lo guira'ti ni gac, gacza suutu nez loj Xi'n Dios ni gujc Niguii.

<sup>37</sup> Rdxee ruluii Jesús nen guidoro dxejc guxhijn sajia'nni yejc dan Oliib. <sup>38</sup> Rsilru ristie rebejn te rdzujñreni lo Jesús nen guidoro casob rsil, te gucuadiajgreni rextiidxni.

## 22

### *Ria'nreni diidx xho guiniaazreni Jesús*

(Mt. 26:1-5, 14-16; Mr. 14:1-2, 10-11; Jn. 11:45-53)

<sup>1</sup> Siäddzungajxh dxe lanij che rajwreni yätxtiil ni di säguij, laaza lanijga pascw. <sup>2</sup> Dxejc reni rnibee loj rebixhojz nájza rebejn ni ruluii leii caguilreni xho gunreni te ju'treni Jesús, sa'csi rdxejbreni rebenguejdx.

<sup>3</sup> Dxejc biu' beñdxab lastoo Judas ni laaza Iscariote, ni najc tej retzubitio'p xpejn pacni. <sup>4</sup> Dee huininäjni dade' ni rnibee loj rebixhojz nájza loj reni rnibee rexcuxhtis guidoo. Guninäj Judasreni xho gunni te guteedni Jesús ladzñaareni. <sup>5</sup> Dxejc bibalajzreni, bia'nreni diidx gudeedreni meel lojni. <sup>6</sup> Cuäjbtu Judas, dxejcn guslojni caguilni xho gunni guteedni Jesús ladzñaareni che rut bejn di suga'.

### *Xchej xten Dad Jesús*

(Mt. 26:17-29; Mr. 14:12-25; Jn. 13:21-30; 1Co. 11:23-26)

<sup>7</sup> Bidzujñ dxe lanij che rajwreni yätxtiil ni di säguij, che rugu'tzareni te xiil si'c ni caj lo xleii toMoisés. <sup>8</sup> Dxejc baxhal Jesús Pedr nájza Juan, räjpni lojreni:

—Colchayejn xchej xten pascw te guidaununi.

<sup>9</sup> Dxejc laareni gunabdiidxreni lojni, räjpreni:

—¿Caro rlajzlu choyennuni?

<sup>10</sup> Räjp Jesús lojreni:

—Cheni jiu'tu lo guejdx, sidxaagtu te dade' ni nuu te re' nis. Colchanajlni, coljiu' rolijz bejn cadre jiu'ni laani. <sup>11</sup> Dxejc colye'tz lo bejn ni najc rolijzni ro'c: “Si'c naj Dad Mastr: ¿Con yu' cadre sajc gauxchenää rexpenä naj pascw?” <sup>12</sup> Dxejc guluiini lojtu te yu' ni sojb jiaa yejc stee yu'. Asuchexгаа yu'ga. Ro'c colyejn xhi guidaunu.

<sup>13</sup> Sä'tireni. Si'ctis ni räjp Jesús lojreni, si'cpac bidxälreni. Dxejc bejnreni xchej xte lanij pascw gaureni.

<sup>14</sup> Che bidzujñ or, gurenäj Jesús rexpejn pacni lo mex. <sup>15</sup> Dxejc räjpni lojreni:

—Guyuduxhä gaan gaunääpactu xchej xten pascw ansde tedä trabajwduxh. <sup>16</sup> Sa'csi rniä lojtu, diruna gaunää la'tu pascw cheni guidzujñli dxej ni gacni lo xcälñibee Dios.

<sup>17</sup> Dxejc cua'ni te co'p, badeedni xquixtios lo Dios, räjpni:

—Colyä' dee, colgudeedni lo sa'tu. <sup>18</sup> Sa'csi rniä lojtu, diruna yä'ä nis ni rii yejc uub stehuält cheni guidzujñli xcälñibee Dios.

<sup>19</sup> Dxejcti cua'ni yätxtiil, badeedni xquixtios loj Dios, gula'nini, gudisnini lojreni, räjpni:

—Dee najc si'c tiexhä ni gudedä ju'treni xcuenttu. Colyejn screeza te guinalajztu narä.

<sup>20</sup> Si'cza bennäjni co'p che gulujx gudajwreni, räjpni lojreni:

—Ni yu' nen co'p najc si'c xtienä ni guixe' che ju'treni narä xcuenttu te si'c jiu' didxcoob ni jia'n Dios con rebejn ni aguleni.

<sup>21</sup> 'Per bahuilaare, bejn ni guto' narä sobganäj narä lo mexre. <sup>22</sup> Guliipacni, Xi'n Dios ni gujc Niguii sinuu tedni loj nezyuj ni abaluii Dios lojni. Luxh proobza bejn ni guto' narä.

<sup>23</sup> Dxejc gusloj canabdiidxreni lo sa'reni, ¿chuchani'c gunni?

*Cayejyreni chuni'c najc beṅroru*

<sup>24</sup> Sas gusloj cayejyreni, don chuni'c guibee gac beṅro lojreni.

<sup>25</sup> Dxejcti räjp Jesús lojreni:

—Rereii ni rnibee lajdx bejn ni digac xpejn Israel, rnibeereni lojreni astoo xtenpacreni najc reguejdxga. Luxh rebenguejdxga rnii lacti hueen najc rereiiga. <sup>26</sup> Per la'tu na'c gactu si'c. Nani najc beṅgoolru lojtu, ni'c riäj] gacni si'c najc ni huinru lojtu. Luxh nani rnibee riäj] gacni si'c mos. <sup>27</sup> ¿Chuni'c sajcru lo bejn? ¿La bejn ni rbej lo mex te gauni o la ni ruteed xhi gauren lo mex? ¿La xhet sajcdiru bejn ni sojb lo mex, ä? Niluxh narä yu'ä lojtu si'c ni ruteed xhi gauni.

<sup>28</sup> 'La'tu najctu ni gusunäj narä guideb ni gudedä retrabajw ni gudedä. <sup>29</sup> Ni'cni narä runidxä yälrnibee lojtu sigajc ni baniidx xtad yälrnibee loä, <sup>30</sup> te gautu, yätu lo xmexä xhaguibaa, te cuezatu lo yagxhil cadro guntu yälguختis loj rexpejn guitzubitio'p rexagdoo Israel.

*Räpxgaa Jesús di Pedr guicäjp numbeeni*

(Mt. 26:31-35; Mr. 14:27-31; Jn. 13:36-38)

<sup>31</sup> Räjp Jesús loj Simón:

—Simón, Simón, agunab beṅdxab ni laa Satanás luj te gusniibni luj si'c rusniib bejn xob te jiani. <sup>32</sup> Narä agunabä lo Dios xcuentlu te na'c jiäädx xcälrlilajzlu. Luxh luj che gusiejch lajzlu, guibi'lu, bastioob lastoo resa'lu.

<sup>33</sup> Räjp Simón lojni:

—Dad, narä sirinalälu; mase gusäureni luj latzguiib, näjza narä siäunäälu; mase ju'treni luj, näjza narä setnäälü.

<sup>34</sup> Dxejcti räjp Jesús loj Simón:

—Pedr, rniä lojlu, nicla gajd guidgaii cuedxa' nadxej niluxh luj alaräjplu chonli huält, dipaclu gumbee narä.

*Nanab soob rediidx ni bacuaareni xcuent Jesús*

<sup>35</sup> Dxejc gunabdiidx Jesús lojreni räjpni:

—Che ganaxtu baxhalä la'tu, xhet bolsdi sanätu, nicla carteerdi, niclaza stee gura'chdi, ¿la yu' xhi biquiintu, xhi biäädx lojtu, ä?

Dxejc räjpreni:

—Xheti.

<sup>36</sup> Dxejc räjpni lojreni:

—Luxh naj rniä lojtu, ni rajp bols, suchanänini; sigajcza carteer. Luxh ni di ga'p espaad, guto'ni xchamarni te siini tejni. <sup>37</sup> Sa'csi rniä lojtu, sisiojb rediidx ni caj lo requijtz Dios xcuentä, cadro caj: “Bigabnäjni reben latsiaj.” Guiraa ni caj lo reguijtz xten Dios xcuentä nanab soobpacni.

<sup>38</sup> Dxejc räjpreni lojni:

—Dad, aree tio'p espaad.

Dxejc räjpni lojreni:

—Sajl reni'c.

*Rbedx-rniab Jesús loj Dios*

(Mt. 26:36-46; Mr. 14:32-42)

<sup>39</sup> Dxejcti birii Jesús, si'cni rujnpacni, sääni nez dajn ni laa Oliib. Dxejc sanajl rexpejnpacni. <sup>40</sup> Che bidzujpreni ro'c, räjpni lojreni:

—Colcuedx, colnab lo Dios te na'c jiajbtu lo dojl.

<sup>41</sup> Dxejc gubicaaj Jesús lojreni, huijni te lajt zite' cadro suga'reni, si'cti cadro rdzujp te guij che rucuaanini. Ro'c bazuxhijbni, gurejdx-gunabni lo Dios, <sup>42</sup> räjpni:

—Xtadä, palga rlajzlu, basläa narä loj trabajwduxhre. Niluxh na'c gacni si'c ni rlazä narä. Bejn si'cni rlajzlu gunlu.

<sup>43</sup> Dxejc biricaj te xangl Dios lojni te badeedni yälrutiplajzni. <sup>44</sup> Lałni cadejdni trabajwduxh, cayac-huinduxh lajzni, cabedx-canabruni lo Dios. Guzunislini gusloj catejeb lo yuj biniduxh si'c rejn lojni.

<sup>45</sup> Cheni huisuni, gulujx gurejdx-gunabni lo Dios, huijni cadro suga' rexpejn̄pacni. Ro'c bidxálnireni nagayejs guiraareni sa'csi cayac-huin lajzreni. <sup>46</sup> Dxejc räjpni lojreni:

—¿Xhicuent nagayejstu? ¡Colchastie! ¡Colnab lo Dios te na'c jiajbtu lo dojl!

#### *Che gunaazreni Jesús*

(Mt. 26:47-56; Mr. 14:43-50; Jn. 18:2-11)

<sup>47</sup> Lał ni canii Jesús lojreni, bidzujñ xhidajl bejn. Tej rexpejn̄pacni ni laa Judas, nijdni nez loj rebejn̄ga. Dxejcti gubigni loj Jesús, te bachagro'ni loj Jesús. <sup>48</sup> Dxejc räjp Jesús lojni:

—Judas, ¿la con te yälruchagro' rutedlu Xi'n Dios ni gujc Niguii ladz̄naa rebejn̄re, ä?

<sup>49</sup> Che bahuii reni suganäj Jesús xhini'c cayajc ro'c, gunabdiidxreni loj Jesús, räjpreni:

—Dad, ¿la sixa'tnu yejcreni con spaad, ä?

<sup>50</sup> Sas tej rexpejn̄ Jesús gudiññä te mos xten ni rnibee loj rebixhojz, batiu'ni diajgni ladbee. <sup>51</sup> Dxejc räjp Jesús lojreni:

—¡Agujc! ¡Colgusaanreni!

Dxejc gudajn Jesús diajg mosga, basiajcnini. <sup>52</sup> Gunigajc Jesús loj reni rnibee loj rebixhojz nájza reni najc guixhajg xten guidoo nájza rebengool, guiraa reni siädxiinini, räjpni:

—¿La siädñätu spaad nájza garo't, astoocanu siädxiitu te gubaan, ä? <sup>53</sup> Cheni suga'a lojtu guixe-guixee nen̄ guidoo, ditu nuhual narä. Per dee najc xortu, luxh arnibee yälñacäjy la'tu.

#### *Di Pedr guicäj̄p numbeeni Jesús*

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

<sup>54</sup> Dxejcti gunaazreni Jesús huinärenini rolijz bixhojz ni rnibee lo guiraa rebixhojz. Siädñäj̄l Pedrni zit-zijt. <sup>55</sup> Che bidzujñreni gule'creni guiboo galäii lole' xten bixhojzga, gurejreni guideb gabi, te bidxa' lajzreni. Näj Pedr nadxaag lojreni gurej ro'c. <sup>56</sup> Dxejc te gunaa ni rujn dzuun ro'c, che bahuiini sobga' Pedr ro'c, rdxelojtisni lojni, räjpni:

—Näj niguiire guyunäj Jesús.

<sup>57</sup> Dxejc basuni' Pedr räjpni:

—Nan, dina gumbeäni.

<sup>58</sup> Che gojl stera't, che bahuii stee bejn̄ lojni, räjpni lojni:

—Näj luj najclu te rexpejn̄ni.

Per Pedr räjp lojni:

—Gurniälojlu, Dad, dina gacä xpejn̄ni.

<sup>59</sup> Che gudejd si'cti teb or, räjp stee bejn̄ lojni:

—Guliipacni, näj bejn̄re guyunäjni, sa'csi laani najczani te beñ Galilee.

<sup>60</sup> Dxejc räjp Pedr lojni:

—Gurniälojlu Dad, dipacna ganä xhini'c caniilu loä.

Lałni canii Pedr rediidxre, guredxa' te guidgaii, <sup>61</sup> luxh gubiréza Jesús, bahuidzu'tzn̄ni lo Pedr, dxejc banalajz Pedr nani gunii Jesús lojni, räjpni: “Che gajd guidgaii cuedxa', abazuni'lu choñ huält, räjp̄lu dilu gumbee najrä.” <sup>62</sup> Dxejcti guc-huin lajz Pedr, biriini ro'c, ronduxhni.

#### *Rniyajreni Jesús*

(Mt. 26:67-68; Mr. 14:65)

<sup>63</sup> Rebejn̄ ni canäj Jesús, gusloj caguxhisnäjrenini, caguijn̄zarenini. <sup>64</sup> Dxejc basäuren̄ni lojni, gudajpreni lojni, räjpreni lojni:

—¡Gunii chuni'c gudijn̄lu!

<sup>65</sup> Luxh guiraloj cayäjbreni lojni, caniyaduxhrenini.

*Bidzunnäjreni Jesús nez loj rebixhojz*  
(Mt. 26:59-66; Mr. 14:55-64; Jn. 18:19-24)

<sup>66</sup> Che bara yääl, bidojp rebengool ni rnibee, näjza reni rnibee loj rebixhojz, näjza rebejn ni ruluii leii, huinäreni Jesús te suuni nez lojreni neņ yu' cadre rujnreni yälguxhtis. Dxejcti räjpreni lojni:

<sup>67</sup> —Palga luj najclu Crist, bicäjpni loonu.

Dxejc badzu' Jesús diidxre lojreni, räjpni:

—Palga guicäpäni, ditu chalilajz. <sup>68</sup> Luxh palga gunä te yälgunabdiidx lojtu xcuent Crist, ditu gudzu' diidxga loä. <sup>69</sup> Per najli sibej Xi'n Dios ni gujc Niguui xladbee Gueb Dios ni yu' xhaguibaa.

<sup>70</sup> Dxejc gunabdiidx guiraareni lojni, räjpreni:

—Mbaj pues, ĵla luj najclu Xi'n Dios, ä?

Dxejc badzu' Jesús diidxre lojreni räjpni:

—Nacäni, si'cni najtu la'tu.

<sup>71</sup> Dxejc räjpreni lo sa'reni:

—ĵXhirucxhamaaz rlanjtu? Dirunu guiquiin diidx guinii bejn, sa'csi lagajc nuurnu abiejn diajgnu diidx ni guniini lagajc laani.

## 23

*Jesús nez loj Pila't*

(Mt. 27:1-2, 11-14; Mr. 15:1-5; Jn. 18:28-38)

<sup>1</sup> Dxejc huisu guiraareni, huinäreni Jesús nez loj Pila't. <sup>2</sup> Ro'c guslojreni cabe'creni xquejni, räjpreni:

—Bidxälnu bejnre cayujnni bieje lo rexpejnnu. Räjpzani xhet nanabdi quixnu impuest lo reii César. Caniizani laani najcni Crist, nalajznu najczani reii.

<sup>3</sup> Dxejc gunabdiidx Pila't lojni, räjpni:

—ĵLa luj ni najc reii xten rexpejn Israel, ä?

Sas badzu' Jesús diidxre räjpni:

—Najcni lagajc si'c ni guniilu.

<sup>4</sup> Dxejc räjp Pila't loj reni rnibee loj rebixhojz näjza loj guiraa rebejn:

—Dina guidxälä nicla tej dojl xten bejnre.

<sup>5</sup> Niluxh laareni sanuutis caniireni, dipru caniireni, räjpreni:

—Guiraa reben Judea cayu' yärsia' xcuent xcälrluluiini. Guslojni guedx Galilee, luxh reeli sanuu caguluiinini.

*Jesús nez loj Herodes*

<sup>6</sup> Che biejn diajg Pila't rediidxre, gunabdiidxni: “ĵLa Galilee siäd bejnğa?” <sup>7</sup> Cheni räjpreni ro'c siädni, baxhalnini loj Herodes ni najc gubernadoor xten Galilee, sa'csi neņ redxejga yu' Herodes guedx Jerusalén. <sup>8</sup> Che bahuii Herodes loj Jesús, bibalajzni sa'csi agujc xchej rlajzni fiini lojni, sa'csi abiejn diagni diidx xcuent ni cayujnni. Luxh rlajzni fiini gunni te milaagwr. <sup>9</sup> Xhidajl yälgunabdiidx bejn Herodes, luxh xhet guniidi Jesús. <sup>10</sup> Ro'c suga'za reni rnibee loj rebixhojz näjza rebejn ni ruluii leii, cabecduxhrureni xquejni. <sup>11</sup> Dxejc gulälaz Herodes näj rexsoldaadni Jesús, baxhiznäjrenini, ni'c bashuajcwrenini te ladsa'c sa' ni rajcw reii, dxejcti baxhalsacrenini loj Pila't. <sup>12</sup> Lagajc dxejga, Pila't näjza Herodes gujcreni amiigw, luxh galoo bidxe'ch lo sa'reni.

*Gunibeereni guet Jesús*

(Mt. 27:15-26; Mr. 15:6-15; Jn. 18:39-19:16)

<sup>13</sup> Dxejc gurejdx Pila't reni rnibee loj bixhojz, näjza rebengool ni najc guxhtis, näjza rebenguejdx. <sup>14</sup> Dxejc räjpni lojreni:

—La'tu biädñatu bejnre loä, najtu caguquılni rebejn gunreni bieje, luxh narä agunabdiidxä guiraloj lojni nez lojtu, luxh abahuiitu dina nidxälä nicla tej dojl ni

cagucuaquijituni. <sup>15</sup> Niclaza Herodes di nidxäl nicla tej dojl, ni'cni baxhałsacnini loonu, luxh abahuiitu xhet dojldi bejnni te guetni. <sup>16</sup> Ni'cni quinäni, dxjecti guslaáni.

<sup>17</sup> Najc costumbr ruslaa Pila't te bejn ni yu' neñ latzguiib casob rajc lanijre. <sup>18</sup> Per guiraareni guredxa'reni si'c tejsi bejn, räjpreni:

—jBagu't bejnre, baslaa Barrabás!

<sup>19</sup> Barrabás najc ni basälreni latzguiib sa'csi batojpni te cuaa bejn ni bacuanäj resoldaad xten Rom, näjza sa'csi yu' chu bagu'tni. <sup>20</sup> Rlajzpac Pila't guslaani Jesús, ni'c gunisacni lojreni, <sup>21</sup> niluxh rebejn dipru guredxa'reni, räjpreni:

—jBacuaani lo crujz, bacuaani lo crujz!

<sup>22</sup> Riojn gunisac Pila't lojreni, räjpni:

—¿Xhi doıduxh bejnni? Xhetlidi dojl rdxälä bejnni te guetni. Ni'cni siguinäni dxejc suslaáni.

<sup>23</sup> Luxh laareni sanuutis guredxa'reni, gunabreni xcajni lo crujz. Luxh sa'csi guredxa'tisreni, bejntireni gaan gujc si'c ni rlajzreni. <sup>24</sup> Dxejc cuäjb Pila't gunibeeni gac si'c ni gunabreni. <sup>25</sup> Dxejc baslaani bejn ni yu' latzguiib sa'csi bejnni bieyj, bagu'tzani bejn, dxejc badeedni Jesús lojreni te gunnäjrenini si'ctis ni rlajzreni.

### *Che cuaj Jesús lo crujz*

*(Mt. 27:32-44; Mr. 15:21-32; Jn. 19:17-27)*

<sup>26</sup> Cheni sanäreni Jesús xcaj lo crujz, gunaazreni te bejn ni laa Simón ni siääd guedx Cirene; basaj bejnğa lo niaa. Dxejc basguurenini crujz, siädnajltini dejtz Jesús.

<sup>27</sup> Siädnajlza xhidalduxh bejn, näjza xhidajl gunaa ni cayonduxh, cabedxa'reni sa'csi cayac-huinduxh lajzreni xcuent Jesús. <sup>28</sup> Dxejc gubiré Jesús, räjpni lojreni:

—Gunaa Jerusalén, na'c roontu xcuentä, colyoon lagajc xcuenttu näjza xcuent rexi'ntu. <sup>29</sup> Sa'csi sidzujñ dxej gäbreni: “Chicbaa regunaa ni di gacdi chu xi'nni, chicbaaza reni di nuxi'n, renani di nusiä' báz.” <sup>30</sup> Dxejc guisloj rebejn gäb loj redajn: “Coljiajb yejcnu”, säjzbareni loj relom: “Colgucua'tz nuurnu.” <sup>31</sup> Palga scree runnäjreni narä ni nacä si'c te yagnaga, aticaxh gunnäjreni la'tu ni najc si'c te yagbijdz.

<sup>32</sup> Sanäzarenı tıo'p benguijdx xcajzarenı loj recrujz, guetnäjrenı Jesús. <sup>33</sup> Che bidzujñrenı te lajt ni laa Calabeer, ro'c bacuaarenı Jesús lo te crujz, bacuaazarenı guiro'p rebenguijdxga lo stıo'p crujz, tejni xladbee, steeni xladbäjgwnı. <sup>34</sup> Chenı cagucuaa rebejn renı lo crujz, gunıı Jesús, räjpni:

—Xtadä, badzucaj xtojł rebejnre, sa'csi direni gan xhini'c cayujñreni.

Dxejc gudzujt resoldaad daad yejc xhajbni, te gudisreni xhajbni cua'renini. <sup>35</sup> Suga' rebejn ro'c cadxelojtisreni. Näjza reguxhtis caguxhisnäjreni laani, cayäjpreni:

—Balti bejn baslaani, naj suguslaani lagajc laani palga guliini laani najcni Crist ni gule Dios.

<sup>36</sup> Näjza resoldaad caguxhisnäjni, gubigreni lojni te badeedreni bin-nii yäni. <sup>37</sup> Dxejc räjpreni lojni:

—Palga guliı najclu reii xten rexpejn Israel, baslaa lagajc luj.

<sup>38</sup> Luxh bacuaarenı gaiı diıdx loj te baräjd ni cuaj yejc crujz. Con didx griegw, con didx latın, näjza didx hebreo, bacuaarenı scree: “Dee najc Reii xten rexpen Israel.”

<sup>39</sup> Te rebenı guijdx ni najł lo te crujz ni caj cuä'ni canıyajni Jesús, räjpni lojni:

—Palga luj najclu Crist, baslaa lagajc luj nägajcza nuurnu.

<sup>40</sup> Per benguijdx ni najł lo crujz stelaadga gudıdxa'ni loj stee benguijdx ni canıyaj Crist, räjpni:

—¿La dilu guidxejb Dios? ¿Ni cayajczalu tejsi castııgw! <sup>41</sup> Per nuurnu cayajcnu castııgw ni riäjł gacnu te guıdıxnu redojl ni bienu. Luxh laani xhet dojldi bejnıı.

<sup>42</sup> Dxejc räjpni loj Jesús:

—Bazalajzlu narä che guidzujñlu lo xcäırnıbeelu.

<sup>43</sup> Dxejc badzu' Jesús diıdxre, räjpni lojni:

—Rnıliäpac lojlu, lagajc nadxej chunäjlu narä xhaguıbaa.

*Che gujt Jesús**(Mt. 27:45-56; Mr. 15:33-41; Jn. 19:28-30)*

<sup>44</sup> Agojl si'cti läidxej. Dxejc bicäy guideb guedxliuj, si'c bianxcäy si'cti rcachonti.  
<sup>45</sup> Bicäy lo gubijdx, luxh ladró ni najl neñ yudxanro xten guidoro, biräjsni gucni tio'p la'.

<sup>46</sup> Dxejcti guredxa' Jesús, räjpni:

—Xtadä, ladzñaalu rutedä xaimä.

Che guniini si'c, gujttini.

<sup>47</sup> Che bahuii capitán ni rnibee loj resoldaad guiraa ni guzajc, gulä'pni xpala'n Dios, räjpni:

—Guliipacni, xhet dojldi bejn bejnre.

<sup>48</sup> Guiraa rebejn ni suga' ro'c ni bahuii guiraa ni guzajc ro'c, gubi'reni rolijzreni, cayääzreni lagajc lastooreni. <sup>49</sup> Luxh guiraa reni rumbee Jesús, näjza regunaa ni biädnajl ni che biriilini Galilee, zijtru bia'nreni cahuiireni guiraa recos ni cayajcre.

*Che biga'tz Jesús**(Mt. 27:57-61; Mr. 15:42-47; Jn. 19:38-42)*

<sup>50</sup> Guyu' te bejn ni laa José, lacti huen najcni, luxh laaca rujni guira'ti. Siädni guedx Arimatea, región Judea. Nadxaagzani loj reni rnibee neñ guidoro xten rexpejn Israel. <sup>51</sup> Cabäjzta José jiäd yälrnibee xten Dios, ni'cni dini nidxaglaz nani bejn resa'ni. <sup>52</sup> Dxejcti huijni lo Pila't, gunabni tiejxh Jesús. <sup>53</sup> Che gulätnini lo cruiz, batejbnini neñ te bariaad, dxejcti bacua'tznini neñ te baa ni guc-chee cuä' te guilaj. Nacoob baaga, nicla tej bejn gajd guiga'tz ro'c. <sup>54</sup> Dxejga najc dxej ni rusucheereni guira'ti, luxh agojl jiu' dxej ni rusilajzreni.

<sup>55</sup> Regunaa ni guzanäj Jesús che biriilini Galilee huihuiireni robaaga te bahuiireni xho gudixhreni togoolga neñ baa. <sup>56</sup> Che gubi'reni rolijzreni bencheereni recuaan ni rlianexhduxh näj te ni najc si'c te saj ni rlianexhduxh ni ruzaareni retogool. Dxejcti basilajzreni dxej ni rusilajz bejn, si'cni caj lo xleii Moisés gunreni.

## 24

*Che gubansac Jesús lo rebengut**(Mt. 28:1-10; Mr. 16:1-8; Jn. 20:1-10)*

<sup>1</sup> Dxej ni gusloj xmaanga, rsildooru huiinä regunaaga robaa recuaan ni rlianexh ni bencheereni. <sup>2</sup> Che bidzujnreni, bahuiireni agubicaj guij ni rusäu ro' baa. <sup>3</sup> Dxejc che biu'reni neñ baaga, direni nidxäl tiejxh Jesús. <sup>4</sup> Laļ ni cadxelojreni, di jien xhi gunreni, biricaj tio'p dade' gusuj cuä'reni. Rdimbichaduxh xhajbreni. <sup>5</sup> Bidxebduxh regunaaga, basajbreni lojreni lo yuj. Dxejc räjp redade'ga lojreni:

—¿Xhicuent siädtiiltu te bejn ni nabajn lo rebengut, ä? <sup>6</sup> Rutini ree. Agubansacni. Colgusnaj lajztu rediidx ni guniini cheni gususijcni Galilee, <sup>7</sup> che najni lojtu: “Riäjl jiajb Xi'n Dios ni gujc Niguii ladzña rebendoj, xcajzani lo cruiz, dxejc ni riojn dxejga sibansacni loj rebengut.”

<sup>8</sup> Dxejc banaj lajz regunaa xtidx Jesús, <sup>9</sup> biriireni robaa, gubi'tireni te bijreni diidx lo retzubiteeb rexpejn pacni näjza loj rebejn ni yunäjreni. <sup>10</sup> Reni huisa'n diidx loj rexpejn pac Jesús najc redee: Marii Magdalen, näjza Xuan, näjza Marii xnan Jacoob, näjza sgaii gunaa. <sup>11</sup> Niluxh rexpejn pacni bejn xhigab didxnayääl ni, direni nililajz xtidx regunaaga.

<sup>12</sup> Dxejc huisu Pedr, ruxunlini huijni ro' baa. Che gudixhlojni, bahuiini neñ baaga, ganaxtis bariaad dzuub te laad. Dxejc gubi'ni rolijzni, rdxelojtisni xluent ni gujc.

*Ni guzajc lo nezyuj ni sii guedx Emaús**(Mr. 16:12-13)*

<sup>13</sup> Lagajc dxejga, tio'p rexpejn pacni sääreni te guejdx ni laa Emaús, ni ria'n si'cti tzubiteeb kilómetro loj guedx Jerusalén. <sup>14</sup> Laļ ni sasajreni lo nezyujga, cayujyreni diidx xluent reni gujc ro'c. <sup>15</sup> Laļ ni caniireni gubig Jesús lojreni, gusloj sasanäjniren. <sup>16</sup> Luxh



mase cahuiireni lojni, yu' xhi badxojn niembeerenini. <sup>17</sup> Dxejc gunabdiidx Jesús lojreni, räjpn:

—¿Xhini'c rujytu la<sub>l</sub> ni sasajtu, ä? ¿Xhicuent cayac-huin lajztu?

<sup>18</sup> Tejreni ni laa Cleofas badzu' diidxre, räjpn:

—Guiraasi bejn najn xhi gujc neñ guedx Jerusalén. ¿La lujtis bia'nlu neñ guejdxga ni di gan xhi gujc ro'c, ä?

<sup>19</sup> Dxejcti räjpn Jesús lojreni:

—¿Xhini'c gujc ro'c?

Dxejc räjpreni lojni:

—Recos xcuent Jesús ni siäd guedx Nazare't, ni gujc te niguii ni gunii xtidx Dios, rajpni yälrnibeduxh xten Dios loj redzuun ni rujnni näjza loj rediidx ni rniini, nez loj Dios näjza nez loj rebejn. <sup>20</sup> Näjza xho bejn reni rnibee loj rebixhojz näjza rexcuxhtisnu, bateedrenini ladz<sub>naa</sub> reni gunibee guetni, dxejc bacuaarenini lo cruzj. <sup>21</sup> Niluxh nuurnu cabääznu laani gacni nani nus<sub>laa</sub> rexpejn Israel ladz<sub>naa</sub> rebenzijt. Naj agujc chon dxej ni gujc recosre. <sup>22</sup> Luxh yu' gaii gunaa ni nadxaag loonu ni baschelojreni nuurnu. Barsil, che huijreni robaa xteni, <sup>23</sup> direni nidxäl tiejxhni. Biädsa'nreni diidx loonu najreni bahuiireni lo tio'p xangl Dios ni räjpn lojreni, agubansac Jesús lo rebengut. <sup>24</sup> Dxejcti huihuii gaii sa'nu robaa, bahuiizareni najcni si'ctis ni naj regunaaga loonu, niluxh direni nuhuii loj Jesús.

<sup>25</sup> Dxejc räjpn Jesús lojreni:

—¡Lacti nayääl tre' xcäriejntu! Lacti neñ rililajztu xtidx redade' ni gunii xtidx Dios xcuent Crist. <sup>26</sup> ¿La di nungäj<sub>l</sub> tedxgaa Crist retrabajwduxhre dxejcti jiu'ni lo xcälrdimbicha' Dios, ä?

<sup>27</sup> Dxejc gusloj cagusule'ni guiraa rediidx ni caj lo xquijtz Dios xcuent Crist. Guslonäjni xtidx Moisés, dxejc huinuuni basule'ni guiraa reguijtz ni bacuaa redade' ni gunii xtidx Dios.

<sup>28</sup> Che bidzujnreni guejdx cadre sääreni, bejn Jesús si'cni chanuuni chääni lo nezyuj.

<sup>29</sup> Dxejc laareni bascuääzrenini te jiannäjnreni, räjpreni lojni:

—Biannäj nuurnu, sa'csi acayajc gudxej, agojl jiu' guxhijn.

Dxejcti biu' Jesús te jiannäjnreni. <sup>30</sup> Cheni sobganäjnreni lo mex, cua'ni yätxtiil, benle'nini, dxejc gula'nini, gudisnini lojreni. <sup>31</sup> Lagajc dxejc, baxhal Dios balojreni, biembeereni Jesús, dxejc laani gunitlojni lojreni. <sup>32</sup> Dxejcti räjpreni lo sa'reni:

—¿La di lastoonu nibeguiboo cheni siädniini loonu lo nezyuj, che cagusule'ni xtidx Dios?

<sup>33</sup> Dxejc dirureni nibäjz ro'c, alga gunasgajczeni nez, gubi'reni guedx Jerusalén. Ro'c bidxälreni abidojp xpejn<sub>pac</sub> Jesús näjza sgaii bejn. <sup>34</sup> Dxejcti bijreni diidx loj guiro'preni bidzujn, räjpreni:

—Guliipac gubansac Jesucrist, luxh baluilojni loj Simón.

<sup>35</sup> Dxejc guiro'p reni bidzujn bijzareni diidx ni gusajczeni lo nezyuj, näj xho biembeezareni Jesús che gula'ni yätxtiil.

*Baluiloj Jesús loj rexpejn<sub>pac</sub>ni*

*(Mt. 28:16-20; Mr. 16:14-18; Jn. 20:19-23)*

<sup>36</sup> Canisi'creni rediidxre chela baluiloj lagajc Jesús galäiireni, guniini xchan lojreni, räjpn:

—¡Col<sub>cued</sub>xi lajztu!

<sup>37</sup> Per laareni rdxelojreni bidxejbreni, naareni cahuiireni lo te sprit. <sup>38</sup> Dxejc räjpn Jesús lojreni:

—¿Xhicuent cadxejbtu? ¿Xhicuent rac tio'p lastootu? <sup>39</sup> ¡Col<sub>hui</sub> renaä, näjza reni'ä! Lagajc naräni. Col<sub>cajn</sub> narä te fiipactu laa naräni, sa'csi anajntu di te sprit ga'p bääl niclaza tzujt si'c rapä narä.

<sup>40</sup> Che guniini rediidxga, baluigajcni renaani näjza reni'ni. <sup>41</sup> La<sub>l</sub> ni cadxelojreni, di gacdi chalilajzreni, sa'csi cabaduxh lajzreni, räjpn lojreni:

—¿La yu' xhi rajptu gauä ree, ä?

<sup>42</sup> Dxejc badeedreni te la' bälbigue', näjza te la' seer ni yu' tzujn. <sup>43</sup> Ni'c cua'ni gudajwnini nez lojreni. <sup>44</sup> Dxejc räjpni lojreni:

—Dee najc xtidxä ni rniä lojtu cheni yusicä lojtu, rniä riäjł soob guiraa rediidx xcuentä ni caj lo xleii Moisés, näjza lo rexquijtz redade' ni gunii xtidx Dios näjza ni caj lo rexquitz Salmos.

<sup>45</sup> Dxejcti basanijni xcäriejnreni te gucbeereni xhi säloj rediidx ni caj lo rexquijtz Dios xcuentni. <sup>46</sup> Dxejc räjpni lojreni:

—Scree caj lo reguijtz: Nanab guet Crist, dxejc ni riojn dxej, guibañsacni loj rebengut.

<sup>47</sup> Sire'chza diidx xcuent xho rusłaa Crist rebejn neñ dojl che rusiejchreni lajzreni, che rililajzreni xtiidxni. Guedx Jerusalén guislojni, dxejc sire'ch diidx guideb guedxliuj.

<sup>48</sup> La'tu najctu testiigw guiraa recosre. <sup>49</sup> Narä suxhałä Sprit Dxan xten Dios lojtu, ni'c coljia'n guedx Jerusalén cheni jiadłajzlini neñ lastootu, guniidxni yälrnibee ni siäd xhaguibaali.

*Huäjs Jesús xhaguibaa*

*(Mr. 16:19-20)*

<sup>50</sup> Dxejc huiinä Jesúsreni stelaad guedx Jerusalén gajxh lo te guejdx ni laa Betania. Ro'c guläsni naani, benle'ni yejcreni. <sup>51</sup> Lał ni cayujnni si'c, gubicajni lojreni, huäjsni xhaguibaa. <sup>52</sup> Peta laareni gulujx gojnrenini, dxejc cabalazduxhrene gubi'reni guedx Jerusalén. <sup>53</sup> Ro'c guixe-guixee guyu'reni neñ guidoro, calä'preni xpala'n Dios. Sugacni si'c.

## Redidxhuen Xten Jesucrist Ni Bacuaa San Juan

### *Xtidx Dios najc te Niguii*

<sup>1</sup> Galodoo che gusloj guira'ti, ala yu' Diidx. Luxh nani najc Diidxga yunäj Dios, luxh Diidxga najc Dios. <sup>2</sup> Che gajd gac-cheeli guedxliuj, yunäjni Dios. <sup>3</sup> Xcuent laani benchee Dios guedxliuj näjza guira'ti ni yu' lojni. Guiraa recos ni yu' di gacdi niu'reni paru rutini. <sup>4</sup> Laani gojp yälñabajñ. Yälñabajñga najc bianij xten rebejñ. <sup>5</sup> Luxh bianijga rdimbicha' nez lo yälçäjy, niluxh yälçäjyga di niajcdi nusuiinini.

<sup>6</sup> Guyu' te niguii birilaj Juan, ni baxhal Dios. <sup>7</sup> Laani biädni te basule'ni diidx. Biädsule'ni diidx xcuent bianij te nililajz guiraa rebejñ diidx xcuent bianij. <sup>8</sup> Laani dini gac bianij, laani biädsule'ni diidx xcuent bianij. <sup>9</sup> Laa bianijpacga ni rusanij lastoo guiraa rebejñ, luxh naj abiädni lo guedxliujre.

<sup>10</sup> Nani najc Diidxga guyu' lo guedxliujre, xcuent laazani guc-chee guedxliujre, luxh di reben guedxliujre nililajz chu najni najcni. <sup>11</sup> Biädni loj rexpen Israel, niluxh rexpejñni direni nicäjb niu'ni lojreni. <sup>12</sup> Dxejc loj guiraa reni cuäjb guyu'ni lojreni, loj renani huililajz xtiidxni, loj reni'c badeedni yälñabee gacreni xi'n Dios. <sup>13</sup> Laa reni'c ni di gac si'c xi'n ben guedxliuj, ni gojl sa'csi rlajz te biniet chu xi'nni, dee najcpacreni Xi'n Dios sa'csi sudeedni yälñabajñ par tejpas lojreni.

<sup>14</sup> Diidxga gujc te ben guedxliuj. Guläjzni lo guedxliujre, bahuilojzanu xcälrdimbicha'ni, si'c yälrdimbicha' xten xingan xteb xtadni, laani najcpacni nani sanälajz nuurnu, nani rni didxlii loonu. <sup>15</sup> Juan gunii xcuent Jesús. Guredxa'ni, räjpni:

—Laa dee ni rniä, nani siäd detzä sajcruni loä, sa'csi laani ganidni nabajñni loä.

<sup>16</sup> Sa'csi guiraanu cua'nu xcälñasacduxhni, yälracnäy detz yälracnäy. <sup>17</sup> Leii xten Dios biädnä toMoisés, niluxh yälracnäy näjza redidxlii biädnä Jesucrist. <sup>18</sup> Rut chu tejdi abahuii lo Dios, xinxtetni ni yunäjpac Dios, laani basule'ni diidx xcuent Dios loonu.

### *Juan ni rutiobnis gunii chuni'c najc Jesucrist*

(Mt. 3:11-12; Mr. 1:7-8; Lc. 3:15-17)

<sup>19</sup> Dee najc diidx nani gunii Juan ni rutiobnis che baxhal rexpejñ Israel rebixhojz näjza rexpejñ guidoo ni laa levitas, biriireni guedx Jerusalén te sanabdiidxreni lo Juan, räjpreni lojni:

—¿Luj chu najclu?

<sup>20</sup> Dxejcti bicäjpni lojreni, xhet bacua'tzdini lojreni, räjpni:

—Et narädi nacä Crist ni jiäd.

<sup>21</sup> Dxejcti gunabdiidxreni lojni, räjpreni:

—¿Chuxhni'c najclu? ¿La lujni najc Elías?

Räjpni:

—Dina gacäni.

Räjpreni:

—¿La najclu te dade' ni gunii xtidx Dios ni cabääznu jiäd?

Dxejc räjpni:

—Dina gacäni.

<sup>22</sup> Räjpreni:

—¿Chuxhni'c najclu? Te chonänu diidx loj reni baxhal nuure. ¿Xhi rniilu, chuxhni'c najclu?

<sup>23</sup> Räjp Juan:

—Narä nacä nani rbedxa' nez lo reyubijdz si'c ni gunii Isafas, ni gunii xtidx Dios scree: “Colyensa'c xnezyuj Dad.”

<sup>24</sup> Rebejñ ni baxhal redee najc reni rniireni “farisee”. <sup>25</sup> Dxejc gunabdiidxreni stee, räjpreni lo Juan:

—¿Xhicuent rutiobnislu palga dilu gac Crist ni jiääd niclaza Elías niclaza stee niguii ni rnii xtidx Dios ni cabääznu jiääd, ä?

<sup>26</sup> Dxejcti räjp Juan lojreni:

—Narä rutiobnisä con nis, niluxh galäiitu yu' tej nani ditu gumbee. <sup>27</sup> Laa dee ni siääd detzä niluxh di nungäj] nicla surloä cuää xcura'chni, sa'csi sajcruni loä.

<sup>28</sup> Guiraa recosre gujc stelaad cadro laa Betábara, ni ria'n stelaad ro' gueu Jordán cadro cagutiobnis Juan.

### *Jesús najc Xile' xten Dios*

<sup>29</sup> Che bara yääl, bahuii Juan siääd Jesús lojni. Dxejc räjpni:

—¿Colhuii! Aree Xile' xten Dios nani rudzucaj xtoj] reben guedxliuj. <sup>30</sup> Lagajc xcuent dee ni rniä cheni guniä lojtu: “Detzä siääd te niguii ni sajcruni loä, sa'csi ganidli narä agac nabajñni.” <sup>31</sup> Luxh dina niembeäni, per biädtiobnisä con nis te guluiä lo rexpejn Israel chu najcni.

<sup>32</sup> Guniiza Juan stee diidx xcuentni, räjpni:

—Narä bahuiä biäjt Sprit Dxiän xten Dios xhaguibaa si'c te palom guzudxini yejcn. <sup>33</sup> Dina niembeäni, per nani baxha] narä gutiobnisä con nis, laani najni loä: “Cheni fiilu jäjt Sprit Dxiän xten Dios xhaguibaa si'c te palom, sudxini yejc te bejn, laanini najc ni gutiobnis con Sprit Dxiän xten Dios.” <sup>34</sup> Narä abahuiä lojni, ni'cni rniliä: “Dee ni najc Xi'n Dios.”

### *Reni gujc xpejn Jesús ganiddoo*

<sup>35</sup> Che bara stee yääl, sugasac Juan ro'c, suganäjni tio'p rexpejñni. <sup>36</sup> Bahuiini lo Jesús che sasajni, dxejc gunii Juan, räjpni:

—¿Colhuii! ¿Laa dee ni najc Xiil xten Dios!

<sup>37</sup> Biejn diajg guiro'p rexpejñpac Juan diidxga, dxejc sanajlreni Jesús. <sup>38</sup> Che gubiré Jesús bahuiini siädnajlreni, dxejc räjpni:

—¿Xhi caguiiltu?

Räjp rebejnnga:

—Mastr, ¿caro rbäjzlu?

<sup>39</sup> Badzu' Jesús diidxre, räjpni:

—Coltaa, te fiitu.

Dxejcti huijreni te bahuiireni caro rbäjzni ro'c. Biannäjrenini ro'c sa'csi agojl si'cti rcatajp gudxej.

<sup>40</sup> Tej reni biejn diajgni xtidx Juan laa Andrés, bejtz Simón Pedr dxejc huinäj]ni Jesús.

<sup>41</sup> Ganiddoo huitiilni bejtzni, dxejc räjpni lojni:

—Abidxälnu Mesías nani sälojza Crist ni cabääznu jiääd.

<sup>42</sup> Sas huinänini loj Jesús. Che bahuii Jesús lojni, räjpni:

—Luj najclu Simón xi'n Jonás; sirilajlu Cefas nani sälojza Pedr.

### *Gurejdx Jesús Felipe näjza Natanael*

<sup>43</sup> Bara yäälga rlajz Jesús chää nez Galilee. Dxejc bidxaagni Felipe, räjpni lojni:

—Gudanajl narä.

<sup>44</sup> Felipe siääd guedx Betsaida, guedxro ni najcza lajdx Andrés näjza Pedr. <sup>45</sup> Felipe bidxaag Natanael räjpni lojni:

—Abidxälnu bejn nani bacuaa toMoisés xcuentni lo reguijtz xten leii agujc xchej, nani bazä'tza reniguii ni gunii xtidx Dios, Jesús xi'n José ni siääd Nazare't.

<sup>46</sup> Räjp Natanael:

—¿La sajg guirii te bensa'c guedx Nazare't, ä?

Räjp Felipe lojni:

—Gudaa, te fiilu.

<sup>47</sup> Che bahuii Jesús siääd Natanael nez lojni, räjpni:

—Colhuii te ben Israelpac nani dipacni gusguee.

<sup>48</sup> Räjp Natanael:

—¿Xho numbeelu narä?

Badzu' Jesús diidxre lojni räjpni:

—Che gajd Felipe cueedx luj, che suga'lilu ni' te yagiigw, bahuiä lojlu.

<sup>49</sup> Badzu' Natanael diidxre, räjpni:

—Mastr, luj najc Xi'n Dios, luj najc Reii xten rexpē Israel.

<sup>50</sup> Räjp Jesús lojni:

—Sa'csi rniä lojlu, “bahuiä suga'lu ni' yagiigw”, ¿ni'c rililajzlu, ä? Xhidajl cosroru suhuiilu.

<sup>51</sup> Dxejcti räjpzani:

—Rniliäpac lojtu, suhuiitu guixal xhaguibaa, näjza rä'p riäjt rexangl Dios yejc Xi'n Dios ni gujc Niguii.

## 2

### *Te sa' ni guyu' guedx Caná xten Galilee*

<sup>1</sup> Che gudejd choñ dxej, guyu' te sa' guedx Caná xten Galilee. Ro'c guyu' xnan Jesús.  
<sup>2</sup> Huijza Jesús näjza rexpejn̄pacni, sa'csi bidon̄reni chääreni lo sa'ga. <sup>3</sup> Gubijdz bin. Dxejcti räjp xnan Jesús lojni:

—Dirureni ga'p bin.

<sup>4</sup> Dxejc badzu' Jesús diidxre räjpni:

—¿Xhicuent rniilu si'c loä, xnanä? Gajd xhorä guidzujñ.

<sup>5</sup> Niluxh räjp xnanni loj remos ni tre' ro'c:

—Col̄yejn guira'ti si'ctis ni guiniini lojtu.

<sup>6</sup> Suga' xho'p guesguij nani rdxaj nis te rdiib naa rexpejn̄ Israel te racnayareni te si'c guisa' xleii toMoisés. Neñ tejga guesguijga ru' si'cti te gayuu litr nis. <sup>7</sup> Räjp Jesús loj remos:

—Col̄guchaj reguesguijre nis.

Dxejcti bachadoo rebejn̄gani. <sup>8</sup> Dxejcti räjp Jesús lojreni:

—Col̄ca' che'n̄ni naj te col̄chanäni lo nani cahuii cayajc sa're.

Dxejc huinä remosga che'n bin lojni. <sup>9</sup> Che gu' dade'ga che'n nis ni gubixhloj bin (luxh dini gan caro siäädni, remostis ni gulä'p nis, ni'ctis najn). Dxejcti gurejdx dade'ga bi'n.

<sup>10</sup> Dxejcti räjpni:

—Guiraa rebejn̄ rudeedreni binsa'c räxгаа rebejn̄, dxejcti che agudxaj xque'reni, rudeedreni bin nani di xcuent, niluxh luj gulucheelu binsa'cre najli.

<sup>11</sup> Seenre najc ganiddoo ni gusloj bejn̄ Jesús; bejnnini neñ guedx Caná xten Galilee. Seenga bazäbdiidx yäl̄rnibee xtenni luxh ni'cni huililajz rexpejn̄pacni xtiidxni.

<sup>12</sup> Che gudejd sa'ga, huijni guedx Capernaum con xnanni, rebejtzni näjza rexpejn̄pacni. Ro'c bia'nreni tio'p-choñ dxej.

### *Basia Jesucrist guidoro*

(Mt. 21:12-13; Mr. 11:15-18; Lc. 19:45-46)

<sup>13</sup> Sa'csi abidzongajxh lanij pascw xten rexpejn̄ Israel cheni rnalajzreni guxhijñ ni gudejd guixhajg xten yäl̄gujt neñ Egipto, ni'c sää Jesús guedx Jerusalén. <sup>14</sup> Neñ guidoro bidxäl̄ni xhidajl bejn̄ nani ruto' gon, xiil, palom näjza reni sobga' caguchaa melzijt.

<sup>15</sup> Dxejc bejn̄ni te chico't con gaii duu, gulääni regon con rexiil neñ guidoo. Batie'chni xcoobr rebejn̄ nani ruchaa melzijt, barexh-xhätni rexmexreni. <sup>16</sup> Räjpzani loj reni cagato' repalom:

—Col̄cuää redee, na'c rujntu rolijz xtadä si'c te guii cadre rdo' guiraloj.

<sup>17</sup> Dxejcti banajlajz rexpejn̄pacni xhi caj lo reguijtz ni bacuaa redade' ni gunii xtidx Dios: “Gucnaj lazä xcuent ni runnäjreni rolijzlu.”

<sup>18</sup> Dxejcti gunabdiidx reni najc xpejn̄ Israel lojni, räjpreni:

—¿Xhi seen guluiilu loonu naj te fiinu arajplu yäl̄rnibee te abejnlu recosre?

<sup>19</sup> Badzu' Jesús diidxre räjpni:

—Col̄gutzuñl guidoore, luxh narä neñ chontis dxej sunchesacäni.

<sup>20</sup> Räj̄p rexpejn̄ Israel lojni:

—Tiubixho'p ijz guclaa ni guc-chee guideore, ¿xhixh sajc gunchesacluni nen̄ chontis dxej, ä?

<sup>21</sup> Niluxh laani caniini xcuent guidoo ni najc lagajc tiejxhni. <sup>22</sup> Ni'cni cheni gubansacni loj reben̄gut, banajlajz rexpejn̄pacni rediidxre ni guniini, dxejc huililajzreni nani caj lo rexquijtz Dios najza rediidx ni gunii Jesús.

### *Numbee Jesús guiraa rebejn̄*

<sup>23</sup> Cheni guyu' Jesús guedx Jerusalén cadre cayajc lanij pascw, la| ni cayajc lanijga, xhidajl rebejn̄ huililajz xtiidxni, bahuiizareni remilagwr ni bejn̄ni. <sup>24</sup> Luxh di Jesús nililajz xtidx rebejn̄ga, sa'csi arumbeeni xho najc rebejn̄. <sup>25</sup> Niluxh dini niquiin chu gäb lojni xho najc bejn̄, sa'csi lagajc laani anancheeni xho najc lastoo tejga bejn̄.

## 3

### *Jesús con Nicodem*

<sup>1</sup> Guyu' te niguii lo rexpejn̄ refarisee ni laa Nicodem, najcni te benroru loj reni rnibee rexpejn̄ Israel. <sup>2</sup> Te guxhij̄n̄ biädxhiga'tzni nez loj Jesús, räj̄pni lojni:

—Mastr, nadonnu lo Dios siäd̄dlu si'c te ni ruluii, sa'csi rut rajcdi rujn sa' remilagwr nani rujnlu palga di Dios sunäj̄ni.

<sup>3</sup> Dxejcti räj̄p Jesús lojni:

—Rniliáp̄pac lojlu, nani di gaal stehuält, di gacdi fiini xcäl̄rnibee Dios xhaguibaa.

<sup>4</sup> Dxejcti räj̄p Nicodem lojni:

—¿Xho gac gaal te bejn̄ stehuält niluxh anajcni bengool? ¿Xhixh sajc chusacni xque' xnanni stehuält te galsacni, ä?

<sup>5</sup> Badzu' Jesús diidxre räj̄pni:

—Rniliáp̄pac lojlu, nani di gaal con nis, najza con Sprit Dxan xten Dios, di gacdi jiu'ni lo xcäl̄rnibee Dios xhaguibaa. <sup>6</sup> Nani rajl xi'n bejn̄ guedxliujre, ni'c najctisni bejn̄ guedxliuj, luxh nani rajl por Sprit Dxan xten Dios, Spritza najcni. <sup>7</sup> Na'c rdxelojlu sa'csi rniä: “Nanabpac gaallu stehuält.” <sup>8</sup> Rbi' bej cadrotis rlajzni; riejn̄ diajglu rubejni niluxh dilu gan caro siäd̄dni, dizalu gan caro sääni. Si'cza rebejn̄ guedxliuj direni gan xho rajl rexpejn̄ Dios stehuält con Sprit Dxan xten Dios.

<sup>9</sup> Badzu' Nicodem diidxre, räj̄pni:

—¿Xho mood sajc gac recosre?

<sup>10</sup> Räj̄p Jesús lojni:

—¿La najclu te maestr xten rexpejn̄ Israel luxh dilu gan recosre, ä? <sup>11</sup> Rniliáp̄pac lojlu, aguniinu xcuent recos ni nadonnu, abasule'nu recos ni abahuiloonu, niluxh la'tu ditu nililajz xtiidxnu. <sup>12</sup> Palga ditu chalilajz xtiidxnu che guniinu xcuent recos guedxliuj nani rniinu: ¿Xho chalilajztu xtiidxnu palga guiniinu xcuent recos xhaguibaa?

<sup>13</sup> Rut chutejdi ahua'p xhaguibaa, xtebtis nani biäjt xhaguibaa, lagajc Xi'n Dios ni gujc Niguii. <sup>14</sup> Lagajc si'cni guläs̄jiaa toMoisés bäl̄ guiib lo yajg nen̄ reyubijdz, sigajcza nanab chäs̄ Xi'n Dios ni gujc Niguii jiaa; <sup>15</sup> te guiraa renani chalilajz xtiidxni direni nit lo Dios, sica'reni yäl̄nabajn̄ par tejpas.

### *Xho huinälajz Dios reben̄ guedxliuj*

<sup>16</sup> Sa'csi huinälazduxh Dios rebejn̄ guedxliuj, ni'cni badeedni biäd̄d Xinxtebni lo guedxliuj, te guiraa renani chalilajz xtiidxni direni nit lo Dios, sa'csi sajpreni yäl̄nabajn̄ par tejpas. <sup>17</sup> Sa'csi di Dios nuxha| xi'nni te gusnijtni rebejn̄ guedxliuj, alga baxha|nini te laa rebejn̄ nen̄ xtoj̄lreni xcuentni.

<sup>18</sup> Nani chalilajz xtiidxni najza chalilajz najcni chu najni najcni dini nit, luxh nani di chalilajz xtiidxni agunijtni sa'csi dini nililajz xtidx Xinxteb Dios. <sup>19</sup> Ni'cni dee najc yäl̄nijtga: abiäd̄d bianijga loj guedxliuj, biäd̄nä Xi'n Diosni, niluxh rebejn̄ guedxliuj bidxaglajzrueni yäl̄nacäjy cadre tre'reni, gulälazreni bianijga sa'csi xhet laadi najc



xtzuunreni. <sup>20</sup> Guiraa reni rujn dzunguijdx, rbälaz bianijga, dizareni guibig loj bianijga, didi guluiloj bianijga rextzunguijdxreni. <sup>21</sup> Luxh reni rusooob didxlii, rbigreni loj bianijga, te bianijga ruluiløj najc rextzuunreni redzunsac xten Dios.

#### *Rnisac Juan ni rutiobnis xcuent Jesús*

<sup>22</sup> Dxejcti biääd Jesús näjza rexpejn̄pacni nez lo reyuj xten Judea. Ro'c geyunäjnireni, batiobnisza rexpejn̄pacni rebejn̄. <sup>23</sup> Juan ni Rutiobnis cagutiobniszani bejn̄ te lajt ni laa Enón ni tre' gajxh Salim, sa'csi ro'c yu' sijn̄ nis. Ro'c sää rebejn̄ lojni te cagutiobnisnireni.

<sup>24</sup> Dxejc gajdreni gusäu Juan nejn̄ latzguib.

<sup>25</sup> Dxejcti gusloj rexpejn̄ Juan cayujy diidx con gaii xpejn̄ Israel xcuent yälrdiib naareni ni najc xcostumbr rexpejn̄ Israel. <sup>26</sup> Dxejc biäädreni lo Juan, räjpreni:

—Mastr, dade' nani geyunäjlu stelaad gueu Jordán, nani basule'lu xcuentni, adade'ga cagutiobnis, luxh guiraa rebejn̄ asää lojni.

<sup>27</sup> Dxejc badzu' Juan diidxre, räjpni lojreni:

—Nicla tej bejn̄ digacdi ga'p te xhi cos palga di Dios gudeedni lojni. <sup>28</sup> Lagajc la'tu nancheetu guniliä: “Dina gacä Crist ni cabäjztu jiääd.” Guniäza: “Narä nacä nani biädnijd lojni.” <sup>29</sup> Che rajc sa', nani sobganäj dxa'p, ni'c najc bi'n ni gac chääl̄ni, luxh xamigw bi'n nani suga' ro'c, riejn̄ diajgni rniini, rbalazduxhni sa'csi riejn̄ diajgni xse' bi'n. Sigajcza abibaduxh lazä xcuentni. <sup>30</sup> Nanab gacni laani beñroru, bensajcru, biädla narä riäj̄l gacä beñhuinru, ni guxiiru sajc lojni.

#### *Nani siääd Xhaguibaa*

<sup>31</sup> 'Nani siääd jiaali, ni'c rnibee guiralii, niluxh nani najc bejn̄ guedxliuj ni'c rnii xcuent recos guedxliuj. Nani siääd xhaguibaa ni'c rnibee guiralii. <sup>32</sup> Nani bahuiini, nani biejn̄ diajgni, ni'c rusule'ni niluxh guxiil rililajzreni xtiidxni. <sup>33</sup> Nani rililajz diidx ni rusule'ni, bejn̄ga ruluiløj guliipac najc xtidx Dios. <sup>34</sup> Nani baxhañ Dios, ni'c rnii xtidx Dios sa'csi che rudeed Dios Sprit xtenni, dini gudeed guxiini. <sup>35</sup> Dad Dios sanälajzni xingaanni, abadeedzani guiraliiti chu ladzñaani. <sup>36</sup> Nani rililajz xtidx xingaanni arajp yäl̄nabajn̄ par tejpas, luxh ni di chalilajz xtidx xi'nni, dini fii yäl̄nabajn̄, siääd xcäl̄rdxe'ch Dios yejcti, sujn̄ Dios castiigwni.

## 4

#### *Rdxaag Jesús te gunaa Samaria*

<sup>1</sup> Che gubbee Jesús abiejn̄ diajg refarisee xhidajlru bejn̄ sanajl Jesús luxh guxiiru sanajlreni Juan, luxh cagutiobnisreni, <sup>2</sup> (niluxh xhet Jesúsdi cagutiobnis. Rexpejn̄ni ni catiobnis), dxejc <sup>3</sup> biriini Judea gubisacni nez Galilee.

<sup>4</sup> Lañ̄ ni sasajni, nanab tedni nez Samaria. <sup>5</sup> Ni'c bidzuj̄nni te guedxro xten Samaria ni laa Sicar, gajxh nejz loj te la' yuj ni badeed toJacoob lo xi'nni toJosé. <sup>6</sup> Ro'c sojb te bisie ni rniireni “xpisie Jacob”. Sa'csi abadxajg Jesús siädsajni, gurejni ro bisiega. Agojl läidxej. <sup>7</sup> Bidzuj̄n̄ te gunaa siädlä'pni nis, dxejc räjp Jesús lojni:

—Baniidx che'n nis yä'ä.

<sup>8</sup> Sa'csi rexpejn̄pacni asääreni guejdxga sasiireni xhi gaureni.

<sup>9</sup> Räjp̄ti guna samaritan̄ga lo Jesús:

—¿Xho mood rniablu nis loä, luj ni najc te bejn̄ Israel luxh narä nacä gunaa samaritan̄? (Sa'csi di rexpejn̄ Israel chanä sa'reni rebejn̄ Samaria.) <sup>10</sup> Räjp̄ Jesús lojni:

—Paru najnlu xhini'c najc yäl̄rulasajz xten Dios, paru numbeelu chuni'c canab nis lojlu, luj siniablu lojni te laani guniidxni nisnabajn̄ lojlu.

<sup>11</sup> Räjp̄ti gunaaga lojni:

—Dad, xhet ca'dilu te guiliä'plu nis, luxh bisiere najc jiätduxh. ¿Caxh chaca'lu nisnabajn̄ga, ä? <sup>12</sup> ¿La beñrorulu lo toxtadgoldoonu Jacob ni basa'n bisiere cadro huä'p nis gu'ni, gu'za rexi'nni, näjza rexquidxaani, ä?

<sup>13</sup> Badzu' Jesús diidxre lojni, räjpni:

—Guiraa reni rä' nis bisiere, siojlneni stehuält. <sup>14</sup> Luxh nani yä nis nani gudedä, diruni jioj, sa'csi nis nani gudedä neñ lastooni sajnci si'c te bisie nani rdatis nisni te gudeedni yälñabajñ par tejpas.

<sup>15</sup> Dxejcti räjp gunaaga lojni:

—Dad, baniidx nisga yä'ä, te na'cru jiojä, te na'cruza guibi'ä jäädlä'pä nis ree.

<sup>16</sup> Räjp Jesús:

—Huij, huitejdx chäálu gudanäni ree.

<sup>17</sup> Räjp gunaa loj Jesús:

—Ruti chälä.

Räjp Jesús lojni:

—Laaca guniilu, <sup>18</sup> sa'csi aguyu' gaiili chäällu. Luxh nani rbäznäjlu ñaj dini gac chäällu; guliica najlu.

<sup>19</sup> Che bieñ diajg gunaaga si'c, räjpni:

—Dad, rchaloä najclu te niguii ni rnii xtidx Dios. <sup>20</sup> Retoxtagoldoonu gojñreni Dios lo dajnre, luxh la'tu rniitu guedx Jerusalén najc cadre nanab ganni Dios.

<sup>21</sup> Räjp Jesús lojni:

—Gunaa, huililajz xtidxä, sidzujñ or cheni nicla lo dajnre, niclaza guedx Jerusalén ditu chagajñ Dad Dios. <sup>22</sup> La'tu rajntu Dios nani ditu gumbee, nuunu rajñnu Dios nani rumbeenu; sa'csi yälrusläa bejñ lo dojl siääd xcuent rexpejñ Israel. <sup>23</sup> Niluxh sidzujñ or, luxh alabidzujñni, che reni guliipac rajñ Dad, reni'c neñ lastooreni, lo xcäriejñreni sajñreni Dios. Sa'csi sa' bejñre rguuil Dad Dios te ganrenini. <sup>24</sup> Dios najc te Sprit. Reni rajñ Dios nanab ganrenini neñ lastooreni, lo xcäriejñreni, guideb xtijpreni sa'csi rumbeerenini.

<sup>25</sup> Räjp gunaa lojni:

—Ananä siääd Mesías ni laaza Crist. Cheni jäädni, laani susule'ni guiraliiti loonu.

<sup>26</sup> Räjp Jesús lojni:

—Narä ni caniä lojlu, nacä laani.

<sup>27</sup> Dxejc bidzujñ rexpejñpacni, bidxelojreni sa'csi gunii Jesús lo gunaaga, niluxh rut gunabdiidxdi xhi rlajzni, niclaza rut gunabdiidxdi xhini'c caninäjni gunaaga. <sup>28</sup> Dxejcti basa'n gunaaga xtie'ni, sä'tini guedxroga. Dxejcti räjpni loj rebejñ:

<sup>29</sup> —Coltaa, fiitu te niguii ni gunii loä guira'ti nani abenä. ¿La et laadi dee Crist ni cabääznu jääd, ä?

<sup>30</sup> Dxejc birii rebejñguejdxga, bidzujñtirenini lojni. <sup>31</sup> Reni najc rexpejñpacni canabduxhreni gau Jesús, räjpreni:

—Mastr, gudajw.

<sup>32</sup> Laani räjpni:

—Narä rapä xhi gauä nani ditu gumbee.

<sup>33</sup> Dxejcti räjp rexpejñpacni lo sa'reni:

—¿Xhaa yu' chu abiädna xhi gudajwni, ä?

<sup>34</sup> Räjp Jesús:

—Yälrajw xtenä najc gunä si'cni rlajz nani baxhañ narä, näj guluxä xtzuunni. <sup>35</sup> La'tu rniitu riäädx tajp bäii te guire' cose'ch. Narä rniä colguiliäs lojtu, colfisa'c loniaa, abiquijtze regäj, agojñ guire' cose'ch. <sup>36</sup> Nani rujñ dzuun rutie' cose'ch rca'ni xcuentni, luxh ni caca'ni najc par yälñabajñ par tejpas, te tejsi guibalaznäj nani gule'c binij näj nani batie' cose'ch. <sup>37</sup> Sa'csi guli najc diidx nani rnii bejñ, rniirenini: “Tejni rbe'c binij, ste'cani rutie'ni.” <sup>38</sup> Narä abaxhalä la'tu gutie'tu cose'ch nani ditu nibe'c; ste'ca najc nani bejñ dzuun gule'cni binij, dxejc la'tu jiu'tu gutie'tu cose'ch loj xtzuunni.

<sup>39</sup> Xhidajñ rebeñ Samaria huililajz xtidx Jesús xcuent rediidx ni räjp gunaaga lojreni che räjpni: “Guniini loä guiralii nani abenä.” <sup>40</sup> Ni'cni, che biääd rebeñ guedx Samaria lojni gunabreni loj Jesús jia'nni lajdxreni. Dxejc bia'nni ro'c tio'p dxej. <sup>41</sup> Dxejc xhidajñrurenini huililajz xtiidxni ni guniini lojpacreni. <sup>42</sup> Dxejcti räjpreni loj gunaaga:

—Dirunu chalilajz ganaxtis xcuent diidx ni guniilu loonu, sa'csi lagajc nuure abiejn diajgnu xtiidxni, ni'c nancheenu dee najcpac ni ruslaa rebejn guedxliuj loj dojl. Laani najc Crist ni cabääznu jiääd.

*Basiajc Jesús xi'n te bejn* ni rujn xtzuum gubier

<sup>43</sup> Che gudejd tio'p dxej, biriini guedx Samaria, huinuuni xnezyujni nez Galilee. <sup>44</sup> Sa'csi lagajc Jesús gunii, räjpni: Te bejn nani rnii xtidx Dios di reben lajdxpacni chanälajz xtiidxni. <sup>45</sup> Che bidzujnni rexyuj Galilee, reben Galilee huichaglojrenini sa'csi näj laareni huijreni lanij pascw guedx Jerusalén, ro'c bahuiireni guiraa redzuun nani bejnii.

<sup>46</sup> Gubisacni, bidzujnni guedx Caná xten Galilee cadro bejnii bidxaa nis gujcnii bin. Dxejcti guyu' te dade' nani rujn xtzuum reii. Guedx Capernaum naga' te xi'nni cayacxhuu. <sup>47</sup> Che biejn diajg dade'ga abirii Jesús Judea, abidzujnni nez Galilee, huijni lo Jesús, gunabduxhni lojni chääni te gusajcni xi'nni nani naga' cuentro, ameerli guetni.

<sup>48</sup> Dxejcti räjp Jesús lojni:

—Paru ditu fii reseen, remilagwr, ditu chalilajz chuni'c nacä narä.

<sup>49</sup> Dade' ni rujn xtzuum reii, gunii lojni, räjpni:

—Do'o Dad, te di guet xi'nä.

<sup>50</sup> Räjp Jesús lojni:

—Huij. Di xi'nlu guet.

Huililajz dade'ga, sä'tini. <sup>51</sup> Che gubi'ni rolizni, birii rexmosni, huichaglojni, badeedreni diidx nabajn xi'nni.

<sup>52</sup> Dxejcti gunabdiidxni:

—¿Corti gusloj cayajcni?

Räjpreni lojni:

—Naii si'cti rcatej gudxej biriini xliaa.

<sup>53</sup> Dxejcti gucbee dade'ga lagajc orga ni räjp Jesús lojni: “Di xi'nlu guet.” Dxejc dade'ga näjza guiraa rebejn ni yu' rolizni huililajzreni Jesús najc ni cabäjzreni jiääd.

<sup>54</sup> Dee barojp seen ni bejn Jesús cheni biriini Judea, biu'ni Galilee.

## 5

*Bejn* Betesda nani naxu'n

<sup>1</sup> Che gujcti recosre, guyu' te lanij xten rexpejn Israel, dxejc huij Jesús guedx Jerusalén. <sup>2</sup> Guedx Jerusalén, gajxh ro' puert ni laa xten rexiil, yu' te guipilro nis; xtidx hebreo laani Betesda. Cuä' guipilroga caj gaii cordoor. <sup>3</sup> Ro'c naga' xhidajl bejn racxhuu, yu' bejn ni di fii, beñcoj, näj bejn nani bixu'n tiejxhni. Cabäjzreni guiniib nisga <sup>4</sup> sa'csi gucti-guc riääd te xangl Dios rusniib nisga. Dxejc bejn nani gun gaan chachu' lo nis ganiddoo che guiniibni, riajcnii lo xhitis yälgujdx ni rajcni. <sup>5</sup> Ro'c guyu' te beñ racxhuu nani agujc galbitzubixhujn ijz cayacxhuuni. <sup>6</sup> Cheni bahuii Jesús naga'ni, badeedzani cuent lacti xchero racxhuuni, räjpni lojni:

—¿La rlajzlu jiajclu?

<sup>7</sup> —Dad —räjp beñ racxhuuga lojni—, dina gapä chu gusal narä neñ nis cheni rniib nisre. Cheni rlazä chachu'ä lo nis, stee bejn rujn gaan narä, ganidni richu'ni lo nisga.

<sup>8</sup> Räjp Jesús lojni:

—Huistie, guläs xta'lu, guzaj, huij.

<sup>9</sup> Lagajc dxejc bjaic bejnga, guläsni xta'ni, gusloj gusajni. Niluxh dxejga najc dxej nani rusilajz rexpejn Israel, <sup>10</sup> ni'c räjp rexpejn Israel lo bejn ni bjaicga:

—Nadxej najc dxej ni rusilajz bejn. Di gacdi guulu xta'lu.

<sup>11</sup> Laani räjpni:

—Nani basiajc narä, laani naj loä: “Guläs xta'lu, gusaj.”

<sup>12</sup> Dxejc gunabdiidxreni lojni:

—¿Chuni'c naj lojlu “Guläs xta'lu, gusaj”?

<sup>13</sup> Dxejcti beŋ racxhuu ni biajcgā dini gaan, sa'csi gunitloj Jesús, biriini ro'c laĵ ni tre' xhidajĵ beŋ lajtga. <sup>14</sup> Che bidxaagni Jesús stehuält nen guidoro, räjp Jesús lojni:

—Ahuii, ŋaj ni abiajclu, na'c gunlu doĵ stehuält, didi sajclu xhi stee ni najc cuentroru.

<sup>15</sup> Sä'ti beŋga, huiye'tzni loj rexepeŋ Israel laa Jesús ni basiajčni. <sup>16</sup> Ni'cni gusloj rexepeŋ Israel carinajlreni Jesús, rlajzreni guiga'ni te ju'trenini, sa'csi rujni redzuunga dxej ni rusilajzreni. <sup>17</sup> Luxh räjp Jesús lojreni:

—Xtadā Dios ŋajli cayujnni dzuun, ni'cni nājza narā cayunā dzuun.

<sup>18</sup> Ni'cni rlajzru rexepeŋ Israel ju'tni, xhet ganaxdi sa'csi rujni dzuun dxej ni rusilajzreni, per nājza sa'csi räjpni Dios najc Xtadni, rniizani tebloj najčni con Dios.

### *Yälrnibee xten Xi'n Dios*

<sup>19</sup> Badzu' Jesús diidxre räjpni lojreni:

—Rniliä, rniliäpac lojtu. Di gacdi gun Xi'n Dios dzuun xtebni, palga dini fixgaa rujn Xtadni dzuunga, sa'csi guira'tis dzuun ni rujn Xtadni, dzuunga rujnza Xi'nni sigajc rujn Xtadni. <sup>20</sup> Sa'csi rinälajz Dad xi'nni, ruluini lo xi'nni guiraa redzuun nani rujni, luxh dzunroruza suluini lojni gunni, te guidxelojtu. <sup>21</sup> Sigajc ni rliäs Dios rebengut, rudeedni yälŋabajŋ lojreni, sigajcza sudeed xi'nni yälŋabajŋ lo renani rlajztisni. <sup>22</sup> Nicla Dad di gun yälguختis, alga badeedni guiralii yälguختis gun Xi'nni, <sup>23</sup> te guiraa beŋ guiliä'p xpala'n xi'nni si'cni rliä'preni xpala'n Dad. Nani di guiliä'p xpala'n Xi'nni, dizani guiliä'p xpala'n Xtadni ni baxhaĵni biädni.

<sup>24</sup> 'Rniliä, rniliäpac lojtu, nani rucudiajg xtidxä, ni chalilajzzani nani baxhaĵ narä, ni'c rajpni yälŋabajŋ par tejpas; niluxh dini ted lo yälguختis, alga abiriini lo yälguĵt, agudejdn lo yälŋabajŋ. <sup>25</sup> Rniliä, rniliäpac, sidzujŋ or, luxh alabidzujnni, cheni siejn diajg rebengut xse' Xi'n Dios, luxh reni riejn diajgni diidxga sibansacreni lo rebengut. <sup>26</sup> Si'cni rajp Dad Dios yälŋabajŋ lagajcsi laani, sigajcza badeedni lo Xi'nni ga'pni yälŋabajŋ lagajcsi laazani. <sup>27</sup> Badeedzani lojni yälrnibee te gunni yälguختis, sa'csi najčni Xi'n Dios ni guĵc Niguui. <sup>28</sup> Na'c rdxelojtu rediidxre, sa'csi sidzujŋ or cheni guiraa reni yu' nen baa siejn diajgreni xse'ni <sup>29</sup> siriizareni nen baa. Reni beŋ dzunsa'c siriireni te guibansacreni loj yälŋabansa'c, niluxh reni beŋ dzunguijdx, siriireni te guibansacreni te tedreni lo xcälguختis Dios.

### *Nani ruluiloj yälrnibee ni rajp Jesús*

<sup>30</sup> 'Xhet rajcđi runä lagajcsi narä. Sigajc ni riejn diagä, sigajcza runä yälguختis. Luxh yälguختis ni runä laaca najčni sa'csi dina quilä gunä nani rlazätis, rguilätis gunä si'c ni rlajz Dad nani baxhaĵ narä. <sup>31</sup> Palga narätis rniä diidx lagajc xcuentä, xhet sajcdi diidxga. <sup>32</sup> Yu' stee nani rniliä diidx xcuentä, luxh nancheä diidx ni rniini xcuentä sacduxhni, guliipacni. <sup>33</sup> La'tu abaxhaltu chu huij loj Juan, huinabdiidxreni lojni "chu najc beŋga", niluxh badzu'ni diidx lojreni guniini diidx guliipac xcuent chu nacä. <sup>34</sup> Narä dina jiuä diidx nani rni rebejŋ xcuentä luxh canisacä rediidxre te laatu lo xtojĵtu. <sup>35</sup> Juan guĵc si'c te bajl ni ralguĵ, basanijzani. Luxh la'tu huihuiituni bibalajztu lo xpianijni balsi dxej. <sup>36</sup> Luxh narä rapä xhi ruluilojru chu nacä lo diidx ni gunii Juan; sa'csi lagajc dzuun nani baniidx Xtadä gunä, lagajc redzuun ni runä, huenliisi ruluilojreni Xtadä Dios baxhaĵ narä. <sup>37</sup> Xtadä ni baxhaĵ narä lojtu agunilii chu nacä. Gajdpactu jiejn diajg xse'ni, gajdzatu fii lojni. <sup>38</sup> Dizatu ga'p xtiidxni nen lastootu, sa'csi di lajztu chalii xtiidx nani baxhaĵ narä. <sup>39</sup> La'tu roĵduxhtu reguijtz xten Dios sa'csi rchalotu si'c sidxältu yälŋabajŋ par tejpas, luxh lagajc reguijtzga rusule' chu narä. <sup>40</sup> Naadditu jiädđu loä te ga'ptu yälŋabajŋ par tejpas.

<sup>41</sup> 'Narä dina quilä chu beŋ guiliä'p xpala'nä nez loä. <sup>42</sup> Luxh narä anumbeätu, ananä ditu chanälajz Dios nen lastootu. <sup>43</sup> Narä biälä xcuent Xtadä, luxh ditu gucudiajg xtidxä; paru jiädđu chu stee beŋ xcuentcani, ni'c sii sucudiajgtu xtiidxni. <sup>44</sup> Xho gac chalilajztu, ni rliä'ptu xpala'n lagajc sa'tu. Ditu quiil xho gac guiliä'p Gueb Dios xpala'ntu. <sup>45</sup> Di naatu pet narä ni chale'cä xquejtu lo Xtadä. ToMoisés ni chale'cä xquejtu, luxh rujntu xhigab lagajc xleiini gacnäj la'tu. <sup>46</sup> Paru la'tu nililajzpcactu xtidx toMoisés, dxejc niliiza lajztu

xtidxä sa'csi xcuentä bacuaa toMoisés lo reguijtz. <sup>47</sup> Palga ditu chalilajz nani bacuaani lo reguijtz, ¿xho chalilajztu rediidx nani cania lojtu, ä?

## 6

*Bayaan Jesús gaii miñ niguui*

(Mt. 14:13-21; Mr. 6:30-44; Lc. 9:10-17)

<sup>1</sup> Che gulujx gujc recosre, dxejc sää Jesús stelaad nezro' nisdoo xten Galilee, nani rniizareni nisdoo xten Tiberias. <sup>2</sup> Sanajl xhidajl bejnñi sa'csi rhuiireni remilagwr ni rujñni lo rebenracxhuu. <sup>3</sup> Dxejcti huä'p Jesús yejc te dajn, ro'c gurenäjni rexpejnñpacni. <sup>4</sup> Niluxh ameer gac lanij pascw xten rexpejnñ Israel, cheni rudeedreni xquixhtios lo Dios xcuent dxej ni biriireni Egipto. <sup>5</sup> Cheni guläs Jesús lojni, bahuiini siääd xhidalduxh bejnñ, siäädreni nez lojni, dxejcti räjpni loj Felipe:

—¿Caro guisiinu yätxtiil te gau rebejnñre?

<sup>6</sup> Dxejc räjpzani si'c te don xhi xhigab gun Felipe, luxh laani anajñni xho gunni. <sup>7</sup> Räjp Felipe lojni:

—Di tio'p gayuu beex yätxtiil gal te gaureni tlagaj.

<sup>8</sup> Tej rexpejnñpacni ni laa Andrés, bejtz Simón Pedr, räjp lojni:

<sup>9</sup> —Ree suga' te biuux ca' gaii yätxtiil con tio'p bäjñ, ¿xhixh sajñ ni'c gau rebenñ xhidajlre?

<sup>10</sup> Dxejcti räjp Jesús:

—Colyejtz loj rebejnñre cuereni.

Yuduxh guixa' ro'c. Dxejcti gurej reniguii. Si'cti gaii miñ najc reniguii. <sup>11</sup> Dxejcti cua' Jesús yätxtiilga, badeedni xquixhtios lo Dios, gudisni yätxtiilga lo rexpejnñpacni. Dxejcti rexpejnñpacni gudisrenini loj rebejnñ nani sobga'. Sigajcza gudisreni rebäjñ si'ctisni rlajzreni gaureni. <sup>12</sup> Che gulujx gudajwreni, gudxaj xque'reni, dxejcti räjp Jesús loj rexpejnñpacni:

—Colgutie' guiraa reyätxtilbiujy nani bia'n te xhet nitdi.

<sup>13</sup> Batie'tireni reyätxtilbiujy, guläsreni tzubitio'p dxijmñ yätxtilbiujy nani bia'n lo gaii yätxtiilga nani gula' gudajwreni. <sup>14</sup> Che bahuii rebejnñga reseñ, remilagwr nani bejnñ Jesús, dxejc räjpreni:

—Guluiipacni, laa dee ni najc niguui ni rni xtidx Dios nani cabäaznu jiääd lo guedxliuj.

<sup>15</sup> Sas che gucbee Jesús cayujñreni xhigab jiädnaazrenini te niujñreni gacni reiñ te guinibeeni lojreni, biriini ro'c, xtebni gubisacni nenñ dajn.

*Gusaj Jesús lo nisdoo*

(Mt. 14:22-27; Mr. 6:45-52)

<sup>16</sup> Che gojl guxhijñ, bidzujñ rexpejnñpacni lo nisdoo. <sup>17</sup> Biu'reni nenñ te barcw te tedreni lo nisdoo nez guedx Capernaum. Abicäy lo yuj niluxh gajd Jesús guibi' lojreni te chääni. <sup>18</sup> Gusloj cayäjs nisdoo xcuent te beduxh nani cabi'. <sup>19</sup> Ni'cni che gusajreni si'cti gaii o xho'p kilómetro, bahuiireni siädzungajxh Jesús lo barcw, lo nisdoo siädsajni. Bidxebduxhreni. <sup>20</sup> Luxh laani räjpni lojreni:

—Naräni. Na'c guidxejbtu.

<sup>21</sup> Dxejcru cuäjbreni biu'ni nenñ barcw. Dxejcti bidzungajcreni stelaad lo yuj cadro sääreni.

*Caguuil rebejnñ Jesús*

<sup>22</sup> Che bara yääl, rebejnñ nani bia'n stelaad ro' nisdoo, bahuiireni asanä rexpejnñpacni barcwbäz nani suga' ro'c, niluxh di Jesús nij, xtebsireni sääreni. <sup>23</sup> Luxh bidzungajc sgaii barcw nani birii guedx Tiberias, te lajt ni tre' gajxh cadro gudajwreni yätxtiil che gulujx badeed Jesús xquixhtios lo Dad. <sup>24</sup> Che bahuii rebejnñ ruti Jesús ro'c, niclaza rexpejnñni, biu'reni nenñ rebarcw, sääreni guedx Capernaum satiilreni Jesús.

*Jesús najc yätxtiil xten yälñabajñ*

<sup>25</sup> Che bidxälreni Jesús stelaad ro' nisdoo, räjpreni lojni:

—Mastr, ¿guc bidzujnlu ree?

<sup>26</sup> Badzu' Jesús diidxre, räjpni lojreni:

—Rniliá, rniliápac lojtu, caguilltu narä sa'csi gudajwtu, gudxaj xque'tu, et sa'csi bahuiiditu remilagwr nani benä. <sup>27</sup> Na'c guntu dzuun ganax par yälrajw nani rnitloj. Colyejn dzuun par yälrajw nani di nitloj, ni runiidx yälñabajn par tejpas. Yälrajwre suniidx Xi'n Niguii, sa'csi loj rebejn baluii Xtadni, Diospac, laani najc Xi'npacni.

<sup>28</sup> Dxejcti räjpreni:

—¿Xhini'c jiennu te gac jienpacnu dzuun ni rlajz Dios?

<sup>29</sup> Räjp Jesús lojreni:

—Dee najc ni rlajz Dios guntu: chalilajztu xtidx narä, nani baxhalni.

<sup>30</sup> Räjpreni lojni:

—¿Xhi seen gunlu te guihuiinu xcälñribeelu te cholilajznu xtiidxlu? ¿Xhi dzuun rujnlu? <sup>31</sup> Retoxtdnu gudajwreni yätxtiil ni laa mana loj reyubijdz si'cni caj loj reguijtz: “Badeedni yätxtiil ni biajb xhaguibaa gudajwreni.”

<sup>32</sup> Räjpza Jesús:

—Rniliá, rniliápac lojtu, xhet toMoisésdi ni badeed yätxtiil ni biajb xhaguibaa. Xtadä ni suniidx yätxtiil nani siäädpac xhaguibaa. <sup>33</sup> Sa'csi yätxtiil xten Dios najc bejn ni siääd xhaguibaa, niluxh laani rudeedni yälñabajn par tejpas loj reben guedxliuj.

<sup>34</sup> Räjpreni:

—Dad, baniidx yätxtiilga loonu.

<sup>35</sup> Dxejcti räjp Jesús lojreni:

—Narä nacä yätxtiil xten yälñabajn nani riäjł jiääd; chutis ni jiääd loä diruni guiliaan, niluxh chutis ni rililajz xtidxä diruni jiojł par tejpas. <sup>36</sup> Aguniä lojtu, la'tu ditu chalilajz, luxh abahuiitu loä. <sup>37</sup> Guiraa renani abaniidx Xtadä loä, siäädni loä, niluxh chutis ni jiääd loä dina cuälazäni. <sup>38</sup> Sa'csi narä siälä xhaguibaali te gunä si'c ni rlajz Xtadä, xhet si'c di ni rlazädi. <sup>39</sup> Dee najc ni rlajz Xtadä nani baxhal narä: na'c nit nicla tej renani baniidxni loä, te guspansacä guiragajcreni che gal dxej lult ni riäjł jiääd. <sup>40</sup> Scree rlajz nani baxhal narä: guiraa renani fii lo Xi'n Dios, näj chalilajzreni xtiidxni, xca'reni yälñabajn par tejpas niluxh narä suspansacäreni che gal dxej lult ni riäjł jiääd.

<sup>41</sup> Rediidxre bejn gusloj casiejy rexpejn Israel xcuent Jesús sa'csi räjpni: “Narä nacä yätxtiil ni biäjt xhaguibaa.” <sup>42</sup> Dxejcti räjpreni:

—¿La et Jesúsdi, xi'n José dee, ä? Nuure numbeenu xtadni, xnanni, ¿xhoxh rniini xhaguibaa biäjtni?

<sup>43</sup> Dxejc räjp Jesús lojreni:

—Na'c rusieinäj sa'tu. <sup>44</sup> Rut rajc di riääd loä palga di Xtadä ni baxhal narä jiädñäni loä, te guspansacäni che gal dxej lult ni riäjł jiääd. <sup>45</sup> Loj reguijtz ni bacuaa redade' ni gunii xtidx Dios caj scree: “Suluii Dios guiraareni.” Ni'cni guiraa reni rucudiajg xtidx Xtadä, reni rsieed lojni, reni'c ni jiääd loä.

<sup>46</sup> Dinä guiniä yu' chu abahuii lo Dios; tejtis ni abahuii lojni: nani baxhal Dios, ni'ctis abahuii lojni. <sup>47</sup> Rniliä lojtu che rniä: nani chalilajz xtidxä, ni'c rajp yälñabajn par tejpas. <sup>48</sup> Narä nacä yätxtiil nani rudeed yälñabajn. <sup>49</sup> Retoxtdtu gudajw mana ni bastejb Dios lo reyubijdz, dxejcti gujtzareni. <sup>50</sup> Dee najc yätxtiil ni siääd xhaguibaa, te chutis ni gau yätxtiilga dini guet. <sup>51</sup> Narä nacä yätxtiilbajn ni siääd xhaguibaa. Palga yu' chu gau yätxtiilre, sibajnni par tejpas. Yätxtiil nani runidxä narä te xca' reben guedxliuj yälñabajn najc lagajc bältiexhä.

<sup>52</sup> Dxejcti gusloj casiejy rexpejn Israel räjpreni:

—¿Xho gac guniidx dee bältiejxhni guidaunu, ä?

<sup>53</sup> Räjp Jesús:

—Rniliá, rniliápac lojtu, palga ditu gau bältiejxh Xi'n Dios ni gujc Niguii, palga dizatu yä xtiejnni, digacdi ga'ptu yälñabajn. <sup>54</sup> Nani gau bältiexhä, nani yäza xtienä, ni'c rajp yälñabajn par tejpas, niluxh suspansacäni che gal redxej lult. <sup>55</sup> Sa'csi bältiexhä najc



te yälrausa'cpac, xtienä najcza te yälräsa'cpac. <sup>56</sup> Nani gau bältiexhä, nani yäza xtienä, ni'c yu'pac con narä, luxh narä yu'äza con laani. <sup>57</sup> Xtadä ni baxhal narä rajp yäl**na**bajñ par tejpas. Narä nabanä xcuent laani. Sigajcza nani rajw narä, sibajñzani xcuent narä. <sup>58</sup> Dee najc yätxtiil nani biääd xhaguibaali; dini gac si'c mana ni gudajw xtadtu dxejc empac gujtreni, sa'csi nani gau yätxtiilre sibajñni par tejpas.

<sup>59</sup> Recosre baluui Jesús neñ te guidobäz lañ ni guyu'ni guedx Capernaum.

*Diidx xten yäl**na**bajñ par tejpas*

<sup>60</sup> Che bieñ diajgredi si'c, xhidajl rexpejñpacni räjp:

—Naganduxh najc rextiidxni. ¿Chu laa nani gac cuadiajgni?

<sup>61</sup> Dxejcti gucbee Jesús cagusieyreni xcuent rediidxga, dxejc gunabdiidxni räjpni:

—¿La rusieed rediidxre la'tu, ä? <sup>62</sup> ¿Xhicha guntu paru fiitu chä'p Xi'n Dios ni gujc Niguii cadro guyu'ni galoo? <sup>63</sup> Sprit xten Dios najc ni rudeed yäl**na**bajñ; bältiejxhni xhet rujndini gaan. Rediidx nani guniä lojtu najc didxlii xcuent recos xten Sprit, luxh rediidxga rudeed yäl**na**bajñ par tejpas. <sup>64</sup> Luxh lañtis yu' lojtu reni di chalilajz.

Sa'csi Jesús nancheeni galooli chu reni'c di chalilajz, anajnzani chuni'c guto'ni, guteedni laani ladzñaa reben dojl. <sup>65</sup> Dxejcti räjpni:

—Ni'cni rniä lojtu, nicla tej rut sajcdi jiääd loä palga di Xtadä jiädñani loä.

<sup>66</sup> Lagajc dxejc gusloj cabicaj xhidajl rebejñ ni agujc xchej gusanäj Jesús, dirureni nisanäj Jesús. <sup>67</sup> Dxejcti räjp Jesús loj guidzubitio'p rexpejñpacni:

—¿La nägajcza la'tu rlanjtu jiitu, ä?

<sup>68</sup> Badzu' Simón Pedr diidxre, räjpni:

—Dad, ¿chuloj chonnu? Luj rajplu diidx ni rudeed yäl**na**bajñ par tejpas. <sup>69</sup> Nuure abiolilaaznu, anajñnu najclu Crist Xi'n Dios nani nabajñ.

<sup>70</sup> Badzu' Jesús diidxre, räjpni:

—¿La et lagajc narädi guleä guitzubitio'ptu? Luxh tejtü najc bendxab.

<sup>71</sup> Diidxga guniini xcuent Judas Iscariote, xi'n Simón, sa'csi Judas najc ni guto'ni mase nadxaagni lo guitzubitio'p rexpejñpac Jesús.

## 7

*Di rebejtz Jesús chalilajz*

<sup>1</sup> Che gujcti recosre, cansaj Jesús nez reyuj xten Galilee, di rlanjñi jia'nni nez reguedx Judea sa'csi rlanj reben ro'c ju'tni. <sup>2</sup> Luxh ameer gal lanij xten cose'ch xten guidoguijd, te relanj xten rexpejñ Israel. <sup>3</sup> Ni'c räjp rebejtz Jesús lojni:

—Na'c jia'nlu ree. Huij Judea te näjza rexpejñpaclu fii redzunro nani rujnlu. <sup>4</sup> Sa'csi rut rujndi xtzuunni xhiga'tz palga rlanjñi gacbee bejñ xhi dzuun rujñni, te gumbee bejñni. Palga rujñpaclu redzuunre, baluiini lo guiraa reben guedxliuj.

<sup>5</sup> Guniireni si'c lojni sa'csi nicla rebejtzni di chalilajz xtiidxni. <sup>6</sup> Dxejcti räjp Jesús lojreni:

—Gajd xhorä guidzujñ, niluxh par la'tu xhitis or najc hueen. <sup>7</sup> Di gacdi guidxe'ch reben guedxliuj lojtu, luxh rdxe'chreni loä sa'csi narä rniää xcuentreni: dzunguijdx najc xtzuunreni. <sup>8</sup> La'tu colchäj lanij; narä dina cha'a lanijga sa'csi gajd xhorä gal.

<sup>9</sup> Che gulujx guniini si'c lojreni bia'ntini nez Galilee.

*Huij Jesús lanij xten retabernaculos*

<sup>10</sup> Dxejcti che asää rebejtzni lanij, dxejc näjza laani sääni lanij, luxh dini nusäbdiidx, si'c xhiga'tz sääni. <sup>11</sup> Dxejcti caguuil rexpejñ Israelni lo lanijga, räjpreni:

—¿Concha niguiiga?

<sup>12</sup> Lo rebejñ xhidaalga yu' xhidajl bejñ ni cagusieyreni xcuentni. Yu'reni räjp: “Hueen najcni”, per sgaiireni räjp: “Dini gac hueen. Cagusgueeni reben\_guejdx.”

<sup>13</sup> Nicla tejreni xhet casäbdiidxdiren xhini'c caniireni. Diren guinii dip sa'csi rdxejbreni rexpejñ Israel nani rnibee.

<sup>14</sup> Agurojl lanij, che biu' Jesús nen guidoro. Dxejcti gusloj caguluiini. <sup>15</sup> Dxejcti rdxelox rexepejn Israel nani rnibee, räjpreni:

—¿Xho najn dee guiraloj, niluxh dini nisieed xleii toMoisés?

<sup>16</sup> Badzu' Jesús diidxre, räjpni:

—Yälrluliii nani caluiyá et xtenädini, xten nani baxhal naräni. <sup>17</sup> Palga yu' chu rlajz gun nani rlajz Dios, sacbeeni la xten Dios najc reyälrluliii xtenä, o la lagajcsi narä rbää diidx ni caguluiä. <sup>18</sup> Nani rusule'ni diidx nani lagajc laani rbääni, ni'c rniini diidxga te guiliä'p rebejn xpala'nni, luxh nani rguuil chá'p xpala'n nani baxhalni, ni'c ni rniini didxlii, xheti yälrusguee nen lastooni. <sup>19</sup> ¿La di toMoises nuniidx leii lojtu, ä? Niluxh nicla tejtü di gusoob xtidx leiga. ¿Xhicuent rlajztu ju'ttu narä, pes?

<sup>20</sup> Badzu' reben xhidajlga diidxre, räjpreni:

—¿Xpriet bendxab yu' lastoolu! ¿Chuni'c rlajz ju'tlu?

<sup>21</sup> Badzu' Jesús diidxre lojreni, räjpni:

—Tejtis dzuun benä con xcälrnibeä, dxejc guiraatu cadxelojtu sa'csi benäni dxej ni rusilajztu. <sup>22</sup> Ni'cni baniidx toMoisés lojtu yälru'tu bee, luxh etlaadini guläxtiejnini, agac guläxtiej retoxtadgoldootuni. La'tu rusältu bee rebiuux mase najcni dxej nani rusilajztu. <sup>23</sup> Mbaj pes, palga rajc rusältu bee bejn te dxej nani rusilajztu didi nit xleii Moisés, ¿xhicuent rdx'e'chtu loä sa'csi basicäpac te bejn te dxej nani rusilajztu, ä? <sup>24</sup> Na'c rujntu yälguhtis si'ctis ni rlajztu. Colyejn yälguhtis con yälguhtis xten Dios.

#### *Rusule' Jesús casiädni*

<sup>25</sup> Dxejcti gusloj gaii bejn Jerusalén cayujn yälgunabdiidx, räjpreni:

—¿La etlaadi dee ni caguilreni te ju'trenini, ä? <sup>26</sup> Ani asuga', caniini nez loj guiraa rebenguejdx, niluxh rut rudxoindini. ¿Xhaa ahuililajz reguxhtis, regubier laani najcpacni Crist, ä? <sup>27</sup> Niluxh nuure nadoncheenu caro siäd niguiire, niluxh che jiäd Crist, rut gacbeedi caro siädni.

<sup>28</sup> Caguluii Jesús nen guidoo che biejn diajgni rediidxre, dxejc dipduxh guniini, räjpni:

—La'tu numbeetu narä, najntu caro siälä; luxh dina niälä lagajcsi narä; nani baxhal narä guliipac nabajni, luxh la'tu ditu gumbeeni. <sup>29</sup> Luxh narä numbeäni, sa'csi lojni biriä, laani baxhalzani narä.

<sup>30</sup> Dxejc rlajzreni niniaazrenini, niluxh rut gunaazdini, sa'csi gajd xhorni gal. <sup>31</sup> Xhidajl bejn lo reben xhidajlga huililajz xtiidxni, dxejcti räjpreni:

—Cheni jiäd Crist, ¿xhixh sujnrni milagwr loj nani rujn dee, ä?

#### *Ruxhal refarisee guixhajg guiniaaz Jesús te jiäuni*

<sup>32</sup> Che biejn diajg refarisee xhi canii rebejn xcuent Jesús, laareni näjza rebixhojz nani rnibee lo rebixhojz baxhalreni guixhajg te guiniaazreni Jesús te jiäuuni. <sup>33</sup> Sas räjp Jesús lojreni:

—Bale'si dxej su'ä lojtu, dxejcti guibi'ä loj nani baxhal narä. <sup>34</sup> Siguiiltu narä, niluxh ditu guidxäl narä, sa'csi cadro cha'ä digacdi jiädtdu.

<sup>35</sup> Ni'c gunii rexepejn Israel lo sa'reni; räjpreni:

—¿Cacharo chääni ni'c di gacdi guidxäl nuni? ¿Xhaa sijni loj rexepejn Israel nani nare'ch nez lajdx regriegos te guluiini regriegos? <sup>36</sup> ¿Xhi säloj diidxre nani guniini loonu: “Siguiiltu narä, niluxh ditu guidxäl narä, sa'csi cadro cha'ä di gacdi jiädtdu”?

#### *Regueu nisnabajn*

<sup>37</sup> Lult dxe lanij, ni najc dxero, gusulii Jesús dipduxh guniini, räjpni:

—Palga yu' chu cayojl, sujiädni loä te yäni. <sup>38</sup> Nani chalilajz xtidxä si'cni caj lo rexquijtz Dios nen lastoolini siliejn nisnabajn.

<sup>39</sup> Rediidxre guniini xcuent Sprit Dxiän nani churu jiädläz nen lastoo reni rililajz xtiidxni, sa'csi gajd Sprit Dxiän jiäd, sa'csi gajd Jesús guibansac lo rebengut.

#### *Gucgala' rebejn*

<sup>40</sup> Lo reben xhidajlga yu' reni biejn diajgreni rediidxga, dxejc räjpreni:

—Guliipacni, dade're najc laapac ni siääd, si'c ni rnii xtidx Dios.

<sup>41</sup> Yu'zareni räjp:

—Dade're najc Crist ni cabäaznu.

Yu'za sgaii ni räjp:

—Gurniälojtu jiääd Crist nez Galilee. <sup>42</sup> Ni loj rexquijtz Dios caj riäjlpac gac Crist te rexagdoo torei David, jiäädzani guedx Belén, lagajc guejdx cadro siääd torei David.

<sup>43</sup> Dxejcti gucgala' rebejn xcuent Jesús. <sup>44</sup> Yu'reni rlajz cháäni pres luxh rut biajxdi gunaazni.

#### *Di reguxhtis chalilajz biääd Crist*

<sup>45</sup> Gubi' reguixhajg xten guidoo loj rebixhojzro näjza refarisee. Dxejcti gunabdiidxreni loj reguixhajg, räjpreni:

—¿Xhicuent ditu niädnäni?

<sup>46</sup> Badzu' reguixhajg diidxre, räjpreni:

—¿Gajdpac te bejn guinii si'cni rnii bejnga!

<sup>47</sup> Dxejc räjp refarisee:

—¿La näj la'tu abasgueeni, ä? <sup>48</sup> ¿Xhixh loj regubier o loj refarisee yu' chu tej ni ahuililajz xtiidxni, ä? <sup>49</sup> Reben xhidajlre ni di gan xleii to Moisés, reni'c agunijtpac.

<sup>50</sup> Nicodem, nani huij lojni te guxhijn, najc te refarisee. Laani räjpni lojreni:

<sup>51</sup> —Lo xleinu caj: digacdi guntu yälguxhtis te bejn palga gajdte gucuadiagxgaa xtiidxni, te don xhi bejn.

<sup>52</sup> Badzu'reni diidxre räjpreni lojni:

—¿La näjza luj siäädlu Galilee, ä? Biłsa'c xhi caj lo xquijtz Dios, suhuiilu nicla tej niguii nani rnii xtidx Dios di jiääd nez Galilee.

#### *Gunaa nani biga' carälguijxh con te niguii*

<sup>53</sup> Dxejc cade tejreni sii rolijzreni.

## 8

<sup>1</sup> Dxejcti huij Jesús nez dan Oliib. <sup>2</sup> Rsilru gubi'ni, bui'ni nen guidoo. Luxh sanuutis siääd guiraa rebenguejdx lojni. Dxejc ro'c gurejni, gusloj caguluiniireni. <sup>3</sup> Dxejcti biääd refarisee näjza reben najn, biädnäreni te gunaa nani biga' carälguijxh con te niguii. Basujrenini galäi reni suga' ro'c. <sup>4</sup> Räjpreni loj Jesús:

—Mastr, gunaare biganäj te niguii carälguijxhreni, niluxh yu' cháäläni. <sup>5</sup> Loj leii xten Moisés caj guicuaanu guij yejc sa' gunaaga te guetni. Luj ¿xhicha naalu?

<sup>6</sup> Si'c räjpreni lojni te gaxäjsi gunijtni te diidx te gac cue'creni xquejni. Niluxh Jesús basajbtisni lojni lo yuj, gusloj cagucuaani lo yuj con bicuenaani. <sup>7</sup> Dxejc sanuutisreni canabdiidxreni, huisutini, räjpni:

—Nani yu' lojtu ni xhettipac xtojlni, ni'c ganiddoo sugucuaani guij yejc gunaare.

<sup>8</sup> Basabsac lojni lo yuj sanuutis cagucuaani con bicuenaani lo yuj. <sup>9</sup> Luxh laareni che biejn diajgreni diidxga, sa'csi yu' xtojlni, gusloj biriireni tebgajreni, ganid ni najc bengolru, dxejcti ni najc huinru. Dxejcti bianxteb Jesús näjza gunaa ni suga' galäiireni.

<sup>10</sup> Dxejc gusulii Jesús, luxh sa'csi rutru lojdi bahuiini, xtebtis gunaaga, räjpni lojni:

—Gunaa, ¿con reni cabe'c xquejlu? ¿La rut bacuaquijdiru luj, ä?

<sup>11</sup> Räjp Gunaaga:

—Nicla tejreni, Dad.

Dxejcti räjp Jesús lojni:

—Niclaza narä dina gucuaquiäru luj. Huij, na'cru gunlu dojl.

#### *Jesús najc bianij xten guedxliuj*

<sup>12</sup> Gunii Jesús lo rebejn stehuält, räjpni lojreni:

—Narä nacä bianij xten guedxliuj; nani jiädnajl narä dini sa lo yälñacäy, sica'ni bianij ni rudeedpac yälñabajn.

<sup>13</sup> Dxejcti räjp refarisee lojni:

—Luj caniiu diidx lagajcsi xcuentlu. Xhet sajcdi sa' diidxga.

<sup>14</sup> Badzu' Jesús diidxre, räjpni lojreni:

—Masque lagajc narä rniä diidx xcuentä, sajcdi xtidxä, guliipacni, sa'csi ananä caro siälä, ananäza caro cha'ä. Niluxh la'tu ditu gan caro siälä, niclaza caro cha'ä. <sup>15</sup> La'tu rujntu yälguxhtis si'c najctis rexhigab xten ben guedxliuj. Narä rut lojdi runä yälguxhtis. <sup>16</sup> Palga gunä yälguxhtis, yälguxhtis xtenä laaca najcni, sa'csi et xtebädi runä yälguxhtis, sa'csi narä näj Xtaä ni baxhaḷ narä rienñuni. <sup>17</sup> Luxh lo xleitu caj diidxre: “Che rniä tio'p bejn tejsi diidx, didxliini, colchalilajzni.” <sup>18</sup> Narä rniliäpac diidx lagajc xcuentä, dxejcti Xtaä nani baxhaḷ narä rniliizani diidx xcuentä.

<sup>19</sup> Räjpreni loj Jesús:

—¿Caro yu' xtadlu?

Räjp Jesús lojreni:

—Ditu gumbee nicla narä, niclaza Xtaä; paru niembeetu narä, niembeezatu Xtaä.

<sup>20</sup> Rediidxre gunii Jesús cadre re' gojn, laḷ ni caguluiini neñ guidoro niluxh rut gunaazdini sa'csi gajd xhorni guidzuj.

*Cadro cha'ä, la'tu digacdi jiaädu*

<sup>21</sup> Gunisac Jesús lojreni, räjpni:

—Narä sia'ä, luxh la'tu siguiiltu narä, niluxh loj xtojltu sejtto. Cadre cha'ä di gacdi jiaädu.

<sup>22</sup> Räjp rexpejn Israel loj resa'reni:

—¿Xhaa sugu'tni lagajc laani, ni'cni najni di gacdi chonnu cadre chääni?

<sup>23</sup> Räjp Jesús lojreni:

—La'tu najctu ben lo yuj. Narä nacä ben ni siääd jiaa. La'tu najctu ben guedxliujre. Luxh narä dina gacätis ben guedxliujre. <sup>24</sup> Ni'cni guniä lojtu, sejtto lo xtojltu sa'csi palga ditu chalilajz nacä chu nacä, sejtpectu lo xtojltu.

<sup>25</sup> Dxejcti räjpreni lojni:

—¿Chuxh najclu?

Dxejcti badzu' Jesús diidxre lojreni, räjpni:

—¿Xhini'c guniä lojtu galooli? <sup>26</sup> Xhidajl diidx rlazä guiniä, xhidajlza yälguxhtis rlazä gunä xcuenttu sa'csi ditu chalilajz, per nani baxhaḷ narä najc ben guliipac; nani biejn diagä guniini, rediidxga rniä loj reben guedxliuj.

<sup>27</sup> Luxh laareni direni niacbee la xcuent Dad Dios ni caniini. <sup>28</sup> Ni'cni räjp Jesús lojreni: —Cheni guiliästu Xi'n Niguii jiaa, dxejc sacbeetu laa narä ni baxhaḷni, luxh xhetliidi runä lagajcsi xcuentä. Si'cni baluii Dad narä, si'ctis rniä. <sup>29</sup> Nani baxhaḷ narä suganäjni narä. Gajd Dad gusanxeb narä, sa'csi runätis ganax redzuun nani rchagljajzni.

<sup>30</sup> Laḷ ni caniini si'c, xhidajlreni huililajz xtiidxni.

*Rexi'n Dios con remos xten dojl*

<sup>31</sup> Dxejcti räjp Jesús lo rexpejn Israel nani huililajzga:

—Palga la'tu sutijptu, guzoobtu xtidxä, dxejc guliipac najctu xpenä. <sup>32</sup> Sumbeezatu nani najc didxguli, niluxh didx guliiga suslaa la'tu lo xtojltu.

<sup>33</sup> Räjpreni lojni:

—Rexagdo to Abraham najcnu, rut chu lojdi gudo'nu si'c mos. ¿Xho mood naalu “siliaatu”?

<sup>34</sup> Räjp Jesús:

—Riniliä, rniliäpac lojtu, chutis ni rujn dojl najc mos xten dojl. <sup>35</sup> Nani najc mos, dini jia'n rolijz xlamni guideb guibajjni, niluxh nani najc xi'n lamga, ni'c sii sia'n rolijz xtaäni guideb guibajjni. <sup>36</sup> Ni'cni, palga ruslaa xi'nni la'tu lo dojl, dxejcsii apac gulaatu. <sup>37</sup> Ananä najctu xagdo to Abraham, luxh la'tu rlanjtu ju'ttu narä sa'csi di xtidxä jiu' lo xcäriejntu. <sup>38</sup> Narä rniä nani abahuiä con Xtaä; luxh la'tu rujntu nani biejnza diajgtu lo xtaädu.

<sup>39</sup> Badzu'reni diidxre, räjpreni lojni:

—Xtadnu najc toAbraham.

Dxejc räjp Jesús lojreni:

—Palga la'tu najcpactu xi'n toAbraham, sujntu sa' dzuun ni bejn toAbraham. <sup>40</sup> Luxh naj rlanjtu ju'ttu narä, sa'csi rniliä rediidx nani baluui Dios loä. ¡Di toAbraham niujn si'c!  
<sup>41</sup> La'tu rujntu xtzuun xtadtu.

Dxejc räjpreni lojni:

—Nuure dinu gac xi'n chälbejn̄di; nuure tejtis xtadnu yu', laani najc Dios.

<sup>42</sup> Dxejcti räjp Jesús:

—Paru guliini najc xtadtu Dios, ninälajztu narä sa'csi loj Dios biriä siälä ree. Xhet lagajcsi xcuentä siälädi; Dios baxhaḷ narä. <sup>43</sup> ¿Xhicuent ditu gacbee rediidx ni rniä lojtu? Sa'csi di rlanjtu gucuadiajgtu rextidxä. <sup>44</sup> Xtadtu najc beḅdxab. La'tu najctu xi'nni, rlanjtu guntu nani rlanjtisni guntu. Xtadtu galooli najcni te ni rugu't, dini suu xlaad didxlii, sa'csi xheti didxlii nen̄ lastooni. Che rniini didx-xhii, si'c rniini sa'csi si'cpac najcni, sa'csi najcni beḅ didx-xhii, najczani xtad didx-xhii. <sup>45</sup> Niluxh narä rniä didxlii, ni'c ditu chalilajz xtidxä. <sup>46</sup> ¿Chu tejtü sajc guluii te dojl̄ ni beḅä? Narä rniä didxlii. ¿Xhicuent ditu chalilajz xtidxä, ä? <sup>47</sup> Nani najc xpejn̄ Dios, ni'c rucuardiajg xtidx Dios. Sa'csi la'tu ditu gac xpejn̄ Dios, ni'cni ditu gucuadiajg xtidxä.

*Ansde toAbraham, agac nabajn̄* Crist

<sup>48</sup> Dxejcti badzu' rexpejn̄ Israel diidxre, räjpreni lojni:

—Laaca rniinu luj najclu te bejn̄ ni siädä Samaria, beḅdxab yu' lastoolu.

<sup>49</sup> Räjp Jesús lojreni:

—Xhet beḅdxabdi yu' lastoä. Nani runätis rliä'pä xpala'n Xtadä, luxh la'tu alga rbälaztu narä. <sup>50</sup> Luxh narä dina quilä chu guiliä'p xpala'nä, yu' chu rguuil guiliä'p bejn̄ xpala'nä, niluxh laani rujnni yalguxhtis. <sup>51</sup> Rniliä'pac lojtu, nani riu, nani rusooob xtidxä, dipacni guet.

<sup>52</sup> Dxejcti räjp rexpejn̄ Israel lojni:

—Naj agucebeepacnu yu' beḅdxab lastoolu. ToAbraham näjza reniguii nani gunii xtidx Dios, guiraareni agujt. Luxh luj rniilu: “Nani riu, nani ruzoob xtidxä, dipacni guet.”

<sup>53</sup> ¿Xhixh sajcrulu lo toxtadnu Abraham, ä? Ni laani gujtni, gujtza reniguii ni gunii xtidx Dios. ¿Chuxh rchalolu najclu?

<sup>54</sup> Badzu' Jesús diidxre, räjpni lojreni:

—Palga lagajc narä rliä'pä xpala'nä, xhet sajcdi xpala'nä. Per nani rliä'p xpala'nä najc Xtadä, lagajcza Xtadä ni rniitu najc Xtioistu. <sup>55</sup> Niluxh la'tu ditu gumbeeni. Narä numbeäni. Paru guiniä dina gumbeäni, sacä te beḅ didx-xhii si'c najctu la'tu. Niluxh dee, numbeäpacni, luxh riuä ni rniini, rusobä xtiidxni. <sup>56</sup> ToAbraham toxtadgoldootu, bibalajzni sa'csi nuhuiini dxej nani jiälä, niluxh bahuiinini dxej bibalazduxhni.

<sup>57</sup> Dxejcti räjp rexpejn̄ Israel lojni:

—Nicla gajdlu chu tiubituu ijz, ¿xho naalu abahuiilu lo toAbraham?

<sup>58</sup> Räjp Jesús lojreni:

—Rniliä'pac lojtu, che gajdli guibajn̄ toAbraham, agac nabaḅä narä.

<sup>59</sup> Dxejcti cua'reni guij te nucuaareni yejc Jesús, per di Jesús niga', biriini nen̄ guidoro, gudejdn̄i galäiireni. Sä'tini.

## 9

*Basiajc Jesús te bejn̄* ni natiä'p balojni che gojllini

<sup>1</sup> Che cadejd Jesús te lajt, bahuiini sobga' te bejn̄ ni che gojlli bejn̄ga agajc natiä'p balojni. <sup>2</sup> Dxejc gunabdiidx rexpejn̄pacni lojni, räjpreni:

—Mastr, ¿chuni'c bejn̄ dojl̄, la bejn̄re o la xcuzajnni, ni'c natiä'p balojni che gojlni, ä?

<sup>3</sup> Räjp Jesús:

—Nicla laani, niclaza xcuzajnni di niujn dojl̄. Si'c gojlni te xcuent ni sajc bejn̄re suhuii bejn̄ xho najc xtzuun Dios. <sup>4</sup> Nanab gunä xtzuun nani baxhaḷ narä naj ni najc rdxee, sa'csi

cheni guidzujn guxhijn rut gacdi gun dzuun. <sup>5</sup> La<sub>l</sub>ni yu'a lo rebejn guedxliuj, nacä xpianij guedxliuj.

<sup>6</sup> Che gulujx guniini si'c, batiobxhejnini lo yuj, bejnini bajn con xhejnini, gudääbnini con bicuenaani lo rebaloj lotiä'pga. <sup>7</sup> Dxejcti räjpni:

—Huij, huitiib lojlu nen nis ni laa Siloé. Laj nisga sälojza “baxha<sub>l</sub>ni”.

Dxejcti huijni. Huitiibni lojni. Che gubi'ni, aruhuiini. <sup>8</sup> Dxejcti rexpisin lotiä'pga, näj renani galoo bahuiireni natiä'p lojni, räjpreni:

—¿La et laadi dee ni rbej te rutie'ni gojn, ä?

<sup>9</sup> Yu'reni räjp:

—Laanini.

Yu'zareni räjp:

—Et laadini, rujnsi lojni si'c.

Laani räjpni:

—Laa naräni.

<sup>10</sup> Räjpreni lojni:

—¿Xho mood arien balojlu?

<sup>11</sup> Dxejcti räjp dade'ga nani gujc lotiä'p:

—Dade' ni laa Jesús bejn bajn, gudääbnini baloä, dxejcti najni: “Huitiib lojlu nen te nis ni laa Siloé”, dxejcti che huitibä loä, lagajc dxejc bien loä.

<sup>12</sup> Dxejcti räjpreni lojni:

—¿Con dade'ga naj?

Räjpni bejnga:

—Dina ganä.

*Reben* farisee bejn yälgunabdiidx lo dad lotiä'p nani biajc lojni

<sup>13</sup> Huijäreni nani gujc lotiä'pga nez loj refarisee. <sup>14</sup> Luxh sa'csi najcni dxej ni rusilajzreni che bejn Jesús bajn ni gudääbni loj lotiä'pga te biajc balojni, <sup>15</sup> gunabdiidxsac refarisee loj dade' nani biajc balojni, xho mood arien balojni naj.

Laani räjpni lojreni:

—Bajn gudääbni loä, dxejc gudibä loä, naj aruhuiä.

<sup>16</sup> Dxejc yu' refarisee ni räjp:

—Di dade' ni bejn dee gac xpejn Dios, sa'csi dini jiu dxej ni rusilajz xpejn Israel.

Yu'zareni räjp:

—¿Xho gac gunni sa' remilagwrga paru najcni ben dojl?

Ni'cni gula' sa'reni, gujcreni tio'p gala'. <sup>17</sup> Dxejcti gunabdiidxsacreni lo ni gujc lotiä'p:

—Luj a', ¿xhi rniilu xcuent nani basiajc balojlu?

Dxejc räjp dade'ga:

—Narä rniä najcni te bejn nani rni xtidx Dios.

<sup>18</sup> Luxh rexpejn Israel naaddireni chalii lajzreni gujcpacni te lotiä'p ni abien balojni, dxejcti gurejdxreni xcuzajn dade' ni gujc lotiä'pga. <sup>19</sup> Dxejcti gunabdiidxreni lojreni, räjpreni:

—¿Laa xi'ntu dee nani najtu cheni gojllini natiä'p lojni? ¿Xhoxh arien lojni naj?

<sup>20</sup> Badzu' rexuzajjni diidxre, räjpreni:

—Nadonnu laa xi'nnuni, luxh che gojlni natiä'p lojni. <sup>21</sup> Niluxh dinu guidon naj xho mood arien lojni, dizanu guidon chu basiajc balojni. Colguiniabdiidx lojni, anajcni bengool, lagajc laani sajz guiniini xhi gusajcni.

<sup>22</sup> Si'c gunii xcuzajjni sa'csi rdxejbreni rexpejn Israel, sa'csi agac bia'nreni diidx sibääreni, diruren gusaan jiu' nen guidoo chutis te bejn ni naa Jesús najc Crist nani abiääd. <sup>23</sup> Ni'cni räjp rexuzajjni:

—Anajcni bi'n ni ayu' xcäriejnini. Lojni colguiniabdiidx.

<sup>24</sup> Dxejcti guredxsacreni nani gujc lotiä'pga, räjpreni lojni:

—Gulä'p xpala'n Gueb Dios. Nuure nadonnu ben dojl najc dade'ga.

<sup>25</sup> Dxejcti badzu' dade'ga diidxre, räjpni:



—Dina ganä la najcni beñ dojl̄ o la dini gac. Tejtis nanä: gucä lotiä'p, luxh naj arien̄ baloä.

<sup>26</sup> Stehuält gunabdiidxreni, räjpreni lojni:

—¿Xho bennäjni luj? ¿Xho bejn̄ni basiajcn̄i balojlu?

<sup>27</sup> Badzu' dade'ga diidxre, räjpni:

—Ni aguniä guira'ti lojtu, luxh la'tu ditu jiu xtidxä. ¿Xhicuent rlanjtu guinisacäni? ¿Xhixh näj la'tu rlanjtu gactu xpejn̄pacni, ä?

<sup>28</sup> Dxejcti gudilnäjrenini, räjpreni:

—Luj najclu xpejn̄ni, per nuure najcnu xpejn̄ toMoisés. <sup>29</sup> Anadonnu guninäj Dios toMoisés, niluxh dade're dinu guidon casiädni.

<sup>30</sup> Dxejcti räjp dade' lojreni:

—Dee najc te cos ni guidxeloj bejn̄: la'tu ditu gan casiädni, ñiluxh laani basiajcn̄i baloä! <sup>31</sup> Nadoncheenu di Dios cuadiajg xtidx reben̄ dojl̄; palga yu' chu rajn̄ Dios, ni rusoobza xtiidxni, rucuardiajg Dios xtidx sa' bejn̄ga. <sup>32</sup> Che guslojli guedxliuj gajd diajgnu jiejn̄ xcuent te bejn̄ nani rusiajcn̄i baloj te beñ lotiä'p nani natiä'p lojni cheni gojllini.

<sup>33</sup> Palga xhet lo Diosdi siäd dade're, xhet sajcdi gunni.

<sup>34</sup> Badzu'reni diidxre räjpreni lojni:

—Luj, lo dojl̄pac gojllu, ¿xho jiädluilu nuure?

Dxejcti guläärenini neñ guidoro, barilaagwrenini.

<sup>35</sup> Biejn̄ diajg Jesús guläärenini neñ guidoro, che bidxälnini, räjpni lojni:

—¿La rililajzlu xtidx ni najc Xi'n Dios ni gujc Niguui, ä?

<sup>36</sup> Badzu'ni diidxre, räjpni:

—¿Chuni'c najcni, Dad, te chalilazä xtiidxni?

<sup>37</sup> Räjp Jesús:

—Abahuiilu lojni, lagajcza laani caninäjlu naj.

<sup>38</sup> Dxejcti räjpni:

—Rililazä Dad.

Dxejcti bazuxhijbni te gojnnini.

<sup>39</sup> Räjp Jesús:

—Par yälguxhtis biälä lo guedxliujre, te fii renani di lojni jien̄, niluxh reni rien̄ lojni sajcreni lotiä'p.

<sup>40</sup> Refarisee nani suganäjreni, che biejn̄ diajgreni diidxre, räjpreni:

—¿Xhixh najczanu beñ lotiä'p, ä?

<sup>41</sup> Räjp Jesús:

—Paru najctu lotiä'p, rut gucuaquijditu xtojltu, naj sa'csi rniitu rien̄ lojtu, sicaquijtu rextojltu.

## 10

### *Jesús najc te baxtorsa'c*

<sup>1</sup> Rniliá, rniliápac lojtu, nani di jiu' ro' gurajl̄ xte rexiil, alga richu'ni stelaad, rä'pni cuä' gurajl̄, ni'c najcni te gubaan. <sup>2</sup> Nani riu' nez ro' gurajl̄ xten rexiil, laani najc xpaxtoorreni.

<sup>3</sup> Che guidzujn̄ baxtoor, ruxhal nani rcanäj ro lä', te jiu'ni. Rexiilga numbeereni xse' baxtoor, dxejctiru laani rbejdxni rexiilga, tebgaj xiilga yu' lajni, rināzanireni cadro naga' guixasa'c. <sup>4</sup> Che rii rexiilga neñ gurajl̄, sanä baxtoorgareni, luxh numbee rexiilga xse'ni, ni'c rsianäjreni baxtoorga. <sup>5</sup> Luxh dipacreni chanä te baxtoor nani direni gumbee, ruxun̄reni lojni sa'csi direni gumbee xse' garenca bejn̄.

<sup>6</sup> Bij Jesús rediidxga lojreni, niluxh direni niacbee xhi säloj ni guniini.

<sup>7</sup> Dxejcti gunisac Jesús diidx lojreni; räjpni:

—Rniliá, rniliápac lojtu, narä nacä si'c roxlä' xcurajl̄ rexiil. <sup>8</sup> Guiraa reni abiäd galoo, najcneni ganax gubaan luxh di rexiil nucuadiajg xse'ni. <sup>9</sup> Narä nacä si'c rolä' xten gurajl̄, nani jiu' nejzga, siłaani loj xtojlni, siu'ni, siriini te guidxälni guixasa'c gauni.

<sup>10</sup> 'Ni najc gubaan riäädtsini te cuanni, te ju'tni, te guxhinzani, niluxh narä siälä te ga'ptu yäl'nabansa'c, yäl'nabajn par tejpas. <sup>11</sup> Narä nacä baxtorsa'c; luxh baxtorsa'c sudeed lagajc xcäl'nabajn ni xcuent rexiilni. <sup>12</sup> Niluxh te mos ni rajxh, di gac baxtoorpac, ni xhet xtendini najc rexiil, che rhuiini siäd te cuyo't, ruxunni, li rbälazni rexiil. Dxejc rniaaz cuyo't rexiil, rutie'chzani rexiil. <sup>13</sup> Mosga ruxun sa'csi najcni mostis, luxh dini jiu xhi rsiajc rexiil.

<sup>14</sup> 'Narä nacä baxtorsa'c; numbeä reni najcpac rexilä; rexilä numbeezareni narä <sup>15</sup> sigajc numbee Xtaä narä, sigajc numbeäza Xtaä; luxh sudedä xcäl'nabanä xcuent rexiilga. <sup>16</sup> Rapäza ste cuaa xiil, ni di gac xten gurajlre; näjza laareni nanab chaxiä, te gusobdiajgreni xtidxä, te guidxagsa' guiro'p cuaareni, gacreni tejtis gurajl, tejtisza baxtoor.

<sup>17</sup> 'Narä siguixäza xcäl'nabanä, guetä, te dxejcru siliässacä xcäl'nabanä, guibansacä, ni'cni sanälajz Xtaä narä. <sup>18</sup> Rut sajcdi ju't narä, lagajc narä gudedä xcäl'nabanä, guetä. Rapä yäl'nibee te gudedä xcäl'nabanä, guetä, rapäza yäl'nibee te xcasacä xcäl'nabanä te guibansacä, sa'csi dee najc yäl'nibee ni baniidx Xtaä löä.

<sup>19</sup> Xcuent rediidxre gula' sa' rexpejn Israel, gujcreni tio'p gala'. <sup>20</sup> Xhidajlreni canii: —¿Xhicuent riutuni? ¿La ditu gan te bendxab yu' lastooni? Yejcni rajc. Xhigac rcuadiajgtu xtiidxni.

<sup>21</sup> Dxejc ste cuaareni:

—Dini gac. Di rediidxre gac xtidx te bendxab. ¿Xhixh sajc rusiajc bendxab baloj relotiä'p, ä?

*Rdxe'ch rebejn* loj Jesucrist

<sup>22</sup> Lagajc nen redxejga gujc lanij xten xquidoo rexpejn Israel guedx Jerusalén. <sup>23</sup> Najcni bäi najl. Biu' Jesús guidoro, sasajni nez nen cordoor ni laa xten Salomón. <sup>24</sup> Gubig rexpejn Israel guideb gabi Jesús, räjpreni lojni:

—¿Gucli gucua'tzlu loonu chu najclu? Palga luj najclu Crist ni cabääznu jiäd, guiniliini loonu tejpas.

<sup>25</sup> Dxejc badzu' Jesús diidxre, räjpni lojreni:

—Aguniä lojtu si'c, niluxh ditu nililajz. Redzuun nani runä xcuent xcäl'nibee Xtaä, huenliisi ruluilojreni chuni'c nacä. <sup>26</sup> La'tu ditu chalilajz sa'csi ditu gac rexilä. <sup>27</sup> Rexilä numbee xse'ä, luxh narä numbeezareni, riädnajlzareni narä. <sup>28</sup> Narä rudedä yäl'nabajn par tejpas loj rexilä, luxh direni nitloj par tejpas. Rutza laadi nani sajcdi gudzucajreni ladzñaä. <sup>29</sup> Xtaä baniidxreni löä, laani najcni guroobru, nadipru loj guiraareni. Rut laadi nani sajcdi gudzucajreni ladzñaä Xtaä. <sup>30</sup> Narä näjza Xtaä najcnu tejsi.

<sup>31</sup> Dxejc gulässac rexpejn Israel guij, te nucuaareni yejc Jesús. <sup>32</sup> Dxejcti räjp Jesús lojreni:

—Xhidajl dzuun xten Xtaä abaluiä lojtu, ¿lo redzuunga, xhi tej dzuun rujn gucuaatu guij yecä?

<sup>33</sup> Dxejcti räjp rexpejn Israel lojni:

—Xcuent redzuun ni rujnlu dinu gucuaa guijlu. Sa'csi guniyajlu, ni'c nucuaanu guij yejclu. Ben guedxliujlu, luxh najlu najclu tejsi con Dios.

<sup>34</sup> Badzu' Jesús diidxre, räjpni lojreni:

—¿La et loj xleiiditu caj rediidxre: “Narä rniä, la'tu najc redios”? <sup>35</sup> Nancheenu digacdi guidxaa xquijtz Dios. Palga gulalajni redios rebejn nani bejn yäl'guxhtis loj rexpejn Israel, dxejc <sup>36</sup> naj ¿xhicuent guniitu löä: “Caniyajlu Dios”, sa'csi guniä lojtu narä nacä Xi'n Dios? Ni gule Dios narä, baxhalni narä lo guedxliujre. <sup>37</sup> Palga dina gunä redzuun xten Xtaä, na'c chalilajztu rextidxä. <sup>38</sup> Luxh palga runnäni, mascä ditu chalilajz xtidxä, colchalilajz ni rului reyäl'milagwr nani runä, te gacbeetu par tejpas, Xtaä yunäj narä, narä yunääza laani.

<sup>39</sup> Che rlajzreni niniaazrenini stehuält, laani biriini ladzñaareni.

<sup>40</sup> Dxejcti sääni, gubisacni nez stelaad gueu Jordán, nejzga huijia'nni, cadre gusloj batiobnis Juan. <sup>41</sup> Xhidajl bejn bidzujn lojni ro'c, räjpreni:

—Di Juan niujn nicla tej yälmilagwr luxh guiraa rediidx ni gunii Juan xcuent dade're najc didxliipac.

<sup>42</sup> Xhidalduxhrene huililajz xtiidxni ro'c.

## 11

### *Gujt Larz*

<sup>1</sup> Yu' te dade' ni cayacxhuu ni laa Larz. Rbäjzni guedx Betania, lajdxza rebisiajnni Marii näjza Mart. <sup>2</sup> Mariire, bisiajn Larz, najc nane' ni basäl setnejxh ni' Jesús, batiaazani ni'ni con xquidxejcti. <sup>3</sup> Ni'cni baxhal guiro'p bäjlrre diidx loj Jesús, räjpreni lojni:

—Dad, xamiigwlu nani sanälajzlu cayacxhuu.

<sup>4</sup> Che biejn diajg Jesús rediidxga, räjpni:

—Di yälracxhuure ju'tni, sa'csi yälracxhuure najc te guluilojni xcälrnibee Dios. Te guluilojza yälracxhuure xcälrnibee Xi'n Dios.

<sup>5</sup> Sanälajz Jesús Mart, bäjlni, näjza Larz, <sup>6</sup> che räjpreni lojni cayacxhuu Larz, bia'nni stio'p dxej cadre yu'ni. <sup>7</sup> Dxejcti räjpni loj rexpejn pacni:

—Colcho', chonnu stehuält región Judea.

<sup>8</sup> Räjp rexpejn ni lojni:

—Mastr, gajd gac xchej rlajz rexpejn Israel ni rnibee nucuaa guij yejclu te nugu'treni luj, luxh naj rlajzlu chäsaclu ro'c.

<sup>9</sup> Dxejcti räjp Jesús lojreni:

—¿La xhet tzubitio'p ordi yu' lo tebdxej, ä? Palga sa bejn rdxee, dini jiajb sa'csi ruhuiini lo bianij nani yu' lo guedxliujre. <sup>10</sup> Palga chasajni guxhijñ, siliaro'ni, sa'csi xheti bianijga.

<sup>11</sup> Dxejcti räjp Jesús lojreni:

—Nagayejs xamigwä Larz. Cha'a te chacuänäni.

<sup>12</sup> Dxejc räjp rexpejn pacni lojni:

—Dad, palga agudiesni, pet siajcti.

<sup>13</sup> Jesús canii lojreni agujt Larz, niluxh rexpejn pacni bejn xhigab caniini xcuent yälrejs xten bacältis.

<sup>14</sup> Ni'cni guniliipac Jesús räjpni lojreni:

—Agujt Larz. <sup>15</sup> Rbalazä sa'csi rutinu ro'c, te chalilajztu xtidxä. Colcho' te chohuiini.

<sup>16</sup> Dxejcti Tomás ni rniizareni “cua'ch”, räjpni loj resa'ni:

—Colcho' te guetnäzanuni.

### *Jesús najc yälrbansac lo yälgujt*

<sup>17</sup> Che bidzujñ Jesús lo guejdxga, agujc tajp dxej biga'tz Larz. <sup>18</sup> Guedx Betania tre' gajxh lo guedx Jerusalén, si'cti tio'p garol kilómetro. <sup>19</sup> Xhidajl rexpejn Israel abidzujñ, siädhuiireni Mart, näjza Marii, te di gac-huin lajzreni sa'csi gujt bisiajnreni.

<sup>20</sup> Che gucbee Mart abidzujñ Jesús, biriini huichaglojnini; niluxh Marii bia'n rolijzreni.

<sup>21</sup> Dxejcti räjp Mart lo Jesús:

—Dad, paru suga'lu ree, di bisianä niejt. <sup>22</sup> Narä nanä suniidx Dios guiraa nani guiniablu lojni.

<sup>23</sup> Jesús räjpni lojni:

—Sibansac bisiajnlu.

<sup>24</sup> Räjp Mart lojni:

—Acananä sibansacni che guidzujñ dxej ni guibansac bejn loj rebengut dxej lult che gun Dios yälguxhtis.

<sup>25</sup> Dxejc räjp Jesús lojni:

—Narä nacä yälruspansac bejn loj rebengut, näjza yäl'nabajn par tejpas. Nani rililajz rextidxä, masä agujtni, sibansacni. <sup>26</sup> Chutis tej bejn ni nabajn ni chalilajz xtidxä, dini nitloj par tejpas, ¿riliiga lajzluni, ä?

<sup>27</sup> Dxejcti räjp Mart lojni:

—Rililazäni, Dad. Ahuililazä luj najclu Crist, Xi'n Dios nani bia'n diidx guxha| Dios lo guedxliujre.

*Biin Jesús cuä' xpaal Larz*

<sup>28</sup> Che guluux gunii Mart, huitejdxni bäjluni Marii, xhiga'tz räjpni lojni:

—Abidzujn Mastr. Cabejdxzani luj.

<sup>29</sup> Che biejn diajg Marii rediidxga, huisugajcni, sahuuini Jesús. <sup>30</sup> Gajd Jesús jiu' guejdxga, lahtis suga'ni cadro bidxaagni Mart. <sup>31</sup> Rexpejn Israel nani biädcuenäj Marii, ni cahui didi gac-huin lajzni, che bahuiireni huisu Marii, sääni, näjza laareni huirinajlreni Marii, naareni pet lo baa sayoonni.

<sup>32</sup> Ni'cni che bidzujn Marii cadro suga' Jesús, bazuxhijbni lojni, räjpni:

—Dad, paru suga'lu ree, di bisianä niejt.

<sup>33</sup> Che bahuii Jesús cayoon Marii, näjza rexpejn Israel ni siädnajl Marii, guc-huin lastooni, biääd te rsliajz lastooni. <sup>34</sup> Dxejcti räjpni lojreni:

—¿Caro bacua'tztuni?

Räjpreni lojni:

—Dad, gudaa ree te fiilu.

<sup>35</sup> Dxejcti biin Jesús. <sup>36</sup> Ni'cni cayäjp rexpejn Israel:

—Colhuii, lacti sanälajznini.

<sup>37</sup> Yu'zareni räjp:

—Dade're basiajc bejn lotiä'p. ¿Xha di niajcdi nusiajcn bejnre te di niejtni, ä?

*Gubansac Larz*

<sup>38</sup> Guc-huinuxh lastoo Jesús, gubigni lo baa. Baaga najc si'c te biliää, suga' te guiro ni rusäuureni ro'ni. <sup>39</sup> Dxejcti räjp Jesús lojreni:

—Colgudzucaj guijga.

Mart, ni najc bisiajn bengutga, räjpni lojni:

—Dad, pet acaladxuudxni, sa'csi agujc tajp dxej gujtni.

<sup>40</sup> Dxejc räjp Jesús lojni:

—¿Et rniä lojlu, palga rililajztu, suhuuilu xcäl'nibee Dios, ä?

<sup>41</sup> Dxejcti badzucajreni guijga. Guläs Jesús lojni xhaguibaa, räjpni loj Xtadni:

—Xtadä, runidxä xquixtios lojlu sa'csi abiejn diajglu xtidxä. <sup>42</sup> Narä nanä guliica rucudiajglu xtidxä, luxh naj caniäni xcuent rebejn ni tre' ree, te chalilajzreni luj baxhallu narä.

<sup>43</sup> Che gulujx guniini rediidxga, guredxa'ni räjpni:

—¿Larz! ¿Gudaa ree!

<sup>44</sup> Dxejc birii bengutga nen biliää. Naliib renaani, reni'ni, niäuu te baii lojni. Dxejcti räjp Jesús lojreni:

—Colguslaani, colgusaan jiini.

*Bachaagreni diidx xho guiniaazreni Jesús*

(Mt. 26:1-5; Mr. 14:1-2; Lc. 22:1-2)

<sup>45</sup> Xcuent dzunrore huililajz rextidx Jesús xhidajl rexpejn Israel nani huinajl Marii, che bahuiireni xhi bejn Jesús. <sup>46</sup> Yu' reni huihuui loj rexpejn Israel ni laa farisee, bijreni diidx xhi bejn Jesús. <sup>47</sup> Dxejcti refariseega, näjza rebixhojz ni rnibee, bire'reni bidxagsa'reni lo Junt Suprem, räjpzaren:

—¿Xho jiennu? Niguiire cayujn xhidajl milagwr. <sup>48</sup> Palga guisaannuni si'c, guiralii bejn sililajz xtiidxni, sinajlrenini. Dxejcti jiääd reben roman ni rnibee, gudzucajreni xcäl'nibeenu, sudzujlzaren lajdxnu.

<sup>49</sup> Dxejc Caifás, bixhojzro ni riäj| gunibeeni lo rebixhojz ijzga, räjpni lojreni:

—La'tu xhetliidi najnditu. <sup>50</sup> Ditu gun xhigab laaca guet tejtis bejn̄ xcuent guideb guejdx, didi nitloj guideb lajdxnu.

<sup>51</sup> Niluxh Caifás dini ninii diidxre xcuentcani. Sa'csi ijzga rnibeeni lo rebixhojz, lagajc Dios badeed diidxga guniini. Ni'c gunixgaani guet Jesús xcuent nación̄ xten rexpejn̄ Israel. <sup>52</sup> Luxh xhet ganaxtis xcuent nacion̄ga, nájza te guire' guiraa rexpejn̄ Dios nani nare'ch loj guideb guedxliujre. <sup>53</sup> Ni'cni dxejliga bachaag rebejn̄ga diidx te don xho gunreni gugu'treni Jesús.

<sup>54</sup> Ni'cni diru Jesús nisíaj nez loj rexpejn̄ Israel. Biriini región̄ Judea, huijni te lajt gajxh nez lo reyubijdz, lo te guejdx ni laa Efraín. Ro'c biannájni rexpejn̄pacni.

<sup>55</sup> Guxii dxej cayääd̄x guidzujn̄ lanij ni laa pascw ni rujn̄ rexpejn̄ Israel. Xhidalduxh rebenguejdx huij guedx Jerusalén̄ te gusiareni lastooreni, te gac gunreni lanij xten pascw. <sup>56</sup> Cansajreni caguuilreni Jesús; che yu'zareni nen̄ guidoro, canabdiid̄x lo sa'reni, rájpreni:

—¿Xhi najtu? ¿La siäd̄ni lanijre o laa dini jiäd̄, ä?

<sup>57</sup> Refarisee nájza rebixhojz ni rnibee loj rebixhojz, agunibeereni palga yu' chu najn caro yu' Jesús, chaye'tzni lojreni te guiniaazrenini.

## 12

### *Gudäáb te gunaa se't ni' Jesús*

(Mt. 26:6-13; Mr. 14:3-9)

<sup>1</sup> Che riäd̄dx xho'p dxej gal̄ lanij pascw, huij Jesús guedx Betania cadre rbäjz Larz nani baspansac Jesús loj rebengut. <sup>2</sup> Ro'c bejnreni te xchej te gau Jesús. Mart bateed xchejga, nájza Larz sobganáj Jesús nájza rexpejn̄pacni lo mex. <sup>3</sup> Dxejcti bidzunnáj Marii si'cti garol litr se't ni rlianexhduxh si'c nard. Sacduxh se'tga. Dxejcti gudäábni se'tga lo reni' Jesús, baspijdzni ni'ni con xquidxejcn̄i. Guideb nen̄ yu'ga gulanejxh se'tga. <sup>4</sup> Dxejcti rájpn̄ Judas Iscariot, xi'n Simón, ni najc te rexpejn̄pac Jesús, lagajc ni abejn̄ xhigab guto'ni Jesús, rájpn̄i:

<sup>5</sup> —¿Xhicuent di se'tre nido' choñ̄ gayuu denar te nidis meelga loj reben̄proob? (Choñ̄ gayuuga najc si'cti ni xca' te niguii paru gunni dzuun tzubiteb bäii.)

<sup>6</sup> Guniini si'c, xhet sa'csi riadini reproob, per sa'csi laani najcni te gubaan, luxh laani ca'ni bols cadre rucnee meel, luxh rbääni meel lojga te rca'nini. <sup>7</sup> Ni'cni rájpn̄ Jesús lojni:

—Na'c gudxojn̄luni; subasäl̄xgaanini, che gajd guidzujn̄ dxej nani guiga'tzá. <sup>8</sup> Dxej-yääl yu' reben̄proob lojtu, luxh narä dina chuä lojtu xchej.

### *Laareni rlajzreni nugu'tzareni Larz*

<sup>9</sup> Dxejc che gucbee xhidajl xpejn̄ Israel yu' Jesús rolijz Larz ni gubansac lo rebengut, bidzujn̄reni, xhet xcuentis Jesús. Biäd̄dreni te fiizareni loj Larz nani baspansacni lo rebengut. <sup>10</sup> Dxejcti rebixhojz ni rnibee bachaagzareni diidx te ju'tzareni Larz, <sup>11</sup> sa'csi xhidajl rexpejn̄ Israel salilajzreni xtidx Jesús sa'csi bahuiireni gubansac Larz.

### *Biu' Jesús guedx Jerusalén̄*

(Mt. 21:1-11; Mr. 11:1-11; Lc. 19:28-40)

<sup>12</sup> Che bara yääl, rebejn̄ xhidajl ni bidzujn̄ lanij biejn̄ diajgreni asiäd̄dzujn̄ Jesús guedx Jerusalén̄, <sup>13</sup> dxejcti batiu'reni naa reyagzijñ, biriireni nen̄ guejdx, sachaglojrenini. Guredxa'reni, rájpreni lo Jesús:

—¡Colguiliä'p xpala'n Dios! ¡Chicbaa nani siäd̄ xcuent Dad nani najc reii lo rexpejn̄ Israel!

<sup>14</sup> Bidxäl Jesús te burbäz, gubijbnini, si'cni caj lo reguijtz:

<sup>15</sup> Na'c guidxejbtu, bejn̄ ni rbäjz nen̄ guedx Sión.

¡Colhuii! Reii xtentu asiäd̄, bijbni dejtz te burbäz.

<sup>16</sup> Di rexpejn̄pacni niacbee recosga che gujcreni, niluxh che gubansacni loj rebengut, dxejc banaj lajzreni recos nani caj lo guijtz xcuentni, nájza guiraa recos ni bejn̄ rebejn̄ lo Jesús te guzobj rediidxga.

<sup>17</sup> Reben<sub>n</sub> xhidajl ni suganäjni che gurejdxni Larz te biriini nen<sub>n</sub> baa che baspansacnini lo reben<sub>g</sub>ut, bijzareni diidx xcuent guiraa ni bahuiireni. <sup>18</sup> Ni'cni biädchagloj reben<sub>n</sub> xhidajlgani, sa'csi abiejn diajgreni laani bejn<sub>n</sub>i milagwrre. <sup>19</sup> Ni'cni räjp refarisee lo sa'reni:

—Aruhuiitu xhet sajcdi jiennu. ¡Colhuii! Empac sanajl guideb guedxliujni.

*Riädtiil regriegw Jesús*

<sup>20</sup> Yu' gaii bengriegw nadxaag lo rebejn<sub>n</sub> ni biädted lanij guedx Jerusalén. <sup>21</sup> Rebejn<sub>n</sub>re bidzuj<sub>n</sub> loj Felipe nani siääd guedx Betsaida xten Galilee, gusloj gunabreni lojni, räjpreni:

—Dad, rlaaznu guihuiinu lo Jesús.

<sup>22</sup> Biääd Felipe, räjpni loj Andrés, dxejcti guiro'preni huiye'tzreni lo Jesús. <sup>23</sup> Dxejcti räjp Jesús lojreni:

—Abidzuj<sub>n</sub> or<sub>n</sub> ni chä'p xpala'n Xi'n Dios ni gujc Niguii. <sup>24</sup> Rniliápac lojtu, palga di te xob binij jiajb lo yuj, nen<sub>n</sub> xhurc cadro cueni, te rianxtebni, guetni, dini guiliejn. Luxh palga guetni, siliejn<sub>n</sub>i, rajcza te nisro lojni, rajc xhidajl xob binij. <sup>25</sup> Nani sanälajz xcäl<sub>n</sub>nabaj<sub>n</sub>n<sub>n</sub>i, sunijtnini, luxh nani rbälaz xcäl<sub>n</sub>nabaj<sub>n</sub>n<sub>n</sub>i lo guedxliujre, sica'ni yäl<sub>n</sub>nabaj<sub>n</sub> par tejpas. <sup>26</sup> Palga yu' chu tej ni r<sub>l</sub>ajz chu loä, sujiäd<sub>n</sub>najl<sub>n</sub>i xnezyuä, te cadro yu'ä, ro'cza cuääz ni ru' loä. Palga yu' chu gun xtzunä, siliä'pza Xtadä xpala'n<sub>n</sub>i.

*Rnixgaa Jesús guetni*

<sup>27</sup> Räjpszani:

—Naj cayac-huin lastoä. ¿Xhichani'cza gäpä lo Xtadä? ¿La siniä: Dad, gucnäj narä te di tedä or<sub>n</sub> ni siääd? Ni te tedäpac orga biälä lo guedxliujre. <sup>28</sup> Xtadä, bejn si'cni riäj<sub>n</sub>l gac te guiliä'p bejn xpala'n<sub>l</sub>u.

Dxejcti xhaguibaali biejn te xse' te ni räjp:

—Agulä'pä xpala'nä, siliä'pä xpala'nä stehuält.

<sup>29</sup> Ni'cni lo rebejn<sub>n</sub> ni tre' ro'c, ni biejn diajgreni se'ga, yu' reni räjp:

—Lascanu gunii te guzii.

Guyu'zaren<sub>n</sub>i räjp:

—Te xangl Dios ni gunii lojni.

<sup>30</sup> Dxejc räjp Jesús lojreni:

—Et xcuentädi gunii xse' ni gunii, xcuenttis la'tu guniini. <sup>31</sup> Naj abiääd xcälguxhtis Dios lo guedxliuj. Naj sibicaj xcäl<sub>n</sub>rnibee nani rnibee lo guedxliujre. <sup>32</sup> Naj, che guiliäsreni narä jiaa lo guedxliuj, te galä ro'c, sutie'ä guiraa bejn loä.

<sup>33</sup> Rediidxre gunii Jesús te canixgaani xho guetni. <sup>34</sup> Räjp rebejn lojni:

—Nuure biejn diajgnu bilreni lo leii, Crist ni jiääd sibaj<sub>n</sub> par tejpas. ¿Xho mood rniilu, nanab chäs Xi'n Dios ni gujc Niguii jiaa lo guedxliuj? ¿Chuxhni'c najc Xi'n Dios ni gujc Niguii ni ruzä'tlu?

<sup>35</sup> Dxejcti räjp Jesús lojreni:

—Stera'tsi yu' bianij lojtu. Col<sub>s</sub>aj la<sub>l</sub> ni rajptu bianijga, te di guiniaaz yäl<sub>x</sub>cäy<sub>y</sub> la'tu, sa'csi ni rsiaj loj nacäy<sub>y</sub>, dini gan caro chääni. <sup>36</sup> La<sub>l</sub> ni rajptu bianij, col<sub>ch</sub>alilajz bianijga te gactu rexi'n bianij.

Gunii Jesús rediidxga lojreni, dxejcti biunejz<sub>n</sub>i ro'c, bicuatzlojni.

*Xhicuent di rexpejn Israel nililajz xtidx Jesús*

<sup>37</sup> Xhidajl remilagwr bejn Jesús nez loj rexpejn<sub>n</sub> Israel, niluxh direni nililajz xtiidxni, gulälazreni nani baxha<sub>l</sub> Dios lojreni. <sup>38</sup> Ni'cni guzobj diidx nani gunii Isafás, ni gunii xtidx Dios galoro, räjpni:

Dad, ¿chuni'c huililajz xtiidxlu?

¿Chuloj baluiilu xcäl<sub>n</sub>rnibeduxhlu, ä?

<sup>39</sup> Ni'cni di niajcdi nililajzreni, sa'csi guniiza Isafás, räjpni:

<sup>40</sup> Abascäjyni lojreni,  
abennajd<sub>n</sub>i lastooreni,  
te di rebalojreni fii,



te di lastooreni gacbee,  
te di gusiejch lajzreni,  
te di gusiäcäreni.

<sup>41</sup> Rediidxre gunii Isaías, sa'csi bahuiini xcälrdimbicha' Jesús xhaguibaa, dxejc guniini xcuentni.

<sup>42</sup> Dxejcti gaii rebejn ni rnibee huililajz xtiidxni che räjpni abaxhal Diosni, niluxh bidxebreni reben farisee, ni'c direni nicäjp ahuililajzreni, te di gurilaagwreni laareni, gudxojnreni jiu'reni nen guidoo. <sup>43</sup> Sa'csi rdxagljazruren guiliä'p rebejn xpala'nreni luxh guxiiru rlajzreni guiliä'p Dios xpala'nreni.

### *Xtidx Jesús sigubee rebejn*

<sup>44</sup> Dxejcti gudidxa' Jesús:

—Nani chalilajz xtidxä, et ganaxdi ni cania rililajzni, näjza xtidx Xtaä nani baxhal narä rililajzni. <sup>45</sup> Nani ruhuii loä, ruhuiizani loj ni baxhal narä. <sup>46</sup> Narä biälä si'c bajl lo guedxliujre, te guiraa renani chalilajz xtidxä, diruren chu lo yälkäjy. <sup>47</sup> Nani riendiajg xtidxä, luxh dini gusoob rediidxga, dina gunä yälguxhtis lojni, sa'csi dina niälä te gunä yälguxhtis rebenguedxliuj, biälä te guslää reben guedxliuj lo dojl. <sup>48</sup> Nani rbälaz narä, ni di gusoob xtidxä, yu' chu gun yälguxhtis xtojlni; lagajc rediidx nani guniä gun yälguxhtis xtojlni che gal lult dxej. <sup>49</sup> Sa'csi narä dina niädniä lagajc xcuentä, lagajc Dad ni baxhal narä, lagajc laani gunibeeni xhini'c guiniä, xhini'c guluiä. <sup>50</sup> Luxh nancheä gunibeeni chu yäl'nabajn par tejpas. Ni'cni rediidx nani rniä, rniäreni si'cpacni gunii Xtaäni loä.

## 13

### *Jesús gudiibni ni' rexpejn pacni*

<sup>1</sup> Che gajd gal dxe lanij ni laa pascw, najn Jesús asiäddzungajxh xorni, or ni jiunejzni lo guedxliujre te chääni lo Xtaäni. Luxh sa'csi agajc sanälajzni rexpejn pacni nani yu' lo guedxliujre, sinälajznanireni par tejpas.

<sup>2</sup> Ni'cni laj ni cayauxchejreni biu' bendxab nen lastoo Judas Iscariote, xi'n Simón, te guto'ni Jesús. <sup>3</sup> Sa'csi agucee Jesús abateed Xtaäni guira'ti ladznaani, gucbeezani loj Dios biriini, lo Dios guibi'zani, <sup>4</sup> ni'c huisu Jesús lo xchejga, gulääni xhablojiaani, gudobjni te tuäi, batejbnini xque'ni. <sup>5</sup> Dxejcti cua'ni nis nen te chaa, guslojni gudiibni ni' rexpejn pacni, baspijdzni ni'reni con tuäiiga. <sup>6</sup> Che bidzujni loj Simón Pedr, räjp Pedr lojni:

—Dad, ¿xhixh luj siguiiblu ni'ä?

<sup>7</sup> Dxejc räjp Jesús lojni:

—Nani cayunä dilu gacbeeni naj, guixee-huijdx sacbeeluni.

<sup>8</sup> Räjp Pedr lojni:

—¡Dipaclu quiib ni'ä!

Räjp Jesús lojni:

—Palga dina quibä ni'lu, digacdiru gaclu xpenä.

<sup>9</sup> Räjp Pedr lojni:

—Dad, na'c quiiblu ni'ätis näjza naä näjza yecä gudiib.

<sup>10</sup> Räjp Jesús lojni:

—Nani agojz di guiquiin gagsacni; ni'tisni guidiib, sa'csi naya guidebni; nayazatu, per xhet guiraaditu naya.

<sup>11</sup> Sa'csi anajzni chu guto'ni, ni'cni guniini: “Xhet guiraaditu naya.”

<sup>12</sup> Ni'cni che gulujx gudiibni ni' rexpejn pacni, gotsacni xhajn, guresacni lo mex, räjpni: —¿La najntu xhini'c benä lojtu, ä? <sup>13</sup> La'tu rniitu narä, Mastr näjza Dad. Luxh laaca rniitu sa'csi nacäni. <sup>14</sup> Mbaj, palga narä ni nacä Dad, nacäza Mastr, gudibä ni'tu, la'tu sigajcza riäj quiibtu ni' resa'tu. <sup>15</sup> Sa'csi abaluiä lojtu xho gacni, te chanuu guntu sigajc ni benä lojtu. <sup>16</sup> Rniliä, rniliäpac lojtu, di te mos gac benroru lo xlamni; diza te ni rij

xmandaad bejn gac beñroru loj nani baxhañi. <sup>17</sup> Palga najntu recosre, chicbaazatu palga si'c guntu.

<sup>18</sup> 'Dina guiniä diidxre lo guiraatu. Numbeä reni aguleä, niluxh nanab soob xtidx Dios ni caj lo rexquijtzi. Scree najc rediidxga: "Nani rajw xcuxtilä, ni'c agubiréni, agulälazni narä." <sup>19</sup> Ni'cni agunixgaäni, che gajdñi gac, te che gacni chalilajztu nacä chu rniä nacä. <sup>20</sup> Rniliä, rniliápac lojtu, nani riu xtidx nani ruxhañä, riuzani xtidxä; luxh nani riu xtidxä, riuzani xtidx nani baxhañ narä.

*Räjp Jesús chuni'c guto'ni*

(Mt. 26:20-25; Mr. 14:17-21; Lc. 22:21-23)

<sup>21</sup> Che gulujx gunii Jesús rediidxre, gac-huinduxh lastooni, dxejc guniliini:

—Rniliä, rniliápac lojtu, tejtuto' narä.

<sup>22</sup> Dxejc gusloj cadxeloj rexpeljñni lo sa'reni, di jien chuchani'c cagusä'tni. <sup>23</sup> Tej rexpeljñni nani sanälajzruni sobga' cuä'ni. <sup>24</sup> Dxejcti bejn Simón Pedr seen lojni te guiniabdiidxni loj Jesús chu xcuent caniini. <sup>25</sup> Dxejc nani sobga' cuä'ni, gubigruni loj Jesús, gunabdiidxni lojni, räjpni:

—Dad, ¿chuni'c rusä'tlu?

<sup>26</sup> Dxejcti räjp Jesús lojni:

—Guhuaxä te la' yätxtiil. Loj nani gudedäni, ni'c najcni.

Dxejcti bahuaajdxni tla' yätxtiil, badeednini loj Judas Iscariote, xi'n Simón.

<sup>27</sup> Che gulujx gudajw Judas yätxtiilga, biu' bendxab lastooni. Dxejcti räjp Jesús lojni:

—Ni rlanjlu gunlu, bejngani.

<sup>28</sup> Nicla tej reni sobga' lo mex direni niacbee xhicuent räjpni lojni si'c. <sup>29</sup> Sa'csi Judas ca' bols meel, gaiireni bejn xhigab pet guniini si'c sa'csi yu' xhi chasiini par lanij, o pet yu' xhi gudeedni loj reben ni xhet rajpdi. <sup>30</sup> Che gudajw Judas yätxtiilga, birigajcni, luxh abiu' guxhijñ.

*Didxcoob ni gunibee Jesús*

<sup>31</sup> Dxejcti che abirii Judas lojreni, räjp Jesús lojreni:

—Naj sienloj xcälñnibee Xi'n Dios ni gujc Niguui, luxh lojni sienloj xcälñnibee Dios.

<sup>32</sup> Palga suluiloj Xi'n Dios ni gujc Niguui xcälñnibee Dios, dxejc suluilojza Dios xcälñnibee Xi'n Dios ni gujc Niguui, luxh siojb gunnini. <sup>33</sup> Rexi'nä nani sanälazä, diru gac xchej chunää la'tu. La'tu siguiiltu narä, per si'cni räpä lo rexpeljñ Israel si'cza rniä lojtu naj: Di gacdi jiäädto cadre cha'a. <sup>34</sup> Te didxcoob rnibeä guntu: Colchanälajz sa'tu. Sigajc ni sanälazä la'tu, sigajcza colchanälajz sa'tu. <sup>35</sup> Palga rinälajz sa'tu, si'c sacbee guiraabenguedxliuj najcpactu rexpeljñä.

*Xhini'c gun Pedr loj Jesús*

(Mt. 26:31-35; Mr. 14:27-31; Lc. 22:31-34)

<sup>36</sup> Dxejcti räjp Simón Pedr loj Jesús:

—Dad, ¿caro chäälu?

Räjp Jesús lojni:

—Cadro cha'ä digacdi jiädñajllu narä naj; niluxh sidzujñ dxej jiädldu ro'c.

<sup>37</sup> Räjp Pedr lojni:

—Dad, ¿xhicuent digacdi jiälä naj? Palga rquiin guetä xcuentlu, suguetä.

<sup>38</sup> Räjp Jesús lojni:

—¿La guliilu guetlu xcuentä, ä? Rniliápac lojlu, nicla gajd guidgäi cuedxa' chon huält, säjblu dilu gumbee najrä.

*Jesús najc nezyuj lo Dad*

<sup>1</sup> Dxejcti räjp Jesucrist lojreni:

—Na'c chutu yärsia'. Rililajztu xtidx Dios, colchalilajzza xtidxä. <sup>2</sup> Yu' xhidalduxh yu' cadre rbäjz Xtradä. Palga xhet si'c di najcni, dizana niniä lojtu si'c. Sia'ä chasucheä reyu' par la'tu. <sup>3</sup> Luxh palga chasucheä cadre cuääztu, che guluxäni, sibisacä, te chanäätu ro'c, te cadre yu'ä, ro'cza chutu. <sup>4</sup> La'tu anajntu caro cha'ä, anajnzatu nezyuj ni chäätu.

<sup>5</sup> Dxejcti räjp Tomás loj Jesús:

—Dad, dinu guidon caro chäälu, ¿xho guidonnu nezyujga, ä?

<sup>6</sup> Räjp Jesús lojni:

—Narä nacä nezyuj. Narä nacä didxliipac, nacäza yäl nabajñ. Por narätis sajc chää bejn cadre rbäjz Xtradä. <sup>7</sup> Palga la'tu niembeetu chuni'c nacä, niembeezatu Xtradä. Luxh najli abiembeepactuni sa'csi acahuiitu lojni.

<sup>8</sup> Räjp Felipe loj Jesús:

—Dad, basaan guihuiinu loj Xtradlu; ni'ctis rlaaznu.

<sup>9</sup> Dxejcti räjp Jesús lojni:

—Felipe, ¿la gajdlu gumbee narä, luxh lacti xchej yu'ä lojtu, ä? Nani ruhuii loä, abahuiini lo Xtradä. ¿Xhicuent rniablu fiilu lo Xtradä, ä? <sup>10</sup> ¿La dilu chalilajz najrä yunää Xtradä, luxh Xtradä yunäjzani narä, ä? Rediidx nani rniä dina guiniäni lagajc xcuentä, sa'csi Xtradä ni yunäj narä laani rujñ lagajc rextzuunni. <sup>11</sup> Colchalilajz xtidxä, che rniä narä yunää Xtradä, luxh Xtradä yunäj narä. O palga ditu chalilajzni sa'csi najcni xtidxä, colchalilajzni sa'csi abahuiitu rextzuun ni runä. <sup>12</sup> Rniliápac lojtu, nani chalilajz xtidxä, sajc gunni redzuun nani runä, luxh sujñni dzunroru sa'csi sia'a cadre yu' Xtradä. <sup>13</sup> Luxh guiraa ni guiniablu lo Xtradä xcuentä, narä sunäni, te guluiloä xcälrnibee Xtradä. <sup>14</sup> Narä sunä xhitis ni guiniabtu por laä.

*Ria'n diidx guxha* Jesús Sprit Dxan

<sup>15</sup> Räjpzani:

—Palga sanälajztu narä, susoobtu xtidxä. <sup>16</sup> Dxejc siniabä lo Xtradä, te guniidxni stee nani gacnäjtü te chunäjni la'tu par tejpas. <sup>17</sup> Nalajznu, Xpriet Dxan xten Dios, ni rnili. Di gacdi xca' reben guedxliujni, sa'csi direni fii lojni, niclaza gumbeerenini. Niluxh la'tu numbeetuni sa'csi yunäjni la'tu, yu'ni nen lastootu. <sup>18</sup> Dina gusanbisiäbä la'tu; sibisacä jiädhuiä la'tu. <sup>19</sup> Diru gac xchej, dxejc diru reben guedxliuj fii loä, niluxh la'tu suhuiitu loä. Sa'csi nabanä, la'tu nabajnzatu. <sup>20</sup> Nen redxejga, dxejc sacbeetu yunää Xtradä, la'tu yunäjtu narä, luxh narä yunääza la'tu. <sup>21</sup> Nani numbee Xtradä, nani rusooobza xtidxä, ni'c ruluiini sanälajzpacni narä. Luxh Xtradä sinälajzza nani sanälajz narä, najza narä chanälazä bejn ga, luxh suluiloä lagajc narä lojreni.

<sup>22</sup> Dxejcti räjp Judas (xhet Iscariótedi) lojni:

—Dad, ¿xhini'c gunlu te guluilojlu lojtisnu, xhet näjdi loj reben guedxliujdi, ä?

<sup>23</sup> Dxejcti räjp Jesús lojni:

—Nani sanälajz narä, ni'c riu xtidxä. Ni'c chanälajz Xtradä, dxejc jioplänznäänuni guiro'pnu Xtradä. <sup>24</sup> Nani di chanälajz narä, dini jiu xtidxä. Luxh rediidx nani biejn diajgtu, et xtidxadini; xtidx Xtradäni ni baxhañ narä.

<sup>25</sup> 'Caniä guiraa rediidxre lojtu lañi yu'ä lojtu, <sup>26</sup> per Sprit Dxan xten Dios nani jiädycnäjtü, nani guxhañ Xtradä xcuentä, laani suluini lojtu guira'ti, najza susnajni lajztu guiraa rediidx nani aguniä lojtu. <sup>27</sup> Yälrbecdxilajz rusa'nä lojtu, xcälrbecdxilazä runidxä lojtu, et si'cdini runiidx guedxliujdi najc nani runidxä lojtu. Na'c chutu yärsia', na'cza guidxejbtu. <sup>28</sup> Abiejñ diajgtu ni guniä lojtu: Sia'ä luxh siälsacä lojtu. Paru ninälajzpacu narä, sibalajztu xcuentä che guniä sia'a lo Xtradä, sa'csi Xtradä najc beñroru loä. <sup>29</sup> Scree agunixgaäni lojtu, te che soobni, dxejcru chalilajztu xtidxä.

<sup>30</sup> 'Diruna guiniduxhä lojtu, sa'csi asiääd nani rnibee loj guedxliujre, luxh digacdi guinibeeni narä; <sup>31</sup> riäjñ gac recosre te gacbee reben guedxliuj sanälazä Xtradä, rusobäza xtidx Xtradä, runä nani gunibeeni. Colchastie, colcho' jiunejznu ree.

## 15

*Jesús najc si'c te yaguub*

<sup>1</sup> Rāpzani:

—Narä nacä si'c te yaguub. Xtäädä najc si'c nani rusuj yajgga. <sup>2</sup> Rebejn najc si'c reṇaa yajgga. Guiraa reṇaa yajgga nani xhet cajdi lojni rutiuugnini. Luxh guiraa reṇaa yajgga ni caj ninejxh lojni, rusianini te xcajru ninejxh lojreni. <sup>3</sup> La'tu anajctu beṇnaya xcuent rediidx nani aguniä lojtu. <sup>4</sup> Colguibannäj narä, sigajc ni nabannää la'tu. Digacdi xcaj ninejxh lo te ṇaa yajg palga agurujgni lo yaguub. Sigajcza la'tu, palga guibicajtu loä, di gacdi guntu xtzunä.

<sup>5</sup> 'Narä nacä si'c yaguub. La'tu najctu si'c reṇaa yajgga. Nani riannäj narä, naräza riannääni, ni'c sajc runduxhni xtzunä, sa'csi che guibicajni loä, xhet sajc di gunni. <sup>6</sup> Nani di chupac loä, sibicajni si'c reṇaa yajg nani rdin sa'csi xhetru rcajdi lojni, dxejcti rbijdzni, rusäl bejnreni lo däj te checni.

<sup>7</sup> Palga chupactu loä, palgaza chupac xtidxä lastootu, colṇab nani rlaajtistu, luxh narä sunidxäpacni. <sup>8</sup> Che gunpactu xtzun Dios, dxejc fii bejn najcpactu xpenä, siliä'p bejn xpala'n Xtäädä, Dios. <sup>9</sup> Si'cpacni sanälajz Xtäädä narä, sigajcza sanälazä la'tu. Colchanuu lo xcälrinälazä. <sup>10</sup> Palga jiutu rextidxä, sinuutu lo xcälrinälazä, sigajc ni abasobä xtidx Xtäädä, luxh rinuä lo xcälrinälajz Xtäädä.

<sup>11</sup> 'Rniä rediidxre lojtu te guibalaznäjtü narä, te si'c guibalazduxhpactu. <sup>12</sup> Dee najc diidx ni rnibeä guntu: colchanälajz sa'tu si'cni sanälazätu. <sup>13</sup> Xheti te yälsanälajz ni guroobru lo yälsanälajzre, gudeed te bejn xcälṇabajjni, guetni lacuaa resa'ni. <sup>14</sup> La'tu najctu resa'ä palga gusoobtu diidx nani guinibeä guntu. <sup>15</sup> Diruna cuälää “mos” la'tu, sa'csi di remos gan xhi rujn xlamreni. Luxh narä agulälää la'tu “rexamigwä”, sa'csi guira'ti rediidx ni biejn diagä lo Xtäädä aguniäza rediidxga lojtu. <sup>16</sup> Et la'ditu gule narä, narä guleä la'tu. Guleä la'tu te guntu xtzun Xtäädä, te na'cza nitloj dzuunga. Te guira'tiza nani guiniabtu lo Xtäädä por laä, ni'cza guniidxni lojtu. <sup>17</sup> Dee rnibeä guntu: colchanälajz sa'tu.

*Rbälaz rebejn guedxliuj Jesús näjza rexpejñni*

<sup>18</sup> Palga cuälaz reben guedxliuj la'tu, anajntu agulälazxgaareni narä. <sup>19</sup> Paru najctu ben guedxliujre, sinälajzreni la'tu. Per ditu gac ben guedxliuj, sa'csi narä guleä la'tu te jiutu xtidx Xtäädä, ni'cni rbälaz reben guedxliuj la'tu. <sup>20</sup> Colsnaj lajztu diidx nani guniä lojtu, 'di te mos gac beṇroru lo xlamni'. Palga basacsireni narä, susacsizareni la'tu. Palga rusoobreni xtidxä, susoobzareni xtiidxtu. <sup>21</sup> Guiraa recosre sunnäjreni la'tu xcentä sa'csi direni gumbee nani baxhal narä.

<sup>22</sup> Paru dina niädniä lojreni direni niujn dojl xten xcälrdxechlajzreni loä, per naj di gacdi guiniireni direni gacbee yu' xtojreni. <sup>23</sup> Nani rbälaz narä, rbälazzani Xtäädä. <sup>24</sup> Palga dina niunä nez lojreni remilagwro, sa' nani rutru rajc di rujn, direni niajp dojlga; sa'csi abahuiireni redzuunga, ni'c agulälazreni narä, näjza Xtäädä. <sup>25</sup> Bejnreni si'c te guzobj diidx nani cuaj lo guijt agujc xchero: “Gulälazreni narä, luxh xhetlidi benä.”

<sup>26</sup> Che jiaäd nani gacnäj la'tu, laani sinii xcuentä, chu nacä. Laani najc Sprit ni yu' lo Xtäädä, siniini didxlii. Narä suxhaläni lojtu; lo Xtäädä guiriini jiaädni lojtu. <sup>27</sup> Näjza la'tu siniitu diidx xcuentä, chu nacä, sa'csi guyu'tu loä cheni gusloäli cagusule'ä diidxga.

## 16

<sup>1</sup> Rediidxre rnixgää lojtu, te didi yu' xhi gun jiajbtu te gunijttu lo xtidxä. <sup>2</sup> Sidzujñ dxej sibääreni la'tu dirureni gusaan jiu'tu neṇ guidoro. Sidzujñ or chutis ju't tejtü, suchaloni cayacnäjni Dios. <sup>3</sup> Guiraa recosre sujñreni sa'csi direni gumbeepac Xtäädä, niclaza narä. <sup>4</sup> Agunixgää rediidxre lojtu, te che guidzujñ orga sinaj lajztu xcuent rediidx ni guniä lojtu.

*Redzuun ni rujn Sprit Dxan xten Dios*

'Dina niniä rediidxre lojtu che gusloä cagusule'ä diidx, sa'csi suganää la'tu. <sup>5</sup> Naj agojl guibi'ä loj nani baxhal narä, luxh nicla tejtü di guiniabdiidx: “¿Caro chäälu?”

<sup>6</sup> Dxejc sa'csi aguniä recosre lojtu, ni'c cayac-huin lastootu. <sup>7</sup> Luxh rniliápac lojtu, huenru par la'tu cha'ä. Palga dina cha'ä, di gacdi jiääd lojtu nani racnäj. Niluxh palga cha'ä, suxhaläni lojtu. <sup>8</sup> Luxh laani, che jiäädni lo guedxliujre, susanijni xcäriejn rebejn te gacbeereni xcuent dojl, näjza xcuent xcäl'nabannaya Dios, näjza xcuent yälguxhtis xten Dios. <sup>9</sup> Guluiizani xcuent dojl lojreni sa'csi direni chalilajz xtidxä. <sup>10</sup> Guluiini xcäl'nabannaya Dios lojreni sa'csi sibusacä lo Xtaä, luxh dirutu fii loä. <sup>11</sup> Guluiini xcuent yälguxhtis xten Dios lojreni sa'csi abejn Dios yälguxhtis loj bendxab nani rnibee lo guedxliujre.

<sup>12</sup> 'Yu' xhidajlru diidx rlazä guiniä lojtu, niluxh digacdi gacbeetureni naj. <sup>13</sup> Che jiääd Sprit xten didxlii xten Dios, laani susanijni xcäriejntu te gacbeetu guiraa redidxgului, sa'csi dini guinii diidx xcuentcani, siniitisni ganax rediidx nani gudeed Dios lojni te guiniini. Siniizani xcuent recos nani churu gac. <sup>14</sup> Laani siliä'pni xpala'nä sa'csi sica'ni xhixtenä, suluinini lojtu. <sup>15</sup> Guiraa ni rajp Xtaä najc xtenä, ni'cni rniä suluini xhixtenä lojtu.

### *Xcäl'rac-huin lajztu sibixloj ni yälrbalajz*

<sup>16</sup> 'Sbale'si dxej, dxejc dirutu fii loä; dxejctiru sgaii dxej suhuisactu loä sa'csi narä sia'a lo Xtaä.

<sup>17</sup> Dxejcti räjp rexpejn pacni lo sa'reni:

—¿Xhini'c caniini loonu? Sbale'si dxej, dxejc dirutu fii loä, dxejctiru sgaii dxej suhuisactu loä, näjza: sa'csi sia'a lo Xtaä. <sup>18</sup> Ni'cni cayäjpreni lo sa'reni: ¿Xhi dee rniini, “sbale'si dxej”? Dinu gacbee xhini'c caniini.

<sup>19</sup> Gucee Jesús xhini'c rlazreni guiniabdiidxreni lojni, dxejcti räjpni lojreni:

—Canabdiidx lo sa'tu xhi säloj nani guniä che guniä, sbale'si dxej, dxejc dirutu fii loä; dxejcru sbale'si dxej, suhuisactu loä. <sup>20</sup> Rniliápac lojtu, la'tu soontu, niluxh reben guedxliujre sibalazduxhrene. Sac-huinduxh lastootu niluxh yäl'rac-huinre sibixhlojni yälrbalajz. <sup>21</sup> Te gunaa che gaal xi'nni, rdejndi trabajw, dxejcti che aguyu' xi'nni, riäl lajzni gudejndi trabajw, dxejc arbaa lajzni gojl xi'nni te niguii lo guedxliujre. <sup>22</sup> Ni'cni, sigajcza rac-huin lastootu naj, dxejcti che jiädhuisacätu, dxejc sii sibalajztu nen lastootu, luxh rut gacdi gudzucajdi yälrbalajzga.

<sup>23</sup> 'Nen redxejga xhetiru xhi yälguiniabdiidxdi guntu loä. Rniliápac lojtu, nani guiniabtu lo xtaä xcuentä, laani suniidxnini lojtu. <sup>24</sup> Naj xhet canabditu xcuentä. Colnabni, te xca'tuni, te guibalajztu.

### *Jesús, nani abejn gaan lo guedxliujre*

<sup>25</sup> 'Aguniä guiraloj lojtu con cuent ni ruluii, niluxh sidzujn dxej che diruna guiniä cuent ni ruluii lojtu. Siniä didxguyasi lojtu xcuent Xtaä. <sup>26</sup> Nen redxejga guiniabtu por laä. Luxh dizana guiniä siniabä narä loj Xtaä par la'tu, <sup>27</sup> sa'csi lagajcza Xtaä sanälajzni la'tu, sa'csi la'tu sanälajztu narä, luxh ahuililajzzatu loj Dios biriä biälä lo guedxliuj. <sup>28</sup> Biriä lo Xtaä xhaguibaa, biälä lo guedxliujre, siunezäza lo guedxliujre, sibusacä lo Xtaä xhaguibaa.

<sup>29</sup> Räjp rexpejn pacni lojni:

—Naj sii caniilu guyasi, dini gac si'c redidx-xhiga'tz xten cuent ni ruluii. <sup>30</sup> Naj sii gucbeenu racbeelu guira'ti rexhicos, xhetru nanabdi guiniabdiidxrunu lojlu; ni'cni ahuililajznu biriilu lo Dios ni yu' xhaguibaa.

<sup>31</sup> Räjp Jesús lojreni:

—¿La rililajz pactu naj, ä? <sup>32</sup> Asiäddzungajxh teb or luxh ala bidzujn orga, che guire'chtu, cade tejtü xnez-xnejztu, te gusanxtebtu narä, luxh dina jianxtebä sa'csi Xtaä suganäj narä. <sup>33</sup> Aguniä rediidxre lojtu te cuexi lastootu lo guedxliujre xcuentä. Lo guedxliujre sidejdpactu trabajw, colgusutijp lastootu sa'csi narä abenä gaan loj guedxliujre.

## 17

*Gunab Jesús lo Dios xcuent rexpejn̄pacni*

<sup>1</sup> Che gulujx guniini loj rexpejn̄pacni rediidxga, gulāsni lojni xhaguibaa, rāj̄pni lo Dios: —Xtadā, abidzuj̄n or; gulā'p xpala'n xi'nlu te guiliā'pza xi'nlu xpala'nlu, <sup>2</sup> sigajc ni badeedlu lojni yāl̄rnibee loj guiraa reben̄ guedxliuj, te gac gudeedni yāl̄nabaj̄n par tejpas lo guiraa renani badeedlu lojni. <sup>3</sup> Redee rajp yāl̄nabaj̄n par tejpas; numbeereni luj ni najc tejtis GuebDios, nājza narā Jesucrist nani baxhaļlu lo guedxliujre.

<sup>4</sup> 'Narā gulā'pā xpala'nlu lo guedxliujre, abaluxā dzuun nani baniidxlu gunā ree. <sup>5</sup> Naj Xtadā, gulā'p xpala'nā con luj, con bala'n, con yāl̄rdimbicha' ni gopā galooli che gajdli guirixtiej guedxliuj.

<sup>6</sup> 'Loj rebejn̄ nani baniidxlu loā, ni gulelu lo reben̄ guedxliujre, loj reni'c abasule'ā, abaluiā chu najclu. Xtenpaclu najcreni, baniidxlureni loā, luxh rapdzu'tzreni xtiidxlu. <sup>7</sup> Naj agucbeereni guiraa rediidx ni guniā lojreni lojpaclu siād̄ni. <sup>8</sup> Sa'csi rediidx nani baniidxlu loā, aguniā rediidxga lojreni, luxh ahuililajzreni rediidxga, agucbeepacreni lojlu biriā, ahuililajzreni lujpac baxhaļ narā.

<sup>9</sup> 'Narā rniabā xcuentreni, dina guiniabā xcuent reben̄ guedxliujre, ganaxtis xcuent renani abaniidxlu loā, sa'csi laareni najcreni xpejn̄lu. <sup>10</sup> Guiralii ni najc xtenā, najczani xtenlu. Guira'tiza ni najc xtenlu najczani xtenā. Agulā'pzareni xpala'nā.

<sup>11</sup> 'Narā diruna jia'nā lo guedxliujre, laareni sia'nrureni lo guedxliujre. Luxh narā siālā lojlu. Xtadā ni najc Dxanro, gucnāj̄ renani baniidxlu loā con xtiidxlu, nani baniidxlu loā te gunreni tejsi xhigab sigajcni riennu nurnu tejsi xhigab. <sup>12</sup> Che guyunāāreni lo guedxliujre, gucnāā con xtiidxlu guiraa renani baniidxlu loā, luxh nicla tejreni di ninitloj, xtebtis nani gunijt te gusojb ni caj lo xtidx Dios.

<sup>13</sup> 'Luxh naj sibusacā lojlu. Caniā rediidxre laļ ni yu'ā lo guedxliujre, sa'csi rlazā guibaa lajzreni si'c ni rbaa lazā. <sup>14</sup> Abasule'ā xtiidxlu lojreni, luxh rebejn̄ guedxliuj rdxe'chreni lojreni sa'csi direni gac bejn̄ guedxliujre sigajc ni dizana gacā bejn̄ guedxliujre. <sup>15</sup> Dina guiniabā cuāālureni lo guedxliujre, rniabā gudzucajlureni loj ben̄dxab. <sup>16</sup> Direni gac bejn̄ guedxliuj, sigajc ni dizana gacā narā bejn̄ guedxliuj. <sup>17</sup> Basyareni con xtiidxlu, sa'csi xtiidxlu najc didxguliipac. <sup>18</sup> Sigajc ni baxhaļlu narā lo guedxliujre, sigajcza ruxhaļāreni te chāāreni guideb guedxliuj. <sup>19</sup> Xcuentreni rudedā lagajc narā, te nāj laareni gacnayareni con xtidxguliipaclu. <sup>20</sup> Dina guiniabā xcuent laatisreni, rniabāza xcuent guiraa renani churu chalilajz xtidxā ni gusule'reni. <sup>21</sup> Rlazā gun guiraareni tejsi xhigab, sigajc ni rujnlu, Xtadā, si'c runāza; te sigajc ni yu'āza con luj, sigajcza churen̄ con nuurnu, te gacbee reben̄ guedxliuj luj baxhaļlu narā. <sup>22</sup> Yāl̄rnibee ni baniidxlu loā, lagajc yāl̄rnibee ga badedā lojreni te gunreni tejsi xhigab, si'cni riennu tejsi xhigab. <sup>23</sup> Narā cayunnāāreni dzuun, luj cayunnāj̄lu narā dzuun, te jiennu tejsi dzuun, te gacbee rebejn̄ guedxliuj luj baxhaļlu narā, luxh sanāljzuren̄ si'cni sanāljzalu narā.

<sup>24</sup> 'Xtadā, guiraa renani baniidxlu loā, rlazāza churen̄ cadro chuā xhaguibaa, te fiireni xcāl̄rnibeā nani baniidxlu, sa'csi huināljzlu narā galooli che gajdli guirixtiej guedxliujre. <sup>25</sup> Xtadā ni rujn̄ cossa'ctis, di rebejn̄ guedxliuj gumbeelu, luxh narā numbeālu, luxh redee agucbeezareni luj baxhaļlu narā. <sup>26</sup> Arāpā lojreni chu najclu; sāpāzaru lojreni te chu yāl̄sanāljz sa' ni rajplu par narā nen̄ lastooreni, te cuāzāza nen̄ lastooreni.

## 18

*Xho gunaazreni Jesús*

(Mt. 26:47-56; Mr. 14:43-50; Lc. 22:47-53)

<sup>1</sup> Che gulujx gunii Jesús rediidxga, huināni rexpejn̄pacni dejt̄z gueu Cedrón. Ro'c yu' xhiroob yuj cadro sojb guiraloj reyajg. Ro'c biu' Jesús nājza rexpejn̄pacni. <sup>2</sup> Anajn Judas, nani guto' Jesús, caro rij Jesús con rexpejn̄pacni sa'csi si'csi-si'c rdxaag sa'reni ro'c. <sup>3</sup> Dxejcti Judas, che biād̄ lojni te cuaa soldad roman, nāj rebixhojz ni rnibee,



näjza refarisee, huinätinireni ro'c, ca'reni balguejd näjza lintern, näjza spaad näjza lans.  
<sup>4</sup> Ni'cni Jesús, sa'csi ananxgaani xhini'c sacni, gubigni lojreni, räjpni lojreni:

—¿Chu rguiltu?

<sup>5</sup> Räjpreni lojni:

—Jesús nani siääd guedx Nazare't.

Räjp Jesús lojreni:

—Laa naräni.

Näjza Judas ni bato'ni suganäjnireni. <sup>6</sup> Che gunii Jesús lojreni: “Laa naräni”, biäxhanreni, biäjbreni lo yuj. <sup>7</sup> Dxejcti gunabdidxsac Jesús lojreni:

—¿Chu rguiltu?

Dxejc räjpzareni stehuält:

—Jesús nani siääd guedx Nazare't.

<sup>8</sup> Räjp Jesús lojreni:

—Aguniä lojtu, laa naräni. Palga narä rguiltu, colgusaan jii redee.

<sup>9</sup> Guniini rediidxga te gusojb rediidx nani guniini che räjpni: “Loj guiraa ni baniidxlu, nicla tejni di ninijt.” <sup>10</sup> Dxejcti Simón Pedr, sa'csi ca'ni te spaad, guläänini, batiuugni diag ladbee xten xmos bixhojzroga. Laj mosga najc Malco. <sup>11</sup> Dxejcti räjp Jesús lo Pedr:

—Guluchee spaad xtenlu neñ xpaguinni. ¿La dina tedä trabajwduxh nani agunibee Xtaädä tedä, ä?

#### *Jesús nez loj bixhojzro*

(Mt. 26:57-58; Mr. 14:53-54; Lc. 22:54)

<sup>12</sup> Dxejcti resoldaadga näjza comandant, näjza reguxhtis ni rnibee rexpejn Israel, gunaazreni Jesús baliibrenini. <sup>13</sup> Dxejcti ganid huinärenini lo Anás, sa'csi najcni xtadsueegr Caifás, luxh ijzga biäjł najc Caifás bixhojzro ni rnibee lo rebixhojz. <sup>14</sup> Caifás najc nani balijdx rexpejn Israel nanab guet te niguii xcuent rebenguejdxga.

#### *Cadro gunii Pedr dini gumbee Jesús*

(Mt. 26:69-70; Mr. 14:66-68; Lc. 22:55-57)

<sup>15</sup> Simón Pedr näjza stee xpejn pacni huinajł dejtz Jesús. Luxh numbee bixhojzro bejn ga, biunäjzani Jesús lo xle' bixhojzro. <sup>16</sup> Bia'nti Pedr rolä'ga. Dxejc birii xpejn pac Jesús nani numbee bixhojzroga, guniini lo nani cayajp rolä'ga, te biu' Pedr nez lo le'ga.

<sup>17</sup> Dxejcti räjp mos gunaa ni rcanäj rolä', räjpni lo Pedr:

—¿La et näjdi luj najclu te xpejn pac Jesús, ä?

Räjp Pedr loj gunaaga:

—¡Xho gacäni!

<sup>18</sup> Dxejcti sa'csi cayacnalduxh, caguse'creni boo te cagucha'lajzreni. Näjza Pedr suganäjreni, cagucha'lajzni ro guibooga.

#### *Bixhojzro cayujn yälgunabdiidx lo Jesús*

(Mt. 26:59-66; Mr. 14:55-64; Lc. 22:66-71)

<sup>19</sup> Dxejcti gusloj cayujn bixhojzro yälgunabdiidx loj Jesús xcuent chuni'c najc rexpejn pacni näjza xcuent xhini'c ruluiini.

<sup>20</sup> Dxejcti räjp Jesús lojni:

—Narä xhet xhiga'tzdi guniä rextidxä, guniäni lo guiraa rebejn guedxliuj. Basule'ä diidx neñ rexquidobäztu näjza neñ guidoro cadre re' guiraa rexpejn Israel, nicla tej diidx dina ninixhiga'tzädi. <sup>21</sup> ¿Xhicuent cayujnlu yälgunabdiidxga loä? Gunabdiidx loj renani biejn diajg xhini'c guniä lojreni. Laareni najnreni xhini'c guniä.

<sup>22</sup> Che gulujx gunii Jesús rediidxre, te rexpejn bixhojzroga huääz loj Jesús, räjpni lojni:

—¿La si'c rudzu' bejn diidx loj bixhojzro, ä?

<sup>23</sup> Dxejcti räjp Jesús lojni:

—Palga xhet laadi guniä, baluii narä xhi diidxga najc xhet laadi, niluxh palga laaca najc ni guniä, ¿xhicuent huääzlu loä?

<sup>24</sup> Dxejcti guideb naliibni baxhał Anásni lo bixhojzro lo ni laa Caifás.

*Gunisac Pedr dini gumbec Jesús**(Mt. 26:71-75; Mr. 14:69-72; Lc. 22:58-62)*

<sup>25</sup> Sugasijc Pedr ro' guiboo, cagucha'lajzni, che räjpreni lojni:

—¿La et näjdi luj najclu te xpejn̄pac niguiiga, ä?

Badzu'ni diidxga räjpni:

—¡Xho gacäni!

<sup>26</sup> Dxejcti te xmos bixhojzroga, sa'csi sa'ni najc mos ni batiu' Pedr diajgni, räjpni lojni:

—¿La et lujdi ni bahuiä neñ huert con laani, ä?

<sup>27</sup> Dxejcti räjp Pedr stehuält:

—Nicla gumbeäni.

Cuantis guniini si'c, guredxagajc te guidgaii.

*Jesús nez loj Pila't**(Mt. 27:1-2, 11-14; Mr. 15:1-5; Lc. 23:1-5)*

<sup>28</sup> Dxejc birinäjreni Jesús rolijz Caifás, huinärenini rolijz gubernadoor cadro laaza Pretorio, niluxh direni niu' ro'c sa'csi ameer guiliejn gubijdx, te di gacdxuudxreni dxejc di gacdi gaureni lani pascw. <sup>29</sup> Ni'cni birii Pila't lojreni räjpni lojreni:

—¿Xhi yälquij xten niguiire siädle'ctu loä?

<sup>30</sup> Dxejcti räjpreni lojni:

—Paru di niguiire najc te beñ latsiaj, dinu niopnäni ladzñaa guejblu.

<sup>31</sup> Räjp Pila't lojreni:

—Colchanäni, colhuii xho gunnäjtuni yälguxhtis con lagajc xleiitu.

Dxejc räjp rexpejn̄ Israel lojni:

—Di xleiitu gusaan ju'tnu te bejn̄.

<sup>32</sup> Guniireni si'c te guzojb diidx nani gunii Jesús xcuent xho guetni.

<sup>33</sup> Ni'cni biusac Pila't neñ Pretorio, gurejdxni Jesús räjpni lojni:

—¿La luj najclu reii xten rexpejn̄ Israel, ä?

<sup>34</sup> Dxejcti räjp Jesús lojni:

—¿La lagajc luj rniilu si'c, ä? O ¿laa yu' chureni'c naj lojlu si'c?

<sup>35</sup> Dxejcti räjp Pila't lojni:

—¿Xhixh näj narä nacä te xpejn̄ Israel? Lagajc reben̄ lajdxlu näjza rebixhojz bateedlu ladzñaa. ¿Xhi bejnlu?

<sup>36</sup> Dxejcti räjp Jesús lojni:

—Xcäl̄rnibeä dini gac yäl̄rnibee sa' ni yu' guedxliujre. Paru najc xcäl̄rnibeä te yäl̄rnibee sa' ni yu' guedxliujre, ala cagucuaa rexpenä te di tedä ladzñaa rexpejn̄ nani rnibee Israel. Naj di xcäl̄rnibeä gac yäl̄rnibee sa' ni yu' lo guedxliujre.

<sup>37</sup> Ni'cni räjp Pila't lojni:

—¿Reii najclu, ä?

Räjp Jesús lojni:

—Laaca najlu nacä reii. Par ni'cpac golä, par ni'cpacza biälä lo guedxliujre, partis gusule'ä didxliipac. Guiraa renani najn didxlii, reni'c rucudiajgreni xtidxä.

<sup>38</sup> Räjp Pila't lojni:

—¿Xhini'c najc didxlii?

Che guniini si'c gunisacni loj rexpejn̄ Israel:

—Dina guidxälä nicla tej xtoj̄l bejnre. <sup>39</sup> Niluxh la'tu rajptu te costumbr, casob lani pascw, ruslaanu te bejn̄ ni yu' neñ latzguuib. ¿Xhi najtu? ¿La rlajztu guslaá ni najc reii xten rexpejn̄ Israel, ä?

<sup>40</sup> Dxejcti guiragajcreni guredxa', räjpreni:

—¡Na'c guslaalu niguiiga! ¡Baslaa Barrabás!

Niluxh Barrabás najc te gubaan.

## 19

<sup>1</sup>Ni'cni gunibee Pila't gudijnreni Jesús con duu ni yu' guechguib lojni. <sup>2</sup>Bejn resoldaad te coronguejch, bazalrenini yejc Jesús. Dxejcti bahuajcwrenini te ladmoraad. <sup>3</sup>Dxejcti gusloj gubigreni lojni, te räjpreni lojni:

—¡Gubajñ par tejpas Reii xten rexpejñ Israel!

Dxejc huääzreni lojni.

<sup>4</sup>Dxejcti birisac Pila't, räjpni lojreni:

—¡Colhunii! Acabääni nez lojtu, te gacbeetu dina guidxäl nicla tej xtojñni.

<sup>5</sup>Dxejcti birii Jesús nez lojreni, yu' coronguejch yejcní, najcwzani ladmoraadga. Dxejcti räjp Pila't lojreni:

—¡Colhunii! ¡Aree niguiire!

<sup>6</sup>Ni'cni, che bahuii rebixhojzro näjza rexquixhajgreni lojni, guredxa'reni, räjpreni:

—¡Colgucuaani lo cruzj! ¡Colgucuaani lo cruzj!

Räjp Pila't lojreni:

—Lagajc la'tu colchanäni te gucuaatuni lo cruzj. Per narä dina guidxälä nicla tej xtojñni.

<sup>7</sup>Dxejcti räjp rexpejñ Israel lo Pila't:

—Nuurnu rajpnu te leii, luxh xcuent leiiga, nanab guetni sa'csi najni najcni Xi'n Dios.

<sup>8</sup>Che biejn diajg Pila't rediidxga, bidxejbruni, <sup>9</sup>biusacni neñ Pretorio, räjpni loj Jesús:

—¿Caro siäädlu?

Per xhet räjpdi Jesús lojni.

<sup>10</sup>Dxejcti räjp Pila't lojni:

—¿La dilu guinii loä? ¿La dilu gan narä rapä yälrnibee te gucuaälu lo cruzj, rapäza yälrnibee te guslaälu, ä?

<sup>11</sup>Räjp Jesús lojni:

—Xhetliidi yälrnibee niajplu loä paru dilu nica'ni xhaguibaali. Ni'cni bejñ nani bato' narä lojlu rapduxhruni dojl loj ni rajplu.

<sup>12</sup>Ni'cni gudiil Pila't xho nuslaani Jesús, niluxh rexpejñ Israel rbedxaduxhrureni, räjpreni:

—Palga luj guslaaluni, dilu gac xamiigw reii César, sa'csi chutis ni rnii najcni reii, najcni xcontraar César.

<sup>13</sup>Che biejn diajg Pila't rediidxre, gulääni Jesús, dxejcti gurej Pila't lo yagxhiil cadre rujnni yälguxhtis, cadre laa Litóstoros con didx-griegw sälojni naga' guisa'c, con didx-hebreo laani Gabata. <sup>14</sup>Najcni dxej vispr lani pascw, si'cti läidxej, dxejcti räjpni loj rexpejñ Israel:

—Colhunii, aree xreiitu.

<sup>15</sup>Ni'cni guredxa'reni räjpreni:

—¡Suguetni! ¡Suguetni! ¡Bacuaani lo cruzj!

Dxejcti räjp Pila't lojreni:

—¿La sucuaá xreiitu lo cruzj, ä?

Dxejcti räjp rebixhojz ni rnibee lojni:

—Rutru reiiidi rajpnu, Césartis najc xreiinu.

<sup>16</sup>Ni'cni bateed Pila't Jesús lojreni te chacuaarenini lo cruzj.

*Che bacuaarenini lo cruzj*

*(Mt. 27:32-44; Mr. 15:21-32; Lc. 23:26-43)*

<sup>17</sup>Dxejcti cua'reni Jesús, biriini ro'c guideb nuuni xcruzjni, cheni bidzujñlireni te lajt ni laa lajt xten Calabeer, con didx hebreo laani Gólgota. <sup>18</sup>Ro'c bacuaarenini lo cruzj. Bacuaazareni tio'p niguii lo stio'p cruzj, tejjani te laad cuä' Jesús. <sup>19</sup>Dxejc bacuaa Pila't diidx ni chää yejc xcruzjni; rediidxga najc scree: “Jesús, beñ Nazare't, Reii xten rexpejñ Israel.” <sup>20</sup>Xhidajl bejñ bil diidx ni caj yejc xcruzjni, sa'csi lajt cadre bacuaarenini lo

crujz najc gajxh ro' guejdxga, luxh didx hebreo, diidx griegw, nájza didx latin bacuaareni rediidxga. <sup>21</sup> Dxejcti rájp rebixhojzro xten rexpejn Israel loj Pila't:

—Na'c nucuaalu: “Reii xten rexpejn Israelni”, laacaru nacuaalu: “Laani najni, najcni reii xten rexpejn Israel”.

<sup>22</sup> Dxejcti rájp Pila't lojreni:

—Nani abacuaá, abacuaá. Si'c jia'nni.

<sup>23</sup> Dxejcti resoldaad, che gulujx bacuaareni Jesús lo crujz, cua'reni rexhablojiaani bejnrenini tajp la', te cade tejreni cua'reni te la'ni. Luxh yu' stee xhajnbi ni laa tunica, nadibni, guejnni hasta lo yuj guc-cheeni. <sup>24</sup> Ni'cni rájpreni lo sa'reni:

—Na'c guitiájznuni; do'o guidzujtnu te daad lojni, te don chu xten gacni.

Si'c bejnreni te gusojb xtiidx Dios cadre caj scree: “Batiájsreni xhablojiaá; yejcza xhabá ni bia'n gudzujtreni daad.”

Ni'cni bejn resoldaad recosre. <sup>25</sup> Niluxh cuá' xcrujz Jesús suga' xnanni, con bájl xnanni, ni laa Marii cháäl Cleofas, nájza Marii Magdalen. <sup>26</sup> Che bahuii Jesús loj xnanni, dxejc bahuiizani loj xpejnpacni nani sanälazduxhni, rájp Jesús loj xnanni:

—Nan, ¡bahuii, aro'c xi'nlu!

<sup>27</sup> Dxejcti rájp Jesús loj xpejnpacni nani sanälazduxhni:

—¡Bahuii, aro'c xnanlu!

Ni'cni dxejcli siná nani najc xpejnpacni xnan Jesús rolijzpacni.

### *Xho gujt Jesús*

(Mt. 27:45-56; Mr. 15:33-41; Lc. 23:44-49)

<sup>28</sup> Ni'cni, sa'csi najn Jesús alagujc guiraa recos ni nanab gac te soob rextidx Dios, rájpní:

—Cayolá nis.

<sup>29</sup> Ro'c suga' te guejs vinagr, nenga bahuajdxreni te esponj dxejc bacuaarenini lo te yajg ni laa hisopo, gulásreni esponjga batzugrenini ro'ni. <sup>30</sup> Che gulujx gu' Jesús vinagrga, rájpní:

—Agulujxni.

Dxejcti basajb yejcní, baslaani xaimni.

### *Xhi bejn te soldaad lo Jesús*

<sup>31</sup> Dxejga najc dxe vispr xte lani pascw, che ru' mandaad par lanijga. Rexpejn Israel di rlajzreni nia'n rebejnnga lo recrujz, sa'csi dxe sabdga najc dxej ni rusilajzreni. Ni'cni gunabreni lo Pila't guxhalni chu qui'ch ni'reni te guetreni, te jiájtreni loj recrujz.

<sup>32</sup> Dxejcti bidzujn resoldaad, gudi'chreni guiro'p ni' nani caj te laad, sigajcza bennájreni stee ni caj ste laadga. <sup>33</sup> Che gubigreni lo Jesús, bahuiireni alagujtni, direni nigui'ch ni'ni. <sup>34</sup> Tej soldaadga baqui'tzni te lans ro' xcustiini, dxejc bixe' rejn nájza nis. <sup>35</sup> Lagajc nará Juan bahuiá recosga, ni'cni caniá rediidxre, luxh diidxga guliipacni. Lagajc nará naná didxguliipac caniá, te chaliiza lajztu xcuentni. <sup>36</sup> Sa'csi si'c gujc guira'ti, te guzojb xtidx Dios cadre caj: “Nicla tej xtuzjtni di guech.” <sup>37</sup> Sigajcza lo stee guijtz caj diidxre: “Sidxelojreni loj nani biguijtz te lans.”

### *Huicua'tzreni Jesús*

(Mt. 27:57-61; Mr. 15:42-47; Lc. 23:50-56)

<sup>38</sup> Che gulujx recosga, dxejcti huij José, te bejn Arimatea, nacxhiga'tzni te xpejn Jesús, sa'csi rdxejbni rexpejn Israel, ni'c huijni loj Pila't, gunabni loj Pila't te laani guiliätni Jesús lo crujz. Cuájzba Pila't, dxejc biáäd José gulätni Jesús, sanätini togoolga. <sup>39</sup> Nájza Nicodem biáäd dxejc, nani galoo huinináj Jesús te guxhijn. Biädnäni si'cti tiuu kil te dänejh ni najc si'c yaal ni laa mirra nájza áloes. <sup>40</sup> Dxejcti cua'reni Jesús batejbrenini te la' lad lino, basälzarení dájga ni laa mirra con áloes, sa'csi si'c najc xcostumbr rexpejn Israel che rucua'tzreni te togool. <sup>41</sup> Gajxh cadre cuaj Jesús lo crujz, yu' te huert, nen huertga yu' te bacoob si'c te biliää, cadre nicla tej bejn gajd guiga'tz. <sup>42</sup> Sa'csi abidzujn dxej vispr lani pascw xten rexpejn Israel, luxh gajxh suga' biliääga, nenga gudixhreni Jesús; si'c biga'tztini.

## 20

*Gubansac Jesús loj rebengut*

(Mt. 28:1-10; Mr. 16:1-8; Lc. 24:1-12)

<sup>1</sup> Primer dxej xten xmaanga, cäjyru, gajd lo guedxliuj jianij che huij Marii Magdalen lo baaga. Che bidzujñni ro' baaga, bahuiini agubicaj guij ni suga' ro' baaga. <sup>2</sup> Dxejcti ruxunni gubi'ni te huiye'tzni lo Simón Pedr näjza lo stee xpejn̄pac Jesús ni sanälazduxhni, räjpni lojreni:

—Ahuilääreni Dad nen̄ baa, luxh dinu guidon caro sanärenini.

<sup>3</sup> Dxejc biriguxun̄ Pedr näjza stee bejn̄ga, huijreni nez lo baa. <sup>4</sup> Ruxun̄ guiro'preni. Niluxh stee bejn̄ga ruxunduxhruni loj Pedr. Laani ganid bidzujñni lo baaga. <sup>5</sup> Dxejcti guretänni te bahuiini nen̄ ba-biliääga. Bahuiini te laad naga' relajdtis nani bidejb Jesús, luxh dini niu' nen̄ baaga. <sup>6</sup> Dxejc bidzungajc Pedr, biugajcni nen̄ baaga, bahuiini naga' relajdga te laad. <sup>7</sup> Bahuiizani lajd ni guyu' yejcn̄i, ni'c nie'tni saru, naga'ni te laad. <sup>8</sup> Dxejcti biu' stee bejn̄ga nani bidzujñ ganid. Che bahuiini nen̄ baaga, huililajzni gubansac Jesús. <sup>9</sup> Sa'csi gajdreni gacbee ni caj lo reguijtz, cadro caj nanab guibansacni loj rebengut. <sup>10</sup> Dxejc gubisac guiro'p rexpejn̄pacni rolizreni.

*Baluiloj Jesús loj Marii Magdalen*

(Mr. 16:9-11)

<sup>11</sup> Laltis suga' Marii cuä' baaga, cayoosni. Ni'cni lał ni cayoosni, basajb lojni te bahuiini nen̄ baaga. <sup>12</sup> Dxejcti bahuiini lo tio'p xangl Dios, najcwreni ladnolbäj, sobga'reni, tejni nez cadro gojt yejc Jesús, steeni nez cadro gojt ni'ni. <sup>13</sup> Dxejcti räjpreni lojni:

—Nane', ¿xhicuent roonlu?

Räjpni lojreni:

—Sa'csi sanäreni Dad, luxh dina ganä caro huisa'nrenini.

<sup>14</sup> Che gulujx guniini si'c, gubiréni, dxejc bahuiini loj Jesús suga' ro'c, niluxh dini niembee Jesús. <sup>15</sup> Dxejc räjp Jesús lojni:

—Nane', ¿xhicuent roonlu? ¿Chu rguillu?

Marii bejn̄ xhigab laa dade' ni rcanäj huertga, ni'c räjpni lojni:

—Dad, palga luj sanäluni, gunii caro gudixhluni te guiliäsáni te chanääni.

<sup>16</sup> Dxejcti räjp Jesús lojni:

—¡Marii!

Dxejc gubiré Marii, räjpni nen̄ xtidx hebreo:

—¡Raboni!

(Säloj diidxga “Mastr”.)

<sup>17</sup> Dxejcti räjp Jesús lojni:

—Na'c guiniaazlu narä sa'csi gadna cha'a lo Xtadä xhaguibaa. Huij loj rebetzä, huiye'tz lojreni, cha'a lo Xtadä, näjza Xtadtu, loj Xtiozä näjza Xtiooztu.

<sup>18</sup> Dxejcti huij Marii Magdalen, bidzujñni loj rexpejn̄pacni badeedni didxcoob, räjpni:

—Abahuiä lo Dad Jesús.

Räjpzani lojreni guiraa recos ni gunii Jesús lojni.

*Baluiloj Jesús loj rexpejn̄pacni*

(Mt. 28:16-20; Mr. 16:14-18; Lc. 24:36-49)

<sup>19</sup> Che gojl gudxej, najcni dumingw, primer dxej xten xmaan, abiäudzu'tz ro lä' ro' yu' cadro tre' rexpejn̄pacni, sa'csi rdxejbreni rexpejn̄ Israel. Chela bidzujñ Jesús, guzujni nez galäiireni, räjpni lojreni:

—Suchu yäl̄rbedxi lastootu.

<sup>20</sup> Che guniini si'c, baluigajcni reñaani lojreni näjza cuä' xcustiini. Ni'cni bibaduxhlajz rexpejn̄pacni che bahuiireni lo Dad Jesús. <sup>21</sup> Dxejc räjp Jesús lojreni stehuält:

—Suchu yäl̄rbedxi lastootu. Si'c ni baxhal̄ Xtadä narä, si'cza ruxhalä la'tu.

<sup>22</sup> Che gulujx guniini rediidxga, balejbni yejcreni, räjpni, lojreni:

—Suguibajñ Sprit Dxan xten Dios nen lastootu. <sup>23</sup> Rextojl rebejn nani siällajztu, sibicajreni. Rextojl rebejn nani ditu jiällajz, siannäjreni redojlga.

*Tomás bahui lo Jesús ni gubansac*

<sup>24</sup> Tomás, ni laaza Didimo, najcni te retzubitio'p xpejñpac Jesús. Rutini che biääd Jesús loj rexpejñpacni. <sup>25</sup> Dxejcti räjp rexpejñpacni lojni:

—Abihuiinu loj Jesús, agubansacni loj rebengut.

Dxejcti laani räjpni lojreni:

—Palga dina fiä loj reñani cadre caj seen xten reclaab, palga dina guqui'tzä bicuenaá cadre guyu' claabga, guqui'tzäza ñaa cadre bixal cuä'ni, di lazä chalii gubansacni loj rebengut.

<sup>26</sup> Che gudejd xhujñ dxej, tresac rexpejñpacni nen yu', nadxaagza Tomás lojreni. Niäudzu'tz yu'ga, luxh chela gucbeereni abidzujñ Jesús, guzujni galäiireni, räjpni lojreni:

—Suchu yälrbedxi lastootu.

<sup>27</sup> Dxejcti räjpni loj Tomás:

—Baqui'tz bicuenaalu ree loj patñaä, basälza ñaalu cuä'äre, na'c ractio'p lajzlu, huililajzpac gubansacä loj rebengut.

<sup>28</sup> Dxejcti räjp Tomás lojni:

—¡Xtadä, Xtioozä!

<sup>29</sup> Dxejcti räjp Jesús lojni:

—Sa'csi abahuiilu loä, Tomás, huililajzlu. Chicbaa renani mase direni fii, rililajzreni xtidxä.

*Xhicuent bacuaani reguijtzre*

<sup>30</sup> Xhidalroduxhru dzuun bejn Jesús nez loj rexpejñpacni, nani di nicaj lo guijtz.

<sup>31</sup> Redzuunre nani bejn Jesús nani cuaj lo guijtzre cuajni te chalilajztu diidxre: Jesús najc Crist, nani cabäjz rebejn jiääd, Xi'n Dios. Luxh che chalilajz te bejn xtiidxni, sajpnii yälñabajñ par tejpas.

## 21

*Jesús baluilojni lo gajdz xpejñpacni*

<sup>1</sup> Dxejcti baluiloj Jesús loj rexpejñni ro' nisdoo ni laa Tiberias. Scree baluilojni lojreni.

<sup>2</sup> Nadxaag sa' rebejnre: Simón Pedr, Tomás ni laaza Didimo, näjza Natanael, nani siääd Caná xten Galilee, rexi'n Zebedeo, näjza stio'p rexpejñpacni. <sup>3</sup> Dxejcti räjp Simón Pedr loj resa'ni:

—Chanazä bäj.

Räjpreni lojni:

—Näjza nuure chonnu.

Dxejcti sääreni, huä'preni nen te barcw. Guideb guxhijnga xhet bäjldi gunaazreni.

<sup>4</sup> Che acayanij loj guedxliuj, suga' Jesús ro' nisdoo, di rexpejñni niembeeni. <sup>5</sup> Ni'cni räjp Jesús lojreni:

—Rexi'nä, ¿la xhet bäjldi rajptu, ä?

Räjpreni lojni:

—Xhet rajpdinu.

<sup>6</sup> Dxejcti räjpni lojreni:

—Colgusal xquijxhtu ladbee xten barcwga, te ro'c siniaaztuni.

Dxejcti bacuaareni guijxhga ladbee xten barcwga, dxejcti ameer diniajcdi nibääreni guijxhga ro'c sa'csi gudxadotzu'tzni bäj. <sup>7</sup> Dxejcti bejn nani sanälazduxh Jesús, räjp loj Pedr:

—Laa Dad Jesús.

Che biejn diajg Simón Pedr laa Dad Jesús, gotgajcni xhablojiaani sa'csi ladxhagjiättis najcwni sa'csi canaazni bäj, dxejcti gutiäjsni lo nisdoo. <sup>8</sup> Sgaii rexpejñpacni biädñäreni rebarcwga sa'csi ameer guidzujñreni ro' nisdoo, si'cti tegayuu metrtis cayäädx.



Siädnäzareni guijxh guidxa rebäjl. <sup>9</sup> Che bidzujñreni ro' nisdoo, bahuiireni re' guiboo, ro'c dzuub te bäjl näjza yätxtiil cague'. <sup>10</sup> Dxejcti räjp Jesús lojreni:

—Coltanä gaii bäjl nani entis gunaaztu.

<sup>11</sup> Dxejcti huij Simón Pedr, gulääni guijxhga, guidxani bälro. Guyu' si'cti te gayuu garol con choñ bäjl neñ guijxhga, niluxh dini niräsyä' mase guyu' xhidalduxh bäjl neñni.

<sup>12</sup> Dxejcti räjp Jesús lojreni:

—Coltaa te gauxharejntu.

Nicla tej rexpejñpacni dini niabdiidx lojni: “¿Chu luj?” sa'csi anajñreni laa Jesúsni.

<sup>13</sup> Dxejcti cua' Jesús yätxtiil, badeedni lojreni, sigajcza rebäjl.

<sup>14</sup> Dee najc ni riojñ huält baluilojni loj rexpejñpacni, che gubañsacni loj rebengut.

### *Jesús rñinäj Simón Pedr*

<sup>15</sup> Che gulujx gudajwreni, räjp Jesús loj Simón Pedr:

—Simón xi'n Jonás, ¿la sanälajzrulu narä loj chu stee, ä?

Räjpni lojni:

—O'n, Dad, luj najnlu sanälazä luj.

Räjp Jesús lojni:

—Gojp rexilä'ä.

<sup>16</sup> Räpsacni lojni ni rojp huält:

—Simón, xi'n Jonás, ¿la sanälajzlu narä, ä?

Räjpni lojni:

—O'n, Dad. Luj najnlu sanälazä luj.

Räjpni lojni:

—Gojp rexilä.

<sup>17</sup> Räpsacni lojni ni riojñ huält:

—Simón xi'n Jonás, ¿la sanälajzlu narä?

Guc-huin lastoo Simón Pedr sa'csi gunabdiidx Jesús lojni choñ huält: “¿La sanälajzlu narä?” Dxejcti räjp Simón lojni:

—Dad, luj najnlu guira'ti. Luj najnlu sanälazä luj.

Räjp Jesús lojni:

—Gojp rexilä. <sup>18</sup> Rñiliápac lojlu, che gujclu bi'nru, lagajc luj rajcwlu xhajblu, rijlu cadrotis rlajzlu. Che anajclu beñgool, susgaatislu ñaalu te gushuajcw ste'ca bejñ xhajblu, te chanäreni luj cadre di rlajzlu.

<sup>19</sup> Luxh diidxga gunii Jesús te cagusule'ni xho gugu'treni Pedr te guiliä'pni xpala'n Dios. Che gulujx guniini si'c, räjpni loj Pedr:

—Gudanajl narä.

<sup>20</sup> Che gubiré Pedr, bahuiini loj stee xpejñni, nani sanälajzru Jesús, siädñajlni dejtreni. Lagajc bejñre ni gurej cuä' Jesús lo lult xchej, ni räjpza loj Jesús: “Dad, ¿chuni'c najc nani guto'lu?” <sup>21</sup> Ni'cni, che bahuii Pedr lojni, räjpni loj Jesús:

—Dad, deea', ¿xhi gun dee?

<sup>22</sup> Dxejcti räjp Jesús lojni:

—Palga rlazä jia'nni che guibisacäli loj guedxliujre, ¿xhixh najcni? Basaanni. Luj gudanajl narä.

<sup>23</sup> Ni'cni bire'ch diidx lagajc loj resa'ni, di bejñga guet. Di Jesús niäjb lojni dini guet, alga räjpni: “palga rlazä jia'nni loj guedxliujre che guibisacäli lo guedxliujre, ¿xhixh najcni?”

<sup>24</sup> Luxh bejñga najc narä, xpejñ Jesús nani bahuiiloj guiraa recosre, nani bacuaazareni. Anadonnu didxliipac najc recos nani rñiini.

<sup>25</sup> Yu'ru xhidalduxh dzuun ni bejñ Jesús. Palga gucuaanu guiralii redzuun ni bejñ Jesús, nicla lo guedxliujre di gal chu regujtzc cadre xcajni.

## Redzuun Rexpejn̄ Dios

*Siääd Sprit Dxan xten Dios te cuääzni nen̄ lastootu*

<sup>1</sup> Xamigwä Teófilo, abacuaä lojlu xcuent guiraa recos nani bejn Jesucrist nájza nani baluui Jesucrist, che guslojlini, <sup>2</sup> hasta dxejli ni huäjsni xhaguibaa. Gunibexgaani xhini'c gun renani guleni gac xpejn̄pacni. Sprit Dxan xten Dios baluui Jesucrist xhi guiniini lojreni. <sup>3</sup> Gudejd Jesucrist trabajwduxh, dxejcti gujtni. Dxejc gubansacni lo rebengut, baluilojni lo rexpejn̄pacni. Tiuu dxej baluilojni loj rexpejn̄pacni balti huält te gacbeereni agubansacni. Guniizani lojreni xcuent xcälrnibee Dios.

<sup>4</sup> Che gudejd tiuu dxejga, batojp Jesucrist rexpejn̄pacni, gunibeeni na'c guiriireni guedx Jerusalén, cuääzreni jiääd Sprit Dxan xten Dios nani aguniipac Dios jiääd. Räjpni: —Dee abiejn diajgtu guniá lojtu. <sup>5</sup> Juan batiobnis con nis, luxh naj guxii dxej cayääd dxejcru siääd Sprit Dxan xten Dios te cuääzni nen̄ lastootu. Si'c guirobnistu —räjpni.

*Huäjs Jesucrist siini xhaguibaa*

<sup>6</sup> Lagajc dxejc che abidojpreni loj Jesucrist, gunabdiidxreni lojni:

—¿La naj gudedsaclu yälrnibee lo rexpejn̄ Israel, ä?

<sup>7</sup> Dxejcti räjp Jesucrist loj rexpejn̄pacni:

—Di riäjl gacbeetu xcuent redxej nájza retiemp nani abasobxgaa Dios con xcälrnibeeni. <sup>8</sup> La'tu sica'tu yälrnibee che abiääd Sprit Dxan xten Dios nen̄ lastootu. Dxejc chatie'chtu xtidxä nájza rextzunä nen̄ guedx Jerusalén, nen̄ guiraa reguedx Judea, nen̄ guiraa reguedx Samaria, nájza nen̄ guideb guedxliuj —räjpni.

<sup>9</sup> Gulujxtis gunii Jesucrist rediidxga, luxh lalni cahuii rebejn̄ lojni huäjsni xhaguibaa, sa'csi gurejx Diosni. Dxejc biääd te za, biu'ni nen̄ zaga. Ro'cti diru rebejn̄ nuhuii lojni. <sup>10</sup> Lalni cadxelodxi rebejn̄ xhaguibaa cadre gunitloj Jesucrist, tiop angl xten Dios ni najcw ladnol suga' gajx cadre suga'reni. <sup>11</sup> Dxejc räjp reangl loj rebejn̄:

—¿Xhi rajctu ben Galilee? ¿Xhicuent cadxelojtu xhaguibaa? Abahuiitu xho huäjs Jesucrist siini xhaguibaa. Lagajc si'c guibisacni —räjpreni.

*Gulereni Matías ni najc apostcoob*

<sup>12</sup> Dxejc birii rebejn̄ yejc dajne' ni laa Dan Oliib, siireni guedx Jerusalén. Dan Oliib suga' gajx Jerusalén. Gusajrenini si'cni rnii leii sajc sareni dxej ni rusilajrreni. <sup>13</sup> Che biu'reni Jerusalén, bidzujrreni ro' yu' cadre rbäzlareni. Yu'ga najc jiaa yejc stee yu'. Ro'c rbäzlaa Pedr nájza Jacob, Juan, Andrés, Felipe, Tomás, Bartolomé, Mateo, Jacob xi'n Alfeo, Simón nani laaza Zelote, nájza Judas bejtz Jacob. <sup>14</sup> Ro'c yu' guirareni nájza regunaa nájza Marii xnan Jesucrist nájza rebetzhuin Jesucrist. Cabejdx, canabreni loj Dios; tejsi najc xhigab xten guirareni.

<sup>15</sup> Nadxagsa' te gayuu gajl bejn̄. Dxejcti huisulii Pedr galäireni, räjppni loj rebejn̄:

<sup>16</sup> —Caniä lojtu, resa'ä, nanabpac soob xtidx Sprit Dxan xten Dios ni bacuaa toDavid lo guijtz xcuent Judas, nani bato' Jesucrist loj renani gunaazni. <sup>17</sup> Gujc Judas sa'nu, bejnzani lagajc dzuun ni biennu. <sup>18</sup> Cua' Judas meel ni badeedreni lojni che bato'ni Jesucrist. Che gulujx bejnni dzunguijdx ni bejnni, badesacni meel lojreni. Gusireni te la' yuj. Dxejcti lagajc Judas basäl duu guejnni, guzäbnajlni lo bej, gujtni. Gusaguijni, dxejcti biräjs xque'ni birii guiraa reziini. <sup>19</sup> Che biejn diajg rebejn̄ Jerusalén si'c, gulälajreni yujre Acéldama, ni säloj yurejn. <sup>20</sup> Nen̄ guijtz ni laa Salmos abacuaa toDavid rediidxre:

Sujianxteb rolijzni;

na'c cuääzru bejn̄ rolijzni;

nájza:

Suxca'za ste'ca niguii xtzuunni.

<sup>21</sup> Naj nanab cuenu stee niguii —räjp Pedr—. Nanab gacni tej ni gusanäj nuunu guideb redxej ni gyunäj Jesucrist nuunu, <sup>22</sup> dxejli ni gusloj batiobnis Juan hasta dxej ni huäjs

Jesucrist xhaguibaa. Te gacnäj niguiire nuunu gusule'nu diidx gubansacpac Jesucrist lo rebengut.

<sup>23</sup> Dxejc gulääreni tiop niguii lojreni, tejni laa José Barsabás ni rbälajreni Justo, steeni laa Matías. <sup>24</sup> Gurejdx, gunabreni lo Dios, räjpreni:

—Dad, Dios, ni racbee lastoo guiraa rebejn, baluii loonu con ni najc niguii ni agulelu loj guiro'p niguiire, <sup>25</sup> te jiu'ni lo dzuun näjza lo yälapost ni basa'n Judas cheni sääni garenca nejz —räjpreni.

<sup>26</sup> Dxejcti gudzujtreni daad te gulereni lo guiro'preni. Che biajb daad, gulereni Matías. Dxejc bigabnäj Matías stzubiteeb reapost te gujcreni tzubitio'p apost.

## 2

### *Biääd Sprit Dxaan xten Dios*

<sup>1</sup> Che bidzujn dxej ni rajc lanij xten Pentecostés, tre' guiraareni tejsi lajt nen yu', <sup>2</sup> chela gusloj cayubej xhaguibaa si'c te beroduxh, bachajni guideb nen yu' cadro suga'reni. <sup>3</sup> Dxejc bahuiireni astoo carechxteb xhidajl bale' casanij rebajlga yejc tejga reni sojb ro'c. <sup>4</sup> Biu'ti Sprit Dxaan xten Dios nen lastoo guiragajcreni. Dxejc gusloj caniiireni garen-garen didxsaj si'ctisni badeed Sprit Dxaan xten Dios guiniireni.

<sup>5</sup> Nen redxejga, xhidajl rexpejn Israel ni sasanäjpac xtidx Dios bidzujn guedx Jerusalén. Xhidajl lajt biriireni siädreni. <sup>6</sup> Che biejn diajgreni guyubej beduxhga, bidojp reben xhidaalga, bachaag sa'reni. Rdxeloduxh reben xhidaalga sa'csi cayejn diajgreni canii reapost xtidxsajpac cade tejreni. <sup>7</sup> Cadxelojreni räjpreni:

—¡Bahuilaare! ¿La et ben Galileedi renani canii, ä? <sup>8</sup> ¿Xhoxh riejn diajgnu caniiireni xtiidxpacnu si'ctis ni rniinu laadxnu, ä? <sup>9</sup> Najcnu ben nación Partia, ben nación Media, ben región Elam, ben Mesopotamia, ben Judea, ben estad Capadocia, ben región Ponto, näjza ben Asia. <sup>10</sup> Najczanu ben distrit Frigia, ben estad Panfilia, ben nación Egipto, näjza bejn ni siäd stelaad Cirene, te estad nen Africa. Loj rebejn ni siäd Roma yu' reni najc xpejn Israel, yu'za reni bazuxhijb lo Dios sa'csi rililajzreni si'cni rililajz rexpejn Israel. <sup>11</sup> Yu'za ben Creta. Yu'za ben nación Arabia. Guiragajcnu riejn diajgnu caniiireni xtiidxpacnu si'ctis ni rniinu laadxnu. Caniiireni loonu xcuent recosroduxh ni cayujn Dios.

<sup>12</sup> Bidxeloduxh reben xhidaalga, dijiejn xhi xhigab gunreni. Räjpreni lo sa'reni:

—¿Xhi säloj dee?

<sup>13</sup> Dxejcti guyu' rebejn ni baxhiznäjreni, räjpreni:

—Agusojz redee.

### *Gunii Pedr loj rebejn*

<sup>14</sup> Dxejcti gusulii Pedr näjza tzubiteeb sa'ni, guredxa'ni guniini lo reben xhidaalga:

—Guejbtu, rexpejn Israel, nani rbäjz distrit Judea näjza guedx Jerusalén. Colcuadiajg diidx nani guiniä. <sup>15</sup> Xhet sojzdinu si'cni cayujntu xhigab. Rsilru naj, entis gojl rcagaa.

<sup>16</sup> Dxejc scree gunii Joel che guniini xtidx Dios agujc xchero. <sup>17</sup> Räjp Dios:

Sidzujn dxej che guxhalä Xsprit Dxaanä cuääzni nen lastoo guiraa rebejn.

Rexingaantu näjza rexindxa'ptu sinii xtidxä xcuent recos ni gajd gac.

Rexi'ntu sinixcal,

rextadgoldootu suluiloj bacal recos nani guluiä lojreni.

<sup>18</sup> Guxhalä Xsprit Dxaanä loj guiraa reni siädnajl narä.

Siniireni rediidx ni gudedä lojreni xcuent recos nani gajd gac.

<sup>19</sup> Suluiä lojtu balti senro xhaguibaa näjza lo guedxliuj.

Resenro ni gac najc rejn con guiboo, luxh guxh sire' si'c te za.

<sup>20</sup> Sicäy loj gubijdx, sajc bäii si'c rejn.

Sajc guiraa recosre,

dxejcu sidzujn dxeduxh che jiälsacä narä, Dios.

<sup>21</sup> Dxejc guiraa rebejn nani cuedx guiniab gacnäj Diosreni, reni'c siliaa lo dojl.

<sup>22</sup> Räjp Pedr lojreni:

—Rexpejn Israel, colcuadiajg xtidxä. Dios baluii Jesucrist, beñ Nazare't, lojtu por recosro, remilagwr, reseen nani bejn ni nez lojtu. Lagajc Dios badeed yälrnibee loj Jesucrist te bejn ni redzunroga. La'tu nancheetu dee. <sup>23</sup> Galooli ananchee Dios xhi guntu loj Jesucrist Xi'nni. Basaanza Dios bateedtu Jesucrist ladznaa rebenguijdx te bacuaareni Jesucrist lo cruz te bagu'trenini. <sup>24</sup> Baspañsac Dios Jesucrist, baslaa Diosni ladznaa yälgujt, sa'csi di niajcdi nica' yälgujtni par tejpas, sa'csi laani rnibee lo yälgujt. <sup>25</sup> Che gubañsac Jesucrist, guzobj diidx ni bacuaa David lo guijtzc xcuent Jesucrist. Räjpc David lo Dios:

Guira dxej ruhuiä lojlu, Dios.

Suga'lu xladbeä cayacñajlu narä te di guidxejb lastoä.

<sup>26</sup> Ni'cni bibalajz lastoä, guniäza lojlu lacti rbaa lazä.

Rbalazä sa'csi suhuiilu narä che guetä.

<sup>27</sup> Dizalu gusaan jia'n xaimä neñ baa.

Dizalu gusaan gudx tiejxh xi'nlu nani sanälajzlu.

<sup>28</sup> Abaluiilu loä xho guibanä par tejpas.

Sibalazduxhä sa'csi guibannää luj,

si'c räjpc David xcuent Jesucrist.

<sup>29</sup> Räjpc Pedr:

—Guyasi guiniä lojtu agujc xchero gujt David. Aguyutzu'tzni neñ baa. Sajc guihuiinu baa cadre biga'tz David. <sup>30</sup> Gunii David xtidx Dios. Che nabajñli David bia'n diidx gudeed Dios te xajgni ni guirilaj Crist, luxh laani gacni reii si'cni gujc David. <sup>31</sup> Sa'csi baluixgaa Dios recosre lo David, ni'c räjpc David sibañsac Crist lo rebengut sa'csi di Dios gusaan jia'n xaimni neñ baa, dizani gusaan gudx tiejxhni. <sup>32</sup> Guläs Dios Jesucrist lo rebengut. Nuure bahuiloonuni, najcnu testiigw gubañsacni lo rebengut. <sup>33</sup> Gurejdx Dios Jesucrist. Naj nabajñ Jesucrist xhaguibaa, nabejni xladbee Dios ro'c canibeeni. Badeed Dios Xsprit Dxanni loj Jesucrist si'cni bia'n diidx. Naj abaxhal Jesucrist Sprit Dxan lo guedxliuj. Jesucrist cayujñ guira'ti nani cahuiitu, nani cayejn diajgtu nadxej. <sup>34</sup> Di David nij xhaguibaa, sa'csi lagajc David räjpc:

Gunii Dios lo Dad nani rnibee loä: “Gurej xladbeä

<sup>35</sup> che guidzujñli dxej gudzugä guiraa reni rdxe'ch lojlu te gacbeereni luj rnibeelu guira'ti.”

<sup>36</sup> 'Rniliäpac lojtu —räjpc Pedr—. La'tu bacuaatu Jesús lo cruz. Ni'cni, colgacbee, guiraatu xpen Israel, abejñ Dios gac Jesúsre Dad nani rnibee loonu.

<sup>37</sup> Che biejn diajgreni laareni bacuaareni Jesús lo cruz, guc-huinduxh lajzreni. Räjpreni lo Pedr näjza lo reapost ni suga' ro'c:

—Aiilu, resa'nu, ¿xhini'c jiennu naj?

<sup>38</sup> Dxejcti räjpc Pedr lojreni:

—Colgusiech lajztu, colguirobnisza, sa'csi ni'c najc te seen rlaiztu chanajltu Jesucrist, te si'c jia xtojltu. Dxejc suniidx Dios Sprit Dxan cuääz neñ lastootu. <sup>39</sup> Si'c rlaiz Dios guniidx Xsprit Dxanni lojtu näjza loj rexi'ntu, näjza lo rebejn ni rbäjz zijtru, näjza loj guiragajc rebejn nani cueedxni —si'c gunii Pedr lo rexpejn Israel.

<sup>40</sup> Dxejcru gunii Pedr xhidajlru diidx, balijdxni rebejn:

—Colguirii loj reben latsiaj ni re' lo guedxliuj naj, te laatu lo dojl.

<sup>41</sup> Xhidajlreni huililajz rediidxga. Dxejcti gurobnisreni sa'csi huililajzreni xtidx Dios. Lagajc dxejga huililajz si'cti chon mil bejn. <sup>42</sup> Sanuutis rusoobreni diidx ni baluii reapost, bibalazduxhreni sa'csi bidxaag sa'reni con rexpejn Jesucrist, gudaunäj sa'reni si'c gudaunäj Jesucrist rexpejñpacni, bidojpreni tejsi lajt te guniireni lo Dios.

*Xho gubajñ* rexpejn Jesucrist galoo

<sup>43</sup> Bidxeloduxh guiraa rebejn luxh bejn reapost redzunro, remilagwr. <sup>44</sup> Bichaag sa' renani huililajz xtidx Dios. Bachagsa'reni xhixtenreni te tejsi gojpreni guiraa xhixtenreni. <sup>45</sup> Bato'reni xhixtenreni, dxejcti badeedreni meel lo sa'reni si'ctis ni

caquiin chutis tejreni. <sup>46</sup> Guixe-guixee bidojpreni nen guidoro xten Israel. Tejsi najc rehxigabreni. Gudaunäj sa'reni rolijz cadetejreni, guiraareni bibalaznäduxh sa'reni. <sup>47</sup> Gulä'preni xpala'n Dios. Guiraa rebejn gunii rexpejn Jesucrist najc bensa'c. Guixe-guixee batie' Dios xhidajlru bejn nani rililajz xtiidxni, badzucajni rextojlreni, dxejc bachaagreni lo rexpejn Jesucrist.

## 3

*Biajc niguii nani racxhuu ni'ni*

<sup>1</sup> Guyu' te dxej sää Pedr näjza Juan nez loj guidoro si'cti rcachon gudxej. <sup>2</sup> Guyu' te niguii nani racxhuu ni'ni, digacdi sani che gojllini. Guixe-guixee rile'c bejn niguiiga ro' puertroga xten guidoro. Puertroga laa Sacré. Ro'c rbejni rniabni gojn lojreni riu' guidoo. <sup>3</sup> Che bahuiini agojl jiu' Pedr näjza Juan nen guidoroga, gunabni te gojn lojreni. <sup>4</sup> Dxejcti bahuii Pedr näjza Juan lojni. Räjpedr lojni:

—;Bahuii loonu!

<sup>5</sup> Che biejn diajg niguiiga xtidx Pedr, bahuiini lojreni sa'csi naani sudeedreni meel lojni.

<sup>6</sup> Räjpedr lojni:

—Xhetliidi meeldi rapä, nani rapätis sunidxä lojlu. Xcuent xcälrnibee Jesucrist, ben Nazare't, rniä lojlu: ;Gusulii! ;Gusaj! —räjpedr.

<sup>7</sup> Dxejcti gunaaz Pedr naani, guläsnini. Biligajc ni'ni, gusutijp ni'ni. <sup>8</sup> Huisuyälni, gusajni. Biunäjni Pedr näjza Juan nen guidoro. Rsiajni, rtiäsni, calä'pni xpala'n Dios. <sup>9</sup> Bahuii xhidajl bejn lojni nen guidoro, rsiajni, calä'pzani xpala'n Dios. <sup>10</sup> Biembeereni laa niguii ni rbej ro' puertro xten guidoro, rniabni gojn. Guiraareni bidxeloduxhreni bahuiireni xhi gusajc niguii ni gucxhuu ni'ni.

*Baluii Pedr xtidx Dios nen cordoor xten guidoro*

<sup>11</sup> Ro' guidoroga yu' te cordoor ni laa Cordoor xten Salomón. Ro'c suga' Pedr näjza Juan, nasztu'tz niguiiga naareni. Ruxun guiraa rebejn bidzujn nen cordoorga. Bidxelojreni sa'csi arsiaj niguii ni gucxhuu ni'ni. <sup>12</sup> Che bahuii Pedr lo rebejn räjpni lojreni:

—;Xhicuent rdxeloy guejbtu, rexpejn Israel? Pet naatu nuure basiajcnu ni' niguiire. Xhet nuudire basiajcnu ni'ni. Xcuent xcälrnibee Jesucrist biajc ni' niguiire. <sup>13</sup> Xtiooznu, ni najc Xtiooz toxtadgoldoonu Abram, toxtadgoldoonu Isaac, näjza toxtadgoldoonu Jacob, lagajc Diosga abadeed yälrnibee loj Xi'nni Jesús. Niluxh la'tu bateedtuni ladznaa reguxhtis. Che rlajz Pila't ni rnibee nusläa Jesucrist, ditu nicäjb niriini, alga guniyajtuni nez loj Pila't. <sup>14</sup> Niluxh la'tu baro'ntu Xi'n Dxan xten Dios nani rujn ganax dzunsa'c. Alga gunabtu birii te niguii nani bagu't bejn. <sup>15</sup> Jesucrist rudeed yäl nabajn, luxh la'tu gunabtu bacuaareni Jesucrist lo cruzj. Gulässac Dios Jesucrist lo rebengut. Bahuiiloonu nabajn Jesucrist, najcnu testiigw gubansac Jesucrist lo rebengut. <sup>16</sup> Cahuiitu loj niguiire nani gucxhuu ni'ni, luxh rumbeetuni. Xcälrnibee Jesucrist abasiajcnu niguiire, sa'csi huililajzni. Sa'csi huililajznu xtidx Jesucrist, ni'c biajcnu te najcni si'cni rhuiituni naj.

<sup>17</sup> Rexpejn Israel, narä nanä di'tu niacbee, diza rexcuxhtistu niacbee laa Xindxan xten Dios ni bacuaatu lo cruzj. <sup>18</sup> Scree gujc te guzojb xtidx Dios ni cuaj lo guijtz agujc xchero. Diidxre bacuaa reniguii ni gunii xtidx Dios, Crist xten Dios sidejd trabajwduxh. <sup>19</sup> Ni'cni colsiechljaztu, colguibi' loj Dios te guibicaj xtojltu. Dxejc susiäluyj Dios lastootu, sujnni gac nacoob guira'ti, si'cni bia'n diidx gacni. <sup>20</sup> Lojtu suxhalza Dios Jesucrist nani rnibee, nani aguleni galooli. <sup>21</sup> Naj nungäjl jia'n Jesucrist xhaguibaa dxejli guscoob Dios guiralii recos si'cni bia'n diidx gac, si'cni gunii Dios lo reniguii nani gunii xtiidxni lo rextadgoldootu agujc xchero. <sup>22</sup> Scree gunii toMoisés lo rextadgoldoonu, räjpni: “Xtadnu Dios suxhal te niguii sa' narä nani cueni lo resa'tu. Siniini xtidx Dios. Colgusobdiajg guiralii diidx nani guiniini lojtu. <sup>23</sup> Renani di gusoob rextiidxni, sinitlojreni, direni gac rexpejn Dios.”



<sup>24</sup> Rājpa Pedr:

—Sigajca agunii guirali renigui nani gunii xtidx Dios. Si'c agunixgaa toSamuel, nājza guiraa renigui ni siādnajni, xcuent recos ni cayajc nen redxjre. <sup>25</sup> La'tu najc xajg renigui ni gunii xtidx Dios. La'tu biannājtu diidx nani gunii Dios loj retoxtadgoldoonu. Bia'n diidx, rājpa Dios loj toxtadgoldoonu Abram: “Jiādjajl te xajglu ni gupalazduxh reben guedxliuj, sa'csi suslaanireni lo dojl.” <sup>26</sup> Dxejcti ganiddoo lojtu baxhaḷ Dios Jesucrist te guibaa lajztu che gusiejch lajztu, te na'cru guntu dojl —rājpa Pedr.

#### 4

*Baluu Pedr nāj Juan xtidx Dios loj reguxhtis*

<sup>1</sup> Laḷ ni canireni lo rebejn, ro'c bidzujn rebixhojz xten Israel nājza nani rnibee lo resoldaad xten guidoro nājza resaduceos. <sup>2</sup> Bidxe'chduxhrene sa'csi cagulijdxrene rebejn, cayājpreni:

—Sibansac rebejn lo rebengut sa'csi gubansac Jesucrist lo rebengut.

<sup>3</sup> Gunaaz reguxhtisrene, biāureni sa'csi agudxj luxh abiāu jusgaad. Nen latzguiib barareni yāal. <sup>4</sup> Xhidajl reni bejn diajg xtiidxrene huililajz xtidx Dios. Si'cti gaii mil nigui huililajz xtidx Dios.

<sup>5</sup> Che bara yāal, bachaag sa' guiraa rebengool, renani rnibee guedx Jerusalén, nājza rebejn ni rului leii, <sup>6</sup> nājza Anás ni rnibee guiraa rebixhojz, nājza xpagojzni ni laa Caifás, nājza Juan, nājza Alejandro, nājza guiraa renigui ni najc sa' rebixhozro ni rnibee.

<sup>7</sup> Gunibeereni biāad Pedr nājza Juan gusuj galāireni te gunabdiidxrene lojrene:

—¿Chu xcārnibee rajptu? ¿Chu laj basā'ttu te basiajcti niguiire?

<sup>8</sup> Dxejcti sa'csi cayu Pedr diidx ni canii Sprit Dxan xten Dios nen lastooni, rājpa lojrene:

—Caniā lo guejbtu, reguxhtis nājza rebengool xten rexpejn Israel, <sup>9</sup> palga canabdiidxtu xhicuent gucnājnu nigui nani gucxhuu ni'ni, palga canabdiidxtu xho basiajcti niguiiga, <sup>10</sup> gusule'nu xcuent dee te gacbeetu te gacbeeza guiraa rexpejn Israel. Xtidx Jesucrist najc yārnibeduxh. Diidxga abasiajcti ni' niguiire, xhet rajcdini suga'ni nez lojtu. La'tu abacuaatu Jesucrist lo cruiz, niluxh Dios gulāsni lo rebengut. <sup>11</sup> Di'tu nināljaz xtidx Jesucrist. Laani najc si'c te guij nani rbācajtū che runcheetu te yu'. Per Dios abejn najc Jesucrist si'c guij nani maazru nacsac, nani guyu' squiin xte yu'. <sup>12</sup> Xtebtis Jesucrist ruslaa bejn lo dojl, ruti stee bejn lo guedxliuj nani baxhaḷ Dios te guslaani bejn lo dojl —si'c rājpa Pedr.

<sup>13</sup> Che bejn diajgrene xtidx Pedr, bidxelojrene sa'csi di Pedr nājza Juan guidxjeb, dizareni guitujy. Dxejcti rājpa rebixhojz ni sajrcu lo sa'reni:

—Direni ganduxh guijt, bejntisrene.

Dxejcti gucbeereni gusanāj redee Jesucrist, lojni bisieedrene. <sup>14</sup> Bahuiiza rebixhojz lo nigui ni abiajcti ni'ni, suganājni guiro'preni. Ro'cti xhetru gujcdi gunii rebixhojz sa'csi laaca bejnrene. <sup>15</sup> Dxejcti gunibee rebixhojz birii guidxojnrene telaad te bij rebixhojz diidx ensilaareni. <sup>16</sup> Rājpreni lo sa'reni:

—¿Xhi jiennānu reniguiire? Guiraa reben Jerusalén anajn xcuent dzunroduxhre ni cayujnrene. Digacdi gucuatzlaaznuni. <sup>17</sup> Per te di guire'ch xtidx Jesucrist ste'ca guejdx, do'o gulijdxnu guidxojnrene te na'c guiniireni xtidx Jesucrist ste'ca guejdx.

<sup>18</sup> Huixisac rebixhojzrene. Dxejcti rājpreni lojrene:

—Na'c guluirutu xtidx Jesucrist, na'cru guiniitu xtiidxni.

<sup>19</sup> Dxejcti gunii Pedr nājza Juan, rājpreni lojrene:

—¿Colguinii loonu chu xtiidx sajrcu guicuaadiaagnu? ¿Xtiidx la'tu, o xtiidx Dios?

<sup>20</sup> Digacdi gusāunu ro'nu. Nanabpac gusule'nu diidx xcuent recos nani abahuiinu nājza rediidx ni abiejn diajgnu.

<sup>21</sup> Balidxsac rebixhojzrene te na'cru guiniireni xtidx Jesucrist. Dxejcti baslaa rebixhojz guiro'preni, sa'csi xhetru niajcdi niujnrene lo Pedr nājza Juan, sa'csi canii rebejn bejnrene te dzunsa'c. Xhidajl rebejn gulā'pza xpala'n Dios sa'csi bahuiireni xhini'c gujct ro'c.

<sup>22</sup> Sa'csi nigui ni basiajcti xcuent yāmilagwr agudejdni tiuu ijz.



*Guredx-gunab rexpejn* Jesucrist lo Dios

<sup>23</sup> Che bas<sub>l</sub>aa rebixhojz guiro'preni, gubi'reni lo sa'reni ni najc rexpejn Jesucrist. Bijreni diidx guiraa ni gunii reguxhtis xten rebixhojz nájza rebengool lojreni. <sup>24</sup> Che biejn diajg rexpejn Jesucrist xtiidxreni, tejtis xhigab bejnreni guredx-gunabreni lo Dios, rájpreni:

—Xtadnu Dios, nani benchee xhaguibaa nájza guedxliuj nájza nisdoo nájza guira'ti ni yu' lojreni, nenreni, <sup>25</sup> nani bejn basoob toDavid xtidx Sprit D<sub>x</sub>an te bacuaani xtiidxlu, rájpn:

¿Xhicuent guyuduxh reben guedxliuj yársia'?

¿Xhicuent bejn rexpejn Israel xhigab ni xhet sajcdi?

<sup>26</sup> Bidxagsa' rereii lo guedxliuj nájza reguxhtis xten reguejdx te gudxojnreni xtzun Dios nájza xten Dad Crist nani baxha<sub>l</sub> Dios,

si'c gunii toDavid.

<sup>27</sup> 'Aguzojb diidxre, sa'csi lo guejdxre bidxagsa' Herodes nájza Poncio Pila't nájza rexpejn Israel nájza rebenzijt nani di gac xpejn Israel. Bidxech<sub>n</sub>ájreni Xi'nlu nani najc Crist ni baxhallu. <sup>28</sup> Naj abejnreni dzunguijdx si'cni galooli guniilu gac. <sup>29</sup> Naj Guejblu Xtiosnu, bahuii xho cagusacsíreni nuure, gucnáj nuure te gutiplaaznu, te na'c guidxeebnu guiniinu xtiidxlu, sa'csi najcnu rexpejnlu. <sup>30</sup> Baniidx xcäl<sub>r</sub>nibee loonu te guisajcnu rebejn, te jienzanu redzunro, remilajgwr con xcäl<sub>r</sub>nibee Xi'ndxanlu Jesucrist.

<sup>31</sup> Che gulujx gurejdxreni lo Dios, gusloj canibsez yu' cadre tre'reni, cayac si'c te xu. Dxejcti biääd Sprit D<sub>x</sub>an xten Dios basutijpruni lastooreni. Dxejc dirureni nidxejb guniireni xtidx Dios.

*Rudeedreni xhixtenreni lo sa'reni*

<sup>32</sup> Guiraa renani huililajz xtidx Dios, tejsi xhigab bejnreni. Rut chu tejdireni bejn guinibexteb xhixtenni: bachaagreni sa' rehxixtenreni te xca' guiraareni nani rquiinreni. <sup>33</sup> Gucnáj Dios reapost, gusutzu'tzreni bijreni diidx bahuilojreni loj Jesucrist che gubansacni lo rebengut. Gucnáj Dios guiraa rexpejn Jesucrist, luxh gopduxh reben guejdx respe'treni. <sup>34</sup> Ni'cla tejreni di niääd<sub>x</sub> xhixtenni sa'csi renani gojp xyujni, rolizjni, bato'renini, dxejcti biäd<sub>n</sub>äreni xcuentni, <sup>35</sup> badeedreni meelga lo reapost. Dxejcti gudis reapost meelga lo guiraa renani rquiinni. <sup>36</sup> Guyu' te niguii ni laa José. Lajdxni najc Chipre, ni re' lo nisdoo. Najcni sa' rexfamil levita. Reapost gulälajni Bernabé (ni säloj xtiidxreni bejn ni rbecdxi lajz sa'ni). <sup>37</sup> Scree gulälajrenini sa'csi bato'ni te la' yuj xtenni, dxejcti badeedni meel ni cua'ni lo reapost.

## 5

*Ananías náj chääl<sub>n</sub>i rujn dojl*

<sup>1</sup> Guyu' stee niguii ni laa Ananías. Chääl<sub>n</sub>i laa Safira. Bato'reni te la' yuj. <sup>2</sup> Niguiire biannájni gala' meel, dxejc sgala' meelga badeedni lo reapost si'c guiraa xcuent yujga luxh chääl<sub>n</sub>i nanchee xhi cayujnni. <sup>3</sup> Dxejcti rájp Pedr lojni:

—Ananías, ¿xhicuent rusooblu xtidx Satanás ni rnibee lo reben<sub>x</sub>ab, ä? ¿Xhicuent rlajzlu gusgueelu Sprit D<sub>x</sub>an xten Dios? Biannájlu gaii meel ni cua'lu che bato'lu te la' yuj. <sup>4</sup> Che gajdlu guto' yujga, xtenluni. Che bato'lu yujga, ¿la xhet xtendilu meel ni cua'lu? ¿Xhicuent bejnlu xhigab nen lastoolu gunlu dee? Loj Dios guniilu didx-xhii, xhet loodinu.

<sup>5</sup> Che biejn diajg Ananías xtidx Pedr, biajbni lo yuj, gujt<sub>n</sub>i. Bidxebduxh rebejn che biejn diajgreni xhi gusajcni. <sup>6</sup> Sas gubig gaii bi'n batejbreni Ananías nen lajd. Dxejcti sanärenini huicua'tzrenini nen baa.

<sup>7</sup> Pet agujc chon or gujt<sub>n</sub>i chela bidzujn chääl Ananías. Dini gan agujt chääl<sub>n</sub>i. <sup>8</sup> Rájp Pedr lojni:

—Gunii, ¿la bato'tu xyujtu si'cni naj chäällu huijni, ä?

Rájp Safira lojni:

—O'n, si'c huijni.

<sup>9</sup> Dxejcti räjp Pedr lojni:

—¿Xhicuent bejnlú tejsi xhigabgujdx con cháällu? ¿Xhicuent rlanjtu gusgüetu Sprit Dxan xten Dios? Ro lä' siääd renani huicua'tz cháällu. Naj näjza luj chacua'tzreni neñ baa.

<sup>10</sup> Si'ctis biajb Safira, gutgajczani. Dxejcti bidzujñ rebi'n, bahuiireni agujtni. Dxejcti guläsrenini, biriireni huicuatgajczeni cuä' baa cadre biga'tz cháällni. <sup>11</sup> Bidxebduxh guiraa rexpejñ Jesucrist, näjza guiraa rebejñ nani biejn diajgni recosre.

#### *Bejn reapost xhidajl redzunro, remilagwr*

<sup>12</sup> Xhidajl redzunro, remilagwr bejn reapost nez loj rebenguejdx. Nadxaag sa' rexpejñ Jesucrist, caguchaagreni diidx neñ cordoor ni laa Salomón. <sup>13</sup> Guyu' xhidajl bejñ ni di nuchaag lo rexpejñ Jesucrist sa'csi bidxebreni guchaagreni lojreni. Rebenguejdxga guläpduxhrene xpala'n rexpejñ Jesucrist. <sup>14</sup> Neñ redxejga xhidalduxh rebejñ huililajz xtidx Jesucrist, niguii sigajc gunaa. <sup>15</sup> Dxejcti gulääreni lo nezyuj rebejñ nani cayacxhuu. Siädnä rebejñ benracxhuu naga' lo da', te gaxäjsi ted xpala Pedr yejcreni che ted Pedr ro'c, te si'c jiajcreni. <sup>16</sup> Guedx Jerusalén bidzujñ xhidajl rebejñ ni siääd ste'ca guejdx. Biädnäreni rebejñ ni cayacxhuu näjza balti bejñ ni yu' bendxab neñ lastooreni. Con xcälñbee Jesucrist basiajc reapost reben racxhuu, gulääzareni rebendxab neñ lastoo balti bejñ.

#### *Gudejd reapost trabajw*

<sup>17</sup> Dxejcti bidxechlajz bixhojz ni rnibee, näjza reniguii ni laa saducee, sa'csi calä'p rebenguejdx xpala'n reapost sa'csi basiajcreni reben racxhuu. <sup>18</sup> Gunaazreni reapost. Basäurenini neñ latzguiib. <sup>19</sup> Niluxh yäälga, biääd te angl xten Dios, baxhalni ro' latzguiibga. Dxejcti gulääni reapost neñ latzguiib. Räjpni lojreni:

<sup>20</sup> —Colchäj guidoro. Ro'c colguinii lo rebejñ xho gac guibannäjreni Dios par tejpas.

<sup>21</sup> Che biejn diajgreni si'c, rsildooru biu'reni neñ guidoro, ro'c baluiireni xtidx Dios lo rebejñ.

Dxejc bixhojz nani rnibee, näjza rebengool, bachagsa'reni gurejdxreni guiraa reguxhtis xten guidoo, näjza guiraa reguxhtis xten rexpejñ Israel. Dxejcti gunibeereni jiädnä reguixhajg reapost nani biäu neñ ladtguiib. <sup>22</sup> Che bidzujñ reguixhajg latzguiib, bahuii reguixhajg neñ latzguiibga, niluxh rut yu'di neñ latzguiib. Che gubi'reni biädnäreni diidx, räjpreni loj reguxhtis:

<sup>23</sup> —Che bidzunnu latzguiib, niäudzu'tz ro' latzguiib luxh resoldaad ni cayajp ro' latzguiib suga' guiro'p laad. Che baxhalnu ro' latzguiib, rut yu'di neñ latzguiib.

<sup>24</sup> Che biejn diajg bixhojz ni rnibee, näjza capitán nani rnibee resoldaad xten guidoro, näjza rebixhojz, ben tio'p lajzreni, räjp lo sa'reni:

—¿Xhini'c gujc? ¿Xhoni gac naj? —räjpreni.

<sup>25</sup> Dxejcti bidzujñ te niguii, räjpni lojreni:

—Reniguii ni basäutu neñ latzguiib, areni suga' neñ guidoro, luxh caguluiireni rebejñ —räjpni.

<sup>26</sup> Dxejcti sanä capitán xten resoldaad rexcuxhtis guidoro te biädnäreni reapost, luxh direni nusacsí reapost sa'csi rdxebreni nucuaareni guij yejcreni. <sup>27</sup> Che bidzunäjreni reapost, räjpreni suureni nez loj reguxhtis xten Israel, sas gunii bixhojz ni rnibee, <sup>28</sup> räjpni loj reapost:

—¿Et agunibeenu lojtu na'cru guiniitu xtidx Jesucrist? Xhoxh naj cagutie'chtu rediidxga lo guiraa rebejñ neñ guedx Jerusalén. La'tu rlanjtu cuaquijtu nuure bagu'tnu Jesucrist.

<sup>29</sup> Dxejc räjp Pedr näjza reapost lojreni:

—Nanabpac gusoobnu xtidx Dios, lacuaa gusoobnu xtidx bejñ. <sup>30</sup> Bagu'ttu Jesucrist che bacuaatuni lo cruzj. Niluxh Xtios xtadgoldoonu guläsni lo rebengut. <sup>31</sup> Naj agule'c Diosni xladbeeni cadre rnibeeni, abadeedza Dios yälñbee loj Jesucrist te gusläani nuure, te si'c rlanjñ guibicaj xtojñ guiraa rexpejñ Israel nani gusiechlajzreni.

<sup>32</sup> Bahuiloonu xhi bejn Dios. Ni'c cagusule'nu. Nadoncheenu Sprit Dxan xten Dios cayacnäj nuure te gusule'nu rediidxre. Badeed Dios Sprit Dxan xtenni lo guiraa renani susoob xtiidxni.

<sup>33</sup> Che biejn diajg reguxhtis rediidxga, bidxechduxhrene, rlajzrene nugu'treni reapost.

<sup>34</sup> Dxejcti huisulii te niguii ni laa Gamaliel, nani najc te farisee nani ruluii leii xten Israel, rebejn rapduxh respe't dade'ga. Gunibee Gamaliel guirii reapost nen yu'ga.

<sup>35</sup> Dxejcti räjp Gamaliel lo rebixhojz:

—Guejbtu rexpejn Israel, colyensa'c xhigab xhini'c rlajztu gunnäjtu reniguiire.

<sup>36</sup> Colzaa lajztu gajd gac xchej guyu' tej ni laa Teudas, räjpni rnibeduxhni. Dxejc huinajl tajp gayuu bejn. Che bagu'trenini, bire'ch guiraa rexpejn, xhetru bejndireni.

<sup>37</sup> Nen ijz ni guyu' cens, biriiza Judas ni siäd Galilee. Dxejc gurejdxni xhidajl bejn ni huinajlni. Bagu'tza bejn, dxejcti bire'chza guiraa reni huinajlni. <sup>38</sup> Naj rniä, colguibicaj, colgusaan reniguiire, rexpejn Jesús. Palga guejbcareni cayujnreni dzuunre, xtebcani sinitlojni. <sup>39</sup> Palga xtzuum Dios ni cayujnreni, digacdi guscuääznu dzuunga, sa'csi guidilnu guidxe'ch Gueb Dios loonu.

<sup>40</sup> Bichaglajz rebixhojz xtiidx Gamaliel. Gurejdxreni reapost, dxejcti gudijnreni reapost, gunibeereni loj reapost na'cru guiniireni xtidx Jesús. Dxejc baslaarenini.

<sup>41</sup> Biriitireni nez loj rebixhojz. Cabaduxh lajzrene sa'csi gujc gudejdeni trabajw xcuent Jesucrist. <sup>42</sup> Guixe-guixee laltis baluiireni xtidx Jesucrist nen guidoro näjza roliz bejn. Cagusule'reni diidx lo rexpen Israel:

—Jesús najc Crist nani cabäätzu jääd.

## 6

### *Gulereni reniguii ni gudeed yätxtiil lo rexpejn Jesucrist*

<sup>1</sup> Nen redxejga, xhidallo gujc rexpejn Jesucrist. Niluxh gusloj camojm rexpejn Jesucrist nani rnii didx griegw. Räjpreni:

—Xhet laadi cayujn rebejn ni rnii didx hebreo. Rebiuud nani rnii didx hebreo rca'ru loj rexpuiudnu. Rebiuud ni rnii didx hebreo rca'ru xhi gauren che rguisreni xhi gau rebiuud guixe-guixee.

<sup>2</sup> Dxejcti batie' guitzubitio'p reapost guiraa rexpejn Jesucrist, räjpreni lo guiraaren:

—Et laadi guisaannu guluiinu xtidx Dios te quisnu xhi gau rebiuud. <sup>3</sup> Ni'c nanab cuetu lo resa'tu gajtz niguii nani najntu najc beñsa'c, nani rbäjz Sprit Dxan xten Dios nen lastooreni, nani yu' xcäriejnreni. Reniguiire quis xhi gauren. <sup>4</sup> Te si'c sajc chanuutis guiniabnu lo Dios, guiluiizanu xtidx Dios lo rebejn.

<sup>5</sup> Guiralii rebejnga bidxaglajzrene diidxga. Dxejcti gulereni Esteban, te niguii ni rililajzpac xtidx Dios, rbäjza Sprit Dxan xten Dios nen lastooni. Gulezaren Felipe, Prócoro, Nicanor, Timón, Parmenas; gulezaren Nicolás nani siäd guedx Antioquía. Nicolás najc te proselite, nalajznu, dini gac xpejn Israel, per basoobni xleii toMoisés che gajdni chalilajz xtidx Jesucrist. <sup>6</sup> Sas biädnä rexpejn Jesús guigajtz niguiiga lo reapost. Dxejcti guredx-gunab reapost lo Dios xcuent reniguiiga, batzuubreni naaren yejc reniguiiga si'c te seen abiu'reni lo xtzuumreni.

<sup>7</sup> Birechduxh xtidx Dios. Xhidajl ben Jerusalén huililajz xtidx Dios, näjza xhidajl bixhojz.

### *Gunaazreni Esteban sanärenini lo rebixhojz nani rnibee*

<sup>8</sup> Gucnäduxh Dios Esteban, bejn redzunro, remilagwr nez lo rebejn. <sup>9</sup> Dxejc reben guidoo ni laa Libertados gusloj cadilnä Esteban. Lojreni nadxaag ben Cirene, näjza ben Alejandría, näjza gaii ben Cilicia, näjza sgaii bejn ni siäd reguedx Asia. <sup>10</sup> Reniguiire di niajcdi nuzejceni diidx lo Esteban, sa'csi nasinduxhni, luxh cayacnäj Sprit Dxan xten Diosni. <sup>11</sup> Dxejcti baquilreni sgaii niguii ni di gac xpejn Jesús, te räjpreni:

—Biejn diaagnu caniyaj Esteban toMoisés näjza Dios.

<sup>12</sup> Scree gujc bache'chreni rebejn nájza rebejn ni ruluu leii nájza rebengool. Dxejcti bachagsa'reni, gunaazreni Esteban. Huinärenini lo reguxhtis xten Israel. <sup>13</sup> Dxejcti biädnäreni reniguii nani baquilreni te guniireni didx-xhii. Räj p reniguiire:

—Entis rniyaj Esteban leii xten toMoisés nájza guidodxanre. <sup>14</sup> Abiejnza diaagnu gunii Esteban: “Jesús nazareno sutzujl guidoro, suchaazani leii nani baniidx toMoisés loonu.”

<sup>15</sup> Dxejcti guiraa rebejn ni sobga' ro'c bahuiireni lo Esteban, bahuiireni rujn lojni si'c rujn loj te angl xten Dios.

## 7

*Diidx ni basule' Esteban lo rebixhojz*

<sup>1</sup> Dxejcti räj p te bixhojz nani rnibee lo Esteban:

—¿La gulii si'c guniilu, ä?

<sup>2</sup> Räj p Esteban lojreni:

—Colgucua diajg rextidkä, guejbtu dad, nájza resa'ä. Xtioznu ni sacduxh, ni rnibee, baluiloj lo toxtadgoldoonu Abram che guläjzni Mesopotamia, che gajdni chaläjz neñ guedx Harán. <sup>3</sup> Räj p Dios loj toAbram: “Birii lajdxtu, basa'n guiraa resa'lu. Huij cadrotis guluiä lojlu” <sup>4</sup> —räj p Esteban—. Dxejcti birii toAbram lajdx reCaldeos. Huiläjzni guedx Harán. Che gujt xtadni, biädnä Dios toAbram nez ree, cadre rbääznu naj. <sup>5</sup> Di Dios nuzalajz nicla tla' yuj cadre suu te ni' toAbram. Niluxh räj p Dios sudeedni yujga lo rexajg toAbram, jiannäjreni yujga che guet toAbram. Niluxh nicla gajd xi'n toAbram chu dxejc. <sup>6</sup> Stee huält räj p Dios lo toAbram: “Rexi'nlu, rexagdoolu, siläjzreni si'c benzijt. Ladxbejn gacreni mos, ro'c susacsí bejnreni si'cti tajp gayuu ijz.” <sup>7</sup> Räj p Dios: “Narä sunä castiigw rebejn ni gusacsíreni che najceni mos. Narä cuää rexagdoolu ro'c, te ree guzuxhijbreni loä neñ guejdxre”, si'c räj p Dios <sup>8</sup> —räj pza Esteban—. Dxejcti si'c bia'n Dios diidx con toAbram, gunibee Dios gutiuug Abram lagajc laani, te chuni bee; ni'c najc te seen xten diidx ni bia'n Dios con Abram. Guyu' te xi'n toAbram, ni laa Isaac. Che guyu'ni xhujn dxej, basälza toAbram beegani si'c te seenza. Sigajcza bennäj Isaac xi'nni Jacob. Sigajcza bennäj Jacob guitzubitio'p rexi'nni nani najc rexpengoldoo xpen Israel.

<sup>9</sup> Räj p Esteban:

—Guitzubiteb rexi'n Jacob guyu' te yälrudxojn lo bejtzreni José. Dxejc bato'reni José lo te beñ Egipto. Dxejc Dios goptzu'tz José. <sup>10</sup> Che gudejd José trabajwduxh, gucnä j Diosni. Badeed Dios yäl nasinduxh lojni. Bejn Dios bichaglajz rei Faraón José. Badeed rei Faraón gujcn gubernador xten Egipto. Gunibeeza José guira'ti xhixten reiiga.

<sup>11</sup> Räj pza Esteban:

—Che bidzujn dxej gujc te gubijn, guiraa neñ reguedx Egipto nájza guiraa neñ reguedx Canaán, trabajwduxh cadejd guiraa rebejn. Xhet guyu'di xhi niajw retoxtadgoldoonu. <sup>12</sup> Che biejn diajg xtadgoldoonu Jacob yu' xhi gaureni neñ reguejdx xten Egipto, ro'c baxhalni rexi'nni, bica'reni xhi gaureni te huält. <sup>13</sup> Che huijreni stehuält, dxejc bazäbdiidx José lojreni laani najc bejtzreni. Biembeza Faraón resa' José. <sup>14</sup> Dxejcti baxhal José diidx jiääd xtadni Jacob, nájza guiraa resa'ni, cuääzreni Egipto. Najc rebejnga si'cti gayonbitzubigaii bejn. <sup>15</sup> Si'c gujc te huij Jacob guedx Egipto. Ro'c guläjzni, ro'c gujtni. Ro'c gujtza retoxtadgoldoonu. <sup>16</sup> Dxejcti huinäreni rextzujtreni loj Siquem te biga'tzsacreni neñ baa nani gusii toxtadgolnu Abram lo rexi'n Hamor neñ guedx Siquem.

<sup>17</sup> Räj p Esteban:

—Che bidzungajxh dxej, si'c diidx ni bia'n Dios con toxtadgoldoonu Abram, bidalduxh rexpengoldoonu neñ guedx Egipto. <sup>18</sup> Dxejcti guyu' te xreii Egipto ni di gan guiraa redzunsac nani bejn toxtadgoldoonu José. <sup>19</sup> Reiiga basgueeni rexpengoldoonu, basacsínireni, trabajwduxh bateedni rexpengoldoonu. Gunibee reiiga basälreni guiraa rebaz niguii te di laareni, te guetreni. <sup>20</sup> Neñ redxejga, gojl Moisés. Che gujc Moisés báz, te báz daani, saru rujn lojni, huinärajz Diosni. Gulaani chon bäii rolizni. <sup>21</sup> Dxejc huisälrenini, te guzobj xtidx Faraón. Dxejc lagajc xindxa'p Faraón bidxälni Moisés, cua'nini baslaanini

si'c xi'nni. <sup>22</sup> Bisieed Moisés guiraa ni najn reben Egipto. Gunisa'cni diidx, bensa'cni dzuun.

<sup>23</sup> Räjpe Esteban:

—Che guyu'ni tiuu ijz, banaj lajzni resa'ni ni najc xpejn Israel, huijni cadro rbäjzreni. <sup>24</sup> Dxejc bahuiini casacsí te ben Egipto te ben sa'ni. Sas bagu'tni ben Egipto. <sup>25</sup> Bejn Moisés xhigab pet sacbee resa'ni cayacnäj Diosni te guslaani rexpejn. Luxh di resa'ni niacbee si'c. <sup>26</sup> Che bara yääl, bahuii Moisés cadilnäj sa'reni tiop xpen Israel. Räjpe Moisés lojreni: “Colcuedxi, Dad. Lagajc sa'tu cadilnäjtu. ¿Xhicuent rdijltu?” si'c gunii Moisés, te na'cru tilnäj sa'reni. <sup>27</sup> Dxejcti nani cayunniälajzga, balanaani Moisés, räjpe loj Moisés: “¿Chu baniidx yälrnibee lojlu te jädnibeelu nuure? <sup>28</sup> ¿La rlajzlu ju'tlu narä si'c bagu'tlu ben Egipto naii?” —räjpe—. <sup>29</sup> Che biejn diajg Moisés rediidxga, baxunni, huijni zijt. Huiläzsijcni guedx Madián. Ro'c bachnaani, guyu' tiop xingaanni.

<sup>30</sup> Räjpe Esteban:

—Che gudejd tiuu ijz, bidzujn te dxej cansajni nez lo reyubijdz ni naga' guideb gabi dajn ni laa Sinaí. Ro'c bahuiini te bajl nen te yaguejch. Nen bajlga baluiloj angl xten Dios lo Moisés. <sup>31</sup> Bidxeloduxh Moisés che bahuiini si'c. Dxejcti gubigni te rlajzni nuhüisa'cni yajgga. Dxejc biejn diajgni gunii Dios, räjpe lo Moisés: <sup>32</sup> “Narä nacä Xtios rextadgoldoolu, narä nacä Dios xten Abram, näjza xten Isaac näjza xten Jacoob.” Dxejcti guceez Moisés sa'csi bidxebduxhni, diruni nuhüisa'c yajgga. <sup>33</sup> Dxejcti räjpe Dios lojni: “Gulää xcura'chlu. Yuj cadro suga'lu najc dxan, sa'csi narä yu'ä ree. <sup>34</sup> Abahuiä xho cagusacsí reben Egipto rexpenä. Abiejn diagä xho roonreni. Naj abiälä te guslää rexpenä. Gudaa naj, suxhalälu chäälü Egipto.”

<sup>35</sup> Räjpe Esteban:

—Dios badeed yälrnibee lo Moisés nani baze' retoxtadgoldoonu che räjpreni: “¿Chu baniidx yälrnibee lojlu te jädnibeelu nuure?” Baxhal Dios Moisés te guinibeeni xpejn Dios, gucnäjza Dios Moisés baslääni rexpejn nen nación Egipto si'c gunii angl xten Dios che baluilojni lo Moisés nen yaguejchga. <sup>36</sup> Gulää Moisés rebejnnga. Ganiddoo bejn Moisés redzunro, yälrdxeloj nen nación Egipto näjza ro' nisdoo ni laa nisdoo xniaa. Tiuu ijz cuansaj retoxtadgoldoonu nen yubijdzroga, ro'c bejnza Moisés redzunro, remilagwr. <sup>37</sup> Lagajc Moisésre gunii xtidx Dios che räjpe loj rexpejn Israel: “Sibe Dios lo rexajgtu te niguii ni najc sigac narä. Siniini xtidx Dios. Colgusoob xtiidxni.” <sup>38</sup> Lagajc Moisés gyunäj rebejn nen yubidzro. Xangl Dios guninäj Moisés nen dajn xten Sinaí. Dxejcti badeed Moisés rediidx ni gunibee Dios lo retoxtadgoldoonu. Laareni basa'nreni diidxga loonu.

<sup>39</sup> Räjpe Esteban:

—Niluxh di retoxtadgoldoonu nusoob rextidx Moisés. Di rlajzreni guinibee Moisésreni. Canaduxhlajzreni nación Egipto. <sup>40</sup> Che säa Moisés dajn Sinaí, räjpreni loj Aaron bejtz Moisés: “Benchee banäjb gac xtiooznu, te nidreni loonu, te chanajlnuren. Chu gan con Moisésre ni baluii nezyuj che gulääni nuure guejdx reEgipto.” <sup>41</sup> Sas bencheereni te banäjb ni najc si'c te gonbäz. Dxejcti bagu'treni guidxaa te badeedreni rejnga lo banäjb te bazuxhijbreni lojni. Bibalazduxhreni sa'csi abencheereni banäjbga. <sup>42</sup> Dxejcti gubicaj Dios loj rexpejn Israel sa'csi bejnreni si'c. Basaan Dios gojnreni gubijdx, näjza bäii, näjza rebal xhaguibaa. Gujcn si'cni caj lo guijtzi ni bejn reniguii nani bacuaa rextidx Dios. Räjpe Dios:

La'tu ben Israel, cheni cuansajtu tiuu ijz nez lo reyubijdz,

¿la par narä bagu'ttu guidxaa, ä?

¿La loä baniidxtu xtiejnreni, ä?

<sup>43</sup> Xho gacni si'c, räjpe Dios.

Cuansanäjtu te yu' najcw guijd cadro chu te banäjb.

Nenga guyu' banäjb ni laa Moloc, nani najtu najc xtiostu.

Gojnzatu balbäze' xten xtiostu ni laa Remfán.

Redios ni bencheetistu reni'c gojntu.



Ni'cni sibää la'tu ree guxhalä la'tu stelaad guedx Babilonia.

<sup>44</sup> Guniiru Esteban, räjpni lojreni:

—Neñ reyubijdz gojp retoxtdagoldoonu te yu' najcwni guijd. Gujcnì xquidooreni. Ro'c guninäjreni Dios. Benchee retoxtdagoldoonu yu' najcw guijdga si'cni gunibee Dios che baluini lo Moisés xhoni gacni. <sup>45</sup> Che gujt Moisés, Josué gunibee lacuaa to Moisés, huinäni retoxtdagoldoonu nación Canaán. Batzujlreni yuro ni najcw guijd te näj ni'c huinäreni Canaán. Gulää Dios rebejn ni guläz neñ reguedx Canaán. Dxejcti bia'n retoxtdagoldoonu neñ reguejdxga. Bazuxhibreni lo Dios neñ yuguid ni najc xquidooreni che gojlli xtiemp reii David. <sup>46</sup> Huinäälajz Dios David. Räjp David lo Dios: “Rläzä gunä te guidoo par guejblu, Dios xten nuure, rexpejn Israel.” <sup>47</sup> Dxejcti di Dios nusoob xtidx David. Alga Salomón, xi'n David, ni'c benchee xquidoro Dios. <sup>48</sup> Naj di Dios guiquini te yu' nani runchee bejn. Scree bacuaa te niguii nani gunii xtidx Dios. Räjp Dios: <sup>49</sup> Si'c najc te yagxhilsa'c cadre rnibee reii, si'c najc xhaguibaa cadre rbeä.

Si'c te bancw cadre rsiuj ni' reii, si'c najc guedxliuj nani bencheä.

Dina guiquinä guncheetu te xyu'ä.

Dina guiquinä te lajt cadre gusilazä, räjp Dios.

<sup>50</sup> ¿La et naädi benchee guiraa nani ruhuiitu?, räjp Dios.

<sup>51</sup> Räjp Esteban lojreni:

—Te beñ nadduxh najctu. Ditu jiu xtidx Dios. Niäu lastootu, niäuzä diajgtu. Di'tu chanälajz xtzuun Sprit Dxan xten Dios, dizani cuääz neñ lastootu. Si'c bejn retoxtdagoldootu, si'c za rujntu. <sup>52</sup> Basacsí retoxtdagoldootu guiralii reniguii nani gunii xtidx Dios. Nicla tejni direni niu. Bagu't retoxtdagoldootu guiraa reniguii nani gunii siääd te niguidxan xten Dios. Naj abiääd niguidxanga, Jesucrist laani, luxh la'tu huinäntuni lo guxhtis te gunibeetu gujtni. <sup>53</sup> La'tu biannäjtü leii nani gunii reangl xten Dios loj Moisés, luxh la'tu ditu nucuadiajg rediidxga.

#### *Bagu'treni Esteban*

<sup>54</sup> Che biejn diajgreni rextidx Esteban, bidxe'chduxhreni, rauya' läijreni sa'csi rdxe'chreni lo Esteban. <sup>55</sup> Rbäjz Sprit Dxan xten Dios neñ lastoo Esteban, ni'cni bahuitzu'tzni xhaguibaa, ro'c bahuiini yälrdimbichasejz xten Dios. Bahuiizani suga' Jesucrist xladbee Dios. <sup>56</sup> Räjp Esteban lojreni:

—Colhuilaa. Narä cahuiä xhaguibaa cadre yu' Dios, ruhuiäza loj Xi'n Dios nani guj Niguii; ani suga' xladbee Dios.

<sup>57</sup> Guredxaduxhreni basäuzareni diajgreni. Dxejcti baxunreni bixa'treni yejc Esteban. <sup>58</sup> Dxejc gudobyujrenini, gulääreni Esteban neñ guejdxga. Ro'c bacuaareni guij yejc Esteban. Che cagucuaareni guij yejcnì, guläyalreni xhajnreni; te niguii ni laa Saulo biannäj xhajnreni. <sup>59</sup> La' ni cagucuaareni guij yejcnì, gunii Esteban loj Jesucrist räjpni:

—Guejblu, Dad Jesucrist, cua' narä.

<sup>60</sup> Dxejcti biäjb Esteban, bazuxhibni, guredxa'ni räjpni:

—Dad Jesucrist, na'c gudzuublu dojlre yejc rebejnre, na'c gucuaquijlureni.

Gulujxsi guniini si'c, gujtni.

## 8

#### *Saulo basacsí rexpejn Jesucrist*

<sup>1</sup> Rbaduxh lajz Saulo bagu'treni Esteban.

Lagajc dxejga gusloj gudejd rexpejn Jesucrist trabajwduxh neñ guedx Jerusalén. Dxejcti bire'ch rexpejn Jesucrist. Biunejzreni ro'c sääreni nez guiraa reguedx Judea näjza nez guiraa reguedx Samaria. Xtebtis reapost bia'n Jerusalén, direni nire'ch.

<sup>2</sup> Reniguii nani sanälajz Dios huicua'tz Esteban. Cayonduxhreni sa'csi riareni gujt Esteban. <sup>3</sup> Biäädza Saulo, guixe-guixee basacsíni rebejn nani huililajz xtidx Dios. Biu'ni rolizreni, gunaazni reniguii näjza regunaa te basäunireni neñ latzguuib.

*Basule' rexpejn Jesucrist xtidx Dios nez región Samaria*



<sup>4</sup> Che bire'ch rebejn nani huililajz xtidx Dios, basule'reni xtidx Dios nez cadrotis sääreni. <sup>5</sup> Tej rebejnğa laa Felipe. Siini nez te guedx Samaria. Ro'c basule'ni xtidx Dios. Räjpnı:

—Jesús najc Crist nani cabäjztu jıääd.

<sup>6</sup> Ro'c bachagsa' rebejn bacuadiajgreni rextidx Felipe, bahuiizareni redzunro, remilagrwr nani bejn Felipe. <sup>7</sup> Gaii bejn yu' bendxab nen lastooreni. Che gunibee Felipe guirii rebendxab lastoo rebejnğa, guredxa' rebendxabğa, dxejcti biriireni nen lastoo rebejnğa. Yu'za xhidajl bejn nani digacdiru guiniib, yu'za reni rajc ni'reni, naareni. Con xcälrnıbee Jesucrist basiajc Felipe guiraa rebejnğa. <sup>8</sup> Sa'csi gujc si'c, bibalazduxh guiraa rebejn nen guejdxğa.

<sup>9</sup> Guyu' te niguii ni laa Simón nen guejdxğa. Bisieedni bejnıni xhidajl redzuun yälbidxaa, basgueeni rebenguejdxğa. Bidxeloduxh rebenguejdx lojni. Räjpnı lo rebejn rutru chu stee bejn ni najc maazru benro lojni. <sup>10</sup> Luxh guiraa rebejn, rebıuux, rebengool, rebenrajp, rebenproob bacuadiajgreni xtidx bidxaaga, räjprenı:

—Laani rajpnı yälrnıbee xten Dios.

<sup>11</sup> Xchero basgueeni rebejn, bidxelojreni rextzunyälbidxaani. Guiraa rebejn huililajz xtiidxnı. <sup>12</sup> Dxejcti baluii Felipe xcuent xcälrnıbee Dios, näjza xcuent Jesucrist. Xhidajl rebenguejdxğa huililajz redıidx nani gunii Felipe. Dxejcti birobnisrenı, niguii näjza gunaa. <sup>13</sup> Nägajcza Simón huililajz redıidxğa dxejc gurobniszani. Dxejc guyunäj Simón Felipe. Che bahuii Simón lo redzunro, remilagrwr nani cayujn Felipe, bidxeloduxh Simón.

<sup>14</sup> Che biejn diajg reapost ni yu' guedx Jerusalén huililajz reben Samaria xtidx Dios, baxhalrenı Pedr näjza Juan ro'c. <sup>15</sup> Che bidzujn guiro'prenı guejdxğa, gunabrenı lo Dios xcuent rebejn ni huililajzğa te gudeed Dios Sprıt Dıan xtenı lojrenı, <sup>16</sup> sa'csi gajd Sprıt Dıan xten Dios jädäläjz nen lastooreni. Che huililajzrenı, gurobnistisrenı te gucbee rebejn chuni'c najc rexpejn Jesucrist. <sup>17</sup> Dxejc batzuub Pedr näjza Juan naareni yejc tejga renani ahuililajz xtidx Dios, dxejc badeed Dios Sprıt Dıan xtenı biädäläjznı nen lastooreni.

<sup>18</sup> Che bahuii Simón biädäläjz Sprıt Dıan xten Dios lastoo rebejn ni batzuub reapost naani yejcreni, rlajz Simón nudeedni meel loj reapost, <sup>19</sup> räjpnı lojrenı:

—Colgunıidx yälrnıbee löä te si'cza gudzubä naä yejc rebejn, te jıu' Sprıt Dıan xten Dios nen lastooreni.

<sup>20</sup> Dxejcti räjpnı Pedr lojni:

—ıSunitloj xmeellu con luj! Xho gunlu xhıgab sıilu Sprıt Dıan xten Dios nani rudedxlia' Dios. <sup>21</sup> Digacdi gunlu dzuun ni riennu, sa'csi xhet laadi najc lastoolu nez loj Dios; yu' dojl nen lastoolu. <sup>22</sup> Basie'ch lajzlu, badzucaj rexhıgab guıjdx xtenlu. Guredxgunab lo Dios, top susıäjł lajz Dios xtojllu ni bejnlu nen lastoolu. <sup>23</sup> Naj narä nanä ruguilazduxhlu, luxh runduxhlu xhıgabguıjdx.

<sup>24</sup> Dxejcti räjpnı Simón lo guiro'prenı:

—Colnab loj Dios xcuentä te na'c sacä si'cni canıitu.

<sup>25</sup> Che gulujxti bıjrenı dıidx xcuent ni bahılojrenı bejn Jesucrist, che gulujx basule'reni xtidx Jesucrist loj reben Samaria, gubısacrenı Jerusalén.

### *Felipe näjza te dade' ni siääd naciön Etiopía*

<sup>26</sup> Dxejcti biääd te xangl Dios, räjpnı lo Felipe:

—Huj lo nezyuj ni rıi guedx Jerusalén, ni rij nez guedx Gaza. Nezyujğa rdejđ lo reyubıjđz.

<sup>27</sup> Sä'ti Felipe. Che bidzujnıni lo nezyujğa, bidxaagni te dade' ni siääd naciön Etiopía. Najcni te eunuco, najczani xcuxhtis reina Candace. Laani rgucweenı guiraa xmeel reinaga. Biääd dade'ğa guedx Jerusalén te sagajnıni Dios. <sup>28</sup> Siäadbısacni lajdxnı. Sobga'ni nen te gare't saruduxh, cayolnı xtidx Isaías, nani bacuaa xtidx Dios agujc xchero.

<sup>29</sup> Dxejcti räjpnı angl xten Dios lo Felipe:

—Gubıg cuä' gare'tga, gunınäj dade'ğa.

<sup>30</sup> Che gubig Felipe cuä' gare'tga, biejn diajgni cayol dade'ga rextidx Isaías. Dxejcti räjp Felipe lojni:

—¿La racbeelu ni caj lo guijtzt nani cayollu, ä?

<sup>31</sup> Dxejcti räjp dade'ga lojni:

—¿Xho gacbeäni palga rut gusule'dini loä?

Sas räjp dade'ga lo Felipe chä'pni nen gare'tga.

<sup>32</sup> Cadro cayol dade'ga nen guijtzt ni caj xtidx Dios rnii scree:

Di xiil cuedxa' che rinä bejnni cadro guetni;

dxitis raa xiil che ruhuajrenini.

Si'c te xiil najc niguiire,

xhet rniidini mase rusacsíduxhrenini.

<sup>33</sup> Basacsíduxhrenini.

Reguxhtis ni niujn yälguxhtisni xhet laliidi bejnreni.

Xhet si'cti nunyäjł gunreni.

¿Xho guiniinu yu' xpejnni?

Ni abagu'trenini. Diruni guibajn lo guedxliuj.

<sup>34</sup> Dxejcti gunabdiidx ben Etiopía, räjpni lo Felipe:

—Gunilaa loä, chuni'c ruzä't niguii nani bacuaa reguijtzre, ¿la ruzä'tni lagajc laani o la ruzä'tni ste'ca bejn, ä?

<sup>35</sup> Gusloj basule' Felipe rediidx nani abil dade'ga. Dxejcti basule'ni rediidx xcuent Jesucrist. <sup>36</sup> Lał ni sääreni lo nezyuj, bidzujnreni te lajt cadro yu' nis. Dxejc räjp dade'ga lo Felipe:

—¿Bahuii, ree yu' nis! ¿Xhi rudxojn tiobnisä?

<sup>37</sup> Dxejc räjp Felipe lojni:

—Palga rililajzlu xtidx Dios nen lastoolu, sajc tiobnislu.

Dxejc räjp dade'ga lo Felipe:

—Rililazä Jesús najc Crist Xi'n Dios.

<sup>38</sup> Dxejc gunibee dade'ga gusudxi gare't, sas biäjt guiro'preni, biu'reni nen nis, ro'c batiobnis Felipe dade'ga. <sup>39</sup> Che biriireni nen nis, huinä Sprit Dxa xten Dios Felipe ste'ca lajt. Dxejc diru dade'ga nuhuii lo Felipe. Sä'ti dade'ga lajdxni, cabalazduxhni. <sup>40</sup> Dxejcti chela gucbee Felipe abidzujnni guedx Azoto. Baluiizani xtidx Dios nen guiraa reguejdx che bidzujnlini guedx Cesarea.

## 9

### *Huililajz Saulo rextidx Jesucrist*

(Hch. 22:6-16; 26:12-18)

<sup>1</sup> Lałtis cagusacsí Saulo rexpejn Jesucrist. Rlajzni ju'tni guiraareni, ni'c huijni lo bixhojz nani rnibee, <sup>2</sup> gunabni gac te guijtzt chanäni lo reguidoo nen guedx Damasco te palga guidxälni reni najc xpejn Jesucrist nen reguidooga, niguii sigac gunaa, guliibnireni, jiädänireni guedx Jerusalén te jiäuren. <sup>3</sup> Lał sasajni lo nezyuj, asiäddzungajxhni guedx Damasco, basaniya' te bal xhaguibaa, basanijni guideb gabi cadro siädsaj Saulo. <sup>4</sup> Dxejc biajbni lo yuj, biejn diajgni te xse' bejn nani canii lojni:

—Saulo, Saulo, ¿xhicuent rusacsílu narä, näjza rexpeña?

<sup>5</sup> Räjp Saulo lojni:

—¿Chuluj Dad?

Räjpni lo Saulo:

—Narä nacä Jesucrist, nani cagusacsíduxhlu. Niluxh lagajc luj cadejdlu trabajw si'c rajc te gon ni rucuan' yejc caru'ch.

<sup>6</sup> Bidxebduxh Saulo, racsejsni räjpni:

—Dad, ¿xhini'c rlajzlu gunä?

Dxejc räjp Jesús loj Saulo:

—Huistie, biu' guedx Damasco. Ro'c suluii te niguii xhini'c gunlu.

<sup>7</sup> Rebejn ni siädnä Saulo sugadxireni, bidxejbreni sa'csi biejn diajgreni te xse' bejn, luxh rut lojdi bahuiireni. <sup>8</sup> Che huistie Saulo lo yuj, baxhalni lojni, niluxh di lojni jien. Dxejc gunaazreni naani, sanärenini guedx Damasco. <sup>9</sup> Ro'c guyu'ni choñ dxej, natiä'p balojni, dini niä', dizani niajw.

<sup>10</sup> Guedx Damasco rbäjz te xpejn Jesucrist ni laa Ananías. Baluiloj Jesucrist loj Ananías lo te bacad, räjp Jesucrist lojni:

—Ananías.

Dxejc räjp Ananías lojni:

—Anaree Dad.

<sup>11</sup> Räjp Jesucrist lojni:

—Huistie te chäälü lo nezyuj ni laa Ladbee cad rbäjz Judas. Ro'c guiniabdiidxlu con te niguii ni laa Saulo, ben Tarso. Cabejdx, canabni loä naj. <sup>12</sup> Lo bacad abahuiini siääd te niguii ni laa Ananías te gutzuubni naani yejcn te fiini stehuält.

<sup>13</sup> Dxejcti räjp Ananías lojni:

—Dad, abiejn diagä xho basacsí niguiiga rexpejnlu nen guedx Jerusalén. <sup>14</sup> Luxh rebixhojz ni rnibee abadeed guijtzn lojni te guiniaazni ree guiraa rebejn nani rbedx-rniab lojlu, chanänireni jiäureni.

<sup>15</sup> Dxejcti räjp Jesucrist lojni:

—Huij, narä aguleäni te gunni xtzunä. Suluiini xtidxä loj rebenzijt nani digac xpen Israel, näjza loj reni rnibee renacion, näjza loj rexpejn Israel. <sup>16</sup> Narä suluiä lo Saulo trabajwduxh ni tedni te jiädnajlni narä.

<sup>17</sup> Dxejcti sää Ananías, bidzujnni ro yu' cadro rbäzlaa Saulo. Batzuubni naani yejc Saulo. Dxejcti räjp Ananías loj Saulo:

—Betzä Saulo, Jesucrist ni rnibee, nani baluiloj lojlu lo nezyuj cheni siäädllu, lagajc laani baxhalni narä te fiilu stehuält, te jiädläjzta Sprit Dxan xten Dios nen lastoolu.

<sup>18</sup> Lagajc dxejc bitejb si'c xmelbäjln yec baloj Saulo, biacgajc balojni, bahuisa'cni stehuält. Dxejc huistieni, gurobnisgajcni. <sup>19</sup> Dxejc gudajwni, guc nadaanni stehuält. Xchej guyunäj Saulo rexpejn Jesucrist nen guedx Damasco.

*Gusloj basule' Saulo xtidx Dios nen guedx Damasco*

<sup>20</sup> Dxejcti gusloj basule' Saulo xtidx Dios nen reguidoo xten rexpejn Israel, räjpni:

—Jesucrist najc Xi'n Dios nani gujc Niguii.

<sup>21</sup> Che biejn diajgreni xtiidxni, bidxelojreni, räjp lo sa'reni:

—¿La xhet laadi niguiire ni rusäu rexpejn Jesucrist nen latzguiib guedx Jerusalén, ä? Lagajcza dee bidzujn ree te guliibni rexpejn Jesucrist te chanänireni guedx Jerusalén lo rebixhojz.

<sup>22</sup> Dxejcti gusutzu'tz Saulo guniini xtidx Dios. Basacajnni rexpejn Israel nani rbäjz Damasco sa'csi basule'pacni Jesús najc Crist nani rnibee.

*Baxun Saulo guedx Damasco*

<sup>23</sup> Che gudejd xhidajln dxej, bachagsa' rexpejn Israel te nugu'treni Saulo. <sup>24</sup> Dxejcti gucbee Saulo xhi xhigab bejnreni. Dxej, yääl cabäjzreni Saulo ro' guiraa renezyuj ni rdzujn guejdxga te ju'trenini. <sup>25</sup> Dxejcti che gojl te yääl basäl rexpejn Jesucrist Saulo nen te dximro, basiäjtreni dxijmga nez ro' te padeer ni dejd gabi guejdxga. Basiäjtrenini nez dejtz padeerga, te si'c baxunni guejdxga.

*Bidzujn Saulo guedx Jerusalén*

<sup>26</sup> Che bidzujn Saulo guedx Jerusalén, rlajzni nuchaagni loj reni rililajzn xtidx Jesucrist, niluxh guiraareni bidxejbrenini sa'csi direni gan ahuililajzn xtidx Dios. <sup>27</sup> Dxejcti huinä Bernabéni lo reapost, bijni diidx xcuent Saulo. Räjp Bernabé lojreni:

—Baluiloj Jesucrist lo Saulo loj nezyuj. Guninäj Xtioznu Saulo loj nezyuj, ni'cni gusutzu'tz Saulo basule'ni xtidx Jesucrist guedx Damasco.

<sup>28</sup> Dxejc bia'n Saulo guedx Jerusalén, bidxaagni lo rexpejn Jesucrist. <sup>29</sup> Dxejcti gusutzu'tz Saulo gusloj bijni xtidx Jesucrist lo rebejn. Dxejcti gudilnäj Saulo rexpejn

Israel nani rniid didx griegw. Laareni rdxechduxhrenei, rlanjrenei nugu'treni Saulo sa'csi direni nichagljajz xtidx Jesucrist. <sup>30</sup> Che gucbee rexpejn Jesucrist si'c, huinäreni Saulo guedx Cesarea, ro'c gulääreni Saulo, baxhalrenini guedx Tarso.

<sup>31</sup> Dxejc guredxi lajz guiraa renani huililajz xtidx Dios neñ reguedx Judea, neñ reguedx Galilee, näjza neñ reguedx Samaria, sa'csi diru Saulo nusacsí rexpejn Jesucrist, luxh guc xhidajlrureni. Basoobreni xtidx Jesucrist, bisieedrureni rextiidxni, gucnäjza Sprit Dxan xten Diosreni.

#### *Biajc Eneas*

<sup>32</sup> Che gusloj sahuui Pedr guiraa renani huililajz xtidx Dios, huihuiizani rexpejn Jesucrist nani yu' guedx Lida. <sup>33</sup> Ro'c bidxälni te niguii ni laa Eneas. Agujc xhujñ izj naga' niguiiga cayacxhuuni. Abixu'ñ tiejxhni, digacdiru guiliini.

<sup>34</sup> Dxejcti räjp Pedr lo Eneas:

—Eneas, cagusiajc Jesucrist guebju. Huistie, guläs xta'lu.

Lagajc dxejc biajcn, huistietini.

<sup>35</sup> Guiraa rebejn ni rbäjz guedx Lida, näjza reben ni rbäjz guedx Sarón, bahuiireni abiajc niguii ni cayacxhuu. Dxejc xhidajlrenei neñ reguejdxga huililajz xtidx Dios.

#### *Gubañsac Dorcas*

<sup>36</sup> Neñ guedx Jope yu' te gunaa ni laa Tabita; rniizarenini Dorcas con xtidx griegw. Gunaaga huililajz xtidx Dios, rudeedzani xhi rquiin rebenproob, najczani huenduxh loj chutis bejn. <sup>37</sup> Gucxhuu gunaaga, dxejc gujtni. Che gulujx bahuajz rebejn togoolga, huitixhrenei neñ te yu' ni najc jiaa yejc sa'ni. <sup>38</sup> Sa'csi gajxh guedx Jope tre' guedx Lida, luxh biejn diajg rexpejn Jesucrist ro'c yu' Pedr, baxhalreni tiop dade' saxii Pedr. Räjp redade'ga loj Pedr:

—Bejn huen salu chonnu Jope nanajga.

<sup>39</sup> Dxejc sanägajc Pedr redade'ga. Che bidzujñrenei, huinäreni Pedr neñ yu' cadro naga' togunaaga. Ro'c cayonduxh guiraa regunabiuud, baluiireni lo Pedr guiraa rehxajbreni nani benchee Dorcas, ni badeed Dorcas lojrenei che nabajñni. <sup>40</sup> Dxejcti gunibee Pedr birii guirareni neñ yu'. Dxejc bazuxhibni, guredx-gunabni loj Dios. Dxejc gubiréni bahuiini loj togoolga, räjpni:

—Tabita, huistie.

Dxejcti baxhal gunaaga balojni; che bahuiini loj Pedr, gurejni. <sup>41</sup> Dxejc gunaaz Pedr ñaani, basuliinini, dxejcti gurejdx Pedr regunabiuud näjza sgaii reni najc rexpejn Jesucrist. Baluiini gunaaga lojrenei te bahuilojrenei agubañsacni. <sup>42</sup> Gucbegajc reben guedx Jope xhini'c gujc, dxejcti xhidajl rebejnga huililajz xtidx Jesucrist. <sup>43</sup> Xchejza guyu' Pedr ro'c, guläjzni roliz dade' ni laa Simón, nani ruscoodz guijd.

## 10

#### *Pedr con Cornel*

<sup>1</sup> Guedx Cesarea guyu' te niguii ni laa Cornel. Rnibeeni te gayuu resoldaad lo te cuaa ni laa Italiano. Cornel najc benzijt, dini gac ben Israel. <sup>2</sup> Bensacduxh najc Cornel, näjza guiraa resa'ni, sacruduxh rusoobreni xtidx Dios. Rudeedni gojn lo reben proob xten Israel. Guixe-guixee rbejdx, rniabni lo Dios. <sup>3</sup> Te dxej, si'cti rcachon gudxej, si'c lo bacal bahuiini loj xangl Dios, räjpni loj Cornel:

—¿Conlu Cornel?

<sup>4</sup> Che bahuii Cornel xangl Dios, bidxejbni, bidxelojni, räjpni lojni:

—¿Xhini'c, Dad?

Dxejcti räjp angl xten Dios lojni:

—Che rniilu lo Dios, riejn diajg Dios xtiidxlu, che rudeedlu meel lo reben proob, ruhuii Dios ni rujnlu, ni'cni rnalajz Dios luj. <sup>5</sup> Naj baxhal tiop niguii chää guedx Jope te chaxiireni Simón Pedr. <sup>6</sup> Rbäjzni roliz te dade' ni laa Simón nani ruscoodz guijd. Roliz Simón sojb gajxh ro' nisdoo. Simón Pedr gusule' xhini'c nanab gunlu.

<sup>7</sup> Che sii angl xten Dios, gule Cornel tiop mos xtenti nájza te xsoldaadni nani sanälajz Dios. <sup>8</sup> Dxejc bij Cornel diidx lojreni xcuent ni gusajcni, dxejc baxhalni redade'ga guedx Jope.

<sup>9</sup> Che bara yääl, sääreni lo nezyuj. Asiäddzungajxhrene guedx Jope, pet si'cti läidxejni. Lagajc orga huä'p Pedr yecyu' te guininäjni Guejb Dios. <sup>10</sup> Calanduxh Pedr, rlajzni gauni. Laļ ni cayujnreni xhi gauhuejni, gusloj canixcalni. <sup>11</sup> Bahuiini bixal xhaguibaa, bahuiizani biäjt te bariadro nani naliib guidap xi'ni. Siädjiätchäiini gajxh nez loj Pedr. <sup>12</sup> Neñ bariadga yu' guiraa reman ni yu' lo guedxliuj nani rsianäj guidap ni'ni, nájza renani rxeeb si'c bäl, nájza renani rutajt. <sup>13</sup> Gunii Dios lo Pedr, räjpni lojni:

—Pedr, huisu te ju'tlu man gaulu.

<sup>14</sup> Dxejc räjp Pedr lojni:

—Na'c Dad. Nunc gauä sa' remandxuudxga, abia'a dina gauä reman nani rnii xleilu najc mandxuudx.

<sup>15</sup> Gunisac Dios loj Pedr, räjpni:

—Na'cru guiniilu nacdXuudx reman nani abasia.

<sup>16</sup> Che gujc choñ huält gujc si'c, huä'psac bariadga xhaguibaa. <sup>17</sup> Laļ ni cayujn Pedr xhigab xhichani'c säloj nani bahuiini, bidzujñ reniguii ni baxhal Cornel ro' yu'ga, sa'csi agunabdiidxreni caro rbäjz Simón nani ruscoodz guijd.

<sup>18</sup> Che bidzujñreni rolä'ga canabdiidxreni la ro'c rbäjz te dade' ni laa Simón Pedr. <sup>19</sup> Laļ ni cayujn Pedr xhigab xcuent ni bahuiini, gunii Sprit Dxan xten Dios lojni, räjpni:

—Bahuii, choñ dade' caguiillu. <sup>20</sup> Biäjt yejc yu're te jinälureni. Na'c gunlu xhi stee xhigab, sa'csi lagajc narä baxhaläreni lojlu.

<sup>21</sup> Dxejcti biäjt Pedr jiaaga, bidzujñni cadro suga' redade'ga, räjpni lojreni:

—Narä nacä ni caguiiltu. ¿Xhi siäadtu?

<sup>22</sup> Räjp reniguiiga lo Pedr:

—Cornel, nani rnibee te gayuu soldaad, te bensa'c, te bejn ni rajñ Dios, te bejn ni sanälajz rexpejn Israel, laani baxhal nuure lojlu, sa'csi räjp angl xten Dios lojni, jiopxiinu luj te jiejn diajgnu xtiidxlu.

<sup>23</sup> Dxejcti gurejdx Pedr rebejnğa, biu'reni neñ yu'. Ro'c bia'nreni te guxhijñ. Che bara yääl, Pedr nájza sgaii beñ Jope ni najc xpejn Jesucrist, sanä redade' ni baxhal Cornel.

<sup>24</sup> Che bara yääl, bidzujñreni guedx Cesarea. Abatojp Cornel resa'ni nájza reexamigwni rolizjni. Cabäjzreni guidzujñ Pedr. <sup>25</sup> Che bidzujñ Pedr ro yu', huichagloj Cornelni, bazuxhijbni lo Pedr. <sup>26</sup> Dxejc gunaaz Pedr ñaani, guläsnini, räjpni lojni:

—Huisulii, sa'csi narä nacä te niguiitis sigajc najclu.

<sup>27</sup> Cayuiireni diidx, biu'reni neñ yu'. Che biu'ni bahuii Pedr nadxagsa' rebejn neñ yu'. <sup>28</sup> Räjp Pedr lojreni:

—Anajntu xhi caj lo leii xten rexpejn Israel: digacdi guchaag te xpejn Israel loj benzijt nani digac xpejn Israel, digacdiza jiu'ni rolizreni. Niluxh agunii Dios loä lo te bacal, te gacbeä digacdiru jiuä releiire. Abaluii Dios narä sajc guchagsa'ä chutis bejn. <sup>29</sup> Ni'cni, che gurejdxtu narä biälgacä. Naj rniabdixä, ¿xhicuent gurejdxtu narä?

<sup>30</sup> Dxejcti räjp Cornel loj Pedr:

—Gudajp dxej si'cti rcachon gudxej, cabedx-canabä lo Dios rolizä chela baluiloj te niguii najcw te ladnol ni rdimbicha'. <sup>31</sup> Najni loä: “Cornel, che rbedx-rniablu lo Dios, riejn diajg Dios xtiidxlu, che rudeedlu meel lo rebeñ proob, racbee Dios, di lajzni jääl luj.

<sup>32</sup> Ni'cni naj baxhal tiop dade' chää guedx Jope te chaxiireni Simón Pedr nani rbäzlaa roliz Simón ni ruscoodz guijd. Rolizjni sojb gajxh ro' nisdoo. Che guidzujñni, laani gusule'ni xtidx Dios lojtu.” <sup>33</sup> Dxejc baxhalä chu biädxiiilu. Xquixtiostelu biäädllu. Naj anadxagsa'nu ree nez loj Dios te jiejn diajgnu rextidx Dios ni baniidxni lojlu guiniilu loonu.

*Basule' Pedr xtidx Dios roliz Cornel*

<sup>34</sup> Dxejcti räjp Pedr lojreni:



—Naj gubeliä tebloj rinälajz Dios guiraa bejn; rebenzijt sigajc rexpejn Israel. <sup>35</sup> Niluxh rinälajz Dios chutis bejn guedxliuj nani ruzuxhijb lojni, nani rusooob rextiidxni, nani laaca nabajn. <sup>36</sup> Badeed Dios xtiidxni loj rexpejn Israel, basule' Dios biääd Jesucrist te gac chanälaaznu Dios te cuedxilajznu, sa'csi Jesucrist rnibee guideb guedxliuj. <sup>37</sup> Che gulujx baluui Juan ni rutiobnis xcuent yälrobnis, dxejc gusloj basule' Jesucrist xtidx Dios nez reguedx Galilee. La'tu najntu xho bire'ch xtidx Jesucrist guideb nez nen reguedx Judea. <sup>38</sup> Nancheetu xho badeed Dios yälrnibee loj Jesucrist, bejn Nazare't. Badeedza Dios Sprit Dxiän xtenni te cuääzni nen lastooni. Nancheetu xho bejn redzunro, remilagwr, basiajcnibejn nani caguteed benxab trabajwduxh. Redzunroga bejn sa'csi bennäj Diosni dzuun. <sup>39</sup> Bahuiloonu guiraa redzuun ni bejn Jesucrist nen reguedx Israel näjza guedx Jerusalén. Bacuaa rexpejn Israel Jesucrist lo cruiz, ro'c gujtni. <sup>40</sup> Dxejcti che biojn dxej, guläs Dios Jesucrist lo rebengut, gubansacni, badeed Dios yälrnibee lojni te gujc biädluiloj Jesucrist loonu. <sup>41</sup> Di Jesucrist nuluiloj loj chutis bejn. Lojtis renani agule Dios gutie'ch diidx gubansac Jesucrist lo rebengut, loj reni'c baluilojni. Nuure nadxagnu loj reni gule Dios. Bidaunänuni, bidunnäänuni che gubansacni lo rebengut. <sup>42</sup> Baxhalni nuure chatie'chnu diidx loj guiraa rebejn, chosule'pacnu Dios gule Jesucrist te gacni juejz xte rebenbajn näjza xte rebengut. <sup>43</sup> Galooli bacuaa renani gunii xtidx Dios lo guijt, räjpreni: “Guiraa rebejn ni chalilajz xtidx Jesucrist sudzucaj Dios xtojreni.”

*Biädlajz Sprit Dxiän xten Dios nen lastoo rebenzijt*

<sup>44</sup> La' ni canii Pedr rediidxga, biädlajz Sprit Dxiän xten Dios nen lastoo renani huililajz xtiidxni. <sup>45</sup> Bidxeloj guiraa rexpejn Israel nani huinä Pedr sa'csi biädlajz Sprit Dxiän xten Dios nen lastoo renani najc benzijt. <sup>46</sup> Gucbeereni biu' Sprit Dxiän xten Dios lastoo rebenzijt sa'csi bejn Sprit Dxiän guniireni stee didxsaj nani gajdreni guisieed, calä'pzareni xpala'n Dios. <sup>47</sup> Dxejcti räjp Pedr lo rexamiigwni:

—Chu laa ni gudxojn yälrobnis lo rebejnre, ni sigajc biädlajz Sprit Dxiän xten Dios nen lastoonu, abiädlajznen lastoo rebejnre.

<sup>48</sup> Dxejcti gunibee Pedr gurobnisreni te gacbee bejn najcreni xpejn Jesucrist. Dxejcti gunabreni loj Pedr jia'nni ro'c tiop-choj dxej.

## 11

*Basule' Pedr xho biädlajz Sprit Dxiän xten Dios lastoo rebenzijt lo rexpejn Jesucrist nen guedx Jerusalén*

<sup>1</sup> Reapost, näjza renani huililajz xtidx Jesucrist nen reguedx Judea, biejn diajgreni huililajz rebenzijt ni digac xpejn Israel xtidx Dios. <sup>2</sup> Che bidzujn Pedr guedx Jerusalén, rexpejn Israel nani rlajz chu guiraa rexpejn Jesucrist bee si'cni bejn toAbram, gudilnäjreni Pedr. <sup>3</sup> Räjpreni lo Pedr:

—¿Xhicuent biu'lu rolijz benzijt nani xhet yu'di bee si'c nuure? ¿Xhicuent gudaunäjlore, ä?

<sup>4</sup> Dxejcti basule' Pedr diidx xho gujc huijni loj rebenzijt:

<sup>5</sup> —Yu'ä guedx Jope. Cabedx-canabä lo Dios, dxejc si'c gunixcalä, bahuiä bixal xhaguibaa, siädjiäjt te bariadro, naliib guidap xi'ni. Siädjiätchäini nez loä. <sup>6</sup> Che bahuisa'cä, nenga yu' guraloj reman ni yu' lo guedxliuj nani rsianäj guidap ni'ni, renani rbäjz nen dajn, renani rxeeb si'c bäl, näjza renani rutaj. <sup>7</sup> Dxejcti biejn diagä naj Dios loä: “Pedr, huisu. Bagu't man gaulu.” <sup>8</sup> Dxejcti räpä: “Digac dini Dad. Nicla tej gadna gauä te man nani rnii leii xtenlu najc mandxuudx.” <sup>9</sup> Dxejc gunisac Dios loä: “Na'cru guiniilu nacdxuudx recos nani abasia Dios.” <sup>10</sup> Che gujc choj huält gunii Dios si'c, huä'psac bariadga xhaguibaa. <sup>11</sup> Lagajc orga bidzujn choj dade' ro yu' cadro yu'ä. Guedx Cesarea biriireni, biädxiiireni narä. <sup>12</sup> Dxejc gunii Sprit Dxiän xten Dios loä: “Huinä reniguiire. Na'c gun tiop lajzlu.” Dxejcti huinä xho'p bejn Jope, dade' nani rililajz xtidx Jesucrist. Che bidzunnu guedx Cesarea, biu'nu rolijz Cornel. <sup>13</sup> Basule' Cornel diidx loonu xho baluiloj te angl xten Dios lojni lagajc rolijz. Räjp angl xten Dios lojni: “Baxhal tiop dade'



chää guedx Jope te chaxiireni Simón ni rniireni Pedr. <sup>14</sup> Laani siniini xtidx Jesucrist te gacbeelu con resa'lu xhini'c nanab gunlu te guslaa Dios la'tu lo rextojltu.” <sup>15</sup> Che gusloj cagusule'ä xtidx Dios lojreni, biu' Sprit Dxan xten Dios nen lastooreni si'c biu'ni lastoonu galooli. <sup>16</sup> Dxejcti banaj lazä rextidx Dad Jesucrist che najni: “Juan abatiobnis con nistis, biädla narä suxhalä Sprit Dxan xten Dios te cuääzni nen lastootu.”

<sup>17</sup> Dxejc räjpza Pedr:

—Palga badeed Dios Sprit Dxan xtenni lojreni si'c baniidxni Sprit Dxan xtenni loonu che huililajznu xtidx Jesucrist, ¿chu narä? te niäpä lo Dios: “Na'c gudeedlu Sprit Dxan xtenlu lojreni.”

<sup>18</sup> Che biejn diajg reben Jerusalén rediidxga, biäuu ro'reni, dirureni nidilnäj Pedr. Alga gulä'preni xpala'n Dios, räjpreni:

—Näjza rebenzajt nani digac rexpejn Israel abasaan Dios gusiechlajzreni te guibannäjreni Dios par tejpas.

*Rexpejn* Jesucrist ni yu' guedx Antioquía

<sup>19</sup> Che gujt Esteban bire'ch renani huililajz rextidx Jesucrist. Bire'chreni lo yuj Chipre ni re' lo nisdoo, lo reguedx Fenicia, näjza lo guedx Antioquía sa'csi cadejdreni trabajwduxh. Basule'reni rextidx Jesucrist lojtis rexpejn Israel. <sup>20</sup> Lojreni nadxaag gaii ben Chipre, näjza gaii ben Cirene. Redee bidzujn guedx Antioquía. Ro'c gusloj caniireni lo benzajt nani rnii didx griegw. Basule'reni lo rebenzajtga guiraa xcuent Jesucrist. <sup>21</sup> Gucnäj Diosreni caniireni xtiidxni. Xhidajl rebejnğa huililajz xtidx Jesucrist, basoobreni xtiidxni.

<sup>22</sup> Che biejn diajg rexpejn Jesucrist ni yu' guedx Jerusalén rililajzreni, baxhalreni Bernabé guedx Antioquía. <sup>23</sup> Che bidzujn Bernabé guedx Antioquía, bibalazduxhni che bahuiini xho cayunnäj Dios rebejnğa. Dxejcti balijdx Bernabéreni: gutijp lajzreni gusoobreni xtiidxtis Jesucrist. <sup>24</sup> Bensä'c najc Bernabé. Rililazduxhni xtidx Jesucrist. Racnäjduxh Sprit Dxan xten Diosni. Xhidajl rebejn huililajz xtidx Jesucrist guejdxga.

<sup>25</sup> Che birii Bernabé guejdxga, huijni guedx Tarso satiilni Saulo. <sup>26</sup> Che bidxälni Saulo, huinänini guedx Antioquía. Ro'c bia'nreni tebijz, bachagsa'reni renani huililajz te baluiireni xtidx Jesucrist lo xhidalduxh bejn. Ganid benguejdxga gulälaj “Cristianos” renani rililajz xtidx Jesucrist.

<sup>27</sup> Nen redxejga birii gaii dade' nani rnii xtidx Dios. Guedx Jerusalén biriireni, bidzujnreni guedx Antioquía. <sup>28</sup> Huisulii te dade'ga ni laa Agabo. Gucnäj Sprit Dxan xten Diosni te guniini siäd te gubijn guideb guedxliuj. Luxh gujc gubijnğa nen reijz ni gunibee reii Claudio ni sajcrü. <sup>29</sup> Dxejcti rexpejn Jesucrist ni rbäjz guedx Antioquía bejn xhigab cade tejreni gudeed meel chää lo rexpejn Jesucrist ni rbäjz nen reguedx Judea. <sup>30</sup> Batojpreni meel, baxhalrenini lo rebengool ni rnibee rexpejn Jesucrist ro'c. Saulo näjza Bernabé huinä meelga che huijreni Judea.

## 12

*Gujt Jacob, biäu Pedr nen* latzguiib

<sup>1</sup> Nen redxejga, trabajwduxh bateed reii Herodes gaii rexpejn Jesucrist. <sup>2</sup> Gunibeeni gujt Jacob betz Juan, biru' guejnii. <sup>3</sup> Che bahuii Herodes bibalazduxh rexpejn Israel sa'csi bagu'tni Jacob, gunibeeni gunazgajcreni Pedr. Dee gujc nen redxe lanij che rajwreni yätxtiil ni di saguij. <sup>4</sup> Che gunaazreni Pedr, biäuni nen latzguiib. Gunibee Herodes biäd tajp cuaa soldaad cuanäjreni ro' latzguiib. Tapgaj soldaad cuanäj ro' latzguiibga cade xho'p or. Bejn Herodes xhigab cuääni Pedr te guetni nez loj rexpejn Israel che ted lanij. <sup>5</sup> Yu'ti Pedr nen latzguiib, dxejcti durtis cabejdx, canab rexpejn Jesucrist lo Dios xcuent Pedr.

*Gulää Dios Pedr nen* latzguiib

<sup>6</sup> Bidzujnti dxe bispr dxej ni rlajz Herodes nibää Pedr nez loj rexpejn Israel. Yäälga nagayejs Pedr galäii tiop soldaad. Caden naliib guiro'p naa Pedr. Stiop soldaad canäj

ro' latzguiib. <sup>7</sup> Chela baluiloj te angl xten Dios, bianij te bajl nani basanij nen latzguiib. Dxejcti gunaazni xhajcw Pedr, basniibnini te gubajñni. Räjpnı lo Pedr:

—Basquejnga, huistie.

Dxejcti bixec recaden, bitejbreni naa Pedr. <sup>8</sup> Räjpnı xangl Dios lo Pedr:

—Gojt xhajblu, baläj xcura'chlu.

Si'c bejn Pedr, dxejc räjpnı xangl Dios lo Pedr:

—Gojt xhablajzlu, gudanajl narä —räjpnı.

<sup>9</sup> Biriitini latzguiib sanajlnı angl xten Dios. Niluxh dini gun xhigab guliipac nani bejn xangl Dios. Bejnı xhigab pet canixcalni. <sup>10</sup> Gudejdreni nez loj te soldaad, gudedgajczeni nezloj steeni, dxejc bidzujñreni ro' puertguiib xten latzguiib nani caj lo nezyuj ni rdejđ galäiı guejdxga. Xtebca bixal puertroga, biriireni gusajreni teznezyuj. Dxejcti te squiın gunitloj xangl Dios. Xtebtis Pedr sasaj lo nezyuj. <sup>11</sup> Dxejc si'cni gubajñ Pedr, bejnı xhigab:

—Naj sii nanä baxhal Dios te xanglnı baslaa narä ladznaa Herodes te digacdi gun rexpejn Israel nani rlajzreni gunnäjreni narä.

<sup>12</sup> Che gucbee Pedr xhi gusajcni, huijni roliz Marii, xnan Juan ni rniireni Marcw. Ro'c nadxagsa' xhidajl rexpejn Jesucrist, cabedx-canabreni lo Dios xcuent Pedr. <sup>13</sup> Cagusejz Pedr rolä', dxejc gubig te dxa'p ni laa Rode, bacuadiajgni ro lä'. <sup>14</sup> Che biembee Rode xse' Pedr, sa'csi bibalazduxhni, biallajzni nuxhalni ro lä'. Alga baxunni biusacni nen yu', räjpnı lojreni:

—Pedr suga' ro lä'.

<sup>15</sup> Dxejcti räjpreni lo Rode:

—Yejclu cayajc.

Dxejcti duurtis gunii dxape'ga suga' Pedr ro lä'. Dxejcti räjpreni loj Rode:

—Xho gacni Pedr. Pet biejn diajglu gunii xangl Dios ni rcanäj Pedr.

<sup>16</sup> Dxejcti laltis cagusejz Pedr ro lä'. Che baxhalreni ro lä' bidxeloduxhreni bahuiireni lo Pedr. <sup>17</sup> Dxejcti bazääb Pedr naani te na'cru jieyreni. Dxejc bij Pedr diidx xho baxhal Dios ro' latzguiib. Dxejc räjpnı:

—Colchaye'tz lo Jacoob näjza lo rexpejn Jesucrist guiraa ni gusacä nayääl.

Dxejcti birii Pedr ro'c, huijni ste'ca lajt.

<sup>18</sup> Che bara yääl, rsildooru, bieiduxh resoladaad sa'csi direni gan xho gujc birii Pedr nen latzguiib. <sup>19</sup> Gunibee Herodes huitiilreni Pedr, gunabdiidxzani lo resoladaad xho gujc birii Pedr, dxejc gunibeeni gujt resoladaad ni cuanäj latzguiib che birii Pedr. Dxejcti birii Herodes reguedx Judea, xchej huijia'nı guedx Cesarea.

### *Gujt Herodes*

<sup>20</sup> Bachechduxh reben Tiro näjza reben Sidón Herodes, ni'cni diruni gusaan guto' rebejn nez cadro rnibeeni xhi gau reben Tiro näjza reben Sidón. Ni'c biääd xhidajlreni te guiniabreni jäjl lajzni, te na'cru guidxe'ch Herodes lojreni. Abenxgaareni xamiigwreni Blasto, mos ni yu' lo reiı Herodes, mos ni sajcu lo guiraa rexmos Herodes. Guninäj Blasto Herodes xcuentreni te na'cru guidxechnäj Herodes rebejnğa. <sup>21</sup> Basoobtini te dxej te guininäjnireni. Dxejga gojt Herodes xhajb reiini, gurejni lo xyacxhil reiini. Dxejcti gusloj caniini didxsa'c loj rebejnğa. <sup>22</sup> Guredxa' rebejn räjpreni lojni:

—Huenduxh najc diidxre. Guejblu najc te dios, xhet xtiidxdi niguii najc diidxre.

<sup>23</sup> Lagajc dxejc biääd te angl xten Dios, bejnı gusloj cayacxhuu Herodes, gudajw rebisiujg Herodes, gujtnı sa'csi basaanni gunii rebejn najcni te dios, sa'csi dini niliä'p xpala'n Dios.

<sup>24</sup> Xhidajl bejn biejn diajgni xtidx Dios, huililajzreni xtidx Dios.

<sup>25</sup> Che gulujx badeed Bernabé näjza Saulo meel ni batojp reben Antioquía lo rebengool, biriireni guedx Jerusalén. Sanäreni Juan ni rniireni Marcw lo guedx Antioquía.

## 13

*Gule Sprit Dxan xten Dios Bernabé nájza Saulo*

<sup>1</sup> Lo rexpejn Jesucrist ni rdxaag sa' guedx Antioquía guyu' gaii niguii ni gunii xtidx Dios, nájza gaii niguii ni rusule' xtidx Dios loj guiraa rexpejn Jesucrist. Loj redee nadxaag Bernabé, náj Simón ni rniireni Negr; náj Lucio, beñ Cirene; náj Manaén ni gulanáj reii Herodes gujcní si'c bejtzni; nájza Saulo. <sup>2</sup> Bidzujñ te dxej cagucua'nreni lañ ni cabedx-canabreni lo Dios, dxejc räjp Sprit Dxan xten Dios lojreni:

—Colcúe Bernabé nájza Saulo te gunreni dzuun ni rlazä gunreni.

<sup>3</sup> Che gulujx bacua'nreni, che gulujxza guredx-gunabreni lo Dios, batzuubreni naareni yejc guiro'preni, te si'c baxhañreni Bernabé nájza Saulo te guluiireni xtidx Dios ste'ca lajt.

*Guiro'preni baluui xtidx Dios lo rebeñ Chipre*

<sup>4</sup> Baxhañ Sprit Dxan xten Dios Saulo nájza Bernabé guedx Seleucia. Ro'c biu'reni nen barcw, sääreni nez yuj ni tre' galäii nisdoo, ni laa Chipre. <sup>5</sup> Che bidzujñreni Chipre, biu'reni guedx Salamina. Ro'c basule'reni xtidx Dios nen guiraa rexquidoo rexpejn Israel. Náj Marcw gucnäjreni. <sup>6</sup> Che cuansajreni guideb yuj Chipre, bidzujñreni guedx Pafos. Ro'c bidxaagreni te niguii ni laa Barjesús. Najcni te bidxaa, najczani te xpejn Israel. Cagusgueeni rebejn guejdxga, räjpni xtidx Dios caniini, niluxh dini gac xtidx Dios. <sup>7</sup> Bidxaare nu'ch lo rexpejn Sergio Paulo, nani najc gubernadoor xten Chipre. Nasinduxh Sergio Paulo. Gurejdxni Bernabé nájza Saulo, sa'csi rlanjni jiejn diajgni xtidx Dios. <sup>8</sup> Dxejcti Barjesús, ni laaza Elimas, bidxagdijñni guiro'preni sa'csi di rlanjni chalilajz Sergio Paulo xtidx Dios. <sup>9</sup> Saulo, nani laaza Pabl, bahuitzu'tz loj Barjesús. Batijp Sprit Dxan xten Dios lastoo Pabl, räjpni loj Barjesús:

<sup>10</sup> —Rusgueduxhlu rebejn, najclu beñlatsiaj, benguidxduxhlu, najclu xi'n Satanás, bendxab ni rnibee. Rdxechñajzalu guiraa recossa'c xten Dios. ¿Guc cuääz guxhiidlu xtidxlii Jesucrist te di chalilajz bejn xtidx Jesucrist? <sup>11</sup> Naj siääd xcastiigw Dios yejclu. Xhidajl dxej sicäjy lojlu, xhetliidi fiilu —räjp Pabl.

Gujcsi räjpni si'c, bicägajc lojni. Dxejctiru cuansajni caguilni chu guiniaaz naani guluiini canejz chääni. <sup>12</sup> Che bahuii Sergio Paulo xhi gusajcni, huililajzni xtidx Dios, sa'csi bidxeloduxhni xcuent xcäl'ruluii Dios.

*Bidzujñ Pabl nájza Bernabé guedx Antioquía xten distrit Pisidia*

<sup>13</sup> Che baluux Pabl nájza resa'ni xtzuunreni guedx Pafos, biu'reni nen barcw, gudejdreni lo nisdoo, sääreni guedx Perge nen estad Panfilia. Che bidzujñreni guejdxga, gubisac Juan, ni rniireni Marcw, Jerusalén. <sup>14</sup> Dxejcti birinäj Pabl resa'ni guedx Perge, sääreni guedx Antioquía nen distrit Pisidia. Dxejc te dxe sabd, dxej ni rusilajz rexpejn Israel, biu'reni nen xquidoo rexpejn Israel, ro'c gurejreni. <sup>15</sup> Che gulujx biñ te dade' reguijtz xten Dios ni laa leii nájza reprofet, baxhañ reguxhtis xten guidoo chu huigajñreni, räjpreni lo Pabl nájza Bernabé:

—La'tu sa'nu, palga rajptu te diidx ni gulijdx rebejnre, colguiniini.

<sup>16</sup> Dxejc huisulii Pabl, guläsni naani bejnni seen lo rebejn te cuadiajgreni xtiidxni. Räjp Pabl lojreni:

—Colcuadiajg, la'tu rexpejn Israel, guiraatu ni rajñ Dios. <sup>17</sup> Galooli gule Xtios rexpejn Israel retoxtadgoldoonu. Luxh che guläjzreni nación Egipto, bidalduxh retoxtadgoldoonu. Gucñajduxh Diosreni bejnni remilagwr, te guläänireni guedx Egipto. <sup>18</sup> Tiuu ijz guläjzreni lo reyubijdz. Xhidajl huält direni nusoob xtidx Dios, niluxh empac gucnäjza Diosreni. <sup>19</sup> Guyu' gajtz nación guläjz nen reyuj ni laa Canaán. Dios bejn gunitloj reguejdxre, te gudisni reyujga loj retoxtadgoldoonu. <sup>20</sup> Dxejcti badeed Dios reniguii ni gujc juejz, gunibeereni rebejn. Tajp gayugarol ijz gunibeereni rexpejn Israel. Samuel nani gunii xtidx Dios gujc lult juejz. <sup>21</sup> Dxejcti gunab rexpejn Israel te reii lo Dios te guinibee reiiga lojreni. Badeedti Dios Saúl xi'n Cis, sa' toBenjamín. Gunibeeni tiuu ijz.

<sup>22</sup> Che badzucaj Dios Saúl, badeedni gunibee toreii David. Räj̄p Dios: “Agucbeä David xi'n Isá rujn tejsi xhigab con narä. Susoobni xtidxä sujnni guiralii ni rlazä gac.”

<sup>23</sup> Räj̄pza Pabl:

—Galooli bia'n diidx lo rexagdoo David guxhaļ Dios te bejn ni gudzucaj xtojlnu, ni guslaa nuure lo dojl. Naj aguzojb diidxga. Jesucrist najc bejn̄ga, rudzucajni xtojlnu, ruslaani nuure lo dojl. <sup>24</sup> Che gusloj cagulijdx Juan rebejn, baluiini nanabpac gusiechlajz rexpejn̄ Israel, tiobnisreni te jia xtojlneni. <sup>25</sup> Niluxh guxii riäädx guluux Juan dzuun ni badeed Dios gunni che räj̄pni lo rebejn: “¿Chu rujntu xhigab nacä narä? Dina gacä Crist nani bia'n diidx guxhaļ Dios. Colhuii, detzä siääd tej ni sacduxhru loä; nicla gac surloä te cuää xcura'chni.”

<sup>26</sup> Räj̄pza Pabl:

—Rniä lojtu sa'ä, rexagdoo toAbram, näjza lo chutis ni rajn̄ Dios, loonu baxhaļ Dios xtiidxni ni rusule' xho rudzucaj Jesucrist xtojlnu, xho ruslaani nuunu lo dojl. <sup>27</sup> Rebejn̄ Jerusalén, näjza renani rnibeereni, direni niembee Jesucrist nani rnibee, dizareni niacbee diidx xcuent Dios nani bacuaa reniguii ni gunii xtidx Dios agujc xchero, luxh rolreni xtidx Diosga gasob sabd. Niluxh che bagu'treni Jesucrist, guzobj xtidx Dios ni caj lo guijtzga. <sup>28</sup> Balijdxreni Pila't ju'tni Jesucrist, luxh xhet bejndini te guetni. <sup>29</sup> Che bagujc guiraa ni caj lo guijtz xcuent Jesucrist, gulätreni Jesucrist lo cruzj, bacua'tzrenini nen̄ baa cuä' te guilaj. <sup>30</sup> Dxejcti guläs Dios Jesucrist lo rebengut. <sup>31</sup> Balti huält baluiloj Jesucrist lo reexamigwni nani biädnajlni nez rexyuj Galilee, renani biädnajlzani nez guedx Jerusalén. Bahuilojreni gubansac Jesucrist lo rebengut, te naj rusule'reni diidx xcuent Jesucrist.

<sup>32</sup> Naj siopnänu xtidx Diosre lojtu te guibalajztu. Agujc xchero bia'n Dios diidxre con retoxtadgoldoonu. <sup>33</sup> Guläs Dios Jesucrist te huile' diidxga par nuure, rexagdooreni. Agujc xchero gunii Dios te diidx ni caj nen̄ Salmo ni bacuaa toDavid. Lo Salmo ni rojp räj̄p Dios: “Luj najclu xi'nä. Nadxej guleälu te guinibeelu.”

<sup>34</sup> Räj̄pza Pabl:

—Dxejcru stee lajt caj xcuent ni guläs Diosni lo rebengut te nuncru guetni. Scree bacuaa te niguii, räj̄p Dios: “Sunidxä recossa'c lojlu si'c ni bia'nä diidx con toDavid.”

<sup>35</sup> Ni'cni bacuaaza toDavid nen̄ stee Salmo ni gunii Dios, guniini: “Dipaclu gusaan gudx tiejxh Xi'nlu nani sanälajzlu.” <sup>36</sup> Che gulujx gunibee toDavid lo retoxtadgoldoonu, si'cni badeed Dios gunni, dxejc gujtni. Biga'tznäj̄ni retoxtadgoldooni. Niluxh guyujdx tiejxh toDavid. <sup>37</sup> Niluxh guläs Dios Jesucrist lo rebengut, ni'c di tiejxhni niujdx. <sup>38</sup> Ni'cni colyabee, la'tu resa'ä, Jesucristre, bejn̄ ni caniä xcuentni, laani rudzucajni rextojlnu. <sup>39</sup> Chutis ni rililajz xtidx Jesucrist ruslaa Jesucristni loj guiraa rextojlni nani digacdi guibicaj mascä rusoobni guiralii ni caj lo leii xten toMoisés. <sup>40</sup> Col̄susin̄ te na'c sajctu recos ni caj lo guijtz ni bacuaa te niguii nani bacuaa xtidx Dios:

<sup>41</sup> Col̄huilaa, la'tu ni ruxhiznäj xtidxä col̄guidxeloj, col̄nitloj, sa'csi naj ni nabajntu sunä te dzunro, te milagwr nez lojtu, niluxh dipac lajztu chalii, mascä jiääd chu gusule'pacni lojtu.

<sup>42</sup> Gulujxti xtidx Pabl, biunejz rebejn̄. Che birinäj Pabl Bernabé biädni rebejn̄re lojreni, räj̄preni:

—Jiädsactu ste xmaan te gusule'rutu rediidxre loonu.

<sup>43</sup> Che care'ch rebejn̄ga, xhidajl rexpejn̄ Israel, näjza xhidajl rebenzajt nani rusoob xtidx Dios si'c rujn rexpejn̄ Israel, birinajlreni Pabl näjza Bernabé. Dxejc balijdxreni rebejn̄ ni siädnajlreni, räj̄preni lojreni chanuutis chalilajzreni didxlii xcuent Jesucrist.

<sup>44</sup> Che gojl̄ti stee sabd, dxej ni rusilajz rexpejn̄ Israel, xhidalduxh rebenguejdx bire' te gcuadiajgreni guinii Pabl xtidx Dios. <sup>45</sup> Che bahuii rexpejn̄ Israel guiraa rebejn̄ ni bire', bidxechlajzreni, gucnadareni. Dxejc gusloj cadxagdijl rexpejn̄ Israel Pabl. Che rniini te diidx, laareni rniireni “didxxhiini”. Caniyazareni Pabl näjza Bernabé, caguereni lojreni.

<sup>46</sup> Luxh di Pabl niclaza Bernabé nidxejb. Gusutijptisreni, räj̄preni lo rebejn̄:

—Nungäj] ganid lojtu guiniinu xtidx Dios, sa'csi la'tu najctu rexpejn Israel. Niluxh ditu chalilajz xtidx Dios, lagajc la'tu caniitu digacdi guibannäjtü Dios par tejpas. Ni'c sibiré loonu, te guiniinu xtidx Dios lo rebenzijt ni digac xpejn Israel. <sup>47</sup> Sa'csi si'c agunibee Xtiosnu. Scree caj xtidx Dios lo guijtz:

Suxhalätu te guluiilu rextidxä lo rebenzijt ni digac xpejn Israel,  
te chalilajz rebejnnga xtidxä,  
te laareni lo xtoj]reni, cadrotis yu'reni lo guedxliuj,  
räjp Dios.

<sup>48</sup> Che biejn diajg rebenzijt rediidxre, bibalazduxhrene, gulä'preni xpala'n xtidx Dios. Renani gule Dios galooli huililajz xtidx Dios. Xhidajl najcreni. <sup>49</sup> Bire'ch xtidx Dios guideb nez reguejdxga. <sup>50</sup> Dxejc rexpejn Israel balijdx regunaa ni sajcrü, näjza reniguii ni sajcrü nen guedx Antioquía, te bidxehnäjreni Pabl näjza Bernabé, barilaagwreni Pabl näjza Bernabé te biunejzreni guedx Antioquía. <sup>51</sup> Dxejcti Pabl näjza Bernabé gubijb guxhuj ni'reni si'c te seen te gacbee rebejn xhet laadi bejnreni. Sä'tireni guedx Iconio. <sup>52</sup> Baspaa Dios lajz rexpejn Jesucrist guedx Antioquía xten Pisidia. Bazutijpza Sprit Dxa xten Dios lastooreni.

## 14

### *Guyu' Pabl näj Bernabé guedx Iconio*

<sup>1</sup> Che bidzujn Pabl näjza Bernabé guedx Iconio, biu'reni xquidoo rexpejn Israel. Basule'reni xtidx Dios lo rexpejn Israel näjza lo rebenzijt. Xhidajl rebejnnga huililajz xtidx Dios. <sup>2</sup> Niluxh sgaii rexpejn Israel nani di chalilajz xtidx Jesucrist balijdx rebenzijt te bidxehnäjreni rebejn nani huililajz xtidx Jesucrist. <sup>3</sup> Ni'cni bia'n Pabl näjza Bernabé lo guejdxga balti dxej. Gusutzu'tz guiro'preni guniireni xtidx Jesucrist. Badeed Dios bejnreni redzunro, remilagwr xcuent xcälrnibee Dios te bahuii bejn cayacnäj Diosreni. <sup>4</sup> Guyu' tiop cuaa bejn nen guejdxga. Gala' guejdxga huililajz xtidx Dios nani gunii Pabl näjza Bernabé, <sup>5</sup> dxejc sgala' guejdxga bacuadiajg xtidx rexpejn Israel. Dxejc bire' te cuaa rexpejn Israel, näjza benzijt, näjza reguxhtis, rlajzreni nidxagdij]reni reapost, rlajzarenen nucaareni guij yejc Pabl näjza Bernabé. <sup>6</sup> Dxejc gucbeerene xhi rlajzreni gunreni, ni'c baxunreni ro'c huijreni nez reguedx Licaonia, ro'c bidzujnreni guedx Listra, guedx Derbe, näjza reguejdx ni re' nejzga. <sup>7</sup> Che bidzujnreni ro'c, cadrotis huijreni basule'reni xtidx Dios.

<sup>8</sup> Guedx Listra guyu' te niguii ni digacdi sa, che gojllini racxhuu ni'ni. <sup>9</sup> Cagucua diajg niguiiga xtidx Pabl. Che bahuii Pabl lojni, gucbee Pabl rililajz niguiiga xtidx Dios, rililajzani sajc gusajc Diosni. <sup>10</sup> Dxejcti dip gunii Pabl lojni, räjpni:

—jHuisulii!

Dxejcti huisuyäl]ni, gusajni. <sup>11</sup> Che bahuii rexpejn Licaonia xhi bejn Pabl, lagajc xtiidxreni guniireni, räjpreni lo sa'reni:

—jRedios abiäd]luiloj loonu si'c niguii!

<sup>12</sup> Gulälajreni Bernabé Júpiter, si'c laa tej rextiosreni. Dxejcti Pabl gulälajreni Mercurio, si'c laa stee rextiosreni, sa'csi laani rniiruni lo guiro'preni. <sup>13</sup> Dxejcti te bixhojz xten xquidoo Júpiter cua' tiop gon najl guii guejnreni. Biäd]nani regonga ro' xquidoo Júpiter ni suga' ro' guejdxga. Rebejn näjza bixhojz rlajzreni nugu'treni regon te ganreni Bernabé näjza Pabl si'c rajnreni rextiosreni. <sup>14</sup> Che biejn diajg reapost xhi cayajc, batiä]sreni tla' xhajnreni si'c te seen direni guichag]ajz xhi cayujn rebejnnga. Ruxunreni bidzujnreni lo rebejn, räjpreni lo rebejn:

<sup>15</sup> —Co]cuadiajg xtiidxnu. ¿Xhicuent cayujn guejbtu recosre? Ni lagajc sabejntu najcnu, lagajc bejn guedxliuj najcnu. Rusule'nu xtidx Dios lojtu te lacuaa ruzuxhijbtu lo redios ni runchee bejn, guzuxhijbtu lo Gueb Dios ni nabajn par tejpas, ni benchee xhaguibaa näjza guedxliuj, näjza nisdoo, näjza guiralii ni yu' lojreni, nenreni, <sup>16</sup> Galoo basaan Diosga gun reben guedxliuj si'ctis ni rlajzreni. <sup>17</sup> Huen najc Dios, rudeedni nisguij,



rudeedni rajc xhi rajw rebejn, rdxaj xque'reni, rbaa lajzreni. Ni'cni riembeepacnu yu' Dios.

<sup>18</sup> Xhidajl diidx guniireni te chäii bejnreni gaan guredxi rebejn, sa'csi rlaizpac rebejn nugu'treni regon.

<sup>19</sup> Dxejcti bidzujn gaii xpejn Israel siäädreni guedx Antioquía nájza guedx Iconio. Baquuilreni reben Litra te gucuaareni guij yejc Pabl. Bacuaareni guij yejc Pabl, gudobxhaxhrenini guläärenini ro' guejdxga, sa'csi naareni agujtni. <sup>20</sup> Dxejc laḷ ni suga' rexpejn Jesucrist guideb gabi cadro naga' Pabl, huistieni, biusacni guejdxga. Che bara yääl, huiñani Bernabé sääreni guedx Derbe.

<sup>21</sup> Che bidzujnreni guejdxga, basule'reni rextidx Dios lo rebejnnga. Xhidajlreni huililajz xtidx Dios. Dxejc gubi'reni, biu'reni guedx Litra, nájza guedx Iconio, nájza guedx Antioquía. <sup>22</sup> Balijdxreni rebejn nani huililajz xtidx Dios, gucnäjnreni rebejnnga te batiplajz rebejnnga, räjpreni lo rexpejn Jesucrist:

—Colsnaj lajztu xtidx Dios. Susacsí rebejn la'tu, sidejdtu trabajw te jiu'tu cadro rnibee Dios.

<sup>23</sup> Dxejcti gule reapost gaii dade' ni najc bengool te fiireni rexquidoo xpejn Jesucrist. Che gulujx bacua'nreni, laḷ ni guredx-gunabreni lo Dios, basadiidxreni rebejn, räjpreni: “Gacnäj Jesucrist la'tu ni huililajz xtiidxni.”

#### *Gubisac guiro'preni guedx Antioquía xten Siria*

<sup>24</sup> Che gudejd Pabl nájza Bernabé distrit Pisidia, bidzujnreni estad Panfilia.

<sup>25</sup> Basule'reni xtidx Dios lo reben Perge, dxejcti biriireni ro'c sääreni guedx Atalia.

<sup>26</sup> Che bidzujnreni guejdxga, biu'reni nen barcw, gudejdreni lo nisdoo te bidzujnreni stee guejdx ni laaza Antioquía. Ni'c najc guejdx ni biriireni che sääreni. Lo guejdxre yu' rexpejn Jesucrist ni gunab lo Dios xcuentreni, gacnäj Diosreni, baxhaḷreni Pabl nájza Bernabé chasule'reni xtidx Dios nen guiraa reguejdx. Naj abaluux Pabl nájza Bernabé dzuunga. <sup>27</sup> Che bidzujnreni guejdxga, bachagsa' rexpejn Jesucrist. Dxejcti bijreni diidx lo rebejnnga guira'ti ni bennäj Dios laareni, nájza xho badeed Dios huililajz rebenzijt nani digac rexpen Israel. <sup>28</sup> Xchej biannäjreni rexpejn Jesucrist ro'c.

## 15

#### *Bidxagsa'zarenin nen guedx Jerusalén*

<sup>1</sup> Nen redxejga bidzujn gaii dade' ni siääd nez Judea, caguluiireni rexpejn Jesucrist, räjpreni lojnreni:

—Palga ditu gusaḷ bee si'c gunibee toMoisés, di Dios gusaḷaatu lo xtojltu.

<sup>2</sup> Che biejn diajg Pabl nájza Bernabé rediidxga, bidxagdijlreni redade'ga. Dxejc gule rexpejn Jesucrist Pabl nájza Bernabé nájza sgaii rexpejn Jesucrist chääreni guedx Jerusalén te guininäjreni reapost nájza rebengool te guidon xho gac xcuent beega.

<sup>3</sup> Huisunejz rexpejn Jesucrist ni najc ben Antioquía Pabl nájza rebejn ni sanäjreni, sääreni guedx Jerusalén. Gudejdreni reguedx Fenicia, nájza reguedx Samaria. Cadrotis gudejdreni bijreni diidx lo rexpejn Jesucrist ahuililajz rebenzijt xtidx Dios. Bibalazduxh rexpejn Jesucrist che biejn diajgreni rediidxga.

<sup>4</sup> Che bidzujnreni guedx Jerusalén, huichagloj rexpejn Jesucristreni. Dxejcti bij Pabl nájza Bernabé diidx lo reapost, lo rebengool nani rnibee rexpejn Jesucrist, nájza lo rexpejn Jesucrist, guiraa redzunro nani cayunnäj Diosreni. <sup>5</sup> Dxejc huisulii gaii refarisee ni ahuililajz xtidx Dios, räjpreni lojnreni:

—Che chalilajz rebenzijt xtidx Dios, nanab churenin bee, nanabza gusoobreni leii xten toMoisés.

<sup>6</sup> Dxejcti bachagsa' reapost nájza rebengool nani rnibee rexpejn Jesucrist, te don xho gunreni. <sup>7</sup> Huisulii Pedr, räjpni lojnreni:

—Guejbtu, resa'ä, anajntu xho bejn Dios gubalti ijz. Gule Dios narä lo guiraanu te gusule'ä xtidx Dios lojn rebenzijt, te chalilajzreni xtidx Dios. <sup>8</sup> Luxh Dios, nani numbechee lastoo giralii bejn, badeed seen huililajzpac rebenzijt xtiidxni. Badeed Dios Sprit



Dxan xtenni lojreni si'c te seen te gacbee bejn najczeni xpejn. Sigac baniidxni Sprit Dxan xtenni loonu galoo, si'cza badeednini lo rebenzajt. <sup>9</sup> Sigajc rinälajz Dios nuunu, sigajcza rinälajzni rebenzajt. Che huililajz rebenzajt xtiidxni, basia Dios lastooreni. <sup>10</sup> Naj ¿xhicuent rusieedtu Dios, ä? Di niajcdi nisianäj retoxtadnu releiiga, digacdiza chosanäjnu releiiga naj. ¿Xhicuent rlaiztu chasanäj rebenzajt releiiga? <sup>11</sup> Xhet si'cti gacni sa'csi Dios ruslaa nuure lo xtojlnu che rililajznu xtidx Jesucrist, luxh si'cza ruslaani rebenzajt lo dojl che rililajzreni xtidx Jesucrist —räjp Pedr.

<sup>12</sup> Che gulujx gunii Pedr, dxitis gurej rebejn, bacuadijgreni xtidx Bernabé, xtidx Pabl. Guiro'preni bijreni diidx xho cayujn Dios redzunro, remilagwr nez lo rebenzajt.

<sup>13</sup> Che gulujx gunii guiro'preni, xhet guniidi rebejn. Jacoobtis räjp lojreni:

—Sa'ä, colcuadijg xtidxä. <sup>14</sup> Agunii Simón ni rniireni Pedr lojtu xho ganiddoo baxhal Dios laani lo rebenzajt te gurejdx Dios rexpejn ni nadxaag lo rebenzajt. <sup>15</sup> Luxh si'cza caj lo guijt. Agujc xcheroduxh bacuaa reniguii nani gunii xtidx Dios, che räjpni:

<sup>16</sup> Sidzujn dxej ni guibisacä.

Sunä guzuxhijb guiraa rebejn nez loä si'c bazuxhijb rexpejn Israel che gubajn toDavid. Si'c gunä,

<sup>17</sup> te jädgajn rebejn narä te gacä Xtiosreni,

näjza guiraa rebenzajt nani najc rexpenä jädgajn narä,

<sup>18</sup> si'c räjp Dios nani galooli baluiloj guiraa redzuunre.

<sup>19</sup> Dxejcti räjp Jacoob lojreni:

—Dee najc xhigab ni runä. Na'cru gusieednu rebenzajt ni cagusiechljazreni, renani salilajz xtidx Dios. <sup>20</sup> Gucuaanu te guijt, jie'tznu lo rebenzajt: Na'c gaureni xhi cos ni basuj bejn loj rebanäjb, sa'csi dinu chalilajz xcuent rebanäjb. Na'cza guesnäjreni bejn ni di gac chäälni, na'cza gaureni bääl nani gurerejn, na'cza gaureni rejn. <sup>21</sup> Dee gucuaanu te di guche'chreni xpejn Israel sa'csi nen guiraa reguejdx galooli yu' rexpejn Israel nani rol leii xten toMoisés gasob sabd —räjp Jacoob.

<sup>22</sup> Che biejn diajg reapost näjza rebengool nani rnibee, näjza guiraa rexpejn Jesucrist xtidx Jacoob, bichagljazreni xtiidxni. Dxejcti gulereni tiop sa'reni chanä Pabl näjza Bernabé guedx Antioquía. Gulereni Judas ni rniireni Barsabás näjza Silas. Guiro'preni najc bejn ni sajcro loj rexpejn Jesucrist. <sup>23</sup> Dxejcti bejnreni guijt huinäreni. Bacuaareni rediidxre:

“Nuure reapost, näjza rebengool ni rnibee, näjza rexpejn xquidoo Jesucrist ruxhalnu xtixtios lojtu, resa'nu nani rbäz guedx Antioquía näjza estad Siria näjza estad Cilicia. <sup>24</sup> Rucuaanu guijtze sa'csi biejn diaagnu birii gaii resa'nu ree biädsieedreni la'tu con xtiidxreni, cayu'tu yärsia' sa'csi najreni lojtu nanab chutu bee si'c gunibee toMoisés, guibajnzatu si'c rni leii xten toMoisés. Xhet nuudinu gunibeenu jädniireni si'c. <sup>25</sup> Ni'cni biennu xhigab guxhalnu lojtu tiop dade' ni gulenu loj resa'nu te chanäreni Bernabé näjza Pabl, nani sanälaaznu. <sup>26</sup> Agajc balti huält rlaizreni nugu'treni Bernabé näjza Pabl, luxh direni guidxejb gusule'reni xtidx Jesucrist. <sup>27</sup> Naj ruxhalnu Judas näjza Silas lojtu. Laareni susule'za guiraa rediidxre lojtu. <sup>28</sup> Tejsi najc xhigabnu con Sprit Dxan xten Dios. Di rlaaznu gutaalrunu leii ni chasanäjtu. Releiitis nani nanab rusoobnu rucuaanu lojtu. <sup>29</sup> Na'c gautu xhicos ni basuj bejn lo rebanäjb, sa'csi dirunu chalilaaz xcuent rebanäjb. Na'cru gautu rejn, na'cza gautu bääl nani gurerejn, na'cza guesnäjtu nani digac chäältu. Palga gusoobtu recosre, laaca cayujntu. Sacru guibajntu. Sujiannäjtu Dios.”

<sup>30</sup> Dxejcti basadiidx rexpejn Jesucrist Judas näjza Silas huinäreni Pabl näjza Bernabé guedx Antioquía. Che bidzujreni ro'c batojpreni guiraa rebejn nani huililajz xtidx Dios te bilreni guijtza lojreni. <sup>31</sup> Che biejn diajg rexpenzaj Jesucrist diidx ni caj lo guijtza, bibalazduxhreni sa'csi gulecdxi diidxga lastooreni. <sup>32</sup> Dxejcti basule' Judas näjza Silas xtidx Dios lojreni, sa'csi rudeed Dios xtiidxni loj guiro'preni. Xhidajl diidx guniireni te balijdxreni rexpejn Jesucrist. Lacti gulecdxi rediidx ni guniireni lastoo guiraa rexpejn Jesucrist. <sup>33</sup> Ro'c bia'nreni xchej, dxejcro cuäjb rexpejn Jesucrist gubi'reni te gudeedreni xtixtios loj reni baxhalreni.

<sup>34</sup> Dxejc Silas bejn xhigab jia'nni ro'c. <sup>35</sup> Luxh Pabl nájza Bernabé bia'n guedx Antioquía. Guiro'preni baluui, basule'reni xtidx Dios loj rebejn. Guyu'za sgaii dade' ni gucnäjreni.

*Huihuisac Pabl rexpejn* Jesucrist nen guiraa reguejdx

<sup>36</sup> Che gudejd xhidajl dxej, räjp Pabl lo Bernabé:

—Do'o guibi' lo guiraa reguejdx cadro basule'nu rextidx Dios te chohuiinu don xho yu' rexpejn Jesucrist.

<sup>37</sup> Niluxh Bernabé rlajz chanäreni Juan ni laa Marcw. <sup>38</sup> Naaddi Pabl chääni, sa'csi birii Marcw lojreni che guyu'reni nez Panfilia, diruni nisianäj Pabl nájza Bernabé. <sup>39</sup> Dxejc gudildiidxreni. Gubicajtireni lo sa'reni. Ni'c sanä Bernabé Marcw, biu'reni nen barcw, sääreni Chipre ni re' galäi nisdoo. <sup>40</sup> Dxejcti Pabl gule Silas te sanänini. Badeed rexpejn Jesucrist xtxtios lojreni, räjpreni gacnäj Diosreni. <sup>41</sup> Laḷ ni sasajreni gudejdreni guiraa reguedx Siria nájza guiraa reguedx Cilicia, ro'c gucnäjreni guiraa rexpejn Jesucrist, basule'ruren xtidx Jesucrist lojreni.

## 16

*Huinä Timoteu Pabl náj Silas*

<sup>1</sup> Bidzunsac Pabl nájza Silas reguedx Derbe nájza Listra. Ro'c bidxaagreni te xpen Jesucrist ni laa Timoteu. Xnanni najc beḅ Israel ni huililajz xtidx Jesucrist. Xtadni najc beḅ griegw. <sup>2</sup> Didxsa'ctis rnii rexpen Jesucrist ni yu' Listra nájza Iconio xcuent Timoteu. <sup>3</sup> Rlajz Pabl chanäni Timoteu. Dxejcti basäl Pabl bee Timoteu te gujcni si'c xpen Israel, te xhet naadi rexpejn Israel, sa'csi guiraareni nanchee xtad Timoteu najc beḅ griegw. <sup>4</sup> Che bidzujḅreni cade tej reguejdx, basule'reni xtidx reapost nájza rebengool nani rnibee xpen Jesucrist guedx Jeurusalén, te gusoob rexpejn Jesucrist diidx ni bacuaareni lo guijtz. <sup>5</sup> Bazutijp xtidx Dios lastoo renani huililajz xtidx Jesucrist. Guixe-guixee xhidajlru bejn huililajz xtidx Dios xcuent Jesucrist.

*Lo te bacal* gunii te niguii lo Pabl

<sup>6</sup> Che gudejdreni distrit Frigia, nájza estad Galacia, di Sprit Dxan xten Dios nusaan nusule'reni xtidx Jesucrist nen reguedx Asia. <sup>7</sup> Bidzujḅtiren gajxh estad Misia. Dxejc rlajzreni nijreni estad Bitinia, niluxh di Sprit Dxan xten Dios nusaan nijreni ro'c. <sup>8</sup> Ni'c gudejdtiren stelaad estad Misia, bidzujḅreni guedx Troas. <sup>9</sup> Te yääl si'c lo te bacal bahuii Pabl suga' te beḅ Macedonia. Canabduxh niguiiga lo Pabl, räjpni:

—Gudaa ladxä, estad Macedonia, te gacnäjlḅ nuunu.

<sup>10</sup> Che bara yääl ni gunixcal Pabl, gudilgajcnu te barcw te chonnu estad Macedonia, sa'csi gucbeenu Dios najc nani caguxhaḷ nuure te guluiini xtiidxni lo reben Macedonia. Narä, Lucas, ni cagucuaä rediidxre, gusanää Pabl nájza Silas.

*Che guyu' Pabl con Silas guedx Filipos*

<sup>11</sup> Biu'tinu nen barcw ro' guedx Troas. Bidzunnu Samotracia, te yuj ni re' nen nisdoo. Che bara yääl bidzunnu guedx Neápolis. Ro'c biriinu nen barcw, <sup>12</sup> bionnu guedx Filipos, guejdx nani sajru lo estad Macedonia. Guedx romanni. Ro'c bia'nnu tiop choḅ dxej. <sup>13</sup> Che gojl sabd, dxej ni rusilajz rexpejn Israel, biriinu guejdxga bionnu ro' te gueuu, sa'csi biennu xhigab ro'c jiääd rexpejn Israel te guininäjreni Dios. Ro'c gurejnu, guniinu lo renane' nani bire' ro'c. <sup>14</sup> Lojreni nadxaag te nane' ni laa Lidia, te benzijḅ ni digac xpejn Israel. Guedx Tiatira siäädni. Ruto'ni ladmuraad ni sacduxh. Rajḅ gunaaga Dios si'c rajḅ rexpejn Israelni. Bacuadiajgni xtidx Jesucrist ni cagusule' Pabl. Gucnäj Dios nane'ga te huililajz xtiidxni. <sup>15</sup> Birobnisni, nájza guiraa reni rbäjz rolizni. Dxejc guniini loonu:

—Palga ruhuiitu guliä rililazä xtidx Dios, colḅtaa rolizä te ro'c cuäätzu.

Lacti gunab nane'ga nuunu, ni'c huijia'nnu rolizni.

<sup>16</sup> Te dxej cheni sionnu cadro rniäj bejn Dios, bidxaagnu te dxa'p nani yu' te beḅdxab nen lastooni. Rajp rexpaxhuaanni melduxh sa'csi rusule' dxa'pga recos ni gajd gac.

<sup>17</sup> Birinajl dxa'pga Pabl nájza nuure. Rbedxa' dxape'ga, räjpni:

—Reniguiire najc xmos Dios nani rnibee guideb guedxliuj. Ruluiireni loonu xho laanu lo xtojlnu —räjp dxape're.

<sup>18</sup> Balti dxej birinajl dxape'ga nuure, entis caniini rediidxga lo rebejn. Lacti basieed dxape'ga Pabl, ni'c gubiréni, räjpni lo bendxab ni yu' nen lastoo dxape'ga:

—Xcuent xcälrnibee Jesucrist rniä lojlu: “Birii nen lastoo dxape'ga.”

Lagajc dxejc birii bendxab nen lastoo dxape'ga.

<sup>19</sup> Che bahuii rexpaxhuaan dxape'ga diru dxape'ga gun gaan melro, gunaazreni Pabl näjza Silas. Dxejcti gudobxhajxhreni guiro'preni nez roguii cadro suga' reguxhtis. <sup>20</sup> Che bidzunnäjreni Pabl näjza Silas lo reguxhtis, räjp rexpaxhuaanni lo reguxhtis:

—Reniguiire najc xpejn Israel. Cayujnreni biey lo guejdxre. <sup>21</sup> Caguluiireni garenca leii nani digacdi gusoobnu sa'csi najcnu ben roman.

<sup>22</sup> Dxejcti bidxechnäj rebejn Pabl näjza Silas. Gunibee rejuejz gulääreni xhajn Pabl, näjza xhajn Silas, te batiäjlnreni baar guideb tiejxh guiro'preni. <sup>23</sup> Che gulujx gudin-duxhreni Pabl näjza Silas, biäurenin nen latzguiib. Dxejcti räjp reguxhtis lo reguixhajg:

—Colgapdzu'tzreni, di gusaantu guiriireni.

<sup>24</sup> Basäl guixhajgreni nen latzguiib. Guyu' ni'reni nen te baräjd ni sojb gueed te di guxunreni.

<sup>25</sup> Garolyääl guninäj Pabl näjza Silas Dios, gusloj cayolreni dij ni rliä'p xpala'n Dios. Biejn diajg guiraa rebejn ni yu' nen latzguiib cayolreni. <sup>26</sup> Chela gujc te xuduxh, basniib guideb latzguiibga. Bixal guiraa repuert, birucya' guiraa recaden, bixal ro' rebaräjd cadro naaz ni'reni. <sup>27</sup> Che gubajn guixhajg ni canäj latzguiib, bahuiini naxhal latzguiib, gulääni spaad xtenni, te rlajzni nugu'tni lagajc laani, sa'csi naani abadxun reni niäu nen latzguiib. <sup>28</sup> Dxejc guredxa' Pabl, räjpni lo guixhajgga:

—Na'c gunlu si'c. Bahuii, guiraliinu suga'nu ree.

<sup>29</sup> Dxejc gunibee guixhajg biäd te bajl te biu'ni nen latzguiib. Racsejsni biädni bazuxhijbni nez loj Pabl näjza nez loj Silas. <sup>30</sup> Dxejcti gulää guixhajgreni nen latzguiib. Gunabdiidxni räjpni lojreni:

—¡Colguinii, dade! ¿Xhini'c nanab gunä te guslaa Dios narä lo dojl?

<sup>31</sup> Räjp Pabl näjza Silas lo guixhajg:

—Huüililajztis xtidx Dios xcuent Jesucrist, luj näjza guiraa reni yu' rolijzlu, te guslaa Diostu lo dojl.

<sup>32</sup> Basule' Pabl näjza Silas rextidx Dios lojni näjza loj guiraa rebejn ni yu' rolijzni. <sup>33</sup> Lagajc dxejc, garol yääl, huinä guixhajgreni gudiibni dejtzen cadro batiuug baarreni. Dxejcti batiobnisreni guixhajg näjza guiraa reni yu' rolijzni. <sup>34</sup> Dxejc huinä guixhajgreni rolijzni, ro'c badeedni xhi gudajwreni. Laani näjza guiraa reni yu' rolijzni bibalaz-duxhreni sa'csi huililajzreni xtidx Dios.

<sup>35</sup> Che bara yääl, baxhal reguxhtis stiop guixhajg räjpni lo guixhajg nani cuanäj latzguiib:

—Baslaa reniguiiga.

<sup>36</sup> Dxejcti huiye'tz guixhajgga lo Pabl, räjpni:

—Anaj reguxhtis guslaātu. Naj colchäj, gacnäj Dios la'tu, saru chäātu.

<sup>37</sup> Niluxh räjp Pabl loj reguixhajg:

—Nuure najczanu ben roman. Batiäjlnreni baar detznu nez loj guiraa rebejn. Nicla niniabdiidxreni la yu' xhi dojl biennu. Basäurenin nuure nen latzguiib. Leii xten roman di gusaan gac reben roman si'c. Luxh naj rlajzreni guslaarenin nuure xhiga'tz. ¡Dinu guirii si'c! Lagajc laarenin sujiädsläärenin nuunu.

<sup>38</sup> Che huiye'tz reguixhajg diidxga lo reguxhtis, bidxebduxhreni che biejn diajgreni ben roman najc Pabl näjza Silas. <sup>39</sup> Dxejcti biäd reguxhtis, gulääreni Pabl näjza Silas, gunabreni jäjllajzreni. Gunabduxhreni lo Pabl näjza Silas; räjpreni:

—Coljiunejz guejdxre.

<sup>40</sup> Che biriireni nen latzguiib, huijreni rolijz Lidia. Balijdxreni rexpejn Jesucrist, gulecdxirenin lajz rexpejn Jesucrist. Dxejc biunejzreni guejdxga.

## 17

*Cadxecheduxh guiraa reben* Tesalónica

<sup>1</sup> Che gudejdreni reguedx Anfípolis, nájza guedx Apolonia, bidzujñreni guedx Tesalónica cadre yu' te xquidoo rexpejn Israel. <sup>2</sup> Ro'c basule' Pabl xtidx Dios si'c ni rujnpacni. Choñ sabd, dxej ni rusilajz rexpejn Israel, basule' ni xtidx Dios lojreni. <sup>3</sup> Basule' Pabl xtidx Dios ni caj lo guijtzt ni bacuaa reniguii ni gunii xtidx Dios galooli. Caj lo guijtztga: “Nanab ted Crist trabajwduxh, guetni, niluxh sibansacni lo rebengut.”

Dxejc räjp Pabl lojreni:

—Ruiä lojtu diidx xcuent Jesús; lagajc Jesúsre najc Crist —räjpni.

<sup>4</sup> Yu' rexpejn Israel huililajz xtidx Dios, gusanäjreni Pabl nájza Silas. Nájza xhidalduxh ben griegw nani rajñ Dios nájza xhidajl reguna griegw ni saj cru huililajz xtiidxni. <sup>5</sup> Luxh yu' rexpejn Israel ni di chalilajz, ni bidxechlajz. Batie'reni gaii benploj, benlatsiaj, bejnreni bieje nez galäii. Biu'reni rolijz Jasón caguuilreni Pabl nájza Silas te cuääreni guiro'preni nez lo rebejn. <sup>6</sup> Niluxh che direni nidxäl Pabl nájza Silas, alga Jasón gulääreni nájza gaii renani rililajz xtidx Dios, sanääreni redee lo reguxhtis, cabedxa'reni:

—Reniguiire ni abejn bieiduxh guideb guedxliuj abidzujñreni laadxnu, <sup>7</sup> luxh badeed Jasón rolijzni jia'nreni. Direni gusoob leii xten César, najreni yu' stee reii ni laa Jesús.

<sup>8</sup> Che biejn diajg reguxhtis nájza rebejn diidxre, guyu'reni yärsia'. <sup>9</sup> Cua' reguxhtis meel lo Jasón nájza lo reexamigwni. Räjp reguxhtis sudedsacreni meelga che jii Pabl nájza Silas, jiunejzreni lo guejdxga. Dxejcti baslaareni Jasón nájza reexamigwni.

*Che guyu' Pabl con Silas guedx Berea*

<sup>10</sup> Che biu' guxhijñ, baxhalgajc rexpejn Jesucrist Pabl nájza Silas ste guejdx ni laa Berea. Che bidzujñreni guejdxga, biugajczeni xquidoo rexpejn Israel. <sup>11</sup> Hueenru najc reben Berea loj reben Tesalónica, sa'csi rbaali lajzreni bacuadiajgzeni xtidx Pabl ni guniini xcuent Jesucrist. Guixe-guixee bilreni guijtzt cadre caj xtidx Dios te gucbeereni la guli rextidx Pabl. <sup>12</sup> Xhidajl rexpejn Israel nájza xhidajl ben griegw ni saj cru, gunaa sigajc niguii, huililajz xtidx Dios. <sup>13</sup> Che gucbee rexpejn Israel ni rbäjz guedx Tesalónica cagului Pabl xtidx Dios guedx Berea, biäädreni guedx Berea. Che bidzujñreni lo guejdxga bejnreni bieje ro'c. <sup>14</sup> Dxejcti baxhal rexpejn Jesucrist Pabl, huijni ro' nisdoo. Niluxh Silas nájza Timoteu bia'n guedx Berea. <sup>15</sup> Dxejcti rebejn ni guzanäj Pabl huinänini guedx Atenas. Ro'c räjp Pabl lo rebejn ni biädnäni gudeedreni diidx lo Silas nájza Timoteu jädgajczeni lojni. Dxejcti rebejn ni sanä Pabl gubisac guedx Berea.

*Guyu' Pabl guedx Atenas*

<sup>16</sup> Lal ni guläjz Pabl guedx Atenas, guyuduxhni yärsia' sa'csi bahuiini rajñ guiraa rebejn rebanäjb nani runchee lagajc bejn. <sup>17</sup> Ni'c nen xquidooreni gudildiidx Pabl rexpejn Israel nájza rebenzajt ni rajñ Dios si'c rajñ rexpejn Israelni. Guixe-guixee gudildiidxni chutis bejn ni re' lo guii. <sup>18</sup> Dxejcti biääd gaii bejn lojni. Yu' reni rolduxh guijtzt ni bacuaa epicúreos, yu'za renani rolduxh guijtzt ni bacuaa estoicos, gudildiidxreni Pabl. Yu' reni räjp lo sa'reni:

—¿Xhicha guinii bejnre loonu? Entis naxhal ro'ni.

Yu'zarenı räjp lo sa'reni:

—Pet calä'pni xpala'n tiop dioscoob.

Si'c guniireni sa'csi biejn diajgzeni bazä't Pabl “Jesús” nájza “Resurreccion”, ni säloj yälgubansac lo rebengut. <sup>19</sup> Dxejcti gunaazreni Pabl sanärenini nez dajn ni laa Areópago. Ro'c yu' si'c te jusgaad. Räjpreni lo Pabl:

—Rlaaznu gacbeenu xhi diidx ruluiilu, <sup>20</sup> sa'csi rujylu diidx nani dinu jiacbee. Ni'cni bejn huen, basule' diidxre loonu te gacbeenu xhi sälojreni —räjpreni.

<sup>21</sup> Reben Atenas nájza rebenzajt ni yu' ro'c rutedreni redxej rniireni didxcoob lo sa'reni, o rucudiajgzeni didxcoob. Ni'cpac rchagljazreni.

<sup>22</sup> Galäii Areópago huisulii Pabl, räjpni lojreni:

—Colcuadiajg guejbtu, beñ Atenas. Abahuiä xho ran̄duxhtu xhidajl banäjb. <sup>23</sup> Che siädsaa' lo guejdxre, bahuiä lo rexpanäjbtu. Bahuiäza loj te piään cadro caj rediidxre: “Dios ni dinu jiembee.” Narä ranä Diosga. Rumbleä Diosga nani rajntu mase ditu gumbeeni. Susule'ä xtiidxni lojtu.

<sup>24</sup> Räj pabl:

—Diosre benchee guedxliuj näjza guiralii ni yu' lo guedxliuj, sa'csi rnibeeni xhaguibaa näjza guedxliuj. Di Diosre cuääz lo piään niclaza nen̄ reguidoo ni runchee bejn. <sup>25</sup> Diza Diosre guiquiin chu gacnäjni sa'csi lagajc Diosre rudeed yäl̄nabajn, yäl̄nadaan, näjza guiralii nani rquiin reben̄ guedxliuj.

<sup>26</sup> Räj pabl:

—Guiralii reben̄ guedxliuj najc rexagdoos tejsi gunaa näjza tejsi niguii. Desde galooli gunibee Diosga bal ijz chu renacion, näjza cati gunibee renacionga. <sup>27</sup> Benchee Dios guiraa reben̄ guedxliuj te quuilreni Dios te chalilajzreni xtiidxni. Luxh suga' Dios gajxh cadetejnu, <sup>28</sup> sa'csi Dios rujn nabajnnu lo guedxliuj, runiidxni rsiaanuu lo guedxliuj, runiidxzani rdajlr̄u xcäl̄nabannu lo guedxliuj. Laaca bacuaa rexpennajntu: “Najcnu xi'n Dios, sa'csi benchee Diosnu.” <sup>29</sup> Ni'cni, sa'csi najcnu xi'n Dios, di nungäj̄l̄ jiennu xhigab najc Dios si'c rebanäjb ni nac-chee pla't, o guij, o yajg si'ctis ni runchee bejn rexpanäjbtu. <sup>30</sup> Nen̄ redxer̄ ni di bejn̄ niembee Dios, diza Dios niujn castiigwreni. Niluxh naj̄ gunibee Dios gusiechljaz̄ guiraa rebejn, <sup>31</sup> sa'csi abasoobni te dxer̄ cheni gac Jesús juejz lo guiraa reben̄ guedxliuj. Agule Diosni gacni juejz, sa'csi rumbechee Jesucrist chu najc benguijdx, chuza najc bensa'c. Rnili Jesucrist rediidx ni najc guliitis. Guläs Dios Jesucrist, baspansacnini lo rebengut, te gacbeenu rajp Jesucrist yäl̄rnibee lo guiraa recos.

<sup>32</sup> Che biejn diajg rebejn̄ga gubansac Jesucrist lo rebengut yu' reni baxhiznäj̄ xtiidxni. Yu'za reni räj p:

—Sucuadiajgrunu xcuent ni rusule'lu.

<sup>33</sup> Dxejcti birii Pabl lojreni. <sup>34</sup> Yu'za reni huinajl̄ni, huililajzreni xtidx Dios. Lojreni nadxaag te dade' ni laa Dionisio ni najc te juejz lo Areópago; näjza te nane' ni laa Dámaris. Guyu'za sgaii bejn̄ ni huililajz.

## 18

### *Guyu' Pabl guedx Corinto*

<sup>1</sup> Biriiti Pabl guedx Atenas, huijni guedx Corinto. <sup>2</sup> Ro'c bidxaagni te dade' ni najc beñ Israel, ni laani Aquila. Ponto najc lajdxni. Biädgajni ro'c, biriini Roma, sa'csi gunibee reii Claudio guirii guiraa rexpejn̄ Israel guedx Roma. Birinäj̄ Aquila Priscila chääl̄ni. Biriireni Italia, biädreni guedx Corinto. Bihuii Pablreni, <sup>3</sup> sa'csi lagajc dzuun ni rujnreni rujnzani. Tejsi lajt guläjzreni te bejn̄ jionreni tejsi dzuun. Runcheereni yuguijd. <sup>4</sup> Gasob sabd, dxer̄ ni rusilajz rexpejn̄ Israel, basule' Pabl xtidx Dios nen̄ xquidoo rexpejn̄ Israel. Rlajzni chalilajz rexpejn̄ Israel näjza beñ griegw ni digac xpejn̄ Israel diidx ni rniini xcuent Jesucrist.

<sup>5</sup> Dxejcti birii Silas näjza Timoteu Macedonia. Che bidzujn̄reni guedx Corinto, gusloj rusule'tis Pabl xtidx Dios guixe-guixee, guniliini lo rexpejn̄ Israel:

—Jesús najc Crist ni runloj rexpejntu guxhal̄ Dios.

<sup>6</sup> Dxejcti bidxehnäj̄ rexpejn̄ Israelni, guniyazreni xtiidxni. Dxejcti gubijb Pabl xhajn̄ni si'c te seen diruni jiureni, caguro'nnireni. Räj pzani lo rexpejn̄ Israel:

—Lagajc la'tu rajptu dojl̄ nittu lo Dios. Xhet dojldi rapä narä. Aguniä xtidx Jesucrist lojtu. Naj lo rebejn̄ nani di gac beñ Israel gusule'ä xtidx Jesucrist —räj pni.

<sup>7</sup> Dxejcti biriini lojreni, huijni roliz Justo, te bejn̄ ni rajn̄ Dios si'c rajn̄ rexpejn̄ Israelni. Rolizni sojb cuä' xquidoo rexpejn̄ Israel. <sup>8</sup> Crisp, ni rnibee xquidoo Israel, huililajz xtidx Jesucrist. Huililajzza guiraa reni rbäjz rolizni. Xhidajlza beñ Corinto huililajz xtidx Jesucrist, dxejcti birobnisreni. <sup>9</sup> Gojl̄ te yääl̄ gunii Dios lo te bacal̄, räj pni lo Pabl:

—Na'c guidxer̄blu. Guniitis, na'c gusäulu ro'lu, <sup>10</sup> sa'csi narä suganää luj. Rut gacdi gun latsiajlu. Aguleä xhidalduxh bejn̄ lo guejdxre te gacreni xpenä —räj p Dios.



<sup>11</sup> Ni'c bia'n Pabl ro'c tebizgarol. Baluiini xtidx Dios lojreni.

<sup>12</sup> Che gujc Galíon gubernadoor xten Acaya, tejsi xhigab bejn rexpejn Israel bidojpreni te gunaazreni Pabl. Sanäreni Pabl jusgaad cadro yu' Galíon. <sup>13</sup> Räjpreni lo Galíon:

—Niguiire caguluii rebejn ganreni Dios garenca mood, xhet si'cti ni caj lo xleiuu —räjpreni.

<sup>14</sup> Agojl ninii Pabl, che räjp Galíon lo rexpejn Israel:

—Palga gulanni o bagu'tni te bejn, dxejc yu' xtojlni te gucuadiagä xtiidxtu. <sup>15</sup> Per la'tu cadxe'chtu xcuent diidx, xcuent laj bejn, xcuent ni caj lo leii xtentu. Gubernadoor narä, xho gucuadiagä diidxga. Lagajc la'tu colchahuii xho guntu yälguxhtis —räjp Galíon.

<sup>16</sup> Gunibee Galíon barilaagw resoldaad rexpejn Israel. <sup>17</sup> Dxejc gunaaz reGriegw Sóstenes nani rnibee xquidoo rexpejn Israel. Batiäjlni baar dejtz Sóstenes nez ro' jusgaad xten Galíon. Niluxh nicla niu Galíonreni.

*Chon* huält huihuii Pabl rexpejn Jesucrist

<sup>18</sup> Bia'nti Pabl Corinto xchej. Dxejc badeed Pabl xtixtios lo rebejn nani huililaz xtidx Jesucrist, biriini ro'c. Sanäni Priscila näjza Aquila, biu'reni neñ barcw te siireni nez estad Siria. Dxejc ganid gudejdreni guedx Cencrea, cadro bahuaj Pabl yejcni si'c te seen yu' xhi diidx bia'nni con Dios. <sup>19</sup> Che bidzujnreni guedx Éfeso, basa'n Pabl Priscila näjza Aquila ro'c. Biu' Pabl xquidoo rexpejn Israel, ro'c bachaagni diidx con rexpejn Israel. <sup>20</sup> Dxejcti che gunabreni jia'n Pabl ro'c xchej, naaddini jia'nni. <sup>21</sup> Badeedni xtixtios, räjpnii lojreni: —Nungäjlpac chatedä laniro guedx Jerusalén. Siälsacä ree palga gusaan Dios jiälä.

Biusacni neñ barcw, biriini guedx Éfeso. <sup>22</sup> Che bidzujnni guedx Cesarea, biriini neñ barcw, huijni guedx Jerusalén. Che bidzujnni, guniini xchan lo reapost näjza lo rexpejn Jesucrist. Dxejc huijni guedx Antioquia xten Siria. <sup>23</sup> Che gudejd balti dxej, biriini guejdxga, gudejdnii guideb estad Galacia näjza guideb distrit Frigia. Neñ cade tej reguejdxga, balijdxni rexpejn Jesucrist te gutijpru lajzreni.

*Baluii Apolos xtidx Dios neñ* guedx Éfeso

<sup>24</sup> Neñ redxejga, te dade' ni laa Apolos bidzujn guedx Éfeso. Najcni xpejn Israel, gojlni guedx Alejandria xten Egipto. Lacti rajc rnisa'cni, nanduxhzani xtidx Dios. <sup>25</sup> Nanduxhni xtidx Dios xcuent Jesucrist. Laaca basule'ni xtidx Dios, guideb xcäl'nabajnni rinälajzni Dios. Niluxh xcuent Jesucrist najntisni yälrobnis xten Juan. <sup>26</sup> Nicla nidxejb Apolos gusloj caniini neñ guidoo xten rexpejn Israel. Che biejn diajg Priscila näjza Aquila xtiidxni, huiärenini rolizreni. Ro'c basule'rureni xtidx Dios nani gajdni gan. <sup>27</sup> Dxejc, sa'csi abejn Apolos xhigab chääni reguejdx ni tre' nez Acaya, bacuaa rexpejn Jesucrist guitz lo rexpejn Jesucrist ni yu' neñ reguejdxga te gacnäjreni Apolos. Gucnäduhx Apolos rebejn nani badeed Dios huililajz xtidx Dios neñ reguejdxga, <sup>28</sup> sa'csi gunilii Apolos nez loj guiraa rebejn xhet laadi rnii rexpejn Israel. Di niajcdi nuzejc rexpejn Israel diidx lo Apolos sa'csi ganax con xtidx Dios ni bacuaa reniguii ni gunii xtidx Dios galoo basule'ni: “Jesús najc Crist nani cayunlojtu guxhal Dios.”

## 19

*Guyu' Pabl guedx Éfeso*

<sup>1</sup> Lañ ni guyu' Apolos guedx Corinto, huij Pabl xhidajl reguejdx neñ región Asia, dxejcti bidzujnni guedx Éfeso cadro bidxaagni gaii bejn nani huililajz xtidx Dios. <sup>2</sup> Gunabdiidx Pabl lojreni:

—Che huililajztu xtidx Dios, ¿la biädlaiz Sprit Dxan xten Dios neñ lastootu, ä?

Räjpreni lojni:

—Nicla gajd diajgnu jiejn la yu' te Sprit Dxan xten Dios.

<sup>3</sup> Räjp Pabl lojreni:

—¿Xho birobnistu, pues?

Räjpreni lojni:

—Birobnisnu si'cni baluii Juan tiobnis bejn.



<sup>4</sup> Dxejcti räjp Pabl lojreni:

—Guliica bastiobnis Juan che basiejch lajz rebejn xtojreni. Räjpza Juan lo rebejn: “Colchalilajz xtidx bejn ni siääd detzä.” Bejn ni basä'tni najc Jesucrist —räjp Pabl.

<sup>5</sup> Che biejn diajgreni rextidx Pabl birobnisreni te gacbee rebejn najcreni xpejn Jesucrist. <sup>6</sup> Che batzuub Pabl naani yejcreni, biu' Sprit Dxaan xten Dios nen lastooreni. Dxejc gusloj caniireni garen-garen didxsaj. Guslojza caniireni diidx ni badeed Dios lojreni. <sup>7</sup> Si'c tzubitio'p dade' gusajc si'c.

<sup>8</sup> Si'c chon bäii, guixe-guixee gunii Pabl rextidx Dios, basule'ni xcuent xcälrnibee Dios loj rebejn nen xquidoo rexpejn Israel. Dini nidxejb guniini loj rebejn.

<sup>9</sup> Dxejc guyu' reni gucnajd, dirureni nililajz xtidx Dios. Che gusloj caniyajreni xtidx Dios lo rebejn, biunejz Pabl ro'c sanäni rexpejnni ni rililajz xtidx Jesucrist. Sanä Pablreni te bidxagsa'reni ro scueel xten mastr Tiranno. Ro'c bidxagsa'reni te guixe-guixee basule' Pabl xtidx Dios lojreni. <sup>10</sup> Tiop ijz bejn Pabl si'c, ni'c guiraa rebejn ni rbäyz Asia biejn diajgreni xtidx Dios. Rexpejn Israel sigajc reben griegw biejn diajgreni xtidx Dios. <sup>11</sup> Gucnäy Dios Pabl bejn xhidajl dzunro, remilagwr. <sup>12</sup> Ni'cni biääd bejn ca'reni baii, ca'reni tla' lajd te guxheebreni relajdga lo Pabl. Dxejcti rinäreni relajdga lo rebejn ni racxhuu, luxh riacgajc rebejn ni racxhuuga, rigajcza rebendxab lastoo renani yu' bendxab.

<sup>13</sup> Dxejcti guyu' gaii bejn Israel nani entis rcansaj, direni cuäaz tejsi guejdx. Najcreni bejn ni rbää bendxab lastoo rebejn. Bejn redee xhigabcoob, naareni cuäreni bendxab xcuent laj Jesucrist, ni'cni räjpreni lo renani yu' bendxab nen lastooni:

—Xcuent xcälrnibee Jesucrist nani rului Pabl rnibeenu guiriilu nen lastoo bejnga —räjpreni.

<sup>14</sup> Guyu' gajdz xi'n Esceva, te bejn Israel, nani sajcro lo rebixhojz. Rujn redee dzuun rbääreni rebendxab nen lastoo rebejn. <sup>15</sup> Che gunii rexi'n Esceva loj bendxabga si'c, räjp bendxab ni yu' nen lastoo bejnga lojreni:

—Rumbeä Jesucrist, rumbeäza Pabl. ¿La'tu, chu la'tu? Dina gumbleä la'tu.

<sup>16</sup> Dxejcti bixa't niguii nani yu' bendxab nen lastooni yejc rexi'n Esceva, gudin-duxhnireni, basälta'nireni, batiäjsni xhajbreni. Dxejcti baxunreni biriireni nen yu'ga, bidxälgujdxzaren biräsya' xhajbreni. <sup>17</sup> Dxejcti guiraa reben Éfeso, rexpejn Israel sigajc bejn griegw, gucbee xho bennäj bendxab reniguiiga. Bidxebduxh rebejnga, luxh huä'p xpala'n Jesucrist.

<sup>18</sup> Xhidalduxh reni huililajz xtidx Dios biääd lo rexpejn Jesucrist. Cacäjpreni guiraa recos xhet laadi nani rujnreni. <sup>19</sup> Xhidajl reni najc bidxaa biädnä reguijtz cadro caj yäl'najn xten rebidxaa. Dxejcti base'creni reguijtzga nez loj guiraa rebejn. Bejnreni cuent lacti meel saj reguijtzga. Sajcreni tiubitzuu mil melpla't. <sup>20</sup> Xhidalduxh rebejn huililajz xtidx Dios. Batijp Dios lastoo rexpejnni. Gulä'p guiraareni xpala'n Dios.

<sup>21</sup> Che gulujx recosre, bejn Pabl xhigab chääni guedx Jerusalén, niluxh tedxgaani reguejdx ni re' nez Macedonia näjza Acaya, bejnzani xhigab, naani:

—Che ahua'a Jerusalén, nanabza cha'a guedx Roma.

<sup>22</sup> Ni'cni baxhał Pabl Timoteu näjza Erasto, tio'p renani racnäjni, huijreni Macedonia, luxh laani bia'nni Asia.

### *Bidxebduxh reben Éfeso*

<sup>23</sup> Nen redxejga, guyuduxh rebejn yärsia' sa'csi baluii Pabl xtidx Dios. Direni nichagljaz care'ch xtidx Dios. <sup>24</sup> Te dade' ni laa Demetrio runchee ni'ch pla't xten banäjb ni laa Diana, ni najc banäjb xten guejdxga. Demetrio näjza guiraa replateer ni rujn ni'ch xten Diana runduxhreni gaan meel ro'c. <sup>25</sup> Gurejdx Demetrio guiraa replateer ni rujn reni'chga, räjpni lojreni:

—Colcuadiajg, la'tu resa'ä: najntu rbäänu melro lo dzuun ni riennu. <sup>26</sup> Abahuiitu niguiire ni laa Pabl. Abiejnza diajgtu xtiidxni. Räjpni lo rebejn: “Xhet diosdi najc reni racchee con naa bejn.” Guedx Éfeso näjza guideb nación Asia cagusiejchni lajz bejn, xhidalduxh bejn salilajz xtiidxni. <sup>27</sup> Ni'c ries nitloj xtzuunnu palga diru bejn sii ni'ch

ni riencheenu. Luxh riesza diru bejn jiädgajn Diana nen xquidoro Diana. Naj reben Asia, näjza guiraa reben guedxliuj randuxh Diana, banäjb ni sajcru, niluxh palga diru rebejn gan Diana, pet sinitlojni —räjpni.

<sup>28</sup> Che bejn diajg replateer xtiidxni, bidxe'chduxhrenei, guredxa'reni räjpreni:

—Sacduxh Diana xtios reben Éfeso.

<sup>29</sup> Guideb guejdx guyu' bieju. Dxejcti ruxunreni bidxagsa'reni lo yuj cadro rajc rexjuntreni. Gunaazreni Gayo näjza Aristarco, ben Macedonia ni rinajl Pabl. <sup>30</sup> Rlajz Pabl niu'ni cadro bidxagsa' rebejn, niluxh di rexpejn Jesucrist nusaanni. <sup>31</sup> Gaii guxhtis ni rnibee Asia, sa'csi najcreni xamijgw Pabl, baxhal'reni diidx lo Pabl, räjpreni:

—Na'c chäälü cadro nadxagsa' rebejnga —räjpreni.

<sup>32</sup> Lo rebejn ni re'ga, yu' reni rbedxa' tej diidx, sgaiireni rbedxa' garenca diidx. Te beiduxh cayajc. Xhidalduxh rebejnga nicla gan xhicuent bidxagsa'reni. <sup>33</sup> Dxejcti gulää rexpejn Israel te dade' ni laa Alejandro lo reben xhidaalga, te guiniini lo rebejn. Dxejcti basääbni naani lo rebejn te gac dxi rebejn. Rlajz Alejandro guiniini xcuent rexpejn Israel loj guiraa rebejn, te di guidxe'chreni lo rexpejn Israel. <sup>34</sup> Niluxh che gucbee rebejn najc Alejandro ben Israel, tiop or guredxaduxhrenei, räjpreni:

—Sacduxh Diana xtios reben Éfeso.

<sup>35</sup> Dxejcti biääd secretaar xten guejdxga lo rebejn, gunibeeni guc dxi rebejn, te räjpni lojreni:

—Colcuadiajg, la'tu ben Éfeso, caguidxäj] te ben guedxliuj ni di gacbee reben guedx Éfeso rajnpac Diana, nani xhaguibaali bitejb lo guedxliuj. <sup>36</sup> Sa'csi rediidxre najc gulii, nungäj] cuedxitu, na'c guntu recos guijdxre. <sup>37</sup> ¿Xhicuent gunaaztu reniguii ni siädnätu ree? Direni gac gubaan ni rbajn recos guidoo, dizareni niniyaj xtiosnu. <sup>38</sup> Naj palga rlajz Demetrio näjza rebejn ni najc plateer chale'c quej, naxhal jusgaad, suga' reguxhtis. Ro'c suchale'creni xquejreni. <sup>39</sup> Niluxh palga yu' xhi stee, nanab gac te junt xte reben guejdx si'c ni caj lo xleiiinu. <sup>40</sup> Ries jii xquejnu lo gubier, naareni bidojpnü te guidxagdijnu gubier. ¿Dxejca'? ¿Xhi jie'tznu xcuent ni bidxagsa'nu ree?

Dxejcti räjpni:

—Agojl, coljiunejz.

<sup>41</sup> Che gunii secretaar si'c, bire'ch rebejn, biunejzreni ro'c.

## 20

*Huihuisac Pabl rexpejn* Jesucrist ni yu' Macedonia näjza Grecia

<sup>1</sup> Che bire'ch rebejn, gurejdx Pabl rexpejn Jesucrist biääd lojni, te balijdxnireni. Badeedni xtixtios lojreni. Sä'tini nez reguedx Macedonia. <sup>2</sup> Guiraa reguejdxga cadro gudejdnü, balijdxni rexpejn Jesucrist, basule'rüni xtidx Dios lojreni. Dxejc sääni reguedx Grecia. <sup>3</sup> Che bidzujnni Grecia, bia'nüni ro'c choñ bäii. Dxejcti niu' Pabl nen barcw te nijni reguejdx Siria. Niluxh che bejn diajgni cabäz-xhiga'tz rexpejn Israelni te guiniaazrenini, gunaazni nezyuj, gubi'ni nez Macedonia. <sup>4</sup> Huinäni Sópater, xi'n Pírios, te ben guedx Berea; näj Aristarco näjza Secondo, ben guedx Tesalónica; näj Gayo, ben guedx Derbe; näj Timoteu; näj Tíquico näjza Trófimo, ben Asia. <sup>5</sup> Guiraa redee gunijd loonu, huiläjzreni nuure guedx Troas. <sup>6</sup> Guedx Filipos bidxaag Pabl narä, Lucas. Ro'c gudejdnü lanij xten rexpejn Israel che rajwreni yätxtiil ni di saguij. Biriitinu guejdxga, biu'nu nen barcw te sonnu nez guedx Troas. Gaii dxej gusaanu nen barcw, dxejc bidzunnu guedx Troas. Ro'c bia'nnu gajdz dxej.

*Balüi Pabl xhidalduxh xtidx Dios lo rexpejn* Jesucrist guedx Troas

<sup>7</sup> Che gojl dumingw, primer dxej xman, bidxagsa'nu te bidaunu yätxtiil si'c gudaunäj Jesucrist rexpejnpacni galoo che gajdni guet. Abejn Pabl xhigab guira yääl guiriini guejdxga. Che biu' guxhijñ, gusloj cagusuleduxh Pabl xtidx Dios, huinuuni si'cti garolyäälli. <sup>8</sup> Yu' cadro bidxagsa'nu najc jiaa yejc stiop yu'. Xhidalduxh balgandeel cagusaniñ ro'c. <sup>9</sup> Sobga' te bi'n ni laa Eutico ro' te bentaan. La] ni cagusuleduxh Pabl

xtidx Dios lo rebejn̄, gunaaz bacal̄ bi'nga, gudiejsni, bitejbni lo yuj desde yu' ni riojn̄ pis. Che huiläsrenini, agujtni. <sup>10</sup> Dxejcti biäjt Pabl lo yuj cadre bitejb bi'nga. Bazuxhijb Pabl cadre naga' bi'nga, gudääznini. Dxejcti räjp Pabl lojreni:

—Na'c chutu yärsia'. Agubansacni. Baspajn̄ Diosni.

<sup>11</sup> Dxejcti huäpsac Pabl lo yujiaaga. Ro'c bidaunu yätxtiil si'c gudaunäj Jesucrist rexpejn̄pacni galoo che gajdni guet. Gunii Pabl lojreni xchejru, che bianijli lo guedxliuj. Dxejc biunejzni. <sup>12</sup> Xhetliiduru rajcdi bi'nga nani gubansac, nani guläs Pabl. Bibalazduxhrenei, huisa'nrenini rolijzni.

*Biu'nu nen̄* barcw, bionnu guedx Mileto

<sup>13</sup> Gunijdnu lo Pabl. Biu'nu nen̄ barcw, sonnu guedx Asón, te ro'c guidxaagnu Pabl, sa'csi abejn̄ Pabl xhigab ni'ni jiini guejdxga, ro'cli jiu'ni nen̄ barcw. <sup>14</sup> Che bidxaag Pabl nuunu guedx Asón, biu'ni nen̄ barcw, sonnu lo nisdoo te bidzunnu guedx Mitilene. <sup>15</sup> Nen̄ barcw biriinu ro'c. Che bara yääl, gudejdn̄ yuj ni re' lo nisdoo ni laa Quío. Che bara stee yääl, bidzunnu guedx Samos. Guedx Trogilio basilaaznu. Che bara stee yääl, bidzunnu guedx Mileto. <sup>16</sup> Di rlanj Pabl jiu'nu guedx Éfeso, diza rlanjni chunu Asía xchej, sa'csi riojb lajzni guidzunnu guedx Jerusalén te ro'c tedni redxe lanij ni laa Pentecostés.

*Guedx Mileto guninäj Pabl reni rnibee xpejn̄* Jesucrist ni yu' guedx Éfeso

<sup>17</sup> Che guyu'nu guedx Mileto, baxhal̄ Pabl diidx lo rexpejn̄ Jesucrist ni yu' guedx Éfeso, gurejdxni reni rnibee. <sup>18</sup> Che bidzujn̄reni lo guejdxga, räjp Pabl lojreni:

—Lagajc la'tu najntu xho nabañä nez lojtu, dxejli ni bidzunä, nabannää Dios. <sup>19</sup> La'tu najntu xho runä xtzuun Jesucrist guixe-guixee, guideb xcäl̄nadipä. Dina niliä'p ä xpala'nä. Najntu xho ronä che di bejn̄ chalilajz xtidx Jesucrist. Che rlanj rexpejn̄ Israel nugu't narä, gudedä trabajwduxh. <sup>20</sup> La'tu najntu xho baluiä lojtu guiralii rextidx Dios ni najc huen par la'tu. Che nadxagsa'tu baluiä xtidx Dios lojtu, näjza rolijz cade tejtu huiluiä xtidx Dios lojtu. <sup>21</sup> Basule'ä xtidx Dios lo rexpejn̄ Israel näjza lo rebenzajt ni di gac xpejn̄ Israel. Röpä lojreni nanab gusiechlajzreni, gusa'nreni xtojln̄reni, nanab chalilajzreni xtidx Jesucrist te gudzucaj Dios xtojln̄reni. <sup>22</sup> Naj cadedä te laad guejdx xtentu, sia'ä guedx Jerusalén, sa'csi caguxhal̄ Sprit Dxan xten Dios narä cha'ä guedx Jerusalén. Dina ganä xhi sacä ro'c. <sup>23</sup> Niluxh nanä cade tej reguejdx cadre rdedä rnii Sprit Dxan xten Dios loä sidedä trabajwduxh, siäuá nen̄ latzguiib guedx Jerusalén. <sup>24</sup> Niluxh dina guidxebä, dizana chanälazduxhä xcäl̄nabañätis, te guluxä dzuun nani baniidx Jesucrist gunä. Lo dzuun ni baniidx Jesucrist nanab chaye'tzä lo guiraa rebejn̄ sibicaj xtojln̄reni palga chalilajzreni xtidx Dios xcuent Jesucrist —räjp Pabl.

<sup>25</sup> Räjzani:

—Naj agucebä dirutu fisac loä, la'tu nani basule'ä xcäl̄rnibee Dios lojtu. <sup>26</sup> Rniliä'pac lojtu, xhet dojldi rapä palga yu' te bejn̄ ni di chalilajz xtidx Dios, ni di Dios gudzucaj xtojln̄ni. <sup>27</sup> Xhetliidi biäädxd̄i loj rextidx Dios ni basule'ä lojtu. Dina nucua'tzä nicla tej xtiidxni xcuent xho rlanj Dios guiban̄nu. <sup>28</sup> Colga'p lagajc la'tu si'c ra'p baxhtoor xiil, si'c colga'p guiraa rebejn̄ nani rililajz xtidx Dios sa'csi Sprit Dxan xten Dios abaniidx dzuunga guntu, ni'cni abixe' xtiejn̄ Jesucrist lo crujz te gac gudzucaj Dios xtojln̄reni. <sup>29</sup> Anancheä che rutdiru narä, siääd bejn̄ nani rlanj chalilajztu ste'ca diidx, na'c chalilajztu niclaza jiuu rebejn̄ga. Rusgueetisreni la'tu. Sutie'chreni la'tu lo sa'tu si'c rutie'ch cuyo't rexiil. <sup>30</sup> Su'za lagajc sa'tu ni guinii didx-xhii lojtu te gunreni gusaan rexpejn̄ Jesucrist xtidx Dios, te chanajln̄reni redee ni rusguee. <sup>31</sup> Colhuii te di gusgueereni la'tu. Di jiäl-lajztu chon̄ ijz, dxej yääl basule'ä xtidx Dios, ronäli balidxätu, sa'csi sanälazätu.

<sup>32</sup> Räjzani Pabl:

—Asia'are, rusa'nätu ladzn̄aa Dios, gacnäj Dios la'tu. Sutijp xtidx Dios lastootu, te xca'tu guiraa ni bia'n diidx guniidx Dios lojtu, näjza loj guiraa ni abejn̄ Dios ben̄sa'c, nani najc xpejn̄ni. <sup>33</sup> Dina niniabä meel, niclaza xhabä che baluiä xtidx Jesucrist lojtu. <sup>34</sup> Anajntu lagajc narä benä dzuun con ñää te bio' xhi gudaunää reexamigwä. <sup>35</sup> Si'c benä

te filojtu xho guntu dzuun te gacnäjtu sa'tu ni xhet rajpdi, te guinaj lajztu xtidx Jesucrist che najni: “Huenru guideednu lo bejn quela xcaxlia'nu xhi cos” —räjpn.

<sup>36</sup> Che gulujx gunii Pabl rediidxga, bazuxhibnäjni rebejnğa, guredx-gunabni lo Dios. <sup>37</sup> Dxejcti ronduxh guiraareni gudääzreni guejn Pabl, bachagro'renini. <sup>38</sup> Guc-huinuxh lajzreni dxejc sa'csi räjp Pabl dirureni fisac lojni. Dxejcti huisa'nrenini lo barcw.

## 21

### *Huij Pabl guedx Jerusalén*

<sup>1</sup> Che basa'ntinu rexpejn Jesucrist ro'c, biu'nu nen barcw, sionnu te lii nejz lo yuj ni laa Cos, ni tre' lo nisdoo. Che bara yääl, bidzunu lo xyuj Rodas ni tre'za lo nisdoo. Ro'c biriinu sionnu nen barcw nez guedx Pátara. <sup>2</sup> Che bidzunu ro' guejdxga, bidxänu te barcw ni sää nez reguedx Fenicia. Dxejc biu'nu nen barcwga te chonnu ro'c. <sup>3</sup> Bahuiinu lo yuj Chipre ni tre' lo nisdoo, xladbäjcwnu tre' yujga, bideednu te laad. Siontinu nez Siria, ro'c bidzunu guedx Tiro cadre gule'creni cargw ni nuu barcwga. <sup>4</sup> Ro'c bidxänu rexpejn Jesucrist. Biannänureni gajdz dxej. Baluii Sprit Dxan xten Diosreni te guniireni lo Pabl, räjpreni:

—Na'c chäälü guedx Jerusalén.

<sup>5</sup> Che baza' gajdz dxej, biunejznu guejdxga. Dxejc guzaj reniguii, regunaa, näjza rexi'nreni biriinu guejdxga. Ro' nisdoo bazuxhibnu te guredx-gunabnu lo Dios.

<sup>6</sup> Che abazadiidxnu sa'nu, nuure biu'nu nen barcw, biädla laareni gubisacreni roli-jzreni.

<sup>7</sup> Biriitinu guedx Tiro. Che bidzunu ro' guedx Tolemada, gulujx xpiajnu biäjtnu nen barcw. Dxejc biohuiinu rexpejn Jesucrist ni yu' guejdxga, biannänureni tejtis yääl. <sup>8</sup> Che bara yääl, biriinu guejdxga, sonnu guedx Cesarea. Che bidzunu guejdxga, bionnu roliz Felipe, te dade' ni rusule' xtidx Dios lo bejn. Felipe gujc tej lo gajdz niguii nani gudis xhi gudajw rexpen Jesucrist nani xhet rajpdi guedx Jerusalén. Rolizni huijia'nnu. <sup>9</sup> Yu' tajp xindxapxteb Felipe. Dios badeed diidx guiniireni lo bejn. <sup>10</sup> Xhidajl dxej guläjznu roliz Felipe. Lał ni dxunnu ro'c, bidzujn te niguii ni laa Agabo, biriini nez Judea. Ruzanij Dios xcäriejnni te guiniini xtidx Dios.

<sup>11</sup> Che bidzujn loonu, cua' Agabo xsindoor Pabl, baliibni lagajc reni'ni näjza reñaani, najni loonu:

—Anaj Sprit Dxan xten Dios: “Scree suliib rexpejn Israel ni yu' guedx Jerusalén niguii ni najc xtenni sindoorre te guteedrenini ladznaa rebenzajt.”

<sup>12</sup> Che biejn diaagnu rediidxga, nuure näjza reben ro'c, gunabduxhnu lo Pabl na'c chääni guedx Jerusalén. <sup>13</sup> Dxejc naj Pabl loonu:

—¿Xhicuent roontu? ¿Xhicuent runhuiintu lazä? Xhet najcdi jääuä nen latzguiib, xhet najcdi palga nungälä guetä guedx Jerusalén xcuent Jesucrist —räjp Pabl.

<sup>14</sup> Che naaddi Pabl gusiechlajzni, xhetru guniidinu lojni. Räjptisnu lojni:

—Sugac nani rlanjtis Dios.

<sup>15</sup> Che gudejd redxejga, bilucheenu rehxixtennu, biriinu guejdxga, siontinu guedx Jerusalén. <sup>16</sup> Gaii rexpejn Jesucrist ni najc ben Cesarea huisa'n nuure guedx Jerusalén. Ro'c huinäreni nuure roliz te dade' ni laa Mnasón, ben Chipre, yuj ni tre' lo nisdoo. Laani galooli huililajzni xtidx Dios. Huijia'nnu rolizni, ro'c gulääznu.

### *Huihuii Pabl Jacob*

<sup>17</sup> Che bidzunu guedx Jerusalén, bibalazduxh rexpejn Jesucrist sa'csi siopnu ro'c. <sup>18</sup> Che bara yääl huinänu Pabl lo Jacob näjza lo renani rnibee guidoo xten rexpejn Jesucrist. <sup>19</sup> Dxejc gudääz Pablreni, bijni diidx xcuent tebgaj redzuun nani badeed Dios bejnni che guyunäjni rebenzajt nani di gac xpejn Israel, te biejn diajgreni xtidx Dios. <sup>20</sup> Che biejn diajgreni xtidx Pabl, gulä'preni xpala'n Dios, räjpzarenini lo Pabl:

—Guejblu, sa'nu, anajnlu lacti xhidalduxh xpejn Israel yu' nani rililajz xtidx Jesucrist luxh rapdaduxhreni leii xten toMoisés. <sup>21</sup> Abiejn diajg rebejnre xcuentlu. Abiejn

diajgreni garenca ruluuilu guiraa rexpejn Israel nani rbäjz nen reguejdx xten rebenz-ijjt, ruliidxlureni na'c gusälreni bee rexi'nreni, na'cza chazanäjrrureni rexcostumbrnu.  
<sup>22</sup> ¿Xhini'c jiennu? Siejn diajgreni abidzujnlu ree, dxejc suchagsa'reni te jiädreni lojlu.  
<sup>23</sup> Naj gunlu nani guiniinu lojlu. Yu' tajp resa'nu ree nani basa'nreni diidx lo Dios.  
<sup>24</sup> Huinäreni, näjza luj bejn si'ctis gunreni si'c ni caj lo leii xten toMoisés, te gaclu naya nez lo Dios. Luj quiixlu guiraa ni banijtreni, te che abasa'tu guiraa ni nanab gac sajc guigaj yejctu si'c te seen te gacbee guiraa rebejn abasoobtu leii. Dxejcti gan guiraa rebejn didx-xhii najc rediidx ni biejn diajgreni xcuentlu. Te gacbeereni laaca rusooblu xleii toMoisés.  
<sup>25</sup> Biädla rebenzijt nani huililajz xtidx Jesucrist, xhet najcdi, sa'csi abacuaanu lojreni, rie'tznu lojreni: na'c gautu recos nani gule'c bejn si'c gojn loj banäjb, na'c gautu rejn, niclaza bääl nani gurerejn, na'c guesnäjtu nani di gac chäältu.

### *Gunaaz rexpejn Israel Pabl*

<sup>26</sup> Che bara yääl, huinä Pabl guidap niguiiga, bejnreni si'c caj lo xleii toMoisés, biu'reni nen xquidoo rexpejn Israel te huiye'tzreni lo bixhojz nen guidoo xhi dxej jiädnä teygareni te man te ju't rebixhojz remanga lo Dios.

<sup>27</sup> Si'c nanab gunreni gajdz dxej. Che ameer guiza' redxejga, bahuii rexpejn Israel ni siäd Asia lo Pabl nen guidoroga. Gunaazreni Pabl, dxejcti gusloj cayujnreni biejj, <sup>28</sup> guredxa'reni räjpreni:

—¡Coltaa xpejn Israel! ¡Coltaa te gacnäjtu nuure! ¡Bahuilaa! Niguiire najc nani rniyaj rexpejn Israel cadrotis rijni. Ruliidxni bejn te di chazanäjrrureni xleii toMoisés, riye'tzni lo bejn xhet sajcdi xquidoronure. Colhuilaa xho siädnäni ree ben griegw, benzijt ni di gac xpejn Israel, te gundxuudxni xquidoronu —räjpreni.

<sup>29</sup> Si'c caniireni sa'csi te huält bahuiireni sanä Pabl Trótimos lo nezyuj. Trótimos najc te benzijt ni siäd guedx Éfeso. Naj cayujnreni xhigab laa niguiiga ni siädnä Pabl nen xquidoro rexpejn Israel.

<sup>30</sup> Guideb guejdxga guyu' yärsia', bire' benguixhuj, bixa'treni yejc Pabl, gunaazrenini, gudobxhajxhrene Pabl, gulägajc renini nen guidoroga. Biägajc repuertro xten guidoro.  
<sup>31</sup> La! ni cayujnreni xhigab ju'trenini, yu' chu huiye'tz lo nani rnibee resoldaad ni caya'p guejdxga, räjpreni:

—Cayajc te bieiduxh nen guejdxre.

<sup>32</sup> Guredxgajc comandant resoldaad näjza gaii capitán, ruxunreni bidzujnreni cadre tre' rebejn. Che bahuii rebejn lo comandant näjza resoldaad, guläjz caguijnreni Pabl.

<sup>33</sup> Dxejcti gubig comandant lo Pabl, gunibeeni baliib resoldaad naa Pabl con tiop cadenguib. Dxejcti gunabdiidxni lo Pabl, räjpni:

—¿Chu luj? ¿Xhini'c bejnlu?

<sup>34</sup> Lo reben xhidaalga yu' rexpejn Israel ni guredxa' tej diidx, yu'za reni guredxa' ste'ca diidx. Di comandant niujn gan niacbeeni xhicuent cayajc biejj sa'csi cabedxa' guiraa rebejn. Dxejc gunibeeni chanä resoldaad Pabl cadre rbäjzreni. <sup>35</sup> Che bidzunäj resoldaad Pabl ro' scaleer ni caj ro'c, biireni Pabl te bejnreni gan biunäjreni Pabl, sa'csi nialazduxh rebejn rlajzreni nugu'treni Pabl.

<sup>36</sup> Siädnajl guiraa rebejn Pabl, rbedxa'reni:

—Colgugu'tni.

<sup>37</sup> Che agojl jiu' Pabl nen yuro xten resoldaad, räjpni lo comandant con diidx griegw:

—Rlazä guiniä tiop diidx lo guejblu.

Räjp comandant lo Pabl:

—¡An rniilu xtidsaä! <sup>38</sup> An dilu gac niguii ni siäd nación Egipto, nani gudiñäj gubier, nani huinä lo reyubijdz tajp mil niguii nani rugu't bejn.

<sup>39</sup> Dxejc räjp Pabl lojni:

—Narä nacä te ben Israel, te ben Tarso xten Cilicia. Sacduxh guejdxga lo reguedx Cilicia. Canabä gun guejblu te hueen, gusaan guejblu guiniä lo rebejnre.



<sup>40</sup> Dxejc cuäjb comandant guinii Pabl lo rebejn. Lal ni suga'ni lo scaleer basääb Pabl naani lo rebejn te gucdxireni. Che aguredxi rebejn, gusloj Pabl canii lojreni didxsaj hebreo, räjpni:

## 22

<sup>1</sup> —Guejbtu bengool, guejbtu resa'ä, näjza la'tu dade'. Gucuardiajgtu rextidxä —räjpni.

<sup>2</sup> Che biejn diajgrenti caniini didx hebreo, dxidujru guzuj rebejn. Räjp Pabl lojreni:

<sup>3</sup> —Narä nacä te xpejn Israel. Guedx Tarso xten Cilicia golä. Reepac gulaä. Lo Gamaliel bisiedä guijtz. Baluisa'cni narä guiragajc releii xten rextotadgoldoonu. Guideb xtipä basobä ni gunibee Dios. Gucä si'cpac ni najctu naj. <sup>4</sup> Dxejcti bidxechduxhä loj renani huililajz xtidx Jesucrist, bagu'täzareni. Balibä xhidajl bejn, niguii näjza gunaa, con cadenguiib. Basäuäreni nen latzguiib. <sup>5</sup> Bixhojz ni sajcrü näjza guiraa rebengool ni sajcrü nen xquidootu, sajc guinii xhini'c benä. Laareni baniidxreni guijtz loä. Ni'c huinää lo rexpejn Israel ni yu' guedx Damasco, cadre hua'a te niniazä rebejn nani huililajz xtidx Jesucrist. Benä xhigab jädnääreni guedx Jerusalén te jäüreni nen latzguiib, te gusacsireni rebejnğa.

### *Gunii Pabl xho huililajzni xtidx Jesucrist*

*(Hch. 9:1-19; 26:12-18)*

<sup>6</sup> Räjpszani:

—Dxejc hua'a guedx Damasco. Läidxejti ameer guidzunä guejdxga, chela bazanij te balro guideb gabi narä. Xhaguibaali siäd bajlga. <sup>7</sup> Biabrloä lo yuj, dxejc biejn diagä te se' ni canii loä, najni: “Saulo, Saulo, ¿xhicuent rusacsílu narä näjza rexpänä?” najni. <sup>8</sup> Dxejcti räpä lojni: “¿Chuluj, Dad?” Najni loä: “Narä nacä Jesucrist ni siäd Nasare't, nani cagusacsíduxhlu.” <sup>9</sup> Rebejn ni sanää bahuiløj bajlga, bidxebreni, niluxh di diajgrenti niejn xse' nani gunii loä. <sup>10</sup> Räpä lojni: “Dad, ¿xhini'c gunä?” Dxejcti najni loä: “Huistie, huij guedx Damasco. Ro'c sinii te dade' lojlu guiraa ni guinibeä gunlu.” <sup>11</sup> Bastujxh bajlga loä, diru loä nien, ni'cni gunaaz resa'ä nää, sontinu guedx Damasco.

<sup>12</sup> Räjp Pabl:

—Guejdxga guläjz te niguii ni laa Ananías. Rusoobni guiraa releii xten toMoisés. Guiraa rexpejn Israel rnii nadalajz lo dade'ga. Biäd Ananías loä. <sup>13</sup> Cuä'ä guzujni najni loä: “¿Saulo, betzä, bahuisac!” Lagajc dxejc biajc loä, bahuiä lojni. <sup>14</sup> Naj Ananías loä: “Xtios rextotadgoldoonu agulelu. Gule Dios luj te jiejn diajglu rediidx ni rlajzni gunlu, te filojlu Jesucrist, Xindxan Dios, te jiejnza diajglu rextiidxpac Jesucrist. <sup>15</sup> Loj guiraa bejn susule'lu guiraa ni bahuilu näjza nani biejn diajglu. <sup>16</sup> ¿Xhicuent sojbtislu ro'c? Basquejn, huistie te tiobnislu. Huililajz xtidx Jesucrist, gurejdx lo Dios te gudzucajni rextojllu.”

### *Gunii Pabl xhicuent baluiini xtidx Dios lo rebenzijt*

<sup>17</sup> Che gubi'ä guedx Jerusalén, biu'ä nen guidoro xten rexpejn Israel te guredx-gunabä lo Dios. Lal ni cabedx-canabä lo Dios, astoo gunixcalä, <sup>18</sup> dxejc bahuiä lo Jesucrist. Najni loä: “Basquejn, birii guedx Jerusalén sa'csi di rebejn chalilajz xtidxä ni gusule'lu lojreni.” <sup>19</sup> Narä räpäza lojni: “Dad, anajnreni xho biu'ä guiraa reguidoo, gunazä guiraa rebejn nani huililajz xtiidxlu, gudinduxhäreni, basäuäreni nen latzguiib. <sup>20</sup> Che bacuaareni guij yejc Esteban nani gunii xtiidxlu, ro'c guzuä, cuäbä bejnreni si'c. Go'pä xhajn xten renani bagu't Esteban lal ni bacuaareni guij.” <sup>21</sup> Dxejcti naj Jesucrist loä: “Huij. Suxhalä luj zitduxh. Chäälü lo guiraa rebenzijt ni di gac xpejn Israel.”

### *Bia'n Pabl nen rolijzro xten resoldaad*

<sup>22</sup> Bacuadiajg guiraa rebejn lal ni gunii Pabl rediidxga, dxejcti guredxa'reni, räjpreni: —Colgu't niguiiga. Di nunyäjil guibajruni.

<sup>23</sup> Sanuutis cabedxa'reni. Gulääreni xcamangwreni, cacuaazareni yuyol jiaa. <sup>24</sup> Dxejcti gunibee comandant lo resoldaad, räjpni:



—Colchanä Pabl nen yuro xtenu. Ro'c colquiin Pabl te guiniini didxgului, te gacbeenu xhicuent rbedxaduxh rebejn lojni.

<sup>25</sup> Sanätireni Pabl. Entis baliibreni ni', naa Pabl con duguijd te niguijnrenini che gunabdiidx Pabl lo capitán, räjpni:

—¿La rajc rguijntu te bejn roman che gajdtu gacbee xhi dojl bejn, ä? Et si'cti caj lo xleiilu.

<sup>26</sup> Che biejn diajg capitán xtiidxni, bidxejbni, huijni lo comandant, räjpni lojni:

—Colnati xhi gunnäjlu dade're, sa'csi najcni bejn roman.

<sup>27</sup> Biädguxun comandant lo Pabl, räjpni:

—¿La gulii najclu bejn roman, ä?

Räjp Pabl lojni:

—Guliini.

<sup>28</sup> Dxejcti räjp comandant:

—Narä badedä xhiroob meel te nacä bejn roman.

Dxejcti räjp Pabl lojni:

—Narä che goläli nacä bejn roman.

<sup>29</sup> Che biejn diajg resoldaad nani niguijn Pabl si'c, baslagajcreni reduguijd ni naliib ni', naani. Che biejnza diajg comandant najc Pabl bejn roman, bidxejbni sa'csi gunibeeni biliib Pabl.

*Basule' Pabl diidx xcuentni lo rebixhojz nani rnibee rexpejn Israel*

<sup>30</sup> Che bara yääl, rlajz comandant gacbeeni xhicuent rlajz rexpejn Israel ju't Pabl. Ni'c gunibeeni jiäd rebixhojz ni sajrcu näjza reguxhtis xten guidoro. Dxejcti biädnäni Pabl, bazujnini nez loj guiraa rebejn ni bire' ro'c.

## 23

<sup>1</sup> Rdxelodzu'tz Pabl lo rebejn ni tre' ro'c laj ni räjpni lojreni:

—Narä gusule'ä tiop diidx lo guejbtu, bejn Israel, sa'ä. Guideb ni nabanä ruzobä xtidx Dios. Di lastoä guidxejb nez lo Dios —räjp Pabl.

<sup>2</sup> Che biejn diajg Ananías, bixhojz ni sajrcu, xtidx Pabl, bidxechduxhni, gunibeeni lo renani suga' gajxh lo Pabl ca'preni ro' Pabl.

<sup>3</sup> Räjp Pabl lo Ananías:

—Sigajcza ca'p Dios ro'lu, benguijdx. Ro'c sobga'lu te gunlu yälguxhtis si'cni caj lo leii. ¿Xhicuent rujnlu nani rnii leiiga di nungäjl gun bejn? ¿Xhicuent gunibeelu guda'preni ro'ä? —räjp Pabl.

<sup>4</sup> Reni suga' cuä' Pabl räjp lo Pabl:

—¿La dilu gacbee laa bixhojz ni sajrcu xten Dios? Na'c guiniyajluni.

<sup>5</sup> Dxejcti räjp Pabl lojreni:

—Rexamigwä, dina niacbeä caniä lo bixhojz ni sajrcu, sa'csi nanä agunii Dios: “Na'c guiniyajlu reni rnibee xpejnlu.” Si'c caj lo guitz ni bacuaa reni gunii xtidx Dios.

<sup>6</sup> Gucbee Pabl tiop cuaa najc reni tre' ro'c. Yu' reni najc bejn saducee, yu'za reni najc bejn farisee. Dxejc guredxa' Pabl räjpni lojreni:

—Sa'ä, narä nacä te bejn farisee, xi'nza te bejn farisee narä. Rililazä sibansac bejn lo rebengut, ni'c cabe'creni xquejä ree.

<sup>7</sup> Entis guniini si'c lojreni, chela gusloj caniireni lo sa'reni. Tiop cuaa gujcreni, gala' refarisee, sgala' resaducee. <sup>8</sup> Di lajz resaducee chalii sibansac rebengut, dizareni chalilajz yu' rexangl Dios, dizareni chalilajz yu' aim xten bejn. Niluxh refarisee rililajz guiraa rediidxga. <sup>9</sup> Guyu' te bieiro. Dxejcti huisulii gaii farisee nani najn leii, gusloj caniduxhrene, räjpreni:

—Di niguiire gac benguijdx. Palga gunii te angl xten Dios o te togool lojni, alga Dios tijnäjnu, dxejc sidxchnäj Diosnu.

<sup>10</sup> Che gusloj cabedxaduxhreni lo sa'reni, bidxejb comandant, andi ju'treni Pabl, caxha'treni yejnci. Dxejcti gunibeeni biäjt resoldaad cadre suga' Pabl. Guideb xtijpreni gulääreni Pabl galäii rebejnğa huinäsacrenini nen yuro xtenreni.

<sup>11</sup> Che biu' guxhijn, baluiloj Jesucrist lo Pabl, guzujni cuä'ni, räjpni lojni:

—Batijp lajzlu, na'c guidxejblu, Pabl. Si'cni basule'lu xtidxä guedx Jerusalén, sigajcza nanab gusule'lu xtidxä guedx Roma.

*Rexpejn* Israel bejn xhigab nugu'treni Pabl

<sup>12</sup> Che bara yääl, bachagsa' gaii xpejn Israel, bejnreni xhigab nugu'treni Pabl. Räjpreni lo sa'reni:

—Na'c guidaunu, na'cza guidunnu nis che guigu'tlinu Pabl —räjpreni.

<sup>13</sup> Si'cti tiuu niguii bia'n diidxga. <sup>14</sup> Bidzujnreni lo rebixhojz näjza rebengool, räjpreni lojni:

—Abia'nnu diidx, xhet guidaudinu, xhetza guidundinu palga dinu guigutxgaa Pabl —räjpreni—. <sup>15</sup> Naj la'tu näjza guiraa rebengool ni rnibee rexpejn Israel, colguxhal diidx lo comandant te guixee jädnäni Pabl lojtu. Colyejn si'c ni rlajztu jiejnru diajgtu diidx xcuent Pabl. Che jädnä comandant Pabl ree, nuure sugu'tnuni lo nezyuj che gajdni guidzujn ree —räjp reniguiiga.

<sup>16</sup> Niluxh biejn diajg xi'n bisiajn Pabl cabäzxhiga'tz reniguiiga te ju'treni Pabl, huijni royuro xten resoldaad. Che bidzujnni, biu'ni räjpni lo Pabl rediidx ni biejn diajgni.

<sup>17</sup> Dxejcti gurejdx Pabl te capitán, räjpni lojni:

—Huinälaa bi'nre lo comandant te gäbni te diidx lojni.

<sup>18</sup> Huinäti capitán bi'nga lo comandant, räjpni lo comandant:

—Pabl, nani niäu nen yuro xten resoldaad, gunab löä jädnälää bi'nre lo guejblu te guiniini te diidx lo guejblu —räjpni.

<sup>19</sup> Dxejc gunaaz comandant naa bi'nre, huinänini te laad cadre rut jiejnru diajgni xtiidxreni, dxejc räjpni lojni:

—¿Xhini'c rlajzlu guiniilu löä?

<sup>20</sup> Dxejc bazejnci diidx, räjpni loj comandant:

—Abia'n te cuaa xpejn Israel diidx siniabreni lo guejblu jädnä guejblu Pabl ro jusgaad guixee. Sujnsireni si'c ni rlajz jiejnru diajgreni diidx xcuent Pabl. <sup>21</sup> Na'c chalilajz guejblu xtiidxreni. Tiu niguii sibäzxhiga'tz cuä' nezyuj te ju'treni Pabl. Abia'nreni diidx direni gau, dizareni yä palga direni jutxgaa Pabl. Naj cabäjztisreni guxhal guejblu diidx sinä guejblu Pabl ro jusgaad.

<sup>22</sup> Che biejn diajg comandant diidxga, basaanni sii bi'nga rolizni, räpxgaani lojni:

—Rut lojdipac gäblu guniilu diidxre löä.

*Huij Pabl lo Pels ni najc gobernador*

<sup>23</sup> Dxejcti gurejdx comandant tiop capitán, räjpni lojni:

—Colgutojp tiop gayuu soldaad, chää guedx Cesarea näjza gayonbitzoo soldaad ni bijb cabaii, näjza tiop gayuu soldaad ni ca' spaad. Rcagaa guxhijn guiriireni ree. <sup>24</sup> Colquiiil tiop cabaii cuib Pabl te xhet gacdi Pabl cheni chanätuni lo gobernador Pels —räjpni.

<sup>25</sup> Dxejcti bejn comandant te guijt chanäreni lo gobernador.

<sup>26</sup> Loj guijtza rni scree: “Gobernador Pels, nani sacduxh. Narä, Claudio Lisias, ruxhalä xtixios lo guejblu. <sup>27</sup> Rediidxre rucuaä lo guejblu. Gunaaz rexpejn Israel niguiire, luxh paru dina nidzunga'cä con resoldaad, nugu'trenini. Che guceä najnci ben roman, guläänuni ro'c. <sup>28</sup> Rläzä niacbeä xhi quej rbe'creni, ni'c huanääni lo junt xten rexpejn Israel ni rnibee guidoro. <sup>29</sup> Dxejc guceä requej ni rbe'creni najc ganax xcuent leii xtenreni, niluxh xhet bejndini te nungäjil guetni, ni clazä nanab jäuni nen latzguiib. <sup>30</sup> Che baxhalreni diidx löä cabäzxhiga'tz rexpejn Israelni te ju'treni dade're, baxhalga'cäni lo guejblu. Agunibeäza jädle'c rexpejn Israelre xquejreni lo guejblu. Ni'ctis rniä lo guejblu”, si'c caj lo guijt ni bejn comandant.

<sup>31</sup> Che biu' guxhijñ, huixii resoldaad Pabl sanärenini guedx Antípatris si'cni gunibee comandant gunreni. <sup>32</sup> Che bara yääl, gubi' resoldaad nani guzaj ni'reni. Resoldaad ni bijb cabaii guzanäj Pabl guedx Cesarea. <sup>33</sup> Che bidzujñ redee Cesarea, badeedreni xquijtz comandant lo gubernadoor, huinäzarenini Pabl lojni te biembeenini. <sup>34</sup> Che gulujx bilni guijtzga, gunabdiidxi lo Pabl:

—¿Caro siäädlu?

Che gucbeeni siääd Pabl Cilicia, <sup>35</sup> räjpni lo Pabl:

—Guidzujñsi rexpejñ Israel ni cadxehnäj luj, sucuadiaggacä xtiidxlu —räjp gubernadoor.

Gunibeeni ga'p resoldaadni neñ yuro xten Herodes.

## 24

### *Gunii Pabl xtiidxi lo Pels*

<sup>1</sup> Gudejdti gaii dxej, dxejc bidzujñ Ananías, bixhojz ni sajcro, näjza gaii rebengool xten guidoro, näjza te dade' ni laa Tértulo ni gunii xcuentreni. Gusloj cabe'cni xquej Pabl lo gubernadoor. <sup>2</sup> Che biädnäreni Pabl, gusloj Tértulo cabe'c xquej Pabl lo gubernadoor. Räjpni lo gubernadoor:

—Xquixtioste guejblu dxiduxh nabannu. Cayacnäduhx guejblu laadxnu con redzunsacduhx ni cayujñ guejblu. <sup>3</sup> Xquixtiosduhx guejblu, gubernadoor Pels, xcuent guiraa redzunsac'c ni rujñ guejblu guira nejz. <sup>4</sup> Luxh na'cru gusieednu guejblu, gucuadiaglaa guejblu tiop diidx. <sup>5</sup> Agucbeenu xho najc niguiire. Benguidxduhxni. Cadrotis rijni rujñni biey lo rexpejñ Israel. Laani rnibee te cuaa ni laa nasareñ, nalajznu rebejñ nani rililajz xtidx Jesucrist ni biääd guedx Nasare't. <sup>6</sup> Rlajzlini nuxhñni xquidoronu, ni'c gunaaznuni. Niennu te junt te lagajc nuure niennu yälguxhtisni si'cni caj lo xquijtznu. <sup>7</sup> Niluxh bidzujñ comandant Lisias näjza resoldaad. Diptis badzucajreni niguiiga ladzñaanu. <sup>8</sup> Laani gunibeeni lo guejblu jiääd reni rbe'c xquejni. Naj lagajc guejblu sajç guiniabdiidxi lojni te gacbee guejblu gulii guiraa requej nani rbe'cnu xcuentni —räjp Tértulo.

<sup>9</sup> Dxejcti guiraa rexpejñ Israel ni suga' ro'c räjp guliica xtidx Tértulo. <sup>10</sup> Dxejcti bejn gubernadoor seen lo Pabl te guiniini. Baze'c Pabl diidx, räjpni lojni:

—Rbaaliza lazä guze'cä diidx lo guejblu, sa'csi anana agujc xchero lacti huen rujñ guejblu yälguxhtis nación Israelre —räjp Pabl—. <sup>11</sup> Gutzbitio'p dxejtis bidzunä guedx Jerusalén te saganä Dios. Najn rebejñ xhi dxej biu'ä Jerusalén, guyasi guniidxreni diidx. <sup>12</sup> Nicla tej dina nichagdilä bejñ neñ guidoro. Nicla tej dina niunä biey neñ reguidobäz, nicla ro nezyuj. <sup>13</sup> Agule'creni quej xtenä lo guejblu, niluxh nicla tej redzuunga dina niunä. Di gacdi guluipacreni lo guejblu gulii najc xtiidxreni. <sup>14</sup> Rniliäpac lo guejblu: Rañä Xtios retoxtadgoldoonu. Jesucrist baluii xho gansa'cnu Dios. Rililazä rextiidxi. Xhidalduxh rexpejñ Israel rniyaj xho basule' Jesucrist gan bejñ Dios. Ruzobä guiraali releii xten toMoisés. Rililazä guiraa rextidxi Dios ni bacuaa reni gunii xtidxi Dios. <sup>15</sup> Rililazä xtidxi Dios si'c rililajzza rebejñre xtidxi Dios. Si'c ni najnreni, si'cza nanä sidzujñ te dxej che guibansac rebengut, rebenguidxi sigajc rebensa'c. <sup>16</sup> Ni'cni racbeä laaca nabañä guiraa dxej, di lastoä guidxejb, nicla nez loj bejñ niclaza nez loj Dios, sa'csi rut rajçdi guiliäs dixhii xcuentä.

<sup>17</sup> Räjp Pabl:

—Agujc xchej yu'ä zijt, lajdx garenca bejñ, naj gubinää meel ni baxhañ reben nejzga te gudedäni lo rebejñ ni xhet rajpdi. Biädnääza gojn xtenä gudedäni lo Dios. <sup>18</sup> Ni'c sanää guidoro. Ro'c bidxajñ rexpejñ Israel ni siääd Asia narä. Agucnayaä si'c ni rnibee xleiiinu. Xhet benxhidajldi suganää, xhetza bieydi cayunä. <sup>19</sup> ¿Con rebejñga naj? Te cue'creni quej lo guejblu palga yu' xhini'c rdxechnäjreni narä. <sup>20</sup> O guiniiza redee palga yu' xhini'c et laadi benä che suga'ä nez loj junt xten guiraa rebixhojz ni rnibee näjza rebengool lo guedx Jerusalén —räjp Pabl—. <sup>21</sup> Tejtis diidxi guniä che suga'ä galäiireni, guredxa'a räpä

lojreni: sa'csi rililazä sibansac guiraa rebejn lo rebengut, ni'c biädnätu narä lo rebejnre —si'c guniä lojreni.

<sup>22</sup> Che biejn diajg Pels xtidx Pabl näjza sa'csi najne'ni xcuent diidx nani baluii Jesucrist, basoobni stee dxej guidxagsac sa'reni räjpni lojreni:

—Che jiäädli comandant Lisias dxejc gunä yälguxhtis —räjp Pels.

<sup>23</sup> Dxejcti gule Pels te capitán ni rnibee te gayuu resoldaad ga'p Pabl. Niluxh räjpni lojni gusaanni gun Pabl nani rlajztisni gunni. Na'cza gudxojnni jiääd reexamigwni te fiireni lojni.

<sup>24</sup> Che gudejd balti dxej, gubi' Pels, biädnäni chäälni Drusila. Drusila najc bejn Israel. Dxejc gurejdx Pels Pabl te gusule'ru Pabl xtidx Jesucrist. <sup>25</sup> Gunii Pabl xho nanab guibansa'c bejn nez loj Dios si'c ni gunibee Dios guibajn bejn. Nanabza gacbee bejn na'c gun bejn cos guijdx, sa'csi sidzujn dxej gac Dios juejz loj guiraa rebejn te fiini xhi bejnreni. Racseli Pels tant bidxejbni biejn diajgni diidxga. Räjpni lo Pabl:

—Huij naj. Sibedxsacälu che latä stee —räjp Pels.

<sup>26</sup> Naa Pels sudeed Pabl meel lojni te guslaanini, ni'c masru guet-guejt gurejdxnini te guninäjnini. <sup>27</sup> Si'c gudejd tiop ijz. Dxejc birii Pels gubernadoor. Dxejcti biu' Porcio Festo, gujcnj gubernadorcoob. Niluxh Pels rlajz chanälajz rexpejn Israelni, ni'c basa'nni niäusijc Pabl.

## 25

### *Gunii Pabl xtiidxni lo Festo*

<sup>1</sup> Che biu' Festo gujcnj gubernadorcoob xten reguejdxga, bia'nni guedx Cesarea chon dxej. Dxejc biriini ro'c sääni guedx Jerusalén. <sup>2</sup> Che bidzujnni guejdxga, rebixhojz nani rnibee näjza reniguii ni sajcro lo rexpejn Israel biääd lo Festo. Gusloj cabe'creni xquej Pabl lojni. Gunabduxhrene lo Festo <sup>3</sup> sa'csi rlajzrene gunni te huen laareni, guinibeeni jiädnäreni Pabl guedx Jerusalén. Si'c gunabreni, sa'csi abenxgaareni xhigab cuäzxhiga'tzrene te ju'treni Pabl lo nezyuj.

<sup>4</sup> Dxejcti räjp Festo lojreni:

—Suniau Pabl guedx Cesarea. Di gaclaa guibi'ä guedx Cesarea. <sup>5</sup> Suchää reniguii ni sajcro lo sa'tu guedx Cesarea, te ro'c cue'creni xquej Pabl loä, don la yu' xhi dzunguijdx bejnne —räjpni.

<sup>6</sup> Che gudejd si'cti tzuu dxej, gubi' Festo guedx Cesarea. Che bara yääl, gurejni lo yagxhil xten gubernadoor, gunibeeni biääd Pabl lojni. <sup>7</sup> Che bidzujn Pabl lojni, biääd rexpejn Israel nani biääd guedx Jerusalén ro'c. Guzujrene guideb gabi Pabl. Gule'creni xhidalduxh xquej Pabl, luxh di niajcdi nuluiireni guliipac xtiidxrene.

<sup>8</sup> Dxejcti räjp Pabl lojreni:

—Nicla tej latsiaj dina niunä, dina niunä latsiaj loj leii xtenu, dizana niunä latsiaj loj guidoro ni sojb guedx Jerusalén, dizana niunä latsiaj loj xgubier César.

<sup>9</sup> Dxejcti Festo, sa'csi rlajzni guiliäsni xpala'nni loj rexpejn Israel, räjpni lo Pabl:

—¿La sisiajlu guedx Jerusalén te cue'c rexpejn Israel xquejlu ro'c nezloä, ä?

<sup>10</sup> Dxejcti räjp Pabl lojni:

—Naj suga'a loj guejblu, ni gule reii César. Guejblu rnibee guiraa reguejdxre. Ree nungäj] cue'creni xquejä lo guejblu, xhet guedx Jerusaléni. Ananchee guejblu xhet latsiajdi benä lo rexpejn Israel. <sup>11</sup> Palga nacä te benguijdx, o palga yu' xhi latsiaj benä te nungäj] guetä, xho dina xcäbä guetä. Palga xhet latsiajdi benä nani canii rexpejn Israel benä, dxejc rutliidi sajc guteed narä ladzñaareni. Suchale'creni xquejä lo César nani najc reii xten reben roman —räjp Pabl.

<sup>12</sup> Che guninäjn Festo reguxhtis xten xquidoro rexpejn Israel, räjpni lo Pabl:

—Luj gunablu chäällo loj reii César. Mbaj. Sijlu lo reii César —räjp Festo.

*Huixiireni Pabl huinärenini lo reii Agripa*

<sup>13</sup> Che gudejd balti dxej, bidzujn reii Agripa nájza cháälni Berenice guedx Cesarea. Biädhuiireni gubernadoor Festo. <sup>14</sup> Che guyu'reni ro'c xchej, bij Festo diidx lo Agripa xcuent Pabl. Rájpa Festo lojni:

—Ree niäusijc te niguii ni laa Pabl ni basa'n Pels. <sup>15</sup> Che guyu'ä guedx Jerusalén, rebixhojz ni rnibee nájza rebengool xten rexpejn Israel gule'c xquejni loä. Rlajzreni guinibeä guetni. <sup>16</sup> Rápä lojreni: “Di leii xten nación roman gusaan guet te bejn palga di bejn jiädxgaa te guiniireni nez lojpacni xhi bejn niguiiga, te guzejcza niguiiga diidx xcuent requej, te guiniini la guliireni.” <sup>17</sup> Ni'cni che biäd rexpejn Israelga lo guejdxre, che bara yääl guregacä lo yagxhil xten gubernadoor. Dxejc guinibeä huixiireni Pabl guzuj nez loä. <sup>18</sup> Benä xhigab pet yu' xhi cosro bejn. Luxh che gusloj cabe'creni xquejni, gucbegacä xhet latsiarodi bejn Pabl. <sup>19</sup> Alga cadilnäjrenini xcuent xleiireni, xcostumbrreni. Guniizareni xcuent te niguii ni laa Jesucrist. Agujtni, niluxh canii Pabl gubansacni lo rebengut. <sup>20</sup> Guxii nanä xcuent sa' diidxre, ni'cni gunabdidxä lo Pabl top sicäjbni chanääni guedx Jerusalén te ro'c cue'c rexpejn Israel xquejni. <sup>21</sup> Dxejc che gunii Pabl lojpac reii César chale'c rexpejn Israel xquejni, ni'c guinibeä jiäusijcni laj ni gac guxhaläni lo César —rájpa Festo.

<sup>22</sup> Dxejcti rájpa Agripa lo Festo:

—Narä rlazäza jiejn diagä xtidx niguiiga —rájpa Agripa.

Dxejcti rájpa Festo lojni:

—Guixee gucuadiaglu xtiidxni —rájpa.

<sup>23</sup> Che bara yääl, biäd Agripa nájza Berenice, luxh sucheduxhreni. Nájza recapitán ni sajcro nájza rebejn ni sajcro lo guejdxga biu'reni neñ yuro xten Festo. Dxejc guinibeä Festo biäd Pabl. <sup>24</sup> Dxejcti rájpa Festo lo guiraa reni re' neñ yuro:

—Reii Agripa nájza guiraa rebejn ni tre' ree, colcuadiag. Colhuii lo niguiire. Reni rnibee xpejn Israel guedx Jerusalén nájza guejdxre agule'c xquejni loä, canabduxhreni guetni. <sup>25</sup> Niluxh narä rchaloä xhet bejndini te nungäjil guinibeä guetni. Luxh lagajc laani gunabni cháäni te gac César juejz lojni, ni'c runä xhigab guxhaläni lojni. <sup>26</sup> Naj dina ganä xhini'c gucuaä lo guijtz te guxhaläni lo César ni rnibee narä. Ni'c biädnää niguiire nez lo guiraatu, ganid nez loj guejblu, reii Agripa, filaa guejblu te gaxäjsi che aguiniini xtiidxni lo guiraanu, sidxälä xhi diidx gucuaä lo guijtz ni cháä lo César. <sup>27</sup> Narä runä xhigab di nungäjil guxhalä niguiire ni niäu latzguuib lo César palga di gacdi gusule'ä xhi quej xcuentni cabe'c rexpejn Israel loä.

## 26

*Gunii Pabl rextiidxni lo reii Agripa*

<sup>1</sup> Dxejcti rájpa Agripa lo Pabl:

—Gunilaa xtiidxlu loonu.

Dxejcti guläs Pabl naani, gusloj cagusule'ni diidx lojreni. Rájpa:

<sup>2</sup> —Reii Agripa, rbalazduxhä sa'csi sajc gusule'ä diidx lo guejblu, sa'csi naj suze'cä diidx xcuent guiraa requej ni gule'c rexpejn Israel. <sup>3</sup> Sa'csi guejblu nanduxh xcuent guiraa releii xten rexpejn Israel. Najza guejblu xhicuent rdxagdijl sa'reni. Ni'c rniabduxhä na'c jieed guejblu gucuadiaglaa guejblu guiraa rextiidxä.

<sup>4</sup> Rájpa Pabl:

—Guiraa rexpejn Israel nanchee xho nacä che gucäli biuux guedx Jerusalén. Galooli najc guedx Jerusalén ladxä. <sup>5</sup> Galooliza numbeereni narä, malaii guicäjpreni gucä te farisee nani bazobduxhru xleiinu si'cni rililajznu. <sup>6</sup> Naj suga'a ree, rlajzreni jiäuä sa'csi rililazä diidx nani bia'n Dios con retoxtadgoldoonu. <sup>7</sup> Guitzubiop cuaa rexpejn Israel huililajz siliäs Dios guiraa rebengut te guibansacreni. Ni'cni bazuxhijbreni lo Dios dxejyäl. Naj rniliä lo guejblu reii Agripa, sa'csi rililazä siliäs Dios guiraa rebengut te guibansacreni, ni'cni rlajzreni gusauren narä. <sup>8</sup> Palga abejn Dios xhigab guiliäsni guiraa rebengut te guibansacreni, ¿xhicuent di lajztu chalii xtidx Dios?

<sup>9</sup> Rájpa Pabl:



—Narä benäza xhigab galoo nanabpac guidxe'chä loj rexpejn Jesucrist ni siäd Nazare't, ni'c batedäreni trabajwduxh basäuäreni nen latzguiib. <sup>10</sup> Guiraa recosre benäza guedx Jerusalén. Baniidx rebixhojz ni rnibee guiitz loä te basäuä rexpejn Jesucrist nen latzguiib. Che biäreni nen latzguiib, narä gule'cä xquejreni te gujtreni. <sup>11</sup> Balti huält basacsiduxhäreni lagajc nen reguidobäz te niniyajreni Jesucrist. Luxh basacsiduxhäreni, hua'a guideb nez reguedxzijz te ro'c huisacsíä rexpejn Jesucrist.

*(Hch. 9:1-19; 22:6-16)*

<sup>12</sup> Räjzpa Pabl:

—Ni'c sa'a nez guedx Damasco, ca'a guiitz ni baniidx rebixhojz ni rnibee. <sup>13</sup> Rniliä lo guejblu, reii, si'cti läidxej, bahuiä te bajl ni siäd xhaguibaali. Rsanijruni loj gubijdx. Basanijni guideb gabi cadro suga'a näjza reni sanää. <sup>14</sup> Che biabrloonu lo yuj, biejn diagä xse' te ni canii loä con didx hebreo: “Saulo, Saulo, ¿xhicuent rusacsílu narä näjza rexpenä? Che rusacsílu narä, lagajc luj rdejdlu trabajw, si'c te gon ni rucuaní' yejc garu'ch.” <sup>15</sup> Dxejcti räpä lojni: “¿Chu luj Dad?” Dxejc najni loä: “Narä nacä Jesucrist nani cagusacsíduxhlu. <sup>16</sup> Huistie, gusulii. Narä baluiloä lojlu sa'csi rlazä gaclu te xpenä. Aguleälu te gusule'lu lo rebejn guiraa ni bahuiilu nadxej, näjza guiraa recos ni churu guluiä lojlu. <sup>17</sup> Naj suxhalälu loj rexpejn Israel näjza lo rebenzjiz nani di gac xpejn Israel. Che gusacsí rexpejn Israel näjza rebenzjiz luj, sacnäduxhälu, te di ju'treni luj. <sup>18</sup> Gacnäá lastooreni te che jiejn diajgreni xtidxä, chalilajzrenini, diru xcäriejnreni gac nayääl, sianij xcäriejnreni. Dxejc dirureni gusoob xtidx Benxhab ni rnibee rebenxhab, sa'csi susoobreni xtidx Dios. Che chalilajzreni rextidxä, sudzucaj Dios xtojlni. Dxejcti suchaag Diosreni loj renani anajc bennaya sa'csi basoobreni xtidx Dios, huililajzreni xtidxä.”

<sup>19</sup> Räjzpa Pabl:

—Ni'cni rniliä lo guejblu, reii Agripa, cayunä si'cni naj Jesucrist loä gunä che baluilojni loä. <sup>20</sup> Gunixgää xtiidxni lo reben Damasco. Räpä lojreni: “Colgusiechljaz, colgusoob xtidx Dios. Colyujn dzunsa'c te gacbee rebejn abasiechljaztu, arusoobtu xtidx Dios.” Si'cza guniä lo reben Jerusalén, näjza lo rebejn ni yu' reguedx Judea, näjza lo rebenzjiz ni di gac xpejn Israel. <sup>21</sup> Sa'csi benä si'c, gunaaz rexpejn Israel narä nen guidoro, rlajzreni nugu'treni narä. <sup>22</sup> Naj racnäj Dios narä, naj sanuutis cagusule'ä rediidxga lo guiraatis bejn. Loj rebejn ni xhet rajpdi sigajc loj rebejn ni rapduxh. Rusule'ätis nani caj lo guiitz nani bacuaa toMoisés näjza guiraa reniguii nani gunii xtidx Dios. Laareni galooli guniireni xcuent xhini'c gac naj. <sup>23</sup> Najreni sidejd Crist trabajwduxh, sugu'trenini. Niluxh sa'csi ganiddoo laani guibansacni lo rebengut, ganiddooza laani suluiini loj rexpejn Israel näjza loj guiraa rebenzjiz guliipac xtidx Dios, sibansac bejn lo rebengut, si'c ni guniini galooli.

*Di Agripa nililajz xtidx Jesucrist*

<sup>24</sup> Lañ ni canii Pabl rediidxga lojreni, dip gunii Festo, räjpni lo Pabl:

—Pabl, yejclu cayajc. Pet sa'csi nanduxhlu guiitz ni'c cayajc yejclu.

<sup>25</sup> Dxejcti räjp Pabl lojni:

—Rniliä lo guejblu dad gubernador Festo, xhet rajpdi yecä. Ganax didxlii caniä.

<sup>26</sup> Ree suga' reii Agripa. Laani nancheeni guiraa rediidxre, ni'c guyasi caniä rediidxre lojni, dizana guidxebä sa'csi anajnni gulii guiraa ni gujc, sa'csi xhet xhiga'tzdi gujcreni.

<sup>27</sup> Guejblu reii Agripa, ¿la rililajz guejblu xtidx reniguii nani bacuaa xtidx Dios, ä? Nancheä rililajz guejblu diidxga —räjp Pabl.

<sup>28</sup> Dxejcti räjp Agripa lo Pabl:

—Tuche'nsi riäädx gunlu gan chalilazä xtidx Jesucrist te gacä xpen Dios.

<sup>29</sup> Räjzpa Pabl lojni:

—Xhet najpdi palga guxii o xhidajl cayäädx, narä canabä guniidx Dios chalilajz guejblu xtiidxni si'c rililazä xtiidxni, nägajcza guiraa reni cacuadiajg xtidxä te gactu si'c nacä, niluxh xhet näjdi resa' cadenre —räjp Pabl.



<sup>30</sup> Dxejcti huisu Agripa, Festo, Berenice, nájza rebejn ni sobganäjreni. <sup>31</sup> Che gubigreni stelaad, räjpreni lo sa'reni:

—Niguiire xhet bejdini te guetni, xhetza bejdini te jiäuni.

<sup>32</sup> Dxejcti räjp Agripa lo Festo:

—Paru dini niniab chääni lo César, sajc nuslaanuni.

## 27

### *Birii Pabl sää nez guedx Roma*

<sup>1</sup> Basoobtireni dxej ni niu'nu neñ barcw te chonnu Italia. Dxejc bateedreni Pabl nájza sgaii bejn nani niäuzä lo capitán ni laa Julio. Rnibee Julio te gayuu soldaad, najczeni te cuaa ni laa Augusto. <sup>2</sup> Nájza te dade' ni laa Aristarco guzaj, siädni guedx Tesalónica xten Macedonia. Biu'nu neñ barcw ro' guedx Cesarea. Barcwga siäd guedx Adramitio. Biriitinu, najc xhigab teednu nez reguejdx nani yu' ro' nisdoo lo reyuj xten Asia. <sup>3</sup> Che bara yääl guläjz barcw ro' guedx Sidón. Huenduxh gujc Julio con Pabl, basaanni bihuii Pabl reexamigwni ni yu' guejdxga te bahuiireni Pabl, badeedreni xhi rquiinni. <sup>4</sup> Che säsac barcw lo nisdoo, bideednu stelaad Chipre, yuj ni tre' lo nisdoo, sa'csi säab te beduxh, ni'c naga' Chipre xladbäigwnu, te guxiiru rda' bej loonu. <sup>5</sup> Che sonnu neñ barcw, bideednu xnisdoo reguedx Cilicia nájza xnisdoo reguedx Panfilia, te bidzunnu ro' guedx Mira xten Licia. <sup>6</sup> Ro'c bidxäjl capitán xten resoldaad stee barcw ni siäd guedx Alejandría. Agojl chää barcwga Italia. Bateedtini guiraanu lo barcwga. <sup>7</sup> Balti dxej chäigaj sonnu lo nisdoo. Trabajwduxh bidzunnu lo nisdoo ro' guedx Gnido, sa'csi entis cabi' beduxh nez cadro sonnu. Ni'c trabajwduxh bideednu xladbäigw yuj Creta ni tre' lo nisdoo xladbeenu. Gudejdu guedx Salmón. <sup>8</sup> Dxejcti chäiduxh sonnu neñ barcw lo nisdoo nez cuä' yu Creta; si'ctis gujc bidzunnu te lajt ro' nisdoo ni laa Buenos Puertos cadro guxii säab bej. Gajxh ro'c tre' guedx Lasea. <sup>9</sup> Agujc balti dxej cayaclaanu, luxh agudejdzä dxej ni rucua'n rexpejn Israel, guxii riädäx chaa ijz. Rebäire di bejn chää neñ barcw sa'csi yuduxh riesgw lo nisdoo, ni'c balijdx Pabl rebejn, <sup>10</sup> räjpni lojreni:

—Rexamigwä, runxgää bis guejbtu, palga chonnu neñ barcw chanuunu xnejznu, sajc te liädxduxh. Sinitloj cargw, sibijxh barcw, luxh silo' xhidajl bejn, —räjpni.

<sup>11</sup> Niluxh di capitán xten resoldaad niu xtidx Pabl. Biuruni xtidx nani rusaj barcw nájza xtidx baxhuaan xten barcw. <sup>12</sup> Luxh sa'csi lajtga dini gajc huen tedreni rebäi nałduxh, bejnreni xhigab hueenru guiriinu ro'c te chonnu guedx Fenice ni tre'za lo yu Creta, sa'csi di bej guibiduxh ro'c. Hueenru ro'c guilääznu ted rebäinajl, rajpreni.

<sup>13</sup> Ni'c che gusloj cabi' te bebäz nez lad sur, naareni pet xhet najcdi guiriinu lo nisdoo con barcw. Dxejc baslaareni barcw, sontinu ro' nisdoo gajxh cuä' Creta. <sup>14</sup> Niluxh di niaclaa gusloj te nisguipeduxh birii nez redajn xten Creta. <sup>15</sup> Gunaaz bejga barcw, diru gacdi gusajrenini. Basa'ntireni sanä bejga barcw cadrotis rlajzni. <sup>16</sup> Siädgobiuuj barcw te canuu. Che bidzunnu stelaad te yuje' ni tre' lo nisdoo ni laa Claudia, guxiiru cabi' beduxhga. Dxejcli bejnreni gaan guläsreni canuu neñ barcw. <sup>17</sup> Che basälnu canuu neñ barcw, cua'reni gaii duro te baliibreni barcwro, bateedreni gaii duu xque' barcw te na'c guibiłni. Cadxebreni te di chachu' barcw lo yujxh ni laa Sirte ni yu' neñ nisdoo. Ni'c guläjtreni ladro ni rniaaz bej te rusajni barcw, gudixhreni lajdga neñ barcw. Sanäti beduxhga barcw cadrotis rlajzni. <sup>18</sup> Che bara yääl caguscuä' beduxh barcw lo nisdoo. Sas basälreni che'n cargw lo nisdoo te bicharu barcw. <sup>19</sup> Ni riojn dxej, lagajc laareni basälreni lo nisdoo guiraa xtrast barcw. <sup>20</sup> Che agujc balti dxej niäü lo gubijdx, diza rebale' nien xhaguibaa sa'csi lałtis cayajb nisguipeduxhga, biennu xhigab guiraanu sejtnu. <sup>21</sup> Xchero rut rlajzdi gau. Dxejc gusuj Pabl galäi rebejn räjpni lojreni:

—Rexamigwä, paru nucuadiajg guejbtu xtidxä, na'c niriitu xyuj Creta, di liädäxre niajc, dizanu nidejd trabajwduxhre. <sup>22</sup> Niluxh colcuedcxi lastootu. Niclatej bejn ni siäd lo barcw di guet. Barcwtis sinitloj. <sup>23</sup> Nacä te xpejn Dios, runä xhitis ni rnibeeni gunä. Nayääl biädsuj te xangl Dios cuä'ä, <sup>24</sup> najni loä: “Na'c guidxjblu Pabl. Nanabpac chäälü lo reii César. ¡Bahuilaa! Abasalajz Dioslu reni siädnälu; nicla tej reni yu' neñ barcwre

di guet", najni loä. <sup>25</sup> Ni'cni caniä lo guejbtu, na'c guidxejbtu. Narä rililazä xtidx Dios. Rililazä sisiojb xtidx Dios si'c ni naj xangl Dios loä. <sup>26</sup> Niluxh yu' cadre chalaj barcw lo yujx nen nisdoo gajxh lo te yuje' ni tre' nen nisdoo —räjp Pabl.

<sup>27</sup> Si'cti tiop xman balanaa beduxhga barcw nezre, nezrec lo nisdoo ni laa Adria. Pet garol yääl ni bejn reniguii ni ruzaj barcw xhigab abidzujn barcw gajxh lo yuj, <sup>28</sup> ni'c bastejbreni te guiib lo duu xhajn nisdoo, te barexhreni ro'c, dxejc gucbeereni najc nisdoo jäät si'cti galbitzubixho'p metr. Che guzaj barcw stelabäze', bastebsacreni guiib con duu xajn nisdoo, dxejc gucbeereni ro'c najc nisdoo jäät si'cti galbigajdz metr. <sup>29</sup> Dxejc bidxejbreni te di chalaj barcw yejc reguij. Bacuaatireni tajp guibro si'c guench ni naliib te caden te ru'reni nen yujxh te ruscuääzreni barcw, te jia'nni tejsi lajt. Dxejc rlanjreni malaii jianijga lo guedxliuj. <sup>30</sup> Dxejcti gulät remos canuu lo nisdoo cayujnsireni si'cni chastejbreni stee guench guiib lo nisdoo, niluxh rlanjreni guxunreni guidon la sajc guidzujnreni ro' nisdoo. <sup>31</sup> Dxejcti räjp Pabl lo capitán näjza lo resoldaad:

—Palga di redee jia'n nen barcw, di gacdi guslaatu xcäl nabajntu —räjpn.

<sup>32</sup> Dxejcti batiugya' resoldaad duu ni naaz canuu te bitejbni lo nisdoo, sanäti nisdoo canuuga. <sup>33</sup> Che gusloj cayani, gunibee Pabl, räjpni lojreni:

—Nadxej rajc tiop xman gajdtu gues, gajdzatu gau. <sup>34</sup> Naj coltajw te gac guixoobtu lo nisdoo. Na'c guntu xhigab guettu, nicla tej xquidxejcti di nitloj.

<sup>35</sup> Che gulujx gunii Pabl si'c, cua'ni yätxtiil, badeedni xquixtios lo Dios nez loj guiraareni. Dxejc gula'nini, gusloj cayajwnini. <sup>36</sup> Dxejc bibaa-lajzreni, näjza laareni gusloj cayajwreni. <sup>37</sup> Nuunu najcnu tiop gayuu gayonbitzubixho'p bejn ni yu' nen barcwga. <sup>38</sup> Che agujc gudajwreni, basälreni triuu lo nisdoo te bicharu barcw.

<sup>39</sup> Che bianisac, direni niembee yujga, niluxh bahuiireni cadre rdzujn te gueubaz ro' nisdoo cadre yu' xhiroob yujxh ro' nisdoo. Rlanjreni nusiureni barcw ro'c. <sup>40</sup> Dxejcti baslaareni guidap guench guiib ni naaz barcw, bia'nreni guideb caden nen nisdoo, baxheczareni yajg ni ruzaj barcw, guläszareni ladro nez delant barcw te balanaa bej barcw. Badzuréreni barcw sääreni nez ro' nisdoo. <sup>41</sup> Sas biu'reni te lajt cadre rdxagsa' tiop cuaa nis. Ro'c huilaj yejc barcw nen yujxh nen nisdoo, digacdiru guiniibni. Dxejcti gusloj cabijl dejtz barcw sa'csi sanuutis caguijn nisdoo detz barcw. <sup>42</sup> Dxejcti rlanj resoldaad nugu't repres te di guixoobreni lo nis guxunreni. <sup>43</sup> Niluxh di rlanj capitán xten resoldaad guet Pabl, ni'c dini nusaan nugu't resoldaad repres. Gunibee capitán ganiddoo renani rajc rxoob lo nis guitiäjs lo nisdoo te guidzujnreni lo yujxh. <sup>44</sup> Dxejcti birinajl rebejn ni digacdi guixoob lo nis, naazreni barajd o te la' yajg ni gula' detz barcw. Si'c gujc bidzujn guiragajc rebejn lo yujxh ro' nisdoo. Nadaanreni bidzujnreni lo yujxhga.

## 28

*Bidzujn* Pabl lo yuj ni laa Malta ni re' lo nisdoo

<sup>1</sup> Che bidzujn nu lo yuj ni tre' lo nisdoo, biembeenu yujga najc ni laa Malta. <sup>2</sup> Gucnä j rebejn ro'c nuure, gule'creni guiboo bahuiireni nuure sa'csi cayacnalduxh, cayajbza nisguij. <sup>3</sup> Ca' Pabl te däaz yajg, sale'cnini lo guiboo, chela biriyäl te bäl nialajz nen yajgga. Saa gudauya'ni naa Pabl. <sup>4</sup> Che bahuii reben Malta li najl bäl nialajzga cayauya' naa Pabl, gusloj cayäjbreni lo sa'reni:

—Pet rugu'tni bejn ni'c mase bejn ni gaan lo nisdoo siguijxni xtojlni, sejt ni naj.

<sup>5</sup> Gubijb Pabl naani dxejcti bitejb bälga lo guiboo. Xhet gujcdi naa Pabl. <sup>6</sup> Dxejc reben ro'c cabä jz fiireni la sisiäguj naa Pabl o laa sejt ni. Xchero bidxelojreni. Che bahuiireni xhet gujcdini, gusloj bejnreni ste'ca xhigab, räjpreni lo sa'reni:

—Pet dios najcni.

<sup>7</sup> Gajxh ro'c naga' xyuj te dade' ni laa Publio ni najc xcubernadoor Malta. Biojia'nnu rolizjni chon dxej. Huenduxh gujc dade'ga, baniidxni guiraa ni biquiinnu. <sup>8</sup> Naga' xtd Publio cayacxhuuni, yu'ni xliaa, cayajczani yobrejn. Huihui Pabl ni. Guredx-gunab Pabl lo Dios, dxejc batzuub Pabl naani yejcn, basiacgajcnini. <sup>9</sup> Che gucbee rebenguejdxga abasiajcn bejn racxhuuga, bidzunnä jreni bejn racxhuu lo Pabl, basiajcn Pabl guiraareni.

<sup>10</sup> Ni'c banidx-xliaareni xhidalduxh xhicos, luxh che biriinu ro'c, baniidxreni guiralii recos ni biquiinnu nen̄ barcw.

*Bidzuj̄n̄* Pabl guedx Roma

<sup>11</sup> Agujc chon̄ bäii yu'nu ro'c che biu'nu nen̄ te barcw ni siääd Alejandría. Lagajc ro'c bateed barcwga rebäinajl̄ che rsiäb beduxh. Yejc barcwga caj tiop figuur xten tiop biuux ni laa Cástor näjza Pólux, rexingancua'ch dios ni laa Zeus. <sup>12</sup> Biriinu Malta sonnu nen̄ barcw nez guedx Siracusa. Ro'c bia'nnu chon̄ dxej. <sup>13</sup> Dxejcti biusacnu nen̄ barcw, sonnu lo nisdoo cheni bidzun̄linu guejdx ni laa Regio. Che bara yääl, gubi' te bej birii lad sur. Biusacnu nen̄ barcw. Bara yääl bidzun̄nu guedx Puteoli. <sup>14</sup> Ro'c bidxaagnu gaii xpejn̄ Jesucrist. Najreni loonu:

—Coljiannäj nuunu —najreni.

Bia'nnu ro'c gajdz dxej. Dxejc biriinu guejdxga, ni'nu sonnu nez guedx Roma. <sup>15</sup> Che gucbee rexpejn̄ Jesucrist ni yu' guedx Roma siopsaanu nez Roma, biäädreni guedx Foro de Apio näjza stee guejdx ni laa Tres Tabernas, ro'c bidxaagreni nuure. Che bahuii Pabl lojreni, guzutijp lastooni, badeedni xquixtios lo Dios. <sup>16</sup> Che biu'nu guedx Roma, bateed capitán repres ladz̄naa comandant, niluxh basaanni cualaa Pabl te yu' cadre cuääzni. Tejtis soldaad biannäj Pabl.

*Baluii Pabl xtidx Dios lo reben̄* Roma

<sup>17</sup> Che gudejd chon̄ dxej, gurejdx Pabl reni rnibee lo rexpejn̄ Israel. Che bidxaag sa'reni cadre yu' Pabl, räjpni lojreni:

—Guejbtu rexamigwä, resa'ä, xhetliidi nani xhet laadi benä lo rexpejn̄ Israel, dizana nibälazä xleii toMoisés. Niluxh basäureni narä nen̄ latzguuib guedx Jerusalén, dxejcti bateedreni narä ladz̄naa reroman. <sup>18</sup> Che biejn̄ diajgreni xtidxä, rlanj reguxhtis roman nus̄laa narä sa'csi xhet benädi te nugu'treni narä. <sup>19</sup> Niluxh naaddi rexpejn̄ Israel gus̄laareni narä, gunabätis lojpac rei César jiädle'creni quej ni cabe'creni xcuentä. Niluxh narä xhet xquejdi rexpejn̄ Israel cue'cä. <sup>20</sup> Ni'cni guredxä la'tu te fiä lojtu, te guininää la'tu, sa'csi rililazä lagajc si'c rililajz xpejn̄ Israel sibansac rebengut, ni'c nalibä cadenre.

<sup>21</sup> Dxejcti räjpreni lojni:

—Nicla tej guijt̄z gajd reguxhtis xten reguedx Judea guxhaḷ loonu xcuentlu, gajdza rexpejn̄nu ni bidzuj̄n̄ ree jiädsa'n diidx xhet laadi bejnlu. <sup>22</sup> Rlanjnu jiejn̄ diajgnu xtiidxlu, don xhi naalu, sa'csi racbeenu xhidajl̄ lajt rniyajreni redidxcoob xten Jesucrist —räjpreni.

<sup>23</sup> Guletireni te dxej guidxagsa'reni. Che bidzuj̄n̄ dxejga, bidxagsa' xhidalduxh bejn̄ nen̄ yu' cadre rbäjz Pabl. Guideb̄ dxej basule' Pabl xtidx Dios lojreni. Basule'ni xho rnibee Dios lojreni. Con rediidx ni caj lo xleii toMoisés näjza diidx ni bacuaa reniguii nani gunii xtidx Dios basule'ni Jesús najc Crist nani galooli cabäjz reben̄ Israel jiääd. <sup>24</sup> Yu' reni huililajz xtidx Pabl, yu'za reni di nililajz xtiidxni. <sup>25</sup> Sa'csi di niajcdi niujnreni tejsi xhigab gusloj siireni. Ganiddoo räjp Pabl lojreni:

—Guliica naj toIsaías che badeed Sprit Dyan xten Dios rediidxre guniini, räjpni lo rextadgoldoonu:

<sup>26</sup> Huij, gunii lo rebejn̄re, scree gojz lojreni:

Siejn̄ diajgtu xtidxä, niluxh ditu gacbeeni.

Suhuiitu nani runä luxh ditu gumbee xhini'c ruhuiitu.

<sup>27</sup> Agucnajd lastoo rebejn̄re sa'csi di rlanjreni chalilajzreni xtidxä.

Direni cuadijg xtidxä sa'csi di rlanjreni jiejn̄ diajgreni diidx ni guliipac.

Rusäuzareni balojreni te di fiireni, te di lajzreni chalii.

Ni'cni direni gusiechljazreni te gusaan gunreni dojl̄ te gudzucaj Dios xtoj̄lreni.

<sup>28</sup> Räjp Pabl lojreni:

—Colgacbee. Najli sisiule' xtidx Dios lo reben̄zijt̄ ni di gac xpejn̄ Israel te gusiejch lajzreni, te gudzucaj Dios xtoj̄lreni. Rniliäpac lojtu, sililajzreni rextidx Dios.

<sup>29</sup> Che gulujx gunii Pabl rediidxga lojreni, ensilaareni gusloj cadxagdijl sa'reni laḷ ni sääreni.

<sup>30</sup> Tiop ijz guläjz Pabl guejdxga neḅ yu' ni cualaani. Biuni guirali rebejn ni biääd rolijzni. <sup>31</sup> Lo guiraa rebejnga basule'ni xho rnibee Dios lojreni. Bijzani diidx xcuent redzuun nani bejn Jesucrist. Di lastooni nidxejb, rutza badxojndi guniini.

## Guijtz Nani Bacuaa Pabl Lo Rebe<sub>n</sub> Roman

*Rucuaa Pabl lo rebe<sub>n</sub> guidoo ne<sub>n</sub> guedx Roma*

<sup>1</sup> Narä, Pabl, nacä te xmos Jesucrist, laani gule narä te gusule'ä xtidx Dios loj rebe<sub>n</sub>.

<sup>2</sup> Agujc xchero bia'n Dios diidx loj renani basule' xtiidxni, suniidxni diidxre loonu, luxh diidx ni bia'n Dios caj lo gui<sub>j</sub>tz xten reprof'e'tga. <sup>3</sup> Rediidx ni rusule'ä najc xcuent Jesucrist, Xi'n Dios, ni najc xagdooreii David xcuent tiejxhni. <sup>4</sup> Xcuent Xsprit D<sub>x</sub>an Dad Jesucrist, najcni Xi'npac Dios. Badeed Dios yäl<sub>r</sub>nibee lojni, ni'cni gubansacni lo rebe<sub>n</sub>gut. <sup>5</sup> Laani gucnäjni narä, guleni narä te gusule'ä xtiidxni te guzobdiajgtu, te chalilajz rebe<sub>n</sub> ni rej guideb guedxliuj xtiidxni. <sup>6</sup> Luxh nadxaagtu loj rebe<sub>n</sub> ni guleni te chalilajzreni xtiidxni.

<sup>7</sup> Ruxhalä gui<sub>j</sub>tzre lojtu ni yu' guedx Roma, guiraatu ni sanälajz Dios ni bibeetu gactu be<sub>n</sub>d<sub>x</sub>an. Gacnäj Dios ni najc Xtadnu näjza Dad Jesucrist la'tu, guscuecdxireni lajztu.

*Rlajz Pabl chää guedx Roma*

<sup>8</sup> Ganidtoo rudedä xquixtios loj Dios con laj Jesucrist xcuent guiraatu, sa'csi guideb guedxliuj rujy be<sub>n</sub> diidx xcuent xcäl<sub>r</sub>rililajztu. <sup>9</sup> Lagajc Dios anajn xho rniabä guet-guejt xcuent la'tu lojni. Narä runä xtuun Dios guideb lastoä, rusule'ä diidx xcuent Xi'nni Jesucrist. <sup>10</sup> Sanuutis canabä lojni, top sajc jädhuiä lojtu si'cni rlazä gunä agujc xchejli.

<sup>11</sup> Sa'csi rlazduxhä fiä lojtu, te gacnäätu, te gulidxä la'tu xhi te xtidx Dios te sudzu'tzrutu lo xtiidxni. <sup>12</sup> Nalajznu, te gustioobnu lajz sa'nu xcäl<sub>r</sub>rililajz xtidx Dios xten sa'nu.

<sup>13</sup> Rebetzä rlazä gacbeetu balti huält benä xhigab jädhuiä lojtu, luxh gajd gacdi jäälä. Rlazä jädhuiä lojtu te chalilajz xhidajlru be<sub>n</sub> xtidx Dios sigajcni salilajzreni guiralajt cadro hua'a loj rebe<sub>n</sub> ni di gac xpe<sub>n</sub> Israel. <sup>14</sup> Nungäjlpac gusule'ä xtidx Dios loj rebe<sub>n</sub> nani rnii garen-garen didxsaj, sigajc loj rebe<sub>n</sub> griegw, loj renani nayääl, sigajc loj rebe<sub>n</sub> najn. <sup>15</sup> Rbaali lazä suga'a naj, te gusule' xtidx Dios näjza lojtu ni yu' guedx Roma.

*Xcäl<sub>r</sub>nibee xtidx Dios*

<sup>16</sup> Sa'csi dina guituiä xcuent xtidx Dios, sa'csi najcni yäl<sub>r</sub>nibee xten Dios te guslaani lo dojl chutis be<sub>n</sub> nani r<sub>l</sub>ajz chalilajz xtiidxni, ganidtoo reni najc rexpe<sub>n</sub> Israel, dxejcti näjza rebe<sub>n</sub> ni di gac xpe<sub>n</sub> Israel. <sup>17</sup> Sa'csi xtidx Dios rusule' xho nanab chalilajz te be<sub>n</sub> te gacni te be<sub>n</sub>sa'c nez lo Dios sa'csi huililajzreni xtiidxni. Lo xtidx Dios caj scree: "Palga rililajz te be<sub>n</sub> xtidx Dios, najcni te be<sub>n</sub>naya nez lo Dios, nabannäjni Dios xcuent xcäl<sub>r</sub>rililajzreni."

*Rextoj<sub>l</sub> be<sub>n</sub>*

<sup>18</sup> Xcäl<sub>r</sub>dx'e'ch Dios nani yu' xhaguibaa siaj<sub>b</sub>ni yejc rebe<sub>n</sub> nani gun dojl, nani r<sub>l</sub>ajz gun cosguijdx, nani di gusaan guisieed sabe<sub>n</sub>reni didxgulii. <sup>19</sup> Sa'csi anancheereni nani sajc gan be<sub>n</sub> xcuent Dios, ni'cni najnreni rajpreni dojl, sa'csi ruluipac Dios na'c gunreni dojl. <sup>20</sup> Cheni birixtiejli guedxliuj, recos nani di gacdi fii be<sub>n</sub> xcuent Dios, si'c xcäl<sub>r</sub>nibeeni ni najc par tejpas, si'c xtujxh xtenni, huenliisi ruzenreni sa'csi ruluilojreni recos ni ruzen nani benchee Dios. Guiraa reni'c ruluiloj najcni Gueb Dios ni rajp yäl<sub>r</sub>nibee par tejpas, ni'c di gacdi guiniireni loj Dios direni niembee xhini'c r<sub>l</sub>ajz Dios gunreni. <sup>21</sup> Ni'cni, mase biembeereni Dios, direni niliä'p xpala'nni te ganreni Gueb Dios, dizareni nudeed xquixtios lojni. Alga guyalajz gujcreni, bicäy<sub>j</sub> xcäriejnreni, naareni hueen najc gunreni si'ctis ni jiaj<sub>b</sub> yejcreni, si'cni rsia' lajzreni ne<sub>n</sub> lastooreni. <sup>22</sup> Caniireni nanduxhreni, per direni gan, nayäälreni. <sup>23</sup> Gulälazreni xcäl<sub>r</sub>dimbicha' Dios ni najc tejsi par tejpas, te bazuxhijbreni nez loj rebanäjb ni benchee naareni, ni najc guiraa ni rujn lojni si'c rujn lo te niguii ni rnitloj, näjza guiraa ni najc si'c reman ni rutaj<sub>t</sub>, näjza guiraa ni najc si'c reman ni yu' tajp ni'ni, näjza ni najc si'c rebäj<sub>l</sub>.

<sup>24</sup> Ni'cni gulälaz Diosreni, basaanni gunreni si'ctis ni rlanjreni. Bejnreni dojl con resa'reni. <sup>25</sup> Sa'csi ahuililajzreni didx-xhii lacuaa nililajzreni xtidxlii Dios, ruzuxhi-jbzareni nez loj recos ni benchee Dios, lacuaa guzuxhijbreni loj Dios nani benchee guiraa rexhicos, Dios nacle' par tejpas. Sugacni si'c.

<sup>26</sup> Ni'cni gulälaz Diosreni, subia'nreni lo xcällatsiajreni, lo yälxtujy xtenreni. Diru regunaa guesnäjä niguii, lagajc sagunaareni resnäjäreni. <sup>27</sup> Sigajcza reniguii gulälaz regunaa, rujnreni dojl con lagajc saniguiireni. Luxh lagajc laareni siguijxreni latsiaj ni rujnreni.

<sup>28</sup> Luxh sa'csi di rlanjreni jiureni Dios, basaanti Dios suyu' cosguijdxctis xcäriejnreni, te chanuutisreni lo xcällatsiajreni, rujnreni recos ni xhet laadi. <sup>29</sup> Guidxareni dojl, näjza cosguijdx, näj yälruguilajz xhixten sa'reni; rugu'treni bejn, rujnreni yälrsiäblajz, rucuanäjreni resa'reni, rusgueereni sa'reni, rdxechnäjreni sa'reni, rniizareni didxxhii. <sup>30</sup> Rniyaj sa'reni, rdxe'chreni lo Dios, gualajzreni, dipacreni guitujy, rliä'preni lagajc xpala'nreni, entis latsiacoob rbäxtiejreni, gualajzreni lo xcuzajnreni, <sup>31</sup> nadduxhreni, xheti xcäriejnreni, xhet sajcdi xtiidxreni ni ria'nreni lo sabejnreni, direni chanälajz sa'reni si'cni nungäjlgacni, dizareni gulasajz sa'reni. <sup>32</sup> Luxh mase agucbeereni gun Dios yälguختis lojreni, najnzareni nungäjlguetpac renani rujn recosre, nicla jiureni, rujnreni guiraa recosguijdxre, luxh rbaali lajzreni richunäjreni rebejn ni rujnza recosguijdxga.

## 2

### *Dios rujn yälguختis con didxguliipac*

<sup>1</sup> Ni'cni, ¿canejz chäätu, la'tu benguedxliuj? Chutis luj ni rgubeelu sabejnlu, lagajc si'c cubeezareni luj, lagajc xcuent ni'c sajclu yälguختis, sa'csi luj rgubeelu sabejnlu, lagajcza luj rujnlu lagajc dojlga. <sup>2</sup> Nancheenu sujn Dios yälguختissa'c loj renani rujn sa' dojlga. <sup>3</sup> Ben guedxliuj ni rgubee loj renani rujn dojl, luxh sigajcza rujnlu, ¿la rujnlu xhigab sidedcaj gun Dios yälguختis lojlu xcuent xtojllu, ä? <sup>4</sup> O ¿la rbälazlu ni rujn Dios, najcni huenduxh, lacti guroob najc xcälrulasajzni, rapduxhzani pasens? ¿La dilu gan dee najc ni gacnäjlgu siechajzlu te guibicajlu lo dojl, ä? <sup>5</sup> Luxh sa'csi nadduxhlu, di lastoolu guigoodz te gusiechajzlu, cagutajllu yälguختis ni gaclu che guidzujn dxej ni gun Dios yälguختis loj reben guedxliuj, <sup>6</sup> siguijx Dios loj tejpgatu xcuent dzuun nani bejn tejpgatu. <sup>7</sup> Loj rebejn nani rlanjtisreni guibaṅsa'c, ni gusoob xtiidxni, sudeed Dios yälṅabajn par tejpas sa'csi gudiilreni xhaniduj näjza go'preni xpala'nreni loj Dios, rlanjreni guibajnreni loj Dios par tejpas. <sup>8</sup> Luxh sidxe'ch Dios, sidxe'chduxhni loj renani sanälajz lagajc laareni, nani di jiu xtidxguliini, alga rusoobreni reyällatsiaj, redidxguijdx. <sup>9</sup> Guiraa reben guedxliuj ni rujn dojl sidejd trabajwduxh näjza sac-huin lastooreni; ganid rexpen Israel, dxejcti näjza reben griegw. <sup>10</sup> Loj guiraa rebejn nani rujn cos-hueen, sudeed Dios xhaniduj, näjza bala'n, näjza yälrbecdx lastooreni, ganid rexpen Israel, dxejcti näjza reben griegw.

<sup>11</sup> Sa'csi tebloj najc guiraasi rebejn nez loj Dios. <sup>12</sup> Guiraa rebejn nani bejn dojl, luxh direni niembee xleii Dios, sinitlojreni sin leiiga; guiraa reni biembee xleii Dios, lagajc con leiiga sujn Dios yälguختisreni xcuent xtojlnreni. <sup>13</sup> Xhet ganaxdi renani rucudiajgtis xleii Moisés najc benṅnaya nez loj Dios; rebejn ni rusoobpac rexleii toMoisés, reni'c najc benṅnaya loj Dios. <sup>14</sup> Yu' xhidal bejn ni di gumbee xleii toMoisés, dizareni gac rexpen Israel, rujnreni recos ni caj lo leii. Najnreni xhini'c najc cos sa'c. Ni'cni lagajc xcäriejnreni najc si'c leii par laareni. <sup>15</sup> Recossa'c ni rujnreni ruluiloj nezyusa'c ni yu' lastooreni. Xcäriejnreni ruluiloj xhini'c loj guiraa nani rujnreni najc cos sa'c, xhini'c najc dojl. <sup>16</sup> Guiraa recosre sajcz che guidzujn dxej ni gun Dios yälguختis guiraa rexhigabxhiga'tz ni yu' lastoo rebejn. Jesucrist gac juejz lojreni, dxejcz sisiojb guiraa rediidx ni cagusule'ä lojtu.

*Rexpen Israel näj xleii toMoisés*



<sup>17</sup> Luj ni laalu xpen Israel, ni rniilu sanäpaclu xleii toMoisés, rniduxhlu najclu xpen Dios, <sup>18</sup> rniilu nancheezalu xhini'c rlajz Dios gunlu, anajnzalu xhini'c najc hueenru sa'csi bisiedsa'cpaclu leii. <sup>19</sup> Rchalolu sajc guluiilu nezyusa'c lo rebejn nani najc si'c lotiä'p, sajc guzanijlu xcäriejn reni nacäy xäriejnreni. <sup>20</sup> Rchalolu najclu maestr lo renani nayääl, najczalu maestr lo rebuux, sa'csi nansa'clu leii, luxh lojni caj guiraa yäl'najn näjza guiraa didxguliipac. <sup>21</sup> Ni'cni rniä lojlu, luj ni caguseed xtee bejn, ¿xhicuent dilu guseed lagajc luj? Luj ni rusule'lu diidx na'c cuan bejn, ¿xhicuent rbajnlü? <sup>22</sup> Luj nani rniilu na'c guesnäjni te ni di gac chääl'ni, ¿la resnäjlu nani di gac chäällu, ä? Rdx'e'chlu xcuent rebanäjb, ¿xhicuent rbäälü xhicos nen xquidoo rebanäjb, ä? <sup>23</sup> Luj rlajzlu chä'p xpala'nlu sa'csi najnlü leii, ¿la rusanxtujyulu Dios sa'csi dilu gusoob xtidx leiiga, ä? <sup>24</sup> Bahuii xho rebejn nani di gac xpen Israel rniyajreni Dios sa'csi la'tu ditu gusoob xtiidxni, rujntu dojl, sigajc ni caj lo xtidx Dios.

<sup>25</sup> Palga la'tu chutu bee si'cni caj lo leiiga, palga gusoobtu guiraa diidx ni caj lo leii, laaca. Luxh palga ditu gusoob guiraliipac xtidx leiiga, xlia'si guyu'tu bee, sa'csi rujntu dojl. <sup>26</sup> Ni'cni palga te bejn ni di chu beega, luxh rusoobni guirliipac xtidx leiiga, ¿la di gacdi guchaagni cuent najcni si'c te nani yu' beega, ä? <sup>27</sup> Bejn nani di chu beega, luxh rililajzni guiraliipac xtidx leiiga, sujnni yälguxhtis la'tu sa'csi mase yu'tu beega, luxh nanduxhtu leiiga, ditu gusoob xtidx leiiga, alga rujntu dojl. <sup>28</sup> Sa'csi xhet guiraadi rebejn ni yu' beega najc rexpejn Israel, luxh di beega ni ru' bejn gun gusoobpac bejn xtidx leiiga. <sup>29</sup> Najcpac te xpen Israel nani najcni nen lastooni, nani yu' bee lastooni, rusoobpacni xtidx Dios xcuent Sprit xteni, dini gunni sa'csi najctisni costumbr. Dios ni siliä'p xpala'nni, xhet bejndi.

### 3

<sup>1</sup> ¿Xhini'c sacnä j te bejn najcni te rexpen Israel, ä? O ¿xhi sajc chuni beega? <sup>2</sup> ¡Empac sacduxhni! Ganidtoo, sa'csi loj rexpen Israel badeed Dios xtiidxni. <sup>3</sup> Mase yu' renani di nililajz diidxga, ¿la ni'cni xhet sajcdi diidx ni bia'n Dios loj rexpejni, ä? <sup>4</sup> ¡Xho gacni si'c! Diostis najc guliipac, guiralii bejn rusguee. Scree caj lo xtidx Dios:

Lagajc xtiidxlu sului laaca rujnlü,  
te che gaclu yälguxhtis,  
nicla tej xtojllu di guidxäjl.

<sup>5</sup> Palga xcällatsiajnu ruluiiru najc Dios huenduxh, ¿xhini'c guiniinu dxejc? Palga gun Dios yälguxhtis nurru, dxejc tednu trabajwduxh, ¿la rujnni latsiaj loonu, ä? (Caniä si'c te bejn guedxliuj naj.) <sup>6</sup> ¡Xho gacni si'c! Paru najcni si'c, ¿xho mood gun Dios yälguxhtis loj rebejn guedxliuj?

<sup>7</sup> Paru redidx-xhii ni rniä riliä'pru xpala'n Dios näjza xtidxliini, ¿xhicuent gunni yälguxhtis narä si'c te bejndojl? <sup>8</sup> Yu'za bejn ni canii didx-xhii, najreni cayäjpnu lo rebejn: "Colyejn cosguijdx te guiluilojni recoshuen." Per rebejn ni canii si'c sidzujn dxej gacreni yälguxhtis.

#### *Guiraanu najcnu bejndojl*

<sup>9</sup> ¿Dxejca'? ¿La najcnu bejnhuenduxhru lojreni, ä? Dini gac; tebloj abile'cnu yälquij xten rexpen Israel con rebejn ni di gac xpen Israel, sa'csi guiraareni yu'reni lo dojl.

<sup>10</sup> Si'cni caj lo guijtz:

Ruti te bensa'c, nicla tejni.

<sup>11</sup> Ruti te bejn ni racbee,

ruti chu tej nani rguuil Dios.

<sup>12</sup> Guiragajcreni abirii lo xnejz Dios,

teblojsi xhet sajcdireni.

Ruti chu tej ni rujn cossa'c, nicla tejni.

<sup>13</sup> Ro'reni rii ganax didxguijdx,

najcni si'c te baa ni naxal,

rusgueereni con lujdxreni,  
didxlatsiaj rii ro'reni najcni si'c benen ni yu' ro' te bälñialajz.

<sup>14</sup> Ro'reni entis cague,  
entis canii didxrdxe'ch lo sa'reni.

<sup>15</sup> Ni'reni ruxunli saxhe' xtiejn sa'reni.

<sup>16</sup> Cadrotis rijreni rujnreni latsiaj,  
ruteedreni sa'reni trabajw.

<sup>17</sup> Direni gumbee nezyuj ni ruscuexdilajz.

<sup>18</sup> Niclaza guidxelojreni Dios.

<sup>19</sup> Racbeenu najc rediidx nani caj lo xleii Dios par rebejn ni rnibee leii lojreni, te jläuu ro' guiralii rebejn, te guiraa reben guedxliuj gacbeereni yu' xtojlni nez loj Dios. <sup>20</sup> Sa'csi mase gusoob bejn guira'ti diidx ni caj lo leii, di leiiga gudzucaj xtojlni bejnğa, sa'csi leiiga najc nani guluii dojl ni yu' nen lastooni.

*Rusläa Dios lo dojl xcuent yälñrililajz xtiidxni*

<sup>21</sup> Naj ruluii Dios stee mood guibicaj xtojlni, nani di gac mood ni caj lo xleii toMoisés. Luxh galooli gusloj canii Dios xcuent nezyujre, cajni lo reguijtz xten leii näjza lo reguijtz ni bejn rebejn nani gunii xtidx Dios galoo. <sup>22</sup> Stee mood najc scree: Chutis ni chalilajz xtidx Jesucrist, sajc naya lastooni nez loj Dios; si'c sajc garaliiza nani salilajz, sa'csi tebloj najcnu nez lojni. <sup>23</sup> Sa'csi guiralii rebejn guedxliuj abanijt lo Dios, direni guiga' guidzujreni lo xnezyuj Dios. <sup>24</sup> Niluxh balaslajz Dios nuunu, banidxxlia'ni loonu yälñabannaya nez loj Dios sa'csi Jesucristis gudijx yälguxhtis xten dojl che baxhe'ni xtiejn ni lo cruz te badzucajni xtojlni. <sup>25</sup> Baxhal Dios xi'nni, Jesucrist, te cuajni lo cruz nez loj rebejn te si'c gudijxni guiraa rextojlni chutis bejn ni rililajz xtidx Dios xcuent xtiejn Jesucrist. Si'c bejn Dios te guluiini xho guibannaya bejn lojni. Galoo gojptis Dios pasens rebejn, dini niujn yälguxhtis rextojlni, <sup>26</sup> sa'csi acanajn Dios guc gunni yälguxhtis redojlğa, te si'c guiluini xcälñayani nez loj guiraa rebejn, te Diospac gunnaya nez lojni chutis ni rililajz xtidx Jesucrist.

<sup>27</sup> Ni'cni ¿con yälñaro? ¿Con yälñbindaan? ¿Xhet sajc dini! ¿Xhi leii rudzucaj xtojlni? ¿La leii najc ni rnii jienu dzunsa'c, ä? ¿Dini gac si'c! Yu' tejtis leii ni rudzucaj dojl, nani rnii chalilajz tis bejn xtidx Jesucrist. <sup>28</sup> Dxejc sajc guiniä lojtu chutis bejn sajc gac naya nez loj Dios sa'csi rililajz ni xtidx Jesucrist, xhet sa'csi rujn ni redzunsa'c ni caj lo leii.

<sup>29</sup> ¿La najc Dios Xtiooztis rexpenn Israel, ä? ¿La dini gac näjza Dios xten rebejn ni di gac xpen Israel? ¿Xho dini gac! Najcni Dios xten guiroc cuaa bejn. <sup>30</sup> Ruti chu stee Dios, tejtis Dios yu'. Rusläani lo dojl rebejn ni guyu' bee sa'csi huililajzreni xtiidxni, sigajcza rusläani lo dojl rebejn ni xhet beedi guyu' sa'csi huililajzreni xtiidxni. <sup>31</sup> ¿La rudzucajnu leii sa'csi rililajznu, ä? Ajndi. ¿Xho gacni si'c! Alga basoobnu xtidx leiiga che huililajznu xtidx Jesucrist.

## 4

*Xcälñrililajz toAbram*

<sup>1</sup> ¿Xhini'c sajc guiniinu xcuent toxtadgoldoonu, Abram? <sup>2</sup> Paru niajc toAbram beñnaya nez loj Dios por redzuun ni bejn ni, pet sajc guibalazduxhni, per xhet nez lojdi Dios. <sup>3</sup> ¿Xhini'c caj lo xtidx Dios? Caj rediidxre:

Huililajz toAbram xtidx Dios,  
ni'c bachaag Dios cuent najcni te beñnaya nez lojni.

<sup>4</sup> Meel nani rca' te bejn ni rujn te dzuun, meelga najc ni riäjl xca'ni, xhet rcaxlia'dinini.

<sup>5</sup> Luxh nani rililajz tis xtidx Dios ni rusläa bejn lo dojl, lacuaa naani yu' xhi dzuun sajc gunni te guibicaj xtojlni, bejnğa najc te beñnaya nez loj Dios, sa'csi huililajz ni xtiidxni.

<sup>6</sup> Sigajcza naj toDavid, chicbaa bejn nani ruhaag Dios cuent najcni te beñnaya luxh di niqiiin niujn ni redzuun ni caj lo leii. Räjpnii:

<sup>7</sup> Chicbaa renani abasläa Dios lo xtojlni,

renani abiäuu loj xtojłreni.

<sup>8</sup> Chicbaa bejn nani diru Dios gun cuent xtojłni.

<sup>9</sup> ¿La sajc guiniini chicbaa rebejntis nani guyu' bee, ä? ¿La et näjdiza renani di niu' bee, ä? Sa'csi rniinu: “ToAbram gujc te beñnaya nez loj Dios sa'csi huililajzni xtidx Dios.”

<sup>10</sup> Guc bidxaag cuent najcni te beñnaya nez loj Dios ¿che gajdni chu bee, ä? O ¿Laa che guyu'ni bee? Bidxaagpac xcuentni che gajdni chu bee. <sup>11</sup> Dxejcti guyu'ni bee si'c te seen xten yälñaya sa'csi huililajzni xtidx Dios che gajdlini chu bee te gacni xtad guiraa renani rililajz lał ni xhet beedi yu'reni, te näjza laareni guidxaag cuent najcreni beñnaya nez loj Dios, <sup>12</sup> te gaczani xtad guiraa renani yu' bee ni huililajzza xtidx Dios si'c huililajz toAbram cheni gajdni chu bee.

### *Diidx ni bia'n Dios rsiojb xcuent yälřrililajz*

<sup>13</sup> Bia'n Dios diidx loj toAbram näjza loj rexagdooni, xca'ni guedxliujre si'c yälñasa'c xtenni. Xhet sa'csi gusoobni xtidx leii xca'nini, sica'nini sa'csi najc toAbram te beñnaya nez loj Dios sa'csi huililajzni xtidx Dios. <sup>14</sup> Sa'csi paru renani rusoob xtidx leiiga najc nani xca' yälñasa'cga, xlia'si chalilajz bejn xtidx Jesucrist, luxh xhetza sajcđi diidx nani bia'n Dios loj toAbram. <sup>15</sup> Che yu' te leii, luxh yu' chu di gusoobni, dxejc rdxe'ch Dios loj bejn. Cadro xheti leii, xhetiza xtojłreni.

<sup>16</sup> Ni'cni balaslajz Dios nuunu, te sudzu'tz diidx ni bia'nni loj toAbram, te guiraa rexagdooni ni rililajz sica' yälñasa'c, xhet xtebtis renani sasanäj xleii toMoisés, nägajcza renani rililajz xtidx Dios si'c huililajz toAbram, nani najc xtad guiraanu nani chalilajz xtidx Dios. <sup>17</sup> Si'cza caj lo xtidx Dios, caj rediidxre: “Abenä gaclu xtad xhidäl renación.” Si'c bia'n Dios diidx loj toAbram, Gueb Dios nani gudeed yälñabajn loj rebengut, nani rnii xcuent recos nani gajd gac ascanu ala najcni.

<sup>18</sup> Anajn toAbram naganduxh soob diidx ni bia'n Dios con laani, luxh laani empac huililajzni, ni'c gujcnı xtad xhidajł nación, te gusojb xtidx Dios ni guniini che räjpni: “Scree gac xhidajł rexagdoolu.” <sup>19</sup> Di toAbram nunijł xcälřrililajzni, mase ayu'ni tegayuu ijz, najnni anajcni bengool, luxh sigajcza Sara abengool diru xi'nreni chu. <sup>20</sup> Dini niuntio'p lajzni xcuent rediidx nani bia'n Dios con laani, alga gusutijpruni huililajzni xtiidxni, gulä'pni xpala'n Dios, badeedni xquixtios lojni. <sup>21</sup> Anajnni rajp Dios yälřnibee te gunni guiralii nani bia'n diidx gunni. <sup>22</sup> Ni'c bachaag Dios cuent najcni te beñnaya nez lojni sa'csi huililajzni xtidx Dios.

<sup>23</sup> Xhet xtebtisđi xcuent toAbram cuaj rediidxre: “Bidxaag cuent najcni te beñnaya nez loj Dios sa'csi huililajzni xtidx Dios”, <sup>24</sup> näjza xcuentnu cuajni, sa'csi che chalilaaznu xtiidx nani baspañsac Xtad Jesucrist loj rebengut, sidxaag cuent najcnu beñnaya nez loj Dios. <sup>25</sup> Bacuaareni Jesucrist lo crujz te gudijxni rextojłnu nez loj Dios, luxh gubañsacni lo rebengut, te gac gacnu beñnaya nez loj Dios.

## 5

### *Xhi rsiajc bejn che najcreni beñnaya nez loj Dios*

<sup>1</sup> Ni'cni che rililajznu xtidx Dios rudzucaj Jesucrist xtojłnu rajcnu beñnaya nez loj Dios, ni'cni ruscuedcxini lajznu. <sup>2</sup> Sa'csi gujt Jesucrist, sa'csi gubañsacni lo rebengut xcuent nuurnu, che rililajznu xtidx Dios xcuent Jesucrist, rulaslajz Dios nuurnu, ni'cni rbalajznu, rajpnu yälñabajn, su'pacnu lo xcälřrdimbicha' Dios. <sup>3</sup> Luxh xhet ni'ctis, sajcza guibalaaznu che tednu trabajw, sa'csi najnnu trabajwga sujn jia'pnu pasens. <sup>4</sup> Luxh che rajpnu pasens rajcnu te benguyajłru; che anajczanu benguyajł, rililazsa'crunu. <sup>5</sup> Luxh yälřrililazsa'cnu dini gusanxtujy, sa'csi yälřsanälajz ni rajp Dios ruchaj lastoonu sa'csi neñ lastoonu rbäjz Xsprit Dxan xten Dios ni baniidxni loonu.

<sup>6</sup> Lał ni xhetliidi sajcđi jiennu lagajc xcuentnu te guibicaj xtojłnu, che basa' dxej biäd Jesucrist te gujtnı lo crujz xcuent rebendojł. <sup>7</sup> Guliipacni, naganduxh guidxälni te bejn ni xcäjb guet lacuaa te bejn ni laaca rujnni. Per sidxajł te bejn ni xcäjb guet lacuaa te beñsa'c. <sup>8</sup> Luxh Dios baluiloj xcälřrinälajzni xcuent nuurnu sa'csi lał ni yugajcnu lo

dojl, gujt Jesucrist lo cruzj xcuentnu. <sup>9</sup> Aticaxh naj ni najcnu bennaya nez loj Dios sa'csi baxhe'ni xtiejnni te gubicaj xtojlnu, naj sidedcaj gacnu xcälguختis Dios. <sup>10</sup> Palga laj ni rdxe'chnu lo Dios, basiäjlni lajzni xcuentnu sa'csi gujt Xi'nni lo cruzj, naj ni abiäjlni lajzni, suslaani nuure lo dojl sa'csi gubansac Xi'nni loj rebengut. <sup>11</sup> Luxh xhet ni'ctis, sibalaznajnu Dios xcuent Dad Jesucrist, sa'csi xcuentni ara'pnu yälrbexi lajzni nez loj Dios.

#### *Adán con Dad Jesucrist*

<sup>12</sup> Ni'cni, xcuent tejtis niguii biu' dojl lo guedxliuj, luxh xcuent dojl biäädza yälgujt, gudejdti yälgujt loj guiraa rebejn, sa'csi guiraa rebejn bejnreni dojl. <sup>13</sup> Cheni gajd xleii toMoisés chu lo guedxliujre, alabejn rebejn dojl, per di niajcdi nucuaquijni rebejn sa'csi xheti leii. <sup>14</sup> Luxh empac gujt rebejn nen redxey ni gubajn toAdán hasta redxey ni gubajn toMoisés, mase direni niujn lagajc dojl nani bejn toAdán; luxh ruluiloj yu' chu stee bejn nungäjlni jiaäd.

<sup>15</sup> Luxh nani runidx-xlia' Dios dini gac si'c najc xtojlni toAdán. Dini gac si'c sa'csi palga xcuent dojl ni bejn toAdán, gujt xhidalduخ bejn, cuantimaaz naj sunidx-xlia' Dios yäl nabajn par tejpas loonu por xcäl rulaslajz Dios, nägajc por xcäl rulaslajz Dad nani laa Jesucrist. <sup>16</sup> Luxh nani runidx-xlia' Dios loonu dini gac si'c yälrunijt ni biääd loonu xcuent dojl ni bejn toAdán; sa'csi xcuent tejtis dojlga biääd yälguختis xten Dios, sa'csi guiraliiza rebejn guedxliujre yu' lo dojl, per xcuent nani banidx-xlia' Dios, nalajznu, gujt Xi'nni Jesucrist lo cruzj, ni'c gujc sa'csi yuduxhtej dojl, te xcuent ni bejn Jesucrist sajz gac bejn bennaya nez loj Dios. <sup>17</sup> Palga xcuent dojl ni bejn tejsi bejn ga gunibee yälgujt lo guiraa bejn, cuantimaaz lo yäl nabajn par tejpas sinibee guiraa reni rca' xcäl rulaslajz Jesucrist näjza renani rcaxlia' lojni yäl racnaya nez loj Dios.

<sup>18</sup> Ni'cni sigajc ni biääd yälguختis lo guiraa reben guedxliuj xcuent dojl ni bejn tejsi niguii, sigajcza sa'csi basoob stee niguii xtidx Dios, xhidal bejn gujc bennaya nez loj Dios, cua'reni yäl nabajn par tejpas. <sup>19</sup> Nalajznu sigajc ni banijt xhidalduخ bejn nez loj Dios xcuent tej niguii ni di nusoob xtidx Dios, sigajcza xhidalduخ bejn sajz bennaya nez loj Dios xcuent tej niguii ni basoob xtiidx Dios. <sup>20</sup> Ni'cni badeed Dios xleii toMoisés, te guzenru dojl. Niluxh cadro guyuduxh dojl, ro'c nanabza chuduxhru xcäl rulaslazduخ Dios, <sup>21</sup> te sigajc ni gunibee dojl guyu' yälgujt, sigajcza guinibee ru xcäl rulaslajz Dios te jia'cnu bennaya nez loj Dios, te xca'nu yäl nabajn par tejpas xcuent Xi'nni, Dad Jesucrist.

## 6

#### *Agujtnu lo dojl per nabannäjnu Jesucrist*

<sup>1</sup> ¿Xhini'c guiniinu, naj? ¿La sajz guidxunrunu lo dojl te tioobru xcäl rulaslajz Dios, ä? <sup>2</sup> ¿Gurniälojtu gacni si'c! Nuurnu najcnu si'c te bengut lo dojl sa'csi rililajznu xtidx Dios; ¿xhoxh gac guibajnrunu lo dojl? <sup>3</sup> ¿La ditu gan, che gurobnisnu con laj Jesucrist, najcni si'c ni näjza nuurnu gujtnu si'c ni gujt Jesucrist? <sup>4</sup> Sa'csi che gurobnisnu bigatznäjnni si'c lo yälgujt, te sigajcni huäjs Jesucrist lo yälgujt xcuent xcäl rnibee Dios, sigajcza näj nuurnu sajz guidxunnu lo te yäl nabañcoob.

<sup>5</sup> Sa'csi palga gujcnu tejsi con laani lo xcälgujtni che birobnisnu, sigajcza sajznu tejsi con laani lo yäl nabansac lo rebengut. <sup>6</sup> Ni'cni xcärienbiejwnu cuaj lo cruzj con laani, te badzucajni rextojlnu, te di gacdiru guinibee dojl loonu. <sup>7</sup> Sa'csi nani agujt, di gacdiru guinibee dojl lojni. <sup>8</sup> Palga nuurnu agujtnu con Jesucrist, rililaznu sibansaczanu con laani. <sup>9</sup> Sa'csi nadonpacnu gubansac Jesucrist loj rebengut, ni'c diruni guet, diru yälgujt ga'p yäl rnibee lojni. <sup>10</sup> Che gujt Jesucrist, gujtni xcuent dojl, luxh diru gacdi guinibee dojl laani par tejpas; naj ni gubansacni, nabajnni nez loj Dios. <sup>11</sup> Ni'cni la'tu colguchaag cuent najctu si'c te bengut lo dojl, luxh nez loj Dios, colguchaag cuent nabannäjtu Jesucrist.

<sup>12</sup> Ni'cni na'c gusaantu guinibee dojl tiejxhtu te guntu si'ctis ni rlajz tiejxhtu. <sup>13</sup> Na'cruza gusaantu jiajb guideb lagaa tiejxhtu lo dojl te guntu cosguijdx. Maazru hueen colgudeed tiejxhtu lo Dios si'c te bejn nani gubansac lo rebengut, näjza colgudeed guideb

lagaa tiejxhtu te guntu recoshueen si'c ni rlaiz Dios guntu. <sup>14</sup> Sa'csi diru dojl guinibee lojtu, sa'csi dirutu chu loj xleii toMoisés, sa'csi yu'tu lo xcäl\_rulaslajz Dios.

*La'tu najc si'c remos*

<sup>15</sup> ¿Xho gacni naj? ¿La sajc jienrunu dojl naj ni dirunu chu lo leii sa'csi yu'nu lo xcäl\_rulaslajz Dios, ä? ¿Xho gacni si'c! <sup>16</sup> La'tu nansa'ctu palga yu'tu si'c te mos loj te lam te gusobdiajgtu xtiidxni, najcactu xmos bejn nani rusooobtu xtiidxni. Ni'cni, palga gusoobtu xtidx dojl, ni'c najc xlamtu, ni'c siädna yälgujt lojtu. Palga gusoobtu xtidx Dios, ni'c najc xlamtu. Dxejc sajctu bennaya nez loj Dios. <sup>17</sup> Xquixtios lo Dios, galoo gujctu xmos dojl, per naj guideb lastootu basobdiajgtu xtidxcoob Dios, huililajztu xtiidxni ni basule'nu lojtu. <sup>18</sup> Luxh agulaatu lo dojl, biädjiajctu xmos Dios lo dzunsa'c. <sup>19</sup> Narä cagusule'ä diidx con sa' didx guyasire sa'csi gajdtu gacbesa'c xho najc xnezyuj Dios. Che gujctu xmos dojl, guideb lagaatu bejntu dojl, bejntu latsiaj, luxh ni'c satajltis latsiaj ni bejntu. Naj ni najctu xmos Dios lo dzunsa'c, guideb lagaatu colyejnru dzunsa'c, te si'c sidajlru dzunsa'c ni guntu sa'csi najctu bennaya nez loj Dios.

<sup>20</sup> Sa'csi che gujctu xmos dojl, di rextidx Dios guinibee la'tu. <sup>21</sup> Naja', ¿xhini'c bejntu gaan che gujctu xmos dojl, bejntu recos ni rtuinäjtu naj? Ni xnezyuj recosga rdzujn loj yälgujttis. <sup>22</sup> Per naj, sa'csi agulaatu lo dojl, abiu'tu najctu xmos Dios, sujntu sajctu bennaya nez loj Dios, luxh xnezyuj recoscoobre rdzujn lo yäl\_nabannäj Dios par tejpas. <sup>23</sup> Xcäl\_rajx xten dojl najc yälgujt, per nani runidx-xlia' Dios najc xcäl\_nabannäj Dios par tejpas xcuent ni bejn Jesucrist xtadnu.

7

*Yäl\_ruluii ni rudeed yäl\_guchnaa*

<sup>1</sup> Caniä lojtu ni najn xleii toMoisés. ¿La ditu gan, resa'ä, xleii toMoisés rnibee loj te bejn guideb nabajnni lo guedxlijre? <sup>2</sup> Najcni si'c te gunaa nani bachnaa te niguii. Nanabpac cuäznäjni chäälni guideb nabajnni. Si'c rnibee leiiga. Palga guet chäälni, diru gacdi guinibee leiiga lojni xcuent chäälni. <sup>3</sup> Ni'cni, laj ni nabajn chääl gunaaga, palga cuäznäj gunaaga ste'ca niguii, cayujnni dojl sirilajni gunaguijdx. Palga agujt chääl gunaaga, agulaani lo leiiga, sajc guchnaani stee niguii, xhet dojl di cayujnni, dizani guirilaj gunaguijdx.

<sup>4</sup> Ni'cni la'tu, rebetzä, sigajcza agulaatu lo leiiga, sa'csi najcni si'cni gujctu si'c bengut lo leii che gujt Jesucrist lo cruzj, te naj sajc jiu'tu lo ste'ca bejn, loj lagajc Jesucrist nani gubansac loj rebengut te sajc jienu redzunsa'c ni rlaiz Dios jienu. <sup>5</sup> Sa'csi laj ni gubajnnu lo yäl\_nabanbiejwga, lagajc rediidx nani rnii leiiga di gacdi gun bejn, lagajc recosga rlaiz gun tiejxhnu, luxh si'c sozaatisnu lo xnezyuj yälgujt. <sup>6</sup> Naj abiriinu lo leiiga, sa'csi agujtnu lo leiiga nani gunibee loonu galoo. Naj con xpritcoob ni yu' nen lastoonu yu'nu lo Dios, xhet con xcärienbiejwdi ni gojpnu che nanab gusoobpacnu leii.

*Redojl nani yu' tiexhä*

<sup>7</sup> ¿Xhixhni'c guiniinu naj? ¿La dojl najc leii, ä? ¿Xho gacni si'c! Palga dina niembeä xhi caj lo leiiga, dizana niacbeä cayunä dojl. Dina niacbeä cayunä dojl che rlazä xca'a xhixten ste'ca bejn palga dina niolä lo leii rediidxre: “Na'c chuguij lajzlu rexhixten bejn.” <sup>8</sup> Ni'cni lagajc diidx ni caj lo leiiga bejn guyuguij lazä rexhixten bejn sa'csi nancheä najcni dojl. Paru xheti leii, xhetiza dojl, agujtni. <sup>9</sup> Galoo gubanä xhet leiidi nanä, luxh che biääd diidx ni rnibee leii, gucbeä xhini'c najc dojl, dxejc banitä lo Dios, si'c ni gutä. <sup>10</sup> Luxh baxhal Dios leiiga loonu te jiuäni, te xca'ä yäl\_nabajn, luxh alga bazenni benä dojl, banitä nez loj Dios, gutäti dxejc. <sup>11</sup> Con leiiga, basguee dojl narä, bejn ni narä si'c te bengut nez loj Dios.

<sup>12</sup> Ni'cni, leii najc dxan, näjza rediidx ni caj lo leiiga najc dxan; hueen najcni, didxgulii najcni. <sup>13</sup> ¿Dxejca'? ¿La nani najc te coshueen huinä narä lo yälgujt, ä? ¿Xho gacni si'c! Dojl najc ni huinä narä lo yälgujt. Te si'c xcuent leiiga ni nasa'c, jienlojni dojlpac najc dojl sa'csi bagu'tni narä con te coshueen, te lagajc rediidx ni caj lo leiiga jienloj lacti latsiaj najc dojl.



<sup>14</sup> Sa'csi nadonnu leiiga najc xtidx Dios, luxh narä nacä te beñ guedxliujre, nacä xmospac dojl. <sup>15</sup> Sa'csi dina gacbeä xhini'c runä. Dina gunä recos nani rlazä gunä, alga cayunä latsiaj nani dipacna rlazä gunä. <sup>16</sup> Naj palga narä runä latsiaj nani dipacna rlazä gunä, lagajcza ni'c rului hueenca najc leii. <sup>17</sup> Naj, diruni gac narä ni cayujn latsiaj, sa'csi yu' dojl neñ lastoä, ni'c ni cayujn runä latsiaj. <sup>18</sup> Sa'csi narä nanä neñ lastoä, nalajznu lo tiexhä, xhetliidi cossa'c di yu'; sa'csi rlazä gunä cossa'c, per dina gacdipä te gunäpac recossa'cga. <sup>19</sup> Sa'csi dina gunä redzunsä'c nani rlazä gunä, alga latsiaj nani diru rlazä gunä, ni'c runä. <sup>20</sup> Ni'cni palga runä latsiaj nani diru rlazä gunä, xhet narädi runäni, dojl ni yu' tiexhä, ni'c ni cayujn runä latsiaj.

<sup>21</sup> Ni'cni narä, nani rlazä gunä redzunsä'c, rdxälä leiire: yu'pa dojl tiexhä. <sup>22</sup> Sa'csi neñ lastoä, rlazäpac gusobä diidx xten xleii Dios. <sup>23</sup> Luxh ruhuiä garenca leii yu' guideb lagaa tiexhä, ruchagdijlni leii ni yu' xcärienä, rutedzani narä ladzñaa xleii dojl nani yu' guideb lagaa tiexhä.

<sup>24</sup> ¡Proobza narä! ¿Chuni'c gusläa tiexhä ni nungäjñ guet xcuent dojl? <sup>25</sup> ¡Xquixtios loj Dios sa'csi Dad Jesucrist sajc gusläa nuurnu lo dojl! Ni'cni con xcärienä rusobä xtiidx Dios, yu'ä lo xleii Dios, niluxh tiexhä rlazj gusoob xtiidx dojl, chuni lo xleii dojl.

## 8

*Yälñabajñ* ni najc xcuent Sprit Dxan xten Dios

<sup>1</sup> Ni'cni naj rut rajc di rbe'c xcälquij renani ahuililajz xtidx Jesucrist, renani diru jiu gunreni latsiaj ni rlazj gun tiejxhreni, alga riurureni rujnreni ni rnibee Sprit Dxan xten Dios ni rbäjz neñ lastooreni. <sup>2</sup> Sa'csi leii xten Sprit Dxan xten Dios ni rudeed yälñabajñ xcuent Jesucrist, abasläani narä lo yälñabee xten xleii dojl näjza yälgujt. <sup>3</sup> Sa'csi nani di najc di niujn leibiejw, sa'csi dini najc nadip lo rebenguedxliuj te gacreni beñnaya nez loj Dios, ni'c bejn Dios che baxhañni Xi'nni Jesucrist, si'c te beñ guedxliujre xcuent dojl, te bejn ni yälgujhtis lo dojl ni rnibee tiejxh bejn. <sup>4</sup> Te si'c gac xcälgujhtis xten leibiejw lo tiejxh nuurnu, renani dirunu gusoob nani rlazj gun tiejxhnu, sa'csi naj rbajñnu si'c ni rnibee Sprit Dxan xten Dios ni yu' neñ lastoonu.

<sup>5</sup> Sa'csi renani rusoohtis nani rlazj gun tiejxhreni, rujntisreni xhigab xcuent redojlga, luxh renani rusoohtis xtidx Sprit Dxan xten Dios rujntisreni xhigab xcuent nani rlazj Dios gunreni. <sup>6</sup> Sa'csi renani yu'tis yejcreni nani rlazj gun tiejxhreni, sejtreni, sinijtreni; luxh renani yu'tis yejcreni nani rnii Sprit Dxan Dios, reni'c sibecdx i lajzreni, sica'reni yälñabajñ lo Dios par tejpas. <sup>7</sup> Te xcäriejn nani riutis ni rlazj gun tiejxh bejn rdxe'ch Dios lojni sa'csi dini gusoob xleii Dios, luxh nicla gac gunnini. <sup>8</sup> Renani nabajñtis te gunreni latsiaj ni rlazj gun tiejxhreni di Dios guibalaznäjreni.

<sup>9</sup> Luxh la'tu dirutu gun si'ctis ni rlazj gun tiejxhtu, ni'cni rujntu si'c ni rlazj Sprit Dxan xten Dios guntu, palga rbäjz ni neñ lastootu. Palga yu' chu tejtü ni di Sprit Dxan cuääz neñ lastooni, di ni'c gac xpejñni. <sup>10</sup> Palga rbäjz Jesucrist neñ lastootu, agujt tiejxhtu xcuent dojl, xpirttu nabajñ sa'csi anajctu beñnaya nez loj Dios. <sup>11</sup> Luxh palga neñ lastootu rbäjz Sprit xten nani baspañsac Jesucrist loj rebengut, lagajc nani baspañsac Jesucrist lo rebengut suspañsac tiexhnu ni nabajñ lo guedxliujre xcuent Xpirtni nani yu' neñ lastoonu.

<sup>12</sup> Ni'cni rebetzä, najcnu bejn ni cuaj di'n, xhet lojdi tiexhnu te jiennu si'c ni rlazj gun tiejxhnu. <sup>13</sup> Sa'csi palga cayujntu si'c ni rlazjtis gun tiejxhtu, sejtactu. Palga nabajñtu xcuent Sprit Dxan xten Dios ni rbäjz neñ lastootu, sibälaztu latsiaj ni rlazj gun tiejxhtu, sibaññajtu Dios par tejpas.

<sup>14</sup> Sa'csi guiraa renani rului Sprit Dxan xten Dios guiraa reni'c najc rexi'n Dios. <sup>15</sup> Naj ditu nica' te sprit xten te mos te chusactu lo yälrdxejb, alga cua'tu sprit xten ni najc si'c te bisiäjñ ni cua' bejn si'c xi'npacni, naj najcnu xi'nni, ni'cni sajc gäbnu lojni: "Guejblu, Xtadä." <sup>16</sup> Sa'csi lagajc Sprit Dxan xten Dios rului loj xpirtnu, najcpcacnu xi'n Dios. <sup>17</sup> Luxh palga najcnu rexi'nni, sica'zanu yälñasa'c lo Dios, tejsi yälñasa'c con Dad



Jesucrist, palga guliini tednu lagajc trabajw ni gudejdni xcuent xtiidxni, te tejsiza siliä'p xpala'nnu con laani.

<sup>18</sup> Sa'csi narä runä xhigab re trabajw ni cadejdnu nen redxejre, digacdi gun teblonureni con yälr dimbicha' nani churu guihuiinu. <sup>19</sup> Sa'csi guiraa recos nani benchee Dios lo guedxliujre, cabäzreni, yuduxhreni gaan fiireni dxej che guluiloj Dios chuni'c najc rexi'nni. <sup>20</sup> Guiraa recos ni gulecxtiej Dios lo guedxliujre, xlia'si gujcreni, xhet sa'csi si'c rlanjdi recosga, per sa'csi si'c bejn Dios, ni cabäzjis <sup>21</sup> guslaapacni guiraa recos ni bencheeni lo guedxliujre lo xcäl rnibee yälgujt, yälrnitloj, te dxejc sajc jiu'ni lo yälrbedxi xten xcäl rdimbicha' xten rexi'n Dios. <sup>22</sup> Guiraa recos ni gulecxtiej Dios lo guedxliujre entis roonreni, guira dxej rdej dreni trabajw, si'c rdej d te gunaa trabajw che rajl xi'nni. <sup>23</sup> Luxh xhet nani tre'tis lo guedxliujdi, näjza nuunu ni yu' Sprit Dxi xten Dios nen lastoonu, roonzanu cabäaznu dxej cheni xca' Dios nuure si'c rexi'nni, cheni guscoobzani tiexhnu. <sup>24</sup> Sa'csi xcäl rililaaaznu ni rbäaznu, ni'c bejn gulaanu luxh yälr bäjz ni guyasi rien, di ni'c gac yälr bäjz, sa'csi ¿chu laa ni cuäaz xcuent te cos ni ala bahuiini? <sup>25</sup> Palga cabäaznu xcuent te cos ni gajdnu guihuii, rbaali laaznu, rsiudzu'tznu rbäjznu guihuiinu gacni.

<sup>26</sup> Sigajcza racnäj Sprit Dxi xten Dios nuure cadro xheti yälrutijp laaznu sa'csi nicla guidonnu xho mood riäj l guiniab bejn lo Dios. Luxh lagajc Sprit Dxi ni yu' lastoonu rniabni lo Dios xcuent nuure con yälrbedxnen nani nicla gajd bejn gäb con diidx xho najcni. <sup>27</sup> Dios, nani rula'tz lastoonu, nanchee xhini'c rniab Sprit Dxi xtenni xcuent nuurnu, sa'csi rniabni si'cpac ni rlanj Dios guiniabnu xcuent rexpejn pac Dios.

### *Siennu gaanpac loj guira'ti*

<sup>28</sup> Nadoncheenu guira'ti ni rsiajc rebejn ni sanälajz Dios, reni agule Dios te gunreni xtzuunni rsiajcrenini te gun Dios gac recosga par xcäl nasa'creni. <sup>29</sup> Sa'csi renani biembe Dios galooli, reni'c gule Dios cheni gajdli guirixtiej guedxliujre, te gacreni si'c ni najc Xi'nni; te gacza Xi'nni ganid loj guiraa ni najc famil xten Dios. <sup>30</sup> Renani guleni galooli, reni'c gurejdxni; renani gurejdxni, bejnzani najcreni bejnaya nez loj Dios; renani bejnni najcreni bejnaya nez loj Dios, gulä'pzani xpala'nreni.

<sup>31</sup> ¿Xhixhni'c guiniinu xcuent dee? Palga yu' Dios xlaadnu, ¿chuxh ni'c najc ni gun gaan loonu? <sup>32</sup> Dios nani di nudxojn Xi'nni, nani cuäjb cuaj Xi'nni lo cruzj te gujtni, te gudijxni xcuent xtoj lnu, ¿xho dini guniidx loonu xcuent Xi'nni guira'ti nani rquiinnu, ä? <sup>33</sup> ¿Chuni'c sajc cue'c xhi xcäl quij reni agule Dios nez lo Dios, ä? Ni lagajc Dios najc nani rni najcnu bejnaya nez lojni. <sup>34</sup> ¿Chuni'c najc nani cue'c xhi xcäl quijnu nez lo Dios? Jesucrist najc nani gujt por nuure, luxh et ni'ctis. Laani gubansaczani loj rebengujt, luxh naj sobga'ni xladbee Dios cadro rnibeeni; laazani cabejdx canabni lo Dios xcuentnu. <sup>35</sup> ¿Chuni'c sajc gudzucaj nuurnu lo yälsanälajz xten Jesucrist: trabajw, o yäl xliajs, o yäl rusacsí, o yäl rliaan, o yäl xhabääl, o yäl rdxejb, o te spaad, ä? Nicla tejni. <sup>36</sup> Si'c ni caj lo guijt ni caj xtidx Dios:

Xcuentlu, sa'csi najcnu xpejnlu caye'tnu guixe-guixee.

Ruchaagreni cuent najcnu si'c xiil ni aguro' te ju't bejn ni.

<sup>37</sup> Luxh loj guiraa recosre, sujnpacnu gaan xcuent nani sanälajz nuure, sa'csi sacnäjpacni nuure. <sup>38</sup> Sa'csi anancheä nicla yälgujt, niclza yäl nabaj, nicla rexangl Dios, niclaza renani rnibee, nicla recos ni yu' naj, niclaza recos nani churu gac, niclaza yäl milaagwr, <sup>39</sup> nicla jiaroduxh, niclaza jäjtpac, niclaza xhitis cos ni guc-chee, nicla tej redee di gacdi gudzucaj nuurnu lo xcäl sanälajz Dios, yälsanälajz ni rajpza Dad, Jesucrist.

## 9

### *Dios agule reben Israel*

<sup>1</sup> Caniä didxguliipac lojtu sa'csi rililazä xtidx Jesucrist. Dina guiniä didx-xhii. Sprit Dxi xten Dios caguluii xcärienä laaca rniä; <sup>2</sup> cayac-huinduxh lastoä, sanuutis yäl xliajsga. <sup>3</sup> Sa'csi narä rlazä malaii sajc lagajc narä nitloä lo Dios te sajc gacnäá resa'ä

lo guedxliujre, rexpejn Israel. <sup>4</sup> Sa'csi laareni najc xagdoo toIsrael, luxh laareni nungäj] gacreni si'c xi'npac Dios. Gubannäj Diosreni. Bia'n Dios didx con laareni. Basa'n Dios xleii Moisés lojreni. Bazuxhijbreni nez lo Dios nen guidoo. Sica'reni reyäl'nasa'c xten Dios palga jiureni xtiidxni. <sup>5</sup> Laareni najc rexagdoo xten toxtadgoldoonu ni gubajn agujc xhero. Jesucrist gujca xagdoo xten toIsrael che gojlni si'c te bejn guedxliuj. Laani najczani Dios loj guiraanu. Suchä'p xpala'nni par tejpas. Sugacni si'c.

<sup>6</sup> Luxh dini gac si'cni abanijt xtidx Dios nani bia'nni loj toIsrael. Sa'csi xhet guiraadi rebejn ni najc xagdoo toIsrael najc xpejn]pac Israel. <sup>7</sup> Diza guiraa reni najc rexagdoo toAbram gac xi'nguliipacni sa'csi räjp Dios lo toAbram: “Rexagdodoolu nani guigab najc reni gac xagdoo Isaac.” <sup>8</sup> Ni'cni xhet guiraadi rexagdoo toAbram najc rexi'n Dios, xtebtis renani chalilajz xtiidxni, reni'c najc xi'nni. <sup>9</sup> Sa'csi bia'n Dios diidx loj toAbram: “Stebijz, lagajc bäiire guibisacä, te dxejc chu te xi'n Sara.”

<sup>10</sup> Xhet diidxtisga gunii Dios. Guniizani lo toRebeca, che nuxi'nni cua'ch, xi'n chäälni, toxtadgoolnu Isaac. <sup>11</sup> Ni'cni ansde gaal rexi'nni, ansde niujnreni te dzunsa'c o te dzunguijdx, te soobpac xtidx Dios xcuent chuni'c cueni lo guiro'p rebäzre, xhet sa'csi bejndireni dzunsa'c, per sa'csi agule Diosni, <sup>12</sup> ni'c räjp Dios lo toRebeca: “Xingangaloolu gac xmos xinhuinlu.” <sup>13</sup> Si'cza caj lo guijtz rediidxre: “Sanälazä Jacob, niluxh bidxechnää Esau.”

<sup>14</sup> ¿Xhini'c guiniinu naj? ¿Xhet laadi rujn Dios, ä? ¿Xho gacni si'c! <sup>15</sup> Sa'csi räjp Dios loj toMoisés: “Sulaslazä chutis bejn nani rlazä gulaslazä, sacnäá chutis bejn nani rlazä gacnäá.” <sup>16</sup> Ni'cni dini gac xcuent ni rlaz rebejn gac, dizani gac xcuent nani rujn rebejn. Rajctisni si'c rlaz Dios nani rulaslaz bejn. <sup>17</sup> Ni'cni caj lo guijtz xten Dios che gunii Dios xcuent Faraón: “Narä benä gujclu rei xten Egipto te guluiloj xcälrnibeä, te guiliä'p bejn xpala'nä guideb guedxliujre.” <sup>18</sup> Rulaslazni rebejn nani rlaztisni, runnadipzani lastoo bejn nani rlaztisni.

<sup>19</sup> Naj la'tu siniitu loä: “¿Xhicuent rucuaquijni bejn? ¿Chuni'c sajc sudzu'tz nez loj nani rlazni gac, ä?” <sup>20</sup> ¿Chuxh luj, bejn guedxliuj, te jieinäjlu Dios? Xhixh säjb te gues loj nani bencheeni: “¿Xhicuent bejnlu narä scree?” <sup>21</sup> Gurniälojlu. Bejn nani runchee guejs, ¿la di gacdi gunni si'ctisni rlazni con bajnga, ä? ¿La di gacdi guncheeni te guesa'c nägajcza te guesyuj ni xhet sirbdi con lagajc bajnga?

<sup>22</sup> ¿Xhiru najc, palga Dios rlazni guluilojni xho rujnni yälguxhtis, näjza rlazni guluilojni xcälrnibeeni, gopnäjni pasens renani nungäj] gac yälguxhtis, te nitlojzaren, ä? <sup>23</sup> Bejn ni si'c te guluilojni lacti sajc xcälrdimbicha'ni loj renani galooli guleni chú lojni lo xcälrdimbicha'ni. <sup>24</sup> Lagajc nuurnu najcnu reni aguleni; xhet xtebtis loj rexpejn Israel guleni nuurnu, näjza loj rebejn ni di gac rexpejn Israel guleni nuurnu. <sup>25</sup> Cajza lo guijtz ni bacuaa Oseas:

Renani di gac xpenä, reni'c cuälää “xpenä”.

Luxh nani dina ninälazä, sinälazäni.

<sup>26</sup> Dxejcti lagajc cadro räjpreni lojreni:

“Ditu gac rexpenä”,

lagajc ro'c säjpreni lojreni:

“La'tu najctu xi'n Dios ni nabajn par tejpas.”

<sup>27</sup> Cajza lo guijtz ni bacuaa Isafas: “Mase najc xhidajl rexpejn Israel si'c najc yujxh ni tre' ro' nisdoo, guxii gac reni laa lo dojl. <sup>28</sup> Sa'csi susoobpac Dad, Dios xtiidxni xcuent xcälguxhtis reben guedxliuj, luxh siojbza gunnini.” <sup>29</sup> Guniiza Isaías, xcuent nani churu gac, bacuaani:

Palga di Dios ni yu' xhaguibaa nusa'n gaii xagdoo reben tiemp, ni ajcnu si'c guj Sodoma näjza Gomorra, reguejdx ni gunitloj.

*Xtidx Dios näj rexpejn Israel*

<sup>30</sup> ¿Xhini'c sajc guiniinu naj? Rebejn nani di gac xpen Israel, direni niguiil xho gacreni bejnaya nez loj Dios, niluxh agujcreni bejnaya nez loj Dios sa'csi huililajzreni xtidx

Jesucrist. <sup>31</sup> Luxh rexpən Israel, mase sanuutisreni lo xleii Moisés ni ruluii xho gac bejn bennaya nez loj Dios, banijtreni, direni niujn gaan nusoobreni guideb leiiga. <sup>32</sup> ¿Xhicuent gujcní si'c? Sa'csi direni nililajz xtidx Dios, alga rlanjreni guntisreni dzuun xten leii, naareni si'c gacreni bennaya nez lo Dios. Ni'cni gulaj ni'reni lo guij ni rutienta' bejn, nalajznu direni nililajz xtidx Dios xcuent Jesucrist. <sup>33</sup> Si'cza bacuaa Isaías, rájpní: Aguleä te bejn lo guedx Sión ni gac si'c te guij cadro rtiäjł ni' bejn, te guij ni rusälta' bejn. Chutis tej nani chalilajz xtiidxni, dini jianxtujy.

## 10

<sup>1</sup> Rebetzä, rlazduxhä chalilajz rexpənä xtidx Dios. Rniabduxhä lo Dios te guslaanireni lo xtojłreni. <sup>2</sup> Narä rniäpac nancheä ruzuxhijb rexpən Israel lo Dios, niluxh direni gumbesa'c xhini'c rlanj Dios gunreni. <sup>3</sup> Sa'csi direni niacbee xcuent xho rajc te bejn te bennaya nez loj Dios, ni'c rlanjreni gunreni dzuun si'c ni caj lo leii te gacreni bennaya nez loj Dios, ni'cza direni nusoob xtidx Dios te gacreni bennaya nez lojni. <sup>4</sup> Abasoob Jesucrist xtidx Leii, ni'cni che chalilajz bejn xtidx Jesucrist, anajcreni bennaya nez loj Dios.

<sup>5</sup> ToMoisés bacuaa rediidxre: “Chutis ni rlanj gac bennaya nez loj Dios sa'csi rusoobni xtidx leii, nanab gusobsa'cpacni diidxga guideb nabajñni lo guedxliujre.” <sup>6</sup> Xcälñayareni nez loj Dios sa'csi rililajzreni xtidx Jesucrist, rnií scree: “Na'c guiniitu neñ lastootu, ¿chuni'c chä'p xhaguibaa?” nalajznu, te jiädñäsacni Jesucrist loj guedxliuj. <sup>7</sup> Na'cza gäbni: “¿Chuni'c jiäjt gabijł?” (nalajznu te chaxiini Jesucrist loj rebengut). <sup>8</sup> ¿Xhini'c rniini naj? Rniini: “Diidxga suga' gajxh ro'tu, neñ lastootu.” Nalajznu, diidx xcuent yälřililaaz nani cagusule'nu lojtu. <sup>9</sup> Rniinu lojtu, palga guiniitu con ro'tu, Jesucrist najc Dad loonu, palga chalilajztu baspansac Dios Jesucrist loj rebengut, suslaani la'tu lo dojl. <sup>10</sup> Sa'csi con lastooni rililajz biniet xtiidxni, ni'c rajcni bennaya nez loj Dios; luxh che rcäjpza biniet con ro'ni, Jesucrist rnibee loonu, ruslaa Diosni lo dojl.

<sup>11</sup> Sa'csi rnií xtidx Dios scree: “Chutis ni rililajz xtidx Dad Jesucrist, dini jianxtujy.” <sup>12</sup> Sa'csi guiraa rebejn najc tebloj nez lojni, rexpejn Israel sigajc rebenzijt, sa'csi lagajc laani najcni Dad lo guiraareni, rulaslazduxhni guiraa renani rbedx-rniab lojni. <sup>13</sup> Lo xtidx Dios caj rediidxre: “Chutis ni rbedx-rniab lo Dad, siliaani lo xtojłni palga rililajzni xtidx Dios.” <sup>14</sup> ¿Xho gac guiniabreni lo Dad, palga direni chalilajz xtiidxni? ¿Xho gacza chalilajzreni xtiidxni, palga gajd diajgreni jiejn xtiidxni? ¿Luxh xho jiejn diajgreni xtiidxni palga rut rusule'di diidxga lojreni, ä? <sup>15</sup> Luxh ¿xhoza gusule'reni diidxga palga rut guxhaldireni? Si'cni caj lo guijtz: “Chipza saru najc ni' renani riädñä diidx xcuent cossa'c, yälřbecdxi lajz rebejn.”

<sup>16</sup> Xhet guiraadireni rusoob xtiidxni, sa'csi guniiza tolsaías: “Dad, ¿chuni'c chalilajz xtiidxnu?” <sup>17</sup> Rililajz bejn xtidx Dios che rucuadajgreni diidxga; rucuadajgzareni che yu' chu rusule' xtidx Jesucrist.

<sup>18</sup> Naj arniä: Gajdpac diajgreni jiejn xtiidxni, o ¿la babiejn diajgreni, ä? Pues abiejn diajgreni, sa'csi lo xtidx Dios caj scree:

Abire'ch xse'reni guideb guedxliuj,  
abidzujñza rextiidxreni lo guiraa reguejdx ni tre' lo guedxliujre.

<sup>19</sup> Rniäza: Dipac rexpən Israel niacbee, o ¿la gucbeereni, ä? Galooli gunii toMoisés rediidxre:

Sunä gudxoñntu xcuent rebejn ni di gac te guejdx,  
con te guejdx nani di gacbee suche'chä la'tu.

<sup>20</sup> Diza tolsaías nidxejb guniini rediidxre:

Renani di niguiil narä, bidxäjł narä,  
baluiloäza loj renani di niniabdiidx narä.

<sup>21</sup> Guniiza tolsaías xcuent rexpən Israel:

Desde galooli, dxej-yääl basgää naä lo rebejnğa te niureni xtidxä,  
luxh najcreni bejn ni di gusoob diidx, rutzu'reni didxnaj.

## 11

*Rexpen* Israel nani gulaa lo dojl

<sup>1</sup> Arniä: ¿La agulälaz Dios rexpen Israel, ä? ¿Xho gacni si'c! Ni lagajc narä nacä te xpen Israel, te xagdoo toAbram, nadxagä lo resa' toBenjamín. <sup>2</sup> Di Dios nibälaz rexpejn, xpen Israel nani guleni galooli che gajdli guirixtiej guedxliuj. O ¿la dilu gacbee xhi caj lo xtidx Dios cadre rnii xcuent Elías, xho gunabduxh Elías didxnaj lo Dios xcuent rexpen Israel, ä? Räjpnii scree: <sup>3</sup> “Dad, abagu'treni guiraa reniguii nani gunii xtiidxlu, abatzujreni rexquidoolu, xtebtis narä bia'nä, luxh naj rlanjreni ju'treni narä.” <sup>4</sup> Luxh, ¿xhini'c räjp Dios lojni? Räjpnii: “Abalucheä gajdz mil bejn nani gajd guzuxhijb nez loj Baal.” <sup>5</sup> Si'cza naj, abia'n te chinae' rexpen Israel nani agule Dios xcuent xcälruulasajzni. <sup>6</sup> Dxejc palga ruslaani nuure lo dojl xcuent xcälruulasajzni diruni gac sa'csi yu' xhi dzuun biennu te nuslaani nuure lo dojl. Paru si'c najcni diru xcälruulasajz Dios gac yälruulasajz.

<sup>7</sup> ¿Dxejca'? Di rexpen Israel nidxäl nani caguilreni, luxh rebejn nani agule Dios, ni'c bidxälni, luxh ste cuaareni, aguyalajzreni. <sup>8</sup> Gujcnii si'c caj lo xtidx Dios:

Bascäy Dios xcäriejnreni, najza balojni di jien,  
lo dxe najli di diajgreni jiejn.

<sup>9</sup> Guniiza toDavid, scree caj lo xtidx Dios:

Sugun xmex lanijreni jiajbreni,  
te gac guiga'reni,  
sugacni si'c guij ni rulani' bejn, te gacreni yälguxhtis.

<sup>10</sup> Suguscäy Dios balojreni te na'c fisa'creni,  
sujie't dejtznii, sutedreni trabajwduxh par tejpas.

*Yälrus*laa lo dojl xten bejn ni di gac xpen Israel

<sup>11</sup> Naj rniabdidxä: ¿La biajb rexpen Israel te gunijtreni par tejpas, ä? ¿Xho gacni si'c! Sa'csi biajb rexpejn Israel, ni'cni gojl biääd yälruslaa lo dojl lo bejn ni di gac xpen Israel, te si'c guisiäblajz lajz rexpen Israel laareni lo dojl. <sup>12</sup> Palga xcuent dojl ni bejn xpen Israel gojp reben guedxliuj xcäl'nasa'c Dios, palga xcuent yälrunijt xten rexpen Israel guyu' xcäl'nasa'c Dios par rebejn ni di gac xpen Israel, aticaxh chu xcäl'nasa'creni che gusoob xpen Israel xtidx Dios.

<sup>13</sup> Naj caniä lojtu ni najc bejn ni di gac xpejn Israel. Gule Dios narä te gusule'ä xtiidxni lojtu, ni'cni caläpä xpala'n xtzunä, <sup>14</sup> te don xho gunä te guisiäblajz reben ladxä ni najc xpen Israel, te si'c chalilajzreni xtidx Jesucrist. <sup>15</sup> Palga gulecdxireni lajz reben guedxliuj con Dios sa'csi gulälaz rexpen Israel xtidx Jesucrist, aticaxh che chalilajz rexpen Israel rextidx Jesucrist, sibansac renani najc si'c bengut. <sup>16</sup> Palga tla' cojb najc hueen, guideb cojbga najc hueen. Sigajcza najc te yajg; palga xlobaani najc hueen, guidebni najc hueen.

<sup>17</sup> Rexpen Israel najcreni si'c te yajg oliib; palga gutiuugreni te naa yajgga, dxejc ro'c guquiidreni naa ste'ca yajg te guibajnni con xtiejn yajg oliibga. <sup>18</sup> Ni'cni, na'c gactu gualajz lo renaapac yajgga. Colgusnaj lajztu, xhet la'ditu ni rudeed yäl'nabajn lo xlobaa yajgga, lobaaga ni runiidx yäl'nabajn lojtu.

<sup>19</sup> Dxejc colguinii: “Batiuugreni naapac yajgre, te gujc biguidä cuä' yajgga.” <sup>20</sup> Guliipacni, biru' naapac yajgga sa'csi direni nililajz xtidx Dios luxh la'tu biguiidtu cuä' yajgga sa'csi huililajztu xtiidxni. Na'c gactu gualajz, colguidxiejb, <sup>21</sup> sa'csi palga di Dios nutedbia renaa yajgga, diza Dios gutedbia la'tu. <sup>22</sup> Bahuii ¡lacti hueen najc Dios! Luxh lacti niälajzani; con renani banijt najcni niälajz, luxh lacti rulasajz Dios la'tu palga chanuu jiutu xtiidxni. Palga ditu jiu xtiidxni, najza la'tu sudzucaj Dios. <sup>23</sup> Luxh sigajcza reni bidin, palga di chanuu cuälazreni xtiidxni sajz suquidsac Diosreni lo yajgga. <sup>24</sup> Luxh la'tu najctu benzijt, najctu si'c naa te yagoliib ni xtebca gulejn nen dajn. Luxh batiuugni la'tu te baquiidni la'tu lo te yagoliib ni najc yagsa'c ni rcaduxh oliib lojni, mase xhet si'cti najc olibguijxhga, ¡aticaxh rexpen Israel ni banijt najc si'c naapac xten yagolibsa'cga ni bidin, palga chalilajzpacreni xtidx Dios, suquidsac Diosreni loj yajg ni najc xtenpacreni!

*Che* laapac rexpen Israel lo dojl

<sup>25</sup> Rebetzä, rlazä gacheetu xcuent te diidx nagajn, te di naatu nanduxhtu. Dee najc didx nagajnga: yu' rexpejn Israel ni guc najd lastooreni te direni nililajz xtidx Dios, hasta guisa' redxey ni chalilajz rebenzijt xtidx Dios. <sup>26</sup> Dxejcti siliaapac guiraa rexpen Israel lo dojl che chalilajzreni xtidx Dios, sa'csi si'c caj lo xtidx Dios, cadre caj rediidxre:

Nani ruslaa sajc bejn guedx Siön,  
luxh sudzucajni xtoj renani najc xagdoo toJacob.

<sup>27</sup> Dee najc diidx ni bia'nä con laareni,  
che gudzucaä xtojreni.

<sup>28</sup> Naj, najcreni xcontraar Dios sa'csi rdxe'chreni xcuent xtidx Jesucrist, te chalilajztu; niluxh Dios sanälajzreni sa'csi si'c abia'nni diidx con retoxtadgoldooreni. <sup>29</sup> Sa'csi rut rajc di rudzucaj nicla yäl'nasa'c ni rudeed Dios, niclaza yäl'rbejdx xten Dios. <sup>30</sup> La'tu galoo ditu nusoob xtidx Dios. Naj rulasajz Dios la'tu sa'csi gulälaz rexpen Israel xtiidxni.

<sup>31</sup> Sigajcza naj direni gusoob xtidx Dios, niluxh si'c najcni te gulasajz Diosreni sa'csi balaslajzzeni la'tu. <sup>32</sup> Dios basaan biajb guiraanu lo dojl, te si'c sajc gulasajz Dios guiraanu.

<sup>33</sup> ¡Lacti guroob najc yäl'nasa'c xten xcäl'najn, xcäl'racbee xten Dios! Nicla tej bejn guedxliuj di gacbee guiraa rexcäl'guxhtisni, rudliidza najn rexnezyujni. <sup>34</sup> Si'c caj lo guijt: "¿Chuni'c gucbee xcäriejn Dios? ¿Chuni'cza abaluiini? Rutliidi. <sup>35</sup> O ¿chuni'c badedxgaa te xhi cos lojni, te quixsacnini lojni, ä? Rutliidi." <sup>36</sup> Sa'csi loj Dios siääd guira'ti, luxh laani bencheeni guira'ti par lagajcza laani. Suguliä'pnu xpala'nni par tejpas. Sugacni si'c.

## 12

*Yäl'nabajn* rliä'p xpala'n Dios

<sup>1</sup> Ni'cni rulidxä la'tu rebetzä, sa'csi rulasajz Dios nuure, colgudeed xcäl'nabajntu lo Dios te gac guibansa'ctu si'cni rlaz Dios. Dee najc yäl'rajnpac Dios si'c ni nungäj gantü Dios. <sup>2</sup> Na'c rujntu lagajc xhigab ni rujn reben guedxliuj, colguscoob rehxigabtu te guidxaapac xmoodtu te si'c guluii Dios xhini'c rlazni guntu, nalajznu xhini'c najc hueen, xhini'c rdxagajz Dios, xhini'cza najc laapac.

<sup>3</sup> Sa'csi balaslajz Dios narä, ni'c rusule'ä xtiidxni loj tejgatu, rniä lojtu, na'c guiliä'ptu lagajc xpala'ntu, naatu sajcrutu loj sa'tu. Colyejn xhigabsa'c, te laaca gac xhigabtu, si'cni baniidx Dios lo tejgatu xho chalilajztu xtiidxni. <sup>4</sup> Sa'csi sigajc najc tiejxhnu, yu' xhidäl la'ni, luxh tejgareni rujn xtzuun-xtzuunreni, <sup>5</sup> sigajcza nuure nani rililajz xtidx Jesucrist, najcnu xhidajl, najcnu si'c tejsi tiejxh lo Jesucrist, mase tejganu rujn xtzun-xtzuunnu, tejsi najcnu.

<sup>6</sup> Luxh sa'csi tejganu rajpnu garen-garen dzuun xcuent yäl'rulasajz ni baniidx Dios loonu, sujiennu rextzuunnu screeza: nani rajc rniä xtidx Jesucrist, suguiiniini, si'c ni najc xcäl'rililajzni; <sup>7</sup> nani rajc racnäjä sa'ni, sugacnäjni; nani rajc ruluii xtidx Dios, suguluiini; <sup>8</sup> nani rajc gulijdx resa'ni, sugulijdxnireni, nani rajc rudedxlia' xhixtenni lo sa'ni, saru sugudeedni xhixtenni; nani rajc rnibee lo sa'ni, suguinibeeni con yäl'nadolajz; nani rajc rulasajz resa'ni, sugulasajzni con yäl'rbalajz.

*Xho nanab guiban*nu lo xnezyuj Dios

<sup>9</sup> Colchanälajzpac resa'tu, na'c gunsitu si'cni rinälajztureni. Colcuälaz redzunguijdx, colyejntis redzunsä'c. <sup>10</sup> Colchanälajz resa'tu si'c rinälajz bejn rebejtzni. Colguiliä'p xpala'nreni.

<sup>11</sup> Colyejn dzunsä'c, na'c cuedxitu. Colyejn xtzuun Jesucrist con guideb xtijptu, guideb xcäriejntu.

<sup>12</sup> Colguibalajz sa'csi ahuililajztu xtiidxni. Colcuedcxi lajztu che tedtu trabajw. Colcuedx-colnabtis lo Dios guideb nabajntu.

<sup>13</sup> Colgacnäjä rebejn nani rililajz xtidx Dios; sacru colnii loj ni riädhuiitu.

<sup>14</sup> Colguiniä didxsa'c xcuent renani rusacsí la'tu, na'c gudzubdetureni.



<sup>15</sup> Colguibalaznäj renani rbalajz, colyonnäj renani roon.

<sup>16</sup> Colyejn tejtis xhigab con resa'tu, na'c gactu guyalajz, colguchaag loj reben nadolajz. Na'c guchalotu najctu be<sub>n</sub>nanduxh.

<sup>17</sup> Na'c gudzu'tu dzunguijdx loj renani rujn dzunguijdx lojtu. Colyejn recossa'c nez loj guirasi bejn. <sup>18</sup> Cadrotis sajcnı, dxıtis colguibannäj guiraa rebejn. <sup>19</sup> Rebetzä, na'c guntu xhigab lagajc la'tu gudeedtu xten renani rujn dojl lojtu, sa'csi lagajc Dios gun yälguxhtis lojreni, ni'cni caj lo xquijtzni scree: “Narä gunä yälguxhtis, narä quixä lojreni si'c naj Dad, Dios.” <sup>20</sup> Näjza: “Palga calaan nani rdxe'ch lojtu, colgudeed xhi gauni, palga cayojlnı, colgudeedza xhi yäni, te si'c jianxtiujni.” <sup>21</sup> Na'c gusaantu gun redzunguijdx gaan lojtu, colyejn gaan lo dzunguijdx con recossa'c ni rujntu.

### 13

<sup>1</sup> Guiraatu nanab jiutu xtidx renani rnıbee lojtu. Sa'csi xheti te yälrnıbee nani di Dios nudeed, luxh guiraa reyälrnıbee ni yu' lo guedxliujre, lagajc Dios gule'creni. <sup>2</sup> Ni'cni renani di gusoob xtidx renani rnıbee, xtidx Dios cabälazni. Luxh renani rujn si'c, lagajc laareni xcaquijreni dojl, sujn Dios yälguxhtis lojreni. <sup>3</sup> Renani rnıbee di guchejb renani rıu xtiidxreni, ruchejbreni renani najc be<sub>n</sub> guijdx ni di jıu xtiidxreni. Palga di rlajztu guidxejbtu reguxhtis, bejntis dzunsa'c, dxejcti guiliä'preni xpala'ntu sa'csi rujntu dzunsa'c. <sup>4</sup> Reguxhtis rujnreni lojtu xtzuun Dios te guibansa'ctu. Palga guntu dzunguijdx, colguidxejb, xhet xlia'di ca'ni spaad, sa'csi najcreni nani rujn xtzuun Dios te gunreni yälguxhtis, te quixpac renani rujn dojl. <sup>5</sup> Ni'cni nanab jiutu rextiidxreni, xhet ganaxtis sa'csi rujnreni yälguxhtis lojtu, näjza te ga'ptu te xcäriejnısa'c, te xcäriennaya. <sup>6</sup> Ni'cni colquijx lojreni nani riäjł xca'reni sa'csi renani rnıbee najc xmos Dios, luxh ni'cpac najc xtzuunreni.

<sup>7</sup> Colgudeed lo guiraa bejn nani riäjł xca'reni. Colquiix loj renani nazääbtu; colquijx impuest loj ni riäjł xca'ni; colchanälajz renani riäjł chanälajztu; colguiliä'p xpala'n renani riäjł chä'p xpala'reni. <sup>8</sup> Na'c xcajlu di'n loj nicla tej bejn, di'ntis xten yälrınälajz sa'ni, sa'csi nani rinälajz xpsınnı, bejnğa abasoob xleii Dios. <sup>9</sup> Sa'csi lo xleii Dios caj scree: “Na'c guesnäjlı bejn ni di gac chäällu, na'c ju'tlu, na'c cuanlu, na'c gusgueelu, na'c chuguij lajzlu xhıxten resa'lu.” Luxh palga yu' xhi stee leii rsa'ni con leii ni rnıi: “Chanälajzlu resa'lu si'c sanälajzlu lagajc luj.” <sup>10</sup> Nani rajp yälsanälajz, dini gun latsıaj lo resa'ni. Ni'cni yälsanälajz rusoob releii ni caj lo xtidx Dios.

<sup>11</sup> Colyejn guiraa redee, sa'csi anajntu xho najc redxej ni nabajnnu naj, anajntu alagojl or guibajnnu lo bacał sa'csi abıdzungajxhru dxej che laanu ne<sub>n</sub> dojl lo dxej che huilılajznu. <sup>12</sup> Aguxhınduxh, asiädgajxh bıanij. Ni'cni cuääz jıennu redzuun guijdx ni rajc lo xcäjy, te jıentısnı redzunsa'c ni rajc rdxee, lo bıanij. <sup>13</sup> Guibansa'cnu si'c riäjł guibaj<sub>n</sub> rebejn rdxee, na'c guıban<sub>n</sub>u lo yälrä', niclaza lo yälbıejy, na'c guıdiesnäjnı bejn ni di gac chäällnu, na'c ga'pnu rebis, na'c guıdxagdılnı resa'nu, na'c chuguij lajznu xhıxten resa'nu. <sup>14</sup> Ni'cni colca' xcälrnıbee Jesucrist te na'c guntu redojl ni rlajz gun tiejxhtu.

### 14

#### *Na'c guıniyajtu rebejztu*

<sup>1</sup> Colnıi dıxdoo lo rebejn nani di gumbesa'c xtidx Dios, na'c tilnäjtıreni. <sup>2</sup> Sa'csi yu' reni rilılajz nani sajc gaurenı guıra'tı xhi cos, niluxh nani gajd sutıjp lo yälrılılajz, ganaxtis berduur rajwnı. <sup>3</sup> Nani rajw guıra'tı, na'c guıdxechnäjni nani di gau guıra'tı; luxh nani di gau guıra'tı, na'c za guıniyajni nani rajw sa'csi Dios aguleza bejnğa. <sup>4</sup> ¿Chuxh luj te guıniyajlu lo xmos te bejn, ä? Sugäb lagajc xlamnı lojni la laaca rujnnı o la xhet laadi rujnnı. Luxh sujnnı laaca sa'csi Dad Jesucrist sujn sutıjp lastoonı.

<sup>5</sup> Tej bejn naa sajcru tej dxej lo stee dxej, dxejc ste'ca bejn rchalo guiraa redxej najc tebloj. Xhet najcdı, tejga bejn sugunpac lagajc xhıgabni. <sup>6</sup> Nani rapda te dxej, rujnnıni te guiliä'pni xpala'n Dios, luxh nani di gunnı, rlıä'pzani xpala'n Dios sa'csi dini gapda te



dxej. Luxh nani rajw guira'ti, rajwni te rliä'pni xpala'n Dios, sa'csi rudeedzani xquixtios lo Dios; nani di gau guira'ti, nez lo Dios dini gau, rliä'pzani xpala'n Dios, rudeedzani xquixtios lo Dios.

<sup>7</sup> Sa'csi nicla tejnu dinu guibajñ xcuentcanu, nicla tejzanu dinu guet xcuentcanu.

<sup>8</sup> Palga nabaannu, nabaannu xcuent Dad Jesucrist; palga guetnu, rejtzanu xcuent Dad, Jesucrist. Ni'cni palga nabaannu, o palga guetnu, lahtis najcnu rexpen Dad, Jesucrist.

<sup>9</sup> Ni'cni gujt Jesucrist, ni'cni gubansaczani, te sajc gacni Dad xten rebengut, näjza Dad xten rebejn nani nabajñ.

<sup>10</sup> Dxejc luj, ¿xhicuent cubeelu bejtzlu, ä? O ¿xhicuent rdxe'chlu rhuiilu lojni, ä? Ni guiragajcnu tednu nez loj Jesucrist cadro cueni te gunni yälguxhtis loonu. <sup>11</sup> Sa'csi scree caj lo xtidx Dios:

Si'ctis ni nabanä, rniliápac lojtu, räjp Dad Dios,  
guiraa reben guedxliuj suzuxhijbreni loä,  
luxh guiragajc ro'reni sicäjp narä nacä Dad Dios.

<sup>12</sup> Ni'cni guiraanu, tejganu sudeednu cuent loj Dios xcuent nani biennu.

### *Na'c guzállu bejtzlu*

<sup>13</sup> Ni'cni na'cru cubeenu sa'nu. Maazru hueen jiennu xhigab nen lastoonu xhetliidi jiennu ni gun jiajb resa'nu lo dojl. <sup>14</sup> Narä nanä, racbeäpac guira'ti najc hueen. Jesucrist Xtadnu baluii narä si'c. Luxh palga yu' chu tej ni rchalo dini gac hueen, par laatisni dini gac hueen. <sup>15</sup> Palga la'tu guntu gac-huin lajz te sa'tu sa'csi yu' xhi rajwtu, dirutu chasanäj xnezyuj yälsanälajz. Na'c gunlu gunijt te sa'lu xcuent nani rajwlu, sa'csi agujt Jesucrist xcuentni. <sup>16</sup> Ni'cni na'c gusaanlu guiniyajreni nani najc te cos hueen par luj.

<sup>17</sup> Sa'csi xcäl'rnibee Dios dini gac xcuent yälrajw, niclaza xcuent yäl'rä'; xcäl'rnibee Dios najc xcuent te yäl'nabannya nez loj Dios, näjza yäl'rbedxilajz con yäl'rbalajz xcuent Sprit Dxan xten Dios. <sup>18</sup> Sa'csi nani rujn si'c lo xtzuun Jesucrist, bejnğa rchagljaz Dios, luxh reben guedxliuj rniiza didxsa'c xcuent sa' bejnğa.

<sup>19</sup> Ni'cni chanuutis guidiilnu recos nani rujn chu yäl'rbedxilajz, näjza nani rujn racnäjnü resa'nu te tioobruren loj xnezyuj Dios. <sup>20</sup> Na'c guntu nit xtzuun Dios xcuent ni rajwtu. Guliicani guira'ti ni rajw bejn najc naya, niluxh palga gautu te cos nani gun jiajb bejtzlu nen dojl, ni'c najc xhet laadi. <sup>21</sup> Hueen najc na'c gautu bääl, na'cza yätu bin, na'cza guntu jiajb sa'lu nen dojl. <sup>22</sup> Nani rililajztu, ni'c colyajp xcuentcatu nez loj Dios. Chicbaa nani di cubee lagajc laani xcuent recos nani rniini laaca najcni. <sup>23</sup> Luxh palga guntio'p lajz te bejn xcuent nani rajwni, sigubeeni lagajc laani, sa'csi dini gau xcuent yäl'rtililajz, sa'csi xhitis ni di gac xcuent yäl'rtililajz, lagajc ni'c najc dojl.

## 15

### *Huinälajz sa'lu*

<sup>1</sup> Nuurnu ni agusutijpnu lo yäl'rtililajz nanab gacnäjnü resa'nu nani gajd chalilazsa'c. Di gacdi guibantisnu xcuentcanu. <sup>2</sup> Tejganu nanab chonälaznu resa'nu lo xcäl'nabansa'cni te gacnäjnü chalilajzruren. <sup>3</sup> Sa'csi nicla Jesucrist dini nibajñ xcuentcani, luxh si'cni caj loj xtidx Dios: “Redidxyaj ni guniyajreni lojlu biajbreni yecä.” <sup>4</sup> Guiraa rediidx ni cuaj lo guijt galooli, cuajreni te guluiireni nuurnu te ga'pnu yälsutijp näjza yäl'rustioblajz te gacza guibääznu lo xtidx Dios. <sup>5</sup> Dios rusutijp lajznu, Dios rutioob lastoonu. Rniabä loj Diosga gacnäjni guntu tejtis xhigab xten Jesucrist con resa'tu. <sup>6</sup> Te dxejcti tejtis gac xse'tu guiliä'ptu xpala'n Dios, Xtad Jesucrist.

### *Gusule' xtidx Dios loj rebenzajt*

<sup>7</sup> Ni'cni colca' resa'tu, renani ahuililajz xtidx Dios sigajc cua' Jesucrist nuure te guiliä'pnu xpala'n Dios. <sup>8</sup> Sa'csi narä rniä lojtu, biääd Jesucrist te gujcn si'c te mos loj rexpen Israel te baluiini xcuent didxgulii xten Dios te gusojb rediidx nani bia'n Dios loj retoxtadgoldoonu, <sup>9</sup> näjza par rebenzajt, te guliä'preni xpala'n Dios sa'csi baluilojni xcäl'rulaslajz Dios lojreni, si'c ni caj lo xtidx Dios:

Ni'cni siliä'pä xpala'nlu nez loj rebenzijt, soläza dij lojlu.

<sup>10</sup> Dxejcti stee lajt rniini:

La'tu benzijt, colguibalaznäj rexpenä rexpejn Israel.

<sup>11</sup> Stee lajt cajza:

Guiraatu, rebenzijt, colguiliä'p xpala'n Dad, suguiliä'pza guirali rebejn xpala'nni.

<sup>12</sup> Stee huält guniiza Isaías scree:

Siricaj te xagdoo toIsaí, nājza te ni chäs te guinibeeni loj rebenzijt, laani cabäjz rebenzijt.

<sup>13</sup> Naj rniabä lo Dios ni rudeed yälrözajz, te laani gacnäj guibalajztu, cuecdxilajztu, sa'csi salilajztu, te tioobru yälrözajz ni rajptu sa'csi Sprit Dxan xten Dios yu' nen lastootu, luxh laani rajpni yälrnibee.

<sup>14</sup> Luxh xcuent la'tu rebetzä, anancheä nabansa'ctu nasinduxhtu, arajcza rulidxtu sa'tu, <sup>15</sup> luxh loj guijtzre bacuaä gaii didxnaj xcuent tiop-chon cos, te gusnaä lajztu. Runä si'c xcuent yälrulasajz ni baniidx Dios loä <sup>16</sup> te gacä xpen Jesucrist ni rusule' diidx loj rebenzijt. Ni'cni cagusulesa'cä xtidx Dios lojreni, te xca' Dios rebenzijt si'c te gojn ni rudedä, sa'csi agujcreni bennaya sa'csi rbäjz Sprit Dxan nen lastooreni.

<sup>17</sup> Ni'cni xcuent Jesucrist abidxälä xhicuent guiniduxhä didxro xcuent recos ni najc xten Dios. <sup>18</sup> Sa'csi dina guiniä diidx xcuent xhi stee cos, ganaxtis xcuent xho gucnäj Jesucrist narä, luxh xcuent ni'c basoob rebenzijt diidx, huililajzreni xtiidxni sa'csi biejn diajgreni xtiidxni, bahuiizareni rextzuunni, <sup>19</sup> con yälmilaagwr xten redzunro, resenro, ni gujc con xcälrnibee Sprit Dxan xten Dios. Ni'cni lo guedx Jerusalénli, nājza guideb gabi ro'c, lo guedx Ilírico, guiraa nejzga abasule'ä xtidx Jesucrist. <sup>20</sup> Si'cza guyu'ä ganduxh gusule'ä xtidx Dios xhet cadro ahuisule'direni xtidx Jesucrist, alga ganax cadro gajdreni gumbee Jesucrist, te na'c gunä dzuun cadro gusloj cayujn ste'ca bejn dzuun. <sup>21</sup> Te gacni si'cni caj lo guijtz:

Renani rutliidi bij diidx xcuentni, suhuiipacreni lojni, luxh renani gajdpac diajgreni jiejn xtiidxni, sacbecheereni xtiidxni.

#### *Rujn Pabl xhigab chääni guedx Roma*

<sup>22</sup> Ni'cni balti huält badxojn Dios narä jiädhuiä lojtu. <sup>23</sup> Luxh naj sa'csi abaluxä xtzunä guideb nezree, nājza sa'csi agujc balti ijz rladuxhä jiädhuiä lojtu, <sup>24</sup> naj che cha'a España siädhuiäpac lojtu. Che tedä, jiädhuiäpac contu te ganid guibalaznää la'tu, dxejcti gacnäjtü narä te cha'a España. <sup>25</sup> Naj sia'a guedx Jerusalén te chanää xcoobr rexpejn Dios ni yu' ree loj rebejn ro'c. <sup>26</sup> Sa'csi rebejn Macedonia nājza reben Acaya rlanjpacreni guxhalreni te coobr loj rebenproob ni yu' lo reni huililajz xtidx Dios nen guedx Jerusalén. <sup>27</sup> Bejnreni xhigab hueen gunreni si'c, luxh guli'careni, sa'csi yu' xhi nazääbreni lojreni sa'csi rebejn Jerusalén najc reni baxhal xtidx Jesucrist lojreni, naj laaca rujnreni cayacnäjnreni reben Jerusalén con xhixtenreni. <sup>28</sup> Ni'cni che chasa'nä meel lojreni dxejc tedä lajdxtu, jiädhuiä contu, dxejc cha'ä España. <sup>29</sup> Luxh ananä che jiälä lojtu, li guidxa lastoä xcäl'nasa'c xtidx Jesucrist guidzunä lojtu.

<sup>30</sup> Rebetzä, rniabduxhä lojtu xcuent xtidx Dad Jesucrist nājza xcuent xcälrinälajz Sprit Dxan xten Dios, colguidxagsa'tu, te colgacnäj colcuedx-guiniabtu lo Dios xcuentä.

<sup>31</sup> Colnab lo Dios te guslaani narä loj reben Judea nani di gusoob xtiidxni te saru gun reben dxan ni yu' Jerusalén te xca'reni ni chanää lojreni. <sup>32</sup> Te cabaa lazä guidzunä lojtu, sa'csi rlanjpac Dios jiälä lojtu, te la'ni yu'ä lojtu siälyuä, susilazäza con la'tu. <sup>33</sup> Dios ni rbecdxilajz bejn gacnäj guiraatu. Sugacni si'c.

<sup>1</sup> Colgacnäj bisiajnnu Febe. Nane're bejn dzunduxh nen guidoo ni tre' Cencrea.  
<sup>2</sup> Colca'ni xcuent Dad, Jesucrist, si'cni riäjł gun bejn gacnäj renani rililajzpac xtidx Dios. Colyacnäjni lo xhitis nani guiquiinni, sa'csi laani gucnäduhxni xhidal rebejn, nägajcza narä gucnäjni.

<sup>3</sup> Ruxhalä xtixtios lo Priscila näjza lo Aquila, ni racnäj narä lo xtzuum Jesucrist.  
<sup>4</sup> Laareni nicäjpreni niejtreni xcuentä, ni'c rudedä xquixtios lojreni, luxh xhet narätis, näjza guiraa rebejn ni yu' lo rexquidoo rebenzijt. <sup>5</sup> Ruxhalä xtixtios loj resa'ä ni rdxagsa'reni rolijz Priscila näjza Aquila. Ruxhalä xtixtios loj Epeneto, ni sanälazduhxä, ni gujc benganid ni huililajz xtidx Jesucrist nen guedx Acaya. <sup>6</sup> Ruxhalä xtixtios lo Marii nani benduxh dzuun lojtu. <sup>7</sup> Ruxhalä xtixtios loj reben ladxä ni laa Andrónico näjza Junias; laareni gyyunäj narä nen latzguiib, najcreni benro loj reapost. Ganid laareni huililajz xtidx Jesucrist, dxejcti huililazä.

<sup>8</sup> Ruxhalä xtixtios loj Amplias, ni sanälazä xcuent Jesucrist. <sup>9</sup> Ruxhalä xtixtios loj Urbano, ni runnäj nuurnu xtzuum Jesucrist. Ruxhaläza xtixtios loj Estaquis, ni sanälazä.  
<sup>10</sup> Ruxhaläza xtixtios loj Apeles, ni abadeed balti seen rililajzpacni xtidx Jesucrist. Ruxhaläza xtixtios loj guiraa ni tre' rolijz Aristóbulo. <sup>11</sup> Ruxhaläza xtixtios lo Herodión ben ladxä, näjza loj resa' Narciso nani ahuililajz xtidx Jesucrist. <sup>12</sup> Ruxhaläza xtixtios loj nan Trifena näjza nan Trifosa, guiro'preni cayujn xtzuum Jesucrist. Ruxhaläza xtixtios loj nan Pérsida, sanälazäni, abenduxhni xtzun Jesucrist. <sup>13</sup> Ruxhaläza xtixtios lo Rufo nani agule Dios, näjza lo xnanni, sa'csi gujcnä si'c xnanäza. <sup>14</sup> Ruxhaläza xtixtios loj Asíncrito, näjza lo Flegonte, näjza lo Hermas, näjza lo Patrobas, näjza lo Hermes, näjza lo rebetzä ni yunäjreni. <sup>15</sup> Ruxhaläza xtixtios loj Filólogo, näjza lo Julia, näjza lo Nereo con bisiajnni, näjza lo Olimpas näjza guiraa rexpen Dios nani yunäjreni ro'c.

<sup>16</sup> Colye'tz xchan loj resa'tu. Guiraa rexquidoo Jesucrist ruxhal xtixtios lojtu.

<sup>17</sup> Rebetzä, rniabduhxä lojtu ga'ptu cuidaad xcuent renani rujn bieje te guilia' sa' bejn, nani rlanj guntu giralajz nani najc garenca loj yälrlului ni bisieedtu, colguibicaj lojreni, <sup>18</sup> sa'csi sa' rebejnnga direni gun xtzuum Jesucrist. Laareni rlanjtisreni gunreni si'c rlanj tiejxhrene; rniireni didxdoo, diidx ni rgudxguel diajg bejn te rusgueereni lastoo rebejn nani di susin. <sup>19</sup> Guiranejz abire'ch diidx xcuent xho rusobsacpactu xtidx Jesucrist, ni'cni rbaa lazä, ni'cni rlazä gactu nasinduxh xcuent recoshueen, luxh si'c báz xhet ganditu xcuent recosguijdx. <sup>20</sup> Luxh Dios nani ruscuecdxilajz bejn siojb guta'cwni bendxab xhan ni'tu. Gacnäj Dad Jesucrist la'tu.

<sup>21</sup> Timoteu nani racnäj narä lo dzuun, ruxhal xtixtios lojtu. Lucio, Jasón, näjza Sosípater, ben ladxä, ruxhalza xtixtios lojtu.

<sup>22</sup> Najrä Tercio, ni cagucuaä guijzre xcuent Pabl, ruxhaläza xtixtios lojtu xcuent Jesucrist.

<sup>23</sup> Ruxhalza Gayo xtixtios lojtu. Rbääznu rolijzni, luxh rudeedzani rolijzni guidxagsa' reben guidoo. Ruxhalza Erasto, ni najc tesoreer xten guejdxre, xtixtios lojtu, sigajcza bejtznu ni laa Cuarto.

<sup>24</sup> Gacnäj Dad Jesucrist la'tu. Sugacni si'c.

### *Rediidx lult xten Pabl*

<sup>25</sup> Colguiliä'p xpala'n nani sajc gusudzu'tz la'tu loj xtiidxni nani basule'ä, näjza loj xtidx Jesucrist xcuent rehxigab ni naga'tz galooli, <sup>26</sup> naj abaluiloj rediidxga lojtu; näjza xcuent ni bacuaa reprofet galooli; si'c najc diidx ni bia'n Gueb Dios ni nabajn par tejpas loj rexpejn, agusule'ni loj guiraa reben guedxliuj, te gusoobreni diidx sa'csi rililajzreni xtiidxni, <sup>27</sup> colguiliä'p xpala'n ni najc tejtis Dios ni nanduxh. Suguiä'pnu xpala'n Dios xcuent Jesucrist. Guiliä'pnu xpala'n Dios par tejpas. Sugacni si'c.

## Guijtz Ganid Ni Bacuaa Pabl Lo Guidoo Xten Guedx Corinto

### *Bacuaa Pabl te guijtz lo guidoo xten guedx Corinto*

<sup>1</sup> Narä Pabl nacä apost xten Jesucrist sa'csi agule Dios narä te gusule'ä xtiidxni. Narä näjza Sóstenes ni najc bejtznu lo xtidx Dios rucuaanu guijszre lojtu <sup>2</sup> ni ahuililajz xtidx Dios, ni yu' nen guidoo xten guedx Corinto. La'tu agule Jesucrist, abasiani lastootu sa'csi ahuililajz xtiidxni. La'tu näjza guiraa rebejn ni ahuililajz rextidx Jesucrist loj guideb guedxliuj, najctu xpejn Dios, ni najc Dad xten guiraanu. <sup>3</sup> Rniabnu lo Dios ni najc xtdadnu näjza lo Dad Jesucrist, gacnäjreni la'tu, guscuedxireni lajztu.

### *Abaniidx Dios xhidajl dzunsa'c xcuent Jesucrist*

<sup>4</sup> Rudedätis xquixtios lo Dios xcuentu, xcuent yälrlulaslajz xten Dios ni cua'tu xcuent Jesucrist, <sup>5</sup> te xcuentni acua'zatu guiraa dzunsa'c, te gusule'tu xtiidxni, näjza te gacbesa'ctu xtiidxni; <sup>6</sup> sigajcza con xcäl'nabansa'ctu baluiitu huililajzfactu xtidx Dios xcuent Crist. <sup>7</sup> Ni'cni xhetliidi cayäädxditu loj redzunsa'c ni runiidx Dios, laj ni ganduxh yu'tu cabäjztu guibisac Jesucrist lo guedxliuj. <sup>8</sup> Laani susutijpni lajztu dxejli ni guibisac Dad Jesucrist loj guedxliuj, te rutliidi gac cue'c xhi te quej xcuenttu. <sup>9</sup> Rusoobpac Dios xtiidxni. Laani gurejdxni la'tu te jiu'tu lo xnejz Xi'nmi Jesucrist ni najc Dad xtenu, te sanäjtni.

### *Rlia' sa'reni nen guidoo*

<sup>10</sup> Rulidxä la'tu, rebetzä, xcuent Xtdad Jesucristnu, colyejn tejsi xhigab te na'c la' sa'tu, saru guibannäjtu sa'tu, colyejn tejsi xhigab, colga'p tejsi xcäriejn. <sup>11</sup> Sa'csi agucebä xcuenttu, betzä ni huililajz xtidx Dios. Tej resa' Cloé biädsa'n diidx loä xcuenttu, yu' yälrdijl lojtu. <sup>12</sup> Rlazä guiniä scree lojtu sa'csi yu'reni rni: “Narä nacä te rexpejn Pabl”, näjza: “Narä nacä te rexpejn Apolos”; näjza: “Narä nacä te rexpejn Pedr”, yu'zaren rni: “Narä nacä xpejn Crist.” <sup>13</sup> ¿La rujntu xhigab nala' sa' Crist, ä? ¿La cuaj Pabl lo cruzj xcuent xtojltu, ä? o ¿La gurobnistu con laj Pabl, ä? <sup>14</sup> Rudedä xquixtios lo Dios dina nutiobnisä nicla tejtü, xtebtis Crispo näjza Gayo, <sup>15</sup> te rut naadi con laä batiobnisäreni. <sup>16</sup> Abanaj lazä batiobnisä resa' Estéfanas. Di lazä guinaj la yu' chu stee bationnisä. <sup>17</sup> Di Crist nuxhal narä te gutiobnisä. Baxhalni narä te gusule'ä rextiidxni xcuent xho gun bejn te laareni lo dojl, xhet con didxmanduxhdi, te di gudzucaä loj dzunroduxh ni bejn Jesucrist che gujtni lo cruzj.

### *Crist najc xcäl'milaagwr näjza xcäl'najn Dios*

<sup>18</sup> Rediidx ni rniinu xcuent Jesucrist xcuent xho gujtni lo cruzj te guslaani rebejn lo dojl najcni te diidx ni xhet sajcdi lo rebejn ni canijt sa'csi direni chalilajz xtiidxni. Luxh loj rebejn ni ruslaa Dios lo dojl najc rediidxga xcäl'milaagwr Dios. <sup>19</sup> Scree caj loj rexquijtz Dios:

Narä sutzulä yäl'nasiñ xten rebennajn, sudzucaäza xcäl'nadxällajz, xhigab rebejn ni nadxällazduxh.

<sup>20</sup> ¿Con bejn ni nanduxh? ¿Con bejn ni rucuaa, ni najc mastr? ¿Con bejn ni ruchagduxh diidx xcuent recos guedxliujre, ä? ¿La et abejndi Dios najc guiraa yäl'nasiñ xten guedxliuj si'c nayällajz nez loj Dios, ä? <sup>21</sup> Ni'cni loj xcäl'nasiñ Dios, di rebejn guedxliuj niembee Dios con xcäl'nasiñ guedxliujre, ni'c bichagljaz Dios con yälrsule' diidx ni rniireni nayällajz, con ni'c baslaani lo dojl rebejn ni huililajz xtiidxni xcuent Crist.

<sup>22</sup> Rexpejn Israel rlanjpacreni fiireni remilaagwr; rebejn griegw rguuil yäl'nanduxh. <sup>23</sup> Niluxh nuurnu rusule'nu diidx xcuent xho cuaj Jesucrist lo cruzj, niluxh loj rexpejn Israel najc diidxre si'c te guiro ni chalani' bejn, luxh loj rebenzajt xhet sajcdi rediidxre. <sup>24</sup> Niluxh loj rebejn ni gule Dios chalilajz rediidxre, rexpejn Israel sigajc loj rebenzajt, rediidxre najczani yäl'milaagwr najczani yäl'nasiñ xten Dios. <sup>25</sup> Sa'csi xcäl'nayääl xten Dios si'c rchalo rebejn ni'c najc nasinduxhru loj xcäl'nasiñ xten reben guedxliuj; luxh

xcäl̄rniaj xten Dios sacduxhruni loj guiraa xcäl̄nadaan reben̄ guedxliuj. <sup>26</sup> Col̄huii la'tu, betzä ni ahuililajz xtidx Dios, xho gule Dios la'tu, colyejn xhigab guxiitu najctu ben̄ nasin̄ loj reben̄ guedxliuj, guxiiza rajptu yäl̄rnibee, guxiizatu najctu bejn̄ ni agojl̄ guiga'tu bensa'c. <sup>27</sup> Niluxh agule Dios rebejn̄ ni xhet nanduxhdi te gusanxtujyni rebejn̄ ni nanduxh, aguleza Dios rebejn̄ ni guxii rnibee te gusanxtujyni rebejn̄ ni rnibeduxh. <sup>28</sup> Agule Dios rebejn̄ ni di guiga' benro, näjza rebejn̄ ni rut riudi, reni rut najcdi, te gusanxtujyni rebejn̄ nani najc guiraa reni'c. <sup>29</sup> Te nicla tej bejn̄ digacdi guiliä'p lagajc xpala'n̄ni nez loj Dios. <sup>30</sup> Lagajc Dios abachaag la'tu loj Dad Jesucrist; baxhal̄zani Jesucrist loonu te basanijni xcäriejnnu te ga'pnu yäl̄nasin̄ xten Dios, te guibansa'cnu nez loj Dios, te gacnaya lastoonu, näjza te quiixni rextojl̄nu. <sup>31</sup> Si'c bejn̄ Dios te soob xtiidxni cadro caj scree:

Ni rlajz guinii didxro, suguiliä'pni xpala'n̄ dzuun ni bejn̄ Jesucrist.

## 2

### *Rediidx xcuent Crist ni cuaj lo cruiz*

<sup>1</sup> Ni'cni cheni biädsule'ä xtidxlii Dios lojtu, rebetzä, dina niädniä didxnajn lojtu, niclaza didxnagajn, xhet si'cti basule'ä xtidx Dios xcuent Crist. <sup>2</sup> Cheni guyu'ä lojtu, benä xhigab dina niädniä xhi stee diidx lojtu, biädsule'ätis diidx xcuent Dad Jesucrist, ni cuaj lo cruiz. <sup>3</sup> Bidzunä lojtu guideb rdxagä, guideb racditä sa'csi cadxebduxhä. <sup>4</sup> Cheni basule'ä diidx lojtu, dina niniä didxro xten yäl̄nasin̄ xten guedxliuj, alga guniä xtiidx yäl̄nasin̄ xten Sprit Dxan xten Dios näjza xcäl̄rnibee Dios, <sup>5</sup> te di gac xcäl̄rililajztu xcuent yäl̄nasin̄ xten guedxliujre, te gac xcäl̄rililajztu xcuent yäl̄rnibee xten Dios.

### *Rumbee bejn̄ Dios xcuent ni ruluii Sprit Dxan xten Dios*

<sup>6</sup> Rniizanu lo sa'nu ni aguyajl lo xtidx Dios rediidx xten yäl̄nasin̄ xten Dios, per te yäl̄nasin̄ ni di gac xcäl̄nasin̄di guedxliuj, niclaza xten reni rnibee lo guedxliujre, sa'csi sidzuj̄n dxej sinitlojreni. <sup>7</sup> Niluxh che rniinu yäl̄nasin̄ xten Dios, rniinu diidx ni rut racbextebdi, xcuent xho gac guidzunn̄u cadro yu' Dios xhaguibaa. Cheni gajdli gac guedxliuj, rapcheeni yäl̄nasin̄xhiga'tz xtenni. Baluiinini loonu te guiban̄näänuni lo xcäl̄rdimbicha' xtenni. <sup>8</sup> Nicla tej reni rnibee lo guedxliujre gajd gacbee recosre niluxh paru niacbeerenini, direni nucuaa lo cruiz Dad Jesucrist nani rajp xcäl̄rdimbichaduxh. <sup>9</sup> Najcni si'cni caj lo rextidx Dios cadro rnii:

Recos ni gajdpac baloj bejn̄ fii,

nani gajdpacza diajg bejn̄ jiejn;

nani gajdpacza jiu' lo xhigab bejn̄, guiraa recosga abaluchee Dios par rebejn̄ ni chanäl̄ajzni.

<sup>10</sup> Niluxh abaluii Diosreni loonu con Sprit Dxan xten Dios, sa'csi laani basule'nireni loonu. Sprit Dxan xten Dios racbesa'c guiraa rexhigab, näjza recos xhiga'tz xten Dios.

<sup>11</sup> Loj reben̄ guedxliuj ¿chuni'c racbee rexhigab ni rujn̄ bejn̄? Lagajc sprit xten bejn̄ ni yu' nen̄ni racbee xhi xhigab cayujnni. Sigajcza rut racbeedi rexhigab xten Dios; Sprit Dxantis xten Dios racbeeni. <sup>12</sup> Luxh nuurnu dinu nica' yäl̄najn̄ xten guedxliuj, alga cua'nu Sprit Dxan ni siäd lo Dios te gacbeenu rexhicos ni abasalajz Dios loonu. <sup>13</sup> Nuurnu rniizanu xcuent recosga, xhet diidxdi ni ruluii xcäl̄najn̄ guedxliujre, diidxtis ni baluii Sprit Dxan xten Dios loonu. Si'c ruluiinu rediidxga loj rebejn̄ ni rbäjz Sprit Dxan xten Dios nen̄ lastooreni.

<sup>14</sup> Niluxh reni di chalilajz xtidx Dios, direni gacbee rexhigab xten Sprit Dxan xten Dios, sa'csi laareni xhigabyäältis rchaloreni xcäl̄nasin̄ Dios. Di gacdiza gabeereni rexhigabga, sa'csi Sprit Dxan xten Diostis rajc ruluii lo bejn̄ rexhigab xtenni. <sup>15</sup> Rebejn̄ ni ahuililajz xtidx Dios, rula'tzreni guira'ti ni ruluii Sprit Dxan xten Dios lojreni. Luxh rebejn̄ ni ahuililajz rutliidi rula'tzdireni. <sup>16</sup> Sa'csi scree caj lo xtidx Dios: “¿Chuni'c agucbee xho najc xhigab xten Dios te gac guluiini Gueb Dios, ä?” Nicla tej bejn̄. Niluxh nuurnu rajpnu lo xcäriejnnu xhigab xten Crist, nalajznu racbeenu rextiidxni.



## 3

*Reni rujn dzuun lo Dios*

<sup>1</sup> Rebetzä, di niajcdi niniä redidxnagajn lojtu si'c ni rniä loj rebejn ni rajp yälناسin xten Sprit Dxiان xten Dios, basule'ä ganaxtis didx guyasi lojtu, sa'csi najctu ben guedxliuj o biuxbäz ni guxii racbeeni xcuent Crist. <sup>2</sup> Basule'ä ganax didxguyasi lojtu si'c rudeed bejn le'ch lo te biuxbäz lacuaa gauni bääl. Dina niniä lojtu guiraa rextidx Dios ni nanab gacbeetu, sa'csi gajd gacdi gacbeetuni, niclaza naj gajd gacdi gacbeetuni, <sup>3</sup> sa'csi nabansijctu si'c nabajn reben guedxliuj lahtis runembiidtu, rdxechlajztu lo sa'tu, ¿la ditu gacbee nacsijctu si'c ben guedxliuj, ä? ¿La lahtis nabajntu si'c nabajn reben guedxliuj ni di gumbee xtidx Dios, ä? <sup>4</sup> Sa'csi cheni rniä tejni: “Narä nacä te xpejn Pabl”, dxejcti steeni rniä: “Narä nacä te xpejn Apolos”, ¿la xhet cayujnditu sigajctis ni rujn rebejn guedxliuj, ä?

<sup>5</sup> ¿Chuni'c najc Pabl? ¿Chuni'c najc Apolos? Nuurnu najctisnu xmos Dios ni basule'ä xtidx Dios lojtu te huililajztu, luxh cade teynu riennu dzuun ni runiidx Dios jiennu. <sup>6</sup> Ganid basule'ä xtidx Dios lojtu, dxejc biääd Apolos te gucnäjzani gucbeerutu xtidx Dios, niluxh lagajc Dios najc ni cagusanij xcäriejntu te gacbesa'ctu xtiidxni. <sup>7</sup> Ni'cni nicla ni rusulexgaa diidx, niclaza nani racnäj racbeeru bejn rediidxga xhet sajcdireni; Diostis sajc nani rusanij xcäriejn rebejn. <sup>8</sup> Nuurnu najcnu si'c rexmos ni rujn dzuun lo yuj. Tejsi najc nani rbe'c binij näjza nani rga' nis, niluxh Dios rguijx tejganu dzuun nani riennu. <sup>9</sup> Nuurnu najcnu si'c remos ni runnäj Dios dzuun. La'tu najctu si'c yuj cadre cayajc xtzun Dios, si'c te yu' ni cayunchee Dios. <sup>10</sup> Narä nacä si'c te mastr albañil. Baniidx Dios dzuun loä, gucnäjni narä te casuä reguij lo yujre, te naj ste'ca bejn quixh basuu yejcti. Niluxh tejsa ni chanuu gun dzuun lojga, suga'pni cuidaad xho guiliäsni padeerga. <sup>11</sup> Sa'csi di gacdi gusujreni garenca cimient loj nani najc-xgaa, ni najc Jesucrist. <sup>12</sup> Naj palga guiliäs bejn te padeer yejc cimientga con oor, con pla't, con guij ni sacduxh, o con baräjd, guixhtriuu, o balag biquii, <sup>13</sup> sidzujn dxej sien xho najc dzuun ni bejn tejsa bejn. Sa'csi siääd fis guiboos ni guluiløj dzuunga, sa'csi lagajc guibooga guluiløj dzuunga, xho najcni. <sup>14</sup> Palga yu' reni bejn te yusa'c yejc cimientga, luxh dini chec lo guibooga, sudeed Dios lo bejnga ni riäjil xca'ni sa'csi bejnni yusa'c. <sup>15</sup> Niluxh palga chec ni bejnni yejc cimientga xhet xca' dini, xcäl'nabajntisni di nit, luxh xtzuunni sejc.

<sup>16</sup> ¿La ditu gan la'tu najctu xquidoo Dios, luxh nen lastootu rbäjz Sprit Dxiان xten Dios, ä? <sup>17</sup> Palga yu' chu gutiexhät xquidoo Dios, sunitloj Diosni par tejpas, sa'csi xquidoo Dios najc dxan, luxh la'tu najctu guidooga.

<sup>18</sup> Nicla tejsa na'c gusgueetu lagajc la'tu. Palga yu' chu rujn xhigab nanduxhni xcuent yälناسin xten guedxliujre, nanabpac gacni si'c te bejn ni xhet najndi te xca'ni yälناسin xten Dios te guliipac gacni te bennajn, te ben nasin. <sup>19</sup> Sa'csi yälناسin xten guedxliuj xhet sajcdi nez loj Dios. Lo rexquijtz Dios caj scree: “Dios rujn rga' reni rajp yälناسin xten guedxliuj lagajc xcuent xcäl'rusgueerene ni rujn lagajc xcäl'nadxällajzreni.” <sup>20</sup> Ste'ca lajt caj scree: “Nanchee Dios xho najc xhigab ni rujn rebejn ni rajp xcäl'ناسin guedxliujre, luxh xhetliidi sajcti nez loj Dios.” <sup>21</sup> Ni'cni na'c guiliä'p bejn xpala'n te bejn guedxliuj. Sa'csi loj tejsatu abaniidx Dios guira'ti rexhicos najc xtengatu, <sup>22</sup> palga najcni Pabl, o Apolos, o Pedr, o guedxliuj, o yäl'nabajn, o yäl'gujt, o recos ni yu' naj, o recos ni churu gac, guiraareni najc xtentu. <sup>23</sup> La'tu najctu xten Crist, luxh Crist najc Xi'n Dios.

## 4

*Xtzuun reapost*

<sup>1</sup> Ni'cni la'tu nanab fiitu loonu si'c rexmos Dad Jesucrist ni rajp rexhigabxhiga'tz xten Dios te gusule'nureni lojtu. <sup>2</sup> Mbaj pues, te bejn ni cahuii te dzuun nanab gusoobreni diidx, gunreni te dzunsa'c. <sup>3</sup> Niluxh guxii runä xhigab gula'tztu narä, o gula'tz chutis guxhtis lo guedxliujre narä; nicla lagajc narä dina gunduxhä xhigab xho nacä nez loj Dios. <sup>4</sup> Entis rbedxi xcärienä, per xhet xcuent ni'cni sajcti guiniä xheti xtolä, Dad Jesucrist najc nani rula'tz narä, rhuiløjni xho nacä. <sup>5</sup> Ni'cni la'tu na'c gucuajquijtu bejn che gajd



guidzujn dxej; colcuäjz jiaäd Jesucrist dxejc laani sibääni lo bianij guiralii ni naga'tz lo nacäyj, luxh suluilozjani xhi xhigab yu' nen lastoo tejga rebejn, dxejc lo tejganu sudeed Dios ni nungäj] xca'nu.

<sup>6</sup> Rebetzä, xcäl'nasa'ctu caniaä rediidxre lojtu. Caniaä xcuent Apolos näjza narä, si'c te yäl'ruluii te fiitu xho riennu te na'cza guntu recos ni xhet caj di lo rexquijtz Dios, te na'cza guilia'ptu xpala'n tejtü lo resa'tu, la] ni cabälaztu steeni. <sup>7</sup> Sa'csi ¿chuni'c rnii najclu bensa'cru lo ste'ca bejn?, o ¿xhini'c rajplu ni di Dios nuniidx lojlu? Luxh palga cuaxlia'luni, ¿xhicuent lagajc luj rliä'plu xpala'ntu, lascanu rut baniidxdi lojlu recos ni rajplu?

<sup>8</sup> Rujntu xhigab rajptu xhidaj] cos, naatu najctu ricwduxh, rchalotu najctu reii, dirutu guiquiin nuurnu. Malaii gulii najcpectu reii te näjzanu guinibenäjnu la'tu. <sup>9</sup> Niluxh runä xhigab gule Dios reapost si'c rebejn ni xhet sajcdi. Najcnu si'c rebejn ni gunibeereni guet. Nez loj reben guedxliuj näjza nez loj rexangl Dios najcnu si'c reben ni rdedlojtis bejn lojreni. <sup>10</sup> Nuurnu najcnu bennayääl xcuent Crist, niluxh la'tu rchalotu racbeduxhtu rextidx Crist. Nuurnu najcnu bejn ni xhet nadipdi, niluxh la'tu najc bendanduxh. Rliä'p rebejn xpala'ntu, ni'c rbälazreni nuurnu. <sup>11</sup> Cadeednu trabajwduxh naj, rliaannu, rioj]nu, xho rniaj xhajbnu, rdil'näj rebejn nuurnu, luxh xheti roliznu. <sup>12</sup> Rdxaggu riennu dzuun lagajc naanu te guidxälnu xhi guidaunu. Che rguereni loonu, rniabnu lo Dios xcuentreni. Che rusacsí rebejn nuurnu, rientisnu huant. <sup>13</sup> Che rniyajreni nuurnu, rulidxnäänureni didxdoo. Rujnreni xhigab najcnu si'c guijxh xten guedxliujre, ruhuiireni loonu si'cni xhet sajcdinu.

<sup>14</sup> Dina gucuaä rediidxre te gusanxtuiyätu. Rucuaä rediidxre te gulidxätu si'c rexi'nä ni sanälazä. <sup>15</sup> Palga ga'ptu tzuu mil bejn ni guluiitu rediidx xten Crist, ruti stee xtadtu; narä gucä xtadtu, ganid narä basule'ä rextidx Dios lojtu. <sup>16</sup> Ni'cni rulidxä la'tu, colyejn si'cni ruhuiitu runä.

<sup>17</sup> Ni'cni baxhalä Timoteu lojtu, najcni si'c xi'nä ni sanälazä, ni rusoob diidx xcuent Crist. Laani susnajni lajztu xho mood nabanä lo yäl'nabajn xten Jesucrist, sigajcni ruluiä nen reguidoo guiraasi lajt. <sup>18</sup> Yu'tu ni acayajc gualajz, naatu pet dina guibisacä lojtu. <sup>19</sup> Cabazä jiädhuiätu, palga si'c rlajz Dios, dxejc sacbeä chuni'c najc rebejn ni cayajc gualajz, fiä xhipacni rujnreni, xhet xtiidxtisreni gacbeä. <sup>20</sup> Sa'csi xcäl'nibee Dios xhet ganaxtis xcuent diidx najcni, näjza dzuun ni rujnreni rululoj xcäl'nibee Sprit Dxaan xten Dios ni rajpreni. <sup>21</sup> ¿Xho rlajzzatu guidzunä lojtu, ä? ¿La sidzunä si'c te dad ni ca' te baar te quinätu o la guidzunä yäl'rinälajz näjza yäl'nadolajz te gulidxätu, ä?

## 5

*Xho nanab gunnäjtu te bejn* ni rujn falt lo sa'ni

<sup>1</sup> Agucbeä yu' tejtü ni ahuililajz xtidx Dios, cua'ni si'c chäälni te gunaa ni gujc chääl xtadni. Dee najc te dol'duxh nani nicla reni di chalilajz xtidx Dios direni gun. <sup>2</sup> Luxh la'tu gujctu gualajz lacuaa niac-huin lastootu; te bejn nani bejn dojlga, riäj] nibäätuni nez lojtu. <sup>3</sup> Mase ruti narä ro'c, lastoä suganäj la'tu. Alabenä xhigab xhini'c jiennäjnu bejnga ni bejn dol'duxhga, sigajc ni niunä paru suga'ä ro'c. <sup>4</sup> Con laj Dad Jesucrist, che abidxagsa'tu, luxh alastoä suganäj la'tu, con xcäl'nibee Dad Jesucrist, <sup>5</sup> abenä xhigab gutednu bejnga ladznaa bendxab te ted tiejxhni trabajw, niluxh sprit xtenni laani nen dxej ni jiädsac Dad Jesucrist lo guedxliujre.

<sup>6</sup> Di guchaag guilia'ptu xpala'ntu xcuent dzuun ni rujntu. ¿La ditu gan te dojl najc si'c tudxe'n cojb ni ruslaj, rusaguijni cojb cadre ru'chni, ä? <sup>7</sup> Colgudzucaj cobyujxhga, te guibajntu te yäl'nabannayacoob si'c te cobyä, sa'ni racchee yätxtiil ni xheti levaduur yejcnii par lanij xten pascw. Arajptu yäl'nabannaya sa'csi agujt Jesucrist sigajc gujt te xile' lo lanij pascw te badzucajni rextoj]nu. <sup>8</sup> Si'c nanab jiennu lanij xten pascw con yätxtiil ni xheti levaduur yejcnii, nalajznu con yäl'guliipac nen lastoonu, xhet yätxtiildi ni yu' cobyujxhga yejcnii, nalajznu na'c gunlu latsiaj.

<sup>9</sup> Lo stee guijtza abacuaä lojtu, na'c guchaagtu reben ni runnä j cosguijdx bejn ni di gac chäälreni. <sup>10</sup> Niluxh xhet caniädi xcuent reben guedxliuj ni rujn cosguijdx con bejn ni di gac chäälreni, niclaza xcuentdi rebejn ni rchaglazte meel, niclaza rebejn ni najc gubaan, niclaza rebejn ni riu rebanäjb. Paru si'c gacni, nanab jiunejzta guedxliujre. <sup>11</sup> Niluxh narä bacuaä guijtza lojtu te na'c guchagsa'tu te bejn nani rnii ahuililajzni xtidx Dios, luxh rujnrui cosguijdx con bejn ni di gac chäälni, o rchaglaztejni meel, o riuni rebanäjb, o rniyaj sa'ni, o rsiojzni, o rusgueeni bejn te rca'ni xhi xtenni. Rniäza lojtu, nicla gaunäjtu sa' bejnga. <sup>12-13</sup> Sa'csi narä di gacdi gunä yälguxhtis loj rebejn ni gajd chalilajz xtidx Dios. Gunti Dios yälguxhtis lojreni. La'tu nungäj l guntu yälguxhtis loj rebejn ni ahuililajz xtidx Dios. Ni'cni colgudzucaj bendojlga lojtu.

## 6

*Na'c chäätu loj rebendojl te gunreni yälguxhtis lojtu*

<sup>1</sup> Palga tejtü ni ahuililajz xtidx Dios rlajz cue'c xquej stee sa'tu, ¿xhicuent chale'ctu xquejni loj rebendojl te gunreni yälguxhtis lojtu? ¿Xhicuent ditu guiniab yälguxhtis loj rebejn ni ahuililajz xtidx Dios, ä? <sup>2</sup> ¿La ditu gan, rebejn ni ahuililajz xtidx Dios sujn yälguxhtis lo reben guedxliuj, ä? Palga la'tu sujntu yälguxhtis lo reben guedxliuj, ¿la di gacdi guntu yälguxhtis lo sa'tu lo recosbäz lacuaa chäätu loj rebendojl te gunreni xcälguxhtisreni lojtu, ä? <sup>3</sup> ¿La ditu gan sienzanu yälguxhtis lo rexangl Dios, ä? ¿Aticaxh jiennu yälguxhtis loj recos bäze' xten sa'nu lo yäl'nabajre! <sup>4</sup> Palga la'tu cadilnä j sa'tu xcuent recos xten guedxliujre, ¿xho mood chäälü loj rebendojl ni rut najcdi loj xquidootu, te naareni lojtu xhini'c guntu, ä? <sup>5</sup> Rniä rediidxga lojtu te guitujytu. ¿La ruti nicla tej bennasin loj guiraatu ni sajc gun yälguxhtis lo resa'tu, ä? <sup>6</sup> ¿Xhicuent rile'c te bejn ni rililajz xtidx Dios xquej bejztni ni rililajzza, luxh rijreni nez loj reguxhtis ni di chalilajz xtidx Dios?

<sup>7</sup> Mbaj naj, guliipacni alabanijttu sa'csi yu' yälrdilnä j sa'tu; colgutijp lajzta rebejn ni rujn dojl lojtu. Maazru huen colgusaan sucua'reni xhixtentu. <sup>8</sup> Per dee, alga lagajc la'tu runnijttu loj lagajc resa'tu, luxh rca'tu xhixten lagajc resa'tu.

<sup>9</sup> O ¿la ditu gan reben dojl dipacreni jiu' lo xcäl'rnibee Dios, ä? Na'c gusaantu gusgueereni la'tu; nicla te resa' dee di jiu' lo xcäl'rnibee Dios: guiraa reni richagtoo regunaa; guiraa reni rajn rebanäjb; reni resnä j bejn ni di gac chäälni; reniguii ni rungunaa; reni najc biräax; <sup>10</sup> reni najc gubaan; reni rsiäblajz xhixten bejn; reni rsiojz; reni rniyaj; reni rusguee bejn te rca'reni xmeel bejn. Nicla tej sa' redee di jiu' lo xcäl'rnibee Dios. <sup>11</sup> Yu'zatu ni gujc si'c galoo, niluxh naj abasia Dios lastootu, naj anajctu bennaya nez loj Dios sa'csi abiällajz Dios xtojltu xcuent Jesucrist, näjza xcuent Sprit Dxan xtenni. La'tu anajctu rexpejni.

*Tiejxhnu najc xquidoo Dios*

<sup>12</sup> Guliini sajc gunä xhitis ni rlazä gunä, niluxh xhet guiraadini najc hueen par narä. Narä sajc gunä si'ctis ni rlazä, niluxh dina gusanä guinibee nicla tej xhi cos narä. <sup>13</sup> Guliini najc yälrajw par xque'ni, luxh xque'ni najc par yälrajw, niluxh sidzujn dxej sunitloj Dios guiro'preni. Per tiejxhnu di gac par jiennu cosguijdx con bejn ni di gac chäälnu. Tiejxhnu najc par Dios, luxh Dios najcza par tiejxhnu. <sup>14</sup> Luxh naj lagajc Dios guläs Dad Jesucrist lo rebengut, siliäszani nuurnu con xcäl'rnibeduxhni.

<sup>15</sup> ¿La ditu gan tejtatu najc si'c te la' tiejxh Crist sa'csi ahuililajzta rextiidxni, ä? Palga tiejxhnu najc xten Crist, ¿la sajc gudeednuni loj te gunadxab, ä? ¿Gurniälojlu jiennu si'c! <sup>16</sup> ¿La ditu gan cheni guchaagni te gunadxab rajcni tejtis tiejxh con laani, ä? Loj rexquijtza Dios caj: “Guirao'preni sajc si'c tejtis bejn.” <sup>17</sup> Niluxh nani rudeed lastooni lo Dios anajczani tejtis con laani sa'csi rbäjz Sprit Dxan xten Dios nen lastooni.

<sup>18</sup> Colguibicaj lo dojl ni rujn bejn con nani di gac chäälni. Xhitis stee dojl ni rujn bejn najcni lo jiaa tiejxhni, niluxh dojl ni runnä jni bejn ni di gac chäälni najc dojl lagajc nen tiejxhni. <sup>19</sup> O ¿la ditu gacbee tiejxhtu najc xquidoo Sprit Dxan ni abaniidx Dios te cuääzni

neñ lastoonu, ä? Ni'cni di gacdi guinibeetu lagajc la'tu. <sup>20</sup> Agudijx Jesucrist xtojlnu con xtiejnni lo cruzj, ni'cni nanab jiennu dzunsa'c nani guiliä'p xpala'n Dios con tiejxhnu näjza Xpřitnu.

## 7

*Yäl\_rulijdx xcuent yäl\_ruchnaa*

<sup>1</sup> Naj gudzu'ä diidx lojtu xcuent ni gunabdiidxtu cheni bacuaatu guijtjz loä. Guliini hueen najcni na'c guchnaa te niguii. <sup>2</sup> Niluxh sa'csi yu' xhidajl reni richunäj chutis gunaa, suga'p tejga reniguii chäälpacni; sigajcza suga'p tejga regunaa chäälpacni. <sup>3</sup> Nanab niguii guchaagni chäälni che rlanj chäälni, sigajcza gunaa nanab guchaagni chäälni che ni si'c rlanj chäälni. <sup>4</sup> Di gunaa guinibee lagajc tiejxhni, sa'csi chäälni rnibee tiejxhni. Sigajcza di niguii guinibee lagajc tiejxhni, sa'csi chäälni rnibee tiejxhni. <sup>5</sup> Na'c gusuni' tejtju lo chäälni. Maazru hueen coljia'n diidx na'c guchagsa'tu te xcheje' te cuedx-guiniabtu lo Dios. Che luux cuedx-guiniabtu lo Dios, guchagsacs'a'tu te na'c guquil bendxabtu chunäjtu ste'ca bejn.

<sup>6</sup> Rniä rediidxre lojtu te ni rlanj guchnaa sajg guchnaani, niluxh dina guiniä lojtu, nanabpac guchnaatu. <sup>7</sup> Narä rlazä maläii sajg gac guiraa bejn si'c ni nacä. Dios abadeed loj tejga bejn xho mood guibajjni. Yu'reni sajg guibajjn tej mood, yu'zareni sajg guibajjn garenca mood.

<sup>8</sup> Loj reben xteb näjza loj regunabiuud rniä, hueen najc na'c guchnaareni, gacreni si'c narä. <sup>9</sup> Niluxh palga di gacdi cue'cdxi lajzreni, suguchnaareni. Maazru huen guchnaareni te na'c guntisreni xhigab rlanjzreni guchaagreni te niguii o te gunaa.

<sup>10</sup> Loj rebejn ni abachnaa, rniä rediidx ni basa'n Dad Jesucrist loonu: "Na'c guro'n gunaa chäälni." <sup>11</sup> Niluxh palga guro'n te gunaa chäälni, na'c guchnasacni, o maazru hueen gusiäjlni diidx guibisacni lo chäälni. Sigajcza te niguii na'c guro'nni chäälni.

<sup>12</sup> Naj rediidx ni guiniä najc xhigab xtenä, xhet diidxdi ni basa'n Jesucrist loonu. Scree rulidxä la'tu. Palga yu' te niguii ni rililajz xtidx Dios, luxh chäälni di chalilajz xtidx Dios, luxh rlanj gunaaga cuäznäjni niguiiga, na'c guro'n niguiigani. <sup>13</sup> Palga yu' te gunaa ni rililajz xtidx Dios, luxh di chäälni chalilajz xtidx Dios, niluxh rlanjzni cuäznäjni gunaaga, na'c guro'n gunaaga chäälni. <sup>14</sup> Palga yu' te niguii ni di chalilajz xtidx Dios, luxh chäälni rililajz xtiidxni, palga hueen nabannäj sa'reni, hueen najc yäl\_ruchnaaga nez loj Dios. Sigajcza palga yu' te gunaa ni di chalilajz xtidx Dios luxh chäälni rililajz xtiidxni, palga hueen nabannäjsa'reni, hueen najc yäl\_ruchnaaga nez loj Dios. Palga dini gac si'c, di Dios gunle' rexi'nreni, per naj abenle' Dios rexi'nreni. <sup>15</sup> Palga chääl te gunaa o chääl te niguii ni di chalilajz xtidx Dios luxh rlanjzni guilia' sa'ni con chäälni ni ahuililajz xtidx Dios, sujizani. Nani rililajz xtidx Dios diruni ga'p por cuäznäjni chäälni ni di chalilajz xtidx Dios, niluxh gurejdx Dios nuurnu te cuedcxini lajznu. <sup>16</sup> Sa'csi ¿xho najnlu, gunaa, la suslaa Dios chäällu lo dojl xcuentlu, ä? O ¿xho najnlu, niguii, la suslaa Dios chäällu lo dojl xcuentlu, ä?

<sup>17</sup> Si'ctis ni baniidx Jesucrist lo tejganu, si'ctis ni gule Dios tejganu, si'c suguibajjnu. Si'cza rulidxä gunrenini neñ guiraa reguidoo. <sup>18</sup> Palga tej niguii rililajz xtidx Dios, luxh yu'ni bee tiejxhni, xhet najcdini. Palga stee niguii chalilajz xtidx Dios, luxh xheti bee tiejxhni, xhet najcdizani. Sujia'nni si'cni najcni. <sup>19</sup> Xhet najcdi la yu'ni bee o xhet beedi yu'ni. Tejtis ni nanab gunni, gusoobni rediidx ni guinibee Dios. <sup>20</sup> Tejgani jia'n si'cni najcni cheni gurejdx Diosni. <sup>21</sup> Palga najclu te mos ni guziireni te gunlu dzuun, dxejc huililajzlu xtidx Dios, na'c chulu yärsia' xcuent ni'c. Palga sajg gudzu'lu meel lo xlamlu, badzu'zani te gaclu te bejn ni rut rnibeedi. <sup>22</sup> Sa'csi nani najc te mos ni guziireni te gunni dzuun che huililajzni xtidx Dios, diruni gac te mos ni bio' nez loj Jesucrist, niluxh te bejn ni rut rnibeedi che rililajzni xtidx Dios, anajcni mos ni guzii Dios, najcni xmos Dios. <sup>23</sup> Guzii Cristtu con xtiejnni, ni'c na'c gusaantu guinibee bejn la'tu te gac guntu xtzun Dios. <sup>24</sup> Rebetzä, colchanuu gactu si'ctis ni najctu che gurejdx Dios la'tu, palga najctu mos ni guziireni, o te bejn ni rut rnibeedi.

<sup>25</sup> Redxa'p ni gajd guchnaa, di Jesucrist ninibee xhini'c nanab gunreni. Gule Dios narä te gusule'ä xtiidxni. Naj gulidxäreni sa'csi nanä xtidx Dios, luxh racnäjzani narä. <sup>26</sup> Runä xhigab hueen najc palga di reniguii guchnaa sa'csi siääd yälñaganduxh lo guedxliujre. <sup>27</sup> ¿La alabachnaalu, ä? Na'c guro'nlu chäällu. ¿La alabaro'nlu chäällu, ä? Na'c chaxiilu chäällu. <sup>28</sup> Palga guchnaalu, xhet dojl̄di rujnlu. Palga guchnaa te dxa'p, dizani gun dojl̄. Niluxh reni ruchnaa sidejdreni trabajw lo yälñabajnre. Ni'cni rniä na'c guchnaatu sa'csi di rlazä tedtu trabajw.

<sup>29</sup> Rebetzä, rlazä guiniä lojtu rediidxre: Guxiiru dxej guibajnnu lo guedxliujre, ni'cni reni abachnaa na'c gunreni xhigab xtentis yälñuchnaa, te gac gunreni xtzuun Dios. <sup>30</sup> Luxh reni cayoon, nanab gunreni si'cni xhet cayoondireni; reni rbalajzreni, nanab gunreni si'cni xhet cabaadi lajzreni; reni rzii xhicos, nanab gunreni si'cni xhet rajpdireni; <sup>31</sup> näjza reni rujn recos lo guedxliujre, nanab gunreni si'cni dini gunni, sa'csi recos ni rhuiinu lo guedxliujre, alacanitlojreni.

<sup>32</sup> Narä rlazä na'c chutu yärsia'. Rebejn̄ ni gajd guchnaa, riureni rextzuun Dios, näjza xho guspaareni lajz Dios. <sup>33</sup> Renani abachnaa riureni recos guedxliujre te guspaani lajz chäälni, <sup>34</sup> tiop najc xhigabni xcuent recos nani gunni. Sigajcza najc te gunaa ni abachnaa con tejni gajd guchnaa. Sa'csi te gunaa ni gajd guchnaa riuni rextzuun Dios te gacreni gunadxan nez loj Dios con tiejxhrene näjza con lastooreni. Niluxh regunaa ni abachnaa riureni recos guedxliujre, näjza xho guspaani lajz chäälni.

<sup>35</sup> Rniä rediidxre par xcälñasa'ctu, xhet gudxonädi la'tu, te gunrutu redzunsac, te chanälazsa'ctu Dios.

<sup>36</sup> Palga yu' chu te niguii lojtu ni rujn xhigab, maazru hueen guchnaa xindxa'pni sa'csi acayajcni gunagool, dini gun dojl̄, sajc gudeednini guchnaani. <sup>37</sup> Palga steeni dini gun xhigab si'c nanab gunni, sajc gunni si'ctis ni rlazjni palga abejnpacni xhigab neñ lastooni di xindxa'pni guchnaa, hueenza najc si'c. <sup>38</sup> Ni'cni nani rudeed xinda'pni guchnaa, hueen rujnni, sigajcza nani dini gudeed xindxa'pni guchnaa, laacaza rujnni.

<sup>39</sup> Te gunaa ni abachnaa, rajpni por guibannäjni chäälni guideb nabajn̄ chäälni. Palga guet chäälni, jianxtebni stehuält, dxej sajc guchnaani chutis niguii ni rlazjni, palga najcni tej ni ahuililajz xtidx Dios. <sup>40</sup> Narä rchaloä maazru guibaa lajzni palga dini guchnaa. Si'c najc xhigab ni runä, luxh riliipac lazä cayacnäj Sprit Dxan xten Dios narä.

## 8

### *Yälñajw ni ruzujreni lo rebanäjb*

<sup>1</sup> Rniä lojtu xcuent reyälñajw ni ruzujreni lo rebanäjb. Guliini guiraanu rajpnu yälñajn xcuent recosga. Niluxh yälñajn rujn rajc bejn̄ gualajz. Luxh yälñälajz sa'ni, ni'c rujn racnäjnu resa'nu. <sup>2</sup> Palga yu' chuni'c rujn xhigab nanduxhni, rusgueeni lastooni sa'csi cayäädxru gacbeeni si'c ni nanab gacbeeni. <sup>3</sup> Palga yu' chu sanälajz Dios, Dios anumbee bejnga.

<sup>4</sup> Ni'cni, xcuent reyälñajw ni risujreni loj rebanäjb, anancheenu xhet sajcdi rebanäjb ni yu' lo guedxliuj, ruti stee Dios; tejtis ni najc Gueb Dios. <sup>5</sup> Masque yu' reni rniireni najc “dios” xhaguibaa o loj guedxliuj, luxh yu'za xhidajl̄ “dios” näjza xhidajl̄ lam̄ ni rnibee, <sup>6</sup> per nuurnu nadonnu yu' tejtis Gueb Dios, Dad nani benchee guiraa recos, luxh lojtisni nabajnnu. Rajpnu tejtis Dad ni rnibee loonu, ni'c najc Jesucrist. Xcuent xcälñrniireni guc-chee guiraa recos loj guedxliuj, luxh nuurnu nabajnnu xcuent Jesucrist.

<sup>7</sup> Niluxh xhet guira'ti bejn̄ najn yu' tejtis Dios. Yu' rebejn̄ ni ahuililajz xtidx Dios abia'reni rajnreni rebanäjb, luxh rajwzarenı reyälñajw lascanu guzujni loj banäjb sa'csi nacäjyru xcäriejnreni, ni'cni et laadi ria'n lastooreni, rxhinza xcäriejnreni. <sup>8</sup> Xhet xcuent xhi rdaudinu sajc guibaṅsa'crunu lo xnejz Dios. Xhet najcdi palga guidaunu o palga dinu guidau. <sup>9</sup> Colñatiro xhi rujntu te na'c guntu jiajb te bejn̄ lo dojl̄ nani gajd chalilazsa'c xtidx Dios. <sup>10</sup> Palga te bejn̄ ni gajd chalilazsa'c xtidx Dios fiini cayajwlu reyälñajw ni guzuj lo rebanäjb, luxh luj najclu te bennajn, sa'csi dee gajd gacbesa'c rextidx Dios, ¿la di lajzni gac nadip te näjza laani chatajwni yälñajw ni guzuj lo rebanäjb? <sup>11</sup> Niluxh luj, xhet dojl̄di

cayujnlu, per bejtzlu ni gajd chalilazsa'c xtidx Dios, sixijñni, luxh najcni bejtzlu sa'csi nájza par laani gujt Dad Jesucrist lo cruzj. <sup>12</sup> Si'cza che rujnlu dojl lo bejtzlu, runnajlu lajzreni sa'csi gajd xcáriejnreni jiansa'c, luxh si'c cayujnzalu dojl lagajc lo Crist. <sup>13</sup> Ni'cni, palga narä runä riabsac betzá lo dojl xcuent ni rauä, hueenru dirunä gauä yälrajw ni gun jiajb betzá lo dojl stehuält.

## 9

*Xhi sajc gun te apost*

<sup>1</sup> ¿La dina gacä te bejn ni rut lojdi yu'ä? ¿La xhet apostdi narä? Ni abahuiä lo Dad Jesucrist, abasule'ä rextiidxni lojtu, ni'c huililajztu xtiidxni. La'tu najctu xtzunä ni runä lo Dios. <sup>2</sup> Yu' reni di gumbeeni narä si'c te apost, niluxh la'tu abiembesa'ctu narä sa'csi ahuililajztu rextidx Jesucrist ni abasule'ä lojtu. Ni'c ruluiloj guliipac nacä te apost.

<sup>3</sup> Diidx ni rniä scree loj reni di chalilajz nacä apost najc scree: <sup>4</sup> ¿La di riäjl xca'ä guiraa ni runiidxtu gauä nájza ni runiidxtu yä'ä? <sup>5</sup> ¿La digacdiza gapä te chälä ni ahuililajz xtidx Dios dxejc chanääzani sigajc rujn guiraa reapost, nájza rebetzhuin xten Dad Jesucrist nájza Pedr? <sup>6</sup> O ¿la xtebtis Bernabé nájza narä di gacdi cuääz jiennu dzuun te guidaunu laj rusule'nu xtidx Dios? <sup>7</sup> ¿Chuni'c rajc soldaad luxh lagajc laani siini xhi gauni? O ¿chuni'c rusuj yaguub luxh dini gau ninejxh ni rcaj lojga, ä? O ¿chuni'c rajp gaii dxib, luxh dini yä le'ch ni rudeedreni, ä? <sup>8</sup> Na'c guntu xhigab lagajc xcuentä caniä rediidxre lojtu, sa'csi náj loj xleii toMoisés caj diidx xcuent recosre. <sup>9</sup> Loj reguijtz xten xleii toMoisés caj rediidxre: “Na'c gusällu guijxh ro' gon che cayo'tni yejc triuu.” ¿La guniitis Dios rediidxre sa'csi riuni regon, ä? <sup>10</sup> ¿Dini gac! Xcälñasa'cnu guniini rediidxga, sa'csi bejn ni rujn dzuun lo niaa nájza nani rusia triuu riäjl gunlojni xca'ni te yälñasa'c ni rajc lo xniani. <sup>11</sup> La'tu najctu si'c te yuj cadro gule'cnu binij sa'csi basule'nu rextidx Dios lojtu, ¿la rujntu xhigab dzunro najc gacnäjtu nuurnu tudxene', ä? <sup>12</sup> Palga racnäjtu ste'ca bejn ni ruluiitu, nungäjlrü gacnäjtu nuurnu.

Niluxh gajdnu guinii si'c lojtu sa'csi di rlazzdinu guidxoönnu chalilazsa'ctu rextidx Dios, ni'c chotipnu lajznu guiraa retrabajw ni cadeednu. <sup>13</sup> La'tu najntu reni rujn dzuun nen guidoro rajwreni rebääl ni risa'nreni lo Dios, sigajcza reni rujn dzuun lo dxan cadro risa'nreni xpääl reguidxaa lo Dios, nájza laareni rajwreni rebäälga. <sup>14</sup> Si'cza gunibee Dad Jesucrist loj reni gusule' xtidx Dios, xca'reni xhi gaureni lagajc loj reni rililajz xtiidxni. <sup>15</sup> Niluxh gajdpacna gunä si'c, xhetza caca'ädi. Dizana gucuaä rediidxre lojtu naj te guniidxtu xhi xca'a. Hueenru guetä te na'c gudzucaj te bejn yälrbalajz ni rapä xcuent dzuun ni runä lo Dios.

<sup>16</sup> Narä dina gapä xhicuent guiliä'pä xpala'nä che rusule'ä xtidx Dios. Sa'csi si'c nanabpac gunä, sa'csi probe'za narä palga dina gusule'ä xtidx Dios. <sup>17</sup> Palga gunä dzuunre sa'csi rdxaglazäpac gunäni yu' xhi guniidx Dios loä. Mase runäni con yälrigaan, empac Dios agule narä te gusule'ä xtiidxni. <sup>18</sup> ¿Xhini'c najc xcuent ni xca'ä, ä? Che gusule'ä xtidx Dios lo chutis bejn, ligaj gusule'äni, te di gusule'ä xtiidxni te guniidx rebejn xhi guniidxreni xcuent xtzunä, mase si'c riäjl gunreni.

<sup>19</sup> Rut xmosdi nacä, luxh lagajc narä benä xhigab gacä si'c te mos te gunä gaan chalilajz xhidajl bejn xtidx Dios. <sup>20</sup> Cheni yu'ä loj rexpejn Israel, runä si'cni rujnreni te gunä gaan chalilajzreni rextidx Dios. Che rlazäza guiniä loj reni nabajn loj xleii toMoisés, dxejc runä si'c rujnreni te gunä gaan chalilajzreni rextidx Dios, niluxh diruna guibanä lo leiiga. <sup>21</sup> Stee lajt cadro rlazä gunä gaan reni di guibajn lo xleii toMoisés, runä si'c rujnzareni, mase empac nabanä lo xleii Dios sa'csi rusobä diidxni basa'n Crist. <sup>22</sup> Cheni yu'ä loj reni guxii rililajz xtidx Dios, racäza si'c ni najcreni te gunä gaan chalilazsa'creni. Narä runä sigajc rujnreni, te si'c gunä gaan chalilajz xhidajlreni xtidx Dios. <sup>23</sup> Runä guira'ti xcuent xtidx Dios ni ruslaa bejn lo dojl, te xca'zanu, narä nájza rebejn ni ahuililajz xtidxä, yälñabajn par tejpas.



<sup>24</sup> Anajntu che ru' te lanij, che ruxun reniguii, guiraareni ruxun, niluxh tejtis ni rca' ni ruzalajzreni. Colguxunza nez lo Dios te gunzatu gaan. <sup>25</sup> Guiraa reni rlajz guxun rapdareni tiejxhrene te ga'p tiejxhrene yalnadip, yalnadaan. Luxh laareni ruxunreni si'c te gunreni gaan te cos ni di gaclaa agunitlojni. Niluxh nuurnu ruxunnu te guniidx Dios loonu nani dipac nitloj. <sup>26</sup> Narä dina guxunä si'cni dina ganä caro cha'ä, dizana gucuää si'c te bejn ni rucuanäj te balaa, o cayääztisni lo bej. <sup>27</sup> Niluxh narä runä rajc tiexhä si'c xmosä te na'c gunni si'ctis ni rlajzni, te gunni nani rlajz Dios te di cheni abasule'ä xtidx Dios loj xhidajl bejn, gusanxtujy tiexhä narä.

## 10

### *Yälrulijdx lo xcuent rebanäjb*

<sup>1</sup> Rebetzä, di rlazä jiällajztu ni gusajc retoxtadgoldoonu. Gusajreni xpalaa te za gudejdzareni galäii nisdoo ni laa Nisdo Xniaa. <sup>2</sup> Gudejdrene xpalaa te za näjza gudejdrene galäii nisdoo; ni'c najc si'c te yälrobnis sa'csi sanajlreni toMoisés. <sup>3</sup> Sigajcza guiraareni gudajw tejtis yälrajw ni baxhal Dios xhaguibaali. <sup>4</sup> Guiraazareni gu' nis ni badeed Dios, Dios bejn birii nisga cuä' te guilaj. Luxh Xpirt Crist gusanäjreni cadrotis sääreni nez lo reyubidzroga. Luxh con xcälrnibeeni birii nis loj guilajga, Crist najc si'c guilaj ni huinäreni. <sup>5</sup> Dios bidxechnäj xhidajlreni, ni'c xhidajlreni gujt nez lo reyubidzga.

<sup>6</sup> Guiraa rediidxga najc te yälrulijdx loonu, te na'c guichaglajznu jiennu lagajc redojl ni bejn retoxtadgoldoonu. <sup>7</sup> Na'cza gantu rebanäjb si'c ni bejn baltireni; acaj lo rexquijtz Dios xcuentreni: "Rebejn ni guyaa lajz gurejreni te gu'reni, gudajwreni, dxejctiru huisuren te gusloj caguijtreni." <sup>8</sup> Na'c chunäjnu stee bejn di gac chäältu si'c bejnreni, ni'cni gujt galbichon milreni tejtis dxej. <sup>9</sup> Na'cza guche'chnu Dios con rextoljnu si'c bejn balti rebejnnga, ni'cni gujtreni sa'csi gudauya' bälreni. <sup>10</sup> Na'cza chamojmtu xcuent ni rujn Dios si'c ni bejn rebejnnga xcuent ni bejn Dios, ni'cni baxhal Dios angl xten yälgujt bagu't xhidajlreni.

<sup>11</sup> Guiraa redee gusajc retoxtadgoldoonu te rulijdxni nuurnu, cuajzareni lo guijtz te guluii rediidxga nuurnu xho riäjł jiennu, nuurnu ni nabajnnu nen redxej naj. <sup>12</sup> Ni'cni chutis ni rujn xhigab nabañsa'cni nez loj Dios, sudzu'tzni te di jiabsacni. <sup>13</sup> Xheti te trabajw ni cadejdtu nani gajd ted chutis bejn. Niluxh di Dios cuälaztu, dini gusaan tedrutu dzunduxh nani digacdi guntu huant, suniidx Dios yalnadip yalnadaan lojtu te che tedtu trabajw sidxältu xho guibicajtu lo dzunduxhga, te gutiplajztu.

<sup>14</sup> Ni'cni rniä lojtu, rebetzä nani sanälazä, colbicaj lo yälrajn xten rebanäjb. <sup>15</sup> Rniä lojtu si'c lo te beñ nasiñ, te beñnajn: colgulatzsa'c rextidxä don la laaca najcreni. <sup>16</sup> Che rdaunu xchej xten Dad Jesucrist najcni te seen nabañnäänu Jesucrist. Che rdunnu nen co'p, rnaalajznu gudijx Dad Jesucrist xtiejnni xcuent xtojłnu lo cruzj. Che rdaunu yätxtiil, sälojni anajcnu tejtis xcuent tiejxhni ni badeedni cuaj lo cruzj xcuentnu. <sup>17</sup> Sa'csi yu' tejtis yätxtiil, mase najcnu xhidajl, najcnu si'c tejsi tiejxh sa'csi tejsi yätxtiil rdaunu che rauxchejnu xchej xten Dad Jesucrist.

<sup>18</sup> ¡Bahuii xho rujn rexpejn Israel! Rajwreni xpääl reguidxaa ni rile'creni lo Dios lo dxan nen guidoo, ni'c najcreni tejsi con guiraa rebejn nani rujn sigajc rujnreni. <sup>19</sup> ¿Xhixhni'c rlazä guiniä, naj? ¿La caniä yu' xhi sajc gojn nani gule'c bejn lo banäjb, ä? O ¿la yu' xhi sajc banäjbga, ä? <sup>20</sup> Xhet sajcdireni. Narä caniä lojtu dee: Recos nani rbe'c rebenzajt lo rebanäjb, lo rebenđxab cabe'crenini, et lojdi Dios. Luxh narä dina rlazä gactu tejsi con rebejn nani rbe'c lo rebenđxab, te di chachunäjzatu rebenđxab. <sup>21</sup> Sa'csi digacdi yätu co'p ni rusnaj laaznu ni bejn Dad Jesucrist lo cruzj nägajcza co'p nani rudeedreni lo rebenđxab. Digacdiza guidaunu xchej xten Dad Jesucrist nägajcza xchej ni rudeedreni lo rebenđxab. <sup>22</sup> O ¿la rlajznu guche'chnu Dad Jesucrist, ä? ¿Xhixh maazru nadipnu lojni, ä? ¡Gurniä lojtu!

Colyejn guira'ti te chä'p xpala'n Dios



<sup>23</sup> Guliicani, sajc jiennu xhitis ni rlanjnu jiennu, niluxh xhet guira'ti ni rlanjnu jiennu najc hueen par nuurnu. Guira'ti najc laaca, niluxh yu' reni di gacnaj gustioobnu lo xcälrlililajz Dios. <sup>24</sup> Na'c guntu xhigab quiiltistu lagajc xcäl'nasa'ctu; maazru hueen quiilzatu xcäl'nasa'c xpisintu. <sup>25</sup> Coltajw xhitis bääl ni rdo' lo guii, na'c guiniabdiidxtu caro siädni te di gacnaj xcäriejntu. <sup>26</sup> Lo xtidx Dios caj rediidxre: "Sa'csi guideb guedxliuj näjza guiraa ni tre' lo guedxliuj najc xten Dios."

<sup>27</sup> Palga jäädgajñ te bejñ ni di chalilajz xtidx Dios luj jäädtaunäjlni luxh acuäjblu chäälü, huijza, gudajw xhitis ni cue'cni nez lojlu, na'c guiniabdiidxlu te di gacnaj xcäriejnlu. <sup>28</sup> Palga yu' chu naa lojlu: "Dee najc bääl ni bile'cnu lo rebanäjñ", na'c gauluni, didi gunni gunijt dade'ga ni gunii si'c lojlu te di gacnajza xcäriejn chutis. <sup>29</sup> Dina guiniä xcäriejnlu, didi gunnajni xcäriejn stee dade'ga; mbaj naj, ¿xhicuent riäjñ gula'tzreni narä sa'csi rajc runä guira'ti porsu racnaj xcäriejn ste'ca bejñ, ä? <sup>30</sup> Palga rudedä xquixtios lo Dios nani runiidx xhi rauä, ¿xhicuent rniyajreni narä ni rauä, luxh abadedä xquixtios lo Dios? <sup>31</sup> Ni'cni palga gautu, o palga yätu o xhitis ni rujntu, colyujñ guira'ti te chä'p xpala'n Dios. <sup>32</sup> Na'c guche'chtu nicla rexpejñ Israel niclaza rebenzajt, niclaza rexpejñ xquidoo Dios. <sup>33</sup> Sigajcza runä narä, runä guira'ti ni ruspaalajz rebejñ, dina quilä xcäl'nasa'cätis, alga rguilä xcäl'nasa'c xhidalduxh bejñ, te laareni lo dojl sa'csi ahuililajzreni xtidx Dios.

## 11

<sup>1</sup> Colyejñ si'cni runä narä, sigajcza narä runä si'cni rujñ Jesucrist.

*Xho riäjñ gun regunaa neñ* xquidoo Dios

<sup>2</sup> Rliä'pä xpala'ntu sa'csi lo guira'ti rñaj lajztu narä, rñajza lajztu rediidx nani baluiä lojtu, sudzu'tztu rusooctu rediidx sigajcni baluiäreni lojtu. <sup>3</sup> Narä rlazä gacbeepactu Jesucrist najc nani rñibee lo niguii, dxejctiru niguii rñibee gunaa si'c rñibee Dios Jesucrist. <sup>4</sup> Chutis te niguii ni yu' xhumbreel yejñni lañni cabedx-canabni lo Dios o lañni caguluini xtidx Dios, laani rusanxtujyñi yejñni. <sup>5</sup> Palga yu' te gunaa ni dini gusäu xpäiini yejñni che cabedx-canabni loj Dios o che caniiini xtidx Dios, rusanxtujyñi yejñni sa'csi najcni sigajc najc te gunaa ni abigaj yejñni. <sup>6</sup> Palga di te gunaa gusäu xpäiini yejñni suguigaj yejñni. Palga najcni te xtujy guigaj yejñni, sugusäuni xpäiini yejñni. <sup>7</sup> Di guchaag gusäu te niguii yejñni sa'csi najcni si'c xtuxh Dios, näjza xcälrdimbicha' Dios. Niluxh regunaa najc si'c xcälrdimbicha' niguii. <sup>8</sup> Sa'csi di niguii nixtietej cuä' gunaa; gunaa najc ni birixtietej cuä' niguii. <sup>9</sup> Xhetza xcuent gunaadi guc-chee niguii; gunaa najc ni guc-chee xcuent niguii. <sup>10</sup> Ni'cni nanab jääu yejñ gunaa neñ guidoo si'c te seen lo rexangl Dios yu' chu rñibeereni. <sup>11</sup> Niluxh nez lo Dios nicla niguii niclaza gunaa digacdi guiban xtebreni. <sup>12</sup> Sigajc galoo birixtietej gunaa cuä' niguii, sigajcza naj gunaa najc nani ruu báz; luxh Diostis najc nani runchee guira'ti rebejñ.

<sup>13</sup> Colyejñ lagajc xhigabtu naj, ¿la laaca najcni cuedx-guiniab te gunaa lo Dios lañ ni xhet niäudi yejñni, ä? <sup>14</sup> Loj reben guedxliuj guiraa reniguii rgaj yejñni, sa'csi najcni te xtujy guigaduxh xquidxejñni. <sup>15</sup> Niluxh regunaa hueen najc rga' xquidxejñni te rusäuni yejñni. <sup>16</sup> Palga yu' chu tilidiidx xcuent rediidx nani caniiä lojtu, nanab gacbeeni si'ctis riennu, si'ctisza rujñreni neñ guiraa rexquidoo Dios.

*Xho ruxhinreni* xchej Dad Jesucrist

<sup>17</sup> Rediidxre ni cagucuaä lojtu, direni guiliä'p xpala'ntu, sa'csi che rdxagsa'tu neñ xquidoo Dios, lacuaa laaca cuetu, xhet laadi rujntu. <sup>18</sup> Rnixgää dee: Abiejñ diagä che re'tu lo xquidoo Dios, rlia'tu lo sa'tu rajctu tiop cuaa; luxh riliica lazä rediidxre. <sup>19</sup> Pet naatu nanab guntu si'c te gacbeetu churenii'c sanälajzpac Dios, churenii'c sajcru lo xtzuum Dios. <sup>20</sup> Ni'cni che rdxagsa'tu, dini gac te cuetu lo xmex xchej Dad Jesucrist, <sup>21</sup> sa'csi che agule'cni xchej lo mex, tejga bejñ rlanj xcaxgaa xhi gauni, dxejñ yu' reni agudxadoo xque'reni, agusojjzarenii, lañni yu' stee cuaa bejñ calaan, gajdrenii gau. <sup>22</sup> ¿Xho mood? ¿La xheti rolijztu cadro gac gautu, yätu, ä? O ¿la rbälazlu xquidoo Dios, ni'c rusanxtujylu

rebejn ni xhet räjpdi, ä? ¿Xhini'c guiniä lojtu naj? ¿La naatu guiliä'pä xpala'ntu xcuent nani rujntu, ä? ¿Gurniälojtu guiliä'pä xpala'ntu!

### *Xchej Dad Jesucrist*

(Mt. 26:26-29; Mr. 14:22-25; Lc. 22:14-20)

<sup>23</sup> Baluiloj Dad Jesucrist loä lagajc nani baluiä lojtu xcuent xho bejnni guxhijn che gudaunäjni rexpejnni te xchej xten pascw, guxhijn ni gudo'ni. Cua'ni yätxtiil, <sup>24</sup> dxejc che abadeedni xquixtios lo Dios, gula'ni yätxtiilga, räjpni lojreni: “Colgajw, dee najc tiexhä ni gudedä guet xcuenttu. Scree guntu te guinalajztu narä.” <sup>25</sup> Si'cza bennäjni co'p che gulujx gudajwreni, räjpni lojreni: “Ni yu' neñ co'pre najc si'c xtienä; che ju'treni narä, sixe' xtienä xcuenttu, si'c te seen xten didxcoob ni gusa'n Dios loj rebejn ni aguleni. Scree guntu te guinalajztu narä.” <sup>26</sup> Che gautu yätxtiilga, che yätu neñ co'pga, ruluilosactu xhi bejn Jesucrist che gudijxni xcuent rextojlnu lo crujz; si'cza colyujn dxejli ni guibisacni lo guedxliujre.

### *Xho riäjl gac xchej Dad Jesucrist*

<sup>27</sup> Ni'cni rniä lojtu, chutis tejtü ni rajw yätxtiil, ni rä'za co'p xten xchej Dad Jesucrist, palga dini gusoob xtidx Dios, rujnni dojl, najcni si'cni lagajc laani bagu't Jesucrist, baxhe'zani xtiejnni. <sup>28</sup> Niluxh sugula'tz tejgatu lagajc lastooni don la yu' xhi dojl bejnni, dxejcti sajc gauni yätxtiil, yäni co'p xten xchej Dad Jesucrist, sa'csi abaxhobdojlni. <sup>29</sup> Chutis bejn ni gau, ni yä xchej Dad Jesucrist, luxh dini gula'tz lagajc lastooni xhicuent gauni, yäni xchej Dad Jesucrist, lagajc laani rujnni jiajb xcälnej Dios yejcn. <sup>30</sup> Ni'cni lacti resa'tu racxhuu, xhet nadaanreni, luxh yu'zaren agujt. <sup>31</sup> Ni'cni nanab fiinu xho najcnu, guiniabnu lo Dios gudzucajni rextojlnu te didi tednu trabajw. <sup>32</sup> Niluxh che rdejdnü trabajw, rdejdnüni te na'c tednu trabajwduxh si'c ted reben guedxliuj che gacreni yälguxhtis xten Dios.

<sup>33</sup> Ni'cni rniä lojtu, rebetzä, che guire'tu te gautu xchej, colcuäjz resa'tu. <sup>34</sup> Palga yu' chu tejtü ni calaan, sugauni lagajc rolijzni, te di gun Dios yälguxhtis lojtu. Guiraa rexhistee cos, che jiälä ro'c fiä don xho gacsa'cni.

## 12

### *Dzuun ni rudeed Sprit Dxan xten Dios lo tejga ni rililajz*

<sup>1</sup> Rebetzä, rlazä gacbeetu xcuent dzuun ni rudeed Sprit Dxan xten Dios lo tejganu.

<sup>2</sup> La'tu najntu che gajdtu chalilajz xtidx Dios, rajntu chutis banäjb ni di gacbee, ni naatis bejn ganü. <sup>3</sup> Ni'cni rlazä gacbeetu naj, nicla tejtü ni yu' Xsprit Dxan Dios neñ lastooni sajc guinii: “Xhet sajcdi Jesucrist.” Luxh rut rajcdi rni: “Jesucrist najc Dadbid baxhuaannu”, palga di Xprit Dxan Dios cuääz neñ lastooni.

<sup>4</sup> Mbaj naj. Yu' xhidajl dzuun ni rudeed Dios loj rebejn ni huililajz xtiidxni, niluxh tejsi najc Xsprit Dxan Dios ni rujn dzuunga neñ lastoo guiragajcnu. <sup>5</sup> Yu'za balti cuaa dzuun nani riennu, niluxh tejsi najc Xtadbid baxhuaannu. <sup>6</sup> Yu' xhidajl mood rajc dzuun, niluxh tejsi Dios rujn dzuunga lastoo guiralii bejn. <sup>7</sup> Tejga bejn ruluiloj garen-garen xtzüun Sprit Dxan xten Dios, niluxh guira'ti redzuunga najc te gacnäjnreni guiraanu. <sup>8</sup> Lo tej bejn rudeed Sprit Dxan yälñasin, lo steeni rudeed lagajc Sprit Dxanga yälnajn. <sup>9</sup> Lagajcza Sprit Dxanga rudeedzani yälrililajzro lo tejni, dxejc lo steeni rudeedza lagajc Sprit Dxanga yälrnibee te rusiajcn yälracxhuu. <sup>10</sup> Loj stee bejn rudeedzani yälrnibee te gunni milaagwr, loj stee bejn rudeedni yälriembee te sajc guinixgaani xcuent recos ni churu gac; lo steeni rudeedni yälñasin te gumbeeni chu najc Sprit guliipac, näjza chu najc sprit ni rusguee. Lo stee bejn rudeedzani guiniini garen-garen redidxsaj; loj stee bejn rudeedzani yälracbee te rajc rniini loonu xhini'c gunii bejn ni rni garen-garen redidxsaj. <sup>11</sup> Niluxh tejsi najc Sprit nani rujn guiraa redzuunre, racnäjni rujn tejganu xtzüunni si'ctis ni rlanjni.

### *Guiraanu najcnu te la' tejsi tiejxh*

<sup>12</sup> Sigajc ni najc tiejxhnu tejsi, mase yu' xhidajl la' xtenni, teygareni te la' tejsi tiejxh, sigajcza najc rebejn nani huililajz xtidx Jesucrist. <sup>13</sup> Guiraanu, mase najcnu rexpejn Israel o ben griegw, mase najcnu mos o mastr, gurobnisnu con laj Sprit Dyan che huililajznu xtidx Dios, te gujcnu si'c tejsi tiejxh, luxh tejsi Sprit Dyan xten Dios biädläz nen lastoonu.

<sup>14</sup> Sa'csi tiejxhnu dini gac tejsi la', najcni balti la'. <sup>15</sup> Paru naa ni'nu: "Sa'csi dina gacä te naa, ni'cni dina gacä te la' tiejxhre." ¿Xhixh porsu ni'c dini gac tla' tiejxhga, ä? ¿Gurniälojlu! <sup>16</sup> Palga diajgnu naa: "Dina gacä te baloj, ni'cni dina gacä te la' tiejxhre." ¿Xhixh porsu ni'c dini gac tla' tiejxhga, ä? ¿Gurniälojlu! <sup>17</sup> Palga guideb tiejxhni niajc te baloj, ¿xhi cojn niejn diajgni? Palga guideb tiejxhni niajc te diajgni, ¿xhi cojn chuxhi'ni? <sup>18</sup> Mbaj naj, ni'c basoob Dios guiraa rela' te guc-chee tiejxhnu si'ctis ni rlajzni gacni. <sup>19</sup> Paru niajc guidebni si'c tejtis la'ni, ¿xho niajcpacni te tiejxhni dxejc? <sup>20</sup> Niluxh naj ensilaani yu' xhidajl la' te najcni tejsi tiejxhni.

<sup>21</sup> Te balojnu di gac gäbni lo naanu: "Dina guiquinälu", niclaza bitiuycjni di gac gäbni lo ni'ni: "Dina guiquinälu." <sup>22</sup> Chucala lapacreni rquininru nani ruzen lascanu xhet sajcdireni. <sup>23</sup> Luxh retla'ga nani rchalonu guxii sajcreni, reni'c maazru saj. Luxh reni rtuinäanu, nigui sigajc gunaa, reni'c riapdarunu. <sup>24</sup> Biätla sgaii la' tiejxhnu nani rlui saruru, reni'c di guiquiin gapdanuni. Niluxh abenchee Dios tiejxhnu si'c, te gapdaru bejn retla' nani lascanu guxiiru saj. <sup>25</sup> Bejnna si'c te di chu yärdijl lo retla' tiejxhnu, te guiraa retla'ga gacnä sa'reni. <sup>26</sup> Ni'cni che et laadi yu' te la' tiejxhnu guidebni ru' et laadi. Sigajcza che guiliä'pnu xpala'n te la' tiejxhnu, guideb tiejxhnu rbalajz.

<sup>27</sup> Ni'cni guiraanu najcnu si'c tiejxh Jesucrist. Tejganu najc te la' tiejxhni. <sup>28</sup> Luxh abadeed Dios yälnibee lo tejganu lo xquidooni te gunnu xtzuun-xtzuunni. Ganidtoo guleni reapost; ni rojpga guleni rebejn ni rniü xtidx Dios; ni riojnga, guleni rebejn ni ruseed; dxejcti guleni reni rujn remilagwr, reni rusiajc benracxhuu, reni racnä, reni rniü garen-garen redidsaj. <sup>29</sup> Et guiraadi rexpejn Jesucrist najc apost. Et guiraadizareni rniireni xtidx Dios. Et guiraadireni rajc ruseed. Et guiraadizareni rajc rujn remilagwr. <sup>30</sup> Et guiraadireni rajc rusiajc rebenracxhuu. Etza guiraadireni rajc rniü garen-garen didxsaj, et guiraadireni rajc rniü xhi säloj redidsajga. <sup>31</sup> Nanab guideb lastootu rlajztu gunidx Dios reyälnibee ni najc maazru hueen lojtu. Niluxh narä guluiä lojtu te nezyuj ni najc hueenru loj guiraareni.

## 13

### Yälsanälajz

<sup>1</sup> Palga guiniä guiraloj xtidxsaj rebejn, o xtidx rexangl Dios, luxh dina chanälazä rebejn, rubejtis xtidxä si'c te tamboor o te platii. <sup>2</sup> Palga saj guiniä xtidx Dios xcuent recos ni churu gac, luxh racbesa'cä guiraa recos xhiga'tz xten Dios, näjza guiralii yälnasin xten guedxliujre, palga rapä yärlirilazduxh te gac gäpä lo redajnre, "colguibicaj", luxh rbicajreni, niluxh xhet sanälazädi rebejn, rut nacädi. <sup>3</sup> Palga gudedä guiraa rehxixtenä nani rapä te gau rebejn ni xhet rajpdi; palga gudedä tiexhä te checni, luxh xhet sanälazädi rebejn, xlia'si gunä guiraa redzuunga.

<sup>4</sup> Rebejn ni rajp yälsanälajz cabäzreni, najczareni bensa'c, direni säblajz xhi xten sa'reni, direni guschä'p lagajc xpala'nreni, direni gac gualajz. <sup>5</sup> Direni gun recos ni di guchaag, dini quii xcalnasa'ctisni, dini guidxe'ch, dini jiu redojl ni rujn bejn lojni. <sup>6</sup> Nani rajp yälsanälajz dini guibalajz che rujn stee bejn dojl, alga rbaa lajzni che laaca rujn bejn. <sup>7</sup> Nani rajp yälsanälajz rujn huant xhitis cos, rililajzni hueen xcuent xhitis cos, sanuutis cabäzjni, rajc rdejdn xhitis trabajw.

<sup>8</sup> Yälsanälajz dipacni nitloj. ¿La rniireni xtidx Dios xcuent recos ni churu gac, ä? Sidzujn dxej sibäz rediidxga. ¿La rajc rniü bejn garen-garen redidsaj, ä? Sidzujn dxej siacdx redidsajga. ¿La yu' yälnajn? Sidzujn dxej sinitlojpacni. <sup>9</sup> Sa'csi naj guxilii racbeenu, guxilii xtidx Dios xcuent recos ni churu gac rajc rniinu, <sup>10</sup> niluxh che jädsac Jesucrist ni rajp guiralii yälnajn, sinitloj xcalnandxucnu.

<sup>11</sup> Che gucä biuux, guniä si'c biuux, benäza xhigab si'c biuux, niluxh che bidzunä lo yälbengol, gunitloj rexhigab biuux ni benä galoo. <sup>12</sup> Sa'csi naj rhuiinu si'c loj te guihuajn ni nacäy, luxh che guibannänu Dios xhaguibaa, suhuisa'cnu si'cni ruhuii bejn che suga'ni loj sa'ni cahuiinini. Naj racbeenu re'cti rec, niluxh dxejc sacbesa'cnu si'cpacni numbee Dios nuure. <sup>13</sup> Niluxh naj ria'n yälrlilajz näjza yälrbäzljajz, näjza yälšanälajz. Lo guidxon redee, sajcrü yälrinälajz.

## 14

### *Renani rnii rediidx*

<sup>1</sup> Ganiddoo colquiiil yälrinälajz, colnabza lo Dios te guniidxruni xhi stee dzuun, niluxh colyejnru te xca'tu yälrnibesa'c te gusule'tu xtidx Dios. <sup>2</sup> Che rnii te bejn garenca diidx ni di rebejn gacbee, rniini lo Diostis, et lojdi rebejn, sa'csi rut racbeedi xtiidxni, mase caniini cosro, cosxhiga'tz nani ruluii Sprit Dxan xten Dios guiniini. <sup>3</sup> Niluxh bejn ni rusule' xtidx Dios, rustioobni xcälrlilajz bejn ni ruliidxni, ruspaani lajz nani rac-huin lajzni. <sup>4</sup> Che rnii te bejn garenca didxsaj ni rut racbeedi, lastootisni rustioobni, niluxh bejn nani rusule' xtidx Dios xcuent recos ni churu gac, laani rustiobruni lastoo guiraa rebenguidoo.

<sup>5</sup> Narä rlazä maläii rajc rnii guiraatu garen-garen diidx, niluxh hueenru gac gusule'tu xtidx Dios. Maazru saj nani rajc rusule' xtidx Dios loj nani rnii garenca diidx palga di gacdi gusule'ni lo rebejn xhini'c caniini. <sup>6</sup> Mbaj naj betzä, che jiälä lojtu, palga guiniä garenca diidx lojtu, ¿xhi gacnäjni la'tu? Hueenru guiniliä xcuent te cos ni abaluiloj Dios loä, o xcuent te yälnejn, o xcuent te xtidx Dios, o xcuent te yälruluii.

<sup>7</sup> Ni ruhuiinu xho najcza reinstrument ni rol bejn si'c te bizej, o te harp; palga di bejn golsa'creni, ¿xho jiennu gacbeenu xhi dij cayolreni, ä? <sup>8</sup> Sigajcza lo guerr, palga direni gol cornet dippac, ¿xho gacbeereni agojl chatijlreni, ä? <sup>9</sup> Sigajcza la'tu, palga ditu guinisa'c didxsaj nani racbee bejn, ¿xho gunreni gacbeereni xhini'c caniilu, ä? Xlia'si guiniilu, lo bejtis sää xtiidxlu. <sup>10</sup> Yu' xhidalduxh didxsaj lo guedxliuj, luxh xheti tejni nani xheti xnejzni. <sup>11</sup> Niluxh palga dina gacbeä didxsaj ni rniireni loä, nacä si'c te benzijt loj nani canii loä, sigajcza saj nani caninäj narä. <sup>12</sup> Ni'cni la'tu ni rlanjtu xca'tu yälrnibee xten Sprit Dxan te guntu xhi redzuun, colguejs, colnab lojni xhidajl dzuun te gacnäjtu tioobru xcälrlilajz rexpen guidoo.

<sup>13</sup> Ni'cni palga yu' te bejn ni rnii garenca didxsaj, suguiniabni loj Dios yälrnibee te gac gusule'ni diidx ni rniini lo rebejn. <sup>14</sup> Palga cuedx-guiniabä lo Dios con te didxsaj ni dina gacbeä, lastoätis ni calä'p xpala'n Dios, niluxh xcärienä xhet cayacbeedini. <sup>15</sup> ¿Xho ricajni dxejc? Siniab xspritä näjza xcärienä lo Dios; sol xspritä näjza xcärienä dij. <sup>16</sup> Palga dini gac si'c, xsprittislu calä'p xpala'n Dios con ste'ca didxsaj, niluxh bejn nani cacuadiajg di gacdi gacnäjnilu guiliä'pni xpala'n Dios, sa'csi dini gacbee xhini'c rniilu. <sup>17</sup> Hueenza calä'plu xpala'n Dios, per stee bejnga dini tioob loj yälrlilajz. <sup>18</sup> Rudedä xquixtios lo Dios maazru rajc rniä garen-garen diidx loj guiragajctu. <sup>19</sup> Niluxh nen guidoo maazru rlazä guiniä con xcärienä gaiitis diidx nani gacbeetu, nani guluii la'tu, loj tzuu mi diidx nani guiniä con xspritä ni ditu gacbee.

<sup>20</sup> Rebetzä, na'c rujntu xhigab si'cni rujn rebiuux, xcuenttis cosguijdx nanab gac-nayatu si'c biuxbäz, per colyejn xhigab si'c te bengool. <sup>21</sup> Scree caj lo xleii toMoisés: “Mase guiniä lo rebejn con garenca diidx näjza xtidx benzijt, nicla si'c direni gucuadiajg xtidxä”, naj Dad baxhuaannu. <sup>22</sup> Ni'cni regaren-garen didxsaj najc si'c te seen lo renani gajd chalilajz xtidx Dios, et lojdi rebejn ni arililajz xtidx Dios. Niluxh yälrusule' xtidx Dios xcuent recos ni churu gac, ni'c najc te seen loj renani ahuililajz xtidx Dios, xhet lojdi renani gajd chalilajz xtidx Dios. <sup>23</sup> Palga re'tu nen guidoo dxejcti caniiu garen-garen diidx ni rut racbeedi, dxejc guidzujn tej ni di gan xtidx Dios, siniini guiraatu rajc yejctu. <sup>24</sup> Palga re'tu nen guidoo, dxejcti guiraatu cagusule'tu xtidx ni baniidx Dios lojtu, che jiu' tej ni di gan xtidx Dios, sacbeeni xhini'c caniiu, sacbeeni yu' xtojlni, <sup>25</sup> sienloj rexhigab xhiga'tz ni yu' nen lastooni, dxejcti siabrlojni suzuxhibni lo Dios, siniabni lo Dios, siniizani guliipacni suga' Dios galäiitu.

Colyejn guira'ti xnez-xnejzni

<sup>26</sup> ¿Xho ricajni naj, betzä? Che guire'tu nen guidoo suxca' tejgatu tebgaj te salm, te xtidx Dios ni guluini, te diidx ni baluiloj Dios lojni, te diidx con garenca diidx, nägajcza te ni gusule' xhi säloj diidxga. Colyejn guiraa ni rujntu te tioob xcälrlililajz renani ahuililajz xtidx Dios. <sup>27</sup> Palga yu' renani rnii con garenca diidx, suguinii tio'p-chon bejn, niluxh tebgajreni, dxejcti sugusule' steeni xhi säloj ni rnii tejegareni. <sup>28</sup> Palga rut rajcdi gusule' rediidxga, na'c guiniireni con garenca diidx nen guidoo, suguinixtebreni lo Dios. <sup>29</sup> Si'cza renani rusule' diidx ni rudeed Dios lojreni, suguinii tio'p-chon bejn, niluxh tebgajreni, te cuadiajg stiop xchonreni donnu la laaca caniireni. <sup>30</sup> Palga guluiloj Dios te cos loj te bejn ni sobga' cacuadiajg, sucuedxisijcni, dxejcru suguiniini. <sup>31</sup> Sa'csi guiraatu sajc gusule'tu tebgajtu didx ni baniidx Dios lojtu te gac guisieedtu, te tioob lastoo guiraatu lo yälrlililajz. <sup>32</sup> Rudeed Sprit Dyan xten Dios yäl'najn loj reni rusule' diidx ni rudeed Dios lojreni te acanajnreni che riäj'l guiniireni o che riäj'l cuedxireni, <sup>33</sup> sa'csi Dios najc te Dios ni rujn guira'ti xnez-xnejzni, dini gun biey, niluxh rbecdxini lastoo bejn nen guiraa reguidoo xten rebejn ni ahuililajzpac xtiidxni. <sup>34</sup> Sucuedxi regunaa nen reguidoo, sa'csi di gacdi gusule' te gunaa xtidx Dios. Nanab gunreni si'c caj lo leii gunreni, gucudiajgreni xtidx Dios ni rusule' reniguii lojreni. <sup>35</sup> Palga rlanjreni gacbeerureni, suguiniabdiidxreni loj chäälni che guibi'reni rolizreni, sa'csi sianxtujy gunaaga palga guiniini nen guidoo.

<sup>36</sup> Colgacbee et la'ditu guläxtiejditu rextidx Dios, luxh etza xtebtis lojtu biäädni. <sup>37</sup> Palga yu' tejtü ni rchalo rajc rniini diidx ni rudeed Dios lojni, o palga rchaloni abadeed Xpirt Dyan xten Dios te dzunro lojni, sugacbeepacni dee: guiraa rediidx ni cagucuaä lojtu, rucuaäni sa'csi si'c gunibee Jesucrist gucuaäni. <sup>38</sup> Palga yu' chu tejtü ni di chalilajz rapä xcäl'rnibee Jesucrist, rutza jjudi xtiidxni.

<sup>39</sup> Ni'cni, rebetzä, colyejnru te gusule'tu diidx ni runiidx Dios lojtu, na'c gudxojuu renani rniiza garenca didxsaj. <sup>40</sup> Luxh guira'ti nani rujntu, colyensa'cni, xnez-xnejzni.

## 15

Gubansac Jesucrist lo rebengut

<sup>1</sup> Naj rniä lojtu betzä, colgusnaj lajztu xtidx Dios ni basule'ä lojtu, nani huililajztu, loj nani sutijptu, <sup>2</sup> näjza colgusnaj lajztu diidx xcuent ni badzucaj Dios xtojltu che huililajztu, palga sanuu sutijptu lojni, te di xlia'si huililajztu diidxga.

<sup>3</sup> Lojtu ganiddoo basule'ä rediidx ni sajcru ni bisiedä, basule'ä xho gujt Jesucrist lo cruzj, bixe' xtejnni te badzucajni rextojl'nu, sigajc ni caj lo xtidx Dios gac. <sup>4</sup> Basule'äza xho biga'tzni, dxejc ni rion dxej guläs Diosni, gubansacni si'cni caj lo xtidx Dios gacni. <sup>5</sup> Cheni gubansacni, baluilojni lo Pedr, dxejctiru loj guitzubito'p rexpejn'pacni, <sup>6</sup> dxejcti baluilojni lo gabixh gaii gayuu bejn ni tre' tejsi lajt. Xhidajlreni nabansijc, niluxh yu'za reni agujt. <sup>7</sup> Dxejcti baluilojni lo Jacoob, dxejctiru loj guiraa reapost.

<sup>8</sup> Dxejcti lultpac baluilojzani loä, luxh alagudejd ruluilojni lo rexpejn'ni dxejc. <sup>9</sup> Narä guxiiru sacä loj guiraa reapost, niclaza nungäj'l cuälajreni narä apost sa'csi basacsä rexpejn' xquidoo Dios. <sup>10</sup> Balaslazduxh Dios narä, ni'c narä nacä si'c ni nacä naj. Luxh et xlia'di balaslajzni narä. Narä benäru dzuun loj guiraareni, niluxh xhet narädi ni benä dzuun, sa'csi xcäl'rulaslajz Dios cayacnäjä narä. <sup>11</sup> ¿Xhiru najcni palga naräni o palga laareni? Empac cagusule'nu xtidx Dios, luxh la'tu salilajztu xtiidxni.

Xho guibansac rebengut

<sup>12</sup> Mbaj naj, palga nuurnu cagusule'nu diidx xcuent ni gubansac Crist loj rebengut, ¿xhicuent yu'tu ni rnii, xheti yälrbansac loj rebengut? <sup>13</sup> Palga xheti yälrbansac lo rebengut, dxejc nicla Crist di nibansac lo rebengut. <sup>14</sup> Luxh palga di Crist nibansac loj rebengut, ¿xlia'si najc diidx nani basule'nu! ¿Xlia'siza najc xcälrlililajztu! <sup>15</sup> Luxh et ni'ctis. Abiga'nu sa'csi rusgueenu rniinu baspansac Dios Jesucrist loj rebengut, luxh dini nuspansacni loj rebengut, palga guliini di bejn guibansac loj rebengut. <sup>16</sup> Niluxh palga di rebengut chäs, niclaza Crist di nibansa'c lo rebengut. <sup>17</sup> Luxh palga di Jesucrist nibansac



loj rebengut, xhet sajcdi xcälirililajztu, sanuutistu loj xtojltu. <sup>18</sup> Sigajcza agunijt rebengut nani huililajz xtidx Jesucrist. <sup>19</sup> Palga naj ni nabajntisnu loj guedxliujre cabääznu Jesucrist, lo guiraa reben guedxliuj nuurnu najcnu rebejn ni riäjl jiaduxhrej guiraa reni ruhuii loonu.

<sup>20</sup> ¡Per dini gac si'c! Guliipacni gubansac Jesucrist loj rebengut. Laani gac ganiddoo loj guiraa rebengut ni gubansac, luxh laani dini niejt par tejpas. <sup>21</sup> Sigajcni biääd yälgujt loonu xcuent tejtis niguii, sigajcza biääd yälransac lo rebengut loonu xcuent tejtis niguii. <sup>22</sup> Sigajc xcuent te niguii ni laa Adán biääd yälgujt, sigajcza xcuent Jesucrist biääd yälransac loj rebengut. <sup>23</sup> Tejganu xcuent-xcuentnu; Jesucrist gujc ganiddoo, dxejcti guiraa reni najc rexpejni che jiädsacni lo guedxliujre, guiraareni suspansacni. <sup>24</sup> Che agujc ni'c, dxejcti siääd dxe lult che gudedsacni yälrnibee lo Dios Xtradni, che abadzujl ni guiraa reyälrnibee, guiraa reyälguxhtis, guiraa reyälmilagwr. <sup>25</sup> Nungäjl pac guinibee Jesucrist cheni gunli Dios gaan loj guiraa reni rdxe'ch lojni, quixhnireni detz ni'ni. <sup>26</sup> Lult ni rdxe'ch lojni ni gunitlojni najc yälgujt. <sup>27</sup> Lo xquijtz Dios caj: “Agudixhni guira'ti detz ni'ni te guinibeenireni.” Che rniini si'c huenliisi gacbee bejn di gacdi guinibee Jesucrist Dios, sa'csi Dios badeed lojni xhini'c guinibeeni. <sup>28</sup> Che acanibee Jesucrist guiraali recos, dxejcti sudeedni guideb yälrnibee loj Xtradni Dios, te xtebtis Dios guinibee guira'tipac.

<sup>29</sup> Palga rujntu xhigab di bejn guibansac loj rebengut, ¿xhi gun rebejn nani robnis xcuent rebengut? Palga di bejn guibansac lo rebengut, ¿xhicuent rutiobnisreni la'tu xcuent rebengut?

<sup>30</sup> ¿Xhicuentza rdxunnu lo casionduxh guira'ti or? <sup>31</sup> Rniliápac lojtu, rebetzä, caläpä xpala'ntu xcuent Jesucrist Xtradnu ni cayun xtzunni lojtu. Ni'cni guniä lojtu, guira dxej rguiilreni narä te ju'treni narä. <sup>32</sup> Palga benä xhigab si'c te niguii guedxliuj che bacuanää reniguii ni najc si'c man nialajz lo guedx Éfeso, ¿xhi gaan benä? Palga di bejn guibansac loj rebengut, do'o jien si'c ni caj lo guijtz: “Do'o guidau, do'o guidun, sa'csi guixee empac sejt nu.”

<sup>33</sup> Na'c gusaantu gusgueerene la'tu, palga sachaaglu lo benguijdx näjza luj sajclu benguijdx. <sup>34</sup> Basani xcariejnlu si'cni nanab gunlu. Bascuääz dojl ni rujnlu sa'csi yu' balti bejn ni dipac gumbee Dios. Te guitujy tu ni'c rniä diidxre lojtu.

### *Xho guibansac rebengut*

<sup>35</sup> Naj yu' reni rniabdiidx: “¿Xho ransac bejn loj rebengut? ¿Xhoza gac tiejxhrenei?” <sup>36</sup> ¡Chip nayäällu! Che rbe'clu te binij, di gäjl guiliejn palga di xhobga guet, nalajznu, palga dini guechduu. <sup>37</sup> Luxh che rbe'clu, dilu cue'c gäjlga si'cni rlajzlu gacni, alga rbe'clu xhob o triuu o ste'ca binij, <sup>38</sup> niluxh Dios rujn rliejni, rustioobni gäjlga, lo tejga gäjl rudeedni xpalajni o tiejxhni, si'ctis ni rlajzni. <sup>39</sup> Xhet guiraadi retiejxhrenei najc tebloj. Yu' bääl xten bejn, yu'za bääl xten reguidxaa, yu'za bääl xten reman xhaguibaa, yu'za bääl xten rebäjl. <sup>40</sup> Sigajcza yu' tiejxh rebajl xhaguibaa, tiejxh rexten guedxliujre. Niluxh yälr dimbicha' xten rebajl xhaguibaa najc tej, dxejc yälr dimbicha' guedxliuj najc ste'ca. <sup>41</sup> Bicha' xte gubijdx najc garen lo xten bäii, sigajcza xpicha' rebal xhaguibaa najc garen-garenza lo sa'reni. <sup>42</sup> Sigajcza yälransac loj rebengut; che guet bejn rga'tz tiejxhni luxh rujdxni, rnitlojni. Luxh che guibansacni loj rebengut, garenca gac tiejxhni, diruni gudx, anabajni par tejpas. <sup>43</sup> Che rga'tzni, rujn bejn xhigab xhetru gacnäjdi tiejxhga, niluxh che guibansacni, lacti sacru, lacti saj tiejxhga. Che rga'tzni, xhetru sajcdi gunni, luxh che guibansacni, anadipduxhni. <sup>44</sup> Che rga'tz tiejxhnu, najcni xten guedxliujre, luxh che chäsni najcni te tiexhcoob ni runiidx Dios. Ni'cni yu' te tiejxhni ni siääd lo guedxliuj, yu'za te tiejxhni ni siääd xhaguibaa.

<sup>45</sup> Si'cza caj lo xtidx Dios: “Nigui galooga ni laa Adán, bejn Dios gujcni te bejn nabajn.” Niluxh Adán ni biääd lult, Jesucrist najc Sprit ni runiidx yälnabancoob loonu. <sup>46</sup> Ganid najc yälnabajn xten guedxliujre, dxejctiru yu' te yälnabancoob xhaguibaali. <sup>47</sup> Sigajcza niguii galooga najc bejn guedxliujre, niluxh ni rojp niguii ni biääd najc bejn xhaguibaali. <sup>48</sup> Benchee Dios Adán con yuj, najcni bejn guedxliuj. Xhaguibaali biääd Jesucrist, najcni



ben xhaguibaa. <sup>49</sup> Sigajcni najcnu si'c ben guedxliujre, sigajcza sajcnu sigajc najc bejn ni yu' xhaguibaa.

<sup>50</sup> Naj guiniä rediidxre lojtu betzä, di gac ted tiejxhnu ni najc bääl näjza rejn xhaguibaa cadro yu' Dios. Tiejxhnure nani sinitloj di gacdiza xca'ni stee tiejxh ni najc par tejpas. <sup>51</sup> ¡Colhuii! Rlazäza gacbeetu te didx-xhiga'tz; xhet guiraadinu guet, niluxh sidxaa guiraa retiejxhnu <sup>52</sup> tera't bäzlule', si'c cheni rdinya' guzii, che jiel lult trompe't, dxejc sibansac rebengut, säjsreni guideb tiexhcoobreni ni najc par tejpas. Luxh näjza tiejxhnu sidxaa. <sup>53</sup> Sa'csi tiejxhnu ni najc xten guedxliuj nanab guidxaani te ga'pnu tiejxhnu ni najc xten xhaguibaa, sa'csi tiejxhnu ni najc xten guedxliuj rejtni, niluxh tiejxhnu ni najc xten xhaguibaa di gacdi guetni, najcni par tejpas. <sup>54</sup> Niluxh che tiejxhnu ni najc xten guedxliuj abidxaa te ga'pnu tiejxhnu ni najc xten xhaguibaa, näjza che tiejxhnu ni sajc guet abidxaa te ga'pnu tiejxhnu ni di gacdi guet, ni najc par tejpas, dxejc sisiojb xtidx Dios ni caj scree: “Yälgujt agunitloj sa'csi bejn Jesucrist gaan lojni. <sup>55</sup> Yälgujt, ¿xho gac gunlu gaan naj, ä? Yälgujt, ¿Con xcäl'nayanlu naj, ä?” <sup>56</sup> Xcäl'nayan xten yälgujt najc dojl. Xcäl'ribee dojl najc leii. <sup>57</sup> Niluxh rdeednu xquixtios lo Dios, nani runiidx te yäl'ribee loonu te jiennu gaan lo yälgujt xcuent Dad Jesucrist.

<sup>58</sup> Ni'cni rebetzä ni sanälazduxhä, colchanuutis, colsudzu'tz lo xtidx Dios, na'c guidxajgtu guntu xtzuunni, sa'csi anancheetu xhet xlia'di najc dzuun ni runiidx Dios riennu.

## 16

### *Meel ni guire' par rexpejn Dios*

<sup>1</sup> Xcuent meel nani guire' par rebejtznü, colyejnüni sigajcni räpä gun reben rexquidoo Galacia. <sup>2</sup> Casob dumingw, nalajznü ganid dxej xmaan, tejgatu colcuää te meel yej nani rujntu gaan nen te xmaan, colcucweeni, te na'c gutie'tu meel che jiälä. <sup>3</sup> Te che guidzunä, guxhalä meelga, näjza tiop-choñ guijt chanä chutis bejn ni cuetu chasa'nüni guedx Jerusalén. <sup>4</sup> Palga laaca cha'aza, sajcza chänäreni narä.

### *Xhigab ni bejn Pabl chääni bij*

<sup>5</sup> Guidzunä lojtu che agudedä reguedx Macedonia, sa'csi sidedä nejzga galoo ni jiälä ro'c. <sup>6</sup> Dxejcti pet siannää la'tu, pet saclää, sidedä guiraa rebäi najl ro'c, te gacnäjtu narä che cha'a cadrotis cha'a. <sup>7</sup> Sa'csi di rlazä jädhuiätu te ladejtzi, rlazä jiannää la'tu xchejpac, palga gusaan Dad Jesucrist gunä si'c. <sup>8</sup> Niluxh sia'nä guedx Éfeso, te ro'c tedä lanij ni rusnaj lajz bejn che biääd Sprit Dxan xten Dios. <sup>9</sup> Sa'csi ro'c yu' xhidajl bejn nani rlanj guisied xtidx Dios, niluxh ro'c yu'za xhidajl reni rdxe'ch loä.

<sup>10</sup> Palga guidzujn Timoteu lojtu, saru colhuiini, te na'c chuni yärsia' la' ni yunäjni la'tu, sa'csi cayujnüni xtzuun Dios sigajc runä narä. <sup>11</sup> Na'c gusaantu chu tej ni cuälazni, colcuedxüni lajzni, dxejc colgusunejzni, te jädhuiini narä ree, sa'csi ree cabääznü laani con rebejtznü.

<sup>12</sup> Niluxh xcuent bejtznü Apolos, räpäza lojni niäädpacni lojtu con rebejtznü, niluxh di rlanjpacni niäädni naj. Per siäädcani dxejtis ni gac jäädni.

### *Rextixtios lult ni ruxhalni*

<sup>13</sup> Colsusin, colsudzu'tz lo yäl'rilihajz xten Dios, colyejn dzuun si'c niguii, colyajc bndaan. <sup>14</sup> Xhitis ni rujntu colyejnüni con yäl'rinälajz.

<sup>15</sup> La'tu rebetzä, anajntu xcuent rexfamil Estéfanas, nani ganid huililajz xtidx Dios nez reguedx Acaya, najntu xho racnäduxhreni rebejtznü nani huililajz xtidx Dios ro'c. Naj rniabduxhä lojtu, <sup>16</sup> colgusoob xtidx rebejnğa, näjza xtidx guiraa rebejn ni racnäj rexpejn Dios, ni rujnza xtzuun Dios. <sup>17</sup> Rbalazä bidzujn Estéfanas, näjza Fortunato, näjza Acaico, sa'csi laareni bejnreni par narä nani di niajcdi niujntu sa'csi rutitu. <sup>18</sup> Gulecdxireni lazä näjza lajztu, ni'cni, ¡coljiu sa' rebejnğa!

<sup>19</sup> Reben̄ xquidoo Dios nez reguedx Asia ruxhal̄ xtixtios lojtu. Aquila nājza chäälni Priscila nājza rebejn̄ ni re' rolijzreni ruxhalzaren̄i xtixtios lojtu. <sup>20</sup> Guiraa rebejznu ruxhal̄ xtixtios lojtu. Colguinii tejgatu lo sa'tu: "Xchan, gacnāj Dios la'tu."

<sup>21</sup> Narä Pabl, ruxhalä xtixtios lojtu, lagajc narä benä reletrre.

<sup>22</sup> Palga yu' chu tejtu ni di chanälajz Dad Jesucrist, sunitlojni. ;Dad Jesucrist, gudaal!

<sup>23</sup> Gacnāj xcäl̄rulaslajz Jesucrist guiraatu. <sup>24</sup> Yäl̄rinälajz ni rapä xcuent Jesucrist suchunājni la'tu. Sugacni si'c.

## Stee Guijtz Ni Bacuaa Pabl Lo Guidoo Xten Guedx Corinto

### *Ni roj p guijtz ni bacuaa Pabl lo guidoo xten guedx Corinto*

<sup>1</sup> Narä Pabl nacä apost xten Jesucrist sa'csi si'c rlazj Dios te gusule'ä xtiidxni. Narä näjza Timoteu, ni najc bejtznu lo xtidx Dios, rucuaanu guijtzre lojtu rexpejn xquidoo Dios ni yu' guedx Corinto, näjza loj guiraa rexpejn Dios ni rbäjz nez guiraa reguedx Acaya. <sup>2</sup> Rniabnu lo Dios ni najc Xtadnu näjza lo Dad Jesucrist, gacnäjreni la'tu, guscuecdxireni lajztu.

### *Trabajw ni gudejd Pabl*

<sup>3</sup> Guiliä'pnu xpala'n Dios Xtad Jesucrist, nani rulaslazj nuurnu, nani rustoolajz nuunu. <sup>4</sup> Che rdejndu trabajw, rbecdxini laaznu te rajcza rbecdxinu lajz renani cadejd trabajw con lagajc yälrbecdxilajz ni baniidx Dios loonu. <sup>5</sup> Sigajc ni rdedduxhnu trabajwduxh ni gudejd Jesucrist sa'csi rusule'nu xtiidxni, sigajcza rbecdxiduxh Jesucrist laaznu. <sup>6</sup> Palga rdeednu trabajw, najcni te gustolajz la'tu, te laatu lo dojl. Palga ruscuecdxi Dios lajznu, si'c rujnni te cuedxilajztu te guntu huant che tedtu lagajc trabajw ni cadejzdanu. <sup>7</sup> Rinudzu'tz yälrunloj ni rajpnu xcuent la'tu, sa'csi nadonnu palga rdejtdtu lagajc trabajw ni cadejndu, suscuedxi Dios lajztu sigajcni ruscuedxini laaznu.

<sup>8</sup> Rebetzä, rlazä gacbeepactu lacti trabajwduxh bideednu nez reguedx Asia, tudxe'nsi dinu nien huant, sa'csi gudedcaj trabajwga, acasislinu. Trabawduxhtejni, benä xhigab sujnni gaan, sugu'tni nuurnu. <sup>9</sup> Gulicanu, alabiennu xhigab sejtpacnu. Niluxh dee gusajcnu te bisieednu na'c chaliilajznu lagajc nuurnu, alga chaliilajznu Dios nani ruspañsac rebengut. <sup>10</sup> Sa'csi Dios baslaa nuure lo yälgujtgä, luxh sinuutis guslaani nuurnu lo yälgujt. Salilazduxhnu Diosre suslaaruni nuurnu, <sup>11</sup> sa'csi cayacnäjtu nuurnu, cabedx-canabtu lo Dios xcuentnu. Dxejcti palga xhidajl bejn cabedx-canab lo Dios xcuentnu, xhidajlzareni sudeed xquixtios lo Dios xcuentnu xcälrlulaslazj Dios ni baniidxni loonu.

### *Xhicuent di Pabl nij guedx Corinto*

<sup>12</sup> Dee najc nani ruspaä laaznu: rbedxi xcäriejnnu, ni'c ruluii loonu laaca nabajjnu, con yälndolajz riennu si'cni rnibee Dios; xhet sa'csi rajpnu xcälñajn reben guedxliujdi, alga sa'csi racnäj Dios nuure. Si'cpac nabajjnu lo guedxliujre, luxh maazru che yu'nu lojtu. <sup>13</sup> Cacuuanu lojtu rediidx ni sajc gojtu, ni sajc gacbeetu, luxh cabäzä sacbesa'ctu guiragajc rediidx ni gucuaä, <sup>14</sup> lagajc si'cni agucbeetu mase gaii xtiidxnu, cabäzä guibaa lajztu xcuent nuurnu, sigajcni guibaa lajznu xcuent la'tu nen dxej ni jääd Dad Jesucrist.

<sup>15</sup> Ni'cni ganiddoo benä xhigab niädhuüä la'tu te nibalajztu tio'p huält. <sup>16</sup> Nalajznu, benä xhigab nidedä ro'c che sa'a reguedx Macedonia, dxejcti stehuält cheni guibi'ä Macedonia, niädhuisacä la'tu ro'c te niacnäjtu narä te nia'a Judea. <sup>17</sup> ¿Xhaa dina niunsa'cä xhigab che benä xhigabre? ¿La rchalotu runä xhigabä si'c te bejn guedxliuj nani runtiop lajzni, nani tejsi diidx rniini “sia'ä” nägajcza “dina cha'a”, ä? <sup>18</sup> Dios guluii lojtu guliica rniä lojtu, dinu guinii tejsi diidx “sia'ä” nägajc “dina cha'a”. <sup>19</sup> Xi'n Dios, Jesucrist nani bisule'nu lojtu narä näjza Silvan, näjza Timoteu dini guntio'p lajzni, dini guinii tejsi diidx “sunäni” näj “dina gunäni”, niluxh laani guiraa xtiidxni najc “sunäpacni”. <sup>20</sup> Si'cza guiraa rediidx ni bia'n Dios loonu xcuent Jesucrist najczeni “sunäpacni”; näjza xcuent laani najczeni “sugacni si'c” par nuurnu, te chä'p xpala'n Dios xcuent nuurnu. <sup>21</sup> Dios cagusudzu'tzza nuure näjza la'tu lo xtidx Jesucrist, agulezani nuurnu te jiennu xtzuunni. <sup>22</sup> Abacuaazani xseenni loonu, ni'cni baniidxni Sprit Dxan xtenni te cuääzni nen lastoonu.

<sup>23</sup> Rbedxä loj Dios gacbeeni xhi yu' lastoä, guliipacni te diruna gutalä xcälñajtu, ni'c dina niälsacä guedx Corinto. <sup>24</sup> Di rlazjnu guinibeenu xho chalilajztu, alga rlazjnu gacnäanutu lo dzuun te guibaa lajztu; guliipac agusudzu'tztu lo xcälrlililajztu.

## 2

<sup>1</sup> Niluxh lagajc xcuent xcäl'nasa'cä benä xhigab dina jädhuisacä la'tu che cayac-huin lazä. <sup>2</sup> Sa'csi palga narä siädyenä gac-huin lajztu, ¿chuni'c gun guibaa lazä? La'tistu, nani benä guc-huin lajzni. <sup>3</sup> Ni'cni lagajc xcuent ni'c bacuaä lojtu, te che jäälä lojtu, di rebejn gunhuin lazä nani riäj] guspaa lazä. Luxh nancheä palga narä guibaa lazä, nägajc la'tu sibaaza lajztu. <sup>4</sup> Che bacuaä guijtzga lojtu, lacti xhigabduxh benä, binduxhä; xhet te gac-huindi lajztu, alga te gacbeetu yäl'sanälazduxh ni sanälazä la'tu.

*Yäl'rusiäj] lajz ni yu' par nani bejn falt*

<sup>5</sup> Palga yu' chu tej ni cayujn cayac-huin lazä, xhet xtebtis lazä cayunhuinni näjza lajztu cayunhuinni guxii diidx guiniä sa'csi di rlazä guntu xhigabduxh. <sup>6</sup> Alabasaciduxh xhidaj] bejn dade'ga, na'cru gusacsftuni naj. <sup>7</sup> Naj col'siäj] lajztu xcuent xtoj]ni, col'cuedxi lajzni didi gac-huinuxhtej lajzni. <sup>8</sup> Ni'cni rniabä lojtu, col'chanälajz bejnre si'c ni huinälajztuni galoo. <sup>9</sup> Bacuaxgaäza lojtu te gacbeä laa susoobtu xtidxä. <sup>10</sup> Naj renani jääj] lajztu xtoj]ni, näj narä siäj] lazäni. Sigajcza narä, nani basiäj] lazä, palga yu' xhi basiäj] lazä, benäni xcuent xcäl'nasa'ctu, nez loj Jesucrist, <sup>11</sup> te di gun bendxab gaan nuure, sa'csi anajnnu xho najc latsiaj ni rujn bendxab.

*Guyu' Pabl yärsia' che bidzuj]ni guedx Troas*

<sup>12</sup> Che bidzunä guedx Troas, te gusule'ä xtidx Jesucrist, bejn Dad Jesucrist rutliidi badxojndi narä, <sup>13</sup> niluxh guyuduxhä yärsia' sa'csi dina nidxälä Tito, bejtznu. Ni'cni basadidxgacäreni, sa'äti nez reguedx Macedonia.

*Jesucrist rujn riennu gaan*

<sup>14</sup> Xquixtios lo Dios nani con Jesucrist racnäj nuurnu te dipacnu gunijt, empac rujntisnu gaan, luxh con nuurnu guiraa nejz ruluilojni xhi saru najc gumbeepac bejn xtidx Dios. <sup>15</sup> Sa'csi najczanu si'c te guxh xten yalnejxh xten Jesucrist lo Dios nez loj renani chalilajz xtidx Dios näjza nez loj rebejn nani canijt sa'csi naadireni chalilajzreni xtiidxni. <sup>16</sup> Loj reni di chalilajz xtiidxni, najcnu si'c te guxh ni rugu't, loj renani rililajz xtiidxni, najcnu si'c guxh xten yalnejxh ni rudeed yäl'nabañcoob. ¿Chu laa ni racbee sa' recosga? <sup>17</sup> Sa'csi dinu gac si'c najc xhidaj] bejn nani rusule' xtidx Dios te gunreni gaan meel. Nuure rusulesa'cnu xtidx Dios sa'csi rinälazpacnu Jesucrist luxh si'c ni gunibee Dios, si'c rusule'nu, rusule'nu diidx con xcäl'racnäj Jesucrist nez loj Dios ni cahuii xhini'c riennu.

## 3

*Diidx nacoob ni basa'n Dios loonu*

<sup>1</sup> Che rniinu rediidxga, ¿la rchalotu canisacnu didxsa'c lagajc xcuentnu, ä? Yu'reni ca' guijtz ni rnii najcreni bens'a'c. ¿La rlazzzatu guiluini lojtu sa' guijtzga, o guiniabnu guntu sa' guijtzga xca'nu, ä? <sup>2</sup> La'tu najc si'c xquijtznu ni rnii xho najcnu. Lastoopacnu acuajtu. Guiraa rebejn rajc rhuii xho huililajztu xtidx Dios sa'csi basule'nu xtiidxni lojtu. <sup>3</sup> Huenliisi rlui loj najctu si'c xquijtz Jesucrist, luxh nuurnu bizule'nu xtiidxni lojtu. Xhet con tintdi cuaj rediidxga, xhet lojdiza guij cuaj diidxga, Sprit Dxan xten Dios ni nabajn bacuaa rextidx Diosga, bacuaanireni lastootu.

<sup>4</sup> Nadoncheenu redee, ni'cni xcuent Crist dinu guidxejb nez loj Dios. <sup>5</sup> Di gacdi jien xtebnu xhitis dzuun ni riennu, riennuni sa'csi laa Dios ni racnäj nuurnu. <sup>6</sup> Laani runiidx yäl'nadaan loonu. Nuurnu najcnu mos xten xtidxcoobni ni bia'nni con nuurnu. Luxh didxcoobga dini gac si'c xleii toMoisés ni bacuaareni lo guij, sa'csi xleini biädnä dojl, dxejc gujtnu. Niluxh didxcoobga ni rusule'nu biädnä Sprit Dxan xten Diosni, luxh runiidxni yäl'nabañcoob loonu. <sup>7</sup> Leii baluii yu' xtoj] bejn, riäj] guetreni. Xhidaj] seen guyu' che bacuaa Dios rediidxga lo guij. Luxh di niajcdi nuhiii rexpejn Israel loj Moisés, bidxejbreni sa'csi rdimbicha' lojni, luxh sanuu cayuii yäl'rdimbicha'ga. <sup>8</sup> Palga si'c gujc che biäd leii, aticaxh naj su'ru xcäl'rdimbicha' xleii Sprit Dxan xten Dios, ni najc redidxcoob nani abasule'nu. <sup>9</sup> Palga xleii toMoisés ni baluiloj yäl'gujt xcuent dojl

biädnä yälrdimbicha', aticaxh naj yu' xcälrdimbicha' xtidxcoob Dios ni rudzucaj dojl. <sup>10</sup> Naj dirunu fii xcälrdimbicha' xleii toMoisés sa'csi xtidxcoob Dios rdimbicha'ru par tejpas. <sup>11</sup> Palga yälrdimbicha' nani biuii bianisesduxhni tera't, stee yälrdimbicha're ni najc par tejpas sidimbichasesduxhni.

<sup>12</sup> Luxh ni'c runiidx yälrbecdx i lajznu, dipacnu guidxejb che rusule'nu xtidxcoob Dios. <sup>13</sup> Dinu gac si'c toMoisés, ni basäu tla' lajd lojni te di fii rexpejn Israel cayuii yälrdimbicha' ni guyu' lojni. <sup>14</sup> Niluxh bicäy xcariajnreni; lo dxej najli che riel xleii toMoisés, najcni si'cni yu' xhi lajd rusäu lastooreni, rudxojn gacbeereni, te di chalilajzreni, xtidx Jesucristtis rajc rudzucaj lajdga. <sup>15</sup> Lo dxe najli che rolreni xleii toMoisés, najcni si'cni ruscäy te lajd xcariajnreni. <sup>16</sup> Lo xtidx Dios rnii scree: “Niluxh che gusiechlajz te bejn, gudzuréni nez loj Dad, sibicaj lajdga”, nalajznu sacbeeni xtidx Dios. <sup>17</sup> Dad Jesucrist najc Sprit luxh cadre yu' Sprit xten Dios badzucaj Diosni lo xleii toMoisés. <sup>18</sup> Niluxh nuure dinu gusäu lajd lojnu, didi guscäyjni xcariajnnu. Nuure najcnu si'c te guihuajn cadre rdimbicha' xtuxh Dad Jesucrist, luxh chäi-chäi cadxaanu cayajcnu si'c najcni näjza caca'nu xcälrdimbicha' Jesucrist, sa'csi si'c cayujn Sprit Dxaan xtenni.

#### 4

<sup>1</sup> Ni'cni sa'csi agule Dios nuure te gusule'nu xtiidxni, sa'csi balaslajzzani nuure, dipacnu jiäxhan. <sup>2</sup> Ni'cni rbälaznu recos ni rajc xhiga'tz, sa'csi rusanxtujyreni. Dizanu gusguee, dizanu guchaa xtidx Dios, niluxh rniinuni si'cpacni najcni, te si'c ruhuii guiraa bejn rsiapacnu lo xnezyuj Dios. <sup>3</sup> Niluxh palga yu' chu dipac gacbee rextidx Dios nani rusule'nu, najctisreni rebejn nani ala canitloj par tejpas, <sup>4</sup> sa'csi abascäy bendxab ni rnibee guedxliujre xcariajnreni, si'cni rujni lo rebejn nani di chalilajz xtidx Jesucrist, te na'c fiireni xcälrdimbicha' xtidx Dios ni rnii xcuent xhanij xten Jesucrist, ni najc xtujxh Dios. <sup>5</sup> Che rusule'nu xtidx Jesucrist, dinu guiliä'p lagajc xpala'nnu, rliä'pnu ganaxtis xpala'n Dad Jesucrist. Nuure najcnu xmostu xcuent Jesucrist. <sup>6</sup> Che benchee Dios guedxliuj, guniini: “Lo xcäy suguirii te bajl ni gusanij.” Lagajc Diosga abasanij lastoonu te baniidxni bajl ni najc yälriembee xcälrdimbicha' Dios nez loj Jesucrist.

#### *Xho guibanu con yälirililajz*

<sup>7</sup> Nuurnu najcnu si'c te guesyuj, xhet sajcdinu, niluxh guidxanu te yälñasacduxh, ni najc xtidx Dios xcuent Jesucrist, te guiluiloj xcälñasa'c xten xcälrnibee Dios lacuaa xhisi te yälñadipbäz xtennu. <sup>8</sup> Rdeednu trabajw guira nejz, niluxh dinu gunijt yälrunloj. Mase di jien xho jiennu, dinu chu yärsia'. <sup>9</sup> Rusacsireni nuure, niluxh di Dios cuälaznu, rguijnreni nuure, dizareni ju't nuure. <sup>10</sup> Cadrotis rionnu rusacsireni nuure si'c basacsireni Jesucrist, te si'c nen tiejxhnu guluilojzani yälñabansac loj rebengut xten Jesucrist. <sup>11</sup> Cadrotis rionnu rlanjzreni ju'treni nuure sa'csi rusule'nu xtidx Jesucrist te si'c za nen tiejxhnu guluilojzani xcälñabajn Jesucrist loj reben guedxliujre. <sup>12</sup> Ni'cni rujn yälgujt dzuun loonu, per yälñabajn cayujn dzuun lojtu.

<sup>13</sup> Sa'csi rajpnu lagajc xsprit xten yälirililajzga, sigajc ni caj lo xtidx Dios: “Huililazä ni'cni basule'ä diidx.” Sigajc za nuure, huililaaznu xtidx Dios, ni'cni rusule'nuni. <sup>14</sup> Sa'csi nadonnu lagajc nani baspañsac Jesucrist loj rebengut, lagajc za laani gun guibañsacnu con Jesucrist te gunni sunäjnu la'tu nez lojni. <sup>15</sup> Rsiajcnu guiraa ni rsiajcnu te xcuent si la'tu gudeedru bejn xquixtios lo Dios, te guiliä'pruzareni xpala'nni xcuent yälñulaslajz ni sanuutis care'ch lo xhidajl bejn.

<sup>16</sup> Ni'cni dinu gunijt yälrunloj, per mase tiejxhre acayujxh, guixe-guixee cagustioob Dios spritnu. <sup>17</sup> Retrabajw ni cadeednu lo yälñabajnre rdedgajczeni, niluxh rujnreni ga'pnu te yälrdimbichaduxh ni gajdnu guidon, ni najc par tejpas. <sup>18</sup> Dinu fiitis renani ruzen lo guedxliujre sa'csi sinitloj reni'c, alga cayenloonu renani di guzen, sa'csi renani di guzen najczeni par tejpas.

## 5

<sup>1</sup> Aracbeenu tiejxhnu najc si'c te yu' xten xaimnu lo guedxliujre, sidzujn dxej sinitlojni, nalajznu sejt tiejxhnu, suniidx Dios te tiejxhnu xten xhaguibaa nani di nitloj, nalajznu dini guet par tejpas. <sup>2</sup> Guliicani, lałni dxunnu nen tiejxhre, rbedxnennu rdeednu trabajw, ni'cni rlanjnu maläi agojl guidxaa tiejxh guedxliujre te xca'nu te tiexhcoob ni siäd xhaguibaa. <sup>3</sup> Te si'c che acua'nuni, diruni gac si'cni suxhabääl xaimnu, sa'csi abicoob tiexhnu. <sup>4</sup> Lałni dxunnu nen tiejxhre rbedxnennu, rdeednu trabajw, sa'csi di rlaaznu suxhabääl xaimnu, rlanjnu gacwnu tiexhcoobnu, te tiejxhre nani cayejt, sidebnäjni tiexhcoob ni siäd xhaguibaa. <sup>5</sup> Nani benchee nuure parpac dee najc Dios, lagajc nani runiidx Sprit Dxan xtenni loonu si'c te seen sujnpacnini.

<sup>6</sup> Ni'cni dinu guidxeb, sa'csi nadonnu lałni nabajnnu lo guedxliujre, di gacdi guibajnnu xhaguibaa loj Dadga. <sup>7</sup> Sa'csi nabajnnu xcuent nani rililajznu, xhet xcuentdi nani rajc rhuinu. <sup>8</sup> Ni'cni rniä nabajnnu dinu guidxeb, rchaloonu hueenru guisa'nnu tiejxhnu lo guedxliujnure, te choläznäänu Jesucrist xhaguibaa. <sup>9</sup> Ni'cni tejtis najc xhigabnu, palga lo guedxliujre o xhaguibaa, rlanjztisnu jiennu renani gun guibaa lajzni. <sup>10</sup> Sa'csi guiraanu riäjł suunu nez loj yagxhiil cadre gun Jesucrist yälguxhtis, te tejganu guica'nu xcuent nani biennu lo guedxliuj, palga dzunsa'cni, o palga dzunguijdxni.

*Diidx xcuent yälrbecdxı lajzni*

<sup>11</sup> Luxh sa'csi rdxejbnu (nalajznu rucuaadiaagnu xtidx) Dad Jesucrist, ruliidxnu rebejn te chalilajzreni xtiidxni. Luxh Dios najn xho nabajnnu; maläi näjza lo xcäriejntu guluiloj xho nabajnnu. <sup>12</sup> Dinu guiliä'p lagajc xpala'nnu lojtu stehuält, rniinu rediidxga lojtu te guibalajztu xcuentnu, te ga'ptu xhi diidx gusejctı lo rebejn ni rchagljajztis ruhuii xho rien bejn, direni gacbee xhi yu' nen lastooreni. <sup>13</sup> Palga najcnu si'c bejn ni rajc yejcreni, si'c najcnu par Dios, palga najcnu si'c bejn ni nasa'c xcäriejnnu, najcnuni par la'tu. <sup>14</sup> Sa'csi sanälazduxh Jesucrist nuure, ni'c rusoobtisnu xtiidxni, sa'csi nancheenu gujt tejtis par guiraanu, ni'c najcni si'cni agujt guiraanu nez loj Dios. <sup>15</sup> Luxh Jesucrist gujt xcuent guiraa rebejn, te renani rililajz xtiidxni, na'cru guibajnnu xcuenttis laareni, alga guibajnpacreni xcuenttis Jesucrist nani gujt, nani gubañsac xcuent laareni. <sup>16</sup> Ni'cni nuure dinu fii lo bejn si'cni najcreni lo guedxliujre. Galoo biembeenu Jesucrist si'cni gujcnı che gubajnnı lo guedxliuj, niluxh naj et si'ctı riembeenuni. <sup>17</sup> Ni'cni chutis bejn, palga rililajzni xtidx Jesucrist, sujnnıni te beñcoob, diruni guichagljajz gunruni nani rajc lo guedxliuj, alga guichagljajzni gunni xtzun Dios.

<sup>18</sup> Guiraa dee siäd lo Dios, nani basiäjł lajzni xcuent Jesucrist, dxejctı baniidxni loonu rediidx xcuent xcälrusiäjł lajzni te gusule'nu rediidxga, <sup>19</sup> nalajznu, nanab gusule'nu diidxre: Dios guyunäj Jesucrist, cagusiäjł lajzni con reben guedxliuj, te xca'nireni, sa'csi diruni gudzuub xtojł reni ahuililajz xtiidxni lo xcuentreni. Dxejc gule Dios nuure te gusule'nu rediidxpacre lo rebejn. <sup>20</sup> Ni'cni sio'pnu te guiniinu xtidx Jesucrist, najcni ascanu lagajc Dios canabduxh lojtu che rniabduxhnu lojtu, colgusiäjł lajztu, colyajc tejsi con Dios. <sup>21</sup> Di Jesucrist niujn nicla tej dojl, niluxh sa'csi sanälajz Dios nuunu, xcuentnu bejn Dios gujc Jesucrist si'c te beñdojl che gule'cni guiraa rextojł guedxliuj yejc Jesucrist che cuajni lo cruzj. Si'c gujcnı te sajc ga'pnu xcälñaya, xcälñasa'c Dios xcuent Jesucrist.

## 6

<sup>1</sup> Ni'cni rniabnu lojtu, jia'cnu tejsi lo xtzun Dios, na'c cuälaztu xcälracnäj Dios; palga guntu si'c, xlia'si cua'tuni. <sup>2</sup> Sa'csi loj xtidx Dios caj scree:

Dxej nani riäjł gunäni, bacuadiagä xtiidxtu,

dxej che gubicaj xtojłtu gucnäá la'tu.

¡Coljiejn! Naj najc te tiempsa'c,

coljiejnza, naj najc dxej ni guibicaj xtojłtu.

<sup>3</sup> Na'c jiennu nicla tej ni gun guidxe'ch lajz bejn, didi guiniireni xhet laadi najc xcälrusule'nu. <sup>4</sup> Niluxh lo guira'ti dzuun ni riennu, guluilojnu lo rebejn najcnu xmos Dios; gacnu nadolajz; jiennu huant che rusacsíreni nuure; che rdejdnı trabajw; che



di jien xho jiennu; <sup>5</sup> che rguijnreni nuure; che rusäureni nuure nen latzguiib; che rdejdn lo bieiduxh; che rdajl xtzuunnu; che re'ch bacal yääl; che rucua'nnu; <sup>6</sup> guluilojza najcnu xmos Dios xcuent xcäl'nabansa'cnu lo Dios; näjza xcäl'nansa'c xtidx Diosnu; näjza yälrajc nadolajz; sa'csi laaca riennu lo sa'nu; näjza sa'csi rbäjz Sprit Dxan xten Dios nen lastoonu; näjza xcuent yälrinälajzpac bejn; <sup>7</sup> näjza xcuent didxguliipac; näjza lo xcäl'rnibeduxh Dios; ca'zanu si'c te madxed xcäl'naya Dios, ca'nuni guopnaanu, ladbee, näjza ladbäjgw. <sup>8</sup> Ruluilojzanu najcnu xmos Dios palga chä'p xpala'nnu, o palgaza jianxtujynu; palga guiniireni didxsa'c xcuentnu, o palgaza guiniyajreni nuunu; palga naarenä najcnu beñrusguee, mase najcnu bejn ni rni didxlii. <sup>9</sup> Palga rut rlajzdi gumbee nuunu, o palga guira'ti bejn numbee nuunu; acayejtnu, niluxh bahuii, anu anabajn; rusaan Dios rguijnreni nuure, niluxh dinu guet; <sup>10</sup> najcnu si'c bejn ni yu' xliajs, niluxh rbalaaznu; najcnu si'c bejn ni xhet rajpdi, luxh riennu gapduxh bejn; najcnu si'c bejn ni xhet rajpdi, niluxh rajpnu guiralaj.

<sup>11</sup> Lojtu, ben Corinto, aguniliinu lojtu guiragajc rediidx ni yu' nen lastoonu. <sup>12</sup> Xhetliidi diidxdi bacua'tznu lojtu, niluxh pet cacuatx lajztu diidx ni nanab guiniitu loonu. <sup>13</sup> Naj narä rulidxä la'tu si'c ruliidx te Dad rexi'nni: ;Colguinii loonu rediidx ni yu' nen lastootu!

#### *Najcnu si'c xquidoo Dios ni nabajn*

<sup>14</sup> Na'c guchaaqtu lo rebejn nani di chalilajz xtidx Dios, sa'csi di gacdi gunteblojtu dzuun sa'csi tejni rlajz gun dzunsa'c, steeni rlajz gunni dzunguijdx, ;xho gac sanäj bajl xcäy, ä? <sup>15</sup> O ;xho gac sanäj Jesucrist bendxab ni laa Satanás, ä? O ;xho gac sanäj te bejn nani rililajz xtidx Dios te bejn ni di chalilajz xtidx Dios, ä? <sup>16</sup> ;Xhixh tebloj najc xquidoo Dios con rebanäjb, ä? Ni nuunu najcnu xquidoo Dios ni nabajn, lagajc si'cni gunii Dios galoo:

Cuäzä nen lastooreni, sisianääzarenä.

Narä sacä Xtiosreni, laarenä sajcreni rexpenä.

<sup>17</sup> Ni'cni colrii galäiireni, colguibicaj lojreni, te laad colcuääz, si'c naj Dios:

Te gac xca'ätu, na'c fal'tu recosdxuudx.

<sup>18</sup> Dxejc la'tu sajctu rexinganä, rexindxa'pä,

luxh narä gacä xtadtu,

si'c naj Gueb Dios ni rajp guiralii yäl'rnibee.

## 7

<sup>1</sup> Ni'cni, la'tu ni sanälazä, sa'csi abia'n Dios diidxre loonu, do'o guisia xcäriejnnu, lastoonu näjza tiejxhnu, do'o cuäcaj guiraa rehxigabguijdx, guiraa redojl, te gac sanu lo rexnezyudxan Dios con xcäl'rdxejb Dios.

#### *Xho basiejch lajz reben Corinto*

<sup>2</sup> ;Colchanälajz nuunu nen lastootu! Xhet latsiajdi biennu lojtu. Rut baxhindinu. Rutza basgueedinu. <sup>3</sup> Dina guiniä rediidxre te cue'cä xquejtu; ni aguniä lojtu galooli, la'tu yu'tu nen lastoonu palga tejsi guetnu, o palga tejsi guibajnrunu. <sup>4</sup> La'tu nadip lazä, rniduxhä didxsa'c xcuenttu lo bejn, rbedxi lastoä, rbalazduxhä loj guiraa retrabajw ni cadeednu.

<sup>5</sup> Ni'cni che guyu'nu reguedx Macedonia, di niajcdi nusilajznu sa'csi guiralajc cadejdn trabajw, xcuent yäl'rdijl ni guyu' guideb gabinu, xcuentza yäl'rdxejb ni guyu' lastoonu. <sup>6</sup> Niluxh Dios ni racnäjb rebejn ni rac-huin lajzreni, gucnäj nuure, sa'csi che bidzujn Tito guredxi lastoä. <sup>7</sup> Luxh xhet sa'csi bidzujntis Tito, näjza sa'csi gulecdxitu lastoo Tito, näjza sa'csi biädnäni diidx xho yu'tu, xho rlajztu fiitu narä, xho yu' xliajs lastootu xcuent xtojltu, xho rladzduxhtu guntu si'cni guniä lojtu, ni'cni bibalasduxhäru.

<sup>8</sup> Acananä guc-huin lajztu che bil'tu guijtzn ni bacuaä lojtu, niluxh di lazä niac-huin mase che baxhaläni guc-huin lazä, sa'csi naj nanä mase bejn guijtzn guc-huin lajztu, xhet xchejdi guc-huin lajztu. <sup>9</sup> Niluxh naj rbalazä, et sa'csi guc-huindi lajztu, alga sa'csi guc-huin lajztu te basiejch lajztu xcuent xtojltu, sa'csi guc-huin lajztu si'cni rlajz Dios, te di yu' xhi gunijttu xcuent nuunu. <sup>10</sup> Sa'csi yäl'rac-huin ni ruxhal Dios loonu rujn rusiejch

lajznu, te ruslaa Dios nuurnu lo dojl ni'cni rbaalazä che bejn ni si'c. Niluxh yälrac-huin xten guedxliuj dini gun gusiejch lajz rebejn rextojlreni, alga rujni nitloj bejn tejpas. <sup>11</sup> La'tu bejntu huant xliajs ni baxhal Dios si'cni rchaglajz Dios gac. Naj jcolhuii gan! jLacti xhi cossa'c bejn ni par la'tu! Bejn ni bahuisa'c pactu xhini'c gujc, te gac gusulegajctu xcuentni; dxejc bejn ni bidxe'chtu, näjza bejn ni bidxejbtu, ni'cni basaantu dojlga, dxejcti bejn ni rlaizpactu nuhuiitu loä, bejnzani guyu'tu yärsia' xcuentä, bejnzani rlaiztu guntu yälguxhtis bejn nani bejn dojlga. Guiraa redee baluiloj et la' ditu bejn dojl. <sup>12</sup> Ni'cni, che bacuaä guijtzga, dina nucuaäni loj bejn ni bejn dojlga, niluxh bacuaä guijtzga lojtu te guiluiloj xcärsia'tu ni rajptu xcuent narä nez loj Dios. <sup>13</sup> Ni'cni aguredxi xcäriejnnu.

Naj aguredxi xcärienä, bibalazduxhärü xcuent xcälrbalajz Tito, sa'csi bicoob, bisilajz xpriitni xcuent guiraa. <sup>14</sup> Sa'csi palga yu' xhi didxsa'c ni räpä lojni xcuenttu, ditu nusanxtuj narä nez lojni. Niluxh sigajcni guniinu ganax didxgulii, sigajcza najc guiraa redidxsa'c xcuenttu ni guniä loj Tito, guliipacni. <sup>15</sup> Ni'cni maazru sanälajz ni la'tu, che rnaj lajz ni xho basoobtu diidx, xho bejntu cua'tuni che bidzujjnu, racejslitu cadxejbtu. <sup>16</sup> Naj rbaalazä sa'csi loj guira'ti la'tu nadip lazä.

## 8

### *Saru rudeedreni meel*

<sup>1</sup> Naj bejtznu, rlaiznu guiniinu lojtu xho badeed Dios xcälruulasajz ni lo reben Macedonia ni huililajz xtidx Dios. <sup>2</sup> Mase gudedduxhäreni trabajw, bibalajzreni, mase xhetliidi gojpreni, badeedreni meel si'c te bejn ni rajp. <sup>3</sup> Narä caniliä lojtu, badeedreni xmeelreni si'cni gojpreni, luxh badeedruren i loj ni naa bejn sajz gudeedreni. <sup>4</sup> Gunabduxhzaren i loonu guisaannu gudeedreni xmeelreni te gacnäjreni rexpen Dios. <sup>5</sup> Niluxh direni niujn si'cni biennu xhigab gunreni. Ganiddoo badeedreni lagajc laaren i loj Dad Jesucrist, näjza loonu si'cni rnibee Dios gac. <sup>6</sup> Sa'csi batie' rexpen Macedonia meel, ni'c naj räpä loj Tito chanuupacni gutie'ni meel lojtu si'cni gunii Tito lojtu galoo. <sup>7</sup> Rujntu xhidajl dzunsa'c. Rililazsa'ctu xtidx Dios; rnisa'ctu xtidx Dios; rajptu yäl najn; rchaglajz pactu guntu dzuun; rinälajztu nuunu, ni'cni na'c gusaantu tedcaj gunzatu dzunsa'cre, nalajznu, gudeedtu meel.

<sup>8</sup> Dina guiniä lojtu colyujn pacni; narä rlazätis gacbeetu xho rbaalajz reni rudeed meel te guiluiloj don la gulii sanälajz paczatu rexpejn Dios. <sup>9</sup> Sa'csi la'tu anumbecheetu rulasajz Dad Jesucrist, te mase najcni ri'cw, rajpni guiraa xhixten Dios, xcuentu gujcni si'c te bejn ni xhet rajpdi, te xcuentni ga'ptu guiraa rexhixten Dios xhaguibaa.

<sup>10</sup> Narä siniä lojtu xhi xhigab runä, par lagajc xcäl nasa'ctu. Gudebijzli ganiid la'tu guslojtu bejntu dzunsa'cre, luxh rbaali lajztu rlaizpactu guntuni. <sup>11</sup> Naj colchanuu, colguluux dzuunga si'cni guslojtu cayujntuni. Naj te luux dzuunga colgudeed si'cni rajptu. <sup>12</sup> Sa'csi palga rlaizduxh te bejn gudeed lo Dios, laaca najc gudeedni si'ctis ni rajppacni. Di Dios guiniab gudeed bejn nani dini ga'p. <sup>13</sup> Dina guiniä gudeedtejtü te tedtu trabajw te gapduxh stee bejn, alga te gacteblojtistu. <sup>14</sup> Nani rajprulu naj ni'c colgudeed te gusalojtu ni cayäädxreni, te stee dxej nani rajpreni laaren i sajz suniidxzaren i te gusalojreni nani cayäädxtu te si'c gacni tebloj. <sup>15</sup> Sa'csi lo xtidx Dios caj scree: “Te bejn nani batopduxh yäl nasa'c, xhet bia'ndiru, dxejcti nani guxii batojp yäl nasa'c, xhet biäädxd i.”

### *Tito näjza rexcompanieerni*

<sup>16</sup> Xquixtios lo Dios nani rudeed lo Tito lagajc yärsia' ni rapä narä par la'tu. <sup>17</sup> Sa'csi cuäjbni gunni nani gunabä lojni gunni. Luxh sa'csi rlazduxh pacni gunni xtzuum Dios, naj lagajc laani bejn ni xhigab jädhuiini lojtu te luux dzuunre.

<sup>18</sup> Caguxhalnu xtee bejtznu chanä Tito. Guiraa rebejn guidoo rnii didxsa'c hueen xcuent bejnre sa'csi laaca rusule'ni xtidx Dios. <sup>19</sup> Ni'ctis aguleza reben guidooni te chunäjni narä te gacnäjni narä lo xtzuum Dios nani cayennu te guiliä'pni xpala'n Gueb Dad Jesucrist, te guiluilojza lacti rlaizpaci ni jennu xtzuumni. <sup>20</sup> Ni'cni rlazä jiapdaduxhnu

te di chu tej ni guiniyaj nuure xcuent melrore ni chosa'nnu lo rexpejn Dios. <sup>21</sup> Sa'csi narä riuduxhä runä nani najc laaca, et ganax nez lojdi Jesucrist, näjza loj rebejn.

<sup>22</sup> Con guiro'p redee, caguxhalzanu stee bejtznu, nani agujc balti huält bihuiinu xho rujnni, te bahuiipacnu rlajzpacni gansa'cni xhidajl dzuun, luxh naj rlajzruni gansa'cni redzuunga sa'csi nadip lajzni la'tu. <sup>23</sup> Palga yu' chu guiniabdiidx xcuent Tito, coljejtz lojni laani najc nani cayunnäj narä dzuun lojtu. Dxejcti xcuent stio'p bejtznu, laareni najcreni xquixhajg reguidoo, rliä'pzareni xpala'n Jesucrist. <sup>24</sup> Ni'c na'c guidxejbtu che yu'tu lo rebejn reguidoo guluiipactu loj rebejnnga xho sanälajztu, näjza redzuun ni rujntu ni'c rniinu ganax didksa'c xcuenttu.

## 9

### *Meel par rebejtznu*

<sup>1</sup> Ni'cni dina gucuaäru lojtu xcuent dzuunre, nalajznu, yälracnäj rexpejn Dios, <sup>2</sup> sa'csi anancheä rlajzpacu guntuni, luxh xcuentpac ni'c agulä'pä xpala'ntu loj reben Macedonia, räpä lojreni la'tu, reben Acaya, gudebijzli batie'tu meel, luxh sa'csi bejntu si'c, xhidajlza reben Macedonia biniib te badeedzareni meel. <sup>3</sup> Ni'cni abaxhalä rebejtznu lojtu, te di xlia'si gulä'pä xpala'ntu xcuent dzuunre, te acabäjzlitu gudeedtu xmeeltu, sigajc ni agunixgää lojtu. <sup>4</sup> Didi che jäädnää reben Macedonia jiophuiinu la'tu, xhet rajpditu, dxejc jianxtuyä narä, näjza la'tu. <sup>5</sup> Ni'cni benä xhigab, nanabpac jäädxgaa rebejtznu, jäädhuiireni la'tu, te fiireni don xho gac xcuent meelro ni galooli bia'n diidx gudeedtu, te abatiexgaatu nani gusalajztu sa'csi rlajzpacu gudeedtuni, xhet sa'csi rniinu riäjlpac gudeedtuni.

<sup>6</sup> Rniliä lojtu, nani guxii rbe'c, guxiiza yälناسа'c guiliäsni, niluxh nani rbe'c xhidajl binij, xhidajlza yälناسа'c guiliäsni. <sup>7</sup> Tejgatu colhuii don lacti sajc gudeedni, dxejc si'c sugudeedni si'cti ni rlajzni, na'c gun tiopdi lajzni, etza sa'csi riäjlpac gudeednini, sa'csi Dios sanälajz bejn ni rbaali lajzni rudeedni meel lojni. <sup>8</sup> Luxh Dios sajc guniidxru xcälracnäjni lojlu, te si'c guixe-guixee sajplu xhidajl guiraloj rehxixtenlu, te ga'plu xhitis ni rquiinlu loj guira'ti xtzunsa'clu. <sup>9</sup> Sa'csi lo xtidx Dios caj scree:

Abadeduxhni loj reben ni xhet rajpdiluxh redzunsa'c ni rujnni, najcreni par tejpas.

<sup>10</sup> Dios nani rudeed binij ni rbe'c nani rujn dzuun loniaa, laani suniidxzani yätxtiil te guidaunu, lagajc Diosga suniidx, sutajlza binij cue'ctu, lagajc laani sustioobnini te gacduxh yälناسа'c xten xtzunsa'ctu. <sup>11</sup> Te si'c ga'ptu lacti yälناسа'c te gac gudeedzatu xhiroob. Luxh xcuent xtzunnu, meel ni ruxhaltu loj rexpejn Dios sujn gudedduxhrene xquixtios lo Dios. <sup>12</sup> Sa'csi che racnäjtu rebejtznu, dinu guideed ganaxtis ni rquiinreni, rujnzanu rudeedrureni xquixtios lo Dios. <sup>13</sup> Che racnäjtu sa'tu si'c, ruluilojtu lacti ru-soobtu xtidx Dios si'cni ahuililajztuni, ni'cni siliä'preni xpala'n Dios xcuent xcälracnäjtu, nalajznu xcuent meel ni badeedtu lojreni, näjza loj guiraareni. <sup>14</sup> Dxejcti laareni sibedx-siniabzareni lo Dios xcuenttu, sinälazduxhrene la'tu sa'csi runidxduxh Dios xcälracnäjni lojtu. <sup>15</sup> Xquixtiosi Dios sa'csi baniidxni yälناسа'cduxhtej loonu!

## 10

### *Yälrnibee ni rajp Pabl sa'csi najcni apost*

<sup>1</sup> Lagajc narä, Pabl, rniabduxhä lojtu, con guiraa didxdoo, guiraa didksa'c xten Crist, (narä ni nac bennadolajz che biälä lojtu, niluxh che suga'a zijt lojtu, dxejc nacä bennialajz). <sup>2</sup> Narä canabä lojtu, colguibansa'c te che jäädhuiä lojtu, dina gacä nialajz dizana guiniä redidxnaj ni abenä xhigab guiniä loj gaii bejn nani rni nabanä si'c te benguexliuj. <sup>3</sup> Guliicani najcnu benguexliuj, niluxh dinu gucuanäj sa'nu guuib nani rca' bejn guexliuj che rcuaareni. <sup>4</sup> Sa'csi reguiib ni rca'nu te guidilsa'nu direni gac sa' guuib ni rca' bejn guexliuj. Nuunu rucuaanu con xcälrnibee Dios te riennu gaan loj guiraa rexcälrnibee guexliujre. <sup>5</sup> Ni'cni cagutzujlnu guiraa rehxigabguijdxreni, näjza

nani rchaloreni najc xhigabro nani rlanjreni guiniyajreni yälrumbee Dios, luxh caca'nu guiralii rexhigabnu cagutednureni ladznaa Jesucrist te gusoobnu rextidx Jesucrist. <sup>6</sup> Cabääztisnu te gunnu yälguixhtis loj chutis bejn ni dini gusoob xtidx Dios, che abasoob guiragajctu xtidx Dios.

<sup>7</sup> La'tu cahuiitu redzuun ni rien. Palga yu' chu tejtü ni rchaloni najcni xpejn Crist, sugunsa'cni xhigab, fiini xho najc lastooni, dxejcti sugacbeepacni sigajcni ahuililajzni xtidx Jesucrist, sigajcza nuure ahuililajznanuni. <sup>8</sup> Sa'csi mase guiliä'päru xpala'nä xcuent yälrnibee ni rapä, ni baniidx Dios te gustiobä xcälirilajztu, et te guxhinädi la'tu, nicla si'c dina gutuiä. <sup>9</sup> Dina rlazä guchalotu rlazä guchebä la'tu con rexquitzä. <sup>10</sup> Sa'csi rniireni: "Lo rexquijztni caj didxnagajn, didxnialajz, niluxh che suga'ni laapacni, xheti xcälsiudzu'tzni, luxh xho rniaj diidx ni rniini." <sup>11</sup> Luxh ni rii si'c, sugacbeepacni dee: si'cni najcnu con rextiidxnu che rucuaanu lojtu che yu'nu zijt, sigajcza najcnu che suganäjpacnu la'tu.

<sup>12</sup> Dinu gun xhigab najcnu tebloj loj rebejn ni runnaro lagajc laareni. Niluxh reni'c rchaloreni si'c sa'csi ruhuiireni xho najczeni cuä' stee lagajc sa'reni. Che rujnreni si'c, nayääl xcäriejnreni. <sup>13</sup> Nuure dinu gunnarotej lagajc nuurnu, niluxh riennu si'cni nungäj] jiennu, xcuent yälrnibee ni baniidx Dios loonu te jiennu dzuun cadro yu'litu. <sup>14</sup> Ni'cni dinu nidedcaj xcälrnibeenu che bio'pnu lojtu, sa'csi baniidx Dios yälrnibee loonu ganiddoo nuunu gusule'nu xtidx Jesucrist lojtu. <sup>15</sup> Dinu niennaro lagajc nuurnu xcuent xtzuun ste'ca bejn, ascanu lagajc nuunu biennuni. Cabääznu tioobru xcälirilajztu, te gac jienrunu dzuun lojtu, si'ctis gal jienunni. <sup>16</sup> Te gacza gusule'nu xtidx Jesucrist ste'ca lajt ni ria'n zijtru lo guejdx cadro yu'tu, na'cza gunnaronu lagajc nuunu xcuent dzuun ni bejn ste'ca bejn.

<sup>17</sup> Sa'csi nani rlanj gacnaro, suguiliä'pni xpala'n Dad Jesucrist. <sup>18</sup> Sa'csi et nani rliä'p lagajc xpala'ndini ni ria'n hueen nez loj Dios, niluxh bejn ni rliä'p Jesucrist xpala'nni, ni'cni rbalaznäj Dios.

## 11

*Pabl näjza rebejn* ni rniisi najczeni apost

<sup>1</sup> Maläii chanunäsijctu narä la] ni guiniä gaii didxnayäle', niluxh asanunäjtu narä. <sup>2</sup> Randzu'ä la'tu con yälrandzu' ni baniidx Dios, sa'csi abia'n diidx gutedä la'tu ladznaa Jesucrist te xca'ni la'tu. Rlazä gactu bejnaya chäätu lojni, si'c te dxa'p che ruchnaani te bi'n, rut bahualdini. <sup>3</sup> Niluxh rdxebä didi gusguee bejdxab la'tu si'c ni basguee bäl Eva con xcäl'nadxällajzni. Didi gunni guichaa xhigabtu, guibicajtu lo xtidx Jesucrist luxh naj laaca rajnpactü Jesucrist, guideb lastootu. <sup>4</sup> Sa'csi la'tu cagutipduxh lajztu che riädni ste'ca bejn lojtu xtidx stee Jesús nani digac nani bisule'nu lojtu; o che naareni xca'tu stee sprit ni digac nani acua'tu; o che naareni chalilajztu ste'ca diidx nani najc garenca lo xtidx Dios ni ahuililajztu. <sup>5</sup> Narä runä xhigab dina gacä bejn ni guxiiru sajc loj guiraa reapost.

<sup>6</sup> Mase di gacdi guinisa'cä, xhet yäl'najndiza cayädxä; niluxh ni'c huenliisi rlui loj guiraa rediidx ni abaluiä lojtu, guiraa redzuun ni abenä ro'c.

<sup>7</sup> O ;la benä te dojl guyu'ä lojtu si'c te bejn nadolajz, te gactu bejnroru, sa'csi xhetliidi cua'ädi xcuent ni basule'ä xtidx Dios lojtu? <sup>8</sup> Cua'ä meel ni baniidx garenca guidoo löä che guyu'ä lojtu, te benä xtzun Dios lojtu. <sup>9</sup> Che guyu'ä lojtu guyu' xhi biquinä, niluxh xhet cua'ädi lojtu, dina nutalä xtzuuntu. Sa'csi che biäd rebejztnu ni siäd Macedonia, baniidxreni guiraa ni biquinä. Loj guiraa redee dina nutalä xtzuuntu, luxh si'c sinuu gunä. <sup>10</sup> Guideb didxlii xten Jesucrist ni yu' nejn lastoä, rniliä rut sajcdi gudzucaj xcuent xho yuä lojtu, ni'cni care'ch didxroga lo guiraa reguedx Acaya. <sup>11</sup> ;Xhicuent rniä si'c? ;Laa sa'csi dina chanälazä la'tu, ä? ;Xho gacni si'c! ;Dios anajn lacti sanälazä la'tu! <sup>12</sup> Niluxh nani rungacä, lagajc ni'c sinuu gunä, te gudxonä renani rlanj gacnaro, renani rlanj naa rebejn najczeni si'cpac najcnu, niluxh direni gac. <sup>13</sup> Direni gac apost, laareni rusgueereni, rujnsireni si'c ni najczeni apost xten Jesucrist, luxh rut najcdireni. <sup>14</sup> Luxh

xho dini gac si'c, ni lagajc be<sub>nd</sub>xab ni laa Satanás ruluiloj si'c te xangl Dios ni rdimbicha' te rusgueeni bejn. <sup>15</sup> Ni'cni na'c guidxelojtu palga nájza rexmos be<sub>nd</sub>xab riáäd, rujnsireni si'c bejn ni rujn dzunsa'c, niluxh sinitlojreni par tejpas xcuent ni rujnreni.

*Rdejd Pabl trabajw sa'csi najcni te apost*

<sup>16</sup> Rnisacä lojtu, na'c guntu xhigab yecä cayajc, niluxh palga si'c rujntu xhigab, colgusaanza guiniä si'c te ni rajc yejcní te guiniäza didxro lagajc xcuentä. <sup>17</sup> Diidx ni rniä dina guiniäni xcuent xcälrníbee Dios, alga rniäni si'c te ni rajc yejcní, lala redidxro ni rniä xcuent lagajc narä. <sup>18</sup> Sa'csi lacti bejn yu' ni rniä didxro xcuent redzuun ni rujnreni lo guedxliujre, sigajcza siniä didxro xcuent lagajc narä. <sup>19</sup> Ni la'tu, sa'csi nasínduxhtu, sanunäjtu rebejn ni rajc yejcreni. <sup>20</sup> La'tu sanunäjtu chutis ni rníbee lojtu si'c te lam, o rusguee la'tu te rbajnreni xhi xtentu, o rujnni runxlia'tu xtzuunni o rliä'preni lagajc xpala'reni, o rga'preni lojtu. <sup>21</sup> Mase rtuiyá guiniäni, dipac niajcdi niniä diidx lojtu te niacä si'c najc rebejnğa. Niluxh loj xhitis nani runnaroreni, (canisicä si'c te be<sub>nn</sub>ayääl) narä sajrcu gunnaröä.

<sup>22</sup> ¿La najceni xpejn hebreos? Sigajcza narä. ¿La najceni xpejn Israel? Sigajcza narä. ¿La najceni xajg toAbram? Sigajcza narä. <sup>23</sup> ¿La najceni xmos Jesucrist? Narä nacäruni lojreni. Naj rniä si'c te bejn ni rajc yejcní. Abenäru dzuun lojreni, agudijnrurení narä loj ni gudijnrení laareni, abasäururení narä ne<sub>n</sub> latzguiib, nicla gac guigab bal huält gudijnrení narä; baltiza huält ameer nietä. <sup>24</sup> Gaii huält gudijn rexpejn Israel narä, tejga huält batiäjlrení duguijd detzá galbitzubigaa huält. <sup>25</sup> Cho<sub>n</sub> huält bahuajcwrení narä garo't; stee huält bacuaareni guij yecä; cho<sub>n</sub> huält biäáz barcw cadre sa'a loj nisdoo; teb dxej, teb yääl guyu'a lo nisdoo. <sup>26</sup> Huaduxhä bñaj, lacti bixun<sub>n</sub> riesgw xcuentä lo gueuu, xcuent regubaan, xcuent reben<sub>n</sub>ladxä, xcuentza reben<sub>n</sub>zijt. Bixun<sub>n</sub>za riesgw ne<sub>n</sub> reguedxro, nájza nez lo reyubijdz, nájza lo nisdoo, nájza xcuent rebejn ni rusguee, rniisireni najceni bejtznu lo xtidx Jesucrist. <sup>27</sup> Abenduxhä dzuun, agudedduxhä trabajw, balti yääl dina niesä, balti huält gulanä, biolä, balti huält xheti xhi niauä; agudedäza yäl<sub>n</sub>alduxh; guyu' huält xhetiza xhabä.

<sup>28</sup> Luxh xhet loj redeetis rdedä trabajw; guixe-guixee di lastoä cuedxi xcuent yärsia' ni ru'a xcuent reben<sub>n</sub> guidoo ni huililajz xtidx Dios. <sup>29</sup> Che rdxajg tejtü, nájza narä rdxagä. Palga tejtü riajb lo dojl, narä ruduxhä yärsia' xcuentni. <sup>30</sup> Palga nanab gunnaröä lagajc narä, sunäni xcuent rediidx nani ruluiloj xcälrdxagä. <sup>31</sup> Dios ni najc Xtad Jesucrist, nani riäj<sub>n</sub> guiliä'p xpala'nni par tejpas, ananchee dina gusgueä la'tu. <sup>32</sup> Che guyu'a guedx Damasco, gubernadoor nani guyu' ro'c, najcni xpejn reii Aretas, guníbee gojp rexcuxhtisni guejdxga te niniaazrení narä te nisäurení narä ne<sub>n</sub> latzguiib. <sup>33</sup> Niluxh basiäjtrení narä ne<sub>n</sub> te dximro nez ro' te padeer ni rdejd gabi guejdxga, te si'c gulaä ladzñaareni.

## 12

*Dios baluiloj lo baca<sub>n</sub>*

<sup>1</sup> Mase riäj<sub>n</sub> guiniäni, xhet gunädi gaan guiniä didxro lagajc xcuentä ni'cni rlazä chanuu diidx, guiniä xcuent rebaca<sub>n</sub> nájza xcuent nani baluiloj Dios loä. <sup>2</sup> Numbeä te niguii ni ahuililajz xtidx Jesucrist. Gutzudaj ijz huijni guibaa ni riojnğa, dina ganä laa guideb tiejxhni huijni, o la ganax xspritni huij, Diostis najn. <sup>3</sup> Diostis najn laa guideb tiejxhni, o ganax xpritni, niluxh nanä xho huij niguiiga, <sup>4</sup> guläs Diosni cadre yu'pac Dios, luxh ro'c biejn diajgni didx-xhiga'tz, didxroduxhtej, nani di gacdi guinii ben<sub>n</sub> guedxliuj. <sup>5</sup> Xcuent sa' niguiiga sajc guiniä didxro, didxsa'c, niluxh xcuent lagajc narä, di gacdi guiniäni; siniätis diidx ni ruluiloj xcälrdxagä. <sup>6</sup> Mase rlazä guiniä didxro, didxsa'c xcuent lagajc narä, dini gac didxnayääl, sa'csi guliicazani. Niluxh dina guiniäni te di guntu xhigab nacä be<sub>nn</sub>roru loj ni rhuiitu runä o nani riejn diajgtu rniä.

<sup>7</sup> Baluiloj Dios xhidalduxh cosroduxh loä, niluxh te na'c gacä be<sub>nn</sub>aro, basaan Dios gusloj guyuguijdx tiexhä, si'c te guejch huäáz tiexhä, ni baxha<sub>n</sub> be<sub>nd</sub>xab xten Satanás te



gusacsni narä te di gacä te bennaro. <sup>8</sup> Chon huält agunabä lo Jesucrist xcuent ni'c, te guibicajni. <sup>9</sup> Niluxh laani najni loä: “Yälracnä j ni gunidxä salduxh luj, sa'csi ruzensa'cru xcälmilagwrä che xheti yälrutiplajz te bejn.” Ni'cni hueenru guiniä didxro sa'csi xhet yälrutiplazädi rapä, te guzen xcälrnibee Jesucrist lastoä. <sup>10</sup> Ni'cni rbedxilazä xheti xcälrutiplazä, rbedxizalazä rniyajreni narä, näjza che caquinä guiraloj, näjza che rdedä trabajw xcuent Jesucrist, sa'csi che xheti xcälrutiplazä, dxejc runiidx Dios yälndadip, yälndadaan loä.

*Yu' Pabl yärsia' xcuent guidoo ni yu' Corinto*

<sup>11</sup> Agucä si'c te bennayäl, lagajc la'tu bejntu nacä si'c. La'tu riäj j niniitu didxro, didxsa'c xcuentä, sa'csi gajdpac biädxädi, nadxagä loj reapost ni sajcro mase rut nacädi. <sup>12</sup> Redzuun ni benä la j ni guyu'ä lojtu, benäni si'c te ni najcpac apost, huinuutis benäni guideb nadolajz näjza reseen, näjza remilagwr. <sup>13</sup> ¿Xhi benä lojtu te naatu runä xhigab guxiiru sajctu loj guiraa reguidoo? Nani benätis najc dee: dina nutalä xtzuuuntu, nalajznu dina niniabä niacnä jtu narä si'c gucnä j narä reguidoo ni yu' garenca lajt. ¿Colsiäj j lajztu narä dojlre!

<sup>14</sup> Naj cayunä xhigab jiädhuiätu, naj gacni chon huält siälä. Di quilä xhixtentu, alga lagajc la'tu rguilä. Di rlazä gutalä xtzuuuntu. Di riäj j cuchee rebiuux meel par xcuzejnreni. Reguzajni ni riäj j cuchee meel par rexi'nreni. <sup>15</sup> Xhet najc di gunitä guiraa nani rapä, näjza lagajc narä sujiuxä, te laa xaimtu lo dojl. Palga chanälazäru la'tu, ¿la guxiiru chanälajztu narä, ä?

<sup>16</sup> Niluxh mase si'c najcni, di narä nutalä xtzuuuntu. Empac yu'reni canii basgueä la'tu sa'csi nadxällazä. <sup>17</sup> ¿Xhixh naatu cua'ä xhi xtentu sa'csi baxhalä rebejtzu lojtu, ä? <sup>18</sup> Che baxhalä Tito, räpä lojni chanääni stee bejtzu te jiädhuiireni la'tu. ¿Xhixh cua'ni xhi xtentu, ä? Xhixh et tejsi xhigab biennu, tebloj biennu dzuun guiro'pnu che guyu'nu lojtu.

<sup>19</sup> La jni cayoltu guiraa rediidxre, cayujntu xhigab canabnu jä j l ajztu, niluxh xhet si'cdini. Caniinu rediidxre nez loj Dios, caniizanu con xcälracnä j Jesucrist te si'c tioobrutu lo xtidx Dios, rebetzä nani rinälazä. <sup>20</sup> Sa'csi rdxebä andi che jiädhuiätu fiä ditu gac si'cni rlazä gactu, dxejtiru la'tu suhuiizatu dizana gacä si'cni rrajztu gacä. Rdxebä andi yu'tu ni cadij j, ni ruguij lajzni xhixten sa'ni, ni cadxe'ch lo sa'ni, ni cala' lo sa'ni, ni caniyaj sa'ni, ni cagutaj j diidx lo sa'ni; ni cayunnaro lagajc laani, ni cayujnza bie j. <sup>21</sup> Rdxebä andi che jiädhuiätu stehuält, gusanxtujy Dios narä xcuenttu. Rdxebäza sonduxhä xcuent xhidajltu nani abanijt, bejntu dojl galoo, luxh gajdtu gusiech lajztu xcuent xtojltu. Yu'tu ni di guiban naya, resnä jtu bejn ni di gac chäältu, yu'za balti dojl rujntu.

## 13

*Lult yälrlujdx xten Pabl*

<sup>1</sup> Naj gac chon huält siädhuiä la'tu. Guira'ti quej nanab cue'creni con xtidx tio'p o chon bejn ni najnpac xhi dojl bejn te jgani. <sup>2</sup> Mase ruti narä ro'c, arnixgä lojtu lagajc diidx ni guniä che guyu'ä lojtu ni barojp biälä lojtu, luxh rniä loj renani abejn dojl, näjza loj guiraatu, palga jälsacä, diruna gulaslazätu nicla te jtu, <sup>3</sup> sa'csi rrajztu fiipactu la guli runiidx Jesucrist yälrnibee loä te guiniä xtiidxni. Luxh Jesucrist dini guisisni xcuenttu, niluxh laani rustioobruni xtiidxni nen lastootu. <sup>4</sup> Guliicani che cuajni lo cruz, gacni si'c te bejn nani casis, niluxh naj nabajni sa'csi rapduxhni xcälrnibee Dios. Näjza nuure rsia'cnu si'c te bejn nani casisnä j laani niluxh nabannä jnu laani xcuent xcälrnibee Dios ni baniidxza Dios xcuenttu.

<sup>5</sup> Colninä j lastootu lagajc la'tu, colhui la guliipac ahuililajztu xtidx Dios; colhuisa'c xho najc lastootu. ¿La ditu gacbee rbä jz Jesucrist nen lastootu, ä? Palga rutini, rusqueetu lastootu, ditu nililajztu xtidx Dios. <sup>6</sup> Narä rlazä gacbeetu, dinu nusguee lastoonu, ahuililajzpacnu xtidx Dios. <sup>7</sup> Rniabä loj Dios na'c guntu cosguijdx, xhet te guiniidi bejn didxsa'c xcuentnu, alga te la'tu guntu recossa'c, mase guiniireni et laadi cayunä narä.



<sup>8</sup> Sa'csi xhetliidi rajc di riennu te nitloj didxgulii, xcälrnibeenu najc te gusule'nu didxlii.

<sup>9</sup> Ni'cni rbaa lajznu che casisnu, niluxh la'tu nadip, nadaantu; rbejdx-rniabzanu lo Dios guiza' xcälrlilajztu lo xtidx Dios. <sup>10</sup> Rucuaä reguijtzre lojtu che gajdna jiälä, te che jiälä na'c tilnäätu si'cpacni nungäjil tilnäätu xcuent yälrnibee ni baniidx Dad Jesucrist loä, te gac tioobrutu lo xtidx Dios, xhet te nitditu.

<sup>11</sup> Ni'cni rbejtznu, colguibalajz, colhuii guisa' xcälrlilajztu, colcuedxli lajztu, colyenäj sa'tu tejsi xhigab, dxitis gubajñ. Dios xten yälrinälajz näjza yälrbecdxi lajz chunäj la'tu. <sup>12</sup> Colñii: "Xchan" lo resa'tu. <sup>13</sup> Guiraa rebejtznu nani ahuililajz ruxhal xtixtios lojtu.

<sup>14</sup> Yälracnäjä xten Dad Jesucrist, näjza yälrinälajz xten Dios, näjza yälracnäjä xten Sprit Dhan chu neñ lastootu. Sugacni si'c.

## Te Guijtz Lo Rebeñ Gálatas

*Pabl rucuaa guijtz loj rebeñ* guidoo nez región Galicia

<sup>1</sup> Narä, Pabl, nacä apost xten Jesucrist. Xhet rebeñdi baxhal narä, xhetza beñdi gule narä. Lagajc Jesucrist näjza Xtradni Dios ni yu' xhaguibaa, nani guläs Jesucrist loj rebengut, laareni agulereni narä. <sup>2</sup> Narä, näjza guiraa resa'nu nani yunäj narä, rucuaanu guijtzre lo rebeñ guidoo ni yu' nez reguedx Galicia. <sup>3</sup> Xca' guejbtu xcälracnäj Dios con xcälrbexilajz xten Dios xtradnu näjza xten Dad Jesucrist. <sup>4</sup> Lagajc laani cuäjbnj gujtni te guslaani nuure lo dojl xten guedxliuj guijdxre, si'cni gunibee Xtradnu, Gueb-Dios. <sup>5</sup> Chä'p xpala'n Dios par tejpas. Sugacni si'c.

*Xhetdi xhi stee didxcoob ni sajc guslaa* nuure

<sup>6</sup> Rdxeloduxhä lacti riojb cabälaztu Dios ni gurejdx la'tu con xcälrinälajz Crist, luxh naj cagusoobtu ste'ca diidx. <sup>7</sup> Xhetdi stee diidx ni sajc guslaa nuure lo dojl. Yu'reni rlajz gusiejchreni lajztu con ste'ca diidx, rlajzreni guchaareni xtidx Jesucrist. <sup>8</sup> Niluxh palga jiaäd chu jiaädluii lojtu ste'ca diidx ni ruslaa beñ lo dojl, niluxh di diidxga gac si'c najc diidx nani abaluiinu lojtu, beñga agubibdeni, chutis najcnu, mase naräni, mase te xangl Dios ni jiaäd xhaguibaali. <sup>9</sup> Si'c ni guniä lojtu, si'c rnisacä lojtu naj: Pal yu' chu jiaädluii lojtu ste'ca diidx ni ruslaa beñ lo dojl, luxh di diidxga gac si'c najc diidx nani abaluiinu lojtu, beñga agubibdeni.

<sup>10</sup> ¿Xhi naatu? ¿La rlazä guinisa'c beñ xcuentä o la rlazä guinisa'c Dios xcuentä, ä? ¿La rlazä guspaä lajz beñ, ä? Paru rlazä guspaä lajz beñ, digacdi gacä xmos Jesucrist.

*Xtzun Pabl*

<sup>11</sup> Colyabee sa'ä, diidx ni ruslaa beñ lo dojl nani abasule'ä lojtu di diidxga gac xhigab beñ guedxliuj. <sup>12</sup> Xhet lojdi beñ guedxliujdi cua'äni, rutza baluiidini löä, niluxh lagajc Jesucrist baniidx xtiidxni löä.

<sup>13</sup> Anajntu xho gucä, xho gubanä galoo che rusobätis rexleii toMoisés. Dxejc basacsíduxhä rebeñ guidoo ni huililajz xtidx Jesucrist, si'c benä te rlazä nitlojreni. <sup>14</sup> Loj reni rusoob xleii toMoisés narä cagusobäru xtiidxni, nanduxhäru loj guiraareni. Loj rebeñ nani sadxagä ladxä, maazru sanälazä xcostumbr retoxtadgoldöä. <sup>15</sup> Dios gule narä, guleni narä cheni nuuli xnanä narä, gurejdxni narä sa'csi sanälajzni narä. <sup>16</sup> Dxejc bibalajz Dios baluilojni Xi'nni Jesucrist löä te guiniä xtiidxni xcuent xho ruslaani beñ lo dojl loj reni di gac xpeñ Israel. Che gujc si'c rut lojdi huiye'tzä. <sup>17</sup> Niclaza nia'ä guedx Jerusalén loj reni ganid gujc apost löä. Alga hua'a nez reguedx Arabia, dxejcti gubisacä guedx Damasco.

<sup>18</sup> Che agudejd si'cti chon ijz, dxejcru hua'a guedx Jerusalén te biembeä Pedr, dxejc biannäni tzun-gubijdx. <sup>19</sup> Niluxh dina nuhuiä loj chu stee apost ro'c. Lojtis Jacob, betzhuin Jesucrist bahuiä. <sup>20</sup> Rniliä nez lo Dios, dina guiniä didx-xhii, rediidx ni cacuaä najc guliipac.

<sup>21</sup> Dxejcti hua'a reguejdx xten Siria näjza Cilicia. <sup>22</sup> Resa'nu ni yu' neñ xquidoo Crist guideb nez reguedx Judea, direni gumbee narä. <sup>23</sup> Riejntis diajgreni: “Beñ nani basacsíduxh nuure agujc xchej, abejnga caguluiini xcuent lagajc xcälrililajz nani galoo rlajzni nunitlojni.” <sup>24</sup> Dxejc rliä'preni xpala'n Dios sa'csi huililazäza xtiidxni.

## 2

*Bidxaag Pabl loj reapost*

<sup>1</sup> Che agudejd tzudaj ijz, dxejcru hua'a guedx Jerusalén con Bernabé, näjza Tito huinänu. <sup>2</sup> Gunii Dios löä, gunibeeni cha'a ro'c te gusule'ä xho huililajz rebeñ ni di gac xpeñ Israel xtidx xcuent Jesucrist ni ruslaa lo dojl. Niluxh lojtis reni rnibee guidoo

basule'ä diidx, te di xlia'si benä dzuun, o te di xlia'si gunäru dzuun. <sup>3</sup> Sanää Tito, te ben griegw ni di gac xpejn Israel. Nicla lojni direni niäjb chuni bee si'c caj lo leii xten Moisés. <sup>4</sup> Niluxh gaii bejn ni rujnsi si'cni najcreni sa'nu, bidxaagreni loonu te gula'tzreni xho rajnnu Dios. Rdx'e'chreni sa'csi nuunu, rexpejn Jesucrist, dinu jienru si'c ni bejn retoxtadgoldoonu. Laareni rlajzreni guxhiidreni nurnu, rlajzreni gusoobnu rextiidxreni. <sup>5</sup> Dipacnu nicäjb nucuadiajgnu xtiidxreni, sa'csi rlaaznu chanuu chalilajztu xtidx Jesucrist nani ruslaa bejn lo dojl.

<sup>6</sup> Niluxh reni sajc, nalajznu reni rnibee reben guidoo ro'c, xhet te didxcoobdi guniireni loä. (Luxh par narä xhet najc di mase bensajcreni, sa'csi Dios runtebloj guiraa bejn.)

<sup>7</sup> Luxh bahuiireni abaniidx Dios xtidx Jesucrist loä, luxh rusule'äni loj rebenzijt te guibicaj xtojlni, sigajcni rusule' Pedr xtidx Jesucrist loj rexpen Israel nani rujnpac si'c ni caj lo leii. <sup>8</sup> Lagajc Dios nani badeed bejn Pedr dzuun xte apost loj rexpen Israel, lagajcza Diosre baniidx gunä dzuun, te gacä apost loj rebenzijt nani di gac xpejn Israel.

<sup>9</sup> Ni'cni Jacob, Pedr, näjza Juan nani najc benroru nen guidoo xten Jesucrist, gucbeereni laa Dios ni cayacnäjä narä. Dxejc baniidxreni naareni loä näj lo Bernabé si'c te seen rbalajzreni, te chonnu guiro'pnu loj rebenzijt. Niluxh laareni chanuureni gusule'reni loj rexpen Israel. <sup>10</sup> Gunabtsreni loonu gacnäjnu rebejn ni xhet rajpdi, luxh ni'cza rlazä gunä.

*Pabl gudi*lnäj Pedr lo guedx Antioquía

<sup>11</sup> Che biääd Pedr lo guedx Antioquía, gudilnäáni, sa'csi abejnni dojl xhet laadi cayujnni. <sup>12</sup> Galoo gudaunäjni rebenzijt, luxh che bidzujn gaii xpejn Israel ni baxhal Jacob, dxejcti gubicajni lo rebenzijt, diruni niaunäjreni sa'csi bidxejbni rexpejn Israel ni ru' bee ni bidzujn ro'c. <sup>13</sup> Dxejcti sigajcza bejn guiraa rexpejn Israel ni nadxaag Pedr, gujcreni sigajc Pedr, runtio'p lajzreni, naareni gusgueereni. Näjli Bernabé bejn si'c. <sup>14</sup> Luxh che bahuiä direni gun si'cpacni najc xtidx Jesucrist, dxejc räpä loj Pedr nez loj guiraa reben guidoo: "Palga luj najclu te xpejn Israel, luxh nabajnlü si'c rebenzijt ni digac xpejn Israel, xhet si'c di ni caj loj leii, ¿xhicuent rlajzlu guinibeelu guibajñ rebenzijt si'c rexpejn Israel nani rusoob xleii to Moisés?"

*Nungäj*l chalilajz rexpejn Israel, sigajc guiraa bejn, te guibicaj xtojlni

<sup>15</sup> Nuure najcnu rexpejn Israel cheni gojllinu; dinu gac ben dojl si'c najc rebenzijt. <sup>16</sup> Anadonnu rut chu tejti bejn sajc guibicaj xtojlni che gunni si'cni caj lo leii, sa'csi nanab chalilajznu xtidx Jesucrist. Ni'cni biolilaaznu xtidx Jesucrist te jia xtojlnu sa'csi rililajznu, xhet sa'csi riennu si'cni caj loj leii. Di gacdi jia xtojñ bejn xcuent yälrusoob xleii to Moisés.

<sup>17</sup> Palga lañ ni rlajznu jia xtojlnu xcuent xcälrlilajz xtidx Jesucrist, ruhuiinu cayenrunu dojl, la sajc guiniinu: Jesucrist rulüi rienrunu dojl, ¿ä? ¿Xho gacni si'c! <sup>18</sup> Palga rlazä gunsacä redzuun nani abaro'nä, lagajc narä rapä dojl nacä ben dojl. <sup>19</sup> Niluxh xcuent leii, anacä si'c bengut: digacdiru guinibee leii narä sa'csi naj nabanä lo xnejz Dios. Luxh lagajc leii bejn nacä si'c bengut che gucbeä di gacdi gusobä guiraa ni caj lo leiiga. <sup>20</sup> Najcni si'cni gutnäá Crist lo cruuz. Naj xhet narädi ni nabanä, laa Crist ni nabajñ nen lastoä. Yäl nabajñ ni nabanä naj lo guedxliujre nabanä sa'csi rililazä xtidx Xi'n Dios nani rinälajz narä luxh gujtni te gudijxni xtoñä. <sup>21</sup> Dina cuälazä xcälrlulasajz Dios. Paru sajc gudzucaj leii xtojñ bejn te gacreni bennaya nez loj Dios, dxejc xlia'si gujt Jesucrist.

### 3

*Yälrlilajz rusia dojl*

<sup>1</sup> ¿Chipsa nayäältu ben Galacia! ¿Chu bascäjyту te di cuadiajgtu xtidx Jesucrist? Ni nez lojpactu bisule'nu diidx xho cuaj Jesucrist lo cruuz. <sup>2</sup> Tejtis diidx rlazä guiniitu loä. ¿La cua'tu Sprit Dxan xten Dios sa'csi bejntu si'cni caj lo leii, ä? o ¿la sa'csi huililajztu diidx ni biejn diajgtu? <sup>3</sup> Chipsa nayäältu. Acua'tu Sprit Dxan xten Dios dxejcti naj rlajzntu guntu ni riajbtis yejctu guntu. <sup>4</sup> ¿La xlia'si gudejdtu trabajw? Chugan la gulii xlia'sini. <sup>5</sup> Che

runiidx Dios Sprit Dxan xtenni lojtu, che rujnni milaagwr nez lojtu, ¿xho rujnnini? Dini gunni sa'csi rujntu si'cni caj lo leii, rujnnini sa'csi rililajzto xtiidxni ni riejn diajgtu.

<sup>6</sup> Huililajz toxtadgoldoonu Abram xtidx Dios, ni'cni cua' Diosni si'c te bejn nani naya lastooni. <sup>7</sup> Ni'cni colyacbee dee: renani rililajz xtiidx Dios najc xi'n toAbram. <sup>8</sup> Galooli najn Dios xcuent yárlililajz susia Dios lastoo rebenzajt, ni'c rájpní lo Abram: “Guiralii reben guedxliuj sacle' xcuentlu.” Diidre cuaj lo guijtzt ni gujc galooli, cadre caj xtidx Dios. <sup>9</sup> Ni'cni reni rililajz naj agucnäj Diosreni sigajc gucnäjni toAbram nani huililajz.

<sup>10</sup> Guiraa reni rlajz guibajreni gunreni si'cni caj lo leii, agubibdereni sa'csi scree caj lo leii: “Guiraa reni digunpac si'cni caj lo reguijtz xten leii, sucuibdereni.” <sup>11</sup> Niluxh huenliisi rien rut nayadi nez loj Dios xcuent leii, sa'csi dee najc xtidx Dios: palga rililajz te bejn xtidx Dios, najcni te bennaya nez lo Dios, nabannäjni Dios xcuent xcárlililajzni. <sup>12</sup> Leii dini naa chalilajz bejn te xca'ni yálnabajn. Scree caj lo leii: “Nani gunpac si'cni caj loj reguijtz xten leii, ni'c nanab guibajn lojpac leiiga.”

<sup>13</sup> Jesucrist badzucaj nuure loj yárbibde xten leii. Laani gubibdeni xcuentnu sa'csi xtidx Dios naj: “Anabibde te bejn ni najl loj te yajg.” <sup>14</sup> Scree gusajc Jesucrist te gusojb diidx ni rájpní Dios loj toAbram, sacnäjni guiraa rebenzajt; nájza te guiraanu ni chalilajznu xtidx Jesucrist xca'nu Sprit Dxan xten Dios.

#### *Leii näj diidx ni bia'n Dios loj toAbram*

<sup>15</sup> Betzá, naj gusá'tä te diidx xcuent bejn guedxliuj. Cheni rujn bejn te guijtzt te jia'n diidx lo stee bejn, mase bejntis najcreni, che abacuaani lajni lo guijtztga, rut sajcdi gudzucaj guijtztga. Rutza sajcdi gucuaaru diidx lojni che anajcni. <sup>16</sup> Luxh anajnnu badeed Dios xtiidxni loj toAbram nájza loj xagdooni. Dini ninii “rexagdooni” si'c loj xhidajlreni, guniini lo tejtis xagdooni, luxh laani najc Jesucrist. <sup>17</sup> Diidx ni rlazä guiniä najc scree: Diidx nani bia'npac Dios loj toAbram gunii Diosni che cayäädx tajp gayuu galbitzúu ijz gudeedni leii lo Moisés te laani gudeednini loj rexpejn Israel. Niluxh di leiiga nuchaa diidx ni bia'n Dios loj toAbram, lajtis sajcdi. <sup>18</sup> Paru naquiin leii te xca' bejn erens, dxejc xhet erensdi cua' Abram lo Dios. Niluxh basa'n Dios erens lojpac Abram sa'csi bia'nni diidx lojni galooli.

<sup>19</sup> ¿Xhicuent badeed Dios leii loj Moisés? Badeed Dios leii sa'csi benduxh rexpejn Israel dojl, te gabeereni xho najc xtojlni, la ni jiääd nani najc xagdoo toAbram. Sa'csi bia'n Dios diidx con laani sigajc con toAbram. Rexangl Dios badeed leii loj toMoisés, te laani gujc si'c te bejn ni rusiäjlni diidx. <sup>20</sup> Te ni rusiäjlni diidx xhet par tejtis bejnndi najcni, niluxh Dios tejtis najc.

#### *Xcuent leii*

<sup>21</sup> ¿La garenca najc xleii Moisés lo diidx ni basa'n Dios loj toAbram, ä? ¿Xho gacni si'c! Paru nica'nu te leii ni rajc rudeed yálnabajn, dxejc sii xcuent leiiga nica' bejn yálnabannaya. <sup>22</sup> Niluxh loj reguijtz xten Dios caj diidx ni rnii: Guiraa bejn niäuu nen dojl, te reni chalilajz xtidx Dios si'c huililajz toAbram, reni'c xca' xcárlililajz diidx xcuent Jesucrist si'cni bia'n Dios diidx loj toAbram.

<sup>23</sup> Che gajd xcárlililajz xcuent Jesucrist jiääd, dxejc basäuu leii nuure nen dojl, cabäjtisnu guiricaj xcárlililajz xcuent xtidx Dios. <sup>24</sup> Ni'cni anajc leii si'c xmastrnu te guluini nuure nezyuj nez lo Dad Jesucrist te gusiani xtojlnu con yárlililajz xtiidxni. <sup>25</sup> Niluxh naj sa'csi arajpnu yárlililajz xcuent xtiidxni, dirunu guiquiin te mastr, nalajznu leii.

<sup>26</sup> Guiraatu najctu xi'n Dios xcuent yárlililajz xtidx Jesucrist, <sup>27</sup> sa'csi guiraatu ni gurobnistu loj xtidx Jesucrist, najctu rexpejn Jesucrist. <sup>28</sup> Naj rutiru rexpen Israel niclaza rebenzajt, niclaza mos, niclaza bejntis, niclaza niguii, niclaza gunaa, sa'csi guiraanu najcnu tebloj nez lo Jesucrist. <sup>29</sup> Palga najcnu xpejn Jesucrist, dxejc guliipac najcnu xi'n toAbram, dxejc sica'nu yálnasa'c ni abia'n diidx gudeed Dios loj Abram.

## 4

<sup>1</sup> Mbaj naj. Nani xca' yálnasa'c, che najcni biuux, najcni sigajc te mos, mase xtenni gac guiraa xhixten xtadni. <sup>2</sup> Yu' chu te bejn ruhuiini, yu'za chu rnibee xhixtenni cheni agurooblina, cheni guidzujn dxej xca'ni ni gudeed xtadni. <sup>3</sup> Sigajcza nuure che gucnu si'c biuux guyu'nu gucnu mos loj releii, rnibeeni xhini'c digacdi jienno lo guedxliuj. <sup>4</sup> Niluxh che bisa' dxej ni basoob Dios, baxhal Dios Xi'npacni. Xi'n te gunaa gojlni, loj rexpejn Israelza biädjiäjlni, basoobni leii xten toMoisés. <sup>5</sup> Si'c gujc te xcasacni reni rusoobpac leii, te xca'ni nuure gacnu si'c te xpsiäjbn.

<sup>6</sup> Luxh sa'csi anajctu xi'nni, ni'c baxhal Dios Sprit xten Xi'nni te cuääzni nen lastoonu. Laani rniini lo Dios xcuentnu: “Guejblu, Xtadnu.” <sup>7</sup> Ni'c dirunu gac mos, sa'csi anajcnu xi'nni. Luxh palga najcnu xi'nni, suniidxza Dios yálnasa'c loonu xcuent Dad Jesucrist.

*Rulijdxni na'c gacsac bejn mos*

<sup>8</sup> Che gajdtu gumbee Dios najctu mos xten rebanäjb ni rajntu si'c Dios luxh dipacreni gac Dios. <sup>9</sup> Luxh naj anumbeetu Dios o naj anumbee Dios la'tu, xho chachusactu loj redzuun ni guyu'tu galoo che gujctu mos xten rebanäjb. <sup>10</sup> Cayutistu redxej, rebäii, retiemp, reijz. <sup>11</sup> Naj rdxebä andi xlia'si gudedä trabajw baluiätu.

<sup>12</sup> Rniabduxhä lojtu betzä, colyajc si'c narä, sa'csi narä ahuililazä xtidx Jesucrist sigajc la'tu. Xhetza xhi dzunguijdxdi bejntu loä che guyu'ä lojtu. <sup>13</sup> La'tu anajntu galoo che basule'ä diidx xcuent Jesucrist lojtu, benäni sa'csi racxhuu tiexhä. <sup>14</sup> Dizatu nuze' niclaza nibälajztu narä xcuent yälracxhuu ni rajc tiexhä, alga si'c te xangl Dios, si'c lagajc Jesucrist cua'tu narä. <sup>15</sup> ¿Con yälrbalajz xtentu ni gojptu dxejc? Niluxh rniä lojtu, paru niajc nibäätu balojtu, nuniidxtuni loä dxejc, si'c niujntu. <sup>16</sup> Naj ¿la rdxe'chtu loä sa'csi caniä didxlii lojtu, ä?

<sup>17</sup> Naj yu' gaii bejn nani rujnsi si'cni sanäreni leii rujnsireni si'cni rinälajzreni la'tu. Niluxh rrajzreni gudzucajreni la'tu te gusaantu xtidxä, te chanajltu laareni, te jiutu xtiidxreni. <sup>18</sup> Laaca chanälajz bejn sa'ni, niluxh na'c gusgueeni, na'cza che suganääsi la'tu chanälajztu narä. <sup>19</sup> Rexi'nä, xcuent la'tu cadedä trabajwduxh si'c te gunaa ni rajl xpäzni, luxh sinuu sidedä trabajw cheni arbäjzpacli Jesucrist nen lastootu. <sup>20</sup> Maläii gac jialä lojtu lagajc naj te gac guiniä xhi stee diidx. Niluxh naj zijt yu'ä, dina gacbeä xhi xhigab gunä xcuenttu.

*Diidx xcuent Agar näj Sara*

<sup>21</sup> Colguinii loä, la'tu ni rrajz gun si'cni caj lo leii, ¿la ditu gacbee, la di diajgtu jiejn xhini'c caj lo leii, ä? <sup>22</sup> ¡Coljiejn! Scree caj loj leii: guyu' tio'p xi'n toAbram. Tejni najc xi'n gunaa ni najc xmos Sara. Steeni najc xi'n chäälpacni. <sup>23</sup> Niluxh xi'n xmosni gojl sa'csi lagajc laani bejn xhigab si'c chu xi'nni. Luxh xi'n chäälpacni gojl sa'csi si'c bia'n Dios diidx loj Abram. <sup>24</sup> Diidx xcuent regunaare najc si'c diidx ni ruluii. Regunaare najc si'c tio'p diidx ni bia'n Dios. Agar najc mos, mosga najc si'c diidx ni bia'n Dios con Moisés lo dan Sinaí. Rexi'n mosga guyu' te gacreni mos lo leii. <sup>25</sup> Agar najc si'c dan Sinaí nez lo reguejdx xten Arabia. Luxh guedx Jerusalén najc si'c dan Sinaí, sa'csi naj ro'c najc cadre re' rexpejn Israel con rexi'nreni, sanäreni leii. <sup>26</sup> Niluxh di guedx Jerusalén ni yu' guibaa gac si'c mos, luxh nuurnu najcnu xi'nni. <sup>27</sup> Scree caj loj xtidx Dios:

Bibalajz, luj gunaa ni gajd xi'nlu chu,

guredxa', bibalajz,

luj ni gajdlu ted trabajw ni rdej gunaa che rajl xi'nni.

Sa'csi su'ru xi'n gunaa nani gulälajz chäälni quela xi'n gunaa ni gudiesnä j chääl stee gunaaga.

<sup>28</sup> Mbaj naj, rebetzä, nuure, sigajc Isaac, najcnu xi'n toAbram nani chu si'cni bia'n Dios diidx loj toAbram. <sup>29</sup> Che gojl xi'n gunaa ni najc mos, ni gojl sa'csi lagajc laani bejn xhigabga, bidxagdijlni xi'n chäälpac Abram nani gojl xcuent diidx ni bia'n Dios loj Abram. Sigajcza najcni naj. <sup>30</sup> ¿Xhi caj lo reguijtz? “Barilaagw gunamos näj xi'nni, te di xca' xi'n gunamos yálnasa'c xtenlu si'c ni xca' xi'n gunaa nani najc chäälpaclu.” <sup>31</sup> Naj

nuure, betzá, dinu gac si'c xi'n gunamos te chunu lo leii. Nuurnu najcnu si'c xi'n gunaa nani najc cháälpac toAbram.

## 5

**Colguzutijp lajztu lo yárlililajz xtidx Dios**

<sup>1</sup> Colgusutijp lajztu lo xtidx Dios nani baniidx Jesucrist loonu sa'csi guliipac gulää Jesucrist nuure ladznaa leii, badzucajni xtojlnu che huililajznu xtiidxni, ni'cni na'cru gusiejch lajztu te gacsactu mos ladznaa leii.

<sup>2</sup> Narä Pabl rniä lojtu, palga la'tu chutu bee si'cni caj lo leii, dxejc xlia'si chalilajztu xtidx Jesucrist. <sup>3</sup> Rniäza stehuält, guiraa bejn nani rlanjpac chu bee, nanab gunni si'cpac ni caj lo leii. <sup>4</sup> Palga rlanjtu guntu redzuun ni caj lo leii te guibicaj xtojltu, dxejc agubicajtu lo Jesucrist, agubicajzatu lo xcälracnäj Dios. <sup>5</sup> Niluxh nuure xcuentpac Sprit Dyan xten Dios rililajznu gudijx Jesucrist xtojlnu lo cruzj, cayenloonu jiädsacni te guniidxni yälbansa'c par tejpas loonu. <sup>6</sup> Sa'csi loj reni rililajz xtidx Jesucrist xhet sajcdi chu bejn bee, xhetza sajcdi na'c chu bejn bee, nani saj najc chalilajz bejn xtidx Dios. Yárlililajzga rujn guibansa'cnu te chonälajznu resa'nu.

<sup>7</sup> La'tu laaca sasajtu. ¿Chu badxojn gusoobtu xtidxlii Dios? <sup>8</sup> Xhet Diosdi ni guletu badxojnditu. <sup>9</sup> Anajntu tudxe'nsi cobgulaj rusaguijni yätxtiil; si'c te cobgulajga najc te niguii ni caguluiitu xtidx leii. <sup>10</sup> Rialilazä xtidx Dad Jesucrist, ni'c nadiplazä la'tu; ananá ditu chalilajz stee diidx. Niluxh bejn ni cagusgueetu susacsí Diosni, chutis najcni.

<sup>11</sup> Narä rebetzä, paru narä caguluiä chutu bee, si'c ruluii rexpejn Israel, ¿xhi xcuent rusacsí rexpejn Israel narä? Paru si'c caguluiä, dirutu chalilajz gudijx Jesucrist xtojlnu lo cruzj. Luxh si'cpacza rlanjzreni. <sup>12</sup> Rebejn nani cagusgueetu caniireni chutu bee, ¡malaiiza gutiuugreni tejpas lagajc tiejxhreni!

<sup>13</sup> La'tu rebetzä, agurejdx Diostu loj xtiidxni te chalilajztu Jesucrist ni ruslaa bejn lo dojl. Colhuixгаа na'c xca'tistu rediidxga dxejcti guntu si'ctis ni rlanj tiejxhtu, si'ctis ni riabza yejctu. Colgacnäj sa'tu con yárlinälajz, tejni sigajc steeni. <sup>14</sup> Sa'csi guiraa diidx ni caj lo leii con tejtis diidxre rsiojbn: “Chanälajztu sa'tu sigajc rinälajztu lagajc la'tu.”

<sup>15</sup> Palga rdijltu, rauya'tu sa'tu, rajwtu sa'tu, ¡colnatiro! Andi lagajc la'tu gunijttu sa'tu.

**Nani rchaglajz rebejn näj yäl nabajñ ni rudeed xtidx Dios**

<sup>16</sup> Rniä lojtu, colguibajñ si'c ruluii xtidx Dios näjza Sprit Dyan xtenni, te si'c na'c guibajntu si'ctis ni rlanj tiejxhtu, si'c ni najctis xhigabtu. <sup>17</sup> Sa'csi ni najc xhigab xten bejn rdxe'ch loj xhigab Sprit Dyan xten Dios. Sigajcza xhigab xten Dios dini gac tebloj con xhigab xte bejn. Rudxojntu loj sa'tu, ni'cni digacdi guntu dzuun ni rlanjtu guntu. <sup>18</sup> Luxh palga cagulijdx Sprit Dyan la'tu, dxejc dirutu quiquiin guntu si'c ni caj lo leii.

<sup>19</sup> Guyasi jiembee bejn xhireni'c najc redzuun ni rujn rebejn nani di gumbee xtidx Dios. Dee najc redzuunga: yálruguee cháäl bejn, yálruguee cháäl sa'reni, yálruguee sa'ni che ruchaag sa' te dxa'p con te bi'n loj redolguijdx, guiraa redolguijdx ni rujn niguii con gunaa, <sup>20</sup> yálrajn rebanäjb, yälbidxaa ni rujn daan bejn, yälrdxechlajz loj sa'ni, yälrchagdijl sa'ni, yälneyedx lo sa'ni, yälrdxecha', yälriu lagajctis laani, yälrlia' lo sa'ni, yälrchaag lo te cuaa bejn. Najza sa' dzunguijdxre rujnreni: <sup>21</sup> yälrdxe'ch lajz, yälругu't sa'ni, yälrsiojz, yälrauxha't, näjza guiraa dojl sa' redee. Sigajc ni balidxä la'tu xhi dxejga rulidxä la'tu naj. Nani rujn sa' redojlre direni jiu' loj xcälrnibee Dios xhaguibaa.

<sup>22</sup> Niluxh xtzuun Sprit Dyan xten Dios najc yárlinälajz sa'ni, yälrbalajz lastooni, yälrbedxi lajzni, yälrbecdxi lajz sa'ni, yäl najc bensa'c lo chutis bejn, yäl nagodzlajz, yárlililajz, <sup>23</sup> yäl nadolajz, yälrnibee lastooni lo ni rlanj gun tiejxhni. Xheti te leii ni rudxojn gun bejn sa' redzuunre. <sup>24</sup> Niluxh renani ahuililajz xtidx Jesucrist, abatío'ñreni guiraa redolguijdx ni rlanj gun tiejxhreni. <sup>25</sup> Palga rbäjz Sprit Dyan nen lastoonu, do'o guibajñ si'c rnibee Sprit Dyan guibajñnu.

<sup>26</sup> Na'c guiliä'pnu lagajc xpala'nnu, na'c guidxech lajznu lo sa'nu, na'c gunembiidnu sa'nu.



## 6

## Colgacnäj sa'tu

<sup>1</sup> Sa'ä, palga chu tejtu ni abiajb nen dojl, lagajc la'tu nani aracheetu xtidx Dios colgulijdx bejnga, colgacnäjni te guiriini nen dojl. Colnii lojni nadolajz, nasinlajztu lagajc la'tu didi che guidon nägajcza la'tu jiajbtu nen dojl. <sup>2</sup> Colhuii xhi rquiin resa'tu, colgacnäjreni te si'c gusoobtu guiraa rediidx ni najc leii xten Jesucrist.

<sup>3</sup> Sa'csi nani rujn xhigab sacduxhni, yu'za chu najcni, niluxh rut najcdini, rusgueeni lagajcsi laani. <sup>4</sup> Tejgatu colcube xho najc xtzuntu te fiitu la laaca najcni, dxejcti sajç guiliä'ptu lagajc xpala'ntu. Dxejc ditu guiquiin chu stee bejn guiliä'p xpala'ntu. <sup>5</sup> Sa'csi tejga bejn susule'ni diidx lo Dios xhini'c bejn.

<sup>6</sup> Nani casieed xtidx Dios nanab gacnäj bejn nani ruluiini, gudeedni tudxe'n xhixtenni loj nani ruluiini.

<sup>7</sup> Na'c gusgueelu lagajc luj. Dios digacdi guigueeni, ni'c guira'ti dzuun ni rujn bejn lagajcza ni'c xca' bejn. <sup>8</sup> Paru te bejn gun dzuun xcuenttis tiejxhni, dxejc che guidzujn dxej xca'ni yálnasa'c, sinitloj tiejxhni, dizani jiu' loj xcälrnibee Dios. Palga te bejn gun dzuun xcuent Sprit ni badeed Dios lojni, che gal yálnasa'c, sica'ni yálnabajn par tejpas. <sup>9</sup> Ni'cni na'c guidxajgnu jiennu dzunsa'c te che guidzujn dxej ni xca'ni yálnasa'c, xca'zanu te yálnasa'cro. <sup>10</sup> Ni'cni nanab laj ni sajçni, gacnäjnu chutis bejn, ganiddoo resa'nu ni ahuililajz.

## Yälrulijdx näjza xtixtios

<sup>11</sup> Colhuilaa lacti reletrduxh cacuaä lojtu con naápac. <sup>12</sup> Guiraa reni rdxaglajz gun ni rlajztis tiejxhni, laa reni'c ni rlajz chutu bee, tedi tedreni trabajw xcuent ni cuaj Jesucrist lo crujz. <sup>13</sup> Lagajc reni ru' bee direni gun si'cni caj lo leii, niluxh rlajzreni chutu bee te guibaa lajzreni sa'csi bejnreni gaan guyu' beega tiejxhtu. <sup>14</sup> Luxh narä dilazä guibaa lo sa' recosga; rbaatis lazä sa'csi gujt Jesucrist, cuajni lo crujz, te gudijxni rextojlnu. Ni'cni par narä xhetru xhi cos-guijdxdi yu' lo guedxliujre, diruna guichaglazä gunä redolguijdx xten guedxliujre. <sup>15</sup> Che ahuililajz te bejn xtidx Jesucrist, xhetru sajçdi chu bejn bee, xhetza sajçdi na'c chu bejn bee. Nani sajçtis najc gacni si'c te bencoob lo xtidx Jesucrist. <sup>16</sup> Guiraa renani nabajn si'cni ruluii xtidx Jesucrist sibedxi lajzreni xcuent xcälrulaslajz Dios. Näjza rexpenn Israel nani ahuililajz xtidx Jesucrist sibedxi lajzreni.

<sup>17</sup> Na'cru guche'chtu narä sa'csi redib ni yu' tiexhä najc si'c te seen narä anacä te xmos Jesucrist.

<sup>18</sup> Rebetzä, gacnäj Dad Jesucrist guiragajctu con Sprit Dxan xtenni. Sugacni si'c.

## Te Guijtz Lo Reben Efesios

*Bacuaa Pabl lo reben* guidoo nen guedx Éfeso

<sup>1</sup> Narä, Pabl, nacä apost xten Jesucrist sa'csi si'c rlajz Dios. Cacuaä guijtzre loj rebejn nani huililajz xtiidxni, loj reni rujn si'cpac rniini nen guedx Éfeso. <sup>2</sup> Xca'tu yälracnäjä, yälrbexi lajz xten Xtdnu Dios, näjza xten Dad Jesucrist.

*Rusule' Pabl xtidx Jesucrist*

<sup>3</sup> Rliä'pnu xpala'n Dios, Dad näj Xtd Jesucrist. Dios racnäjä nuure, xcuent Crist rniidxni guiraa reyälracnäjä xca' lastoonu, astoo yu'lanu xhaguibaa. <sup>4</sup> Laani gule nuure, che gajdli guirixtiej guedxliujre, te gacnu xpejnüni, te guibannayanu nez lojni con yälrinälajz. <sup>5</sup> Sigajcza anungäjil xca'ni nuure te gacnu si'c xi'npacni sa'csi abiääd Jesucrist te guslaani nuure nen dojl, si'c ni gunibee Dios sa'csi balaslajzni nuure. <sup>6</sup> Gucnäjä Dios nuure te guiliä'pnu xpala'n Dios, sa'csi lagajc laani acua'ni nuure, abejnini nuure tejsi con xi'nni ni sanälajzni. <sup>7</sup> Laani baslaani nuure nen dojl xcuent xtiejnüni, laani badzucajni xtojlnu xcuent xcälruslaslajzni <sup>8</sup> nani banidxduxhni loonu. Guideb yälnejn, guideb xcäriejn <sup>9</sup> basule'ni loonu xhigab xhiga'tzni xcuent redzuun ni rlajzni gunni, xhigabza ni bejnini galooli. <sup>10</sup> Luxh sidzujn dxej sisiojbpac xhigab ni bejn Dios. Che guidzujn dxejga sutojp Dios guiraali, sudeedni guinibee Jesucrist guira'ti ni yu' xhaguibaa, sigajc recos ni yu' lo guedxliuj.

<sup>11</sup> Arajpnu te xcäl'nasa'c Jesucrist, sa'csi galooli bejn Dios xhigab guniidxni yäl'nasa'cga. Lagajc Dios benchee guira'ti ni yu', luxh rujnpacni nani abejnini xhigab najc laaca gunni <sup>12</sup> te guiliä'p bejn xpala'n xcäl'nibeeni xcuentnu, nani ganiddoo biolilaaznu xtidx Jesucrist. <sup>13</sup> Näjza la'tu, che biejn diajgtu redidx gulii, rediidx ni ruslaa bejn lo dojl, dxej huililajztu xtidx Jesucrist, dxej gujczatu tejsi con laani. Dxej cua'tu Sprit Dxi xten Dios, ni'c najc si'c seen ahuililajztu, si'cni bia'n Dios diidx. <sup>14</sup> Baniidx Dios Sprit Dxi xtenni te cuääzni nen lastoonu, te ni'c najc seen xca'nu yäl'nasa'c nani guniidx Dios che abaluuxni xtzuumni, nalajznu guslaani guiraa rexpejnüni te guiliä'preni xpala'nni lo xcäl'nibeeni.

*Rniab Pabl gudeed Dios yälnejn loj renani ahuililajz*

<sup>15</sup> Ni'cni näjza narä, sa'csi abiejn diagä xho rililajztu xtidx Dad Jesucrist näjza xho sanälajztu guiraa rexpejn Jesucrist, <sup>16</sup> dina gusanä gudedä xquixtios lo Dios xcuent la'tu. Rnaduxh lazä la'tu che rniabä lo Dios. <sup>17</sup> Rniabä lo Xtios Dad Jesucrist, xtdni ni rnibee xhaguibaa, guniidxni lojtu te yäl'nanduxh, te yäl'ruluiloj recos xhiga'tz te gacbeduxhrutu xcuent Gueb Dios. <sup>18</sup> Rniabäza lo Dios jianij xcäriejntu te gacbeetu xhini'c najc speranza xten yäl'racrejdxtu lo xtiidxni, te gacbeetu lacti saru, lacti sajc yäl'nasa'c ni gudeed Dios lo Jesucrist näjza loj rexpejnüni, <sup>19</sup> te gacbeezatu lacti gurobduxh najc yäl'rnibee nani rajpni nez loonu nani ahuililajz xtiidxni. Guiraa redee ruluu lacti nadip najc yäl'rnibee xten Dios. <sup>20</sup> Lagajc yäl'rnibeere bejn dzuun par Jesucrist. Con yäl'rnibeere baspajn Dios Jesucrist lo rebengut, te gurejni xladbee Dios cadro rnibeeni xhaguibaa. <sup>21</sup> Maazru sajcnini lo chutis gubier, lo chutis yäl'rnibee, lo xhitis yäl'nadip, lo chutis ni rnibee; maazru sajcnini lo chutis nani abibee te guinibee, sigajc naj, sigajc nen redxej ni churu jääd. <sup>22</sup> Niluxh badeed Dios guira'tini ladznaa Jesucrist, laazani bejn bibee Jesucrist gunibeeni lo guiraa xhixten xquidoo. <sup>23</sup> Reben guidooore najc si'c tiejxh xten Jesucrist, luxh sigajc rudeed Dios guralii loj Jesucrist, sigajcza rudeed Jesucrist guralii loj rebejn ni najc xquidoo.

## 2

*Ruslaa Dios nurnu sa'csi rinälajzni nurnu*

<sup>1</sup> Laani baniidxni yäl'nabajn lojtu che najctu si'c bengut nez loj Dios sa'csi rujntu dojl. <sup>2</sup> Galoo gubajntu lo dojl, entis lo xnez guedxliujre guzajtu, biutu xtidx bendxab

nani rnibee guedxliujre. Sprit xtenni rujn dzuun nen lastoo rexi'nni nani di gucua diajg xtidx Dios. <sup>3</sup> Luxh galoo, nāj nuure nadxaagnu lojreni, biennu si'c ni rlajz tiejxhnu. Dxejc biennu si'ctisni rlajz tiejxhnu, si'ctisni biajb xhigabnu. Nungāj̄l guidxe'ch Dios loonu, sigajc bidxe'chni loj guiraa reben guedxliuj. <sup>4</sup> Niluxh balaslajz Dios nuure. Con xcālsanālazduxhni huinālazjni nuure. <sup>5</sup> Mase anajcnu bengut lo dojl̄, laani baniidxni yālnabaj̄n loonu. Rajpnu yālnabaj̄nre con Jesucrist. Sa'csi balaslajzni nuure baslaani nuure nen dojl̄. <sup>6</sup> Baspañsacni nuure con Jesucrist; sigajcza bejn̄ni cuenāj̄nu Jesucrist xhaguibaa, <sup>7</sup> te nen redxej ni churu jīād, guluilojni lacti sajc xcālnasa'c xten yālrulaslajzni, ni'c sanālazjni nuure, najcni huenduxh loonu por Jesucrist. <sup>8</sup> Sa'csi rulaslajz Dios nuure, ni'c baslaani nuure nen dojl̄ che huililajznu xtiidxni. Luxh et sa'csi yu' xhi biennu; dee najc nani banidx-xlia' Dios loonu. <sup>9</sup> Xhet xcuent xhi dzunsa'c di ni biennu, te di chu tejt̄u gac nayedxlajzdi. <sup>10</sup> Dios najc ni benchee nuure. Sigajcza con Jesucrist bejn̄ni gacnu bejn̄ ni rujn dzunsa'c nani galooli agunibee Dios jienpacnu.

### *Yālrbedxilajz ni rajpnu por Jesucrist*

<sup>11</sup> Ni'c colsnaj lajztu xho gujct̄u galoo. Ditu niajc rexpejn̄ Israel. Rniireni la'tu 'benzajt̄' sa'csi dit̄u chu bee si'c ru' rexpejn̄ Israel. Sa'csi lagajc con naareni rusāreni bee. <sup>12</sup> Dxejc suga'tu dit̄u gumbee Jesucrist. Zijt̄ yu'tu loj rexpejn̄ Israel, najct̄u benzajt̄. Nicla gumbeetu rediidx ni bia'n Dios loj rexpejn̄ Israel. Ditu niunloj guslaa Dios la'tu lo dojl̄, dizatu niembee Gueb Dios lo guedxliujre. <sup>13</sup> Niluxh naj ayu'tu lo Jesucrist, la'tu ni guyu' zijt̄ lo Dios galoo. Naj agubigt̄u lo Dios sa'csi abia xtojlt̄u con xtiejn̄ Jesucrist. <sup>14</sup> Jesucrist najc ni rbecdxi lajznu. Laani bejn̄ gujc rexpejn̄ Israel tejsi con rebenzajt̄. Laani badzucajni redzuun xten leii te gujc rexpejn̄ Israel tejsi con rebenzajt̄. <sup>15</sup> Lagajc con tiejxh Jesucrist ni gojl̄ lo cruiz banijt̄ni redzuun xten leii nani bejn̄ bidxe'ch rexpejn̄ Israel lo rebenzajt̄. Lagajc laani bejn̄ni bidxagsa'reni te gujcreni tejsi che huililajzreni xtiidxni, gujcreni te beñcoob. Dxejc gulecdxini lajznireni. <sup>16</sup> Con yālgujt̄ ni gujt̄ni lo cruiz badzu'ni guiro'preni lo Dios te gujcreni tejsi. Si'c gulājz rdxechnāj sa'reni.

<sup>17</sup> Cajza lo guijt̄z rediidxre:

Biād̄ni te basule'ni xho ga'p rebejn̄ yālrbedxi lajz rebejn̄ ni suga' zijt̄ lo Dios nājza reni suga' gajxh lo Dios.

<sup>18</sup> Laani bejn̄ sajc jiu' guiro'p cuaa bejn̄ lo Dios con tejsi xhigab, nājza tejsi Sprit. <sup>19</sup> Ni'cni dirutu gac benzajt̄, bejn̄ ni rut numbeedi. Anajct̄u tejsi con rexpejn̄ni, najczatu sa' rexpejn̄ Dios. <sup>20</sup> La'tu najct̄u si'c te yuro. La'tu najct̄u si'c padeer xten yu'ga. Reapost nājza reprof̄e't najc si'c cheni birixtiej yu'ga. Jesucrist najc si'c guiro ni gusuj squiin yu'ga, guij ni sajcru, sa'csi Jesucrist rnibee. <sup>21</sup> Cayunsa'c Dios yu'ga, cayajc yu'ga con la'tu, caroobni te gacni xquidodxan Jesucrist. <sup>22</sup> Sigajcza la'tu nājza rexpejn̄ Israel ni huililajz najct̄u tejsi con Jesucrist. Cagustioobtu guidooga te nenni cuāāz Sprit Dxan xten Dios.

## 3

### *Pabl nungāj̄l chanā xtidx Dios lo rebenzajt̄*

<sup>1</sup> Ni'cni yu'ā nen latzguiib, narā, Pabl sa'csi cagusule'ā Jesucrist, te jīādnāā xtiidxni lojtu, najct̄u benzajt̄. <sup>2</sup> Pet abiejn̄ diajgt̄u lacti hueen najc Dios baniidxni dzuunre loā, jīādnāā xtiidxni lojtu. <sup>3</sup> Dios baluiini xhigab-xhiga'tzni loā (si'cni bacuaā lojtu galoo). <sup>4</sup> Che gojt̄u guijt̄zga, sacbeetu cati ananā rehxigabxhiga'tz xten Jesucrist. <sup>5</sup> Xhigab-xhiga'tzre di bejn̄ niembee galoo, niluxh naj Sprit Dxan xten Dios abaluiinini loj reapost nājza loj reprof̄e't. <sup>6</sup> Dee najc xhigab-xhiga'tzga: por rediidx xcuent Jesucrist ni ruslaa bejn̄ nen dojl̄ rujn Dios gac reni najc benzajt̄ tejsi con reni najc xpen̄ Israel, guidxaag sa'reni, gacreni tejsi bejn̄. Guiro'preni xca' yālnasa'c si'c bia'n Dios diidx.

<sup>7</sup> Narā nacā te apost xten dzuun ni baniidxni, por xcālrulaslajz Dios ni cuaxlia'ā. Dios baniidx dzuunre loā con xcālrnibeduxhni. <sup>8</sup> Luxh masā guxiiru sacā lo guiraa rexpejn̄ni, loā baniidxni xcālracnāj̄ni te lo rebenzajt̄ gusule'ā xtiidxni, nalajznu redidxcoob xcuent xcālnasa'c Jesucrist, <sup>9</sup> te gusule'ā lo guiraa bejn̄ rehxigabxhiga'tz nani bacua'tz Dios

lojnu galooli. Dios benchee guiralii ni yu'. <sup>10</sup> Si'c gujc te naj jien guiralii yäl\_nanduxh xten Dios. Reni najc xpejn\_pacni nen\_ xquidooi guluii yäl\_najnre lo rexangl Dios, loj reni rnibee xhaguibaa. <sup>11</sup> Galooli bejn Dios xhigabre par tejpas, ni'cni biääd xtadnu Jesucrist te guzobj xhigab ni bejn Dios. <sup>12</sup> Con Jesucrist dinu guidxejb guibignu, guiniabnu lo Dios sa'csi ahuililajznu xtiidxni. <sup>13</sup> Na'c gac-huin lajztu sa'csi cadedä trabajw xcuenttu. Colguibalajz; dee najc xcäl\_nasa'ctu.

### *Xcäl\_sanälajz Jesucrist*

<sup>14</sup> Ni'cni ruzuxhibä nez loj Xtad Dad Jesucrist <sup>15</sup> nani badeed lajni lo guiraa reni yu' xhaguibaa näjza reni yu' lo guedxliuj, <sup>16</sup> rniabä loj Dad xhaguibaa gutijpni lastootu con yäl\_rnibee xcuent Sprit Dxan xtenu, sa'csi yuduxh xcäl\_nasa'cni lo xcäl\_rdimbicha'ni xhaguibaa. <sup>17</sup> Rniabäza lo Dios te jääd\_läjz Jesucrist nen\_ lastootu sa'csi ahuililajztu. Te che agusudzu'tztu, agusutijptu lo yäl\_rinälajz <sup>18</sup> dxejc sajc gacbeetu sigajc guiraa rexpejn\_pacni lacti gulajg, lactiza siool, lacti jäät, lactiza jiaa najc yäl\_sanälajz xten Jesucrist. <sup>19</sup> Te gumbeezatu xcäl\_sanälajz Jesucrist ni najc gurobduxhtej, digacdi guichalonuni. Te chaza lastootu, näjza xcäriejntu con guiraa rexcäl\_nasa'c Dios.

<sup>20</sup> Dios rnibeduxh. Sajc gunid\_xduxhruni loj xhitis ni rniabnu lojni, loj recos ni riennu xhigab. Con Sprit Dxan ni rujn dzuun nen\_ lastoonu suniidxni reyäl\_nasa'c. <sup>21</sup> Loj Diosre coldeed xquixtios. Colguiliä'p xpala'nni nen\_ guidoo xcuent Dad Jesucrist guira dxej, par tejpas. Sugacni si'c.

## 4

### *Por Sprit Dxan nadxaag sa'nu*

<sup>1</sup> Narä yu'ä lojtis Jesucrist te rsule'ätis xtiidxni. Ni'cni rniabä lojtu, guibajntu si'cni nungäj\_l, si'cni bejn\_zatu xhigab cheni gurejdxni la'tu. <sup>2</sup> Colguibajntu con yäl\_nalaslajz, näjza yäl\_nadolajz, colcuedcxi lajztu. Colyujn huant resa'tu con yäl\_rinälajz sa'ni. <sup>3</sup> Colhuii te guidxaag sa'tu gactu tejsi con Sprit Dxan ni ruscuedcxilajztu. <sup>4</sup> Si'c tejsi tiejxh najcnu loj Jesucrist, tejsiza najc xhigabnu con laani, tejsiza najc yäl\_runloj ni rajptu xcuent diidx nani gurejdxtu. <sup>5</sup> Rajptu tejsi Dad, tejsi yäl\_rililajz, tejsi yäl\_robniis, <sup>6</sup> tejsi Dios, tejsi Xtad guiraanu nani rnibee guira'ti lo guiraanu.

<sup>7</sup> Lo tejganu abaniidxni dzuun si'ctis bejn Jesucrist xhigab guniidxni lo tejganu. <sup>8</sup> Ni'cni caj lo reguijtz:

Che huä'pni xhaguibaa, cadre rnibeeni,  
abejnni gaan loj guiraa yäl\_rnibee,  
dxejcti badeedni dzuun lo rexpejnni lo guedxliuj.

<sup>9</sup> ¿Xhi säloj cadre caj, “huä'pni”? Dee säloj ganid biäjtni maazru jäät lo guedxliuj. <sup>10</sup> Lagajc nani biäjtgä, lagajc laani huä'pni jiaaru lo guiraa rexhaguibaa te sajc guinibeeni guibaa näjza guedxliuj. <sup>11</sup> Lagajc laani badeedni xtzuum tejgareni. Yu'reni badeedni gac apost, yu'reni badeedni gac profet, gaiireni badeedni gusule' xho rusläa xtiidxni bejn lo dojl, sgaiireni badeedni gac si'c ni ga'p reben\_ guidoo, sgaiireni badeedni guluii rexpejnni. <sup>12</sup> Guiraa redee badeedni te guluiireni rexpejn\_ Jesucrist, te gunreni dzuun te gustaj\_lreni rebejn\_ ni gac xquidoo Jesucrist. <sup>13</sup> Nungäj\_l gac dzuunre che guidzuj\_nli dxej ni nadxaag-sa'nu guiraanu loj yäl\_rililajz, che guidzuj\_nli dxej riembesa'cnu Xi'n Dios, dxejc anajcnu benguyaj\_l lo xtiidxni, si'c te ni aguroob loj xcäl\_rnibee Jesucrist. <sup>14</sup> Dirunu gac si'c rebuux ni tera'tsi rusiejch lajzni, rucuaiajgreni xtidx chutis bejn, mase xhitis diidx ruluiini. Dxejc riabreni lo redidx-xhii xten bejn nani rusguee, nani cabäjztis gusguee bejn. <sup>15</sup> Maazru hueen chonuunu loj redidxlii xten Jesucrist con yäl\_rinälajz te tioobnu lo guiraa recos xten nani rnibee, lagajc Jesucrist. <sup>16</sup> Loj Jesucrist nazdu'tz guiraa rexpejnni, te si'cni nazdu'tzsa'reni sääreni, najcreni tejsi loj tiejxh Jesucrist, racnäj sa'reni segun xhi dzuun rujn tejgareni, casieedruren te cayajc xhidaj\_lru rebejn\_ga con yäl\_sanälajz.

*Te yäl\_naba\_ncoob con Jesucrist*

<sup>17</sup> Laa ni'cni rniä rniabäza con laj Dad Jesucrist na'cru guibajntu si'c nabajñ rebejn nani di gumbee Dios. Laareni rujñ si'ctis ni rjab yejcreni. <sup>18</sup> Nayääl xcäriejnreni, direni ga'p xcälñabajñ Dios sa'csi nadduxh lastooreni. <sup>19</sup> Redee che gucñajd xcäriejnreni gusloj bejnreni guiraloj yälrtujy, guiraa redojl ni di nungäjñ gunreni. <sup>20</sup> Niluxh la'tu xhet si'c di bisieedu loj Jesucrist. <sup>21</sup> Palga abiejñ diajgtu xtiidxni, niluxh abaluiini lojtu didxlii ni siädñä Jesucrist, <sup>22</sup> colgusaan yälñabanyujxh ni gojptu: Lo yälñabanyujxhga rujñ bejn si'ctis ni rlanjñ. Dxejcti si'c runijtni la'tu lo Dios. <sup>23</sup> Colgusiejch lajztu, colgusia xcäriejntu, <sup>24</sup> te gactu beñcoob nani bejn Dios, colchanuu te yälñabansa'c, te yälñabanya xten xtidxliini.

<sup>25</sup> Colguro'n diidx-xhii, colñii didxlii lo resa'tu sa'csi tejsi najcnu guiraanu.

<sup>26</sup> Che guidxe'chtu, na'c guntu dojl. Na'c gusaantu chu xcälrdxe'chtu guideb dxej che chääzli gubijdx. <sup>27</sup> Na'c gusaantu jiu' beñdxab neñ lastootu.

<sup>28</sup> Nani rilajn, na'cru cuanni. Laaca gunni dzuun con naani te gunni te dzunsa'c nani gudeed meel lojni te gac gacñäjzani rebejn nani xhet rajpdi.

<sup>29</sup> Na'c gusaantu guirii nicla tej didxgujdx ro'tu. Colñii ganax didxsa'c te gacñäjñi guisieed reni rucuañajg xtiidxtu. <sup>30</sup> Na'c guntu gac-huin lajz Sprit Dxan xten Dios. Laani najc te seen xten Dios najctu xpejn Dios, ni'c rbäjzñi neñ lastootu che guidzujñli dxej ni chäätu lo Dios.

<sup>31</sup> Colguro'n yälñabandxuudx xtentu, näj yälrdxe'ch, näj yälrdxagdijñ sa'ni, näj yälrbedxa', näj yälrgue. Colguibicaj lo guiraa redojlga, na'c gactu beñgujdx. <sup>32</sup> Nungäjñ gactu huen loj resa'tu, colgulasajz resa'tu, colsiäjñ lajztu con resa'tu ni rujñ dojl lojtu si'c rsiäjñ Dios lajzñi rextojñtu xcuent Dad Jesucrist.

## 5

### *Xho nanab guibajñ rexi'n Dios*

<sup>1</sup> Colguibajñ si'c nabajñ Dios, sa'csi najctu xi'nni nani sanälajzñi. <sup>2</sup> Colchasanäj yälñanälajz sigajcni huinälajz Jesucrist nuure cheni badeedni lagajc laani lo Dios, cuajñi lo cruzj, gujtni. Laani gujñcni si'c gojn, gujczani yälrbibyaal ni bidxagajz Dios.

<sup>3</sup> Nicla gusä'ttu yälñrusguee chääñ bejn, nicla redoñ dxuudx, niclaza yälñanälazteñ xhixtentisni. Nicla gusä'ttuni lo sa'tu, sa'csi xhet si'c di nungäjñ gun bejn ni nabanaya. <sup>4</sup> Sigajcza colcuälaz diidx ni rujñ xtujy, näjza didxñajd, näjza didxñaj nani digac laaca. Colgudeedtis xquixtios lo Dios. <sup>5</sup> La'tu anajntu nicla tej ni rusguee chälbejn, nicla tej beñdxuudx, nicla tej ni sanälazteñ xhixtentisni, nicla renani rajñ rebanäjñ, nicla tej reni'c di xca' yälñasa'c loj Jesucrist, dizareni jiu' lo xcälñnibee Jesucrist, xcälñnibee Dios. <sup>6</sup> Na'c gusaantu gusguee bejn la'tu con diidx ni xhet sajcdi sa'csi xcuent redzuunga riääñ xcälrdxe'ch Dios loj rebejn ni di gusoob xtiidxni. <sup>7</sup> Na'c guntu sigajc rujñreni.

<sup>8</sup> Galoo nacäjyñtis xcäriejntu gubajntu, luxh ñaj abasanij Jesucrist xcäriejntu. Colguibajñ si'c nungäjñ guibajñ nani abianij xcäriejñni. <sup>9</sup> Sa'csi nani abianij xcäriejñni rujñ dzunsa'c, rniini didxgulii. <sup>10</sup> Colguisieed xhini'c rchagajz Dios. <sup>11</sup> Na'c guntu redzundxuudx nani rujñ reni nacäjy xcäriejnreni, coltilñäj reni rujñ sa' dzunguijdxga. <sup>12</sup> Sa'csi te xtujyñi najc jieinu diidx xcuent xtzunreni ni runxhiga'tzreni. <sup>13</sup> Niluxh guiraa sa' redzuunre ni rdilñäjñu, huenliisi sien xhi najcreni, suzeñni lo xpianij Jesucrist. Sa'csi guira'ti ni ruzeñ najc nianij. <sup>14</sup> Ni'cni caj loj reguijtz, räjp Dios:

Gubajñ, huistie luj ni rejslu.  
 ¡Huistie lo dojl, luj ni naga'lu lo dojl si'c beñgut,  
 te gusanij Jesucrist xcäriejñlu!

<sup>15</sup> Colñhui, colsiñ, na'c guibajntu si'c te bejn nani di gacbee, colguibajñ si'c bejn nani yu' xcäriejñni. <sup>16</sup> Colñtedsa'c redxej sa'csi neñ redxejre ganax cosguijdx rujñ bejn. <sup>17</sup> Ni'cni na'c guibajntu si'c rebejn nani di gacbee, colyacñasiñ, te gacbeetu xhini'c najc ni rlanj Dad xhaguibaa guntu. <sup>18</sup> Lacuaa yätu nejñ nani runijñ bejn, colgapchee Sprit Dxan xten Dios neñ lastootu. <sup>19</sup> Colñii loj resa'tu rediidx nani gunii rebejn tiemp gulä'preni xpala'n



Dios, colyelza redij xten Dios, con reyälrieli colguiliä'p xpala'n Dios nen lastootu. <sup>20</sup> Di jiäl lajztu gudeedu xquixtios lo Dios xtadnu con laj Dad Jesucrist.

*Xho guibannäj sa' rexpejn Jesucrist*

<sup>21</sup> Sa'csi rajntu Jesucrist, colgusoob xtidx sa'tu.

<sup>22</sup> Lojtu, regunaa ni abachnaa, rniä scree: Colgusoob xtidx chäältu si'c rusoobzatu xtidx Dad Jesucrist. <sup>23</sup> Sa'csi niguii rnibee gunaa si'cni rnibee Jesucrist xquidooni, niluxh laazani ruslaani rexpejn guidooni lo redojl, najcreni si'c tiejxhni. <sup>24</sup> Ni'cni, sigajc rusoob reben guidooga nani rnibee Jesucrist gunreni, sigajcza nungäj] gusoob regunaa ni abachnaa nani guinibeetis chäälneni gunreni.

<sup>25</sup> Lojtu, reniguii ni abachnaa rniä scree: Colchanälajz chäältu sigajc ni huinälajz Jesucrist rexpen guidooni, badeedni lagajc tiejxhni loj Dios cheni cuajni lo cruz por laareni <sup>26</sup> te basiani xtoj] rexpejn guidooni, te gujcreni te bencoob, abidiib lastooreni con xtiidxni si'c rdiib te cos con nis <sup>27</sup> te che xca'ni rexpen guidooni, najcreni te guidoo ni saj cru, te guidoo nani xheti xtoj]ni, te guidoo nani sugadzu'tz, te guidoo xhet xhi riäädxd, najcni te guidoya, xheti xhi xtoj]dini. <sup>28</sup> Sigajcza, te niguii nani abachnaa nungäj] chanälajz chäälni sigajc sanälajzni lagajc tiejxhni. Nani sanälajz chäälni sanälajz lagajc laani. <sup>29</sup> Ruti chu te bejn ni rbälaz tiejxhni; alga rajpni tiejxhni ruyaanni tiejxhni sigajc rajp Jesucrist rexpen guidooni. <sup>30</sup> Najczanu tejsi loj tiejxh Jesucrist, loj xpäälni, loj rextzujtni. <sup>31</sup> “Ni'cni che guchnaa te niguii rusa'nmi xtadni, xnanni, te xca'ni gunaa, te gac guiro'preni si'c tejsi bääl, si'c tejsi bejn.” <sup>32</sup> Dee najc te diidx xhiga'tzduxh; li te “¿chuj?” najcni. Niluxh narä rniä xcuent Jesucrist con rexpenguidooni. <sup>33</sup> Niluxh nanabpac chanälajz teygatu chäältu sigajc sanälajztu tiejxhtu. Dxejcti gunaa ga'pzani xpala'n chäälni.

## 6

<sup>1</sup> Lojtu biuux, rniä scree: Colgucuadajg xtidx Jesucrist, colgusoob xtidx xtadtu sa'csi ni'c saj nez loj Dios. <sup>2</sup> Colga'p xpala'n xtadtu, xnantu, sa'csi ni'c najc didx galoo xten leii nani runiidx xhi xca'tu palga gusoobtu diidxga; <sup>3</sup> “Te saruduxh guibajntu xchero lo guedxliujre.”

<sup>4</sup> La'tu, Dad ni najc guzajn, na'c guntu guidxe'ch rexi'ntu lojtu. Colguslaareni con yäl]naj, colgulijdxreni con xtidx Jesucrist.

<sup>5</sup> La'tu ni najc mos, colgusoob xtidx xlamtu lo guedxliujre, colcuadajg xtiidxni, xhet xhi steedi xhigabdi guntu nen lastootu. Colyejn xtzuunni si'cni najc xtzuun Jesucrist. <sup>6</sup> Colyejn xtzuunni, niluxh xhet che suga'tisreni, cahuiireni, parsi jiansa'ctu lojreni. Maazru hueen guntu dzuun si'c xmos Jesucrist; colyejn guira'ti si'cni rujntu xtzuunpactu; si'cni rlajz Dios. <sup>7</sup> Colyujn xtzuunni guideb lastootu si'c xmos Jesucrist, et si'cdi xmos ben guedxliuj. <sup>8</sup> Anajntu dzunsa'c ni gun teygatu, lagajcza xcuent ni'c xca'tu loj Dad Jesucrist, mase najctu mos o mase rutlojdi yu'tu.

<sup>9</sup> Lojtu, relam, rniä scree: Sigajcza colyujn lojreni. Colgusaan yäl]rusacsí, sa'csi anajntu yu' xlamtu xhaguibaa, luxh tebloj najc guiraa rebejn nez lojni.

*Nani gacw rexpejn Jesucrist lo guerr*

<sup>10</sup> Didx lult ni rniä, sa'ä, najc scree: Colsutijp lo xcäl]racnä] Jesucrist, colsudzu'tz lo xcäl]nadip xcäl]rnibeeni. <sup>11</sup> Colgajcw xhabguiib xten Dios te gac sudzu'tztu lo reyäl]rusguee xten bendxab. <sup>12</sup> Sa'csi xhet ben guedxliujtis cadil]nä]nu. Cadil]nä]znanu reguxhtis xte yäl]cä]y, nä]za reyäl]rnibee, rebejn nani rnibee loj reyäl]cä]y, nä]za rexangl bendxab nani rnibee bej xten guedxliujre. <sup>13</sup> Ni'cni colca' guideb lad-guiib xten Dios nani runiidxni loonu te gac sudzu'tznu nen dxej ni guideednu trabajwduxh, te che agudejndi, laltis sisiudzu'tznu. <sup>14</sup> Colsudzu'tz pues. Xque'tu colguliib sindoor-guiib ni najc xtidx Jesucrist, colgajcw gamangw-guiib ni najc rextzunsa'c xten Dios ni rujntu. <sup>15</sup> Colcuua gurach-guiib ni'tu (ni'c najc xtidx Jesucrist ni ruscuedxi lajztu). <sup>16</sup> Colca' escud-guiib ni najc yäl]rililajz te con yäl]rililajz xtidx Dios di bendxab gun gaan gusguee la'tu con



rextidx-xhiini. <sup>17</sup> Colca' yälruslaa xten Dios lo dojl si'c te xhumbrel-guiib chu yejctu; colca'za lans xten Sprit Dxan xten Dios ni najc xtidx Dios. <sup>18</sup> Colnab lo Dios guiraa dxej; colnab lojni con Sprit Dxan xtenni; colsusintis; na'c jieedtu guiniabtu lo Dios xcuent guiraa xpejnü. <sup>19</sup> Colnabza lo Dios por narä te guniidx Dios diidx cheni gal guiniä, te na'c guidxebä guiniä che guluiä didx-xhiga'tz xten yälruslaa bejn lo dojl. <sup>20</sup> Xcuent rediidxga ni yu'ä neñ latzguiib, caduä con caden. Ni'cni colnab lo Dios te na'c guidxebä guiniä rediidxga si'cpacni säbyäjl guiniäni.

*Lult xtixtios*

<sup>21</sup> Niluxh te gabeetu xho sasaj rextzunä, nägajcza xho yu'ä narä, Tíquico, sa'nu ni sanälajznu, ni runsa'cza xtzun Dad Jesucrist, siäd lojtu te gusule'ni diidx. <sup>22</sup> Laapacni ruxhalä lojtu, te gabeetu xho yu'nu, te si'c guscuecdxini lajztu.

<sup>23</sup> Rniabä yälrbexilajz par resa'nu, näjza yälrlilajz con yälsanälajz xten Dios Xtadnu näjza xten Dad Jesucrist. <sup>24</sup> Gacnäj Dios guiraa reni di gusguee, reni sanälajzpac Dad Jesucrist. Sugacni si'c.

## Te Guijtz Lo Rebeñ Filipos

*Latzguiib yu' Pabl bacuaani loj rebeñ*guidoo xten guedx Filipos

<sup>1</sup> Pabl nájza Timoteu, nani najc rexmos Jesucrist, rucuaanu guijtzre lo guiraa rexpejn Jesucrist nani rbájz guedx Filipos, loj rebeñ nani ruluii xtidx Dios nen reguidoo nájza loj rediaconos. <sup>2</sup> Gacnáj Dios la'tu con yälrbexi-lajz xten Xtdnu nájza xten Dad Jesucrist.

*Rniab Pabl lo Dios xcuent rebeñ* nani rililajz

<sup>3</sup> Che rnaj lazä la'tu, rudedä xquixtios lo Dios. <sup>4</sup> Che rniabä lo Dios, rbaa lazä rniabä lo Dios xcuent la'tu, <sup>5</sup> sa'csi abidxaag sa'nu lo xtidx Jesucrist che guslojli huililajzta hasta najli. <sup>6</sup> Anancheä Dios nani gusloj cayunsa'c dzuun nen lastootu, lagajc laani suluxsa'c dzuunga dxejli ni jiääd Jesucrist. <sup>7</sup> ¿Xhiru xhigab nungäjł gunä? Ni rapä la'tu nen lastoä sa'csi cayacnájtu narä nen latzguiib luxh rsiudzu'tztu riye'tztu lo bejn, guli najc rediidx nani rusule'ä xcuent Jesucrist nájza la'tu rusule'tu rediidxga. <sup>8</sup> Dios nanchee xho rbanäätu, xho sanälazä guiraatu lo xcäl'sanälajz Jesucrist. <sup>9</sup> Rniabä lo Dios te tioobru xcäl'rinälajzta naj xcäl'najntu nägajc churu xcäriejn guiraatu, <sup>10</sup> te cuetu nani najc dzunsa'c te si'c guiban nayatu, te na'c ga'ptu nicla tej dojl cheni jiääd Jesucrist. <sup>11</sup> Te guidxa lastootu yäl'nasa'c xten te yäl'nabansa'c ni runiidx Jesucrist, te guspaa lajzta Dios, guiliä'ptu xpala'nni.

*Jesucrist najc xcäl'nabanä*

<sup>12</sup> Rlazä gacbeetu betzä: guiraa nani gusacä ni'c cayacnáj guire'chru xtidx Jesucrist. <sup>13</sup> Ni'c guiraa rebeñ, renani yu' jusgaad sigajc renani yu' garenca lajt, anajnreni niäüä latzguiib xcuent Crist. <sup>14</sup> Xhidajlrü resa'nu cheni gucbeereni yu'ä latzguiib, gusudzu'tzru lajzreni, direni nidxejb, guniirureni xtidx Dios.

<sup>15</sup> Guliica yu' reni rusule' xtidx Jesucrist sa'csi rdxe'ch lajzreni, rdxe'chzaren loä. Yu'za reni rusule' xtidx Jesucrist sa'csi laaca najc xhigabreni. <sup>16</sup> Yu'reni rusule' xtidx Jesucrist sa'csi rdxe'chreni, xhet sa'csi laaca najc xhigabreni, alga rujnreni xhigab gustioobruren trabajw nani tedä nen latzguiib. <sup>17</sup> Niluxh yu' reni rusule' rediidxga sa'csi sanälajzreni Jesucrist. Anajnreni yu'ä latzguiibre te gusule'äru guliipac najc xtidx Jesucrist. <sup>18</sup> Niluxh ¿xhiru najcni? Palga rujnsireni laaca o palga guluiipac laaca najc xhigabreni rusule'reni xtidx Crist; rbaa lazä sa'csi care'ch xtiidxni niluxh sibaaru lazä. <sup>19</sup> Ananä laaca guiriä loj guiraa recosre sa'csi canabtu lo Dios xcuentä. Luxh xcäl'racnáj Sprit xten Jesucrist <sup>20</sup> rujn runloä, rbäzäza dina jianxtuiä. Ni'cni dina guidxebä guiniä, si'cni runäpac, sigajcza runä naj te gac guiliä'pä xpala'n Jesucrist con tiexhä palga guibanä o palga guetä. <sup>21</sup> Sa'csi palga guibanä, su'ä lo Jesucrist; luxh palga guetä sunäru gaan. <sup>22</sup> Palga guibanäru lo guedxliujre, sajcrü gunä xtzruun Dad Jesucrist, ni'cni dina gacbeä xhnic cueä xca'ä. <sup>23</sup> Nagajn najcni par narä cueä lo guiro'preni. Te lajt runä xhigab: malaii guetä te cha'a cadre yu' Jesucrist sa'csi ni'c najc huenru par narä. <sup>24</sup> Niluxh stee lajt nancheä nungäjł guibanäru lo guedxliujre xcuent la'tu. <sup>25</sup> Niluxh narä racbeäpac siannäaru la'tu, su'äru lojtu te chanuurutu lo xtidx Jesucrist, te guibalajzta lo yäl'rililajz, <sup>26</sup> te guibalajzrutu xcuentä loj Jesucrist che guibisacä lojtu stehuält.

<sup>27</sup> Colhuiitis guibajntu si'cpac ni rni xtidx Jesucrist, te palga jiädhuiätu o palga ruti narä, jiejn diagä sugadzu'tztu, rujntu tejsi xhigab, nadxaag sa'tu rujntu tejsi dzuun con yäl'rililajz xten xtidx Jesucrist. <sup>28</sup> Na'c guidxjbditu renani rdxe'ch lojtu. Laareni huenliisi ruseñ agunijtreni ni'c rdxe'chreni, ni'cni la'tu huenliisi ruseñ agulaatu nen dojl si'c baniidx Dios, ni'cni ditu guidxe'ch. <sup>29</sup> Sa'csi lojtu abaniidx Jesucrist chalilajzta xtiidxni. Niluxh xhet ni'ctis; nägajcza tedtu trabajw xcuent laani. <sup>30</sup> Cadejdtu lagajc trabajw ni cahuiitu gudedä luxh naj riejn diajgtu cadedsicä trabajwga.

## 2

*Xcälñalaslajz näjza xcälguobduxh Jesucrist*

<sup>1</sup> ¿La ruspaa Jesucrist lajztu? ¿La racnäy xcälñinälajztu la'tu? ¿La yu' Sprit Dyan xtenni con la'tu? ¿La yu' xcälñanälajzni näj xcälñulaslajzni lastootu? <sup>2</sup> Palga yu'ni, colguspaa lazä, colyejn tejsi xhigab con narä, colga'p lagajc yälñanälajzga, colguidxaag sa'tu, colyejn tejsi xhigab. <sup>3</sup> Na'c guntu nicla tej dzuun sa'csi cayutu lagajc la'tu, na'cza guntu dzuun te chä'p xpala'ntu. Colyejn xtzuumtu con yälñalaslajz, colhuii loj sa'tu si'c beñroru lojtu. <sup>4</sup> Na'c jiu chu tejtü lagajctis xhixtenni, coljiu tejgatu xhixten sa'ni.

<sup>5</sup> Colga'p lagajc sa' xhigab nani gojpa Jesucrist <sup>6</sup> nani mase najcni sigajc Dios, dini niniadzdu'tz xcälñnibee Dios, <sup>7</sup> alga basa'nni te laad yälñnibee nani rajpni con Xtadni Dios te gujcní mos cheni gojlni lo guedxliujre. Gujcní si'ctis te bejn. <sup>8</sup> Che gujcní si'ctis beñ guedxliuj, gujcní beñ nadolajz, beñ nasobdiidx. Basoobni xtidx Dios, gujtni lo cruja, luxh yälñrejt lo cruja najc te yälñrtuiduxh. <sup>9</sup> Ni'cni baspañsac Diosni, gule'cni Crist te lajt ni najc jiaaru, badeedza Dios sajcu lajni lo laj guiraa relay ni rusä't bejn. <sup>10</sup> Luxh che jiejn diajgreni laj Jesucrist, suzuxhijb guiraa reni yu' xhaguibaa, guiraa reni yu' lo guedxliuj, näjza guiraa reni yu' nez neñ yuj. <sup>11</sup> Te guiraareni gacbeepac, guiniizareni: "Jesucrist najc Dad", te si'c chä'pduxh xpala'n Xtadnu Dios.

*Rexpejn Jesucrist najc si'c bajl ni rusanij lo guedxliuj*

<sup>12</sup> Ni'cni, resa'ä ni sanälazä, sigajcni rusoobtu xtidxä cheni suganää la'tu, sigajcza colgusoob xtidxä naj ni yu'ä zijt, colhuii tejgatu xho gac laatu neñ dojl, colyajc bejn ni rusoob diidx con yälñrdxejb. <sup>13</sup> Sa'csi Dios najc ni rujn dzuun neñ lastootu te rajc rujntu xhigabsa'c, dxejc racnäyzani la'tu te rajc rujntu si'cni rlanjni.

<sup>14</sup> Loj guira'ti ni rujntu, na'c gusmojmütu, na'cza gun tiop lajztu, <sup>15</sup> te rut gucuaquijditu, te gactu bejn ni ruchaag chutis bejn, gactu xi'n Dios, bejn nani xhet xtojldini yu' laj ni tre'tu loj rebeñguijdx ni rujn redzundxuudx. Nez lojreni gactu si'c te bajl ni rdimbicha' si'c rebalxhaguibaa che nacäy, <sup>16</sup> sa'csi arapdzu'tztu xtidx yälñabajn ni runiidx Crist neñ lastootu te guspaaü lazä dxej cheni jiääd Jesucrist, sa'csi xhet xlia'di gujc xtzunä, xhetza xlia'di cayunä dzuun naj. <sup>17</sup> Mase lagajc xtienä guixe' te guiza' te gojn ni xca' Dios xcuent xcälñrililajztu, rbaa lazä, sibalaznääza la'tu. <sup>18</sup> Sigajcza colguibaa lajztu, colguibalaznäy narä.

*Timoteu con Epafrodito*

<sup>19</sup> Nez loj Dad Jesucrist cayunloä guxhalgacä Timoteu lojtu te näjza narä guibaa lazä che agucebä xho yu'tu nejzga. <sup>20</sup> Sa'csi rutru rapädi nani rujn tejsi xhigab, tej ni guliipac gun dzuun, jiupacni la'tu. <sup>21</sup> Guiraa rebejnre rujntis xtzuumcareni, direni jiu gunreni xtzuum Jesucrist. <sup>22</sup> Niluxh la'tu anajntu xho rujn Timoteu; si'c racnäy te bi'n xtadni, si'cza racnäyni narä lo xtidx Jesucrist. <sup>23</sup> Ni'cni rlazä guxhaläni te jiädhuiini la'tu, fixgaási don xho sasaj xcuentä ree. <sup>24</sup> Cabäzäza nez lo Dad Jesucrist don la näjza narä sajl jiädhugacäü.

<sup>25</sup> Niluxh rchaloä nanabpac guxhalä bejtznu Epafrodito ni najc sa'ä loj dzuun, loj retrabajw ni cadejdnü. Lagajc la'tu baxhaltüni te jiuni narä, fiini xhini'c rquinä. <sup>26</sup> Laani rlazduxhni fiini lojtu, lacti cayu'ni yärsia' sa'csi gucbeetu gucxhuuni. <sup>27</sup> Guliica gucxhuuni cuentro, ameer niejtni, niluxh Dios balaslajzni laani, luxh xhet laatisni, balaslajzzani narä te di nidedäru loj yälñahuinlajz ni yu'ä ree. <sup>28</sup> Ni'cni rlazä guxhalgacäni te guibalajztu che fisactu lojni, näjza te na'cru gac-huinlazä xcuent la'tu. <sup>29</sup> Colca'ni con yälñbalajz si'c bejztu lo xtidx Dios, sigajcza colyejn reni najc sigajc laani. <sup>30</sup> Xcuent xtzuum Jesucrist ameer niejtni, dini niu xcälñabajnñtisni te bejnñi redzuun nani di niajcdi niujntu lagajc la'tu xcuentä.

## 3

*Te yälñabansa'cpac*

<sup>1</sup> Naj rebetzä, colguibalajz nez lo Dad Jesucrist. Xhet najcdi gucuasacä lagajc rediidx nani abacuaä lojtu, sa'csi sacnäjni la'tu. <sup>2</sup> Colnati renani najc si'c bä'cw. Colnatiza rebejn nani rujn dzun guijdx. Colnatiza reni ru' bee tiejxhtisreni luxh xlia'si rujnreni si'c. <sup>3</sup> Renani guliipac yu' bee najc nuure nani ahuililajz xtidx Dios, rienzanu xtzuumni si'cni rlajzni sa'csi ayu' Sprit Dxaan xtenni neñ lastoonu. Rbalaaznu sa'csi najcnu xpejn Dad Jesucrist, xhet xcuentdi redzuun ni rujn tiejxhnu. <sup>4</sup> Narä sajczä guibalazä xcuent ni rujn tiexhä. Palga yu' chu tej ni rbalajz, narä rbalazäru <sup>5</sup> sa'csi guyu'ä bee che guyu'ä xhujñ gubijdx; narä nacä te rexpejn Israel; narä nacä tej rexpejn toBenjamín, nacä te hebreo, luxh xtadä najc te beñ hebreo; xcuent leii nacä te farisee. <sup>6</sup> Basobduxhä guiralii rextidx Dios ni caj lo leii ni'cni basacsiduxhä rexpén Jesucrist; xcuent yälñabansa'c xten leii, xhetliidi xtolä yu'; basobdzu'tzä xtidx leii. <sup>7</sup> Niluxh naj rediidx nani galoo benä xhigab sacduxh, naj xhet sajcdini sa'csi sanälazä Jesucrist. <sup>8</sup> Niluxh maazru runä: runä xhigab xhet sajcdi guiraa nani rapä, sa'csi maazru sacduxh yälriembee Jesucrist ni najc Dad xtenä. Xcuent Jesucrist gulälazä guira'ti, guira'ti najc si'c guixbiujy nez loä te gunä gaan Jesucrist, <sup>9</sup> te chu'ä lojni, xhet xcuentdi xcälñabansa'cä ni najc xcuent leii, alga xcuent yälñabansa'c ni najc xcuent xcälñirililajz Jesucrist, yälñabansa'c ni najc xten Dios xcuent yälñirililajz. <sup>10</sup> Ni'cni rlazä gumbeäru Jesucrist loj yälñribee ni rajpni sa'csi huistie gubansa'cni sacni loj rebengut, te gumbeäru retrabajwduxh ni gudejdni, te ganä xho gunä ni rlajz Dios si'c gucbee Jesucrist, bejnzani ni rlajz Dios che gujtni. <sup>11</sup> Te gac guidzunä lo yälguibansac loj rebengut te xca'ä yälñabajñ par tejpas lo Dios.

<sup>12</sup> Dizana guiniä “abenä gaan” o “anacä bensa'c”, alga sanuätis te gunä gaan yälñabajñ nani cua'ä lo Jesucrist. <sup>13</sup> La'tu rebetzä, dipacna gunä cuent alabenä gaan, niluxh tejtis nani runä, riallazä nani agudejd, rusgää nää si'cni guiniazä nani churu gac. <sup>14</sup> Si'cni sanuutis ruxun bejn te gunni gaan xhi guzalajzni, si'cza sanuutis cayunä dzuun nani baniidx Jesucrist loä, te che abenä gaan dzuunga sica'ä ni guzalajzni, nalajznu sibejdx Dios narä cha'a loj Jesucrist.

<sup>15</sup> Guiraanu nani ahuililajznu, nanab jiennu lagajc xhigabga, niluxh palga la'tu guntu ste'ca xhigab, rchaloä lagajc Dios suluilojni lojtu xcuent ni et laadi cayujntu.

<sup>16</sup> Naj, cadrotis abidzunnu lo nani abiembeenu, sigajcza nanab guibansijcnu, chanuutis gusoobnu rediidxga; nungäjñ guibajñnu loj rediidxre, jiennu tejsi xhigab.

<sup>17</sup> Rebetzä, coltanajñ narä, colyejn si'c runä narä, colñhuiiza rebejn nani nabajñ si'c nabanä. <sup>18</sup> Xhidajñ huält aguniä lojtu, naj ronäli rnisacä lojtu, yu' xhidajñ reni rdxe'ch lojtu, rniyajreni nani bejn Jesucrist che gudijxni xtojñnu lo cruz. <sup>19</sup> Redee che luux xnezyujreni sinitlojreni, sa'csi xtioozreni najc yälñrausa'c; luxh rbaali lajzreni rujnreni dzun xtujy; luxh riutisreni xcälñnasa'c guedxliujre. <sup>20</sup> Niluxh nuure, xhaguibaali najc laadxnu, luxh ro'cli cabääznu jiääd nani ruslaanu neñ dojl, nalaaznu lagajc Dad Jesucrist. <sup>21</sup> Laani suchaani tiexhnu ni rajpnu lo guedxliujre, te gac tiexhnu sigajc najc tiejxhni lo xcälñribeeni. Sujñni dee con yälñribeduxh ni rajpni te rribeeni loj guiral'i'ti, guiraa nejz.

## 4

### Colguibalajztis xcuent Dad Jesucrist

<sup>1</sup> Ni'cni rniä lojtu, rebetzä nani sanälazä, lojtu ni rlazä fisacä, lojtu ni ruspaä lazä, lojtu ni najc yälñnasa'c xtenä, colñsudzu'tz loj xtidx Jesucrist.

<sup>2</sup> Rniabduxhä lo Evodia näjza lo Síntique, rulidxäreni gunreni tejsi xhigab xcuent Dad Jesucrist. <sup>3</sup> Sigajcza rniabä lojlu betzä, ni runnäj narä dzuun, gucnäj regunaare ni bennäj narä dzuun, bideednu trabajw xcuent xtidx Jesucrist. Gucnäjza Clemente näjza guiraa reni bennäj narä dzuun; alajreni caj neñ reguijtz xten yälñabajñ par tejpas.

<sup>4</sup> Colguibalaznäjti Dad Jesucrist; stehuält rniä: colguibalajz. <sup>5</sup> Sugacbee guiraa rebejn xho najc xcälñabajntu lo xtidx Dios. Asiäddzungajxh dxej xten Dad Jesucrist.

<sup>6</sup> Na'c guidxejbtu, colñnabtis lo Dad guira'ti, colñgudeedza xquixtios lojni lañ ni cabedxcanabtu lojni. <sup>7</sup> Dios guniidx xcälñrbedxilazduxhni, nicla guntu xhigab lacti najc yälñrbedxilajzga. Yälñrbedxilajzga ga'p lastootu näjza xcäriejntu loj Dad Jesucrist.

*Colyejn xhigabsa'c*

<sup>8</sup> Mbaj naj, deetis guiniä lojtu rebetzä, sa'tis rediidxre gusaantu chu loj rehxigabtu: guiraa ni najc guliipac; guiraa rediidx ni nanab guiliä'pni xpala'nni, guira'ti nani nacsac; guira'ti nani naya; guira'ti nani najc saru; guira'ti nani rapsa'c xpala'n lajni; näj palga yu' xhi dzuun ni nacsac'pac, o palga yu' xhi te diidx ni sajc guiliä'p xpala'nni, xcuent guiraa reni'c colyejn xhigab. <sup>9</sup> Nani bisieedtu, nani cua'tu, nani biejn diajgtu, nani bahuiitu benä, ni'c guntu te Dios ni rbecdxilajz, laani jiannäjni la'tu.

*Gojn xten refilipenses ni xca' Pabl*

<sup>10</sup> Rbaduxh lazä nez loj Dad Jesucrist sa'csi banasac lajztu gacnäjtü narä. Guliini; galooli rlajztu niacnäjtü narä, luxh di niacjdini. <sup>11</sup> Dinä guiniä si'c sa'csi yu' xhi cayädxä, sa'csi abisiedä guibaali lazä loj xhitis ni rapä. <sup>12</sup> Sajc guibanä che guxii rapä; sajc guibanä che xhidäl rapä; abisiedä guibanä xhotis: sajc gauduxhä, sajcza guilianä; sajc gapä xhidajl xhixtenä, sajcza tedä trabajw. <sup>13</sup> Guira'tini sajc gunä sa'csi Jesucrist racnäjtü narä. <sup>14</sup> Niluxh xhet najcdi; laaca dzuun bejntu che bejntu xhigab gacnäjtü narä laj ni cadedä trabajw.

<sup>15</sup> Gacbee guejbtu, dad filipenses, che gusloj caguluiä xtidx Jesucrist lojtu, cheni biriä reguedx Macedonia, nicla tej guidoo di niacnäjtü narä, la'tistu gucnäj narä. <sup>16</sup> Cheni yu'äli guedx Tesalónica, baxhałtu meel loä tej-tio'p huält. <sup>17</sup> Niluxh narä di rlazä xca'ätis xhixtentu ni guniidxtu, nani rlazä najc tioobru xcäl'nasa'ctu nez lo Dios xcuent dzuun ni rujntu ruxhałtu meel loä. <sup>18</sup> Naj acua'ä guiraa ni baxhałtu, arapä xhidajl, arapduxhä sa'csi acua'ä nani biädnä Epafradito baxhałtu loä, te gojn ni rlianejxh si'c guxhyaal, te dzunsa'c ni rchaglajz Dios. <sup>19</sup> Dios xtenä guniidx lojtu guiraa nani riäädx xca'tu, si'tisni rajpni reyäl'nasa'cduxh xhaguibaa con Dad Jesucrist. <sup>20</sup> Colguiliä'p xpala'n Dios xtadnu guixe-guixee par tejpas. Si'c gacni.

*Lult xtixtios*

<sup>21</sup> Coldeed xtixtios lo guiraa rebejn ni abia lastooni nez loj Dad Jesucrist. Rebejtznu ni yu' ree näj narä ruxhałnu xtixtios lojtu. <sup>22</sup> Guiraa rebenree ni abia lastooni nez loj Dad Jesucrist ruxhał xtixtios, niluxh ruxhałru resa' César xtixtios lojtu.

<sup>23</sup> Suga'p xcäl'racnäjtü Dad Jesucrist lastootu. Sugacni si'c.

## Te Guijtz Lo Rebeñ Colosas

*Bacuaa Pabl loj rebeñ* guidoo ni yu' guedx Colosas

<sup>1</sup> Narä, Pabl nacä te apost xten Jesucrist. Dios gule narä. Narä näjza bejtznu Timoteu <sup>2</sup> cagucuaanu reguijtzre loj rebeñ Colosas nani nabannaya rujnreni si'cpacni rlajz Dios, näjza reni najc bejtznu lo xtidx Jesucrist. Xca'tu yälracnäjä näjza yälrbedxilajz xten Dios xtadnu.

*Rniab Pabl gudeed Dios yälñajn xtenni*

<sup>3</sup> Rdeednu xquixtios lo Dios xtad Dad Jesucrist rniabnu lojni xcuenttu guixe-guixee. <sup>4</sup> Abiejn diajgnu xho rililajztu xtidx Dad Jesucrist, näjza xho sanälajztu rebeñ ni ahuililajz xtidx Jesucrist, <sup>5</sup> sa'csi cabäjztu xca'tu reyälñasa'c ni yuchee xhaguibaa par la'tu. Laa xcuent reni'c ni biejn diajgtu cheni bacuadiajgtu xtidxlii Jesucrist xcuent yälñuslaa lo dojl. <sup>6</sup> Laa rediidxga ni abiääd lojtu sigajc ni bire'chni guideb lo guedxliuj, luxh cayac xhidajlru rebeñ ni cayacbee diidxre, asalilajzreni diidxga, sigajc guzajctu la'tu. Cheni biejn diajgtu xtidx Jesucrist, dxejc biembeeatu guliipac najc xcälñulasajz Dios. <sup>7</sup> Sigajcza bisieedtuni lo Epafra, ni sanuutis cayacnäjni nuure lo dzuun. Laani najc te bensa'c, yu'ni lojtu cayujnpacni xtzuun Jesucrist lacuaa nuure. <sup>8</sup> Laani abasule'ni diidx loonu xho sanälajz sa'tu sa'csi nabajñ Sprit Dxan xten Dios neñ lastootu.

<sup>9</sup> Laa ni'cni dxejli nani biejn diajgnu diidxre xcuenttu, di cuääz cabedx-canabnu lo Dios, canabnu gacbeduxhtu xho rlajz Dios guntu, guniidxni guiraa yälñajn näjza gusanijni xcäriejntu <sup>10</sup> te guibajntu si'cni nungäjñ guibajñ beñ ni sanajñ Dad Jesucrist, te guspaatu lajzni lo guiraa redzuun. Chanuuzatu gunrutu guiraa redzunsac näjza jianijru xcäriejntu xcuent yälñriembe Dios. <sup>11</sup> Tioobrutu loj xcälñadip, xcälñabee Dios te guibaa lajztu gusutiplajztu, cue'cdxilajztu loj xhitis ni sajctu. <sup>12</sup> Guibalajznu guideednu xquixtios loj xtadnu Dios nani basudzu'tz nuure te xca'nu yälñabajñ par tejpas sigajc guiraa rebeñ nani ahuililajz xtiidxni yu'reni lo xpianijni. <sup>13</sup> Laani abaslaani nuure loj xcälñabee yälñacäjä, abateedni nuure lo xcälñabee xi'nni ni sanälajzni. <sup>14</sup> Laa xi'nni ni baslaa nuure neñ dojl cheni baxhe'ni xtiejñni, gujtni lo cruzj, dxejc gudijxni rextojñnu.

*Gubisacnu loj Dios xcuent xcälgujt Jesucrist*

<sup>15</sup> Rut rajcdi ruhui lo Gueb-Dios, niluxh xi'nni najc si'cpac najc Dios; si'cpac rujñ lojni. Laani guyu'ni galodoo luxh rnibeeni lo guiralii ni yu' lo guedxliuj. <sup>16</sup> Por laani benchee Dios guiralii ni yu' xhaguibaa ni yu'za lo guedxliuj, renani ruzen sigajc renani di guzen: rereii, näjza reni rnibee loj rexangl Dios, näjza reni rnibee loj rexangl bendxab, nägajcza reyälñabee xten reguixhajg, sigajczani loj regubier, lo reguxhtis ni rajp yälñabee, guiraani guc-chee por laani, näjza par laani. <sup>17</sup> Alanabajñ Jesucrist galooli, che gajdli guirixtiej guedxliuj. Por laani yu' guira'ti ni yu'. <sup>18</sup> Laani najc nani rnibee guidoo, nalajznu rebeñ nani ahuililajz xtiidxni. Laani najc ni guläxtiej guira'ti. Ganiddoo laani huäjs lo rebengut te rnibeeni. Loj guira'ti ni yu' laatisni najc nani sajñ guinibee. <sup>19</sup> Sa'csi bidxaglajz Dad Dios ga'p Jesucrist guiralii yälñabee nani najc xten Dios, <sup>20</sup> por lagajcza Jesucrist badzu' Dios guira'ti ni yu', guibi'reni lojni, reni yu' lo guedxliuj sigajc reni yu' xhaguibaa, sa'csi abiäjñ-lajzni, aguredxi lajzni sa'csi bixe' xtiejñ Jesucrist lo cruzj.

<sup>21</sup> Luxh la'tu gujctu si'c benzijt lo Dios sa'csi galoo rdxe'chtu lo Dios neñ lastootu xcuent redzunguijdx nani bejntu. <sup>22</sup> Niluxh naj abiäjñ-lajz Dios abadzu' Jesucrist la'tu, agucnayatu gubi'tu lo Dios xcuent xtiejñ Jesucrist ni baxhe'ni lo cruzj cheni gujtni. Ni'c bejñni te che suutu nez lojni, xhetiru xtojñtu, xhet xhi guiniidi Dios lojtu sa'csi anayapactu. <sup>23</sup> Niluxh riäjñ chanuu sudzu'tztu, cuedxitu lo yälñrililajz. Na'c gusaantu chu gusiejch-lajztu te cuälaztu xtidx Jesucrist nani abiejn diajgtu. Rediidxga abasule'zanu loj guiraa rebeñ ni re' lo guedxliujre. Luxh lagajc narä, Pabl rusule'ä diidxga sa'csi parpac ni'c gule Dios narä.



*Dzuun guidoo najc xcuent Pabl*

<sup>24</sup> Naj rbalazä cadedä trabajw xcuenttu sa'csi retrabajw ni cadedä lagajc narä cagusa' nani cayäädx lo retrabajw xten Crist xcuent guidoo, nalajznu rebejn ni ahuililajz xtiidxni, ni najc si'c tiejxh Jesucrist. <sup>25</sup> Ni'c nacä te bejn ni rusule' diidx nen guidoo. Dzuunga baniidx Dios gunä par xcäl'nasa'ctu te gusule'äpac guiragajc xtidx Dios, <sup>26</sup> te gacbeenu rehxigabxhiga'tz nani najc xhiga'tz galododuxh niluxh naj abaluiini redidx-xhiga'tzre loj rexpejn. <sup>27</sup> Lojreni bejn Dios xhigab guluiini reyäl'nasa'c xten yälrdimbicha' xten redidx-xhiga'tz ni cagusule'ni loj rebenzijt. Yäl'xhiga'tzre säloj Jesucrist rbäjz nen lastootu ni'c runlojtu chaläjztu lo yälrdimbicha' xten Dios.

<sup>28</sup> Rusule'nu diidx xcuent Jesucrist, ruliidxnu guiraa rebejn, guideb yäl'najn ruluiinu te guisa' yäl'najn xten guiraa rebejn xcuent Jesucrist che guidzujjreni nez loj Jesucrist. <sup>29</sup> Xcuent dzuunre guideb xtipä runä dzuun con guiraa yäl'rnibee nani runiidx Jesucrist narä.

## 2

<sup>1</sup> Rlazä gacbeetu lacti cadedä trabajw xcuentu, näjza xcuent reni yu' guedx Laodicea, näjza xcuent guiraa reni gajd gumbee narä. <sup>2</sup> Te tioob lastoo guiraatu sa'csi abidxagsa' lastootu lo yäl'sanalajz, näjza te ga'ptu guiraa reyäl'nasa'c ni rajp bejn che racbesa'creni xtidx Dios. Te gumbeezatu guiraa redidx-xhiga'tz xten Dios xtdadnu näjza Dad Jesucrist. <sup>3</sup> Nen lastoo Dios näjza lastoo Jesucrist naga'tz guiraa reyäl'nasa'c xten guiraa reyäl'najn, guiraa yäl'numbee. <sup>4</sup> Dee rniä lojtu te di gusguee chu gusgueetu con rediidx-xhii. <sup>5</sup> Te palga ruti narä ro'c, canaj lazä la'tu, cabaa lazä cahuiä laaca cayujntu, sugatzu'tztu loj yäl'rilitajz xten Jesucrist.

<sup>6</sup> Ni'cni sigajc ni huililajztu xtidx Jesucrist, sigajcza colchasanäj Jesucrist. <sup>7</sup> Col'sudzu'tz lo Jesucrist si'c rsiobdzu'tz xlobaa te yajg. Col'sudzu'tz lo yäl'rilitajz xten Jesucrist si'c ni abisieedu. Colgudedduxhru xquixtios lo Dios.

*Yäl'nabancoob ni rudeed Jesucrist*

<sup>8</sup> Col'huii, na'c gusaantu guxhiid bejn xcäl'rilitajztu con xtiidxtisreni näjza rediidx nani xhet sajcdi, si'c najc xtidx reben galoo, näjza si'c najc diidx xcuent xhigab xten reben guedxliuj, di rediidxga gac si'cni rlajz Jesucrist.

<sup>9</sup> Sa'csi guiralii ni najc Dios, lagajc ni'c najc Jesucrist, niluxh yu' tiejxh Jesucrist. <sup>10</sup> Xhet cayäädxdx lo yäl'nabajn xten Dios ni rajptu sa'csi najctu tejsi con Jesucrist. Laani rnibee guiraa reyäl'guxhtis, guiraa reyäl'rnibee ni yu' guira lajt. <sup>11</sup> Sa'csi huililajztu Jesucrist aguyu'tu bee, niluxh xhet beedi nani rusäl bejn con naareni, alga xpee Jesucrist, ni najc yäl'rusia xtoj bejn sa'csi rusaan bejn redzunguijdx, rujnreni tejsi xhigab con Jesucrist. Si'c najc xpee Jesucrist. <sup>12</sup> Cheni gurobnistu najcni si'cni agujttu ni'c biga'tztu con Jesucrist, najczani si'cni gubansactu con laani sa'csi huililajztu rajp Dios yäl'rnibee nani gulässac Jesucrist lo rebengut. <sup>13</sup> Che najctu si'c bengut lo dojl, näjza sa'csi di bee niu' tiejxhtu, dxejcli baniidx Dios yäl'nabajn par tejpas lojtu con Jesucrist, badzucajni guiraa rextojl'nu. <sup>14</sup> Dios badzucaj guiraa releii nani basäuu nuure nen dojl, badzucajni lojni, sa'csi bacuaanini lo crujz, cadre gudijx Jesucrist guiralii rextojl'nu. <sup>15</sup> Cheni gujt Jesucrist lo crujz bejn gan loj reyäl'guxhtis näjza guiraa reyäl'rnibee xten bendxab näjza rexspritni. Basanxujynireni nez loj guiraa rebejn. Laani bejn ganreni cheni cuajni lo crujz.

*Col'quiil recos ni najc xten xhaguibaa*

<sup>16</sup> Nicla tejtü na'c cubee sa'ni xcuent reyäl'rajw näjza reyäl'rä', niclaza xcuent redxe lanij näjza rexchej rebäicoob, näjza redxej ni rusilajzni. <sup>17</sup> Guiraa redee najc si'csi te balaa xten nani churu jääd, te guluiireni ni rujn balaaga, nalajznu ni'c najc Jesucrist. <sup>18</sup> Na'c gusaantu gudzucaj bejn xcäl'nasa'ctu te gunreni gactu nadolajz, te gantu reangl. Sa' bejn ga richu' loj nani gajdreni fii; rchaloreni najczeni benro xcuent lagajc xhigabreni. <sup>19</sup> Laareni direni chanajl Jesucrist nani rnibee, nani rujn roobru tiejxhni, nalajznu

rexpejn̄ni, sa'csi lojni rca'reni ni rquiin lastooreni, te ruhaagni sa' teygareni si'c nadxaquiid bäǟl cuä' dzujt lo tiejxh bejn̄, te gacreni tejsi con Dios.

<sup>20</sup> La'tu agujttu con Jesucrist, abiriitu lo rexhigab xten guedxliujre. Naj ¿xhicuent guibajntu sigajctis nabajn̄ rebejn̄ nani di gumbee xtidx Jesucrist, ä? ¿Xhicuent rusoobtu rediidx ni caj lo releii? Loj releii caj sa' diidxre: <sup>21</sup> “Di chahuallu dee, di gaulu ni'c, di canlu dec.” <sup>22</sup> Luxh guiraa redee rnitloj che runnäj̄nini dzuun. Luxh guiraa sa' leiiga najc diidxtis nani ruluu bejn̄. <sup>23</sup> Guluiicani sa' releiiga rien̄ asdoo ruluuireni yäl̄nanduxh, luxh che rusoob bejn̄ releiiga rchaloreni raj̄nreni Dios, rchaloreni rac nadolajzreni, rusacsireni lagajc tiejxhreni. Niluxh xlai'si ruj̄nreni guiraa redzuunga, sa'csi sanuutis ruj̄nreni si'ctisni rlajz tiejxhreni.

### 3

<sup>1</sup> Palga anabansactu con Jesucrist, colquuil reyäl̄nasa'c ni yu' xhaguibaa cadre sobga' Jesucrist xladbee Dios. <sup>2</sup> Colyejn̄ xhigab xcuenttis reyäl̄nasa'c ni yu' xhaguibaa, na'c guntu xhigabtis xcuent reni yu' lo guedxliuj. <sup>3</sup> La'tu anajctu si'c bengut loj reyäl̄nasa'c ni yu' lo guedxliuj, luxh yäl̄nabajn̄ ni raj̄ptu naj, yäl̄nabaj̄nga naga'tz con Dios xcuent Jesucrist. <sup>4</sup> Che guluiilosac Jesucrist ni najc xcäl̄nabajntu, dxejc nāj̄za la'tu suluiilojtu con laani lo xcäl̄rdimbicha'ni.

#### *Yäl̄naban̄*biejw con yäl̄naban̄coob

<sup>5</sup> Colcuäl̄az redzunguijdx xten guedxliuj nani ruj̄ntu, yäl̄rusguee gunaxteb, yäl̄rujn̄ recosdxuudx, recos ni rdxagljaz tiejxhtu, rexhigab-guijdx, yäl̄rsiäb-lajz xhi xten bejn̄, guiraa redee ruj̄n runij̄t bejn̄ lo Dios sigajc ruj̄n bejn̄ che raj̄n̄ bejn̄ rebanäj̄b. <sup>6</sup> Guiraa redzuunga ruj̄n riääd xcäl̄rdxe'ch Dios yejc renani ruj̄n sa' redzuunga. <sup>7</sup> Nāj̄za la'tu bejntu sa' redzunguijdxga galoo cheni guyu'tu lo sa' yäl̄nabaj̄nga. <sup>8</sup> Niluxh naj̄ nāj̄za la'tu colgusaan recosre; nalajznu yäl̄rdxe'ch, yäl̄ruche'ch sa'ni, yäl̄rujn̄ latzsiäz sa'ni, yäl̄rniyaj sa'ni, nāj̄za rediidx-dxuudx ni rniitu. <sup>9</sup> Na'c gusgheetu resa'tu, sa'csi nanab gusaantu nani bejntu cheni guyu'tu loj redzunguijdx. <sup>10</sup> Colyajc te ben̄coob, ni guixeguixee cayanijr̄u xcäriejn̄ni, te gumbesa'ctu Dios, te gactu sigajc najc Dios ni benchee benguedxliuj. <sup>11</sup> Lo yäl̄naban̄coobre rutiru benzij̄t, niclaza xpejn̄ Israel, rutiza rebejn̄ ni ru' bee, niclaza bejn̄ ni di chu bee; rutiza benzij̄t, niclaza bejn̄ ni siääd zitduxh; rutiza mos, niclaza bejn̄ nani di chu lo bejn̄, sa'csi che rililajz te bejn̄ xtidx Jesucrist najcni tebloj con guiraa reni rililajz xtidx Jesucrist; guiraareni najc xpejn̄ Jesucrist.

<sup>12</sup> Naj agule Dios la'tu te gactu xpejn̄ni nani gac naya, nani sanäl̄ajzni, colguibajn̄ con yäl̄rulaslajz, na'c guidxe'chtu, colyacnadoo con yäl̄nadolajz, colniiza nadolajz. <sup>13</sup> Colyujn̄ huant, na'c guidxe'chtu loj sa'tu, palga yu' chu sa'tu rdxe'ch loj sa'ni, colgusiäj̄l-lajztu sigajcni basiäj̄l-lajz Dad Jesucrist lojnu xcuent rextol̄nu. <sup>14</sup> Che abejntu guiraa recosre, colguuilru yäl̄sanäl̄ajz nani rusa' loj guiraa recosre. <sup>15</sup> Xcäl̄rbedxilajz Dios guinibee nen̄ lastootu, sa'csi parpac ni'c gurejdxni la'tu, te gaczatu tejsi con rexpejn̄ Jesucrist. Colgudeed xquixtios loj Dios.

<sup>16</sup> Xtidx Jesucrist chuduxh nen̄ lastootu con guiraa yäl̄naj̄n, te guluiitu, te gulijdxtu tejsa resa'tu con redij̄ nani gulä'p toDavid xpala'n Dios, nāj̄za redij̄ nani rol̄tu, nāj̄za redij̄ nani rliä'p xpala'n Dios. Redij̄ga gol̄nu te guideednu xquixtios lo Dios nen̄ lastoonu. <sup>17</sup> Guira'ti nani guntu, sigajc rediidx ni rniitu, sigajcza redzuun ni ruj̄ntu, colyejn̄ guiraani con laj Dad Jesucrist, coldeed xquixtios lo Dios xtadnu con laj Jesucrist.

#### *Xho nanab guibajn̄* te famil̄ ni najc xpejn̄ Jesucrist

<sup>18</sup> Regunaa nani abach̄naa, colgusoob xtidx chääl̄tu sa'csi si'c rlajz Dad Jesucrist. <sup>19</sup> Reniguii nani abach̄naa, colchanäl̄ajz chääl̄tu, na'c guidxehnäj̄tureni. <sup>20</sup> Reni najc biuux, colgusoob xtidx xtadtu loj guira'ti, sa'csi si'c rchaglajz Dad Jesucrist. <sup>21</sup> Reni najc Dad, na'c guche'chtu rexi'ntu, didi gac-huin lajzreni. <sup>22</sup> Reni najc mos, colgucua diajg xtidx xlam̄tu lo guedxliujre loj guira'ti xtzuunni. Na'c gunsa'ctu dzuun che cahuiitisreni si'c ruj̄n renani ruspaa lajz bejntis. Con yäl̄nadolajz colyejn̄ dzuun sa'csi sanäl̄ajztu

Dios. <sup>23</sup> Guira'ti nani guntu, col<sub>l</sub>yej<sub>n</sub>ni guideb lastootu si'c xtz<sub>u</sub>un Dios, et si'c xtz<sub>u</sub>undi rebej<sub>n</sub>tis. <sup>24</sup> Anajntu lo Dad Jesucrist sica'tu yäl<sub>n</sub>asa'c ni najc yäl<sub>n</sub>abaj<sub>n</sub> par tejpas, sa'csi loj Dad Jesucrist rujntu dzuun. <sup>25</sup> Niluxh nani rujn recosguijdx, lagajc xcuent recosguijdxga gudeed Dios lojni, sa'csi tebloj rujn Dios guiraa rebenguijdx.

## 4

<sup>1</sup> Renani najc lam<sub>l</sub>, col<sub>l</sub>deed loj rexmostu nani riäj<sub>l</sub> xca'reni sa'csi anantu näjza la'tu rajptu xlam<sub>t</sub>u xhaguibaa.

<sup>2</sup> Col<sub>l</sub>chanuu col<sub>l</sub>nab lo Dios, col<sub>l</sub>susi<sub>n</sub> che rniabtu lo Dios. Col<sub>l</sub>gudeed xquixtios lo Dios. <sup>3</sup> Col<sub>l</sub>nabza lo Dios con nuure te gacnäj Dios narä gusule'ä xtidx Jesucrist, te gusule'ä redidx-xhiga'tz xten Crist. Xcuent ni'cza yu'ä ne<sub>n</sub> latzguiib. <sup>4</sup> Col<sub>l</sub>nab lo Dios te guyasi gusule'ä rediidxga si'cni riäj<sub>l</sub> guiniä.

<sup>5</sup> Col<sub>l</sub>guibans<sub>n</sub> loj rebej<sub>n</sub> nani di gumbee xtidx Jesucrist, col<sub>l</sub>gusule' diidx cheni riäj<sub>l</sub> guiniitu lojreni. <sup>6</sup> Rextiidxtu nanab gacni si'c rchaglajz Dios, saruduxhza gac xtiidxtu te gacbeetu xho riäj<sub>l</sub> gudzu'tu diidx loj tejegareni.

*Lult xtixtios*

<sup>7</sup> Tíquico, bejtznu ni sanälajznu, ni runsa'c dzuun, ni najc xmos Dad Jesucrist, laani gusule'ni diidx lojtu xcuent guiraa rextzunä. <sup>8</sup> Ruxhaläni lojtu te gacbeepactu xho yu'ä, te guspaani lajztu. <sup>9</sup> Laani jädnäzani Onésimo nani najc te betznu ni sanälajznu. Laani najc tej resa'tu. Laareni gusule'zareni guira'ti nani cadeednu ree.

<sup>10</sup> Aristarco, nani yunäj narä ne<sub>n</sub> latzguiib, ruxhal<sub>n</sub>i xtixtios lojtu näjza Marcw, betz prim<sub>n</sub> xten Bernabé (abacuaä lojtu xcuentni, xho guntu, palga jädhuiini la'tu, sacru col<sub>l</sub>huiini). <sup>11</sup> Näjza Jesús nani laaza Justo, ruxhal<sub>n</sub> xtixtios lojtu. Laatisreni najc rexpej<sub>n</sub> Israel nani cayacnäj loj dzuun xten xcäl<sub>n</sub>nibee Dios. Laareni ruspaa lazä. <sup>12</sup> Epafra, ni najc te sa'tu, ruxhal<sub>n</sub> xtixtios lojtu, luxh rniabduxhni xcuenttu lo Dios te sudzu'tztu guntu guiragajc ni rlajz Dios guntu. <sup>13</sup> Narä rniliä xho rdzuun Epafra xcuent la'tu, näjza xcuent rebej<sub>n</sub> ni yu' guedx Laodicea, näjza guedx Hierápolis. <sup>14</sup> Lucas, doctoor ni sanälajznu, näjza Demas ruxhalzareni xtixtios lojtu.

<sup>15</sup> Col<sub>l</sub>deed xtixtios loj rebejtznu nani yu' guedx Laodicea, näjza loj Ninfas, näjza lo rebej<sub>n</sub> nani re' rolijzni. <sup>16</sup> Cheni agulujx bil<sub>t</sub>u guiitzre, col<sub>l</sub>guxhal<sub>n</sub>i te jielni ne<sub>n</sub> guidoo xten guedx Laodicea, dxejcti col<sub>l</sub>yelza guiitz nani baxhalä lo reben<sub>n</sub> guedx Laodicea. <sup>17</sup> Col<sub>l</sub>ye'tz loj Arquipo: “Bahuisa'c xtz<sub>u</sub>un Dad Jesucrist nani cua'lu lojni. Bensa'c dzuunga.”

<sup>18</sup> Lagajc narä Pabl rucuaä xtixtiosre con lagajc naä, con lagajc xleträ. Col<sub>l</sub>gusnaj-lajztu narä yu'ä latzguiib. Gacnäj Dios la'tu. Sugacni si'c.

## Guijtz Ganid Lo Rebe<sub>n</sub> Tesalónica

### *Bacuaa Pabl con reexamigwni lo guidoo guedx Tesalónica*

<sup>1</sup> Narä, Pabl, näjza Silvan, näjza Timoteu cacuaanu guijszre lojtu, resa'nu ni yu' guidoo lo guedx Tesalónica, reni yu' lo Dios Xtradnu näjza lo Dad Jesucrist. Guspaa Dios näjza Jesucrist lajztu, guscuecdxizareni lajztu.

### *Xho huililajz be<sub>n</sub> Tesalónica xtidx Dios*

<sup>2</sup> Guet-guejt rdeednu xquixtios lo Dios xcuent guiraatu, rnaduxhza laaznu la'tu cheni rbejdx rniabnu lo Dios. <sup>3</sup> Ruzä'tnu lo Dios xtradnu xho rujntu dzuun sa'csi rililajztu xtidx Dios; näjza xho runduxhtu dzuun te racnäjtu sa'tu ni xhet rajpdi sa'csi rinälajztu Dios; näjza xho rutip lajztu cabäjztu guibi' Dad Jesucrist lo guedxliuj. <sup>4</sup> Bejznu, racbeenu sanälajz Dios la'tu, laani aguleni la'tu. <sup>5</sup> Sa'csi che basule'nu xtidx Dios lojtu, et ganax diidxtis gujcn, niluxh xcälrnibee Sprit Dxan xten Dios ne<sub>n</sub> lastootu bejn gucbeepactu diidx ni najc didxlii. Nanchesä'ctu xho gujcnu che guyu'nu lojtu. Si'c baluiinu la'tu te guibansa'ctu.

<sup>6</sup> Sigajcni nabannäjnu Dad Jesucrist sigajcza gusloj cua'tu xmoodnu, basoobzatu diidx guideb xcälrbalajz Sprit Dxan xten Dios ni baniidxni lojtu, mase gudejdtu trabajw. <sup>7</sup> Si'c gujc te baluiitu loj guiraa reni rililajz nez Macedonia näjza nez Acaya xho nungäj<sub>l</sub> gac. <sup>8</sup> Ni'c abire'ch xtidx Dios, xhet nejzdi Macedonia näjza Acayatis, bire'chza diidx guira nejz. Ro'c najnreni xho sanälajztu Dios, ni'c xhetru nanabti guiniinu lojreni. <sup>9</sup> Alga lagajc laareni rujyreni diidx xho guyu'nu lojtu; nägajcza xho basaantu gojntu rebanäj<sub>b</sub> te rajntu Dios ni nabajnpac ni najc guliipac. <sup>10</sup> Rujyzareni diidx xho cabäjzzatu guibisac Jesucrist lo guedxliuj. Laazani najc Xi'n Dios ni guläs Dios lo rebengut, Jesucrist ni rusläa nuurnu lo xcälrdxe'ch Dios ni churu siäd.

## 2

### *Xhi bejn Pabl ne<sub>n</sub> guedx Tesalónica*

<sup>1</sup> Naj lagajc la'tu najntu, bejznu, et xlia'di bio'pnu lojtu. <sup>2</sup> Et najntu xho gudéreni loonu, basacsíreni nuurnu guedx Filipos. Niluxh mase gudejdn trabajw, gusutijpnu lo Dios, xhet bidxejbtinu basule'nu xtidx Dios lojtu, mase gudejdn trabajwduxh. <sup>3</sup> Sa'csi dinu nulijdx la'tu con didx-xhii, niclaza didx-dxuudx, niclaza diidx ni rusguee. <sup>4</sup> Sa'csi rsoobnu xtidx Dios basannäjni nuurnu xtiidxni, ni'c rusule'nu xtidx Dios. Dinu guinii diidx te jiansa'cnu lo bejn, rniinu diidx te jiansa'cnu lo Dios ni ruhuii lastoonu. <sup>5</sup> Anajntu xho basule'nu xtidx Dios. Nicla tej dinu ninii xhi stee diidx ni xhet sajcdi lojtu. Dizanu nusule' xtidx Dios te xhiga'tz niennu gaan xhi nica'nu. Dios nanchee xcuent ni riennu. <sup>6</sup> Dizanu nidiil guiliä'p bejn xpala'nnu, niclaza la'tu, niclaza chu stee bejn, mase nungäj<sub>l</sub> niennu niacbeetu rajpnu yälrnibee sa'csi baxha<sub>l</sub> Jesucrist nuurnu. <sup>7</sup> Niluxh guc nadolajznu che guyu'nu lojtu, cuanäjnu la'tu si'c rcanäj te na<sub>n</sub> rexpäzni. <sup>8</sup> Sa'csi huiälazduxhnu la'tu, biennu xhigab xhet ganaxdi xtidx Dios guiniidxnu lojtu, näjza lagajc xaimnu guniidxnu te guseednu la'tu xtidx Dios sa'csi sanälazduxhnu la'tu. <sup>9</sup> Bejznu, la'tu rnalajztu xho biennu dzuun te biennu gaan xcäl'nabaannu. Biennu dzuun dxej-yääl, te di niednäjtu nuurnu la<sub>l</sub> ni basule'nu xtidx Dios lojtu.

<sup>10</sup> Lagajc la'tu nancheetu, sigajc nanchee Dios, laaca biennu che guyu'nu lojtu: gujcnu bejn ni randuxh Dios, gujcnu bendxo<sub>j</sub>n, gujcnu bensa'c. <sup>11</sup> Anajntu xho baliidxnu la'tu, xho bascuedxinu lajztu si'c runnäj te dad rexingaanni. <sup>12</sup> Guiraa dee biennu, te guibansa'ctu si'c nungäj<sub>l</sub> gun reni najc xi'n Dios, lagajc Dios ni gurejdx la'tu te chunäj<sub>t</sub>uni lo xcälrnibeeni näjza lo xcälrdimbicha'ni.

<sup>13</sup> Ni'cni rdedduxhnu xquixtios lo Dios sa'csi che biejn diajgtu xtidx Dios ni basule'nu lojtu, cua'tuni si'c xtidx Dios xhet si'c xtiidxdi be<sub>n</sub> guedxliuj. Niluxh guli<sub>i</sub> xtidx

Diosni, sa'csi rusiani lastoo renani rililajz. <sup>14</sup> Bejtznu, dxejcti bejntu lagajc si'c rujn rebejn xquidoo Dios nen reguedx Judea reni najc xpen Jesucrist; luxh gusajctu lagajc ni gusajcreni, basacsí reben lajdxtu la'tu. Sigajcza birinajl rexpen Israelreni. <sup>15</sup> Rexpen Israel bagu't Dad Jesucrist, si'cza bagu'treni lagajc rexprofe'treni, renani bacuaa xtidx Dios, barilaagwzarení nuurnu. Direni chanálajz Dios, dizarení gusaan chanajl rebejn Jesucrist. <sup>16</sup> Che rlanjnu gulijdxnu reni digac rexpen Israel, te nájza laareni laareni lo dojl, direni gusaan, si'ctis cagutajlreni xtojlni. Niluxh naj abiaádpac yálraxe'ch xten Dios yejcreni.

### *Rlanj Pabl nihuisacni ro'c*

<sup>17</sup> Bejtznu, mase biriinu ro'c, naj dirunu guihuii lojtu, rnalazduxhnu la'tu, batijp lajznu jio'pnu ro'c, rlazduxhnu fisacnu lojtu. <sup>18</sup> Rlanjnu nio'pnu, narä, Pabl xhidal huält rlazä niälä, niluxh bendxab di nusaan. <sup>19</sup> ¿Xhini'c najc xcälrbääznu, xcälrbalajznu, xcälracnaronu? Lagajc la'tu gactuni che suunu nez loj Jesucrist che jiádsac Dad Jesucrist. <sup>20</sup> La'tu najc ni ruspaa lajznu ni rliä'pza xpala'nnu nez lo Dios.

## 3

<sup>1</sup> Dxejc, che dirunu nutijp lajznu, biennu xhigab bianxtebä guedx Atenas. <sup>2</sup> Dxejc baxhalä Timoteu, bejtznu nez loj Jesucrist, te biädhuiini la'tu, sa'csi laani najcni te xpen Dios ni runnäj nuurnu dzuun, rniini xtidx Jesucrist, te guscuecdxini lajztu, guzudzu'tzni xcälrlilajztu. <sup>3</sup> Te nicla tejtu di guidxejb che jiädä reyälhuin sa'csi la'tu anajntu agule Dios nuurnu ni'c sidejndu trabajw. <sup>4</sup> Cheni yusijcnu lojtu, rnixgaanu lojtu sidejndu trabajw; niluxh si'cni agusojb diidxga naj. <sup>5</sup> Ni'cni diruna nutiplazä, baxhalä chu jiädnä diidx xho najc xcälrlilajztu, sa'csi cadxebä andi abasguee bendxab la'tu, luxh xlia'si biennu dzuun guyu'nu lojtu.

<sup>6</sup> Naj agubi' Timoteu, biädhuiini la'tu. Biadnäni ganax didxlii xho sanuu rililajztu xtidx Jesucrist, xho rinälajztuni, nájza sanuutis rnalajztu nuurnu, rlanjzatu fiitu loonu, sigajcza nuurnu rlanjznu fiinu lojtu. <sup>7</sup> Ni'cni, betznu, masä riäädx xhixtennu, masä rdeednu trabajw, rbalajznu sa'csi la'tu sanuutis rililajztu xtidx Dios. <sup>8</sup> Naj laaca rdxunnu sa'csi racbeenu sudzu'tztu nez loj xtidx Dad Jesucrist. <sup>9</sup> Xhocha gac guideednu xquixtios lo Dios xcuent guiraatu näj xcuent yälrbalajz ni yu' lastoonu xcuent la'tu nez lo Dios. <sup>10</sup> Dxejyäl rniabnu lo Dios gusaanni jiophuiinu la'tu te gusa'nu guiraa rediidx ni cayäädx gabeetu xcuent xcälrlilajztu.

<sup>11</sup> Rniabnu lo Xtdanu Dios, nájza lo Dad Jesucrist, gacnäjreni nuurnu te gac jiophuiinu la'tu. <sup>12</sup> Rniabzanu lo Dad Jesucrist, gunni gustiobruni lastootu te ga'prutu yälrinälajz loj resa'tu nájza loj guiraa rebejn, si'cni rinälajznu la'tu, <sup>13</sup> te gunni sudzu'tz lastootu, na'c ga'ptu dojl nez lo Xtdanu Dios, che jiädä Jesucrist nájza guiraa rexpejn ni xhaguibaali.

## 4

### *Guibajnnu si'c rchaglajz Dios*

<sup>1</sup> Naj, rebejtznu, rniabduxhnu lojtu, ruliidxnu la'tu con laj Dad Jesucrist, guibajntu si'cni baluiinu la'tu nungäjl guibajntu te guspaatu lajz Dios, te si'c chanuutis guibansa'ctu nez lo Dios.

<sup>2</sup> La'tu, anajntu rediidx ni baluiinu lojtu con xcälrnibee Dad Jesucrist. <sup>3</sup> Lagajc Dios rlanj nayatis guibansa'ctu, na'c gun niguii dojl guesnäj gunaa ni di gac chäälni, sigajcza na'c guesnäj gunaa niguii ni di gac chäälni. <sup>4</sup> Tejgatu gantu xho guibannajtu chäältu nayatis nájza xpala'nni. <sup>5</sup> Xhet si'c ni rujndi regunadxab nájza reniguii, nicla si'c ni rujn rebejn ni di gumbee Dios. <sup>6</sup> Rut chutejditu gusguee bejtzni lo redzunguijdxre, sa'csi Dios susacsí guiraa rebejn ni rujnza redojlre, ni'cni abiniinu lojtu, agunixgaanu diidxre lojtu. <sup>7</sup> Sa'csi Dios gurejdxni nuurnu te guibajnnu lo yäl'nabannaya xtenni, xhet lo yäl'nabandxuudxdi. <sup>8</sup> Ni'cni bejn ni di gucuadiajg rediidxre, dini gac xtiidx te bejn ni dini cuadiajg, xtiidxpac Dios ni dini cuadiajg, Dios nani abaniidx Sprit Dxaan xtenni loonu.



<sup>9</sup> Ditu guiquiin gucuäärü diidx xho chanälajztu resa'tu, sa'csi lagajc Dios abaluiitu xho chanälajztu resa'tu. <sup>10</sup> Luxh rinälajztu guiraa reni rililajz, guiraa reni siääd guideb nez Macedonia. Ni'cni rniabnu lojtu bejztu, chä'pru xcälrinälajztu. <sup>11</sup> Colgutijp lajztu, dxitis colguibajn, coljiu xtzuuncatu, lagajc naatu colyejn dzuun si'cni agunibeenu guntu. <sup>12</sup> Te fii rebejn ni di chalilajz laaca nabansa'ctu, nägajcza te xhet jiäädxdü xhi rquiintu.

*Xho gac che jiädsac Jesucrist lo guedxliuj*

<sup>13</sup> Bejztu, rlanjnu gacbeetu xcuent rebengut te di gac-huin lajztu si'c rujn rebejn ni di chalilajz xtidx Dios. <sup>14</sup> Si'c ni rililajznu gujt Jesucrist, dxejc gubansacni, sigajcza rililajznu suspansac Dios guiraa reni nagayejs nen baa, renani huililajz xtidx Jesucrist. Luxh che guibi' Jesucrist, siädnänireni.

<sup>15</sup> Xcuent xcälrnibee Jesucrist rniä lojtu, nuurnu ni nabajnnu che jiädsac Jesucrist, dinu nid loj reni nagayejs nen baa. <sup>16</sup> Sa'csi lagajc Dad Jesucrist siäjt lo guedxliujre, sivedxa'ni, siejnza xse' guixhajg ni rnibee, sivedxa'za trompet xten Dios. Dxejc sibaxgaa reni nagayejs nen baa, reni huililajz xtidx Crist. <sup>17</sup> Dxejc nuure ni nabansijcnu sidxaagnureni nen rebäj te lo bej chachagloonu Dad. Si'c chonnu cholaznäjnuni par tejpas. <sup>18</sup> Ni'cni rniä lojtu, colcuedxilajz sa'tu con rediidxre.

5

<sup>1</sup> Niluxh xcuent redxejga, reijzga, xhet riquiinditu gucuääni lojtu, <sup>2</sup> sa'csi la'tu anansa'ctu sidzujn dxej ni jiääd Jesucrist cheni rut cayunlojdini, sigajc che riääd te gubaan yääl. <sup>3</sup> Che canii bejn: "laaca dxunnu, dxunsa'cnu", chela gacbeerene acadejdrene trabajw si'c che rdzujn yälñayan te gunaa che rajl xi'nni, luxh digacdi guxunreni lojni. <sup>4</sup> Niluxh bejztu, di gac nayäältu te di che xhet cayunlojditu dxej xten Jesucrist, guidzunxhiga'tz dxejga si'c gubaan. <sup>5</sup> Sa'csi guiraatu najctu beñsa'c nabajntu lo bianij, lo rdxee, dinu gac benguijdx, dinu guibajn lo yääl, lo yälrcäy. <sup>6</sup> Ni'cni di nungäjñ guidiesnu si'c rejs stecuaa bejn, ni'cni nungäjñ sunasinu na'cza jiennu redojl ni rlanj tiejxhnu. <sup>7</sup> Reni rejs, rejsrene yääl, reni rsiojz, rsiojzrene yääl. <sup>8</sup> Niluxh nuure nabajnnu lo rdxee, ni'cni nanab na'c jiennu si'c, riäjñ xca'nu yälrililajz näjza yälrinälajz si'c rca' soldaad gamangw guuib ni rajcwni, ni rusäuu lastooni. Riäjñza guiläzdzu'tznu sa'csi yälrusläa lo dojl najc si'c xhumbrel-guib ni ru' yejc soldaad ni rusäuu yejcn. <sup>9</sup> Sa'csi di Dios nibe nuurnu te chonnu gabijl, alga guleni nuurnu te xca'nu yälñabajn ni rudeed xi'nni, Jesucrist. <sup>10</sup> Sa'csi gujt Jesucrist lacuaa nuurnu, te guibannäjñuni masä nabajnnu lo guedxliujre o nagayejsnu nen baa che guibi'ni. <sup>11</sup> Ni'cni, colguspaa lajz sa'tu, tejtü sigajcza steetu, sigajcni cayujntu naj.

*Rulijdx Pabl resa'ni*

<sup>12</sup> Bejztu, rniabduxhnu lojtu, colhuiduxh reni rului xtidx Dios lojtu, sa'csi agule'c Dadrene te guinibeerene, te gulijdxrene la'tu. <sup>13</sup> Riäjñza chanälazduxhtureni xcuent dzuun ni rujnrene. Colcuedxi con resa'tu.

<sup>14</sup> Rulijdxnu la'tu, bejztu, colgulijdx reni najc benlatsiaj; colsudzu'tz lajz reni guxii rbalajz lo xnez Dios; colgacnäj reni di gumbesa'c xtidx Dios, colcuedxi lajz guiraasi bejn.

<sup>15</sup> Colhuii di chu tejtü gunza dolguijdx lo rebejn ni rujn dolguijdx. Laaca guntu ganax dzunsa'c lo sa'tu, sigajcza lo chutis bejn.

<sup>16</sup> Colguibalajztis guideb nabajntu. <sup>17</sup> Na'c cuääz guiniitu lo Dios. <sup>18</sup> Mase xhitis rsiajctu, coldeed xquixtios lo Dios, sa'csi si'c rlanj Dios gun reni rililajz Jesucrist.

<sup>19</sup> Di cuälaztu xtidx Sprit Dxan xten Dios ni rniini nen lastootu. <sup>20</sup> Na'c cuälaztu xtidx reni rni xtidx Dios xcuent nani churu gac. <sup>21</sup> Colquiil guiraa rediidx, coljiannäjñtis rediidx ni najc didxsa'c. <sup>22</sup> Colbicaj lo guralii dolguijdx.

<sup>23</sup> Lagajc Dios, Dios ni rbecdxi lajztu, gusiapac lastootu, te cucheeni xaimtu, näj lastootu, näjza tiejxhtu, te na'c guntu dojl ni di riäjñ guntu te cuääztu dxej ni guibisac Dad Jesucrist. <sup>24</sup> Dad ni gurejdx la'tu rujnza guiraa ni rniini, ni'c sujnzani guiraa redzuunre.

*Ruzadiidxnireni*



<sup>25</sup> Bejtznu, colnab lo Dios xcuent nuurnu.

<sup>26</sup> Colgudeed xtixtios lo rebejtznu ni yu' ro'c.

<sup>27</sup> Con laj Dad Jesucrist rnibeä, goltu guiitzre loj guiraa rebejtznu.

<sup>28</sup> Gacnäj Dad Jesucrist la'tu. Sugacni si'c.

## Guijtz Ni Rojp Lo Reben Tesalónica

*Rucuaanu guiitzre lojtu, rexpen* Jesucrist ni rbäjz guedx Tesalónica

<sup>1</sup> Narä Pabl, näjza Silvan näjza Timoteu, cacuaanu guiitzre lojtu, rebejtznu ni yu' guidoo lo guedx Tesalónica, reni yu' lo Dios Xtadnu näjza lo Dad Jesucrist. <sup>2</sup> Gacnäj Dios Xtadnu näj Dad Jesucrist la'tu, guscuecdxizareni lajztu.

*Gun Dios yälguxhtis loj reben*doj] che guibi' Jesucrist lo guedxliuj

<sup>3</sup> Bejtznu, rudeednu xquixtios lo Dios xcuenttu, si'c riäj] jiennuni, sa'csi xcälrlilajztu siädroobru, näjza yälrinälajz ni rajp tejgatu näjza sa'tu siädroobruni. <sup>4</sup> Ni'cni rliä'pnu xpala'ntu nen reguidoo xten Dios. Rbaa lajznu sa'csi rsiudzu'tztu sanuutis rililajztu xtidx Dios mase rdejdtu trabajw, rusacsí bejntu. <sup>5</sup> Dee ruluiipac xcälguxhtis Dios najc laaca, ni'c nii Dios riäj] jiu'tu lo xcälrnibeeni sa'csi cadejdtu trabajw xcuent yälrnibeega.

<sup>6</sup> Sa'csi rujn Dios xhigab riäj]za quiix reni bateedtu trabajw xtoj]reni, ni'c suteedzani reni'c trabajw. <sup>7</sup> Niluxh la'tu ni cadejdtu trabajw, sujn Dios gusilaznäjtu nuure che guluiiloj Jesucrist, siriini xhaguibaa siädnäjni rexanglni ni saj, ni rnibeduxh. <sup>8</sup> Lo te balduxh siädni, dxejc guisloj susacsíduxhni reni di gan] Dios, dizareni gusoob xtidx Dad Jesucrist nani rudzucaj dojl. <sup>9</sup> Guiraareni sidejdreni trabajw, par tejpas agunijtreni, zijt churen lo Dios, lo yälrdimbicha' xten xcälrnibeeni. <sup>10</sup> Che jiäd Dad guiriini xhaguibaa, dxejga siliä'p rexpej]ni xpala'nni, sidxelojza renani huililajz laani näjza la'tu, sa'csi huililajztu diidx ni basule'nu che guyu'nu lojtu.

<sup>11</sup> Ni'c rniabtisnu lo Dios por la'tu, rniabnu lo Dios guinaj lajzni nabajntu si'c riäj] guibaj] reni guleni. Rniabzanu guniidx Dios lojtu guntu guiraa redzunsac ni rchaglajz Dios guntu, gacnäjzani la'tu con xcälrnibeeni te guntu redzuun ni rujntu sa'csi rililajztu. <sup>12</sup> Te chä'p xpala'n laj Dad Jesucrist si'cni nabajntu, te laani guiliä'pzeni xpala'ntu, xcuent yälrinälajz xten Dios näjza Dad Jesucrist.

## 2

*Bendolduxh*

<sup>1</sup> Naj, rniabduxhnu lojtu bejtznu, xcuent dxej ni jiäd Jesucrist, dxej ni guidojpzanu lojni, <sup>2</sup> na'c chugajtu yarsia'. Na'cza gusaantu guchejbreni la'tu con diidx ni ruluii te bejn ni najc profe't, nicla con diidx ni nii stee bejn lojtu, niclaza con diidx ni naareni lojtu caj loj te guiitz ni naareni baxhalnu lojtu, cadre caj “dxej ni guibi' Jesucrist abidzuj]”. <sup>3</sup> Na'c gusaantu gusguee bejn la'tu xcuent rediidxre. Che gajd dxejga guidzuj], su' bejn ni sibälaz xtidx Dios, dxejc suluiiloj benlatsiaduxh, xi'n nani sinitloj par tejpas. <sup>4</sup> Bejnre siliä'p lagajc xpala'nni, sidxe'chni lo guiraa ni sanä laj Dios, näjza xhitis ni raj] bejn, te cueni nen xquidoo Dios, guluiiloj]ni si'c lagajc Gueb Dios.

<sup>5</sup> ¿La di lajztu guisaj cheni guyusicä lojtu, rniä rediidxre lojtu, ä? <sup>6</sup> Naj la'tu anajntu xhini'c ruscuääzni, te na'c guiricajni ansde guisa' redxej xtenni. <sup>7</sup> Te yälxhiga'tz najc dzunlatsiaj ni alacayajc lo guedxliuj, cayäädxtis guibicaj nani caguscuääzni galäiini. <sup>8</sup> Dxejc suluiiloj benlatsiaduxhre. Niluxh Dad Jesucrist, sugu'tnini con bero'ni, che guibi' Jesucrist lo guedxliuj xpianijni sujn nitlojni. <sup>9</sup> Benlatsiaduxhre najc si'cpac najc bendxab. Che guidzuj]ni, guidzuj]ni si'c te bejn nani rnibee, suj]ni seen, suj]nzani milagrw ni rusguee. <sup>10</sup> Con xcällatsiaj bejnre susgueeni guiraa renani alagunij]t lo Dios sa'csi direni nicäjb ninälajzreni didxlii ni nuslaareni nen dojl. <sup>11</sup> Ni'cni susaan Dios jiäd te yälrusgueduxh te chalilajzreni didx-xhii. <sup>12</sup> Te gabij] jii guiraa renani di nicäjb nililajz didxlii, alga bidxaglajzreni yällatsiaj.

*Reni gule Dios guirii nen* dojl

<sup>13</sup> Niluxh nuurnu riäj] gudeedtisnu xquixhtios lo Dios por la'tu, bejtznu, ni sanälajz Dad Jesucrist. Rudeednu xquixhtios sa'csi galooli gule Dios la'tu te guslaani la'tu lo dojl,

xcuent Xsprit Dxanni ni rusia lastootu, nájza redidxlii ni huililajztu. <sup>14</sup> Ni'cni che biejn diajgtu diidx ni basule'nu lojtu, gurejdx Dios la'tu, te xca'zatu xcälrdimbicha' Jesucrist.

<sup>15</sup> Naj bejtznu, colchanuu, colsudzu'tz, na'cza jiällajztu rediidx ni balijdxnu la'tu che guyu'nu ro'c, nájza rediidx ni bacuaanu lo guijtzi ni baxhalnu lojtu. <sup>16</sup> Lagajc Dad Jesucrist, náj Dios Xtadnu, ni sanälajz nuurnu, ni ruscäjñ lajznu par tejpas, ni baniidx xcälrbääznu racnäjñi nuunu, <sup>17</sup> guspaani lajztu, gusudzu'tzni la'tu lo guiraa redidxa'c ni guiniitu nájza redzuunsa'c ni guntu.

### 3

*Colnab lo Dios xcuent nuurnu*

<sup>1</sup> Bejtznu, colnab lo Dios xcuent nuurnu te chanuu guire'ch xtidx Dad Jesucrist, te che gusoob bejn diidxga chä'p xpala'n diidxga, sigajcni gujcní con la'tu. <sup>2</sup> Colnabza lo Dios xcanäjñi nuurnu te di tednu ladzñaa rebenlatsiaj, rebenguijdx, sa'csi xhet guiraadi bejn rajp yälirililajz. <sup>3</sup> Dios rusooob xtiidxni, susudzu'tzni la'tu, sacnäjzani la'tu te di sactu dolguijdx. <sup>4</sup> Abascuedxi Dios lastoonu xcuenttu sa'csi anancheenu cayujntu guira'ti nani gunibeenu guntu, luxh si'cza sinuu gusoobtu xtiidxnu. <sup>5</sup> Canabä lo Dad Jesucrist guniidxni gacbeerutu xcälsanälajz Dios, canabäza colcuedcxi lajztu si'cni bejn Crist che gudejñi trabajw.

*Nanab jiennu dzuun*

<sup>6</sup> Bejtznu, con laj Xtad Jesucristnu, rnibeenu guibicajtu lo chutis te sa'nu ni ricanzajtis, ni di rlajz gunni dzuun. Guibicajzatu loj reni di guibajñ si'cni baluiinu riäjñ guibajntu. <sup>7</sup> La'tu anajntu xho riäjñ guibajntu, chanuutu guntu si'cni riennu nuure. Najntu nuurnu dinu nicanzaj che guyu'nu lojtu sa'csi biennu dzuun. <sup>8</sup> Dizanu nidauxlia' xcu'n chu tejtü; guiraani bidiixnu, biennu dzuun dxej-yääl, te di nutaalnu xtzuun chu tejtü. <sup>9</sup> Masä nungäjñ niniabnu niacnäjtu nuurnu, dinu niniabni; alga biennu dzuun te baluiinu xho chanuutu. <sup>10</sup> Cheni guyu'nu lojtu, gunibeenu scree guntu: Chutis ni di rlajz gun dzuun di riäjñ xca'ni xhi gauni. <sup>11</sup> Aguniireni loonu baltitu ricanzajtis, direni gun dzuun, alga rihuiireni xhi cayujñ rebejn. <sup>12</sup> Rulijdxnu rebejnre, rnibeenureni con laj Xtad Jesucristnu: colcuedcxi, colyejn dzuun te gautu.

<sup>13</sup> Bejtznu, na'c guidxajgtu guntu dzunsa'c. <sup>14</sup> Palga yu' chu tejtü di gucuadiajg xtiidxnu ni caj lo guijtzi, colhuii chuni'cni te na'c guchaagtuni, te guitujyni. <sup>15</sup> Niluxh na'c ga'ptuni si'c ni rdxe'ch lojtu, colguliidxni si'c bejtztu.

*Rusadiidxnireni*

<sup>16</sup> Gueb Dios xten yälrbedxi, guscuedcxi lajztu guixe-guixee, masä xhitis sajctü. Jiannäj Dad Jesucrist guiraatu.

<sup>17</sup> Narä, Pabl cacuaä xtixtiosre con ñaäpac si'c runä lo guiraa rexquitzä, scree rucuaä. <sup>18</sup> Gacnäj Xtad Jesucrist guiragajctü. Sugacni si'c.

## Guijtz Ganid Lo Timoteu

### *Pabl rucuaa te guijtz lo Timoteu*

<sup>1</sup> Narä Pabl, nacä te apost xten Jesucrist, rucuaä guijtzre lojlu. Nacä apost sa'csi si'c gunibee Dios ni ruslaa nuurnu lo dojl näjza Dad Jesucrist nani cholääznu. <sup>2</sup> Timoteu, luj najclu si'cpac xinganä lo yälrlililajz. Xtadnu Dios näjza Xtad Jesucristnu gacnäjl, gulaslajzreni luj, guscuecdxireni lastoolu.

### *Pabl rulijdx xcuent reni rului diidx-xhii*

<sup>3</sup> Che sia'ä reguedx Macedonia, gunibeaä jia'nlu guedx Éfeso te gulijdxlu gaii bejn te na'c guluiireni garenca diidx, <sup>4</sup> te na'c jiutejreni rexcuent rebenttiemp, te na'cza jiuduxhreni chu gujc rexpengoldooreni, sa'csi di rediidxre gacnäj guiroobru lastooreni si'c rustioob yälrlililajz lastoonu. Naj rnibeaä si'c chanuu gulijdxlu rebejn.

<sup>5</sup> Rulijdxnu bejn te ga'preni yälrinälajz sa'reni. Ganid nanab gacnaya lastooreni, nanab ga'preni xhigabsa'c, nanabza chalilajzpacreni. <sup>6</sup> Yu'reni abaro'n rediidxre, riejytis ro'reni saniduxhreni diidx ni xhet sajcdi. <sup>7</sup> Rlajzreni gacreni bejn ni najn leii, niluxh niclaza laareni direni gacbee xhi säloj ni rniireni, niclaza xhi säloj rediidx ni ruluiireni, räjpreni, 'didxliipac dee'.

<sup>8</sup> Anajnnu leii xten Dios najc sacduxhni, palga jiennu si'cni rniipacni. <sup>9</sup> Najnnu di leii gac par beñsa'c, najcni par reni najc beñlatsiaj ni di jiu leii xten Dios, näjza reni di gusoob diidx; par reben guiidx, näjza rebendojl; par reni di jiu Dios, näjza reni rusguee; par reni rugu't xtadni, xnanni, näjza guiraa reni rugu't bejn; <sup>10</sup> par reni resnäjä te gunaa ni digac chäälneni, näjza reni resnäjä lagajc saniguiireni; par reni rbajn bejn; reni rnii didx-xhii; reni rnii didx-xhii si'c didxle' parsi rusguee sa'reni; näjza bejn ni rujn xhitis xhi xtee dzuun ni digac dzunsa'c, <sup>11</sup> nalajznu sa' redzunsa'c ni rulijdx xtidx Dios-le', diidx ni ruslaa lo dojl. Narä biannää diidxre.

### *Rudeedni xquixtios lo Dios sa'csi rulaslajznini*

<sup>12</sup> Rdedä xquixtios lo Dad Jesucrist ni runiidx yälrnibee narä sa'csi najnni nasobdidxä, ni'cni guleni narä gunä xtzuunni. <sup>13</sup> Luxh galoo guniyaäni, birinalä xpejnni, basacsä'reni. Niluxh Dios balaslajz narä, sa'csi dina niacbeä xhini'c cayunä, sa'csi gajdna chalilazä. <sup>14</sup> Niluxh lacti guroob gujc yälracnäjä xte Xtadnu, guideb yälrlililajz, näj yälsanälajz ni rajp Jesucrist.

<sup>15</sup> Diidxre najc guliduxh, nanab chalilajzpacuni: Jesucrist biääd lo guedxliujre te guslaani reben dojl; lo reben dojl narä nacäru bendolduxh. <sup>16</sup> Ni'cni balaslajz Dios narä, mase nacä bendolduxh lo guiraareni, te ganid con narä guluini xho rbäjz Jesucrist te chalilajz bejn xtiidxni, te filoj reni churu chalilajz xtiidxni te ga'preni yäl'nabajn par tejpas. <sup>17</sup> Dios najc reii, reii ni di guet, reii ni di guzen, laatisni najc Gueb Dios ni nanduxh, ni'cni colguiliä'p xpala'nni, colgajnni guideb guibajntu näjza par tejpas. Si'c gacni.

<sup>18</sup> Xi'nä, Timoteu, dee najc yälrlulijdx ni runidxä lojlu te gucuasa'clu si'c te soldaad ni abisieed, sigajc ni gunii reprofet xcuentlu galoo. <sup>19</sup> Di gunijtlu yälrlililajz, bejnza xhigabsa'c, sa'csi yu'reni abaro'n xtidx Dios, ni'c abanijtreni yälrlililajz. <sup>20</sup> Si'c gusajc Himeneo näj Alejandro, luxh abatedä'reni ladzñaa bendxab te guisieedreni na'c guiniya'reni Dios.

## 2

### *Ruluiini xho guiniabreni lo Dios*

<sup>1</sup> Rulidxälu ganiddoo cueedxlu, guiniablu lo Dios, gudeedlu xquixtios lo Dios xcuent guiraa rebejn. <sup>2</sup> Guiniabzalu xcuent rereii näj guiraa reni rnibee lo guedxliujre, te gac guibandxinu, te gac chanuunu xnez Dios, te saru guibajnnu. <sup>3</sup> Sa' yäl'rniabga najc laaca, luxh si'c rdxaglajz Dios ni ruslaa nurnu lo dojl guiniabnu lojni. <sup>4</sup> Dios rlajz laa guiraa

bejn lo dojl, rlazzzani gacbeepacreni xtidxliini. <sup>5</sup> Yu' tejtis Dios, nájza tejtisza nani rusiäj] diidx lo Dios nájza loj rebejn guedxliuj. Laani najc Jesucrist ni gujczza niguii. <sup>6</sup> Jesucrist gujt lo cruzj te gudixjni redojl xten guiraanu ni tre' lo guedxliuj. Dee gujc che gojl dxej ni gule Dios. <sup>7</sup> Dios gule narä te gacä apost te gusule'ä xtiidxni, yälirililajz nájza didxlii lo reni di gac xpejn Israel. Si'c ni rlazj Jesucrist rniä didxlii, dina guiniä diidx ni rusguee.

<sup>8</sup> Ni'cni rlazä guiraatis lajt guiniab rebejn lo Dios, saru guiliäs naareni, gusaanreni yälrdxe'ch, na'c gunreni bieje. <sup>9</sup> Si'cza regunaa, saru gacwreni xhajnreni, na'c gacreni gunaroxhi, cuedxireni. Xhet si'c di regunaa ni entis rsiucheduxh con oor o perl o ladsajc, rajc guichniil yejcnj te guidxeloj bejnreni. <sup>10</sup> Masru ruchaag gunreni si'cni rchalglajz Dios, si'c riäj] gun guiraa regunaa ni yu' lo Dios. <sup>11</sup> Riäj] dxitis gucua diajg regunaa xtidx Dios ni rusule' reniguii. <sup>12</sup> Dina xcäbä gusule' te gunaa diidx lo guiraa rebejn, niclaza guinibeeni lo reniguii, dxitis cueni lo rebejn ni cagucua diajg diidx nani cagusule'ni. <sup>13</sup> Sa'csi ganid benchee Dios Adán, dxejctiru bencheeni Eva. <sup>14</sup> Luxh et Adandi basguee bendxab, bendxab basguee gunaaga, dxejc biajbni nen dojl. <sup>15</sup> Niluxh siliaa regunaa, palga jiureni xtzunreni si'c nan, palga chanuu chalilajzreni xtidx Dios, palga chanälajzreni sa'reni, palga chutisreni lo Dios, gaczareni gunasa'c cuedxireni.

### 3

*Xho riäj] gac reni rnibee*

<sup>1</sup> Dee najc didx gulii: palga rlazj te niguii ga'p dzuun xten Dios, gusule'ni xtidx Dios, guinibeeni rebejn, te dzunsa'c najc ni rlazjni gunni. <sup>2</sup> Ni'cni, ni rlazj gac nani rnibee, riäj] guibaṅsa'cni te na'c chu xhicuent guiniyaj rebejn. Riäj] gacni chääl tejtis gunaa, riäj] susiṅni, gacni te beṅsa'c, cuedxini, te guibaṅsa'cni. Riäj]za di gudxojnri rolizjni guidzujn bejn, nágajc riäj] gacni te bejn ni nansa'c te guluini. <sup>3</sup> Na'c gacni te beṅgu, nicla te ni rdxagdij] bejn, na'cza gacni te nani rsia' lajzni ga'pni xhidaj] meel, riäj] cuedxini lajzni, na'c chanälajzni meel. <sup>4</sup> Riäj] guinibesa'cni rolizjni, saru gunni te gusoob rexi'nni xtiidxni. <sup>5</sup> Sa'csi palga di te bejn gan xho guinibeeni lagajc rolizjni, aticaxh gac ga'pni guidoo xten Dios. <sup>6</sup> Di riäj] guinibee te beṅcoob nani entis huililajz, te di guschä'pni xpala'nni sas jiajbni lo lagajc xcälṅaj Dios ni biajb bendxab. <sup>7</sup> Luxh riäj]za guinii reni di chalilajz xtidx Dios laaca najcni, te na'c jianxtujyni, te na'cza jiajbni ladzṅaa bendxab.

*Xho riäj] gac reni rcanäj nen guidoo*

<sup>8</sup> Si'cza rediaconos riäj] gacreni bejn ni yu' xcäriejnreni, nanab gunreni si'cpac ni rniireni, na'cza soozreni, na'c xca'reni meel ni direni niunsa'c gaan. <sup>9</sup> Riäj] gapdzu'tzni rediidx nagajn xten yälirililajz, ni'c nanab gac naya lastooreni. <sup>10</sup> Riäj] fixgaatu xho nabajnreni. Palga nabaṅsa'cni, rutza gacdi gucuaquidireni, sajg gacreni diacono. <sup>11</sup> Regunaa ni rlazj gac diaconas riäj]za chu xcäriejnreni, na'c güireni diidx ni di guchaag, na'c soozreni, gacreni gunasa'c, cuedxireni, gunreni si'cpac ni rniireni lo guira'ti dzuun. <sup>12</sup> Riäj] gac rediacono chääl tejtis gunaa. Riäj] guinibesa'cni rexi'nni náj guiraa reni yu' rolizjni. <sup>13</sup> Sa'csi rediaconos ni runsa'c xtzunni, sanälajz bejnreni, dizareni guidxejb rsiudzu'tz lastooreni lo xcälirililajz xtidx Jesucrist.

*Gurobduxh najc yälxhiga'tz xten Jesucrist*

<sup>14</sup> Cacuaä diidxre lojlu, niluxh rlazä jiädhugaä la'tu. <sup>15</sup> Luxh palga gac laä, anajnlu xho riäj] guibajn bejn roliz Dios, nalajznu xquidoo Gueb Dios ni nabajn par tejpas. Guidoore rniadsdu'tz nájza ruluiiru didxlii xten Dios. <sup>16</sup> Rdxeloyaduxh guiralii bejn yälxhiga'tz xten xcälṅajn Dios:

Dios biääd lo guedxliuj si'c te beṅguedxliuj,  
 Sprit Dxan xten Dios gunii bendxanni;  
 bahuu rexangl Dios lojni;  
 basule'reni xtiidxni lo rebejn ni di gac xpejn Israel;  
 guira lajt huililajz bejn xtiidxni;  
 huäjsni lo xcälrdimbicha' Dios xhaguibaa.

## 4

*Reni rbicaj lo xnezyuj Dios*

<sup>1</sup> Aguniipac Sprit Dxiän siääd redxey che chu reni guro'n yälrlililajz, sucuadiajgreni xtidx rebejn ni rusguee näj xtidx rebendxab, <sup>2</sup> nicla jiureni rniireni didx-xhii ni rusguee, sa'csi xhetiru xcäriejnreni, anajcni si'c najc cadre rudxujy te guiblaa: xhetru racbeedini. <sup>3</sup> Suluii rebejnre na'c guchnaa bejn, suluiizareni na'c gau bejn guiraloj, niluxh Dios bejnpac redee te xca' rebejn ni rililajz, ni racbeza didxlii, te gudeedreni xquixtios lo Dios. <sup>4</sup> Guiralii reni benchee Dios najc laaca, di riäj] cuälaznu xhi rca'nu che rudeddu xquixtios lo Dios. <sup>5</sup> Sa'csi xtidx Dios näj yälrbedx-rniab lo Dios runsa'c guira'ti.

*Te ni runsa'c xtzuun Jesucrist*

<sup>6</sup> Palga susnajlu lajz rebejtznu rediidxre, sajclu te mossa'c xten Jesucrist, luxh si'c sisieedruzalu diidx xten yälrlililajz, näj yälrluisa'c ni sanuulu. <sup>7</sup> Na'c jiulu ni rni regunaroyei ni xheti xtzuunni. Bisieed sudzu'tz lastoolu lo xtidx Dios. <sup>8</sup> Guxii sajc guinibduxh bejn te gusutijpni tiejxhni. Niluxh sacduxhru cucheeni xtidx Dios nejn lastooni, sa'csi racnäjni bejn lo yäl'nabajjnre näjza lo yäl'nabajjn ni najc par tejpas. <sup>9</sup> Dee najc didxlii, riäj] chalilajz guiraatuni. <sup>10</sup> Ni'c riennu dzuun, rdeednu trabajw, sa'csi cabäjznu Gueb Dios ni nabajjn, ni ruslaa bejn lo dojl, ganiddoo renani rililajz xtiidxni.

<sup>11</sup> Sajplu guinibeelu soob rediidxre, näjza guluiilu rediidxre. <sup>12</sup> Di gusaanlu cuälazreni luj sa'csi najclu bi'n; riäj] gaclu te ni suu te fii guiraa reni rililazsa'cpac xho rniilu, xho nabajjnlu, xho sanälajzlu sa'lu, xho rililajzlu, näjza xho rajplu xhigabsa'c. <sup>13</sup> La] ni guidzunä ro'c, bi] xtidx Dios lo rebejn, balijdxreni, baluiiza xtidx Dios lojreni. <sup>14</sup> Di gusaanlu reyäl'najn ni baniidx Dios lojlu cheni basuj rebengool naareni yejclu por xtidx Dios, guniireni diidx xcuent nani churu gac.

<sup>15</sup> Guet-guejt basnaj lajzlu rediidxre, biusa'c rediidxre, te gac fii guiraareni xho sanuulu lo xtidx Dios. <sup>16</sup> Gopdzu'tz lagajc luj näjza rediidx ni ruluiilu; guzudzu'tz lo guiraa rediidxre, te si'c laalu lo dojl, te laaza reni rucuadajg xtiidxlu.

## 5

*Xho guibannäjnu reni rililajz*

<sup>1</sup> Na'c quidxa'lu loj te bengool; guninäjni si'c xtadlu, balijdx rebi'n si'c bejtzlu, <sup>2</sup> balijdx renanbengool si'c xnanlu, balijdx redxap steeb si'c rebisajjnlu con rehxigabsa'c.

<sup>3</sup> Gucnäj rebiiud ni guliipac rquiin chu gacnäjreni te chu xhi gaureni. <sup>4</sup> Niluxh palga yu' chu biuud yu' xi'nni o xajgni, suguisiedxgaareni guiban nayareni lo xnez Dios, te quiixreni di'n ni nasääbreni lo xtadreni, näj xnanreni ni baslaareni, sa'csi ni'c najc laaca, rdxaglaizza Diosni. <sup>5</sup> Gunaa ni najcpac biuud, abia'n xtebni, ni'c rbäjztisni lo Dios, dxej-yääl rbejdx-rniabni lo Dios. <sup>6</sup> Niluxh biuud ni nabajjn cadedgustisni najc si'c te ni agujt nejn dojl. <sup>7</sup> Basule' rediidxre lojreni te rut gucuaquijdireni. <sup>8</sup> Palga yu' chutej ni di gacnäj resa'ni, lagajc reni rbäjz rolizni, ni'c agulälaz xtidx Dios, benguijdxru najcni lo rebejn nani di chalilajz xtidx Dios.

<sup>9</sup> Di gucuaalu laj rebiiud lo guijtz te gacnäjtuni palga gajdni chu gayojn ijz. Riäj]za gac biuudga te gunaa ni gubannäsa'c chäälni. <sup>10</sup> Riäj]za gumbee bejn ni xcuent redzunsä'c ni rujnni; palga baslaani rexi'nni, palga badedlaani rolizni gues bejn zijt, palga gudiibni ni' rexpejn Dios te si'c guzen xcäl'nadolajzni, palga racnäjni reni rdejd trabajw, palgaza riuni rujnni guira'ti redzunsä'c.

<sup>11</sup> Niluxh na'c gucuaalu laj biuud ni yu' guxiiru ijz sa'csi che guichaglaizreni te niguii, siäl]ajzreni diidx ni bia'nreni lo Jesucrist, te rlajzni guchnasacreni. <sup>12</sup> Dxejc siu'reni nejn dojl sa'csi rbälazreni rediidx ni bia'nreni che galoo bejnreni xhigab ninuureni lo xtzuun Dios. <sup>13</sup> Dxejc sia' lojreni xhet gundireni, rijreni roliz bejn ricuereni. Luxh malaii ni'ctis gunreni. Niluxh rliäsareni didxxhii, richu'reni lo xhitis, rniizareni diidx ni di guchaag guiniireni. <sup>14</sup> Ni'cni rlazä rebiiud ni najc dxa'pru guchnaareni stehuält, chu xi'nreni,



fisa'creni rolijzreni te na'c guiniyajreni rebejn ni rdxe'ch lojnu. <sup>15</sup> Sa'csi yu' gaii biuud ni alagubicaj lo xnez Dios sanajlreni beṅdxab.

<sup>16</sup> Pal yu' tej resa'nu ni najc sa'ni te biuud, riäjḷ gacnäjnini, na'c gusaanni gutajlni xtzuun guidoo, te si'c guidoo sajc gacnäj rebiuud ni rquiinpac chu gacnäjreni.

<sup>17</sup> Rebengool ni rnibesa'c guidoo, riäjḷ chanälajzrutureni näj gudeedrutu guiraa nani rquiinreni, si'c najc reni rusulesa'c xtidx Dios, rulidxsa'creni la'tu con xtidx Dios. <sup>18</sup> Sa'csi lo xtidx Dios caj scree: “Na'c gusällu guijxh ro' gon che rusiani triuu”; si'cza caj stee diidx: “Riäjḷ gax bejn ni rujn dzuun.”

<sup>19</sup> Na'c cucuadiajglu xtidx tej ni rucuaquij te bengool palga ruti tio'p, chon testiigw. <sup>20</sup> Niluxh reni sanuu rujntis dojl, riäjḷ gulijdxlureni nez loj reben guidoo, te näjza laareni guidxebreni. <sup>21</sup> Nez loj Dios, nez loj Dad Jesucrist, nez lojza reangl ni gule Dios, rulidxduxhälu chanuulu lo rediidxre, na'c jjurulu tej bejn lo sa'ni. Bejn tebloj loj guiraa rebejn. <sup>22</sup> Na'c gusiojb lajzlu gusujlu naalu yejc te bejn, te gacni beṅ guidoo palga gajdni guisieed guibaṅsa'cni lo xnez Dios sa'csi lagajc yejclu jiajb rextojlni. Gubicaj lo guiraa dolguijdx.

<sup>23</sup> Na'cru yälu ganax nis. Gu'za tudxe'n bin sa'csi racxhuu xque'lu, näjza sa'csi yu'ru rexcälracxhuulu.

<sup>24</sup> Yu' bejn ruzengajc rextojlni ni'c rajcni castiigw, niluxh yu' bejn ni di xtojlni guzengajc. <sup>25</sup> Sigajcsa redzunsac ni rujn bejn; yu'reni ruzengajc, niluxh mase dini guzengajc, digacdi jianxhiga'tzni, sidzujn dxej suzenni.

## 6

<sup>1</sup> Reni najc mos riäjḷ cuadiajgreni xtidx xlamreni, te na'c guiniyaj rebejn laj Dios niclaza xtidx Dios ni rusule'nu. <sup>2</sup> Palga yu' remos ni najc xlamni te nani rlilajz, na'c cuälazreni rextiidxni sa'csi najcni bejtzni lo xcälrlilajz Jesucrist. Riäjḷ gūnsa'crureni xtzuunni, sa'csi najcni sa'ni loj yälrlilajz xten Dios, luxh sanälajzzarenini. Rediidxre baluii, basule'.

*Yälṅabaṅsa'c näjza te lastoo ni rbedxi*

<sup>3</sup> Palga yu' chu ruluu garenca diidx, diidx ni digac didxsa'c, si'c najc xtidx Jesucrist, näjza xhet si'c diidxdi ni ruluu xho guibaṅsa'c bejn, <sup>4</sup> bejnga rlajz guiliä'p lagajc xpala'nni, niluxh xhet najndini. Si'c te yälguijdx yu'tis yejcn yälguiniab diidx, yälrdiidx. Luxh redee rujn rdxe'ch lajzreni, rujnni rdxe'ch bejn lo sa'ni, rujnni rniyaj bejn, rujnzani di bejn guinisa'c lo sa'ni. <sup>5</sup> Rujnzani rdilnäj bejn sa'ni. Guiraa redee gun bejn ni aguxhijṅ xcäriejnni, bejn ni diru ga'p didxlii. Rchaloreni sujnreni ganduxh xcuent rediidx ni ruluiireni. Gubicaj lo sa' bejnre. <sup>6</sup> Niluxh yälṅabaṅsa'c näjza te lastoo ni rebedxi, redee sa'cduxh. <sup>7</sup> Sa'csi xhet biopnädinu lo guedxliujre, luxh sigajcza xhet sajcdi chonänu che guetnu. <sup>8</sup> Niluxh palga rajpnu xhi gaunu, xhi gajcwnu, con ni'c riäjḷ guibalaaznu. <sup>9</sup> Niluxh reni rlajz ga'p xhidalduxh meel, riajbreni lo xhigab guijdx, rujnzareni xhidajl dzuun ni xhet sajcdi, ni rujn daan, ni rusiääz bejn lo yälruhxin, lo yälrnitloj. <sup>10</sup> Sa'csi yälrinälajzni meel najc xlobaa guiraa redzunguijdx. Yu'za bejn ni rladuxh ga'pni meel, rusaanreni xcälrlilajz Dios, dxejc lagajc laareni rujn rdedduxhreni trabajw.

*Dzun-huen xten yälrlilajz*

<sup>11</sup> Niluxh luj, bejn xten Dios, baxu'ṅ lo guiraa dee, te chanuulu lo xcälxhigabsa'clu näjza yälṅabaṅsa'clu; te chanajllu yälrlilajz näjza yälṅanälajz; te chanuulu lo yälrbedcxi lajz näjza yälṅadolajz. <sup>12</sup> Benduxh dzuun xcuent yälrlilajz Jesucrist, gunazdu'tz yälṅabajṅ ni najc par tejpas. Ni'cni gurejdx Dioslu, luxh aguniilu rililajzlu xtidx Dios nez loj xhidajl bejn, te anancheereni. <sup>13</sup> Naj rulidxälu nez loj Dios ni rudeed yälṅabajṅ lo guiraa ni yu' lo guedxliujre, näjza nez loj Jesucrist, ni basule' xtiidxni nez lo Poncio Pila't, <sup>14</sup> rnibeä guzobsa'clu guiraa rediidx ni rniä lojlu, na'c guchaaluni, te na'c guiniyajreni luj naj niclaza cheni jiaäd Xtad Jesucristnu. <sup>15</sup> Sidzujṅ dxejga nani agunii Dios guidzujṅni. Dios ni najc le' sujn scree sa'csi laatisni najc Dios, najcni rei xten rerei, rnibeezani reni

rnibee. <sup>16</sup> Laatisni dini guet, nabaj<sub>n</sub>ni lo bianij cadro rut rajcdi rbig. Nicla te bej<sub>n</sub> gajd fii lojni, niclaza gac fiireni lojni. Xtebtis laani riäj<sub>l</sub> ga'p rebej<sub>n</sub> xpala'n<sub>n</sub>i. Laani rajp yäl<sub>n</sub>ribee par tejpas. Sugacni si'c.

<sup>17</sup> Balijdx reni rajp xhidaj<sub>l</sub> xhixt<sub>n</sub>ni lo guedxliujre, na'c guschä'preni xpala'nreni, niclaza chanälajzreni xhixtentisreni. Huenru chanälajzreni Dios ni nabaj<sub>n</sub>, ni runiidx loonu guiralii xhixt<sub>n</sub>ni ni rqui<sub>n</sub>nu te guibalajznu. <sup>18</sup> Balijdxreni gunreni dzunsa'c, gundaj<sub>n</sub>reni dzunsa'c, gacnäjäreni reni xhet rajpdi, cuenäsa'creni sa'reni. <sup>19</sup> Si'c ga'preni yäl<sub>n</sub>asa'c ni guzudzu'tzreni che jiääd Jesucrist, te guiniaztzu'tzreni yäl<sub>n</sub>nabaj<sub>n</sub> par tejpas.

*Rulijdxni Timoteu*

<sup>20</sup> Timoteu, cuenäjä ni rniä lojlu. Na'c jiulu didxguijdx ni yu' lo guedxliujre, niclaza didx-xhii, niclaza rediidx ni rusguee, ni rbälajreni 'yäl<sub>n</sub>naj<sub>n</sub>'. <sup>21</sup> Sa'csi yu' reni sanuu yäl<sub>n</sub>naj<sub>n</sub>re ni'c banijtreni lo Dios xcuent yäl<sub>n</sub>rililajz. Gacnäjä Dios luj. Sugacni si'c.

## Guijtz Ni Rojp Lo Timoteu

*Stee guijtz ni baxha* Pabl loj Timoteu

<sup>1</sup> Narä Pabl, nacä apost xten Jesucrist. Dios gule narä, xcuent yäl'nabajn ni gudeed Dios loj reni yunäj Jesucrist, si'c ni bia'n diidx. <sup>2</sup> Caciaä guijtzre lojlu, Timoteu, xi'nä lo yäl'rilitajz. Rinälazä luj. Rniabä lo Xtadnu Dios näj lo Dad Jesucrist gacnäj luj, gulaslajzreni luj, guscuecdxireni lajzlu.

*Rusule'ni xcuent Jesucrist*

<sup>3</sup> Rnaj lazälu che rniabä lo Dios dxej-yääl. Dxejc rdedä xquixtios por luj lo Dios. Naya xcärienä yu'ä lo Dios, runä xtzuunni si'c bejnza rextadgoldoä. <sup>4</sup> Rnaj lazä xho biinlu, naj rlazä fiä lojlu te guibalazä. <sup>5</sup> Rnaj lazäza yu'pac yäl'rilitajz lastoolu si'cni guyu'ni galoo lastoo xmanlu Loida dxejcru lastoo xnanlu Eunice si'cza yu' yäl'rilitajzga lastoolu naj.

<sup>6</sup> Ni'cni rniä lojlu naj, si'cni rcanäj bejn rodäj te di juini, si'cza cuanäduh reyäl'najn ni baniidx Dios lojlu cheni basuä naä yejclu. <sup>7</sup> Sa'csi di Dios nuniidx te lastoo ni rdxejb loonu, baniidxni te lastoo ni rsiutijp, baniidxni te lastoo ni rinälajz, baniidxzani yuduxh xcäriejnno. <sup>8</sup> Na'c guitujyulu guiniilu rediidx xten Xtad Jesucristnu, na'cza guituinäjlu narä sa'csi yu'ä neñ latzguiib xcuent Jesucrist. Näj luj gudejd trabajw ni siääd xcuent yäl'rusule' xtidx Dios si'ctis gacnäj Dios luj. <sup>9</sup> Dios ni gulää nurnu neñ dojl, gurejdx nurnu te guiba'nsa'cnu lojtisni. Gurejdxni nuurnu xhet sa'csi bienu dzunsa'c, alga sa'csi si'c rlanjni laani, sa'csi balaslajzni nuurnu xcuent Jesucrist galooli che gajdli guncheeni guedxliuj. <sup>10</sup> Niluxh cheni biääd Jesucrist ni badzucaj rextojlno lo guedxliujre, baluiloj yäl'rulaslajzga. Jesucrist banitloj yäl'rnibee xten yäl'gajt. Xtiidxni, ni rusule' xho rbicaj dojl, baluii yäl'nabajn, näjza yäl'nabajn par tejpas.

<sup>11</sup> Dios gule narä te gacä te ni rusule' xtiidxni, te gacäza te apost, näjza te bejn ni ruluii loj reni di gac xpejn Israel. <sup>12</sup> Ni'cni rdedä trabajw xcuent guiraa rediidxre. Niluxh dina guituiyä, sa'csi narä nanä chu xtiidx huililazä, nancheä laani sajc gapdzu'tzni dzuun ni baniidxni loä dxejli cheni guibi'ni.

<sup>13</sup> Chanuu guluiilu redidxsa'c ni banidxä lojlu. Gubajnzä lo yäl'rilitajz näj lo yäl'sanälajz ni rajpnu sa'csi yu'nu lo Jesucrist. <sup>14</sup> Cuanädzu'tz reyäl'najn ni baniidx Dios lojlu näj Sprit Dxaan xtenni ni rbäjz neñ lastoonu.

<sup>15</sup> Anajnlu guiraa reni siääd reguedx Asia gulälaz narä; lo redee nadxaag Figelo näj Hermógenes. <sup>16</sup> Dad Jesucrist gacnäj reni yu' rolizj Onesíforo sa'csi balti huält biädspaani lazä, dini nitujy sa'csi yu'ä neñ latzguiib. <sup>17</sup> Che bidzujjni guedx Roma, gudiilpacni narä te bidxälni narä. <sup>18</sup> Dad Jesucrist gulaslajz laani che guidzujn dxej ni guibi' Jesucrist. Luj anajnlu balti dzunsa'c bejnne che guyu'ni guedx Éfeso.

## 2

*Te ni runsa'c xtzuun Jesucrist*

<sup>1</sup> Ni'cni xi'nä, guzutijp sa'csi rulaslajz Jesucrist luj, racnäjnlu. <sup>2</sup> Rediidx ni abiejn diajglu guniä nez loj xhidal bejn lagajc rediidxga guniini lo rebejn ni rililajzpac, loj rebejn ni sajc guluiiza diidxga lo stecuaa bejn.

<sup>3</sup> Batijp lajzlu tednäjlü narä trabajw si'c te soldadsa'c xten Jesucrist. <sup>4</sup> Di te soldaad gun dzuun ni bejnne che gajdni gac soldaad. Rujjni xtzuun bejn ni guleni gacni soldaad, te si'c guspaani lajz bejnnga. <sup>5</sup> Sigajcza, ni rguijt digacdi xca'ni yäl'nasa'c palga dini quitsa'c si'c riäjil quitni. <sup>6</sup> Bejn ni rujn dzuun loniaa nanab xca'ni xcäl'nasa'cni ganidoo. <sup>7</sup> Bejn xhigab xcuent ni rniä lojlu, dxejc sujn Dios gacbeelu guiraani.

<sup>8</sup> Basnaj lajzlu Jesucrist, te xagdoo toDavid ni huäjz lo rebengut. Dee najc xtidx Dios ni rudzucaj dojl, si'c ni rusule'ä lojlu. <sup>9</sup> Ni'cni cagutipä lazä cadedä trabajw, caduä caden si'c te bejn ni bagu't sabejnne. Niluxh digacdi xcaduu xtidx Dios. <sup>10</sup> Ni'cni cadedä trabajwre

te gacnaá reni agule Dios te nájza reni'c chalilajz xtiidxni te guibajñreni lo bianij xten Jesucrist par tejpas.

<sup>11</sup> Guliiduxh najc diidxre;

palga agujtnu con laani, sibannájzanu laani.

<sup>12</sup> Palga rdejndu trabajw, sinibenájzanu laani.

Palga dinu guicá'p numbeenuni, dizani guicájp numbeeni nuurnu loj Xtadni Dios.

<sup>13</sup> Mase dinu chanuu lo xtiidxni, laani susoobni xtiidxni sa'csi digacdi cuatzlajzni diidx lagajc laani.

*Te bejn* nani abia xtzuunni

<sup>14</sup> Basnaj lajz rebejn xcuent rediidxre, gunibee lojreni nez lo Dad Jesucrist na'c tildiidxreni sa'csi sa' diidxga xhet sajcdini, ruxhintisni reni riendiajgni. <sup>15</sup> Batijp lajzlu te guidzujñlu lo Dios si'c te bejn ni runsa'c dzuun, xheti xhicient guitujyлу, sa'csi ruluisa'cpaclu xtidxliitis Dios. <sup>16</sup> Gulälaz yälriñiyaj nájza xhidalduxh diidx ni xhet sajcdi, sa'csi renani rucua diajg rediidxga riajbrureni lo redolguijdx. <sup>17</sup> Luxh diidx ni ruluiireni suxhingajcni lastoo bejn si'c rxhinlajz tiejxh bejn. Ni'c casiajc Himeneo náj Fileto. <sup>18</sup> Abanijtreni lo didxlii. Caniireni ala huäjs bejn lo rebengut. Si'c cagusiejchreni lajz gaii rebejn ni rililajz. <sup>19</sup> Niluxh xtidx Dios rsiudzu'tzni si'c te guij nani nadipduxh, luxh rajpnu diidxre si'c te seen: “Dad guibaa anumbee guiraa reni najc xpejnñi”; nájza “Nanab guibicajreni lo redolguijdx, guiraa reni ahuililajz xtidx Jesucrist.”

<sup>20</sup> Neñ te yuro, xhet ganaxdi cos or nájza cos plat yu'. Yu'za cos yajg náj cos bajñ; yu'reni najc parsi te laniro, yu'za reni rquiin guixe-guixee. <sup>21</sup> Sigajcza te bejn ni rlajz gun dzuunro xten Dios, riäjñ guibicajni loj redolguijdx ni xhet sajcdi. Dxejcti Dad Jesucrist sacñajni te gunni redzunro xtenni.

<sup>22</sup> Gubicaj lo redzunguijdx ni rujn rebejn, huinuu yälñabansa'c, yälñrililajz, yälñsanälajz, gulecdxiza lajzlu náj reni rujn xtzuun Dios, naya lastooreni rbedx-rniabreni lo Dios. <sup>23</sup> Na'c jiulu rediidx ni ruluii rebejn guedxliuj. Anajnlu rediidxga rujn rdilñaj rebejn sa'ni. <sup>24</sup> Niluxh te xmos Dad guibaa di riäjñ guchaagni reni rdijñ; riäjñ gacni beñsa'c loj guiraatis bejn. Riäjñza guluisa'cni; riäjñza gutip lajzni che xhet laadi rujn bejn lojni. <sup>25</sup> Guideb yälñadolajz guluiilu reni rdxe'ch loj rediidx ni ruluiilu. Cuääzlu gaxäjsi gusiejch lajzreni gun Dios gacbeereni didxgulii, <sup>26</sup> te jianij xcäriejnreni te guiriireni ladzñaa beñdxab, te gunreni ni rlajztis Dios.

### 3

*Xho gac rebejn* neñ redxelult

<sup>1</sup> Nanab gacbeelu neñ redxelult sidzujñ dxej tedtu trabajw. <sup>2</sup> Sa'csi su' bejn ni chanälajz lagajctis laani, ni rinälajz xmeeltisni, bejn ni rniyaduxhtis, bejn ni rchaglajz chä'p xpala'ntisni, bejn ni rniyaj Dios; su' bejn ni di gusoob xtidx xtadreni, su' bejn ni di gudeed xquixtios lo Dios, su' bejn ni najc benguijdxhtis. <sup>3</sup> Neñ redxelultga su'za bejn ni di chanälajz sa'ni, bejn ni di lajzni jiäjñ, bejn ni rusgueduxh; bejn ni digacdi guscuääz dolguijdx ni rujnreni; bejn ni gualazduxh; bejn nani ru'o'n guira'ti dzunsa'c. <sup>4</sup> Neñ redxelultga su' bejn ni ruto' sa'reni; bejn ni di guidxejb gunreni ni riajbtis yejcreni, bejn ni rchalosi najcreni beñsacduxh; bejn ni rchaglajzru gun nani rchaglajz tiejxhreni lacuaa chanälajzreni Dios. <sup>5</sup> Neñ redxelult su' bejn ni najc si'c benguidoo, ascanu rusoobreni xtidx Dios, niluxh naadireni xca'reni yälñnadip náj yälñriabee xten Jesucrist ni ruchaa lastoo bejn.

Na'c guchaaglu rebejnğa, <sup>6</sup> sa'csi loj sa' bejnre yu' reni richu' rolizj bejn, sasgueereni regunanayääl ni rujn dojl. Regunaare rinuu rujreni ni rlajztis tiejxhreni, rujnreni guiraloj. <sup>7</sup> Rebejnre rsiedduxh didxcoob, niluxh di didxlii xten Jesucrist jiu' yejcreni. <sup>8</sup> Sigajcni gujc Janes nájza Jambres ni bidxe'ch loj Moisés, sigajcza najc rebejnre, cadxehnäjreni didxlii xten Jesucrist, najcreni bejn ni aguxhijñ xcäriejnreni, luxh direni

gacbee xtidx Dios, direni ga'p yälrlilajz. <sup>9</sup> Niluxh direni chanuu xchej, sa'csi huenliisi suhüi guiraa rebejn najcreni benguijdx. Si'cza gusajc guiro'p reni bidxe'ch loj Moisés.

*Pabl rnibee sudzu'tz Timoteu*

<sup>10</sup> Luj sanuutislu lo nani rusule'ä, näj xho nabanä, näj xhicuent runä dzuunre, lo xcälrlililazä, lo xcälñadolazä, lo xcälsanälazä, näjza xho batip lazä. <sup>11</sup> Najnlu xho basacsireni narä gudedäza trabajw ladzña rebejn nen reguejdx xten Antioquía, guedx Iconio, näjza guedx Listra. Gudedä trabajw niluxh Dios baslaa narä loj guiraa retrabajwga. <sup>12</sup> Guliduxh guiraa reni rlajz chutis loj Jesucrist sidejdpacreni trabajw. <sup>13</sup> Niluxh rebenguijdx näj reni rusguee, sinuutisreni redolguijdx, sinuuru gusgueereni bejn, luxh susgueeza bejn laareni.

<sup>14</sup> Luj huinuu guzudzu'tz loj ni abisieedlu, nani ahuililajzzalu, luj anajnlu chuni'c baluini lojlu. <sup>15</sup> Cheni biuuxlilu racbeelu xtidx Dios, ni ruluiilu xho guiriilu nen dojl te xca'lu yälñabajn par tejpas sa'csi rililajzlu xtidx Jesucrist.

<sup>16</sup> Guiraa rediidx xten Dios ni caj lo guijtz, lagajc Dios baniidxni te xcajni lo guijtz.

Guirali xtidx Dios najc laaca te gului nuurnu xhini'c najc didxlii,

te gacbeenu xhi najc didx-xhii,

te gacbeezanu xho riäj guibañsa'cnu.

<sup>17</sup> Te susiñ niguii ni najc xpejn Dios,

te gac gunni guiraa redzunsa'c ni riäj gunni.

4

<sup>1</sup> Rulidxälu nez lo Dios näjza nez lo Dad Jesucrist ni jiäd si'c rei te gunni yälguxhtis loj reni nabajn näjza loj reni agujt; rniäza dee lojlu: <sup>2</sup> basule' xtidx Dios, gususiñ lo Dios mase xhitis or. Baluii reben dojl, gudiñäj reni di rlajz guzobdiidx xtidx Dios, balidxnäj resa'tu xtidx Dios. <sup>3</sup> Sa'csi sidzujñ dxej di rebejn guidxagljaz gucuadiajz yälrluisa'c; alga diidx ni najc lagajc si'c najc xhigabreni rlajzreni jiendaajgreni, ni'cni siguiilreni xhidajl bejn ni rului te guisieedreni ganax ni rlajzreni gucuadiajgreni. <sup>4</sup> Susäuuren i diajgreni te di jiendaajgreni xtidxlii Dios; alga xhitis diidx gucuadiajgreni. <sup>5</sup> Niluxh luj huinuutis lo xtidx Dios, batiplajz yälhuin, guniitis xho rudzucaj Dios rextoljreni, beñsa'c xtzunlu.

<sup>6</sup> Sa'csi narä suga'ä ree te ju'treni narä, asiäddzungenjx dxej ni guetä. <sup>7</sup> Agulujx bacuaä si'c te soldaad ni huicuaasa'c lo guer, agulujx xnezyuä, gopdzutzä yälrlilajz. <sup>8</sup> Naj cabäzä xca'a yälñasa'c ni guniidx Dad xhaguibaa, suniidxni yälñabañsa'c. Dad najc juejz ni runsa'c yälguxhtis. Niluxh xhet loätis guniidxni yälñabañsa'c. Sudeednini loj guiraa rebejn ni catiplajz cabäjzreni dxej cheni guibisac Jesucrist.

*Rediidx ni räjpni lojtis Timoteu*

<sup>9</sup> Basaaga lajzlu jiädhuijalu narä; <sup>10</sup> sa'csi abasa'n Demas narä. Sanälajzruni redzuun xten guedxliujre, naj säani guedx Tesalónica. Baxhalä Crescent säa lo reguejdx ni re' nez Galacia. Baxhalä Tito säa guedx Dalmacia. <sup>11</sup> Xtebtis Lucas suganäj narä. Gudiil Marcw te jiädñäluni sa'csi sajc gacñajni narä lo xtzun Dios. <sup>12</sup> Tíquico baxhalä säa guedx Éfeso. <sup>13</sup> Cheni jiädñälu, jiädñälu ca'p ni basa'nä guedx Troas rolijz Carpo, näj rexlibrä; di jiälza lajzlu rexquitzä. <sup>14</sup> Alejandro, ni najc gubetzguiib, basacsíduxhni narä. Dios quiixni sigajcni bejn. <sup>15</sup> Luj bahuii te di gunni xhi gunni luj sa'csi rdxecheduxhni lo xtidx Dios ni rusule'nu.

<sup>16</sup> Galoo che bazecä diidx lo reguxhtis, rut gucnäjdi narä; guiraareni gulälazreni narä. Rniabä lo Dios na'c guchagcuentni nani bejnreni. <sup>17</sup> Niluxh Dad ni yu' xhaguibaa gucnäj narä, baniidxni yälñadip te gujc guniä guiraa xtidx Dios te biejn diajg reni digac xpen Israel xtidx Dios. Luxh gucnäj Dios narä guläani narä ladzñaareni, si'c ro' te beedz.

<sup>18</sup> Suslaani narä loj guiraa redolguijdx, saptzu'tzni narä, sigucbeezeni narä te chunääni lo xcälrnibeeni xhaguibaa. Lojni coldeed xquixtios, colganduxhni par tejpas. Sugacni si'c.

*Rudeedni xtixtios lo rexamigwni*

<sup>19</sup> Badeed xtixtios lo Prisca nájza lo Aquila nájza loj resa' Onesíforo. <sup>20</sup> Erasto bia'n guedx Corinto, niluxh basa'nä Trófimo guedx Mileto sa'csi cayacxhuuni. <sup>21</sup> Jiädgajlu ansde guisloj rebäinajl. Eubulo, Pudente, Lino, Claudia, nájza guiraa rebejtznu ni yu' lo Jesucrist ree, ruxhalreni xtixtios lojlu.

<sup>22</sup> Dad Jesucrist chunäj xaimlu. Dios gacnäj guiraatu. Sugacni si'c.



## Te Guijtz Lo Tito

### *Bacuaa Pabl lo Tito*

<sup>1</sup> Narä Pabl, nacä xmos Dios, apost xten Jesucrist, te gacnäá guiroobru xcälirililajz reni agule Dios, te gacbeezareni didxlii ni rusia xcäl'nabajñnu. <sup>2</sup> Cayunlojzanu yäl'nabajñ par tejpas nani Dios, ni digacdi guinii didx-xhii, bia'nni diidx guniidxni cheni gajdli guedxliuj guirixtiej. <sup>3</sup> Niluxh che bidzujñ dxej ni agulexgaa Dios, laani baluiini xtiidxni. Si'cza baniidxni xtiidxni loä te gusule'äni si'c gunibee Xtiosnu ni ruslaa nurnu neñ dojl. <sup>4</sup> Cacuaä guijtzre lojlu, Tito, xi'nä lo yäl'irililajz ni ria'pnu xcuent Jesucrist. Rniabä lo Dios Xtadnu näj lo Dad Jesucrist ni rbää nuurnu neñ dojl, gacnäjreni luj, gulaslajzreni luj, guscuecdxizareni lajzlu.

### *Dzuun ni rujñ Tito quedx Creta*

<sup>5</sup> Che basa'nälu lo yuj ni tre' lo nisdoo, ni laa Creta, basa'nälu te guluuxlu dzuun ni di niajldi nuluxä ro'c, näjza te cuelu rebengool loj reguidoo neñ tejga reguejdx si'cni gunibeä gunlu. <sup>6</sup> Gule bengool ni nabansa'c, te na'c guiniyaj bejñreni, nanab gacni chääl tejtis gunaa, riäjzla chalilajz rexi'nni, na'c guibajñreni si'ctisni rlajz tiejxhreni, jiureni xtidx xtadreni. <sup>7</sup> Niguii ni rnibee guidoo rcanäj rexhixten Dios, ni'cni riäjñ ga'pni te yäl'nabanya. Na'c gacni te bennajd, na'c gacni te bennadxecha', na'c gacni bengü, na'c gacni te bejñ ni rdxagdijñ bejñ, na'cza xca'ni meel ni dini niunsa'c gaan. <sup>8</sup> Nanab gacni te bejñ ni rudedlaa rolizni jia'n beñ biooz, riäjzla chanälajzni dzunsa'c, gac nasinñ, chu xcäriejnñi; guibansa'cni nez lo Dios, sigajcza nez lo rebejñ, guibannayani nez lo Dios, na'c gunni nani rlajztis tiejxhni. <sup>9</sup> Riäjñ chanuutisni lo didxlii ni bisieedni te gac gulidxnäjzani bejñ xtidx Dios, te guzejcni diidx lo rebejñ ni rniyaj xtidx Dios.

<sup>10</sup> Yu' xhidajñ benguijdx, bejñ ni rnii diidx ni xhet sajcdi, näjza xhidajñ bejñ ni rnii didx-xhii ni rusguee. Näjza lo rexpenñ Israel ni riuduxh leii yu' sa' bejñre. <sup>11</sup> Sa' redee ni nanab jäü ro'ni, sa'csi rusgueerene xhidarlo sa'reni, ruluiireni ni di riäjñ guluiireni te gunreni gaan meel.

<sup>12</sup> Te niguii ni siääd lagajc lajdxreni guniini xcuent lagajc rebenñ lajdxni: "Rebejñ ni najc cretenses rniduxhrene didx-xhii, niälajzzeneni. Rlajzreni gausa'creni niluxh di rlajzreni gunreni dzuun." <sup>13</sup> Niluxh guliini, ni'cni gudilñäjreni, te chalilazsa'creni xtidx Jesucrist, <sup>14</sup> te na'cruza gucuadijgrene rediidx ni rdxällajz rexpenñ Israel, niclaza rediidx ni rnibee bejñ ni gulälaz didxlii.

<sup>15</sup> Loj renani rujñ xhigabya, guira'ti najc naya, niluxh loj reni di chalilajz, ni xhet nayadi najc xhigabreni, guira'ti nacdxuudx, xcäriejnlireni nacdxuudx. <sup>16</sup> Naj rujnsireni si'cni numbeerene Dios, niluxh ni rujñreni huenliisi ruzenñ direni nililajz, najcreni benguijdx, direni jiu xtidx Dios, digacdi gunreni nicla tej dzunsa'c.

## 2

### *Rulijdx Pabl Tito guluisa'cni rebejñ*

<sup>1</sup> Niluxh luj guniitis rediidx ni ruluisa'c. <sup>2</sup> Baluii rebengool gac benya, bejñ ni yu' xcäriejnñi, bejñ ni rumbee xhini'c najc dzunsa'c, xhini'c najc dzunguijdx, bejñ ni rajpza yäl'irililajz, yäl'sanälajz, näjza ni rbecdxi lajzni. <sup>3</sup> Sigajcza, regunagool, nanab guibajñreni si'c te ni yusa'c lo Dios, na'c guiniireni diidx ni di riäjñ guiniireni, na'cza soozreni. Riäjñ guluiireni redidxa'c <sup>4</sup> te guluiireni regunaa dxa'p chu xcäriejnreni, chanälajzreni chäälreni näj rexi'nreni. <sup>5</sup> Gacreni nasinñ, guibannayareni, xcanäsa'creni rolizreni, gacreni bensa'c gusoobreni xtidx chäälreni, te rut guiniyajdi xtidx Dios.

<sup>6</sup> Sigajcza gojz lo rebi'n riäjñ chu xcäriejnreni. <sup>7</sup> Luj guzuj te fiireni xho riäjñ gun bejñ dzunsa'c. Che guluiilureni, saru baluii guiraa reni riäjñ guluiilu. <sup>8</sup> Didxa'c gunii

te rut gacdi guiniyaj diidxga, te si'c guitujy chutis ni rlanj guidxe'ch lojtu te xhet xhi didxguijdxdi gac guiniireni xcuentlu.

<sup>9</sup> Balijdx remos te gusoobreni xtidx xlamreni, te gansa'creni dzuun, na'c guzejcreni diidx lo rexlamreni. <sup>10</sup> Na'c cuanreni alga guibansa'creni te guluii xcäl'nabajñreni lacti sacduxh xtidx Dios ni baslaa nuurnu neñ dojl.

<sup>11</sup> Sa'csi abiääd xcäl'racnäjä Dios, abiädñäni yälruslaa neñ dojl lo guiraa rebejn. <sup>12</sup> La xcäl'racnäjä Dios ni ruluii nuurnu gusa'nnu redzunguijdx, näjza dzuun xten guedxliujre te guibansa'cnu, te chonälajznu Dios lo guedxliujre. <sup>13</sup> Ruluiizani nuurnu cuäaznu guidzujñ dxej ni soob xtiidxni ni basa'nni loonu xcuent dxej che jiääd Gueb Dios näj Xtrad Jesucristnu ni ruslaa nuurnu lo dojl. <sup>14</sup> Laani gujtñi te guslaani nuurnu lo guiraa redolguijdx, te basiani nuurnu te gacnu xpejnñi, gaczanu te bejn ni rdxagljaz rujñ dzunsa'c.

<sup>15</sup> Diidxre gunii, balijdx, basule' si'c te beññajñ. Di gusaanlu cuälazreni luj.

### 3

#### *Ni riäjñ* gun reni rililajz

<sup>1</sup> Basnaj lajz rebejn gusoobreni xtiidx rebejn ni rnibee näjza reguxhtis, gusoobreni xtiidxreni, xcäjbzarenì gunreni xhitis dzunsa'c. <sup>2</sup> Na'c guiniyajreni bejn, cuedxireni, gaczarenì bensa'c, saru gac nadolajzreni loj chutis bejn.

<sup>3</sup> Sa'csi galoo sigajcza xheti xcäriejnñu, dikanu gusoob xtidx Dios; basguee bejn nuurnu, yu'tisnu lo guiraasi dolguijdx näjza lo ni rchagljaztis rujñ tiejxhnu, nabajñtisnu lo dolguijdx, rudxonlajznu, rdxe'ch bejn loonu, rdxe'chzanu lo sa'nu. <sup>4</sup> Niluxh che baluiloj xcäl'rulaslajz näjza xcäl'rinälajz Dios ni ruslaa nuurnu näjza rebejn guedxliuj lo dojl, <sup>5</sup> dxejc baslaa Dios nuurnu lo dojl, xhet sa'csi yu'di xhi dzunsa'c biennu, alga sa'csi balaslajzni nuurnu. Baslaa Dios nuurnu lo dojl sa'csi bidiib lastoonu, te biäjt xtojñnu te najcnu beñcoob, sa'csi bascoobza Xsprit Dxan xten Dios xcäriejnñu. <sup>6</sup> Baniidx Dios cuäazpac Xsprit Dxanni neñ lastoonu xcuent ni bejn Jesucrist ni baslaa nuurnu, <sup>7</sup> te sa'csi rujñ Dios cuent najcnu bensa'c sa'csi abadzucajni xtojñnu, naj sica'nu xcäl'nasa'cnu ni cabäaznu, nalaaznu yäl'nabajñ par tejpas.

<sup>8</sup> Dee ni najc guliipac, ni'cni rlazä chanuutislu guiniilu rediidxre loj rebejn, te rebejn ni rililajz xtidx Dios gunduxhreni ganax dzunsa'c. Rediidxre najc laaca, sacduxhreni loonu. <sup>9</sup> Naj basaan rediidx ni najc xlia'si, rediidx ni gunii rebejn galoo, yäl'rildiidx xcuent xleii toMoisés sa'csi guiraa rebiejyga xhet sajcdini, xhetza huendi rujñreni.

<sup>10</sup> Palga yu' te bejn ni gun la' sa' rebejn guidoo, gunii lojni tej o tio'p huält. Palga dini jiejn, colcuääni lojtu. <sup>11</sup> Sa'csi anajntu sa' bejnnga abar'o'nni, agulälazni didxlii, lagajc xtojñni sujñ nitni.

#### *Diidx ni bacuaani lojtis Tito*

<sup>12</sup> Che guxhalä Artemas o Tíquico lojlu, gudahuiipac narä lo guedx Nicópolis. Ro'c abenä xhigab tedä rebäinajñ. <sup>13</sup> Gucnäduxh licenciaad Zenas näjza Apolos, badeed guiraa ni rquiinreni te chanuurenì xpiajreni, te xhet jiäädxdireni. <sup>14</sup> Suguisieedza resa'nu gunreni dzunsa'c te gacnäjreni che guiquiinnurenì, te na'c guibajñreni xlia'si.

#### *Ruxhalñi xtixtios*

<sup>15</sup> Guiraa reni yunäj narä ruxhal xtixtios lojlu. Badeedza xtixtios loj resa'nu lo yäl'rilitajz. Dios gacnäjä guiraatu. Sugacni si'c.

## Te Guijtz Lo Filemón

### *Rucuaa Pabl guijtz lo Filemón*

<sup>1</sup> Narä, Pabl, yu'ä nen latzguiib sa'csi rniä xtidx Dad Jesucrist. Narä näjza bejtznu Timoteu cagucuaanu guijtzre lojlu, Filemón, ni sanälazduxhnu sa'csi najclu sa'nu lo xtzun Dios. <sup>2</sup> Rucuaazanu guijtzre lo Apia, bisiajnnu lo yälirililajz, näj lo Arquipo ni racnäj nuurnu lo dzuunre, näjza loj rebenguidoo ni rchagsa' rolizjlu. <sup>3</sup> Dios Xtadnu näj Dad Jesucrist gacnäj la'tu, guscuedxireni lajztu.

### *Xcälisanälajz näj xcälirililajz Filemón*

<sup>4</sup> Rudedä xquixtios lo Dios xcuent luj che rniä lo Dios. <sup>5</sup> Abiejn diagä xcuent yälrinälajz näj yälirililajz ni rajplu lo Dad Jesucrist, näjza reni yu' lo Dios. <sup>6</sup> Rniabä lo Dios tioobru xcälirililajzlu laj ni rusule'luni, te gacbesa'creni xcuent guiraa reyäl'nasa'c ni rajplu, ni runiidx Dad Jesucrist lojlu. <sup>7</sup> Lacti rbalazduxhä, rbedxi lazä sa'csi sanälajzlu resa'nu näjza sa'csi luj, betzä, agulecdxilu lastoo reni rililajz.

### *Pabl rniabni lo Filemón xcasacni Onésimo*

<sup>8</sup> Mase rapä xcälrnibee Jesucrist sajc guiniä gunlu xhitis ni riäj] gunlu, <sup>9</sup> rniabä lojlu gunlu te dzunsa'c sa'csi narä nacä Pabl ni rinälajzlu, nacä bengool, yu'ä latzguiib xcuent Dad Jesucrist. <sup>10</sup> Canabä xcuent Onésimo ni najc si'c xi'nä, sa'csi huililajzni xtidx Dios ni basule'ä lojni naj ni yu'ä latzguiib.

<sup>11</sup> Galoo, dini niajc bensa'c lojlu, niluxh naj sacnäduxhni guiro'pnu. <sup>12</sup> Ruxha]sacäni lojlu, te xcasacluni stehuält si'c ni najräni xca'lu, sa'csi siädnäni lojlu ascanu lagajc lastoä. <sup>13</sup> Narä rlazä niannäjni narä xcuentlu, te niacnäjni narä naj ni yu'ä latzguiib sa'csi basule'ä xtidx Dios. <sup>14</sup> Niluxh di rlazä niunä si'c palga luj dilu xcäjb gacni si'c. Dina guinia gacnäjpaclu narä si'c gojn. Narä rlazä gunluni sa'csi r]ajzpaclu gacni si'c. <sup>15</sup> Pet gubicaj Onésimo lojlu tio'p-chon dxejsi. Niluxh naj xca'luni te chuni lojlu par tejpas. <sup>16</sup> Naj xhetru si'c di te mos chuni lojlu. Naj sajcruni loj te mos. Naj najcni si'c te betzbiidlu ni sanälajzlu. Narä sanälazduxhäni, niluxh luj riäj] chanälajzruluni, xhet si'c chutis te bejn, alga si'c te bejtzlu lo Dad Jesucrist.

<sup>17</sup> Näj palga rumbeelu narä si'c te sa'lu, cua'ni sigajc narä. <sup>18</sup> Palga yu' xhi bejn ni lojlu o palga yu' xhi nazäabni lojlu, basa'n ni lo xcuentä. <sup>19</sup> Lagajc narä, Pabl abacuaä guijtzre con naä con xleträ, narä siguixäni. (Te na'c guiniä nazäabzalu lagajc luj loä.) <sup>20</sup> Betzä, ben]aa hueenre narä si'c te ni sanälajz Dios te guspaalu lazä nez loj Dad Jesucrist.

<sup>21</sup> Bacuaä guijtzre lojlu sa'csi nancheä susooblu xtidxä, sujnzalu maazdi loj ni rniabä lojlu. <sup>22</sup> Sigajcza basuchee te lajt cadre jia'nä, sa'csi cabäzä gudzu' Dios ni gunabtu lojni, gusaan Dios jiädhuiä la'tu.

### *Ruxha]ni xtixtios lojni*

<sup>23</sup> Epafras ruxha] xtixtios lojlu. Laani yunäjni narä latzguiib, sa'csi guniizani xtidx Jesucrist. <sup>24</sup> Marcw, Aristarco, Demas, näj Lucas, ni racnäj narä lo dzuunre, ruxha]zareni xtixtios lojlu.

<sup>25</sup> Dad Jesucrist gacnäj la'tu. Sugacni si'c.

## Te Guijtz Nani Biääd Loj Rebe<sub>n</sub> Hebree

### *Agunii Xi'n Dios xtidx Xtadni*

<sup>1</sup> Ne<sub>n</sub> redxe galoo garen-garen mood guninä<sub>j</sub> Dios retoxtadgoldoonu. Xhidajlza huält guniini por reniguii ni bacuaa xtiidxni. <sup>2</sup> Ne<sub>n</sub> redxejre aguniini loonu por Xi'n<sub>n</sub>i, lojzani badeed Dios yäl<sub>r</sub>nibee guncheeni guedxliujre, badeedzani guira'ti lojni. <sup>3</sup> Laani najc xtuxh xten xcäl<sub>r</sub>dimbicha' Dios, laani najczani sigajc najc Dios, laazani rapchee guira'ti con xtiidxni ni rnibee. Cheni gulujx basiani xtoj<sub>l</sub>nu, gurejni xladbee Gueb Dios xhaguibaa te canibeeni.

### *Sacduxhru Xi'n Dios loj rexangl Dios*

<sup>4</sup> Ro'c gurej Xi'n Dios sa'csi sajcruni loj reangl xten Dios, sa'csi acua'ni yäl<sub>r</sub>nibee si'c te bej<sub>n</sub> ni riannä<sub>j</sub> xhixten Xtadni. Lajzani sajcru lo relaj rexangl Dios. <sup>5</sup> Sa'csi Dios di niä<sub>j</sub>b loj nicla tej rexangl<sub>n</sub>i:

Luj najclu Xi'nä. Narä guleälu te guinibeelu.

Dizani niä<sub>j</sub>b xcuent nicla tej rexangl<sub>n</sub>i:

Narä gacä xtadni, laani gacni xi'nä.

<sup>6</sup> Niluxh che biäd<sub>nä</sub>ni Xi'n xtebni lo guedxliuj, guniini:

Guiraa rexangl xten Dios, ¡Colga<sub>n</sub> Xi'nä!

<sup>7</sup> Che gunii Dios xcuent rexangl<sub>n</sub>i räjpni:

Ruj<sub>n</sub>ni ruxhu<sub>n</sub> rexangl<sub>n</sub>i si'c bej, ruj<sub>n</sub>ni rbebajl rexmosni.

<sup>8</sup> Niluxh xcuent Xi'n<sub>n</sub>i guniini:

Luj najc Dios.

Nabaj<sub>n</sub>lu par tejpas;

xcäl<sub>r</sub>nibeelu par tejpas najc te yäl<sub>r</sub>nibesa'c.

<sup>9</sup> Ahuinälajzlu xhigabsa'c, dipaclu nichag<sub>l</sub>ajz xhigabguijdx,

ni'cni Dios ni najc Xtioslu, baniidxru yäl<sub>r</sub>balajz lojlu quela loj resa'lu.

<sup>10</sup> Rniizani:

Luj, Dad, che guslojli bencheelu guira'ti,

bencheelu cad soob guedxliuj, naazalu bencheelu reguibaa.

<sup>11</sup> Laareni sinitlojreni, niluxh luj nabaj<sub>n</sub>lu par tejpas.

Guiraareni siujx si'c riujx te lajd.

<sup>12</sup> Suse'tlureni si'c rie't te la' lajd, sidxaareni si'c rdxaa te lajd.

Niluxh luj dilu guidxaa.

Lalgajctis nabaj<sub>n</sub>lu, di rexijzlu ted.

<sup>13</sup> ¿Gucxha räjp Dios lo te xangl<sub>n</sub>i scree, ä? Räjpni:

Gurej xladbeä te guinibeelu dxejli cheni gudzugä guiraa ni rdxe'ch lojlu ladz ni'lu.

<sup>14</sup> Guiraa rexangl Dios najc sprit, ruxha<sub>l</sub> Diosreni te chayacnä<sub>j</sub>reni rebej<sub>n</sub> ni xca' yäl<sub>n</sub>abaj<sub>n</sub> par tejpas.

## 2

### *Na'c gusaanni diidx ni ruslaani lo dojl*

<sup>1</sup> Ni'cni nanab jiunu xtidx Dios ni abiejn diajgnu, te na'c guibicajnu lo xnezyujni.

<sup>2</sup> Anajntu aguzojb diidx ni gunii rexangl Dios ne<sub>n</sub> redxe galoo. Luxh reni di nusoob diidxga bejnreni dojl, dxejc bateed Diosreni trabajw. <sup>3</sup> ¿Xho gac guibicaj xcäl<sub>n</sub>aj Dios yejcnu palga dinu jiu rextidx Dios xcuent yäl<sub>r</sub>ruslaa lo dojl, ä? Ni Dad, Jesucrist basa'n diidxga lo rexej<sub>n</sub>pacni, dxejc laareni basule'reni rediidxre loonu. <sup>4</sup> Niluxh Dios baluii najc diidxga guliipac sa'csi bejn<sub>n</sub>i rese<sub>n</sub>, näjza yäl<sub>r</sub>rdxeloduxh, näjza xhidajl remilagrw.

Badeedzani Sprit Dxan xtenni loj renani ahuililajz xtiidxni te gun tejjareni garen-garen xtzuunreni si'ctis ni rlajz Dios gunreni.

*Nani guläxteij yälruslaa bejn lo dojl*

<sup>5</sup> Di Dios gudeed yälrnibee lo rexanglni te guinibeereni guedxliucoob ni cagusä'tnu naj. <sup>6</sup> Guyu' tej ni bacuaa xtidx Dios lo guijt, räjpni:

¿Chu najc niguii, te guinalajz Dios laani?

¿Chu najc xi'n niguii te jiädhuiizaluni?

<sup>7</sup> Nagabsi dxej guxiiru sajcnj lo reangl xhaguibaa,

dxejcti badesaclu xcäl'nasa'cni,

badesaclu xpala'nni,

badeedzalu yälrnibee lojni te guinibeeni guira'ti ni bencheelu.

<sup>8</sup> Badeedlu guinibeeni guiralii ni yu' lo guedxliuj.

Cheni badeed Dios guira'ti te guinibeeni, xhetliidi basa'n Dios ni digacdi guinibeeni, niluxh naj ruhuiinu gajdni guinibee guiralii ni'c. <sup>9</sup> Alga rhuiinu Jesucrist, ni bejn Dios guxiiru sajcnj lo reangl xten Dios che guyu'ni lo guedxliuj balsi dxej. Che baluux Jesucrist xtzuumni lo guedxliuj, badeed Dios yälrdimbicha' näjza xpala'nni lojni. Sa'csi sanälajz Dios nuurnu basaanni gudejd Xi'nni trabajwduxh, gujtñi lacuaa niejtñu.

<sup>10</sup> Dios benchee guiralii ni yu' lo guedxliujre, najli rnibeeza Dios guira'ti. Luxh Diosre rlajz chanäni xhidajl xi'nni xhaguibaa, ni'cni baxhal Dios xi'npacni Jesucrist te guläxteijni yälruslaa bejn lo dojl che gudejdni trabajwduxh lo cruujz. <sup>11</sup> Sa'csi Jesucrist, ni rujn chasanäj bejn te yäl'nabanya, näjza reni risanäj yäl'nabanya, tejtis najc xtradreni. Ni'cni di Xi'n Dios guitujy guiniini lojreni: “betzä”. <sup>12</sup> Scree caj lo xtidx Dios:

Chasule'ä lo rebetzä xho najclu,

siliä'päza xpala'nlu lojreni.

<sup>13</sup> Räjpszani:

Sibäzä gacnäj Dios narä.

Ste lajt guniini:

Bahuii loä näjza rexi'nä ni baniidx Dios loä.

<sup>14</sup> Te famiļ najc tejsi bääl, tejsiza rejñ; ni'cni che biääd Jesucrist lo guedxliuj guyu' tiejxhni näj xtejnñi si'c benguedxliuj, gujtzani te gujc bejnñi gunijt nani rnibee yälgujt, nalajznu, bendxab. <sup>15</sup> Te si'c baslaani guiraa reni rdxejb yälgujt, najcreni si'c reni yu'tis loj xlamni guideb nabajñreni, lacti rdxejbreni yälgujt. <sup>16</sup> Guliini dini niääd te gacnäjni reangl xten Dios, biäädni te gacnäjni guiralii rexajz toAbram. <sup>17</sup> Ni'cni gujcnj si'cpac te bejtznu, te gac gacni te bixhojz xten Dios ni rulaslajz, te bixhozsa'cza xten Dios, si'cni rlajz Dios gacni te guslaani rebejn lo dojl. <sup>18</sup> Sa'csi lagajc laani gudejdni trabajw, luxh baquuilza bendxabni niujñni dojl, ni'c naj sajg gacnäjni renani ruquuil bendxab gun dojl.

### 3

*Jesucrist sajcru loj Moisés*

<sup>1</sup> Ni'cni bejtznu, reni anabansa'c, sa'csi najctu reni gurejdx Dios gac xi'nni, colyembee Jesucrist ni baxhal Dios loonu. Laani najc bixhojz ni sajcru, rusule'zani xtidx Dios xcuent nani ahuililajznu. <sup>2</sup> Laani huinuutis guyu'ni lo Dios ni guleni te gunni dzuunre. Sigajc ni bensa'c toMoisés xtzuum Dios che guyu'ni loj rexpejn Israel, sigajcza bensa'c Jesucrist dzuun che biäädni lo guedxliuj. <sup>3</sup> Sigajc ni yu'ru xpala'n dad lo xpala'n rexi'nni, sigajcza yu'ru xpala'n Jesucrist lo xpala'n toMoisés. <sup>4</sup> Yu' xtad guiraa refamiļ lo guedxliuj, niluxh gule'c Dios guiralii bejn, bencheezani guedxliuj. <sup>5</sup> Basoob Moisés diidx si'c te mos, cuanäjñi rexpen Dios si'cni gunibee Dios gunni, te baluiini xho gac redzuun ni gajd gac dxejc, luxh naj agujc redzuunga. <sup>6</sup> Niluxh Jesucrist basoob diidx si'c xi'npac Dios. Cuanäjñi xfamiļ Dios. Nurnu najcnu xfamiļ Dios palga chanuutis sudzu'tznu lo xtiidxni, palga guibalajztisnu, palga gutiplajznu dxejli ni guibi' Jesucrist.

*Yälrusilajz xten rexpejn Dios*

<sup>7</sup> Ni'cni, si'cpac rñi Sprit Dxan xten Dios:

Naj, palga jiendiajgtu xse'ni,

<sup>8</sup> na'c gun-najd tu lastootu si'c bejn rebejn ni bidxehnäj Dios che cuansajreni lo reyubijdz.

<sup>9</sup> Ro'c bidxehnäj retoxtadgoldootu Dios sa'csi direni nililajz Dios siädnäreni, niluxh bahuiireni redzunduxh ni bejn Dios nez lojreni tiuu ijz.

<sup>10</sup> Ni'cni laj ni cadxe'ch Dios loj rebejnğa, bejn Dios xhigab:

Sujiannäjreni xhigabguijdxreni,  
dina gusanä jiu'reni xcälrusilazä.

<sup>11</sup> Ni'cni bidxe'ch Dios lojreni,  
bejn Dios te xhigabduxh,  
di rebejnğa jiu' te gusilaznäjni.

<sup>12</sup> Bejtznu, colnatiro andi chu tejt u rujn xhigabguijdx, rlajz guibicaj lo Dios, ni nabajn par tejpas, sa'csi dini chalilajz xtiidxni. <sup>13</sup> Ni'cni colgulijdx resa'tu guixe-guixee, laga najcni nadxej; te di chu tejt u gacnajd lastooni xcuent reyälrusguee xten redojl. <sup>14</sup> Sa'csi palga chanuunu sudzu'tznu lo xtidx Dios ni huililajznu che biemeenuni, dxejc yu' xhi rajpnu con Jesucrist. <sup>15</sup> Si'c caj lo guijtz:

Nadxej, palga jiendiajgtu xse' Dios,  
na'c gunnajd tu lastootu si'c bejn rebejn ni bidxehnäj Dios lo reyubijdz.

<sup>16</sup> ¿Chu reni'cni bidxehnäj Dios che biendiajgreni xtiidxni? ¿La et laadi guiraa rebejn ni gulää Moisés guedx Egipto, ä? <sup>17</sup> ¿Chuxh loj bidxe'ch Dios tiuu ijz lo reyubijdz, ä? ¿La et laadi reni biajb lo dojl, dxejc gujtreni, huijiajbreni nez loj reyubijdz, ä? <sup>18</sup> ¿Chu loj räjpni dipacreni jiu' lo xcälrusilajzni? Loj reni di nusoob xtiidxni. <sup>19</sup> Ni'c ruhuiinu di niajcdi niu'reni lo yälrusilajz sa'csi direni nililajz xtidx Dios.

#### 4

<sup>1</sup> Ni'cni palga bia'n diidx siu'pacnu lo yälrusilajz con Dios, nanab jia'pnu lagajc nuure didi yu' chu tejt u di gun gaan jiu' lo yälrusilajzğa. <sup>2</sup> Sa'csi nuure abiejn diaagzanu diidx ni rusia dojl, sigajc biejn diajg rebejnğa; niluxh xlia'si biejn diajgreni diidxğa sa'csi bacuadiajgrenini niluxh direni nililajzni. <sup>3</sup> Luxh nuure ni ahuililaaznu siu'nu lo yälrusilajzğa; caj lo guijtz gunii Dios rediidxre:

Ni'cni bidxe'chä lojreni, benä te xhigabduxh,  
di rebejnğa jiu' te gusilaznäjreni narä.

Mase abaluuxni xtzuunni cheni birixtiejli guedxliuj. <sup>4</sup> Sa'csi loj stee guijtz caj diidx ni guniini xcuent dxej ni rusilajz bejn:

Xho'p dxej bejn Dios xtzuunni, dxejcti basilajzni tebdxej.

Xhet bejndini dxejğa.

<sup>5</sup> Stehuält guniini:

Di rebejnğa jiu' te gusilaznäjreni narä.

<sup>6</sup> Niluxh yu' reni gajd jiu' loj yälrusilajzğa, luxh reni biejn diajgni diidx ni rusia dojl di niu' sa'csi direni nusoob xtiidxni. <sup>7</sup> Ni'cni basoob Dios ste dxej gac "nadxej". Gudejd xhidajl ijz che gunisac Dios xcuent yälrusilajz. Badeed Dios gunii toDavid rediidxre:

Nadxej, palga jiendiajgtu xse'ni, na'c gunnajd tu lastootu.

<sup>8</sup> Paru nudeed Josué yälrusilajzğa loj rexpen Israel, diru Dios ninisac xcuent stee dxejre.

<sup>9</sup> Naj ria'nza te yälrusilajz par rexpejn Dios, <sup>10</sup> sa'csi nani riu' lo xcälrusilaznäj Dios, rusilajzzani lo xtzuunni sigajc basilajz Dios lo xtzuunni. <sup>11</sup> Nanab chanuu gusoobnu xtiidxni te jiu'nu lo yälrusilajzğa, te di chu tejt u ni gacnajd lajzni si'c ni gucnajd lajz renani di nililajz.

<sup>12</sup> Sa'csi nasesduxh xtidx Dios, yuduxhza xcälrnibee xtidx Dios. Najcni si'c te guchiil ni caduxh ro'ni, rääzni nez nen redzujt näj yojb. Sigajcza xtidx Dios rääz nez cadro rlia' sa' xsprit näjza xaim bejn. Ruluiiza xtidx Dios rexhigab ni yu' lastoo bejn, näjza redzuun ni rlajz lastoo bejn gun. <sup>13</sup> Xheti xhi bencheedi Dios ni naga'tz nez lojni. Guiralii guyasi ruhui Dios. Sajpnu gudeednu cuent lo Dios.

*Bixhojz ni sajcr u najc Jesucrist*



<sup>14</sup> Jesucrist, Xi'n Dios, najc xpixhojzpacnu ni sajcru, nani abiu' loj Dios. Ni'cni nanab chanuu sudzu'tznu chalilaaunu xtidx Dios. <sup>15</sup> Xpixhojznu ni sajcru sajc gulaslajzni nuure te di jiajbnu lo dojl, sa'csi laani sigajcza gudejdni trabajw, baquuil bendxabni te niujnni dojl, niluxh dini niujn dojl. <sup>16</sup> Riäjlpac na'c guidxebnu cuedx-guiniabnu lo Xtiosnu ni sanälajz nuure. Na'cza guitujynu, te gulaslajzni nuure, guideb xcälracnäjni gacnäjzani nuure.

## 5

<sup>1</sup> Galooli guiraa rebixhojz ni sajcru nabee lo rebejn. Bixhojz ni sajcru rniab lo Dios xcuent rebejn. Luxh lojni rudeed rebejn regon näjza reguidxaa ni gudeedni lo Dios te jiäu lo xtojlreni nez lo Dios. <sup>2</sup> Rdejdza bixhojz trabajw sigajc benguedxliuj, ni'c sajc ga'pni yälñadolajz loj rebejn nani nayääl näjza reni abanijt lo Dios. <sup>3</sup> Niluxh sa'csi näjza laani rujnni dojl, nanab gudeedni guidxaa lo Dios te jiäu lo rextojlni sigajc rudeedni guidxaa lo Dios te riäu lo xtojl rebejn.

<sup>4</sup> Rut sajcdi gac bixhojz xcuentcani. Dios najc ni rbejdxni te gacni bixhojz, dxejc rudeedni xpala'nmi lojni si'c badeednini lo Aarón. <sup>5</sup> Si'cza di Jesucrist niajc bixhojz ni sajcru xcuentcani. Dios najc nani gulälajni gacni bixhojz ni sajcru, räjpni lojni:

Luj najclu Xi'nä, narä guleälu nadxej te guinibeelu.

<sup>6</sup> Scree cajza lo xtidx Dios stee lajt:

Luj najclu bixhojz par tejpas sigajc gujc te niguii ni laa Melquisedec.

<sup>7</sup> Cheni gubajn Jesucrist lo guedxliujre, gurejdx-gunabzani lo Dios, guredxa'ni biinzani lo Dios nani sajc nudzucajni lo yälgujt; Dios bacuadiajg xtiidxni sa'csi huinälajz Jesucrist Dios. <sup>8</sup> Ni'cni Jesucrist mase najcni Xi'n Dios bisieedni basoobni diidx luxh näj ni'c gudejdni trabajw. <sup>9</sup> Che bidzujn dxej baluuxni guiraa redzuun ni rlajz Dios gunni, laani gujcn nani rudeed laa bejn nani rusoob xtiidxni lo dojl par tejpas <sup>10</sup> sa'csi Dios gulälajni bixhojz ni sajcru, gujcn bixhojz sigajc gujc Melquisedec.

*Rxhu*ñriezgw gusa'nmi xcälrililajzni

<sup>11</sup> Rlajznu guiniinu xhidalduxhru diidx xcuent Melquisedec, niluxh naganduxh gusule'nuni lojtu sa'csi nadyejctu, ditu gacbee. <sup>12</sup> Agujc xchej huililajztu rediidx xcuent Jesucrist. Ariäjlgusule'tu rediidxre naj, niluxh alga rquiinrutu chu gusule' rediidxre lojtu stehuält, luxh rediidxre najc rediidx guyasi xten Dios. Agucsactu si'c bäs. Rlajztu yäsactu le'ch lacuaa gautu yäjt, bäälg; nalajznu, redidxnagajn xten Dios. <sup>13</sup> Reni najc si'c bäs, rä' le'chtis, direni gumbesa'c redidxxa'c xten Dios. <sup>14</sup> Niluxh reben guyajl rajw yäjt. Sigajcza redidxnagajn xten Dios najc par rebejn ni aguyajl lo xtidx Dios, renani ayu' xcäriejnmi, arumbeereni nani najc dzunsa'c, nani najcza dzunguijdx.

## 6

<sup>1</sup> Nanab guisieedrunu xtidx Dios te churu xcäriejnmi. Na'c guisieedtisu didx-guyasi xcuent Jesucrist. Na'c guluiitisnu diidx xcuent yälrusiechlajz, xcuent redzuun ni rujn rejt bejn, näj yälrililajz xtidx Dios. <sup>2</sup> Na'c guluiitisnu xcuent yälrobnis, näj yälrudzubnaa yejc bejn, näj xcuent yälrbajnsac rebengut, näj xcuent yälguxhtis par tejpas. <sup>3</sup> Alga do'o guisieedru xtidx Dios te churu xcäriejnmi, palga si'c guniidx Dios jiennu.

<sup>4</sup> Yu' bejn ni abianij xcäriejnmi, ni acua' reyälñasa'c ni rudeed Dios, ni rbäjz Sprit Dxaan xten Dios nen lastooreni, <sup>5</sup> luxh bidxagljzreni xtidx Dios näj yälñabee xten Dios ni churu jiääd. <sup>6</sup> Palga laareni guibisacreni lo sa' yälñabajn ni gojpreni galoo, diru gacdi guidxaa xmodreni stehuält, sa'csi dxejc sajcn si'c ni lagajc laareni gucasacreni Xi'n Dios lo cruzj, nalajznu susanxtujyreni Jesucrist nez loj rebejn. <sup>7</sup> Ben guedxliuj ni biejn diajgni najc si'c najc yuj ni rä' nis che riajbtis nisguij. Palga yujga gudeed yälñasa'c loj reni rujn dzuun lojni, sunle' Dios yujga. <sup>8</sup> Niluxh palga gudeed yujga ganax yaguejch näjza cuaan ni xhet sajcdi, xlia'sini, sujn rebejn gac nadeni te checni.

*Diidx ni rusudzu'tz lastoonu*

<sup>9</sup> Mase rniinu scree lojtu, anajnnu huililajztu xtidx Jesucrist najza xtiidxni ni ruslaa lo dojl. <sup>10</sup> Sa'csi Dios najc ni rujn yälguxhtissa'c, diza lajzni jiäl ni rujntu la'tu näj yälsanälajz ni rajptu par laani che racnäjtu rebejtznu lo yälrlilajz, luxh guixe-guixee si'c rujntu. <sup>11</sup> Naj rlajznu tejgatu chanuu ga'p lagajc yälrbalajzre dxe lultli, te gac guiraa ni cabäjztu. <sup>12</sup> Rlajznu na'c gactu bejn ni rbedxitis, alga guntu sigajc bejn reben galoo, gopdzu'tzreni yälrlilajz ni batipduxh lajzreni, guläjzreni te cua'reni reyäl'nasa'c ni bia'n diidx gudeed Dios lojreni.

<sup>13</sup> Luxh che bia'n Dios diidx loj toxtadgoldoonu Abram, guniini por lagajc laani sa'csi ruti stee ni sajcro lojni. <sup>14</sup> Scree gunii Dios: “Guliä sacnäá luj, sunidxäza xhidajl xi'nlu.” <sup>15</sup> Cheni aguläjz Abram xchej, gusojb diidx, cua'ni nani gunii Dios lojni. <sup>16</sup> Sa'csi cheni rniliipac bejn te diidx, rniireni diidxga por laj ste'ca bejn ni sajcro lojreni, sas che rusä'treni laj bejnga xhetru yu'di xhi gunreni bieje. <sup>17</sup> Rlajz Dios gacbeepac rexagdo toAbram sisiojbpac diidx ni bia'nni che guniini loj Abram galooli. Sisiojbpac xtiidxni, sa'csi guniini diidx con lagajc lajzni che bia'nni diidxga. <sup>18</sup> Ni'cni naj yu' tiop diidx ni digacdi guichaa sa'csi digacdi guinii Dios didx-xhii, rusoobpacni xtiidxni, rudeedzani yälrbedxilajz loj renani gubig-guxun lojni, loj reni sanuu loj yälrlilajz xtiidxni nani abaniidxni loonu por lagajc lajzni. <sup>19</sup> Laa ni'cni cabäaznu ni rusudzu'tz lajznu si'c duu-guuiib con ancl ni rniazdu'tz te barcw. Si'c rusudzu'tzni lastoonu te jionnu cadro yu'ni detz ladró. <sup>20</sup> Lagajc ro'c biu' Jesucrist xcuent nuure, te galooli baxhalni xnez Dios loonu, te gujcn bixhojzro par tejpas si'c gujzca bixhojz nani laa Melquisedec.

## 7

### *Jesucrist najc bixhojzro si'c najc Melquisedec*

<sup>1</sup> Galoo che gujc Melquisedec reii xten guedx Salem, gujcn bixhojzro xten Gueb Dios. Che gubi' Abram che gulujx guer cadro bagu'tni rereii ni bidxe'ch lojni, huichagloj Melquisedecni, sas gunabni lo Dios te gacnäjru Dios Abram. <sup>2</sup> Dxejcti bejn Abram tzuu cuaa guiraa ni bejnni gaan, te badeedni tej cuaani loj Melquisedec. Laj Melquisedec säloj “reii ni runsa'c yälguxhtis”, dxejctiru reii xten guedx Salem sälojzani “reii xten yälrbedxilajz”. <sup>3</sup> Baluiilojni lojreni, niluxh dinu gan chu najc xtadni, niclaza chu najc xnanni, niclaza chu najc resa'ni. Dizanu gan guc gojlni niclaza guc gujtni. Gujcn si'c najc Xi'n Dios. Najctiszani bixhojzro par tejpas.

<sup>4</sup> Naj colhuii, lacti te beñsa'c, te beñro najc Melquisedec. Lojni badeed toxtadgoldoonu Abram tejga ni sajcro lo tejga tzuu ni bejnni gaan. Luxh Abram najc bejn ni sajcro lo rexpejn. <sup>5</sup> Leii xten Moisés, rnibee xca' rebixhojz ni najc xfamil Leví te cuaa lo sa'reni si'c ni badeed toAbram loj Melquisedec, mase najcreni rexagdo Abram. <sup>6</sup> Niluxh di Melquisedec gac xfamil Leví. Niluxh badeed Abram te cuaa xhixtanni loj Melquisedec. Dxejcti benle'ni Abram ni biannäj xtidx Dios. <sup>7</sup> Naj rut sajcdi guinii garenca, sa'csi nani sajcro runle' yejc nani guxiiru saj. <sup>8</sup> Naj rebixhojz ni rca' tejga lo tzuu ni rajpreni, najc bejn ni rejt. Niluxh rnii xtidx Dios xcuent Melquisedec ni cua' te cuaani galooli: najcni si'c te bixhojz nani nabajn par tejpas. <sup>9</sup> Ni'cni saj guiniinu xcuent Leví nani rca' te cuaa, lagajc laani agudijx te cuaaga che badeed Abram tejga yejc tzuuga lo Melquisedec. <sup>10</sup> Sa'csi mase gajd xi'n toAbram chu che huichagloj Melquisedecni, batijpni lastooni sa'csi abia'n diidx sudeed Dios xajgni. Ni'cni che agudijxni te cuaaga najcni si'cni suganäjni rexajgni.

<sup>11</sup> Rexpejn Israel cua' leii che gujc bixhojz relevitas, reni najc rexi'n toAarón. Paru niajc niujnreni nibansa'c rebejn ni huisanäj leiiga, dirureni niquiin niääd stee bixhojz ni di gac si'c Aarón, alga si'c najc bixhojz Melquisedec najcni. <sup>12</sup> Sa'csi cheni rdxaa te cuaa bixhojz nanab najza leiiga guidxaa. <sup>13</sup> Niluxh rnii xtidx Dios, Dad Jesucrist najc bejn xten garenca famil. Luxh nicla tej bixhojz gajd gac bejn xten familga. <sup>14</sup> Huenliisi najnnu najc Dad Jesucrist te bejn xten xfamil toJudá, niluxh di Moisés ninii gac te rexpejn Judá bixhojz.

<sup>15</sup> Luxh huenliisi najc ni rniinu, sa'csi abiricaj ste bixhojz ni najc sigajc gujc Melquisedec. <sup>16</sup> Luxh dini niajc bixhojz si'c rniie releii ni guyu' dxejc. Laani gujcnii bixhojz xcuent yäl̄rnibee ni najc par tejpas, ni rut gacdi gutzujl. <sup>17</sup> Scree najc diidx ni gunii Dios xcuentni:

Luj najclu bixhojz par tejpas si'c gujc te niguii ni laa Melquisedec.

<sup>18</sup> Dxejcti gunijt leii sa'csi xlia'si gujcnii, di niajcdi niujn bejn̄ si'cni rniini. <sup>19</sup> Di xleii toMoisés niujn gaan nibansa'c bejn̄. Naj lacuaa leiiga rajpnu te xcäl̄rililazsa'c; ni'c rujn rbignu lo Dios.

<sup>20</sup> Dios bejn̄ gacni bixhojz con xtidxliini, ni guniini con lagajc lajni. <sup>21</sup> Stecuua rebixhojz gujcreni bixhojz niluxh et con didxliidire, con laj te benro, niluxh bixhojzre guc bixhojz con didxlii, con laj nani räjp:

Agunilii Dios diidx con lagajc lajni,

niluxh dini gusiech lajni, räjpni:

“Luj najclu te bixhojzro par tejpas, lagajc si'c gujc Melquisedec.”

<sup>22</sup> Ni'cni, Jesucrist najc ni rujn rile' rediidxre, luxh diidxre sajcruni loj xleii Moisés.

<sup>23</sup> Guyu' xhidalduxh stecuaa rebixhojz, sa'csi rejtreni, digacdi chanuureni gacreni bixhojz. <sup>24</sup> Niluxh Jesucrist rajpni yäl̄nabajn̄ par tejpas, naj najczani bixhojz par tejpas.

<sup>25</sup> Ni'c rajcza ruslaani bejn̄ lo dojl̄ par tejpas. Ruslaani guiraa renani rbig lo Dios por laani, sa'csi anabajn̄ni par tejpas te canabni lo Dios xcuent laareni.

<sup>26</sup> Jesucrist najc bixhojzro nani rquiinnu. Laani najc dxan, dini niujn dojl̄, agubicajni lo reben̄-dojl̄, huäjszani jiaaru xhaguibaa. <sup>27</sup> Dini gac si'c stecuaa rebixhojz ni nanab ju't man guixe-guixee te guze'c bixhojzroni lo Dios te ganid jiaa lagajc xtojlni. Dxejcti sajz guibi'ni guze'cnini lo Dios xcuent xtoj̄l̄ rebejn̄. Niluxh Jesucrist tejtis huält gudejdni trabajw, bejnnini cheni cuajni lo crujz, baxhe'ni xtiejn̄ni xcuent nuure, gujtni. Si'c gudijxni xtoj̄lnu par tejpas. <sup>28</sup> Leii xten Moisés rusaan gac bixhojzro te bejn̄ nani rejt, niluxh didxlii ni gunii Dios con lagajc lajni guleni tejni gac bixhojzro lagajc Xi'nni nani naya, nani nabansa'c par tejpas.

## 8

### *Jesucrist najc nani rusiäj̄l̄ diidx*

<sup>1</sup> Diidx ni sajcru loj rediidx ni caniiinu najc scree: bixhojz ni najc xpixhojzronu agurej xladbee Dios lo xcäl̄rdimbicha'ni xhaguibaa. <sup>2</sup> Neñ̄ yu' ni najc dxan, neñ̄ guidoo ni benchee Dios yu' bixhojzre, xhet nendi guidoo ni runchee reben̄ lo guedxliuj. <sup>3</sup> Guiraa rebixhojz rajc rudeedreni gojn̄ lo Dios, rajcza ju'treni guidxaa te gusejcreni lo Dios xcuent xtoj̄l̄reni, ni'cni nanab ga'p Jesucrist xhi gudeedni lo Dios. <sup>4</sup> Paru suga'ni lo guedxliujre, nicla bixhojz dini niajc, sa'csi yu' bixhojz ni rudeed regojn̄ si'c ni rnibee xleii Moisés. <sup>5</sup> Niluxh redzuun ni rujn rebixhojzga najc si'c te balaa xten guira'ti ni yu' xhaguibaa. Najnnu najcreni balaa sa'csi balijdx Dios Moisés cheni agojl̄ gunni xquidoo Dios, räjp Dios lojni: “Bahuii te gunlu guira'ti si'cpac ni baluiä lojlu lo dan Sinaí.” <sup>6</sup> Niluxh xpixhojznu Jesucrist rujn dzuun ni sajcru, sa'csi najcni nani suga' galäii xnezyuj Dios loj reben̄ guedxliuj, gusule'ni diidx ni gunii Dios cheni bejn̄ni xhigabcoob, basa'nni didxcoob loj reben̄ guedxliuj. Luxh didxcoobre sacduxhruni.

<sup>7</sup> Paru niajc nusiejch leii ni badeed Dios galooli lo Moisés lajz rebejn̄, di niqiiin niujn Dios ste xhigabcoob. <sup>8</sup> Niluxh bahuii Dios xhet cayunsa'c di reben̄ guedxliuj, dxejc räjpni: Naj rniliä sidzujn̄ redxej che gunä stee xhigab, jia'n stee diidx loj rexpejn̄ Israel näjza loj rexpejn̄ Judá te xca'reni didxcoob.

<sup>9</sup> Xhet si'c di xhigab ni benä che bia'nä diidx loj retoxtadgoldooreni neñ̄ redxej ni gunazä naareni te gulääreni lajdx reben̄ Egipto.

Laareni direni nusoob xtidxä ni'c basa'näreni, diruna niuäreni. Si'c gunii Dad, Gueb Dios.

<sup>10</sup> Niluxh diidx nani runä xhigab rlazä jia'n diidx loj rexpejn Israel nen redxejre gac scree, räjp Dad:

Sunä chu rexleä lo xcäriejnreni, sucuaäza xtidxä nen lastooreni.

Dxejcti narä gacä Xtiosreni, laareni gac rexpenä.

<sup>11</sup> Rut chu tejdi guluii sa'ni,

nicla bejtzni, nicla chu stee bejn gäbreni, “colyembee Dad”,

sa'csi alanumbee guiraareni narä, rebäz sigajc rebengool.

<sup>12</sup> Narä sulaslazäreni susiaä redzundxuudx ni bejnreni, diru lazä guizaj rextojlreni, nicla latzsiaj ni bejnreni.

<sup>13</sup> Che bia'n Dios didxcoob, diidx nani bia'nni galoo agujcni didx-biejw, luxh nani anajc didx-biejw, xhetru sajcdini.

## 9

### *Xquidoo guedxliujre näjza guidoo xhaguibaa*

<sup>1</sup> Laaca naj. Diidx ni bia'n galoo badeed leii xho gunreni che rajnreni Dios, näjza xho gac guidoo lo guidxliujre. <sup>2</sup> Guc-chee guidoo dxejcti gojl te ladro galäiini te gujcnio'p yu'. Yu' ni najc ganid laani yudxan. Ro'c suga' candilieer, näjza mex cadro naga' yätxtiil ni aguc le'. <sup>3</sup> Ni rojp yu'ga najc dejtz ladro, ro'c najc yudxanduxh. <sup>4</sup> Ro'c suga' te guiib cadro ru' yaal. Najcni ganax oor. Ro'c yu'za te guijn ni laa “arco de pacto”, najcwni ganax oor, sigajc dejtzni, sigajcza nenni. Nenga yu' te bo't ganax oor. Nen bo'tga, yu' yätxtiil ni laa mana. Lagajcza nen guijnga yu' bar xten toAarón nani biga', guyu' bid lojni, näjza guij cadro bacuaa Dios xleii toMoisés. <sup>5</sup> Yejc guijnga caj tio'p figur oor ni najc si'c xangl Dios. Laareni rujn racbee bejn suga' Dios ro'c. Lagajc redee rusäuu con rexhigareni cadro ruxhe' bixhojzro xtiejn guidxaa xcuent xtoj rebajn. Ro'cti di gacdiru guiniirunu xcuentreni naj.

<sup>6</sup> Che gulujx gusucheereni, riu' rebixhojz si'csi si'c nen guidoo, nen yudxan te rajnreni Dios si'c gunibee Dios. <sup>7</sup> Niluxh nen stee yu'ga ni laa yudxanduxh, ro'c rajc riu' bixhojzrotis. Xtebtisni riu'ni, luxh tejtis huält nen teb ijz, te chanäni xtiejn reguidxaa ni gudeedni te jia xtojlni näjza te jia xtoj rebajn ni najc xpejn Israel. <sup>8</sup> Luxh guiraa reni'c ruluii Sprit Dxan xten Dios loonu, gajd yudxanduxh guxal che sugasijc yu' ganid, yu' ni laa dxan, cadro sanuu rajnreni Dios. <sup>9</sup> Guiraa ni gujc galoo najc si'c te balaa, baluiini xho gacni naj. Regon näjza reman ni rudeedreni lo Dios direni nusansa'c xcäriejn reni rudeed gojn lo Dios, sa'csi xtiejn reman rusäutisni lo xtoj rebajn. <sup>10</sup> Dee najc ganaxtis xhi rajwni, ni rä'ni, con yälrobnis, o xhi stee dzuun ni rujn bejn te ria ganaxtis tiejxhreni che guidzujnli dxej cheni guchaa Dios guira'ti.

<sup>11</sup> Niluxh abiääd Jesucrist, naj laani najc bixhojzro xcuent redidxcoob ni sajcro naj. Nacoob guidoro cadro biu' bixhojzre, nasa'cruni naj. Xhet con naadi bejn guc-cheeni. Dizani gac guidoo guedxliujre. <sup>12</sup> Abiu' Jesucrist cadro najcpac yu' ni laa dxanduxh, niluxh xhet xtiejndi redxib, regon; ganax lagajc xtiejn ni ca'ni biu'ni yudxanduxh tejtis huält, te si'c baslaani nuure lo dojl par tejpas. <sup>13</sup> Reni basia xtoj bejn galoo najc redee: xtiejn regon näjza redxib, näj cobdäj xten reguidxaa ni rejc nen guidodxanga; bastiojbni guiro'preni yejc reni yu' xtojlni. <sup>14</sup> Palga basia redee xtoj bejn, aticaxh xtiejn Jesucrist sajc gusia dojl, sa'csi rajpni yäl nabajn par tejpas. Lagajc laani badeedni xtiejn ni lo Dios. Niluxh najcni renya sa'csi dini niujn dojl, rusiazani xcäriejn nuu xcuent retzuun ni xhet sajcdi, te chunu loj Dios ni nabajn par tejpas.

<sup>15</sup> Ni'cni Jesucrist najc nani suga' galäii: nez lo Dios näjza nez loj reben guedxliuj xcuent didxcoob. Yälgujt xten Jesucrist najc te gudzucajni xtoj reben näjza xtoj renani bejn si'cni caj lo leii, te xca' guiraa reni agurejdx Dios yäl nabajn par tejpas, si'c bia'n diidx galooli. <sup>16</sup> Didxcoobre najc si'c che rlazj tej bejn guinibee xho guidis xhixtenni che agojl guetni, nanab gucuaa bejnga lo te guijtz xho guidisni, dxejcti gucuaani lajni. Niluxh xhet sajcdi guijtzga che gajd bejnga guet. <sup>17</sup> Xhet sajcdi guijtzga che nabansijc nani bejn ni. Sajcni che agujt bejnga. <sup>18</sup> Ni'cni che bia'n Dios diidx loj rexpejn Israel galoo, gujt te man

te bixe' rejn. <sup>19</sup> Che gulujx gunii Moisés rediidx si'c ni caj lo leii loj guiraa rexpejn Israel, bagu'tni rebiser, redxib, cua'ni rejnga nájza nis, bahuaidxni guid-xiil xniaa nájza te la' yajg balagbáz, hysopo, dxejcti bastiojbni rejn yejc guijtzc cadre caj leii, nájza yejc rebejn.

<sup>20</sup> Dxejc guniini lojreni: “Rejnre najc seen sile'pac diidx ni abaxhał Dios lojtu.”

<sup>21</sup> Sigajcza bastiojb Moisés rejn guidoo náj guiraa renani rquiin rebixhojz che rajnreni Dios. <sup>22</sup> Leii xten Moisés rnibee jia guiralii con rejn, palga di rejn guixe', di xtojł bejn jia.

### *Xtiejn Jesucrist rudzucaj dojl*

<sup>23</sup> Ni'cni biquinpac gujt remanre, bixe' xtiejn ni te basiani reni najc xpalaa reni yu' xhaguibaa, niluxh reni yu' xhaguibaa rquiin guixe' xtiejn te ni sajcu. <sup>24</sup> Di Jesucrist niu' neñ guidoo ni benchee rebejn, ni najc xpalaa guidoopac xten Dios xhaguibaa. Laani biu'ni lagajc xhaguibaa, te laani suga'ni nez lojpac Dios te caniini xcuent nuure loj Dios.

<sup>25</sup> Bixhojzro xten xpen Israel biu' neñ yu' ni laa dxanduxh tejtis huält neñ teb ijz, ca'ni xtiejn reguidxaa. Niluxh Crist biu' xquidoopac Dios xhaguibaa tejtis huält par tejpas, luxh ca'ni lagajc xtiejn ni. Di guiquiin jiu'runi balti huält. <sup>26</sup> Palga nanab gunni si'cni rujn rebixhojz, sajpn ni por niejtni te chinaduxh huält cheli birixtiej guedxliuj. Luxh naj, cheni bidzujn dxej, baluiloj Jesucrist tejtis huält, lagajc laani badeedzani xtiejn ni lo Dios cheni gujtni, cuajni lo crujz te si'c badzucajni par tejpas xtojł rebejn. <sup>27</sup> Guiraa bejn nanabpac guetreni tejtis huält, dxejctiru sidejdreni yalguxhtis xten Dios. <sup>28</sup> Sigajcza tejtis huält badeed Jesucrist xtiejn ni bixe' lo crujz te badzucajni xtojł xhidalduxh bejn. Luxh loj renani cabájzni suluiilojni stehuält, xhet te gudzucajdiruni dojl, alga te gusa'ni xcälrusłaa renani cabájzni.

## 10

<sup>1</sup> Sa'csi leii xten to Moisés najctis si'c te balaa xten nani siäd naj. Niluxh dini gac si'cpac redidxcoobga. Ni'cni leii, con xtiejn reguidxaa ni rxe' cazob ijz digacdi gansa'cni rebejn nani guibig lo Dios, sa'csi di xtiejn man gudzucajpac rextojłreni. <sup>2</sup> Paru niajc nibicajpac xtojł reni rudeed xtiejn guidxaa, agulájz rudeedreni xtiejn guidxaa, sa'csi che gubicaj xtojłreni, diru xcäriejnreni gumbee dojl. <sup>3</sup> Niluxh yälrejt man náj yälruudeedreni rejn casob ijz rusnajtisreni lajzreni xcuent dojl. <sup>4</sup> Sa'csi digacdi gudzucajpac regon nájza xtiejn redxib xtojł bejn.

<sup>5</sup> Ni'cni che biäd Jesucrist lo guedxliuj räjpni lo Dios:

Di rlajzlu xtiejn guidxaa niclaza regon niluxh abejnlu gacä nigui-guedxliuj.

<sup>6</sup> Dilu nichagljaz yälrejc xten guidxaa niclaza yälruudeed rejn, niclaza gojn ni rudeed rebejn te gusiani xtojłreni.

<sup>7</sup> Dxejc räpä: “Narä basiälä te gunä si'cni rlajzlu Dad, Dios, (si'cni caj neñ reguijtz xcuent ni sacä).”

<sup>8</sup> Che gulujx gunii Jesucrist diidxga: “Di rlajzlu, dizalu guidxagljaz xcälrejt guidxaa nájza regon niclaza xcälrejc guidxaa, niclaza yälruudeed rejn xcuent xtojł bejn si'cni caj lo leii gun bejn.” <sup>9</sup> Dxejcti räjpni: “Narä siälä, te gunä si'cpac ni rlajzlu, Dad Dios.” Dxejc badzucaj Jesucrist nani gujc galoo, te guläxtiejni didxcoob ni bia'n Dios loonu naj.

<sup>10</sup> Abasia Dios lastoonu sa'csi bejn Jesucrist si'c rlajz Dios cheni baxhe'ni xtiejn ni lo crujz tejtis huält par tejpas.

<sup>11</sup> Guiraa rexpixhojz Israel rujnreni dzuun guixe-guixee te rudeedreni lagajctis guidxaa, nájza xtiejn reman, guiraa si'ctis ni caj lo leii, niluxh reni'c digacdi gudzucaj dojl. <sup>12</sup> Niluxh Jesucrist tejtis huält baxhe' xtiejn ni lo crujz te badzucajni xtojł rebejn par tejpas. Naj agurejni xladbee Dios cadre rnibeeni. <sup>13</sup> Ro'c cabájzni guiraa ni rdxe'ch lojni te cuereni ladzni'ni. <sup>14</sup> Ni'cni tejtis huält cuajni lo crujz te basiani par tejpas guiraa renani ahuililajz xtiidxni. <sup>15</sup> Sigajcza rnii Sprit Dxan xten Dios loonu; najni:

<sup>16</sup> Diidx nani jiannääreni neñ redxejre gac scree, naj Dad Dios: sucuaä rextidxä lo xcäriejnreni, susäläza xtidxä neñ lastooreni. Dxejcti räjpni:



<sup>17</sup> Diru lazä guizaj rextoljreni nicla rextolguijdxreni.

<sup>18</sup> Ni'cni, cheni abia xtoj bejn, diru quiquiin gudeedreni guidxaa te jia rextoljreni.

### *Nanab guibignu lo Dios*

<sup>19</sup> Ni'cni resa'nu, na'c guidxajtbtu, sajc jiu'nu yudxanduxh cadro bixe' xtiejn Dad Jesucrist nani abadeedni lo Dios. <sup>20</sup> Naj yu' te nezyuj, nezsiucoob, nezyuj xten xcälñ-abancoobnu ni baxhalni che badzucajni ladroga. Ni'c säloj cheni biu'ni nen yudxanduxh, badeedni lagajc xtiejnni lo Dios. <sup>21</sup> Jesucrist najc xpixhojzronu nani rnibee rexpejn Dios. <sup>22</sup> Ni'cni do'o guibigrunu lo Dios guideb lastosa'cnu, na'c guidxajbdinu, na'cza guitujydinu. Con yälirililajzpac abia lastoonu xcuent rexhigabguijd, abidiibza tiejxhnu lo nis-ya. <sup>23</sup> Do'o chanuu sudzu'tznu lo xtiidxni nani huililajznu, na'c guchaanu xhigabnu sa'csi susoob Dios diidx ni bia'nni loonu. <sup>24</sup> Naj do'o guihuii xho jiennu te gacnä j sa'nu te si'c chonälajznu sa'nu nägajcza te jiennu ganax dzunsa'c. <sup>25</sup> Na'c jiennu si'c rujn rebejn nani diru jääd che rdxagsa'nu. Nanab guiliidxnu resa'nu sa'csi naj asiäddzungajxh dxej ni guibi' Dad Jesucrist.

<sup>26</sup> Palga chanuu jienrunu dojl, niluxh abiejn diajgnu xtidx Jesucrist, diru gacdi guibicaj xtojlnu dxejc. <sup>27</sup> Dxejcsii guidxeebtisnu guilääznu yälguxhtisduxh xten Dios näj guiboo ni guze'c renani rdxe'ch loj Dios. <sup>28</sup> Cheni guyu' chu tej ni di niujn si'c caj lo xleii Moisés, niluxh bidxaag xtidx tio'p o choñ ni nancheepac, räjpreni dini nusoob leii, gujt bejnga, rut balaslajzdini. <sup>29</sup> Maazru yälrusacsíduxh nanab ted renani ruläj yejc Xi'n Dios cheni direni gusobdiajg xtiidxni. Alga ruro'nreni xtiejnni ni baxhe'ni lo cruz te basianini. Rusanxtujzani Sprit Dxan xten Dios nani badeed didxcoob lojni. <sup>30</sup> Anancheenu gunii Dios: “Narä susquixä bejn; loä siguijx bejn”, räjp Dios. Stehuält guniini: “Dad sujn yälguxhtis rexpejnni.” <sup>31</sup> ¡Cosduxh gac bejn ni jiajb ladzñaa Dios nani nabajn par tejpas!

<sup>32</sup> Niluxh colsnaj lajztu xho gujcti galoo; cheni entis cua'tu xtidx Dios, xho batip lajztu, gudejdtu trabajw sa'csi cua'tu xtidx Dios. <sup>33</sup> Guyu' resa'tu gudéreni lojni, yu' reni basacsí la'tu nez loj rebejn. Guyu'za huält astoo gudejdzatu trabajw sa'csi cahuiitu rebejn nani basacsíreni, cadejdzareni trabajw. <sup>34</sup> La'tu banaj lajztu renani yu' latzguiib, guideb yälrbalajz batip lajztu che cua'reni guiraa xhixtentu, sa'csi gucbeetu xhaguibaa rajptu reyälñasa'c ni sajcru, niluxh yu'ni par tejpas. <sup>35</sup> Na'c gunijttu xcälirililajz xtidx Jesucrist, sa'csi yälirililajzga gun xca'tu yälñabajn par tejpas. <sup>36</sup> La'tu nanab cuedxitu te che abejntu ni rlajz Dios, dxejc xca'tu nani aguniini guniidxni. <sup>37</sup> Sa'csi xtidx Dios ni bia'n rnii:

Asiäddzungajxhpc dxej ni jäädni,  
asiäddzungajxhpc dxej ni jääd nani siäd, dipacni gaclaa.

<sup>38</sup> Renani nabañsa'c sibannäj yälirililajz,  
niluxh palga yu' chutej ni guidxajb chalilajz,  
dini'c gun guibaa lazä.

<sup>39</sup> Niluxh nuure dinu gac si'c reni rusaan yälirililajz te nitreni loj dojl. Nuure najcnu renani rililajz xtidx Jesucrist te laa xaimnu par tejpas.

## 11

### *Yälirililajz*

<sup>1</sup> ¿Xhini'c najc yälirililajz? Yälirililajz säloj cabääznu sajcpac tejni gajd gac, yu'pacza ni mase dinu fiini, najcni si'cni abahuiinuni. <sup>2</sup> Dios huinälajz retoxtadgoldoonu sa'csi huililajzreni xtiidxni.

<sup>3</sup> Sa'csi rililajznu, najnnu benchee Dios reguedxliuj, bencheeni guibaa, bencheezani guiraa nani rhuiinu. Con xtiidxtisni bencheeni nani dinu guihuii.

<sup>4</sup> Gojpza toAbel yälirililajz badzubyaaalni rexquidxaani lo Dios. Yälrbijbyaal xtenni sajcru loj yälrbibyaal xten toCaín. Ni'cni gunii Dios najc toAbel beñsa'c. Naj mase agujt Abel, sanuutis racbeenu xcuent yälirililajz ni gojpnii.

<sup>5</sup> Sigajcza gojp Enoc yälirililajz, ni'c sinä Dios Enoc xhaguibaa, guideb nabajnii, te na'c nejtni. Diru rebejn nidxälñi sa'csi asinä Diosni xhaguibaa. Luxh räjp Dios xcuentni che



gajd Dios jinäni, gubansa'cni, baspaani lajz Dios. <sup>6</sup> Rut chu tejdi sajc guspaa lajz Dios palga dini chalilajz, sa'csi che guibigni lojni, nanab chalilajzni yu' Dios, chalilajzzani sudeed Dios xcäl'nasa'cni loj renani rguilni, nalajznu renani rlajz gumbeepac Dios.

<sup>7</sup> Gojpa toNoé yälrlilajz. Che räjp Dios lojni siajbpac nisguij ni gajdreni fii, huililajzni. Bejnni si'c ni räjp Dios. Bidxejbni sa'csi najni rusoob Dios xtiidxni, ni'c bencheeni te canuduxh te di niejt rexi'nni. Sa'csi gojpni yälrlilajzga, bejnni gubibde rebejn guedxliuj, gunijtreni sa'csi direni nililajz xtiidxni. Dxejcti cua'ni yäl'nabansa'c ni siäd xcuent yälrlilajz.

<sup>8</sup> Sa'csi gojp toAbram yälrlilajz, basoobni xtidx Dios che gurejdx Diosni, biriini lajdxni te huijni cadre gudeed Dios yuj lojni te cuääzni ro'c. Biriini lajdxni, mase dini gan caro chääni. <sup>9</sup> Gojp toAbram yälrlilajz, ni'c huilajzni si'c benzijt loj reyuj ni räjp Dios gudeedni lojreni. Ro'c gulajzreni si'c lajdx benzijt. Gulajzni nen reyuguijd, sigajcza bejn tosaac näjza toJacoob, sa'csi näjza lojreni räjp Dios gudeedni yujga. <sup>10</sup> Niluxh toAbram cayunloj te guejdx nani sudzu'tz, te guejdx nani cuäxtiej Dios, nani gunchee lagajc Dios.

<sup>11</sup> Sigajcza gojp toSara yälrlilajz te mase anajcni bengool niluxh agudejd chu xi'nni, cua'ni yälrnibee xten Dios te gujcnii nan, guyu' te xi'nni, sa'csi huililajzni susoob Dios xtiidxni. <sup>12</sup> Ni'cni mase siädzungajxh dxej ni guet toAbram, guyu' xhidalduxh xajgni. Si'c rebalxhaguibaa näj si'c reguibäzlule' xten yujxh ni tre' ro' nisdoo, si'c najcreni xhidalduxh, nicla gac guigabreni.

<sup>13</sup> Guiraa rebejnre gujt, direni nica' yuj nani räjp Dios gudeedni lojreni; niluxh sa'csi rajpreni yälrlilajz, bahuiireni lo yujga zitro, ni'c bibalajzreni, sa'csi anajreni najcreni benzijt, cansajsireni lo guedxliuj. <sup>14</sup> Reni rnii si'c, rniliireni caguilsijcreni cadre gac lajdxreni. <sup>15</sup> Paru niujnreni xhigab lajdxreni najc guejdx cadre biriireni, pet niajc nibisacreni ro'c. <sup>16</sup> Niluxh laareni rlajzreni te lajdxreni ni sajcru, nalajznu lajdx Dios xhaguibaa, ni'c rguilreni. Ni'cni di Dios guitujy gäbreni najcni Dios xtenreni, luxh alabencheeni guejdx cadre cuääzreni xhaguibaa.

<sup>17</sup> Gojpa toAbram yälrlilajz ni'cni cheni bateed Diosni preeb, räjpni loj Abram gudeedni Isaac lojni lacuaa gudeedni xhiil, cuäjbni gugu'tni xi'nni lacuaa xhiil, luxh Dios ni najc tejtis aräjp lojni galooli: <sup>18</sup> "Isaac guniidx chu xhidajl xajglu, xagdoolu." <sup>19</sup> Sa'csi nanchee toAbram rajp Dios yälrnibee te guspajnni rebengut. Luxh si'c za cuasacni xi'nni, ascanu loj rebengut cuasacni xi'nni.

<sup>20</sup> Näjza toIsaac gojp yälrlilajz benle'ni toJacoob näjza toEsaú, räjpni xhini'c gun tejpgareni. <sup>21</sup> Gojpa toJacoob yälrlilajz, che agojl guetni, benle'ni guiro'p rexi'n toJosé. Dxejcti huistieni guzucajni yejc baston xtenni te si'c gojnni Dios. <sup>22</sup> ToJosé gojp yälrlilajz. Che agojl guetni, räjpni sirii rexpejn Israel lajdx Egipto, gunibeezani xho gunnäjreni xtzujtni.

<sup>23</sup> Gojp rexuczajn Moisés yälrlilajz, ni'c cheni gojl Moisés, bacua'tzrenini chon bäii, sa'csi bahuiireni bázdaanni. Direni niu xtidx reii ni gunibeeni, räjpni ju'treni báz niguii. <sup>24</sup> ToMoisés gojp yälrlilajz, ni'cni che aguroobni di rlajzni nirilajni xi'n xindxa'p reii xten Egipto. <sup>25</sup> Bejnni xhigab tednäjni trabajw rexpejn Dios lacuaa niujnni redzuun ni rchaglajz rujn reben Egipto, sa'csi najc reni'c dojl, luxh tera'tsi ruspaareni lajz bejn. <sup>26</sup> Par laani maazru sajc tedni lagajc trabajw ni gudejd Jesucrist lacuaa niajpni reyäl'nasa'c xten Egipto sa'csi laani cabäjtisni reyäl'nasa'c nani churu gudeed Dios lojni. <sup>27</sup> Gojp toMoisés yälrlilajz biriini lajdx reEgipto, dini nidxejb yälrdxe'ch xten reii, huinuutis gusudzu'tzni si'cni najc xhigabni, ruhuiini loj nani di guzen, nalajznu Dios.

<sup>28</sup> Gojp Moisés yälrlilajz bejnni lanij xten pascw. Gunibeeni baroobreni rejn ro' xpuert rexpejn Israel te che ted angl xten yälgujt nicla te xingan galoo xten rexpejn Israel di guet. <sup>29</sup> Gojp rexpejn Israel yälrlilajz gudejdreni galäii nisdoo ni laa nisdoxniaa luxh asdoo loj yubijdz rsiajreni si'c gudejdreni. Niluxh che rlajz rebejn Egipto nidejd, gubi' nis, dxejc gulo'reni nen nis.

<sup>30</sup> Xcuent yälrlilajz gurebä'n paderguij xten guedx Jericó, cheni basa' gajdz dxej caded huält rexpejn Israel guejdxga. <sup>31</sup> ToRahab, te gunaguijdx, gojnzani yälrlilajz ni'c dini

niejt che gujt renani di nuzobdiidx, sa'csi laani bacua'tzni gaii bejn nani sagula'tz xho najc guejdxga.

<sup>32</sup> ¿Xhiruxh guiniä? Di galđi guiniä xcuent toGedeón, xcuent toBarac, xcuent toSansón, xcuent toJefté, xcuent toDavid, xcuent toSamuel, nájza xcuent retoprofe't. <sup>33</sup> Guiraareni gojp yálrililajz ni'c bejnreni gaan xhidajl reguejdx, bensa'creni yálguxhtis, cua'reni xcálracnáj Dios ni bia'n diidx xca'reni, basäureni ro' rebeedz. <sup>34</sup> Guyu'reni nen te balduxh luxh xhet gujcdireni, gojl baxunreni te di niejtreni con espaad. Reni gujc benrdxajg, guzutzut'zreni gujcreni nadipduxh, gujcreni benduxh lo guer, barilaagwreni resoldaad xten reni rdxe'ch lojreni. <sup>35</sup> Guyu' regunaa ni cuasac rextogoolreni, gubansacreni lo rebengut.

Sgaiireni gujt xcuent yálrusacsí lacuaa nicäjbreni nusiech lajzreni te nuslaa bejnreni sa'csi rlaizreni xca'reni stee yálnabajn ni sajrcu. <sup>36</sup> Sgaiireni gudejd trabajw guniyaj bejnreni, gudinnáj bejnreni chiir, cuaduuzareni caden, guyu'zareni latzguiib. <sup>37</sup> Guyu'za reni gujt che bacuaa bejn guij yejcreni o che gujcreni tio'p la' con sier. Guyu'za reni basacsí bejn te guro'nreni yálrililajz. Guyu'za reni gujt con spaad. Guyu' reni cuanzaj nezree nezrec, gojtreni guid-xiil nájza guid-dxib, sa'csi xhet rajpdireni luxh entis rdejdreni trabajw rusacsí bejnreni. <sup>38</sup> Sa' rebejnnga di nungäj] reben guedxliuj niääd rebejnnga lojreni. Cuanzaj rebejnnga nez lo reyubijdz cad xhet yu'di xhi gaureni nicla nis te yäreni; cuanzajreni nez nen redajn, nez nen rebiliää náj nez nen guedduxh ni yu' nen yuj. <sup>39</sup> Guiraa rebejnnga gojp yálrililajz, luxh ni'cni huä'p xpala'nreni, niluxh direni nica' ni bia'n diidx gudeed Dios lojreni, <sup>40</sup> sa'csi bejn Dios xhigab gunni te dzunsa'c lojreni. Bejn Dios xhigab guniidxni yálnasa'c loonu, naj tejsi guica'nu con laareni nani bia'n diidx guniidx Dios.

## 12

### *Guihuitisnu lo Jesucrist*

<sup>1</sup> Ni'c najcni si'cni suga'nu galäii guiraa rebejnre luxh cahuiireni xcálrililaaznu. Ni'c do'o guisa'n te laad guiraa reni rusäu lo xnejznu, nájza redojl ni ruxhiid nuure lo xcálnabajjnu, te di jieednu chosaanu nez lo nezyuj ni sasanäanu nez cadre chonnu.

<sup>2</sup> Do'o guihuidzu'tz nez loj Dad Jesucrist nani guläxtiej, nani guluuxza xcálrililajznu. Jesucrist gudejd trabajw lo crujz, dini nitujy gujtni lo sa' yálgujtga, sa'csi najnni cheni agudejdni trabajw, sica'ni yálrbalajz; naj agurejni xladbee Dios cadre rnibeeni.

<sup>3</sup> Colyujn xhigab la'tu xho gudejd Jesucrist ladznaa reben dojl, te na'c guidxajgtu, na'cza jieedtu la] ni cabäjztuni. <sup>4</sup> La'tu gajd xtiejntu guixe' lo yálrucuanáj dojl. <sup>5</sup> ¿La abiäl lajztu xho balijdx Dios la'tu si'c xi'nni, ä? Scree caj xtiidxni lo reguijtz; räjpni: Xinä, na'c cuälazlu xcálnaj Dad niclaza jieedlu che tilnäjni luj.

<sup>6</sup> Sa'csi si'c runnaj Dad renani sanälajzni, rujnni ríaa guiraa renani rca'ni si'c xi'nni.

<sup>7</sup> Palga gatijp lajzlu lo xcálnaj Dios, sica'ni luj si'c xi'nni, sa'csi ¿chu dad di gunnaj xi'nni?

<sup>8</sup> Niluxh palga di Dios gunnaj la'tu si'cni runnajni guiraa rexi'nni, ditu gac xi'npacni, najctu xi'n redolguijdx. <sup>9</sup> Anajntu cheni gucnu biuux lo guedxliujre, bennaj xtadnu nuure te rsoobnu xtiidxni, te runsa'czanu si'cni rlaizni. ¿Xhicuent dinu cuadiajg xtidx xtadnu ni yu' xhaguibaa te si'c jia'pnu yálnabajn, ä? <sup>10</sup> Xtdadnu lo guedxliujre bennajreni nuure tio'p-choñ dxej, te gac gusoobnu xtiidxni. Niluxh si'c runnaj Dios nuure te jia'pnu te yálnabanya, te gac nayazanu sigajc najcni laani. <sup>11</sup> Guliini xhet xhi yálnajdi ni rchalonu najc laaca che rsiajcnuni, racnaj tiejxhnu niluxh ria'nnu et laadi. Niluxh guiraa renani agudejd loj yálnajga rusoob xtiidxni, rca'reni te yálnabanya ni rbecdxilajzreni.

### *Riez guze'ni xtidx Dios*

<sup>12</sup> Ni'cni colsudzu'tz renaatu ni abadxajg, colsudzu'tz yecxhijbtu ni abadxajg, <sup>13</sup> te colquiiil nezyuj xten xtidx Jesucrist te sudzu'tz ni'tu. Na'c guibicajtu lo xnezyujni.

<sup>14</sup> Colquiiil xho cuedxinäjtu guiraa rebejn. Colchanä te yäl nabanya, sa'csi renani di guibanyadi, digacdi fiireni loj Dad Jesucrist. <sup>15</sup> Colhuisa'c te di gunijt chutejtu lo xcälracnäj Dios, colnatiro gac chu tejtü si'c te cuanlaa ni rujn daan, sa'csi sa' bejnga suxhinäni guiraa renani ahuililajz. <sup>16</sup> Nicla tejtü na'c ga'p stee gunaa te laad, nungäjil cuäznäjni chäältisni. Na'cza gactu bejn ni di jiu xtidx Dios, si'c gujc toEsaú cheni bato'ni xcäl nasa'cni ni najc xtenni sa'csi najcni xingan galoo xtadni. Bato'nini te cua'ni yälrajwtis. <sup>17</sup> Anajntu, cheni rlanjni niunle' xtadnini te nica'ni ni najc xten xingangalooni, dini nica'ni mase guc-huin lajzni, binduxhni. Dxejcti diru niajcti nica'nini.

<sup>18</sup> Colnatiro, sa'csi la'tu di'tu nibig lo te dajn cadro rajc rsiaj bejn, te dajn ni galoo cayecduxh guiboo, cadro nacäy, nacäiboo, cayajcza bedonduxh. <sup>19</sup> Diza diajgtu niejn xse' trompet, xse' Dios si'c biendiajg rexpejn Israel agujc xchero. Luxh che biejn diajgreni rediidxga, direni nutiplajz, gunabduxhrene na'cru guiniini lojreni. <sup>20</sup> (Sa'csi direni nutiplajz diidx ni caniini, räjpni: "Palga ted te mantis guläj xhuj dajnga, colju'tni con guij.") <sup>21</sup> Te yäl nadxebduxh najc nani guzen ro'c, lagajc toMoisés räjp: "Cayacditä yälrdxejb."

<sup>22</sup> Niluxh la'tu agubigtu lo dajn xten Siön, cad najc lajdx Dios ni nabajnpac, nalajznu guedx Jerusalén ni yu' xhaguibaa cadro yu' xhidalduxh xangl Dios, <sup>23</sup> cadro re' reni calä'p xpala'n Dios. Ro'c re'za reni najc xi'n Dios, renani acaj lajni xhaguibaa. Agubigzatu lo Diospac, ni najc Juejz xten guiraanu, näjza loj respit xten rebejn nani abasia Dios te anajcreni bennasa'c. <sup>24</sup> Agubigzanu loj Jesucrist nani suga' galäi nez loj Dios näj benguedxliuj xcuent didxcoob ni bia'n Dios, näjza lo xtiejn Jesucrist ni badeedni lo Dios xcuent nuure. Jesucrist rniab jäjil lajz Dios, luxh ni'c sajcro loj nani rniab xtiejn toAbel. Xtiejn toAbel rniab quiix nani bagu'tni.

<sup>25</sup> Ni'c colnatiro te di cuälaztu nani canii lojtu rextiidxni. Palga di rebejn nidedbia sa'csi gulälaz nani baluii bejn ni siääd guedxliujre, ¿xho jiennu tedbianu palga guilälaznu nani ruluii nani siääd xhaguibaali? <sup>26</sup> Xse' Dios basniib guedxliuj galooli, niluxh naj rnisacni: "Ste huält susnibä xhet ganaxdi guedxliuj, susnibä näjza xhaguibaa." <sup>27</sup> Che gunii "ste huält", ni'c säloj guibicaj renani benchee Dios ni rac rniib, te jia'n renani digacdi guiniib. <sup>28</sup> Luxh sa'csi lajdxnu ni guniidx Dios digacdi guiniibni, do'o guideed xquixtios lo Dios xcuentni, te si'c chunu loj Dios, chonälaznuni guideb yälrdxejb näjza yäl nadolajz, <sup>29</sup> sa'csi Xtiosnu najc si'c te balduxh ni ruse'c, ni runitlojza.

## 13

### *Xho guspaa bejn lajz Dios*

<sup>1</sup> Colchanuu lo yäl rinälajz sa'ni. <sup>2</sup> Di gusaantu gudeedu rolijztu guidzujn biooz, sa'csi loj reni bejn si'c, yu'reni badeed rolijzreni bidzujn xangl Dios rolijzreni, niluxh direni niacbee chu najcreni.

<sup>3</sup> Colsnaj lajztu reni yu' nen latzguiib, ascanu la la'tu ni yunäreni latzguiib. Colsnajza lajztu renani basacsí bejn, ascanu la la'tu ni cagusacsíreni sa'csi näjza la'tu najctu benguedxliuj si'c najcreni.

<sup>4</sup> Colga'p xpala'n yälguchnaa te guiban-nayatu con chäältu sa'csi sujn Dios yälguxhtis rebejn ni resnäjä chäääl bejn näjza reni rusguee rebenxteb.

<sup>5</sup> Na'c chanälajztu meel, colguibalaznäjä ni rajptu, sa'csi Dios agunii: "Dipacna gusanälu, dizana cuälazälu." <sup>6</sup> Ni'c dinu guidxeeb guiniinu:

Dad ni yu' xhaguibaa najc ni rcanäj narä;  
dina guidxebä xhitis ni gunnäjä bejn narä.

<sup>7</sup> Colsnaj lajztu renani baluii guibansa'ctu, ni basule'za xtidx Dios lojtu; colhuii xho nabajpreni te sigajcza colchanä xcäl rililajzreni.

<sup>8</sup> Sigajc gujc Jesucrist naii, sigajcza najcni nadxej, sigajcza sajcnii par tejpas. <sup>9</sup> Na'c gusaantu gusiechreni lajztu xcuent ste'ca yäl ruluii ni digac si'c xtidx Jesucrist.

Sacduxh sudzu'tz lastoonu lo yälracnä j ni ruluii xtidx Dios, xhet lojdi yälrajwtis. Xhet sajcdi rebejn nani rujntis xhigab xcuent yälrajw.

<sup>10</sup> Nuurnu rajpnu garenca piään, ro'c digacdi xca' rebixhojz xhi gaureni si'c ni cua'reni nen guidoguid galoo. <sup>11</sup> Sa'csi xpixhojzro xpejn Israel rinä xtiejn reman nen yu' ni laa dxanduxh te biäu lo dojl xten rebejn, niluxh rize'creni xpääl remanga te laad, dejtz guejdxga. <sup>12</sup> Si'cza gujt Jesucrist te laad, dejtz guejdx, te basiani xtoj l rebejn xcuent lagajc xtiejn ni. <sup>13</sup> Naj colcho' chonnu loj Jesucrist te laad dejtz guejdx te guideednu trabajw näjza yälxtujy si'cni gudejd Jesucrist. <sup>14</sup> Sa'csi lo guedxliujre dxunlaasinu, niluxh caguiilnu laadxnu ni chu jiäädru, te ro'c guidxunnu par tejpas. <sup>15</sup> Guideb xcälracnä j Jesucrist do'o guideedtisnu xquixtios lo Dios si'c te gojn ni gudeednu lojni, guiliä'pnu xpala'nni nä j jielnu redij. <sup>16</sup> Na'cza jiällajztu guntu huen, gacnä j sa'tu, sa'csi reni'cni najc redzuun ni rdxagajz Dios.

<sup>17</sup> Colcuadiajg xtidx reni rnibee la'tu, sa'csi laareni rcanäjreni lastoonu, si'cza laareni sudeedreni cuent lo Dios. Colyujn guibalajzreni gunreni xtzunreni, na'c gac-huin lajzreni sa'csi palga gac-huin lajzreni, xhet sajcdini par la'tu.

<sup>18</sup> Colnab lo Dios xcuent nuunu, sa'csi racbeenu naya xcäriejnnu, rlaaznu laaca jiennu guira'ti dzuun. <sup>19</sup> Rniä lojtu, guiniabrutu loj Dios, te gun Dios jiojb guibi'ä jiälä lojtu.

#### *Te didxle' nä j lult xtixtios*

<sup>20</sup> Dios xten yälrbedxilajz ni baspaj n Dad Jesucrist lo rebengut, Jesucrist najc baxtor-duxh xten rexiil xcuent rejn ni bejn gusojb didxcoob xtenni ni najc par tejpas. <sup>21</sup> Dios gun gactu bensa'c, bendxojn loj xhitis te guntu ni rlajzni, nä j gunni loj guiraa nuure si'c ni rlajzni xcuent Jesucrist. ¡Colspaa lajz Jesucrist par tejpas! ¡Sugacni si'c!

<sup>22</sup> Resa'nu, rniabä lojtu, colcuedcxi lajztu, colcuadiajg rediidx ni ruliidxre, sa'csi riojbgä cacuaä te labäz guijtze lojtu. <sup>23</sup> Colyabee abirii bejznu Timoteu latzguiib. Palga guidzungajni ree, siädnaäni jiädhuiä la'tu.

<sup>24</sup> Colgudeed xtixtios loj guiraa renani ruluii la'tu nä j loj guiraa rebejznu ni rililajz. Reben Italia ruxhal xtixtios lojtu.

<sup>25</sup> Gacnä j Dios guiraatu. Sugacni si'c.

## Guijtz Nani Bacuaa Santiaag

### *Santiaag rucuaa guijtz loj renani nare'ch lo guedxliuj*

<sup>1</sup> Narä Santiaag, xmos Dios näjza xten Dad Jesucrist, ruxhalä xtixtios loj guitzubitio'p cuaa rexpejn Israel ni nare'ch lo guedxliujre.

### *Yälñajn nani runiidx Dios loonu*

<sup>2</sup> Rebetzä lo xtidx Dios, colguibalazduxhtis che rsiajctu recos nani ruquiltu cuälaztu xnezyuj Dios, <sup>3</sup> sa'csi che rsiajctu reni'c, rsiajctureni te don la guliipac ahuililajztu xtidx Dios, dxejc rsieedrutu yälrbecdxilajz. <sup>4</sup> Dxejcti yälrbecdxilajz sajz gunni xtzuunni neñ lastootu, te gactu bensa'c, bejn ni aguyajl lo xtidx Dios, nani xhet cayäädxd xcalñajnni.

<sup>5</sup> Palga yu' tejtü ni cayäädxd xcalñajnni, suguiniabnini lo Dios, sa'csi Dios rudeedduxhni yälñajn loj guira'ti bejn, luxh dini guinii didxlaa lojni. Palga guiniab bejn, sudeedza Diosni. <sup>6</sup> Niluxh che guiniabni, suchalilajzpacni, na'c guntio'p lajzni, sa'csi bejn ni runtio'p lajzni najc si'c bäj ni sanä bej, nezree-nezre'c sääbni. <sup>7</sup> Nani najc si'c, na'c gunni xhigab yu' xhi xca'ni lo Dad Jesucrist. <sup>8</sup> Sa'csi nani runtio'p lajzni, lo guiraa ni rujnni nadxej rujnni tej xhigab, guixee rujnni xte'ca xhigab, di gacdi chanuuni tejsi xhigab.

<sup>9</sup> Te sa'nu ni najc nadolajz, suguibalajzni sa'csi najcni beñro sa'csi guläs Diosni, <sup>10</sup> sigajcza bejtznu ni yu' xhixtëni, suguibalajzni sa'csi abaluii Dios lojni najcni bejn ni xhet sajcdini, sa'csi nägajc laani sinitlojni si'c rnitloj reguii ni yu' lo cuaan ni yu' loniaa. <sup>11</sup> Sa'csi che rliejn gubijdz näjza te belaa, li rgoļ recuaanga, li riuii reguii ni caj lojni, dxejc rtejbreni, dxejcti agunijt xcälsacrüni. Si'cza sinitloj te bejn ni yuduxh xhixtëni laļ ni yu'ni lo xnezyujni.

### *Xhi xca'ni che tedni trabajw*

<sup>12</sup> Chicbaa niguii ni rsiudzu'tz laļ ni cadejdni trabajw, sa'csi che agunii Dios didxsa'c xcuent nani bejn sica'ni coron xten yälñabajn par tejpas ni bia'n Dios diidx gudeedni loj rebejn ni sanälajz Dios. <sup>13</sup> Che gunijt tejtü, rujntu dojl, na'c gäbtu: “Dios bejn banitä”, sa'csi di gacdi quiquiil Dios te gunni cosguijdx, digacdi gunijt Dios, luxh sigajcza di gacdi gun Dios gunijt te bejn, gunni dojl. <sup>14</sup> Niluxh tejgatu runijt che rcäy xcariejntu sa'csi riajb yejctü guntu cosguijdx. <sup>15</sup> Che riajb yejctü guntu cosguijdx, runijttu rujntu dojl, luxh dojl che abejntuni, riädñäni yälgujt.

<sup>16</sup> Sa'ä ni sanälazä, na'c gusaantu gusgueereni la'tu. <sup>17</sup> Guiraa recoshueen, guiraa recossa'c xhaguibaali siädreni loonu; Dios ruxhalreni, lagajc Dios ni benchee rebajl xhaguibaa, Dios nani di guchaa, sigajctis najcni. <sup>18</sup> Lagajc xcuentni bejn Dios gacnu xpejn sa'csi huililajznu xtidxliipacni, te gacnu rebeñ galoo loj rexpejn.

### *Xho nanab jiennu*

<sup>19</sup> Acanajntu recosre, sa'ä ni sanälazä. Niluxh tejgatu nanab gusquejn te gucuadi-ajgni, per gaclaani te guiniini, gaclaazani te guidxe'chni, <sup>20</sup> sa'csi xcälrdxe'ch bejn dini gun xcälñasa'c Dios. <sup>21</sup> Ni'cni colcuälaz guiraa recosguijdx, guiraa recoslatsiaj ni ria'n. Guideb yälñadolajz colchalilajz xtidx Dios ni basule'nu, ni yu'pac lastootu, sa'csi ni'c najc ni sajz gusläa xaimtu lo dojl.

<sup>22</sup> Niluxh baluii lo guira'ti bejn najctü bejn ni rusoobpactu xtidx Dios, xhet bejn di ni rucuaiajgtis xtiidxni, ni rusgueeni lagajc laani. <sup>23</sup> Sa'csi palga najc te bejn te nani rucuaiajgtis xtidx Dios, niluxh dini gusoob diidxga, najcni si'c te bejn ni ruhuii lojni loj te guihujn. <sup>24</sup> Sa'csi che ruhuii xho najcni, sägajcni, riallazgajcni xho najcni. <sup>25</sup> Niluxh nani ruhuidzu'tz lo leisa'c, nalajznu leii nani rusläa bejn, luxh rusoobpacni leiiga, nani lacuaa jiallajzni nani riejn diajgni, rujnpacni ni caj lo leiiga, bejnga najc ni sajz yälrbalajzpac lo xhitis ni rujnni.



<sup>26</sup> Palga yu' tejtü ni rujn xhigab najcni te bejn ni randuxh Dios, niluxh di gacdi gusäuni ro'ni, guiralöj rniini, bejnğa rusguee lagajc laani, luxh xhet sajcdi yälrajn Dios xtenni. <sup>27</sup> Yälrajn Dios ni najc guliipac, ni xhet nu'chdi lojni najc scree: chahuiini rebisiäjb, näjza regunaa ni agujt chäälni che yu' xhi rquiinreni, näjza na'c säblajztu guntu nani rujn reben guedxliuj ni di chalilajz xtidx Dios.

## 2

### *Nanab tebloj jiennäanu guira'ti bejn*

<sup>1</sup> Resa'ä, la'tu ahuililajztu xtidx Dad Jesucrist ni rajp guiraa yälrdimbicha', ni'c di gacdi guntu xhigab sajcrü tej bejn lo sabejnni. <sup>2</sup> Palga guidzujn te bejn xquidootu yu' niloor naani, najcwni ladsa'c, dxejcti jiu'za te bejn nani xhet rajpdi, najcwni ladyujxh, ladbeed, <sup>3</sup> dxejcti la'tu jiurutu nani najcw ladsa'cga, naatu: “Ree gurej lo yagxhilsa'cre”, dxejcti gäblu lo bejn ni xhet rajpdi: “Rec gusulii o gurej lo yujre”, <sup>4</sup> ¿la xhet rujnditu xhigab garenca najc tej bejn lo sa'ni, ä? Luxh dxejc acayajctü si'c juejz ni rujn xhigab guijdx.

<sup>5</sup> ¿Colgucuadaiajg, betzä ni sanälazä! Agule Dios bejn nani xhet rajpdi lo guedxliujre te ga'preni yälirililazduxh, te lo xcälrnibee Dios xca'reni xcäl'nasa'c ni bia'n diidx gudeed Dios loj renani sanälajzni. <sup>6</sup> Niluxh la'tu agulälaztu rebejn nani xhet rajpdi. ¿Xhixh xhet laadi rebejn ni rajp ni rusacsitu, li rgobxhaxhreni la'tu, rinäreni la'tu loj reguxhtis, ä? <sup>7</sup> ¿La xhet laadi rebejn ni rajp ni rniyaj loj Dios ni sacduxh? La'tu abirilajtu rexi'n Dios.

<sup>8</sup> Palga guliitu cagusoobtu leii xten xreininu Dios, si'cni caj lo xquijtz Dios scree: “Colchanälajz sa'tu sigajc rinälajztu lagajc la'tu”, laaca rujntu. <sup>9</sup> Niluxh palga rinälajzrutu tej cuaa bejn lo stee cuaa bejn, cayujntu dojl, luxh xleii Dios rnii najctü bejn dojl, bejn ni rbälaz leii. <sup>10</sup> Palga yu' te bejn ni ruseob guiraa ni caj lo xleii Moisés, niluxh runijtni lo tejtis diidx ni caj lo leii, abanijtpacni, najcni si'cni dini nuseob nicla tej diidx lo guideb leiiga. <sup>11</sup> Sa'csi lagajc Dios ni gunii: “Na'c guesnäjlü bejn ni di gac chäällu”, lagajc laani guniizani: “Na'c ju'tlu.” Palga dilu guesnäj bejn ni di gac chäällu, niluxh rugu'tlu te bejn, abanijtlu xcuent guiralii releii. <sup>12</sup> La'tu colguinii, colguibajn si'c rebejn ni gun Dios yäl'guxhtis con xtiidxni ni ruslaa bejn lo dojl. <sup>13</sup> Sa'csi renani di gulasajz bejn, che gun Dios yäl'guxhtisreni, dizani gulasajz laareni. Sajcrü yäl'rulasajz lo yäl'guxhtis.

### *Yälirililajz näj dzuun ni rujn bejn*

<sup>14</sup> Resa'ä, ¿xhi sajç palga guinii te bejn: “Ahuililazä xtidx Dios”, niluxh dini gun dzuun ni riäjil gunni, ä? Sa' yälirililajzre, ¿la suslaanini lo dojl, ä? <sup>15</sup> Palga yu' te bejtznu o te bisiajnnu ni dini ga'p xhajnbi, luxh xhetiza xhi gauni, xhi yäni, <sup>16</sup> luxh gäb tejtü lojni: “Sucedxi lajzlu jiilu, suguidxa' lajzlu, suguidxaj xque'lu”, niluxh dini gudeed nani caquiinni, ¿xhi sajç rediidx ni räjpni lojni, ä? <sup>17</sup> Sigajcza yälirililajz nani di guquiil bejn gunreni xtzuun Dios najc si'c te ni agujt, sa'csi dini guquiil bejn gunreni dzuun.

<sup>18</sup> Yu'za reni naa: “Luj rajplu yälirililajz, narä runä xtzuun Dios; baluii narä xcälirililajzlu xhet näjdi xtzuun Dios, dxejcti narä suluiä xcälirililazä xcuent rextzuun Dios ni runä.”

<sup>19</sup> La'tu rililajztu yu' tejtis Dios. Laaca rujnlu, niluxh näjza rebendxab rililajz yu' tejtis Dios, racdihtlireni, rdxebduxhrenini. <sup>20</sup> ¿La di rlanjtu gacbeetu, bennayääl? ¿La ditu gan, yälirililajz ni di guichagnäj xtzuun Dios najc te yälirililazgut? <sup>21</sup> Dios badzucaj xtojil toxtadgoldoonu Abram sa'csi bejnni si'c gunibee Dios gunni, che badzuubni xingaanni Isa'c lo piään, nugu'tnini nez lo Dios. <sup>22</sup> Colhuii xho tejsi junt sadxaag xcälirililajz toAbram dzuun ni bejnni, dxejcti sa'csi bejnni nani gunibee Dios gunni, bejn Dios gujc xcälirililajzni sa' yälirililajz nani rlanj Dios ga'p rexpejnni. <sup>23</sup> Dxejcti huile' xtidx Dios cadro caj scree: “Abram huililajz ni räjp Dios lojni, ni'cni badzucaj Dios xtojilni, cua' Dios Abram si'c te bennaya.” Birilajzani “xamiigw Dios.”

<sup>24</sup> Ni'cni ruhuiitu rca' Dios te bejn si'c bennaya nez lojni xcuent xtzuun Dios ni rujnzani, xhet ganaxtis xcuent xcälirililajz bejnğa. <sup>25</sup> Sigajcza gusajc toRahab, ni gujc te gunadxab. Dios badzucajza xtojilni, bejn Dios xhigab najcni te bennaya sa'csi bejnni xtzuun Dios che badeedni rolizni bacua'tzloj tio'p xpejn Israel ni gujc guixhajg ni



sagula'tz guejdxga, dxejc gucnäjnireni te siireni ste'ca nez yuj. <sup>26</sup> Sigajc ni di gacdi guibajñ tiejxh bejñ palga xheti sprit, sigajcza di gacdi guibajñ yälirililajz palga dini gun dzuun ni rnibee Dios gunni.

## 3

*Rediidx nani rnii luudxnu*

<sup>1</sup> Resa'ä, na'c gac xhidajltu bejñ ni ruluii xtidx Dios, sa'csi anajnnu rac yälguxhtisoru rebejñ nani ruluii xtiidxni. <sup>2</sup> Sa'csi guiragajcnu riennu xhidajl cuaa dojl. Palga yu' te bejñ ni di gunijt lo diidx ni rniini, laani najcni te bensa'c, rajcza rnibeeni guideb tiejxhni. <sup>3</sup> Palga rusälñu guuib ni ru' ro' cabaii te chääni cadro rlajznu jiini, rnibeezanu guideb xtiejxhni. <sup>4</sup> Colhuii rebarcwro, mase siolduxhrene, luxh rebeduxh rulanaareni, niluxh capitán ni rusaj barcw lo nisdoo, te guibbáz ni caj xhajn barcw nen nis, con ni'ctis rinänini cadrotis rlajzni. <sup>5</sup> Sigajcza najc luudxnu, najcni te labáz tiejxhnu, luxh colhuii lacti didxro rniini. Najcni si'c te balbáz ni rajc ruze'c guiragajc reyajg ni yu' dajn. <sup>6</sup> Luxh luudxnu najc si'c te bajl. Rnii luudxnu guiraa redidxdxuudx ni rnii rebejñ guedxliujre nani rdxe'ch lo Dios. Lo guiraa rela' ni najc tiejxhnu, laa luudxnu ni rundxuudx guideb tiejxhnu. Luudxnu ralguij con xquiboo gabijl. <sup>7</sup> Rebejñ sajg gusiadcooreni guiraloj guidxaa, guiraa mane', guiraa bäl, guiraa man lo nisdoo, abasiadcoo bejñreni, <sup>8</sup> per nicla tej bejñ di gacdi gusiadcoo lujdxni. Dini cuedxi, guidxani cosguijdx, najcni si'c te bäl ni rauya'ni rugu'tni te bejñ. <sup>9</sup> Lagajc luudxnu rliä'pnu xpala'n Dios Xtadnu, lagajc laani rniyajnu sabejñnu ni benchee Dios sigajc najcni. <sup>10</sup> Tejsi ro'nu rnile' lo Dios nägajcza rgue lo bejñ. Rebetzä, jxhet si'c di nungäjldi gacni! <sup>11</sup> ¿La rbää bejñ nisnejxh näjza nisrop lo tejsi bisie, ä? <sup>12</sup> Betzä, ¿la caxajsi sajg xcaj aceitun loj te yagiigw, ä? ¿O la sajg xcaj iigw lo te yaguub, ä? Sigajcza digacdi guirii nisnejxh näjza nisrop lo tejsi bisie.

*Yälñajn ni siääd xhaguibaa*

<sup>13</sup> ¿Chuni'c lo guiraatu yu' xcäriejñni, nanduxhni, ä? Suguluii xho najcni xcuent xcälñabansa'cni, sugunni xtzuumni guideb yälñadolajz ni rudeed xcäriejñni. <sup>14</sup> Niluxh palga yu' yälrdxe'ch lo sa'lu ni runnanlaa lastoolu, näjza rujñlu guira'ti parsi xcälñasa'c lagajc luj, na'c gaclu gualajz, sa'csi ni'c najc si'c ni caniilu didxrusguee xcuent xtidxlii Dios. <sup>15</sup> Sa'csi sa' yälñajnre, xhet xhaguibaadi siäädni, alga najcni yälñajn xten guedxliujre, xten rebejñ guedxliuj, xtenza rebendxab. <sup>16</sup> Sa'csi cadro yu' yälrdxe'ch lo sa'ni, näj cadro rujñ bejñ guira'ti parsi xcälñasa'c lagajc laani, ro'c yu' biey, yu' guiraloj latsiaj. <sup>17</sup> Niluxh yälñajn ni ruxhal Dios, ganiddoo najcni naya, dxejcti rulecdxini xcäriejñ bejñ, dxejc rujñni rajc bejñ nadolajz lo sa'reni, rujnzani saru runñaj bejñ sa'reni, rulazlajz bejñ sa'reni, rujnzareni guiraloj dzunsa'c, runle'pacreni xtiidxreni, direni guinii tej diidx laaga cayujñreni garenca dzuun. <sup>18</sup> Renani rguuil yälrbedxi, yälrbedxi rbe'creni te xca'reni te yälñabannaya nez loj Dios si'c xcälñasa'creni.

## 4

*Ni nabannäj guedxliuj*

<sup>1</sup> ¿Casiääd rebiey, reyälrdxe'ch lo sa'ni ni casiajctu? ¿La direni jiääd xcuent lagajc xhigab ni yu' lastootu, ä? Lagajc rehxigabga rujñ biey nen lastootu, ruscäyreni xcäriejntu. <sup>2</sup> La'tu rlajztu ga'ptu nani ditu ga'p, dxejcti rugu'ttu sa'tu. Rsiäblajztu xhixten sa'tu, luxh sa'csi digacdi xca'tuni, dxejc rucuanäjtu sa'tu, rdilñajtu sa'tu. Ditu ga'p nani rlajztu sa'csi ditu guiniabni loj Dios. <sup>3</sup> Rniabtuni, niluxh dini guniidxni sa'csi xhet laadi najc xhigabtu gunabtuni, alga gunabtuni sa'csi rlajztu gunijttuni si'cni rlajztu. <sup>4</sup> ¡Aii! Bejñ ni di gandzu' Diostis. ¿La ditu gan bejñ nani rlajz gun redzuun ni rujñ rebejñ guedxliuj, bejñga rdxe'chreni lo Dios, ä? Ni'cni palga yu' chu tejtuni ni rlajz chanuu lo ni rajc lo guedxliujre, bejñga rdxe'ch lo Dios. <sup>5</sup> O ¿la rchalotu xlia'si caj lo xtidx Dios rediidxre: “Sprit ni baxhal Dios te cuääzni nen lastoonu, randzu'ni nuurnu sa'csi rlajzni guinibeeni nuurnu”? <sup>6</sup> Niluxh runiidxru Dios xcälracñajni loonu. Ni'cni rnii xtiidxni

scree: “Dios rdxehnäj renani runnaro lagajc laareni, niluxh rudeedruni xcälracnäjni lo rebennadolajz.” <sup>7</sup> Coljiu'pac lo xnezyuj Dios. Colsudzu'tzpac te di guntu ni rlanj bendxab, te guxunni lojtu. <sup>8</sup> Colguibigru lo Dios te guibigzani lojtu. Bendojl, colquiib naatu, nalajznu na'cru guntu latsiaj; colgusia lastootu, la'tu ni runtio'p lajztu. <sup>9</sup> Sugacnaj lajztu, suchuti xliajs, colyonduxh. Colguchaa xcälruixijstu, colca' yälhuin, colguchaa xcälrbalajztu, colca' yälroon. <sup>10</sup> Colyajc si'c bejn ni xhetliidi sajc nez loj Dad Jesucrist, te laani guiliäsni la'tu gunni la'tu benro.

#### *Na'c guiniyajtu sa'tu*

<sup>11</sup> Rebetzä, na'c guiniyajtu resa'tu. Sa'csi renani rniyaj sa'ni o rujnni yälguxhtis sa'ni, reni'c rniyaj xleii Dios, rujnni yälguxhtis xleii Dios luxh palga guntu si'c, dirutu gac renani rusooob xtidx Dios, alga najctu juejz xten leii. <sup>12</sup> Tejtis najc nani runiidx leii loonu, tejtis najc juejz; najcni nani rajc ruslaa bejn lo dojl, nani sajcza gunitloj bejn. La'tu, ¿chuxh najctu te guntu yälguxhtis lo sa'tu, ä?

#### *Dinu gan xhi gac guixee*

<sup>13</sup> Naj colcuadiajg dee, la'tu ni rniitu, nadxej o guixee chonnu te guejdx nezrec. Ro'c guideednu tebijz te guiziinu, guito'nu te jiennu gaan meel. <sup>14</sup> Luxh nicla gantu xho gac xcäl nabajntu guixee. Xcäl nabajntu najc si'csi te za nani rienloj tera'tbäz, dxejcti rnitlojni. <sup>15</sup> Hueenru guiniitu scree: “Palga rlanj Dios sibaannu, te jiennu dee o dec.” <sup>16</sup> Niluxh si'c ni rujntu naj, rajc gualajztu rniitu didxro; luxh guiraa redidxroga najc dojl. <sup>17</sup> Ni'cni ni najn xho riäjl gunni, palga dini gun si'c, rujnni dojl.

## 5

#### *Rulijdxni rebejn ni yu' xhidajl xhixtenti*

<sup>1</sup> Colgucuadiajg xtidxä, bejn ni yu' xhidajl xhixtentu. Colyoon, colcuedxa' xcuent recasionduxh ni sactu. <sup>2</sup> Guiraa rexhixtentu nani rajptu aguxhijj, luxh rexhajbtu agudajw rebaguiidni. <sup>3</sup> Oor näjza pla't xtentu agubibtejn, aguxhijj. Lagajc dee gun gacbee Dios ditu niujn ni rlanj Dios guntu, lagajc ni'c gun chectu, nitlojtu. ¿Xlia'si batiedajntu xhixtentu nen redxej lultga! <sup>4</sup> ¿Colhuii! Ditu niguixsa'c loj reni bejn xtzuuntu, ni'cni laareni cayujnni yälquij lo Dios xcuenttu. Luxh xhadiajgli Dios xten reangl ni yu' xhaguibaa abidzujj yälquij xtentu ni cabe'c renani batie' xcäl nasa'ctu. <sup>5</sup> Agubansa'cpactu lo guedxliujre, bejntu lanij si'ctis ni rlanjtu, abastio'tu lastootu nen redxej xten yäl rugu't. <sup>6</sup> Gudiiltu xho bagu'ttu rebensa'c luxh laareni dxiitis gusujreni, xhet bejndireni te na'c nugu'ttureni.

#### *Colcuääz jiädxhii Diostu*

<sup>7</sup> Resa'ä, dxitis colcuääz guidzujj dxej cheni jääd Dad Jesucrist. Colhuii xho rujn bejn ni rbe'c binij, dxitis rbäjzni gac xcäljni la' ni riajb nisguigaloo näjza nisguij ni riajb lult. <sup>8</sup> Si'cza la'tu colcuäzdx, colgustioob lastootu sa'csi asiäddzungajxh dxej ni jääd Dad Jesucrist. <sup>9</sup> Resa'ä, na'c chale'ctu xquej sa'tu, didi gun Dios yälguxhtis la'tu, sa'csi asiäddzungajxh dxej che guidzujj Dios ni najc Juejz. <sup>10</sup> Rebetzbidä, colhuii xho gudejd reniguii nani bacuaa xtidx Dios trabajw galoo, xho guläjjzaren. <sup>11</sup> Colhuii xho rniinu chicbaa renani guläzdx lo trabajw ni gudejdreni. Abiejn diajgzatu xho bejn Job che gudejdni trabajw, anajnzatu xho guzajcni xcuent redzunsac Diosni, ni ruluiloj xho riaduxh Dios bejn, rapduxhni yäl rulaslajz.

<sup>12</sup> Rebetzä, che ria'ntu diidx lo te bejn, gunatiro palga gusä'ttu xhaguibaa, o guedxliuj, o xhi steeni. Che naatu: “Mbaj”, ni'ctisza colguinii. Che naatu: “Na'c”, ni'ctisza colguinii te na'c gun Dios yälguxhtis la'tu.

<sup>13</sup> ¿La yu' tejtü ni cadejd trabajw, ä? Suginiabni lo Dios. ¿La yu' chu tejtü ni cabalajz, ä? Sugolni dij te guiliä'pni xpala'n Dios. <sup>14</sup> ¿La yu' chu tejtü ni cayacxhuu, ä? Sucueedxni rebengool ni rnibee nen guidoo, te guiniabreni lo Dios xcuentni la' ni cagusälzaren se't lo cuajni con laj Jesucrist. <sup>15</sup> Luxh palga rililajzpacreni che canabreni,

siajc benracxhuuga, siliäs Jesucrist bejn̄ga. Luxh palga bejn̄ni dojl̄, sibicaj xtoj̄lni. <sup>16</sup> Ni'cni colguxhobdojl̄ lo sa'tu, colnab lo Dios xcuent sa'tu te jiajctu. Che rniabduxh te ben̄ naya lo Dios, dzunroza rujn̄ Dios. <sup>17</sup> Elías, te bejn̄ ni gunii xtid̄x Dios agujc xchero, gujca te bejn̄ sigajc najcnu. Gunabdipni loj Dios te na'c jiajb̄ nisguij, luxh di nisguij niajb̄ lo guedxliuj choñ̄ ijz garol. <sup>18</sup> Dxejc gunabsacni lo Dios, dxejc bixal xhaguibaa, biabsac nisguij, dxejcru gujc reyäl̄nasa'c xtenreni lo guedxliuj.

<sup>19</sup> Rebetzä, palga yu' chu tejt̄u ni guibicaj lo xtid̄x Dios, luxh yu' chu gacnäj̄ guibisacni lo xtid̄x Dios, <sup>20</sup> sugacbee bejn̄ nani racnäj̄ guirii ben̄dojl̄ lo xnezyuguijdxni te guibisacni lo Dios, bejn̄ga agucnäj̄ni te guḷaa xaimni lo yäl̄gujt, te gubicajza guiraa xtoj̄lni, mase xhidalduxh najc xtoj̄lni.

## Guijtz Ganid Nani Bacuaa Pedr

### *Pedr cacuaa guijtz loj reni rililajz ni nare'ch*

<sup>1</sup> Narä Pedr, te apost xten Jesucrist, cacuaä guijtzre loj renani agule Dios gac rexpejn̄ni nani rbäjz si'c benzij̄t lo reguedx Ponto, Galacia, Capadocia, Asia, näjza Bitinia. <sup>2</sup> Xtradnu Dios gule la'tu galooli bencheeni niguii, aguleni la'tu par lagajc laani te gun Sprit Dxa xtenni xtuunni neñ lastootu te gusoobtu xtidx Jesucrist te jia lastootu con xtiejn Jesucrist. Rniabä lo Dios gacnäduxhr̄ni la'tu, guscuecdxini lastootu lo guiraliiti.

### *Te yäl̄nabaj̄n ni cabäaznu*

<sup>3</sup> Col̄guiliä'p xpala'n Dios ni najc Xtrad Jesucrist, Dios nani xcuent xcäl̄rulaslazduxhni bejn̄ni gojpn̄u te yäl̄nabañcoob sa'csi baspansacni Jesucrist loj rebengut. Sa'csi rajpn̄u yäl̄nabañcoob, ni'c nadippac lajznu. <sup>4</sup> Ni'cni laani suniidxni te yäl̄rusalajz ni di nitloj, ni di xhin̄, ni di jiuui si'c riuii rebalajc. Yäl̄rusalajzga aguluchedzu'tzni xhaguibaa par la'tu, <sup>5</sup> nani cayapdzu'tz xcäl̄milaagwr xten Dios sa'csi rililajztu xtiidxni, te guluii Dios guira'ti ni rajpn̄i par la'tu, ni arapcheeni te guluiinireni lojtu che luux guedxliujre.

<sup>6</sup> Ni'cni rbalazduxhtu, mase nanab tedtu balti trabajw gaie'si dxej lo guedxliujre, <sup>7</sup> te guzen̄ xho rililajztu. Xcäl̄rililajztu sajcr̄u lo oor nani rnitloj, niluxh xcäl̄rililajztu di nitloj, mase tedni lo guiboo, ni'cni sinii Dios didxsa'c, didxro, siliä'pni xpala'ntu che guibisac Jesucrist lo guedxliujre guideb xcäl̄milaagwr̄ni, näjza xcäl̄rdimbicha'ni.

<sup>8</sup> Mase gajd̄tu fii lojni, sanälajztuni. Mase ditu fii lojni naj, ahuililajztu xtiidxni, rbalazduxhtu guideb yäl̄rbalajz ni rut rajcdi rusule', sa'ni yu' xhaguibaatis, <sup>9</sup> sa'csi xcäl̄rililajztu suslaa xaimtu lo dojl̄, sica'tu yäl̄nabaj̄n par tejpas.

<sup>10</sup> Luxh xcuent yäl̄ruslaa dojl̄re, rebejn̄ nani gunii xtidx Dios agujc xchero, laareni abasulexgaareni xcuent xcäl̄racnäj Diosre nani siääd lojtu. Luxh bisiedduxh̄reni, gunabdiidx̄zaren̄i, <sup>11</sup> te rlaizreni gacbeereni chu bejn̄ o gucpac gac nani cagusä't Sprit xten Crist ni yu' neñ lastooreni che gunixgaani xho nungäj̄l̄ ted Jesucrist trabajw, dxejcr̄u xcasacni yäl̄rnibee. <sup>12</sup> Baluii Dios lojreni, di rediidxga soob neñ redxej ni nabaj̄nreni, alga par la'tu najc rediidxga. Naj agunii rebejn̄ ni rusule' xtidx Dios rediidxga lojtu. Abasule'reni xtidx Jesucrist sa'csi xhaguibaali baxhał̄ Dios Sprit Dxa xtenni te cuäaz̄ni neñ lastooreni. Näjza rexangl̄ Dios ni rbäjz xhaguibaa rlaiz gacbeer̄reni rediidxga.

### *Xcäl̄nabannayanu nez loj Dios*

<sup>13</sup> Ni'cni, col̄sanij̄ xcäriejntu, col̄gusudzu'tz lastootu, guideb lastootu colyenloj yäl̄racnäj xten Dios ni abia'n diidx xca'nu che guibisac Jesucrist lo guedxliuj. <sup>14</sup> Gactu si'c biuux nani rusoob xtidx xtradni. Na'cru xcäjbtu guntu redzunguijdx ni bejntu galoo che gajd̄tu gumbee Dios. <sup>15</sup> Dios ni gule la'tu najc dxan. Sigajcza la'tu, loj guiralii ni rujntu colyajc bendxan. <sup>16</sup> Sa'csi lo xtidx Dios caj scree: "Sajctu bendxan sa'csi narä nacä dxan."

<sup>17</sup> Palga la'tu rniitu "Dad" lo Dios nani tebloj rujn̄ yäl̄guxhtis loj guiraa bejn̄ xcuent dzuun ni bejn̄ni, la'tu riäj̄l̄ guidxejbtuni guiraa dxej ni nabansijctu lo guedxliujre. <sup>18</sup> Anajntu di Dios nudeed yäl̄nasa'c ni rnitlojdi, si'c oor näjza pla't, te baslaani la'tu lo recostumbr̄ ni cua'tu lo retoxtadgoldootu. Recostumbr̄ga xhet sa'cdireni. Di Dios nudeed oor nicla pla't te baslaani la'tu, <sup>19</sup> badeedni rejn̄ ni sacduxh te baslaani la'tu loj xtojltu. Rejn̄ si'c xtiejn te xiil ni naya, xhetpac najcdini, xtiejn lagajc Jesucrist. <sup>20</sup> Guliipacni che gajd̄li guirixtiej̄ guedxliujre, gule Dios Jesucrist, niluxh najru, neñ redxelult che gajd̄ guedxliujre nitloj, biäd̄luiloini par xcäl̄nasa'ctu, <sup>21</sup> la'tu nani rililajz xtidx Dios xcuent Jesucrist. Luxh Dios baspansac Jesucrist loj rebengut, badeedni yäl̄rnibee lojni, ni'cni ahuililajztu xtidx Dios, luxh Diostis cayenlojtu naj.

<sup>22</sup> Naj sa'csi abasoobtu xtidxliini, te si'c abasiatu lastootu te gac chanälajztu sa'tu, naj guideb lastootu col̄chanälajzpac sa'tu. <sup>23</sup> Sa'csi acua'tu xcäl̄nabañcoobtu xcuent xtidx

Dios ni najc par tejpas, et xcuentdi xtidx beñ guedxliuj ni rnitloj. La'tu najctu si'c cuaan ni rliejn lo bejdz ni siääd xhaguibaa, xhet lo bejdzdi ni rnitloj. <sup>24</sup> Galooli gunii Dios scree: Guiraa reben guedxliuj najc si'c recuaan, guiraa xcäl'nasa'creni najc si'c reguii ni rcaj lo cuaan, recuaan rgoļ, lirtejbza reguii xtenni, <sup>25</sup> niluxh xtidx xtađ Jesucristnu rsiudzu'tzni tejpas. Luxh diidxre najc diidx ni basule'reni lojtu.

## 2

<sup>1</sup> Ni'cni colgusaan guiraa redzunguijdx ni yu' lo guedxliuj, na'c gusgueetu sa'tu, na'c guntioþ lajztu, na'c chuguij lajztu xhixten sa'tu, na'c guiniyaj sa'tu. <sup>2</sup> Si'c riojļ rebäznite' le'ch, si'cza colquiiļ xtidx Dios par sprittu. Coljiojļ xtidx Dios te gustioobruni la'tu lo yäl'rusļaa lo dojļ, <sup>3</sup> palga agucbeetu lacti hueen najc xcäl'racnäj Jesucrist.

### *Crist najc si'c te guij ni nabajñ*

<sup>4</sup> Colguibig loj Jesucrist ni najc si'c te guij ni nabajñ. Laani suniidx yäl'nabajñ par tejpas loonu. Rebejñ badzucaj guijga, niluxh Dios gulenini sa'csi sacduxhni. <sup>5</sup> Sigajcza tejpgatu najctu si'c guij ni nabajñ, ni'c colgusaan xca' Dios la'tu, reguibajñ, te con la'tu gunchee Dios te yu' cadre cuääz Sprit xtenni, te gactu rexpixhojz Dios, nani nayapac lastooreni. Ni'cni sa'csi najctu tejtis con Dad Jesucrist sudeedtu lo Dios guiraa xcäl'nasa'ctu con xprit xtentu. Dee najc nani rchaglaļz Dios. <sup>6</sup> Sa'csi galooli gunii Dios scree:

Agule'că te bejñ neñ guedx Sión, nalajznu Jerusalén,  
ni gac si'c te guisa'c, te guiro ni rsiuj squiin te yuro.

Chutis bejñ ni chalilajz xtiidxni, dini jianxtujy.

<sup>7</sup> Lojtu ni ahuililajz xtiidxni najcni si'c te guisacduxh, niluxh loj renani gajd chalilajz xtiidxni, najcni:

Guij ni gulälaz renani cayunchee yu',  
lagajc guijga gujc guijpac ni baliib squiin xten yu'ga

<sup>8</sup> näjza:

Te guij ni rliaj ni' bejñ, ni ruzälta'reni,  
laareni riajbreni sa'csi direni gusoob xtidx Dios,  
luxh agunibexгаа Dios nitlojreni.

### *Renani gule Dios*

<sup>9</sup> La'tu najctu te cuaa bejñ ni agule Dios, tejpgatu najctu rebixhojz ni najc si'c rei xten Dios. La'tu najctu te bennaya, te bensa'c, rexpeljñpacni. Aguleni la'tu te gusule'tu reyäl'nasacduxh ni bejñ Dios ni gurejdxte che guyu'tu lo nezyunacäy xten guedxliujre te biu'tu lo nezyuj ni rdimbichasejz xten Dios. <sup>10</sup> La'tu galoo rut najcđitu, niluxh naj najctu rexpeljñpac Dios. Galoo gajd Dios gulaslaļztu, luxh naj abalaslajz Dios la'tu.

### *Colguibajñ lo xnezyuj Dios*

<sup>11</sup> Rebetzä ni sanälazä, nabajñtu lo guedxliujre si'c benzijt, ni rbäjz te laad, ni'c rniabduxhä lojtu, na'c guntu recosguijdx xten guedxliujre, ni rutijļ neñ lastoo bejñ te cuälazreni xnezyuj Dios. <sup>12</sup> Colguibansa'c laļ ni yu'tu loj rebenzijt ni di gac xpejñ Israel te palga guiniyajreni la'tu gäbreni najctu beñlatsiaj, che fiireni redzunsac'c ni rujntu, siliä'ppacreni xpala'n Dios che jiädsac Jesucrist te gunni yälguxhtis.

<sup>13</sup> Ni'cni, sa'csi huililajztu xtidx Jesucrist, colgusoob xtidx guiraa reni rnibeetu lo guedxliujre, si'c najc presidentro, <sup>14</sup> regubernadoor nani ruxhalni te rujnreni yälguxhtis rebendojļ näjza te guiliä'pni xpala'n reben nani laaca rujnreni. <sup>15</sup> Sa'csi Dios rlaļz guntu recossa'c te cuecdxtu rextidxnayääl ni rnii reni di rlaļz gumbee didxlii xcuent Jesucrist.

<sup>16</sup> Colguibajñ si'c bejñ ni rut rnibeedi, na'cza guntu latsiaj sa'csi rut rnibeeditu, colguibajñ si'c guinibee Dios. <sup>17</sup> Ga'ptu yäl'nadolajz loj guiraasi bejñ. Colchanälajz sa'tu ni rililajz. Colguidxejb Dios, colguiliä'p xpala'n presidentro.

### *Gudejđ Jesucrist trabajw te baluiini xho jiennu*

<sup>18</sup> La'tu ni najc mos, guideb yäl̄nadolajz col̄gusobdiajg guiraa xtid̄x rexlam̄tu, xhet ganaxdi relamsa'c ni najc nadolajz, näjza relam̄ ni najc beṅguijdx. <sup>19</sup> Sa'csi rchagljaz ruhuii Dios te bejn̄ palga sa'csi rililajz te bejn̄ xtid̄x Dios rujn̄ bejn̄ huant che rdejdn̄i trabajw luxh xhet bejndini. <sup>20</sup> Palga la'tu rujntu latsiaj ni'cni rusacsini la'tu, ¿xhi guntu gaan palga rujntu huant rdejdtu trabajw? Niluxh palga la'tu rdejdtu trabajw sa'csi rujntu redzunsac, luxh rujntu huant, ni'c najc laaca nez loj Dios. <sup>21</sup> Te guntu si'c gurejdx Diostu, sa'csi gudejdz Jesucrist trabajw xcuenttu te guluiini xho guntu che chanuutu lo xnezyujni. <sup>22</sup> Laani dini niujn̄ nicla tej dojl̄, laani dini nusguee nicla tej bejn̄ con didx-xhii. <sup>23</sup> Che guniyajreni lojni, dini nudzu' yäl̄rniyajga. Che cadejdn̄i trabajw, dini nudzu' diidx̄ niluxh bateedni lagajc laani ladzṅaa Dios ni rujn̄ yäl̄guxhtissa'c. <sup>24</sup> Gudeed Jesucrist trabajw si'c te beṅdol̄duxh, bacuaarenini lo cruz te ro'c gusacsíduxh tiejxhni xcuent xtoj̄l̄nu, te na'c gunrunu dojl̄, te guibaṅsa'cnu lo xnezyuj Dios. Gudil̄guijdxreni tiejxhni te basiajcn̄i la'tu. <sup>25</sup> Sa'csi galoo gujct̄u si'c rexiil̄ ni rut rajpdi, rijreni nezree-nezrec. Niluxh naj̄ agubisactu lo xpaxtoortu näjza nani randzu' xaimtu, Jesucrist.

### 3

#### *Xho nanab guibann̄ajtu chäältu*

<sup>1</sup> Sigajcza la'tu, regunaa ni abachṅaa, col̄gusoob xtid̄x chäältu, te mase yu' tejreni ni di chalilajz xtid̄x Dios, sililajzni xtid̄x Dios sa'csi fiini xho rujntu mase xhet rniidilu. <sup>2</sup> Sa'csi fiini xho riulu xtiidxni näjza xho rniilu nadolajz lojni, näjza xho nabann̄äsa'cluni. <sup>3</sup> Na'c gusucheetu ganax lo jiaatis, si'c najc guichniil̄ yejct̄u, näjza biaoar ni rcaj diajgtu, guejntu, naatu, näjza ladsa'c ni najc sacru. <sup>4</sup> Col̄gusuchenäj lastootu yäl̄nadolajz, yäl̄rbecdx̄i lajz, näjza yäl̄sanälajz, sa'csi direni nitloj, luxh sacduxhreni nez loj Dios. <sup>5</sup> Galoo si'cza bejn̄ regunaa ni gujc xpejn̄ Dios ni huililajz xtid̄x Dios, basucheereni lastooreni, basoobreni xtid̄x chäälr̄eni. <sup>6</sup> Si'c gujc toSara, basobdiajgni xtid̄x toAbram, guniizani lo toAbram, Dad. Naj̄ najct̄u si'c laani palga rujntu redzunsac, näjza na'c guidxejbditu.

<sup>7</sup> Sigajcza la'tu, niguii ni abachṅaa, col̄guibann̄äsa'c chäältu. Col̄gapdani sa'csi dini gacnadip si'c te niguii; nanab guntu si'c sa'csi näjza lojreni badeed Dios yäl̄nabajn̄ par tejpas. Col̄yejn̄ si'c, te gucuadiajg Dios che cuedx̄-guiniabtu lojni.

#### *Renani rdejd̄ trabajw che laaca rujn̄reni*

<sup>8</sup> Dee najc ni caniä loj guiraatu, saru col̄guibann̄äj sa'tu. Col̄gulaslajz sa'tu, col̄chanälajz sa'tu si'c rinälajz te niguii bejtzni. Gactu bensac, bennadolajz. <sup>9</sup> Na'c gudzu'tu didx̄guijdx̄ che guiniireni didx̄guijdx̄ lojtu, na'cza gudzu'tu didxyaj che guiniireni didxyaj lojtu. Alga gunab lo Dios gacn̄ajn̄ireni, sa'csi ni'cni gule Dios la'tu, te sica'zatu reyäl̄nasa'c ni guniidx̄ni lojtu. <sup>10</sup> Sa'csi scree caj lo xtid̄x Dios:

Nani rchagljaz guibajn̄ni,

luxh rlajzzani saru tedni redxej lo guedx̄liujre,  
sugudxojn̄ni guinii ro'ni didxn̄aj näjza didx̄-xhii.

<sup>11</sup> Guibicajni loj redzunguijdx̄, sugunni redzunsac'tis.  
Suquiil̄ni yäl̄rbedxi te ni'c chanuuni.

<sup>12</sup> Sa'csi ruhuii Dios rebejn̄ ni rujn̄ dzunsac,  
rucuadiajgzani xtiidx̄reni che rniabreni lojni.

Niluxh rudzurēni lojni, rbälazzani renani rujn̄ latsiaj.

<sup>13</sup> ¿Chu laa ni gun latsiaj la'tu, palga la'tu rbaali lajztu rujntu dzunsac? <sup>14</sup> Palga caxäjsi tedtu trabajw che guntu redzunsac. ¡Chicbaatu! Na'c guntu xhigab, niclaza guidxejbtu xcäl̄ruchejbreni. <sup>15</sup> Col̄gusaan guinibee Dad Jesucrist nen̄ lastootu, gususiṅ te gudzu'tu diidx̄ loj reni rniabdiidx̄ lojtu xhicuent runlojtu guibi' Jesucrist. Guideb yäl̄nadolajz saru gudzu'tu diidx̄. <sup>16</sup> Col̄guibaṅsa'c te cuedx̄i xcäl̄riejntu te che guiniyajreni la'tu sa'csi nabansa'ctu loj Crist, jianxtujy reni rniyaj la'tu. <sup>17</sup> Sa'csi hueenru tedtu trabajw che cayuntu te dzunsac, palga si'c rlajz Dios, lacuaa tedtu trabajw sa'csi cayujntu dojl̄.



<sup>18</sup> Sa'csi sigajcza tejtis gujt Jesucrist xcuent rextojlnu. Xhetliidi xtojlni guyu' nez loj Dios, niluxh gudejndi trabajwduxh xcuent rebendojl. Bejnne si'c te gac guibignu lo Dios sa'csi gujt tiejxh Jesucrist, luxh guyusac sprit xtenni lo tiejxhni te gubansacni. <sup>19</sup> Che gajd xpritni guibisac lo tiejxhni, huij spritni basule'ni diidx loj resprit ni yu' latzguiib. <sup>20</sup> Respritga najc renani di nusoob xtidx Noé che basule'ni xtidx Dios lojreni. Guläz Dios rebejnnga guiraa redxej ni cayujn Noé barcwro agujc xchero. Baslaa Dios xcäl'nabajn xhujntis bejn, xhet gujcdireni gudejdreni lo nisguiro ni biajb guideb guedxliujre. <sup>21</sup> Che robnisnu naj, rusnaalajznu rebejnnga; yälrobnisga ruluiloj xho ruslaa Diosnu lo dojl. Et sa'csi riäjt beed lo tiejxhnu nen nisga, alga sa'csi dxejc rniabnu lo Dios guniidxni te xcäriensa'c, sa'csi sajc xca'nuni xcuent ni gubansac Jesucrist lo rebengut. <sup>22</sup> Che birii Jesucrist loj rebengut, biu'ni xhaguibaa cadre gurejni xladbee Dios te ro'c rnibeeni loj rexangl Dios, näjza loj guiraa resprit ni rajc rnibee, ni yu' lo guedxliuj näjza xhaguibaa.

## 4

*Colyejn xtzuum Dios*

<sup>1</sup> Ni'cni sa'csi agudejd Jesucrist trabajw cuajni lo cruzj xcuentnu, sigajcza la'tu riäjlguntu xhigab sidejdtu trabajw lo guedxliujre sa'csi nani agudejd trabajw, diruni gun dojl, <sup>2</sup> te guideb nabajjni lo guedxliuj, guibajjni si'c rlanj Dios, diruni guibajn te gunni redzunguijdx xten guedxliujre. <sup>3</sup> Sa'csi bejntu si'ctis ni rlanjtu galoo, bejntu si'c rujn rebejn ni di gumbee Dios, bejntu si'cni rlanj tiejxhtu, bejntu latsiaj, gusojztu, bejntu relanero, gudedcaj gusojztu, luxh bejntu cosxtuiduxh bazuxhijbzatu loj rebanäbdxab. <sup>4</sup> Dxejcti rebejn ni rujn recosga naj, rdxelojreni sa'csi dirutu gun ni rlanjreni, ni'c rniyajreni la'tu. <sup>5</sup> Niluxh laareni suureni nez loj Jesucrist ni agojl gun yälguxhtis loj guiraa rebejn, rebejn ni nabajn näjza renani agujt, te gusule'reni xcuent nani bejnreni. <sup>6</sup> Ni'cni basule' Jesucrist xtidx Dios loj reni agujt, te mase che gubajjreni lo guedxliuj gujcreni yälguxhtis si'ctis ni rajc bejn, dxejc gujtreni, naj sprit xtenreni sinuu guibajn si'c ni rlanj Dios.

<sup>7</sup> Asiäddzungajxh dxej che guibisac Jesucrist lo guedxliujre. Ni'cni ganax laaca colyejn xhigab, colgusiñ xcäriejntu te saru cuedx-guiniabtu lo Dios. <sup>8</sup> Niluxh ni maazru sajc najc yäl'sanälajz resa'tu sa'csi che rinälajztu resa'tu, riallajztu xtojlni sa'tu. <sup>9</sup> Saru gurenäj bejn ni rdzujn rolizlu, na'c jiejytu. <sup>10</sup> Abaniidx Dios loj tejgatu te dzuun ni sajc guntu. Dzuunga colyacnäj resa'tu, te si'c guluiitu lo resa'tu laaca cayunsa'ctu guira'ti nani baniidx Dios lojtu. <sup>11</sup> Palga tejtü najc xtzuumni guluiini xtidx Dios, suguiini ascanu najcni xtiidxpac Dios. Palga tejtü najc xtzuumni gacnäjni sa'ni, sugunnini, guideb yäl'nadip yäl'nadaan ni rudeed Dios lojni, te guira'tis ni rajc sujn guiliä'p xpala'n Dios xcuent Jesucrist. Sa'csi laatisni riäjlgä'p xpala'nni, laatisni riäjlguinibeeni tejpas. Sugacni si'c.

*Xho nanab tednu trabajw*

<sup>12</sup> Rebetzä ni sanälazä, na'c guidxelojtu sa'csi cadejdtu trabajw ni najc si'c guiboo, ni siääd te gactu preeb. Na'c guntu xhigab xhichani'c casiajctu. <sup>13</sup> Colguibalajz sa'csi sigajc ni cadejdtu trabajw sa'ni gudejd Jesucrist, sigajcza sibalajztu che guiluiloj xcälrdimbicha' Jesucrist. <sup>14</sup> Palga rniyajreni la'tu sa'csi rililajztu xtidx Jesucrist, chicbaa la'tu, sa'csi rbäjz Xprit Dxan xten Dios guideb xcälrdimbicha'ni nen lastootu. <sup>15</sup> Gunatiro, andi gusaantu ted tejtü trabajw sa'csi bagu'ttu bejn, o sa'csi gulajntu xhi xten bejn, o sa'csi bejntu latsiaj, o sa'csi huichu'ni lo xcuent sa'ni ni xhet nungäjldi gacbeeni. <sup>16</sup> Palga yu' chu tej tedni trabajw sa'csi rililajzni xtidx Jesucrist, na'c guitujyni, alga suguiliä'pni xpala'n Dios xcuent Jesucrist.

<sup>17</sup> Abidzujn dxej che ganid rexpejn Dios ted trabajw. Luxh palga ganid nuurnu gacnu yälguxhtis luxh ahuililaaznu xtiidxni, xhocha gun rebejn nani di chalilajz xtidx Dios xcuent Jesucrist! <sup>18</sup> Lo xtidx Dios caj scree:

Lacti naganlajz rliaa reben'naya lo dojl,

xhocha gunäjni rebejn nani di chalilajz xtidx Dios näjza rebendojl?

<sup>19</sup> Ni'cni, guiraatu nani cadejd trabajw xcuent xtidx Dios si'cni rlanj Dios, colgudeed xprittu lo Dios ni di gusguee, ni bencheetu, te chanuutis guntu ni riäj] guntu.

## 5

*Yälrulijdx loj renani ahuililajz xtidx Dios*

<sup>1</sup> Narä nacä te bengool, bahuiä trabajw ni gudejd Jesucrist, bahuiäza xcälrdimbicha' Jesucrist ni guniidxni loonu che guibisacni lo guedxliujre. Ni'cni rulidxä la'tu ni najc rebengool, <sup>2</sup> colgajp renani rililajz xtidx Dios nani rajptu fiipactu xhi rujnreni. Colga'preni si'c te bejn ni rajp xiil, colyejnni guideb yejc, guideb lajztu. Colyejn si'c sa'csi si'c rlanj Dios guntu, na'c gunlojtu meel. Colguibalajz cayajptu rexpejn Dios. <sup>3</sup> Na'c guinibeetu lojreni si'c rnibee te lam loj reni rujn xtzuumni, colguluiireni xho gunreni con xcäl'nabansa'clu. <sup>4</sup> Che guibisac Jesucrist, ni rajp nuure, laani suniidxni xcuentnu, te yäl'nasacduxh nani dipac nitloj.

<sup>5</sup> Sigajcza la'tu ni najc bi'n, colgusobdiajg xtidx rebengool. Guiraatu coljju xtidx sa'tu, colguluii sa'tu guideb nadolajz. Sa'csi:

Dios rbälaz rebejn ni runnaro lagajc laareni,  
niluxh racnäjni rebejn ni najc nadolajz.

<sup>6</sup> Ni'cni guideb yäl'nadolajz coljju lo Dios sa'csi rajpni yäl'rnibeduxh, te guiliä'pni xpala'ntu che gal dxej ni guibisacni. <sup>7</sup> Colgudeed guiraa reyärsia' ni yu' lastootu lo Jesucrist te guscuecdxini xcäriejntu sa'csi laani sanälajzni la'tu.

<sup>8</sup> Colgusanij xcäriejntu, colsusin sa'csi rdxe'ch bendxab lojtu, cansaxhiga'tzni si'c te beedz nialajz, caguiilni chu guxhinni. <sup>9</sup> Colsudzu'tz nez lojni, guideb lastootu colchalilajz xtidx Dios, sa'csi anajntu sigajcza cayunnäjni guiraa rebetznu ni nabajn lo guedxliujre.

<sup>10</sup> Che agudejdtu trabajw tiop-choñ dxej, Dios nani rajp guiraa yäl'racnäj, nani gurejdx la'tu te näjza la'tu xca'tu xcälrdimbicha'ni xcuent lagajc Jesucrist, lagajc laani sunsa'cni la'tu, bejn ni rsiudzu'tz lo xtiidxni, bejn ni nadip lajzni, bejn ni di guidxejb. <sup>11</sup> Laani rajpni yäl'rnibeduxh par tejpas, guiliä'pnu xpala'nni par tejpas. Sugacni si'c.

<sup>12</sup> Siädnä Silvan guijtzre lojtu. Runä xhigab najcni te bejn nani huililazsa'c xtidx Dios. Abacuaä bale'si diidxre lojtu te gulidxä la'tu, te guiniliä lojtu dee najc xcäl'racnäjpac Dios. Colsudzu'tz xcuent yäl'racnäjre.

<sup>13</sup> Rexpejn Dios ni re' lo guedx Babilonia ruxhal xtiixios lojtu sa'csi gule Dios la'tu sigajc guleni laareni. Marcw, ni najc si'c xi'nä, ruxhalza xtiixios lojtu. <sup>14</sup> Colguinii "xchan" lo tejga sa'tu ro'c.

Rniabä lo Dios guscuecdxini lastoo guiraatu ni rililajz xtidx Crist.

## Guijtz Ni Rojp Ni Bacuaa Pedr

### *Pedr rucuaa te guijtz loj reni ahuililajz*

<sup>1</sup> Narä nacä Simón Pedr, ni rujn xtzun Jesucrist, te apost xtenni. Rucuaä guijtzre lojtu nani rililajz xtidx Dios sigajc ni rililajznu, sa'csi bahuii Dios loonu si'c bennaya xcuent Xtiosnu Jesucrist nani baslaa nuurnu lo dojl. <sup>2</sup> Rniabä lo Dios gacnäduxhruni la'tu, guscuecdxiruni lastootu, te gacbeerutu xtidx Dios näjza Dad Jesucrist.

### *Xho riäjł gac rexpejn Crist*

<sup>3</sup> Sa'csi xcälrnibee Dios baniidx guira'ti ni rquiinnu te guibansa'cnu, te gacnu bennaya nez lojni, xcuent rililajzpac xtiidxni ni nansa'cnu xcuent Jesucrist nani gurejdx nuure, nani gule nuure te xca'zanu xcälrdimbicha'ni, näjza guiraa xcäl'nansa'cni. <sup>4</sup> Lagajc xcuent redee baniidxni rextidxliini, rextidxsacduxhni. Palga chalilajznu xtiidxni, sajcnu xpejnni, sajcnu bensa'c si'c najcni sa'csi abiriinu loj redzunguijdx ni chagljajz rujn rebejn ni ruxhiñ guedxliujre. <sup>5</sup> Ni'cni nanab gacbeenu xho nabañnu lo guedxliujre. Siroobru xcälrlilajztu sacnäjni la'tu te guibansa'cnu lo Dios; luxh sa'csi nabañsa'ctu, siroobru xcäl'najntu xcuent dzunsa'c näjza dzunguijdx. <sup>6</sup> Luxh palga guroob xcäl'najntu xcuent dzunsa'c näjza dzunguijdx sajc guinibeetu tiejxhtu te na'c guntu dzunguijdx. Che guinibeetu tiejxhtu, sibedxi lajztu. Che arajptu yälrbexilajz, sajctu bensa'c, bendxan. <sup>7</sup> Che anajctu bensa'c, bendxan, sinälajztu resa'tu; che asanälajztu sa'tu, arajptu yäl'sanälajz sa'tu xten Jesucrist.

<sup>8</sup> Palga la'tu rusobtu guiraa rediidxre, luxh chanuutis caroobreni neñ lastootu, ditu guibanxlia'; sujnpactu xtzun Dios, luxh rediidxre sacnäjrutu gumbeetu Dad Jesucrist. <sup>9</sup> Sa'csi renani di ga'p rediidxre, najcni si'c te lotiä'p ni di fii, o te ni di gacdi fii zijt, ni'cni abiällajzni xho basia Dios rextojłni nani bejnni galoo. <sup>10</sup> Ni'cni rniä lojtu rebetzä, colsejs, colguisieed xtidx Dios te gacbeepactu, guluilojzatu lo bejn xho gurejdx, xho gule Dios la'tu, sa'csi lał ni chanuu gucuadijgtu rediidxga, dipactu gunijt lo Dios. <sup>11</sup> Palga guibajntu si'c lo guedxliujre, siu'pactu xhaguibaa cadre rnibee Dad Jesucrist par tejpas.

<sup>12</sup> Ni'cni anasuga'ä te gusnaä lajztu xcuent rediidxre, mase anajntureni, mase risutzu'tztu yälrlilajz xten didxlii ni yu' neñ lastootu. <sup>13</sup> Narä runä xhigab laaca runä che rusnaä lajztu, te gusnibä la'tu, te gusnaä lajztu. Si'cza gunä guideb ni nabañä lo guedxliujre. <sup>14</sup> Ananä asiäddzungajxh dxej ni xca' Dios narä, sa'csi abaluii Dad Jesucrist ni'c loä. <sup>15</sup> Ni'cni cayunduxhä dzuun naj, te che guiquiinni sinaj lajztu xtidxä che agu'tä.

### *Renani bahuii loj yäl'nasa'c xten Crist*

<sup>16</sup> Che basule'nu lojtu xcälrnibee näj xcälrdimbicha' Dad Jesucrist, xcuent ni guibisacpacni, dinu niniitisi, dizanu nusguee la'tu, sa'csi abahuiloonu xcälrdimbicha'ni. <sup>17</sup> Sa'csi che badeed Dios xtadnu yälrnibee, yälrdimbicha' lojni, dxejc biejn diajgnu gunii Dios, birii xse'ni neñ te za ni gurej xhaguibaa, räjpni: “Dee najc xi'nä ni sanälazä, rbanälazduxhäni.” <sup>18</sup> Lagajc nuure biejn diajgnu xse' Dios che guniini xhaguibaali che geyunäjnu Jesucrist lo dajn ni najc dxan.

<sup>19</sup> Ni'cni naj guliiru rediidx ni gunii reprove't. Ni'cni sujntu laaca palga gusobdiajglu rediidxga, sa'csi najcreni si'c te bajl ni rusanij te lajt ni nacäy, susanijreni xcäriejntu dxejli ni jiaäd bajl xhaguibaa. Dxejc lagajc laani susanij lastoonu. <sup>20</sup> Niluxh ganiddoo nanab gacbeetu dee: nicla tej bejn sajc guinii laatisni sajc guinii xhi säloj xtidx Dios, <sup>21</sup> sa'csi nicla tej diidx ni bacuaa reprove't dini gac diidx ni biajbtis yejcreni. Guiraliireni bacuaareni ganaxtis diidx ni badeed Xprit Dxan Dios lojreni gucuaareni.

## 2

*Rebejn nani rusguee  
(Judas 4-13)*

<sup>1</sup> Niluxh galoo biricajza te cuaa bejn ni basguee rexpejn Israel, sigajcni siääd stee cuaa bejn ni susguee la'tu. Laareni guluixhiga'tzreni didx-xhii nani rujn rusiejxh lajz bejn xcälirilajzreni, sibälazreni lagajc Dad Jesucrist nani gudijx xcuent xtojlni. Niluxh renani rusguee, siojb nitlojreni par tejpas. <sup>2</sup> Xhidajlza bejn sinajlreni lo xcäl'nabanguijdxreni, dxejcti ni'c gun siniyaj xhidajl bejn xnezyuj xtidxlii Dios. <sup>3</sup> Sa'csi ruguilajzreni xmeeltu, xhixtentu, ni'c siädgusgueereni la'tu te xca'reni xhixtentu. Niluxh xcäl'guxhtisreni nani gun Dios, näjza xcäl'rnitlojreni cabäzgjajczeni agujc xchero.

<sup>4</sup> Najcni si'c sa'csi di Dios niäl'lajz rextolj rexanglni nani bejn dojl, niluxh baxhal'nireni gabijl, basäunireni nen reguednacäy cadro cabäzjzreni dxej ni gun Dios xcäl'guxhtisni. <sup>5</sup> Sigajza rebejn ni guyu' galoo, banitloj Diosreni, baslaa Dios xcäl'nabajn Noétis näjza sgajdzreni, sa'csi basule' Noé xtidx guluii Dios. Luxh baxhal'ni nisguiro te biädnitlojni guiraa rebejn nani di nucuadijg xtidx Dios. <sup>6</sup> Bejn Dios yäl'guxhtis xten guedx Sodoma näjza guedx Gomorra, base'cni reguejdxga, gujcreni cobdäj. Si'c bejn Dios te gacbee bejn xho runnäj Dios rebejn ni di gusoob xtidx Dios. <sup>7</sup> Gulää Dios Lo't ni gujc te bensa'c lo reguejdxga, sa'csi guc-huin lajzni xcuent relatsiaj ni bejn rebejdojlga. <sup>8</sup> Guideb ni guläjs Lo't, te bensa'c, lo guejdxga, dxej, yääl guc-huin lastooni xcuent nani bahuini, nani biejn diajgni, xcuentza latsiaj ni bejnreni, sa'csi bensa'cni. <sup>9</sup> Anajn Dios xho racnäjni rebensa'c te rbäänireni lo retrabajw ni cadejdreni, anajnza Dios xho gusacsini rebejdojl cheni guidzujnli dxej ni gunni xcäl'guxhtisreni.

<sup>10</sup> Guliduxhni, sujnru Dios yäl'guxhtis loj rebejn nani rlajz gun si'ctisni rlajz tiejxhreni, näjza renani rbälaz xcäl'rnibee Dios. Najczeni bejn ni di guidxejb, rujnreni ni rijabtis yejcreni, direni guidxejb guiniyajreni rexangl Dios ni rdimbicha'. <sup>11</sup> Niluxh nicla tej rexangl Dios ni rajpru yäl'rnibee lo rebejnre, direni guiniyaj, cue'creni xquejreni lo Dios.

<sup>12</sup> Luxh, rebejnga najc si'c reguidxaa nani xheti xcäriejnreni, cabäzjtisreni chu guiniaazreni te guetreni. Rniyajreni luxh direni gan xhini'c rniireni. Niluxh sigajc rnitloj reguidxaa, sigajza sinitlojreni. <sup>13</sup> Bejnreni dojl, ni'c sinitlojreni, sidejdreni yäl-rusacsiduxh xcuent rextoljreni. Laareni rchaglajzreni guntisreni laniro rdxee. Laareni najczeni si'c te cosdxuudx o si'c te manch ni rcaj lo te ladnol, rbaali lajzreni rusgueereni la'tu la' ni cayajc lanij cayaunäjreni la'tu.

<sup>14</sup> Digacdi fiireni loj te gunaa, li rsia' lajzreni, direni guidxajg rujnreni dojl, rusgueereni rebejn te gunzareni dojl, ruluiireni lastooreni te säblajzreni meel, najczeni bejn nani batzubde Dios, <sup>15</sup> agulälazreni nezyusa'c, abanijtreni, naj sanajlreni xnezyuj Balaam, xi'n Beor, nani huichaglajzru nani rquijx yäl'latsiaj. <sup>16</sup> Niluxh gudi'näj Diosni xcuent xtojlni, bejn Dios gunii te mandip si'c xse' bejn, te bascuääzni profe'tga, dini nusaan niujnni nani cayujnni, cayujnni si'c te bejn ni rajc yejcn.

<sup>17</sup> Reben latsiajre najc si'c te bisie cadro xheti nis, najczareni si'c rexcäy ni sanä bej nezree nezrec che cabi' te bero. Laareni su'reni lo xcäy par tejpas che gun Dios yäl'guxhtis. <sup>18</sup> Sa'csi rniduxhreni didxro, niluxh xhet sajcdi rediidxga luxh rniireni huenduxh najc gun bejn ni rlajztis tiejxhreni, con yäl'latsiaj rusgueereni rebejn nani entis birii loj reni rujn sa' dzunguijdxga. <sup>19</sup> Rusgueereni, rniireni rut gudxojdini palga jädnajlnireni, niluxh lagajc laareni najczeni mos, sa'csi rnibee latsiajreni. Xhitis ni rnibee te bejn, ni'c rusäuni nen latzguiib. <sup>20</sup> Sa'csi palga agubicaj te bejn loj redzunguijdx xten guedxliuj sa'csi huililajzreni xtidx Dad Jesucrist nani ruslaa rebejn lo guiraa dojl, dxejctiru gubisacni loj xtojlni, abixhidsacreni lo xtojlni, nalajz najczeni si'c che gajdreni gumbee xtidx Dios. <sup>21</sup> Huenru direni niembee xnezyuj Dios, quela che abiembeerreni nezyujga, cuälazreni didx dxan, xtidx Dios ni basule'reni lojreni. <sup>22</sup> Dxejcsii rsiojb diidx ni najc scree: "Rbisac te bä'cw loj xcäl'rdzujbni. Cuch ni entis gojz richusacni lo xpajnni."

<sup>1</sup> Rebetzä, dee najc ni rojp guijtze ni caguxhalä lojtu; lo guiro'p guijtze cagusnibä la'tu xcuent reyäl\_rulijdx ni gusnaj lajztu. <sup>2</sup> Col\_gusnaj lajztu rediidx ni gunii reprof'e't agujc xchero, näjza rediidx ni gunii Dad Jesucrist nani basule' reapost.

<sup>3</sup> Ganiddoo, col\_gacbee dee: che asiäddzungajxh redxelult, siäd rebejn ni rgubee rextidx Dios, laareni sujnreni si'ctis ni rlajz tiejxhreni. <sup>4</sup> Siniabdiidxreni: “¿Xhicuent gajd Jesucrist guibisac si'cni bia'n diidx? Cheni gujtli rextadgoldoonu, guira'ti sanuutis najcni si'c gujcn cheni guc-cheeli guedxliujre.” <sup>5</sup> Niluxh che rniireni si'c, rlajzpac jiällajzreni agujc xchero benchee Dios xhaguibaa xcuent xtiidxtisni, näjza guniitis Dios te si'c guc-chee guedxliuj, biriini nen nis, naj tre'ni loj nisga. <sup>6</sup> Dxejcti gunitloj guira'ti ni yu' lo guedxliujga che biajb te nisguiro, gunitlojni. <sup>7</sup> Niluxh xhaguibaa näjza guedxliuj ni tre' naj, cayajp Diosreni xcuent xtiidxni te checreni che guidzujn dxej ni gunni yälguxhtis, che gunitlojni rebendojl.

<sup>8</sup> Rebetzä, na'c jiällajztu, Jesucrist ruhuii tebdxej si'c te tzugayuu ijz, rhuiizani te tzugayuu ijz si'c tebdxej. <sup>9</sup> Di gaclaa gusoob Dios diidx ni bia'n, si'c rujn bejn xhigab raclaani, niluxh cabecdxiru lajzni xcuent la'tu, sa'csi cabäjzni gusiejch lajztu, sa'csi di rlajzni nitloj nicla tejtju.

<sup>10</sup> Niluxh sidzujn dxej che guibisac Jesucrist lo guedxliujre si'c rdzujn te gubaan, rut gacbeedi siädni. Dxejcti sibicaj xhaguibaa, gac te bieiduxh, guira'ti sialni lo te guiboduxh, guedxliujre näjza guira'ti ni tre' lojni, guiragajcni sejcni.

<sup>11</sup> Sa'csi sinitloj guiraa redee, ni'c nanab guibannayatu lo guedxliujre, na'c guntu dojl. <sup>12</sup> Col\_cuäjz dxejtis ni jiäd Dios lo guedxliuj. Dxejc sejc xhaguibaa, sinitlojni, luxh guiralii ni yu' sialni lo guiboro. <sup>13</sup> Niluxh abasa'n Dios diidx loonu, ni'cni cayenloonu te guibacoob, te guedxliucoob, cadre gunreni ganaxis dzunsa'c, xhetiru dojl.

<sup>14</sup> Ni'cni rebetzä ni sanälazä, sa'csi cabääznu guiraa ni gac, colyejn huant te che guibisac Dios, sidxälni la'tu dxitis nabajntu, nabannayatu, xhetiru xtojltu. <sup>15</sup> Col\_huii xhi dzuun bejn Dad Jesucrist ni'c rajpnu yäl\_ruslaa lo dojl. Sigajcza bacuaa bejznu Pabl ni sanälajznu. Bacuaani sa'csi badeed Dios yäl\_najn lojni. <sup>16</sup> Nen guiraa rexquijtzn bacuaani xcuent rediidxre. Yu' gaii guijtze ni bacuaani ni najc naganduxh. Luxh bejn ni guxii racbee, ni runtio'p lajzreni, reni'c ruxhiid rextiidxni, sigajc runnäjreni guiraa xtidx Dios, ni'cni sinitlojreni.

<sup>17</sup> Ni'cni rebetzä ni sanälazä, sa'csi ananxgaatu rediidxre, colnatiru didi jiajbtu ladznaa renani gusgheetu, te na'c gunijttu xcäl\_rsiudzu'tztu lo xtidx Dios. <sup>18</sup> Col\_gustioob xcäriejntu con yäl\_racnäj näjza yäl\_najn xten Dad Jesucrist nani ruslaa nuure lo dojl. Suguiiä'pnu xpala'n Dad Jesucrist, naj näjza par tejpas. Sugacni si'c.

## Guijtz Ganid Ni Bacuaa Juan

*Xtidx Dios ni runiidx yäl nabajñ* par tejpas loonu

<sup>1</sup> Galooli che gajd Dios gun guedxliuj, agac nabajñ Jesucrist. Niluxh narä bahuiä loj Jesucrist, biejn diagä rediidx ni guniini loä, gunazä naani. Laani najc Diidx ni runiidx yäl nabajñ par tejpas loonu. <sup>2</sup> Baluilojni loonu; reapost bahuiinu lojni. Ni'cni rniä lojtu, nabajñ Jesucrist par tejpas. Rniliápac nabaññäj Jesucrist Dios. Baluii Dios Jesucrist loonu. <sup>3</sup> Caniä stehuält lojtu, bahuiinu lojni. Biejn diajgnu rediidx ni guniini loonu. Xhigab xtennu najc tejtis con Dios, näjza Jesucrist Xi'n Dios. Ni'cni cagusule'ä rediidxga lojtu, te tejtis xhigab jiennäanu resa'nu. <sup>4</sup> Cagucuaä rediidxre lojtu te guibalazduxhtu.

*Dios najc Bajl*

<sup>5</sup> Naj cagusule'ä rediidx nani baluii Jesucrist loonu. Dios najc bajl. Guiraa redzuun ni rujñni, ganax dzunsa'cni. Xhet yäl nacäyji yu' lo Dios. <sup>6</sup> Palga chutis tejnu naa, tejtis najc xhigabnu con Dios, niluxh riennu redzunguijdx, rniinu didx-xhii, runijtnu dinu chasanäj xtidx Dios. <sup>7</sup> Palga nabajñnu lo bianij si'cni nabajñ Dios lo bianij, tejtis xhigab riennu con resa'nu. Dxejc rusiaza xtiejn Jesucrist Xi'n Dios lastoonu che riennu dojl.

<sup>8</sup> Palga naanu xheti xtojñnu, rusgueenu lagajc nuunu, luxh dinu ga'p xtidx Dios neñ lastoonu. <sup>9</sup> Palga guicäjpnu lo Dios guiraa redojl ni cayennu, siällajzni xtojñnu, sudzucajni rextojñnu, sa'csi laaca rujñni luxh gului najc rextiidxni. <sup>10</sup> Palga guinuunu dinu niujñ dojl, rniinu najc Dios si'c te bejn ni rniä didx-xhii sa'csi anaj Dios yu' xtojñnu, luxh dizanu ga'p xtidx Dios neñ lastoonu.

## 2

*Racñäj Jesucrist nuunu nez loj Dios*

<sup>1</sup> Guejbtu, resa'ä nani huililajz xtidx Dios, cagucuaä rediidxre lojtu lo guiitz te na'c guntu dojl. Niluxh palga jiennu dojl, racñäj Jesucrist nuunu, rniini xcuentnu lo Dios, sa'csi xheti xtojñni. <sup>2</sup> Gujt Jesucrist xcuentnu lo cruzj. Gudijxni rextojñnu lo cruzj. Luxh et rextojtisnu gudijxni. Gudijxni rextojñ guiraa rebejn ni re' lo guideb guedxliuj.

<sup>3</sup> Palga rusoobnu rextidx Dios, huenliisi rluii riembeenu Dios. <sup>4</sup> Cheni rniä te bejn, “narä rumbeäni”, niluxh dini gusoob rextiidxni, rusgueeni resabejnñi. Di lajzni nilii xtidx Dios. <sup>5</sup> Palga rusoobnu xtidx Dios, guliipac rinälaaznu Dios, ni'c najñnu nabaññäjñuni. <sup>6</sup> Cheni rniinu nabaññäjñu Jesucrist, nanabpac guibansa'cnu si'c gubajñ Jesucrist lo guedxliuj.

*Redidxcoob*

<sup>7</sup> Guejbtu resa'ä, xhet didxcoobdi ni cagucuaä lojtu. Cagucuaä lagajc diidx ni najntu galooli che huililajzlitu rextidx Dios, nalajznu rediidx nani biejn diajgtu galooli. <sup>8</sup> Niluxh najcza rediidxre didxcoob loonu, sa'csi che huililajznu rextiidxni gusloj dirunu guibajñ lo yäl nacäyji. Baluii Jesucrist redidxcoobga loonu. Guliipac najc Dios si'c bajl. Dini guibajñ lo nacäyji.

<sup>9</sup> Palga chutis tejnu rniä, “nabañä lo nianij xten Dios”, niluxh rdxe'chni lo resa'ni, lo yäl nacäyji yu'ni. <sup>10</sup> Chutis tejnu ni rinälajz sa'ni, nabajñni lo bianij xten Dios, rujñni dzunsa'c, dizani guichagljaz gunni dojl. <sup>11</sup> Niluxh palga rdxe'chnu lo resa'nu, nabajñnu lo yäl nacäyji sa'csi riennu dojl, sasaanu lo yäl nacäyji. Nicla gacbeenu canejz chonnu, sa'csi ruscäyji beñdxab balojnu.

<sup>12</sup> Cagucuaä rediidxre lo guejbtu, resa'ä ni rililajz, sa'csi abadzucaj Dios rextojñnu, sa'csi lo cruzj gudijx Jesucrist rextojñnu. <sup>13</sup> Cagucuaä rediidxre lo guejbtu, redad beñgool, sa'csi huililajztu rextidx Jesucrist, najntu laani nabajñni galooli näjza par tejpas. Cagucuaä rediidxre lojtu, rebi'n sa'csi dirutu jiu xtidx beñdxab.



Cagucuaä rediidxre lojtu rexi'nä, sa'csi rumbeetu Dios. <sup>14</sup> Abacuaä rediidxre lo guejbtu, redad bengool, sa'csi numbeetu Jesucrist nani nabajñ galooli näjza par tejpas. Abacuaä rediidxre lojtu rebi'n, sa'csi sudzu'tztu, sa'csi yuchee xtidx Dios neñ lastootu, dirutu jiu xtidx bendxab.

<sup>15</sup> Na'c guichagljaztu guntu renani rujñ rebejn nani di chalilajz xtidx Jesucrist; na'cza chanälaztejtü xhixtentu ni rajptu lo guedxliuj. Palga rinälaztejtü rexhixtenti ni ra'pnu lo guedxliuj, dxejc dinu chanälajz Dios. <sup>16</sup> Rebeñ guedxliuj ni di chalilajz xtidx Dios rchagljazreni rujñreni redzunguijdxre: rujñreni dzunguijdx nani rchagljaz tiejxhreni; rujñreni dzunguijdx nani rchagljaz balojreni, näjza lagajc laareni rliä'preni xpala'nreni. Niluxh guiraa reni'c najc dzun guedxliuj, xhet dzuundi ni gunibee Dios gac. <sup>17</sup> Luxh rnitlojpac guedxliuj. Sinitlojza guiraa reni rchagljaz rujñ rebeñ guedxliuj ni di chalilajz xtidx Dios. Niluxh palga gusoobtisnu xtidx Xtadnu Dios, sibannäjñuni par tejpas.

### *Didx guli näjza didx-xhii*

<sup>18</sup> Guejbtu resa'ä ni rililajz xtidx Dios, asiäddzungajxh dxej che guluiloj niguii nani rdxe'ch loj Jesucrist. Abiejñ diajgtu siääd niguiiga. Naj yu' xhidajl reniguii nani rdxechlajz lo Crist. Ni'c alaracbeenu asiäddzungajxh dxejga che guluiloj niguiiga. <sup>19</sup> Yu' xhidajl rebejn ni rdxechlajz lo Jesucrist. Biriireni lo resa'nu. Direni nililajz xtidx Jesucrist. Palga nililajzreni xtidx Jesucrist si'c huililaaznu nuure xtidx Jesucrist, direni nirii lo resa'nu. Biriireni lo resa'nu, ni'c racbeenu direni gac xpejn Jesucrist.

<sup>20</sup> Gule Dios Jesucrist. Jesucristre baniidx Sprit Dxan xten Dios loonu te gacbeenu xhini'c najc redidxliipac. <sup>21</sup> Et sa'csi ditu gan xhi diidx najc didx guli bacuaä rediidxga lojtu. Sa'csi najntu xhi diidx najc didx guliipac, ni'c bacuaäni, te gutijp lajztu. Palga rucuaä rediidx ni najc guli, anajntu dina gusgueä la'tu.

<sup>22</sup> Chutis ni naa di Jesús gac Crist Xi'n Dios, xhet guliidi rextiidxni. Renani rnii di Jesucrist gac Xi'n Dios rdxechlajzni lo Jesucrist. Di reni'c nililajz xtidx Dios. <sup>23</sup> Chutis reni rnii di Jesucrist gac Xi'n Dios, di reni'c gumbee xtadnu Dios. Niluxh renani rnii Jesucrist najc Xi'n Dios, huililajzreni xtidx Dios, numbeezareni Dios.

<sup>24</sup> Colgusoob rediidx ni bejn diajgtu galooli che huililajztu rextidx Dios. Palga rusoobtu rediidxga, nabannäjtu Dios näj xi'nni Jesucrist. <sup>25</sup> Abia'n Jesucrist diidx guniidxni yälñabancoob loonu. Naj ara'pnu yälñabajñre, ra'pnuni par tejpas.

<sup>26</sup> Abacuaä rediidxre lojtu xcuent rebejn ni rñajz chalilajztu rediidx ni xhet guliidi. <sup>27</sup> Baxhañ Jesucrist Sprit Dxan xten Dios loonu. Rbäjzñ neñ lastoonu. Dinu guiquiin chu stee bejn guluii loonu xhi diidx najc guli, sa'csi lagajc Sprit Dxan xten Dios ruluii xtiidxni loonu. Naj ruluiini la'tu guiraa ni najc guli, dini gusguee la'tu. Colguibannäj Jesucrist; colgusoob xtidx Jesucrist si'cni ruluii Sprit Dxan xten Dios lojtu.

<sup>28</sup> Naj guejbtu resa'ä, colguibannäj Jesucrist, te che jiädsacni lo guedxliuj sisiutz'tznu nejz lojni, dinu guituj nejz lojni. <sup>29</sup> Anajntu laaca najc Dios. Anajntu renani rusoob xtidx Dios sasanäjreni Dios, ni'c najceni xi'n Dios.

## 3

### *Rexi'n Dios*

<sup>1</sup> Bahuii xho huinälazduxh Dios nuure, ni'c anaj Dios nuure najcnu rexi'nni. Luxh guli najcnu rexi'n Dios. Rebeñ guedxliuj ni di chalilajz xtidx Dios, direni gumbee nuure, rexi'n Dios, sa'csi dizareni gumbee Dios ni najc xtadnu. <sup>2</sup> Resa'ä ni rinälazä, nuunu riolilaaznu rextidx Dios, ni'cni najcnu rexi'n Dios. Dinu gacbee xho gacnu niluxh che guibisac Jesucrist loonu, suhuiinu lojni si'c ni najcni, sa'csi suchaani nuure te gacnu si'c ni najcni laani. <sup>3</sup> Che rñaj laaznu sidzujñ dxej gac tejganu si'c ni najc Jesucrist, dxej rban'sa'cnu si'c ni gubajñ Jesucrist lo guedxliuj.

<sup>4</sup> Di rebejn ni rujñ dojl gusoob leii xten Dios. Che riennu dojl, runijntu lo leii xten Dios. <sup>5</sup> Racbeenu Jesucrist biääd lo guedxliuj, gujñni niguii te gujñ badzucajni rextojñnu. Laani dini niujñ dojl. <sup>6</sup> Che sasanäjñu Jesucrist, dinu gac benguijdx. Di bejn nani rujñ dojl chalilajz xtidx Jesucrist, dizani gumbeeni. <sup>7</sup> Resa'ä, na'c chalilajztu didx-xhii ni rnii

bejn lojtu, che rniireni cayujntu dojl. Rebejn ni rujn laaca, najczareni si'c najc Jesucrist. <sup>8</sup> Rebejn nani rujn dojl najc xi'n bendxab. Galodooli rujn bendxab dojl. Ni'cni biääd Jesucrist Xi'n Dios lo guedxliuj te gudzucajni redojl nani rujn bejn xcuent bendxab.

<sup>9</sup> Rebejn nani najc xi'n Dios direni guichagljaz gunreni dojl, sa'csi abachaa Dios xcäriejnreni, sa'csi rbäjz Dios nen lastooreni. Direni gun dojl, sa'csi najcreni xi'n Dios. <sup>10</sup> Si'c riembeenu rebejn ni najc xi'n Dios, näjza rebejn ni najc rexi'n bendxab. Chutis tejni di gun dzunsa'c, ni dini chanälajz resa'reni, dini gac xi'n Dios.

#### *Nungäjł chanälajznu resa'nu*

<sup>11</sup> Lagajc rediidxre bejn diajgtu galooli che huililajztu rextidx Dios: colchanälajz resa'tu. <sup>12</sup> Xhet si'c di toCain nani gujc xi'n bendxab. Bejnni dojl, bagu'tni bejtzni. ¿Xhicuent bagu'tnini? Bagu'tnini sa'csi bejn bejtzni ganax dzunsa'c, luxh toCain bejn dzunguijdx. <sup>13</sup> Na'c guidxelojtu che guidxechlajz rebejn lojtu. <sup>14</sup> Racbeenu dirunu sa lo xnezyuj yälgujt, sa'csi dinu guidxechlajz loj resa'nu. Rajpnu yäl nabajñ par tejpas sa'csi rionälaaznu resa'nu. Chutis tej ni di chanälajz resa'reni canzaj lo xnezyuj yälgujt, sa'csi rdxechlajzreni lo sa'reni. <sup>15</sup> Chutis ni rdxechlajz lo resa'ni, najcni nejz lo Dios si'c ni abagu'tni te bejn. Najnnu che rugu't te niguii te bejn dini ga'p yäl nabajñ par tejpas. <sup>16</sup> Racbeenu rinälajz Jesucrist nuunu, sa'csi gujtni lacuaa nuunu lo cruzj. Sigajcza nungäjł gacnäjn nu resa'nu, mase guetnu lacuaa guetreni. <sup>17</sup> Chutis tejnu ni rajp xhidajł xhixtenni, luxh dini gacnäj nicla tejnu ni xhet rajpdi, di bejn ga chanälajz Dios. <sup>18</sup> Guejbtu resa'ä, na'c chanälaaznu resa'nu con rextiidxtisnu, na'c guiniitisnu rionälaaznu resa'nu. Palga rionälaazpacnu resa'nu, sacnäjn nu resa'nu.

#### *Sisiutzu'tznu nez loj Dios*

<sup>19-20</sup> Palga rionälaaznu resa'nu, nancheenu najcnu rexi'n Dios. Palga jiajbnu xhigab dinu gac bensa'c, dizanu gac xi'n Dios, nanab jiunu rextiidxtis Dios, na'c jiunu rexhigabnu. Dios najn rexhigabga. Niluxh Dios anaj: renani rinälaaz resa'reni, reni'c najc rexi'n ni. <sup>21</sup> Rniä lo guejbtu nani rinälazä, palga lagajc lastoonu rni loonu, “cagusooblu xtidx Dios”, sisiutijp lastoonu che rbedx-rniabnu lo Dios. <sup>22</sup> Xhitis ni rniabnu lo Dios, runiidxni loonu sa'csi rusoobnu xtiidxni, riennu redzuun ni ruspaa lajz Dios. <sup>23</sup> Dee najc rediidx ni gunibee Dios gusoobnu: chalilaaznu xtidx Dios, diidx ni rni xho gujt Jesucrist lacuaa nuunu, chonälaazzanu resa'nu si'cni gunibee Dios. <sup>24</sup> Palga rusoobnu guiraa nani gunibeeni, nabannäjnnuni, si'cza nabannäjni nuunu. Nancheenu nabannäj Dios nuunu, sa'csi baniidxni Sprit Dxan xtenni te cuääz nen lastoonu.

## 4

#### *Scree gacbeenu xhi didx najc guliipac*

<sup>1</sup> Guejbtu renani rinälazä, na'c chalilajztu rextidx chutis bejn nani naa, “rniä rextidx Dios lojtu”. Ganiddoo colgula'tz rextiidxni te gacbeetu don chu xtidx caniini, sa'csi xhidajł bejn sinii lojtu, “nuunu rniinu rextidx Dios”, niluxh caniisireni si'c. <sup>2</sup> Scree gacbeenu xhi diidx najc guliipac. Guiraa rebejn nani guinii “Jesucrist, Xi'n Dios, ni biääd lo guedxliuj si'c niguii”, reni'c cayacnäj Sprit Dxan xten Dios, reni'c canii xtidx Dios. <sup>3</sup> Guiraa rebejn nani di guinii biääd Jesucrist Xi'n Dios si'c niguii, xhet xtidx Diosdi rniireni. Reni'c rdxe'chreni loj Jesucrist. Abiejn diajgtu siääd te niguii ni rdxe'chduxh loj Jesucrist, luxh naj abidzujñ rextzuun niguiiga lo guedxliuj.

<sup>4</sup> Guejbtu resa'ä, najcnu rexi'n Dios. Naj abiennu gaan lo rebejn ni rdxe'ch lo Jesucrist sa'csi Dios ni rbäjz nen lastoonu abejnni gaan lo bendxab ni nabajñ lo guedxliuj. <sup>5</sup> Rebejn ni rni xhet guliidi xtidx Dios, rililajztisreni rediidx ni najc xten guedxliuj. Xhidalduxh rebejn ni re' lo guedxliuj riu rediidx ni xhet guliidi. <sup>6</sup> Nuunu najcnu xi'n Dios. Rebejn nani riembee Dios riu xtiidxnu. Rebejn nani di gac xi'n Dios direni jiu xtiidxnu. Scree gacbeenu chu rebejn rni didxliipac. Scree gacbeezanu chu rebejn rni diidx ni xhet guliidi.

*Rinälajz Dios rebejn*

<sup>7</sup> Rniä lo guejbtu nani rinälazä, nanab chanälaaznu resa'nu, renani huililajz xtidx Dios, sa'csi Dios racnä j nuunu te chanälaaznu resa'nu. Palga rinälaaznu resa'nu, dxejc najcnu rexi'n Dios, luxh gulii riembeenu Dios. <sup>8</sup> Palga chutis tejnu di chanälajz resa'ni, dizani gumbee Dios, sa'csi lagajc Dios racnä j chanälaaznu Dios, racnä jzani chanälaaznu resa'nu. <sup>9</sup> Abasule' Dios loonu lacti rinälajzni nuunu. Yu' tejtis Xi'n Dios. Abaxhalni Xi'nni lo guedxliuj te gudijxni rextojlnu lo crujz te si'c guibannäjnnuni par tejpas. <sup>10</sup> Si'c racbeenu rinälajzpac Dios nuunu. Galoo dinu ninälajz Dios. Niluxh Dios huinälajz nuunu, ni'c baxhalni Xi'nni lo guedxliuj te gudijxni xtojlnu lo crujz.

<sup>11</sup> Rniä lo guejbtu nani rinälazä, si'cni rinälajz Dios nuunu, sigajcza rrlajzni chanälaaznu resa'nu. <sup>12</sup> Nicla tej bejn gjajd fii lo Dios. Niluxh palga chanälaaznu resa'nu, Dios nabajn nen lastoonu, dxejc gulii rinälaazpacnu Dios. <sup>13</sup> Nancheenu nabannäjnu Dios, sigajcza nabannäjpac Dios nuunu, sa'csi abaxhalni Sprit Dxan xtenni cuääz nen lastoonu. <sup>14</sup> Narä näjza reapost abahuiinu loj Jesucrist. Caniä lojtu abaxhal Xtadnu Dios Xi'nni lo guedxliuj te guslaani rebejn lo xtojlni. <sup>15</sup> Chutis tejnu ni rnii “Jesucrist najc Xi'n Dios”, nabannäjni Dios, nabannäjza Dios bejn ga.

<sup>16</sup> Racbeenu, rililaazzanu rinälajz Dios nuure. Guliduxh rinälajz Dios nuunu. Palga rinälaaznu Dios, nabannäjnu Dios, nabannäjza Dios nuunu. <sup>17</sup> Naj sanälaaznu Dios si'cni rrlajzni luxh palga chanälaaznuni guidebtis ni guibajnnu, dinu guidxelj che guidzujn dxej ni gun Jesucrist yälguxhtis lo guedxliuj. Dinu guidxelj sa'csi guideb nabajnnu lo guedxliuj, nabannäjnu Dios si'c nabannäj Jesucrist Dios. <sup>18</sup> Palga rinälazsa'cnu Dios, dinu guidxelj, palga rinälajzpacnu di gacdi guidxebnu. Palga guliipacnu rinälaaznu Dios, xhetliidi rdxejbdinu. Nani rdxejb, rdejndi trabajw, gjajd bejn ga chanälazsa'c Dios.

<sup>19</sup> Rinälaaznu Dios sa'csi ganiddoo Dios huinälajz nuunu. <sup>20</sup> Palga chutis tejnu naa “rinälazä Dios” niluxh rdxechlajzni lo resa'nu, xhet guliidi xtiidxni. Palga dinu chanälajz sa'nu nani cahuiinu, xhixh sajch chanälaazzanu Dios nani gjajdnu fii. <sup>21</sup> Agunibee Dios, nani rinälajz Dios chanälajzni resa'ni sigajc rinälajzni Dios.

## 5

*Riennu gaan lo guiraa redo|guijdx lo guedxliuj*

<sup>1</sup> Chutis ni rililajz Jesús najc Crist nani baxhal Dios, ni'c najc Xi'n Dios. Palga rinälaaznu Xtadnu Dios, sigajcza sinälaaznu renani najc Xi'n Dios. <sup>2</sup> Palga rinälaaznu Dios, palga rusoobzanu xtiidxni, dxejc najnnu rinälaaznu resa'nu nani najc Xi'n Dios. <sup>3</sup> Ni'cni, palga rinälaaznu Dios, susoobnu xtiidxni. Luxh dinu guichalo nagajn gusoobnu xtiidxni. <sup>4</sup> Chutis tejnu ni najc xi'n Dios, riennu gaan lo redojl ni re' lo guedxliuj. Riennu gaan lo redojl lo guedxliujre sa'csi huililaaznu xtidx Jesucrist. <sup>5</sup> ¿Chuni'c cayujn gaan lo redojl lo guedxliuj, ä? Renani rililajz najc Jesucrist, Xi'n Dios, reni'c rujn gaan lo redojl lo guedxliujre.

*Rediidx ni baluii Dios loonu xcuent Jesucrist*

<sup>6</sup> Biääd Jesucrist lo guedxliujre. Birobnis Jesucrist, baxhe'zani xtiejn ni lo crujz. Xhet ganaxdi te guirobnisni biäädni, näjza te guxhe'ni xtiejn ni lo crujz che biäädni. Sprit Dxan xten Dios canii rediidxre. Guliipac rextiidxni. <sup>7</sup> Yu' chon ni baluiloj xhaguibaa. Rniireni xcuent Jesucrist tejsi diidx. Tejni najc Dios, steeni najc nani laa Diidx, steeni najc Sprit Dxan xten Dios. <sup>8</sup> Sigajcza yu' chon ni baluiloj lo guedxliuj. Rniireni xcuent Jesucrist tejsi diidx. Tejni najc Sprit Dxan xten Dios. Steeni najc che birobnis Jesucrist, steeni najc che baxhe' Jesucrist xtiejn ni lo crujz che gujtni. <sup>9</sup> Palga rililaaznu xtidx rebejn ni rbäjz lo guedxliuj, nungäj| chalilaazrunu xtidx Dios. Rediidx nani rnii jion reni baluiloj tejsi diidx najcreni con nani rnii Dios xcuent Jesucrist Xi'n Dios. <sup>10</sup> Palga rililaaznu xtidx Jesucrist Xi'n Dios, rnii Dios xcuent Jesucrist nen lastoonu. Chutis tejnu ni di chalilajz xtidx Dios, rujnni najc Dios si'c tej ni rusguee sa'csi dini chalilajz xtidx Dios ni rniiini xcuent Jesucrist. <sup>11</sup> Scree najc rediidx ni rnii Dios. Abaniidx Dios loonu yälnabajn par tejpas. Yälnabajn ga

biädnä Xi'nni, Jesucrist. <sup>12</sup> Palga nabannäjnu Xi'nni, rajpnu yäl<sub>n</sub>abaj<sub>n</sub> par tejpas. Palga dinu guibannäj Xi'nni, dinu ga'p yäl<sub>n</sub>abaj<sub>n</sub> par tejpas.

*Xtixtios con diidx ni ruliidx*

<sup>13</sup> Abacuaä rediidxre lojtu ni rililajz rextidx Jesucrist te gacbeepactu rajptu yäl<sub>n</sub>abaj<sub>n</sub> par tejpas.

<sup>14</sup> Ni'cni dinu guidxejb che guiniinu lo Dios, sa'csi riu Dios xtiidxnu palga tejsi najc xhigabnu con Dios che rniabnu lojni. <sup>15</sup> Luxh palga najnnu riu Dios nuunu che rniinu lojni, sigajcza najnnu suniidxni nani rniabnu lojni.

<sup>16</sup> Palga tejnu fii tej resa'nu cayuj<sub>n</sub> dojl, niluxh riuruni xtidx Dios, nuunu rajpnu por guiniabnu lo Dios xcuent laani, te gudeed Dios yäl<sub>n</sub>abaj<sub>n</sub> lojni. Niluxh yu' te dol<sub>r</sub>oduxh. Chutis te bejn ni gun dojlga, di Dios gudeed lo bejn<sub>ga</sub> yäl<sub>n</sub>abaj<sub>n</sub> par tejpas. Dizana guiniä guiniabtu lo Dios xcuent bejn ni rujn dol<sub>r</sub>oga. <sup>17</sup> Guiraa redzunguijdx nani rujn rebejn najc dojl. Niluxh yu' redojl nani di gun gunij<sub>t</sub> bejn lo Dios par tejpas palga jiu bejn xtidx Dios.

<sup>18</sup> Racbeenu guiraanu nani najc xi'n Dios di rlaaznu jiennu dojl. Racnäj Jesucrist nuunu te di be<sub>n</sub>dxab gun gaan nuunu, te dizanu gusoob xtidx be<sub>n</sub>dxab.

<sup>19</sup> Nancheenu nuure najcnu xi'n Dios, niluxh guiraa rebejn nani riutis rextzun guedxliuj cagusoobreni xtidx be<sub>n</sub>dxab.

<sup>20</sup> Najnnu biääd Jesucrist Xi'n Dios lo guedxliuj. Baluiini nuunu rextidx Dios te jiembeenu Dios, nani najcpac Dios gulii. Nabannäjnu Dios ni najc gulii, sa'csi nabannäjnu Jesucrist. Laani najc Dios ni najc gulii. Caguniidxni loonu yäl<sub>n</sub>abaj<sub>n</sub> par tejpas. <sup>21</sup> Resa'ä, na'c guzuxhijbtu lo rebanäjb ni xhet guliidi. Sugacni si'c.

## Guijtz Ni Rojp Ni Bacuaa Juan

### *Diidx gului nájza yálrinálaaznu resa'nu*

<sup>1</sup> Narä nacä bengool. Cagucuaä guijtzre lojlu nane' nani agule Dios, nájza loj rexi'nlu. Rinälazäpac la'tu luxh xhet xtebädi; nájza guiraa reni rililajz xtidx Dios sanälajztu.

<sup>2</sup> Nuure rinálaaznu la'tu sa'csi yuchee nen lastoonu rediidx nani najc gului, luxh dilajznu jiäl rediidxre. <sup>3</sup> Xtdanu Dios, nájza Jesucrist Xi'nmi, gacnäy nuunu, jiareni nuunu, guscuecdxi lajznu con xcäl'najn didxlii nájza yálrinälajz.

<sup>4</sup> Bibalazduxhä che gubeä yu' rexi'nlu ni ruseob xtidx Dios si'c gunibee Dios loonu gusoobnuni. <sup>5</sup> Nane' ni gule Dios, diidx nani rniabä guseob guejblu naj dini gac didxcoob, niluxh lagajc diidx ni biejn diaagnu galooli, che huililaazlinu xtidx Jesucrist. Lagajc dee najc nani gunibee Dios loonu: nungäjlpac chanálaaznu resa'nu. <sup>6</sup> Sinálaaznu resa'nu palga caguseobnu xtidx Dios. Dee najc xtidx Dios ni biejn diaagnu galooli, che huililaazlinu xtidx Jesucrist: chanálaaznu resa'nu.

### *Rebejn ni rni garenca diidx ni xhet guliidi*

<sup>7</sup> Balti bejn birii loonu, naj cagusgueereni xhidajl bejn ni re' lo guedxliuj. Caniireni di Jesucrist najc niguii che biädni lo guedxliuj. Sa' bejnre najc benrusguee. Sa' bejnre rdxe'chreni loj Jesucrist. <sup>8</sup> Colga'p la'tu te na'c chalilajztu xtiidxreni, didi xlia'si biennu dzuun ro'c, te xca'tu guiraa ni guniidx Dios lojtu.

<sup>9</sup> Chutis bejn ni rlanj gugu'ch xtiidxpacni lo xtidx Jesucrist, di bejnga gumbee Dios. Niluxh chutis bejn ni riu xtidx Jesucrist, rumbeeni Dios, rumbeezani Jesucrist Xi'n Dios.

<sup>10</sup> Palga jiäd te bejn rolijztu ni di chasanäj xtidx Jesucrist, na'c xcäjbtu jiu'ni rolijztu, na'cza guiniitu lojni, "Xchan. Biu'." <sup>11</sup> Sa'csi chutis bejn ni guinii "xchan" loj te bejn ni di chasanäj xtidx Jesucrist, cayacnäzani redzunguijdx ni rujn bejnga.

### *Rudeedni xtixtios*

<sup>12</sup> Xhidalduxhru diidx rlazä guiniä lojtu, niluxh di rlazä gucuaäreni lo guijtz. Cabäzä jiädhuiä lojtu ro'c te guiniä rediidxre lojpactu, te guibaalajztu. <sup>13</sup> Rexi'n bäjllu, nani aguleza Dios, ruxhal xtixtios lojlu. Ni'ctis najc ni rucuaä lojtu. Sugacni si'c.

## Guijtz Ni Riojñ Ni Bacuaa Juan

### *Cagucuaani didxsa'c lo Gayo*

<sup>1</sup> Narä nacä te bengool. Caguxhalä guiijtze lojlu, dad Gayo. Rinälazduxhälu sa'csi huililajzlu rextidx Dios.

<sup>2</sup> Sanälazälu, nanä laaca yu' lastoolu loj Dios. Naj rniabä lo Dios gacnäjni luj, guniidxzani yäl'nadaanlu. <sup>3</sup> Bibalazduxhä che gubi' gaii resa'nu, guniliireni loä xho huililajzlu xtidx Jesucrist, xho basoobzalu xtidx Jesucrist. <sup>4</sup> Xheti stee diidx ni ruspaa lazä si'c rbaa lazä che racbeä rusoob resa'nu redidxlii xten Jesucrist.

<sup>5</sup> Dad Gayo, laaca cayujnlu che racnäjlu renani rililajz xtidx Jesucrist, mase dilu gumbeereni che riädreni lojlu. <sup>6</sup> Aräjpreni lo resa'nu ni rdxagsa' ree xho huinäälajzlureni näjza xho gucnäjlorene. Laaca bejnlu gucnäjlu resa'nu, badeedlu xhi biquinreni lo nejz che biriireni rolizlu. Si'cza nanab jiennu lo guiraa resa'nu, nalajznu rebejn ni ruluii xtidx Dios. <sup>7</sup> Ruluiireni xtidx Jesucrist sa'csi sanälajzreni Jesucrist. Xhet rca'direni lo rebejn ni di chalilajz xtidx Jesucrist. <sup>8</sup> Si'cza nanab gacnäjnu rebejn ni riluii xtidx Jesucrist neñ garen-garen guejdx, te si'c jiennänu xtzuum Dios guiraa renani ruluii xtidx Dios.

### *Di Diótrefes niujn redzunsä'c*

<sup>9</sup> Abaxhalä te guiijtze lo rexpejn Jesucrist ro'c. Niluxh Diótrefes rlanj guinibeeni lo resa'nu ro'c. Dini jiu xtidxä. <sup>10</sup> Ni'cni che guidzunä ro'c, narä siniä rediidxre lo resa'nu ro'c, che guidxaag sa'nu ro'c. Diótrefes rniyaj narä lo resa'nu ro'c. Dizani jiu resa'nu che rdzujnreni ro'c. Dizani gusaan fiitu resa'nu ni riäd ro'c, mase rlanj chu tejtü fiireni. Luxh rlanjni gudxojni guidxagnäjtu rebejn nani ruhuii resa'nu ni ruluii xtidx Jesucrist.

<sup>11</sup> Sa'ä ni rinälazä, na'c gunlu redzunguijdx, bejn redzunsä'c. Nani rujn dzunsä'c ni'c najc Xi'n Dios. Chutis tej ni rujn redzunsä'c najc xpejn Dios. Chutis tej ni rujn redzunguijdx, di ni'c gumbee Dios.

### *Rniireni didxsa'c xcuent Demetrio*

<sup>12</sup> Guiraa rebejn ganax didxsa'c rniireni xcuent Demetrio, luxh huenliisi rusoobni xtidx Jesucrist. Sigajcza narä rniä didxsa'c xcuentni. Najnlu guliipac rediidx ni rniä.

### *Rudeedni xtixtios*

<sup>13</sup> Rlazä guiniä xhidalduxhru diidx lojlu, niluxh di rlazä gucuää rediidxga lo guiijtze. <sup>14</sup> Runä xhigab di gaclaa jädhuiä lojlu, dxejcti jieinu diidx.

<sup>15</sup> Gulecdxi lajzlu. Rexamigwlu ruxhalreni xtixtios lojlu. Badeed xtixtios lo tejga rexamigwä ro'c.



## Guijtz Ni Bacuaa Judas

### *Judas cagucuaa loj renani agule Dios*

<sup>1</sup> Narä nacä Judas, ni rujn xtzuum Jesucrist. Narä nacäza betz Jacob. Cagucuaä guiitzre loj renani agule xadnu Dios, renani sanälazduxhni, nani cayapcheeni par Jesucrist. <sup>2</sup> Rniabä lo Dios, gulaslazduxhruni la'tu, guscuedxiduxhruni lastootu, gacnäjni la'tu, guniidxruni yälsanälajz.

### *Renani rului yälrusguee*

*(2 Pedro 2:1-17)*

<sup>3</sup> Rebetzä nani sanälazä, che cayunduxhä xhigab gucuaä lojtu xcuent yälrusläa lo rextoljnu ni rajpnu, benä xhigab riojbru gucuaä te guiitz lojtu te gulidxätu sudzu'tznu, gapdzu'tztu yälirilajz ni basule'reni par tejpas loj rexpejn Dios. <sup>4</sup> Sa'csi abiuxhiga'tz gaii bejn, renani galooli gunii Dios siädreni, niluxh sinitlojreni. Najcreni bejn ni di chalilajz xtidx Dios, najcreni benguidxduxh, rutzuréreni xcälracnäj Dios, rujnreni xtujy, sanäreni te yälbandxuudx. Rbälazzareni xpaxhuaannu nani rnibee loonu, Dad Jesucrist.

<sup>5</sup> Mase anajntu guira'ti rediidxga tejpas, rlazä gusnä lajztu che gudejd gulää Dad Jesucrist rexpejn Israel lo guedx Egipto, dxejcti bagu'tni renani di nililajz xtiidxni. <sup>6</sup> Rexangl Dios nani di nucuadiajg diidx, ni birii cadro rlazj Dios churen, reni'c basäu Diosreni cadro nacäiboo te cabäzreni gun Dios xcälguhtisni lojreni. <sup>7</sup> Si'c bejnni guedx Sodoma näjza Gomorra näjza reguedxbäz ni tre' gajx ro'c, sa'csi bejnreni dojl, reniguii gyunäjreni niguii biräax, regunaa gyunäjzaren, regunabiräax. Dxejc gudejdreni trabawduxh huejcreni nen guiboo par tejpas xcuent xtojreni, ni'c najc te yälrujidx loonu.

<sup>8</sup> Rebejn ni riu' lojtu naj najc si'c reben galoo ni bejn dojl. Nabajreni si'c ni bisieedreni lo guiraa nani rului yälrnixcal, ruxhinreni tiejxhreni, rbälazreni xcälrnibee Dios, rniyajzaren rexangl Dios. <sup>9</sup> Miguejl ni rnibeeru loj rexangl Dios, che gudildiidxni bendxab yejc tiejxh toMoisés, dini niniyaj bendxab, alga räjpni: “Sugun Dad Jesucrist yälguhtis lojlu.” <sup>10</sup> Niluxh rebejnga rniyajreni nicla ganreni xhini'c rniireni. Niluxh nani racbeepac rebejnga najc yälnajn nani nicla niqiiin nisieedreni, lala sa' nani rujnza reguidxaa, ni xheti xcäriejn, reni'c sujn nitlojreni.

<sup>11</sup> ¡Aii! ¡Riazanuren! Sanajlreni xnezyuj Caín, luxh te gunreni gaan meel ruxhunlireni rujnreni sa' dojl ni bejn Balaam agujc xchero, näjza sa' dojl ni bejn Coré, ni gudilnäj Dios, luxh gunitlojni. <sup>12</sup> Laaren najcreni te xtuiduxh lo rexchej ni rajc guidoo, direni guidxeb gauxchenäjreni la'tu, sa'csi xque'tisreni riuren. Najcreni si'c te xcäy ni xhet nisguij siädnäni, nani sanä bej nezree nezrec; najczaren si'c te yagbigool nani di ninejxh xcaj lojni, tio'p huält agujtreni, najcreni si'c te yajg ni abiliäädx. <sup>13</sup> Laaren najc si'c nis ni räjs lo nisdoo, che cayajc te bidonduxh, sää, siädni, carii xtujyreni si'c räjs nis lo nisdoo. Najcreni si'c bale' ni rtejb xhaguibaa, rijreni lo te yälnacäiduxh ni benchee Dios par tejpas.

<sup>14</sup> Xcuentza redee agunixgaaza Enoc ni najc xagdodoo Adán, räjpni: “Bahui, siädnä Dios xhidalduxh xangl ni <sup>15</sup> te gunni yälguhtis loj guiraa bejn te gusacsiduxhni guiraa rebejn ni di gumbee Dios xcuent redolduxh ni bejnreni, xcuentza redidxnaj ni guniyaj rebendolduxhre Dios.” <sup>16</sup> Rebejnre laa reni rmojm, runduxhreni quej, rujnreni si'ctis ni rlazj tiejxhreni, rniireni guiraloj didxnaj, rniisireni didxsa'c loj rebejn te gun rebejnga si'c ni rlazjreni gunreni.

### *Rulijdxni rebejn nani ahuililajz xtidx Dios*

<sup>17</sup> La'tu, betzä ni sanälazä, riäjil guinaj lajztu rediidx nani gunii reapost xten Dad Jesucrist, <sup>18</sup> sa'csi guniireni lojtu: “Nen redxelult che guibisac Jesucrist, su' bejn ni suxhiznäjreni rextidx Dios, sujnreni si'ctis guisia' lajzreni.” <sup>19</sup> Redee najc renani run rlia'

rexpejn̄ Dios lo sa'reni; rinuuzareni ni yu' lo guedxliuj, diza Xp̄rit Dxan xten Dios cuääz nen̄ lastooreni.

<sup>20</sup> Niluxh la'tu rebetzä nani sanälazä, col̄tioob loj xcäl̄rililajztu ni siäd lo Diostis, col̄nab lo Dios xcuent yäl̄rnibee xten Xp̄rit Dxan xtenni. <sup>21</sup> Col̄guibaj̄ntis lo yäl̄sanälajz xten Dios, col̄sus̄ntis lāl ni cayunlojtu yäl̄rulaslajz xten Dad Jesucrist ni guniidx yäl̄nabaj̄n par tejpas.

<sup>22</sup> Col̄gacnäj renani di chalilazsa'c te chalilajzpacreni xtidx Dios. <sup>23</sup> Col̄yacnäj sgaii te guibicajreni lo dojl, gudobxhajxreni, col̄yejn xhigab lo guiboo cayejcreni. Col̄yacnäj sgaii bejn, col̄gulaslajzreni con yäl̄rdxejb, niluxh col̄natiru te di guntu lagajc dojl̄ ni rujnreni. Gulälaz nani rujnreni, nani ruxhīnreni.

*Redidx lult*

<sup>24</sup> Col̄guiliä'p xpala'n Dios nani racnäj la'tu didi jiajbtu lo dojl, nani rujn saj̄c suutu lo xcäl̄rdimbicha' Dios, nayadujtu, rbaduxh lajztu. <sup>25</sup> Yu' tejtis Dios. Laatisni rajpni yäl̄naj̄n te guslaani nuurnu lo dojl̄ xcuent ni bejn xtadnu Jesucrist. Col̄guiliä'p xpala'nni, rajpni guiralii yäl̄rnibee, yäl̄rdimbicha', galooli, näj̄ naj̄, näjza par tejpas. Sugacni si'c.

## Rediidx Nani Bacuaa Juan Xcuent Recos Ni Churu Gac

*Baluiloj Jesucrist lo Juan*

<sup>1</sup> Dee najc rediidx ni badeed Dios loj Jesucrist te guluilojnini loj rexmosni, xcuent recos nani di gaclaa gac. Jesucrist baxhal xanglni lo Juan, te baluini guiraa recosga lojni.

<sup>2</sup> Ni'cni bacuaa Juan lo guijtze guiraa xtidx Dios nani baluii Jesucrist lojni, xcuent guiraa recos nani bahuilojpacni.

<sup>3</sup> Chicbaa renani roj guijtze xcuent recos ni churu gac, renani riuza rediidxga, renani ruguchee rediidxga nen lastooni sa'csi siäddzungajxh redxj che soob rediidxga.

*Juan cagucuaa guijtza lo gajdz guidoo*

<sup>4</sup> Narä nacä Juan. Cagucuaä guijtze loj guigajdz reguidoo ni tre' lo región Asia. Dios gupalajz la'tu, guscuecdxini lajtzu, lagajc Dios ni sigajc najc nadxj, sigajcza gujcnii nani, sigajcza sajcnii par tejpas. Xca'zatu xcälruspalajz näj xcälrbexilajz guigajdz resprit ni suga' guideb gabi cadro rnibeeni, <sup>5</sup> näj xcälruspalajz, xcälrbexilajz Jesucrist nani gunilii diidx ni badeed Dios lojni, nani ganiddoo gubansac lo rebengut, nani rnibeeza lo guiraa rereii loj guedxliujre. Laani sanälazduxhni nuure, laani rudzucajni xtojlnu con xtiejnni. <sup>6</sup> Laani bejnii gacnu te beņro, te guedxro, gaczanu bixhojz lo Dios Xtadni. Suchä'p xpala'nni, suga'pni yälrbexi par tejpas. Sugacni si'c.

<sup>7</sup> ¡Colgachee! Laani sibisacni lo rexcäy, luxh guiragajc rebejn suhuu lojni, nägajc renani gudzujd cuä' xcustiini. Guiraa rebejn guedxliujre soon xcuentni. Si'cti, sugacni si'c.

<sup>8</sup> —Narä nacä ganid, nacäza lult, si'c najc relectr A con Z —rnii Dad Dios—. Nabanä nadxj, sigajcza gubanä nani, sigajcza sibanä par tejpas, dipacna gacä ste'ca. Rapä yälrbexiduxhru lo chutis.

*Bahuiä loj Jesucrist lo xcälrdimbicha'ni*

<sup>9</sup> Narä, Juan, bejtztu, näjza ni cadednäjtü trabajw xcuent Jesucrist, ni riunäjzatu cadro rnibee Dios, ni rsiudzutznäjzatu lo xtidx Jesucrist, guyu'ä lo yuj nani tre' lo nisdoo, ni laa Patmos. Ro'c baxhalreni narä pres sa'csi basule'ä xtidx Dios näjza diidx xcuent ni bejn Jesucrist lo guedxliujre. <sup>10</sup> Te dumingw, laj ni cayunää Dios, guzacä astoo canixcalä, dina niacbeä caro yu'ä, dxejcti nez detzä biejn diagä xse' te ni gunii dipduxh, astoo te trompet, <sup>11</sup> najni loä:

—Narä nacä ganiddoo, nacäza lult. Lo te guitzro bacuaa nani fiilu, dxejcti baxhal guijtza loj guigajdz guidoo ni yu' nez Asia, nen reguejdxre: Éfeso, Esmirna, Pérgamo, Tiatira, Sardis, Filadelfia, näjza Laodicea.

<sup>12</sup> Dxejc gubireä te bahuiä chuni'c canii loä. Che gubireä bahuiä lo gajdz gandilier oor. <sup>13</sup> Galäii guigajdz recandilieerga, suga' te ni najc Xi'n Dios nani gujc Xi'n Niguui, najcwni te lajd ni rdzujn lo ni'lini, lastoozani naliib te cinturon gulajg ni najc ganaxduj oor. <sup>14</sup> Yejcni näjza xquidxejcnii najczareni nolbäj si'c xquichlajd xiil, nolbäj si'c yejg. Dxejcru rbebajl lojni. <sup>15</sup> Ni'ni rdimbicha' si'c guiib ni laa bronz che cayejcni lo guiboo. Xse'ni riejn nadipduxh astoo che riäjt nisro nen regueuu. <sup>16</sup> Ladbee ca' naani gajdz balxhaguibaa; ro'ni rii te espaad ni guiro'p laad caj ro'ni; dxejctiru lojni rujn si'c rujn loj gubijdx che cagusanijni guideb lagaa.

<sup>17</sup> Che bahuiä lojni, biabrloä nez lojni si'c te bengut. Dxejcti batzuubni naani xladbeeni yecä, dxejc guniini loä, najni:

—Na'c guidxejblu, narä nacä ni gubajn galooli, narä nacäza ni guibajn lult. <sup>18</sup> Narä nacä ni nabajnpac; gutä, niluxh naj nabanä par tejpas. Rapä yälrbexi lo yälgujt näjza lo gabijl. <sup>19</sup> Ni'cni bacuaa recos ni abahuilu, nani cayajc naj, näjza nani churu gac.

<sup>20</sup> Dee najc laa yälxhiga'tz xten regajdz balxhaguibaa ni bahuiilu lo naä ladbee näjza

regajdz gandilier oor: guigajdz balguibaa sälojni xangl Dios xten reguidoo. Dxejc gajdz gandilieerga sälojni guigajdz reguidooga.

## 2

*Rediidx nani chää loj rexpejn* guidoo Éfeso

<sup>1</sup> Dxejcti najni loä:

—Bacuaa rediidxre lo xangl Dios xten guidoo Éfeso: “Nani ca' guigajdz balxhaguibaa naani ladbee, näjza nani rsiaj galäii guigajdz gandilier oor, rnii rediidxre lojtu: <sup>2</sup> Narä numbeä xhi redzuun rujntu, xhi trabajw rdejdu rujntu dzuunga, näjza xho rsiudzu'tztu. Dizatu guchagsa'tu benlatsiaj; näjza bala'tztu xho rujn rebejn nani rniireni najcreni apost ni rnii xtidx Dios, luxh direni gac, luxh la'tu gucbegajctu cagusgueereni bejn. <sup>3</sup> Rsiudzu'tztu, rujntu huant xcuent xtidxä, gajdte guidxajg. <sup>4</sup> Empac yu' te quej ni rbe'cä xcuenttu: dirutu chanälajz narä si'cni huinälajz narä ganiddoo. <sup>5</sup> Ni'cni colguzaa lajzto caro banijttu, colgusiejch lajzto, colyejn lagajc redzuun ni bejntu galoo che guslojtu huililajzto xtidxä. Palga ditu gusiechlajzto, sudzucaä xcandilieertu cadre suga'ni. <sup>6</sup> Laaca rujntu rbälaztu xtzuum rebejn ni laa nicolaítas, sa'csi näjza narä rbixlazä xtzuumreni. <sup>7</sup> Nani yu' diajgni te cuadiajgni diidx, sucuadiajgni diidx ni rnii Sprit Dxan xten Dios loj reguidoo: loj renani gun gaan lo dojl, gudedä gauni ninejxh ni rcaj lo yajg yäl nabajn, ni yu' xhaguibaa cadre yu' Dios.”

*Rediidx ni rniini loj rexpejn* guidoo ni yu' Esmirna

<sup>8</sup> Dxejcti najni loä:

—Bacuaa rediidxre lo xangl Dios xten guidoo ni yu' Esmirna: “Nani najc ganiddoo, nani najcza lult, nani agujt, dxejctiru gubansacni par tejpas, rnii diidxre lojtu: <sup>9</sup> Narä nanä xho cadejdlu trabajw, nanäza guxilii rajplu, niluxh nez loj Dios yu' xhidajl xhixtenlu. Nanäza yu'reni rniyajlu. Reni rniyajlu rniireni najcreni rexpejn Israel, luxh direni gac. Najcreni xpejn xquidobäz bendxab. <sup>10</sup> Na'c guidxejblu trabajw nani agojl tedlu. Aree bendxab gusal gai sa'tu nen latzguuib, te gacbeeni don la guliitu ahuililajzto xtidx Dios, te tedzatu trabajw tzuu dxej. Colgutip lajzto mase guettu, dxejcti narä gunidxä te coron xten yäl nabajn. <sup>11</sup> Nani rlajz cuadiajg diidx sucuadiajgni diidx ni rnii Sprit Dxan xten Dios loj reguidoo: nani gun gaan lo dojl, xhet gundi yälgujt ni rojppa lojni.”

*Rediidx ni rniini lo rexpejn* guidoo ni yu' Pérgamo

<sup>12</sup> Dxejcti najni loä:

—Bacuaa rediidxre lo xangl Dios xten guidoo ni yu' Pérgamo: “Nani ca' spaad ni caduxh ro'ni guiro'p laad rnii rediidxre lojtu: <sup>13</sup> Narä nanä caro rbäjzto, rbäjzto lo guejdx cadre rnibee Bendxab. Rsiudzu'tztu xcuent xtidxä. Laltis rsiudzu'tztu rililajzto xtidxä, mase nen redxej cheni bagu'treni Antipas, ni gunii diidx xcuenta, nani gusudzutpac nez loä, nani bagu'treni nen guejdx cadre rnibee Bendxab. <sup>14</sup> Niluxh yu' tiop-chon xtojltu. Lojtu nadxaag gaii bejn ni rujn si'c bejn toBalaam agujc xchero. Laani baseedni Balac xho gunni te jiajb rexpejn Israel nen dojl, baseednireni gaureni recos ni gurej lo dxan nez loj rebanäjb, baseedzani rexpejn Israel guesnäjreni chutis gunaa. <sup>15</sup> Sigajcza nadxaag lojtu gaii bejn ni riu rediidx ni rusule' reni laa nicolaítas. <sup>16</sup> Colgusiechxgaa lajzto, te di jialgacä lojtu te gucuanääreni spaad ni yu' ro'ä. <sup>17</sup> Nani rlajz cuadiajg diidx, sucuadiajgni diidx ni rnii Sprit Dxan xten Dios loj reguidoo: renani gun gaan lo dojl, lojni gudedä yätxtiil ni laa mana ni yuchee-xhiga'tz. Sudedäza lojni te guibäz ni najc nol, lojni caj te lajni ni nacoob, nani rutru racbeedi, xtebtis nani xca'ni.”

*Rediidx nani rniini lo rexpejn* guidoo ni yu' Tiatira

<sup>18</sup> Dxejcti najni loä:

—Bacuaa rediidxre lo xangl Dios xten guidoo ni yu' Tiatira: “Xi'n Dios nani rbebajl balojni, ni rdimbicha' ni'ni si'c bronz, ni'c rnii rediidxre lojtu: <sup>19</sup> Ananä xtzuumtu,

sanälajztu sa'tu, nanä xho rililajztu xtidxä, xho racnäjtu resa'tu, näjza xho rsiudzu'tztu, runduxhtu huant. Nanäza cayujntu dzunroru naj loj ni bejntu che guslojtu. <sup>20</sup> Niluxh yu' xhicuent rdxe'chä lojtu. Rcäjbtu riu'tu loj te gunaa ni laa Jezabel. Laani rniisini najcni te profe't, gunaa ni rni xtidx Dios, rusgueetisni bejn. Luxh xcäl'ruseedni cagusgueeni rexpənä nani ahuililajz xtidxä, te naj rujnreni cosguijdx, si'c yälresnäjä ni di gac chäälni, rajwzarenani nani gurej lo dxan xten rebanäjb. <sup>21</sup> Aguläzä xchej te gusiechlajzni, gusaanni gunni dojl, luxh naaddini gusiechlajzni xcuent redzunguijdx ni rujnni. <sup>22</sup> Luxh palga laani dini gusaan gunni redzuun nani rujnni, narä siguixäni, gudedä te yälracxhuro. Luxh sutedä trabajwduxh guiraa renani bennäjni dzunguijdx palga direni gusiejch lajzreni, palga direni guchaa xmoodreni. <sup>23</sup> Sugutxhiä, sunitloä rexi'n gunaaga, te si'c gacbee guiraa rebejn ni yu' neñ reguidoo narä nacä ni rula'tz rexhigab ni yu' xcäriejnreni, näjza yäl'rilihajz ni yu' neñ lastooreni. Te gacbeezarenani narä sunidxä lo tejgatu ni riäj l xca'tu xcuent redzuun ni rujntu. <sup>24</sup> Dxejc loj guiraa reni yu' lo guedx Tiatira, la'tu ni di guirinajl xnezyuj Jezabel, la'tu ni di gumbee nani rniireni najc recosduxh xten beñdxab, xhetru rniädi lojtu, dirunä gutalä xtzuuuntu. <sup>25</sup> Colyapdzu'tz rextidxä nani arajptu dxejli ni guibisacä lojtu. <sup>26</sup> Nani gun gaan lo dojl, näjza nani cagusoob xtidxä dxe lultli, lojni sutedä yälrnibee te guinibeeni renacion. <sup>27</sup> Si'cni baniidx Xtädi yälrnibee loä, sutedä yälrnibee lojni, te guinibeeni guiraa reben guedxliuj, gunnäjni yäl'guxhtis lojreni te barguiib si'c rujn ni runchee guesbajñ, rlia'ni guiraa regues nani xhet sajcdi. <sup>28</sup> Sunidxäza bale' xhaguibaa ni rii rsildoo (ni säloj guibanäjnu Dios). <sup>29</sup> Nani rlajz cuadiajg sucuadiajgni diidx ni rni Sprit Dxan xten Dios loj reguidoo.”

### 3

*Rediidx nani rniini lo rexpeljñ* guidoo ni yu' Sardis

<sup>1</sup> Dxejcti najni loä:

—Bacuaa rediidxre lo xangl Dios xten guidoo ni yu' Sardis: “Si'c naj nani rajp guigajdz Sprit xten Dios näj guigajdz rebal xhaguibaa: Narä nanä guiraa redzuun nani rujntu, rni rebejn nabajntu, niluxh narä nanä ascanu agujttu, dirutu gun xtzunä. <sup>2</sup> Colguibajñ, colgula'tzru nani rapsijctu xcuent rextidxä nani ameer nitloj neñ lastootu. Narä ruhüiä ditu niunsa'c dzuun xtenä nez loj Dios. <sup>3</sup> Colgusnaj lajztu rediidx ni basule'reni lojtu, nani abacuadiajgtu, colgusoob rediidxga, colgusiech lajztu. Palga ditu guibajñ, palga ditu guchaa xmoodtu, sidzunä nez lojtu si'c te gubaan, nicla gaantu cor guidzunä lojtu. <sup>4</sup> Niluxh yu' gaisi bejn lo guedx Sardis nani naya, nani gajdreni gun dojl. Sajcwreni ladnolbäj te sanäreni narä xhaguibaa, sa'csi laareni säbyäjlneni. <sup>5</sup> Nani gun gaan lo dojl, ni'c sajc gacwni ladnol, luxh dizana guche'nä lajni loj xlibr cadre caj laj renani sibajñnäjä Dios par tejpas. Sicäpäza nez loj Xtädi näjza nez loj guiraa rexquixhajgni, bejnga najc rexpənä. <sup>6</sup> Nani rlajz cuadiajg diidx, sucuadiajgni diidx ni rni Sprit Dxan xten Dios loj reguidoo.”

*Rediidx nani rniini lo rexpeljñ* guidoo ni yu' Filadelfia

<sup>7</sup> Dxejcti najni loä:

—Bacuaa rediidxre lo xangl Dios xten guidoo yu' Filadelfia: “Nani najc dxan, nani najc guliipac, nani rajp xliäi toDavid (ni säloj guiragajc yälrnibee), nani che ruxhalni, rut rusäuudi, nani che rusäuuni, rut ruxhaldi, laani rniini diidxre lojtu: <sup>8</sup> Narä nanä xhini'c rujntu. Si'c te puert ni naxhal, ni rut rusäudi, si'cza sunidxä yälrnibee lojtu te gusule'tu xtidxä, rutliidi sajc gusäuu ro'tu. Mase guxii nadip-nadaantu, atu canii xtidxä, ditu cuatzlajz xtidxä. <sup>9</sup> Suhuiitu xho gunä rebejn ni yu' lo guidobäz xten beñdxab. Rniisireni najcreni xpejn Israel, luxh direni gac; rusgueereni bejn. Narä sunäpac jädzuxhijbreni nez lojtu, sunäza gacbeepacreni sanälazduxhä la'tu. <sup>10</sup> Sa'csi basoobtu xtidxä ni gunibea sutijptu, na'c jieedtu, ni'cni narä sacnäázatu che guidzujñ dxej tedtu trabajw. Luxh orga ameer guidzujñ lo guideb guedxliuj, luxh sidejd guiraa reben guedxliuj trabajw, te guibee

rebensa'c lo reben guedxliuj. <sup>11</sup> Narä di gaclaa jäälä; gopdzu'tz ni rajptu, te rut gudzucajdi ni gunidxä xca'tu. <sup>12</sup> Nani gun gaan lo dojl, narä gunäni si'c te pilajr nen xquidoo Xtioozä, nalajznu, sajcnj te bejn nani gac guinibee cadro yu' Dios. Sibajnni ro'c par tejpas, diruni guirii ro'c. Lojni gucuää laj Dios näjza laj guejdx xten Dios ni najc Jerusaléncoob, nani guirii xhaguibaa cadro yu' Dios; lojni sucuaäza laä ni najcza nacoob sa'csi najcni xpenä. <sup>13</sup> Nani rlajz cuadiajg diidx, sucuadiajgni ni rnii Sprit Dxan xten Dios loj reguidoo.”

*Rediidx nani rniini lo rexpejn* guidoo ni yu' Laodicea

<sup>14</sup> Dxejcti najni loä:

—Bacuaa rediidxre lo xangl Dios xten guidoo ni yu' Laodicea: “Nani laa Amén (ni säloj sugacni si'c), nani najc testiigw ni rniliipac, ni di cuääz guiniini didxliiga, nani guläxteij guedxliujre näj guiralii ni benchee Dios, laani rniini scree: <sup>15</sup> Nanä redzuun ni cayujntu. Ditu sasa'c lo xnezyuä, dizatu cuälaz xnezyuä. ¡Maläii guntu tejni o steeni! <sup>16</sup> Ni'cni, sa'csi najctu si'c nistiib, ditu gac si'c nisnajl, niclaza gactu si'c nislää, sibäro'ä la'tu. <sup>17</sup> Sa'csi rniilu: Ri'cw narä, rapä xhidalduxh xhixtenä, xhet rquinädi. Luxh dilu gan xhet rajpdilu, alga najclu ben gubijn, te ben probduxhlu, di lojlu jien, luxh suga'lu xhabäälü nez lo Dios. <sup>18</sup> Ni'cni rulidxälu siilu loä oor xtenä nani agudejd lo guiboo te gaclu ri'cw; gusii loä ladnol gacwlu, te di guitujylu suulu xhabäälü; gusiiza unguent loä te chää balojlu, te jien lojlu. <sup>19</sup> Rebejn nani sanälazä, reni'c rulidxä, runäza riareni che et laadi rujnreni. Ni'cni colsäblajz; colgusiejch lajztu. <sup>20</sup> Colhuii, ana suga'ä roxlä' lastootu, cagusezä, cabedxa'ä. Palga yu' chu tejtu ni jiejn diajgni xse'ä, guxhalni xpuert lastooni, siu'ä lastooni, te gacnääni, te guibansa'czani nez loä. <sup>21</sup> Loj nani gun gaan lo dojl, lojni gudedä guinibenäjni narä xhaguibaa, sa'csi näj narä abenä gaan lo dojl, ni'cni gurenää Xtadä cadro rnibeeni xhaguibaa. <sup>22</sup> Nani rlajz cuadiajg diidx, sucuadiajgni diidx ni rnii Sprit Dxan xten Dios loj reguidoo.”

## 4

*Calä'preni xpala'n Dios xhaguibaa*

<sup>1</sup> Che gulujx bacuaä rediidxga, guläsä loä, bahuiä astoo naxhal ro puert xhaguibaa. Dxejcro gunii xse' nani biejn diagä ganiddoo, nani riejn si'c xse' te trompet, najni loä:

—Huä'p, gudaä ree, te guluiä lojlu recos ni churu gac che luux gac recosre.

<sup>2</sup> Lagajc dxejc astoocanu si'cni huij sprit xtenä xhaguibaa. Ro'c bahuiä te yagxhilro cadro rbej nani rnibee xhaguibaa, luxh ro'c sobga' nani rnibeeni. <sup>3</sup> Nani sobga' lo yagxhilga, rienni si'c te guisa'c ni rbebalsejs, si'c reguisa'c ni laa jaspe, näj cornalina. Guideb gabi yagxhil cadro rnibeeni dejd te xquitgubijdx ni rbebalsejs si'c guisa'c ni laa esmeralda. <sup>4</sup> Guideb gabi cadro rnibeeni suga' sgalbitajp yagxhil, loj reyagxhilga sobga' galbitajp rebengool, najcwreni ladnol, yu' coron oor yejc tejegareni. <sup>5</sup> Nez lo yagxhilro cadro rnibeeni rii reyälrdinya' näjza guzii. Nez loj cadro rnibeeni cayalguij gajdz bajl ni najc gajdz Sprit Dxan xten Dios. <sup>6</sup> Nez loj cadro rnibeeni yu' astoocanu te nisdoo ni rien si'c te guiuanro, rdimbichasejsni.

Galäii yagxhilroga näjza guideb gabini suga' tajp man, guideb nez lojreni näjza nez dejtreni yu' balojni. <sup>7</sup> Manganidga najc si'c te lion; man ni rojpga najc si'c te gonbäz; man ni riojnga rujn lojni si'c rujn loj te niguii; man ni rdajpga najcni si'c te bisiro cagutajt xhaguibaa. <sup>8</sup> Niluxh guidap remanga tejegareni yu' xho'p xhigareni, guideb gabireni, näj nez nenreni liguidxa balojreni, niluxh direni gusilajz, dxej-yääl caniiireni:

Dxan, dxan, dxan najc Dad Dios ni rajp yälrnibeduxh, nani yu' galooli, nani yu' naj, nani churu jääd.

<sup>9</sup> Guidap remanga rliä'preni xpala'n Dios, rusuxhijbreni rajnrenini, rdeedzarenj xquixtios loj nani rnibee par tejpas. <sup>10</sup> Dxejc guigalbitap rebengool, suzuxhijbzarenj loj nani rbej lo yagxhilro, te ganreni nani nabajn par tejpas. Sucuaarenj xcoronreni nez loj xyagxhilroni, siniireni lojni, säjpreni:



<sup>11</sup> Dad Dios baxhuaannu, Guejbpac lu riäj̄l xca' guiraa rebala'n, guiraa reyälruzuxhijb, guiraa reyälrnibee, sa'csi Guejblu guläxtiej guira'ti nani yu' naj, yu'reni sa'csi rlaiz Guejblu chureni, ni'cni benchee Guejblu guiraareni.

## 5

*Te guijtz näj te ni najc Xiil xten Dios*

<sup>1</sup> Dxejcru narä Juan bahuiä lo nani sobga' lo yagxhilroga. Naani ladbee ca'ni te libr, najcni si'c te bilu guijtz. Caj diidx nez lojni caj diidx nez dejtzn, nadxe'ni, caj gajdz seii lojni. <sup>2</sup> Dxejcti bahuiä lo te xangl Dios ni nadipduxh, dip guniini, najni:

—¿Chuni'c riäj̄l guxhal guijtzre? ¿Chuni'c riäj̄l gutiäjs reseire?

<sup>3</sup> Niluxh nicla tej bejn di nidxäj̄l ni riäj̄l gutiäjs reseiiga te guxhalni guijtzga; nicla xhaguibaa, nicla lo guedxliujre, nicla xhajiät nez nen guedxliuj. Niclaza nidxäj̄l chu niajc nuhii lo guijtzga. <sup>4</sup> Narä ronduxhä sa'csi nicla tej rut riäj̄l di gutiäjs reseiiga, niclaza ni riäj̄l goł guijtzga, niclaza ni riäj̄l fiitis lo guijtzga. <sup>5</sup> Dxejcti gunii te bengool loä, najni:

—Na'cru goonlu. Bahui gan, niguii ni rniireni Lion, xagdoo toJudá, xagdoo toDavid, abejni gan lo yälgujt ni'c naj riäj̄l guxhalni guijtzga, gutiäjszani guigajdz reseiiga.

<sup>6</sup> Dxejc bahuiä nez cadro suga' yagxhilroga näj guidap remanga, näj cadro suga' guiraa rebengool luxh te galäiiga suga' tej ni najc Xiil xten Dios, astoo abagu'trenini. Sojb gajdz xca'chni näjza gajdz balojni, ni najc gajdz Sprit xten Dios nani ruxhalni guiraa nez lo guedxliuj. <sup>7</sup> Laani gubigni, cua'ni guijtzga, guläänini naa ladbee xten nani sobga' lo yagxhilroga canibee. <sup>8</sup> Che cua'ni guijtzga, guidap remanga näjza guigalbitap rebengool bazuxhijbreni nez loj Xiilga. Tejga rebengoolga ca' te arp, ca'zareni taz oor guidxa te ni najc si'c yaal. Yaalga najc guiraa reyälrbejdx, yälrniab xten rexpejn Dios. <sup>9</sup> Cayolzareni te dicoob ni najc scree:

Guejblu sacduxh,  
riäj̄lpac xca' Guejblu guijtzga,  
gutiäjs Guejblu reseiiga, sa'csi bagu't rebejnlu,  
näjza xtiejnlu gudijx xcuent bejn lo Dios.  
Gudijxlu xcuent bejn ni najc garen-garen raz,  
ni rnii garen-garen didxsaj,  
ni siäd garen-garen guejdx lo garen-garen ladxbejn.

<sup>10</sup> Badeedlu gacreni reii näjza bixhojz lo Dios.

Laareni sinibeereni reben guedxliuj.

<sup>11</sup> Che bahuiä, biejn diagä xse' xhidalduxh xangl Dios ni suga' guideb gabi yagxhilro cadro rbej nani rnibee, näjza xse' guidap reman, näjza xse' guiraa rebengool. Luxh di gacdi guigab xangl Dios ni tre' ro'c sa'csi xhidalduxhtej najcreni, xhidalduxh miyon najcreni. <sup>12</sup> Dipduxh najc xse'reni, caniireni scree:

Sacduxh Xiil nani bagu'treni,  
ni'c riäj̄l xca'ni yälrnibeduxh, yälrapduxh, yälmanduxh, yälmilagwr.

Riäj̄lza guiliä'pnu xpala'nni, guzuxhijbnu lojni gannuni, gudeednu xquixtios lojni.

<sup>13</sup> Dxejcti biejn diagä xse' guiragajcreni, guiraa reni benchee Dios ni yu' xhaguibaa, näj guiraa reni yu' loj guedxliujre, näjza guiraa reni yu' xhajiät nez nen guedxliuj näj lo nisdoo, biejn diagä caniireni scree:

Loj nani sobga' lo yagxhilro cadro rnibeeni,  
näjza loj ni najc Xiil xten Dios, laatisni sacduxhni,  
guiliä'pnu xpala'nni, guzuxhijbnu nez lojni gannuni,  
gäbzanu rinibeeni par tejpas.

<sup>14</sup> Dxejcti guidap remanga rnigajcreni scree:

—Sugacni si'c.

Dxejcti guigalbitap rebengool bazuxhijbreni nez loj nani nabajn par tejpas, gojnrenini.

## 6

*Guigajdz reseii*

<sup>1</sup> Dxejcti bahuiä loj ni najc Xiil xten Dios. Batiäjsni tej seiiga. Biejn diagä gunii tej lo guidap remanga, luxh che guniini riejn xse'ni si'c che ni canii guzii, najni loä:

—Gudaa te fiilu.

<sup>2</sup> Dxejc bahuiä lo te cabai nol. Nani bijb dejtzni ca' te arcw nani rucuaa fle'ch. Badeedreni te coron lojni. Biriini cayujnni gaan te chanuutis gunni gaan.

<sup>3</sup> Che batiäjsni ni rojp seiiga, biejn diagä gunii ni rojp manga, najni loä:

—Gudaa te fiilu.

<sup>4</sup> Dxejc bahuiä lo te cabai xniaa. Loj nani bijb cabai xniaaga badeedreni yälrnibee gudzucajni yälñadoo, yälrbexilajz, lo guedxliujre, te ju't sa' rebejn. Badeedreni te spadro cua'ni.

<sup>5</sup> Dxejcti che batiäjsni ni riojn seiiga, biejn diagä gunii ni riojn manga, najni loä:

—Gudaa te fiilu.

Dxejc bahuiä lo te cabai yas. Nani bijbni naazni te balans. <sup>6</sup> Biejn diagä astoo galäii guidap remanga, birii xse' te ni canii scree:

—Tej kil xob xca'lu gunlu dzuun tebdxej; choñ kil salbaad xca'lu gunlu dzuun tebdxej. Niluxh na'c guhuañllu bin niclaza se't.

<sup>7</sup> Dxejcti che batiäjsni ni rdap seiiga, biejn diagä gunii ni rdajp manga, najni loä:

—Gudaa te fiilu.

<sup>8</sup> Dxejc bahuiä lo te cabai gojtz. Nani bijbni laa yälgujt, luxh dejtzni siädnaalgajc ni rnibee gabijl. Gula'ni rebejn ni re' lo guedxliujre gujcreni tajp gala', dxejc loj redee badeedreni guinibeereni lo te cuaa rebenguedxliuj te ju'treni rebejnnga con spaad, näj yälrliaan, näj yälracxhuu, näjza remanduxh ni yu' dajn.

<sup>9</sup> Dxejcti che batiäjsni ni rajc gaii seiiga, bahuiä nez ni' xpiändxan Dios, ro'c naga' xaim rebejn nani bagu'treni sa'csi huililajzreni xtidx Dios, näjza sa'csi gusutijpreni basule'reni xtidx Dios. <sup>10</sup> Dipduxh caniireni, canabreni lo Dios, räjpreni:

—Dad, ni najc Dxan, ni najc guliipac. ¿Gucli cuääz, gaclaa gun Guejblu yälguxhtis loj reni bagu't nuure lo guedxliuj te quiixreni ni bejnreni?

<sup>11</sup> Dxejcti cua'reni te ladnolbäj gojt tejgareni. Dxejc räjpreni lojreni cuäzsijcreni, gusilajzreni, lañ ni guiza' resa'reni ni rusule' xtidx Dios, ni churu gugu'treni sigajc bagu'treni laareni.

<sup>12</sup> Bahuiäza cheni batiäjsni ni rajc xho'p seiiga, luxh gujc te xuduxh, bigasboo loj gubijdx si'c te ladyas, sas bäii gujc guidebni si'c rejn. <sup>13</sup> Rebajl ni yu' xhaguibaa bitejbreni lo guedxliujre, si'c rtejb rebetz yagxhejn che rusniib te beduxh yajgga. <sup>14</sup> Dxejcti gunitloj guibaa si'cni rnitloj te guijtz che re'ni, rajcni te bilu. Guiraa redajn näjza reyuj ni re' galäii lo nisdoo biniibreni, bidxaa xladreni. <sup>15</sup> Ni'cni guiraa reben guedxliuj, rebejn nani rnibee, näjza rebenro, näjza recapitan, näjza reben rapduxh, näjza reben ni nadiplajzreni, näjza remos, näjza renani rut lojdi yu'reni, guiragajcreni baxunreni, huicuatzojreni nen rebiliää nen redajn. <sup>16</sup> Dxejc räjpreni loj redajn, loj reguilaj:

—Colguitejb yejcnu, colgucua'tz nuure loj nani rbej lo yagxhilro xhaguibaa näjza loj yälguxhtis xten nani najc Xiil xten Dios. <sup>17</sup> Sa'csi abidzujñ dxero xten xcälguxhtisni, ¿chuni'c sajc suu nez lojni?

## 7

*Tegayuu tiubitajp miñ rexpejn Israel*

<sup>1</sup> Dxejcti bahuiä lo tajp xangl Dios ni suga' loj guidajp laad guedxliuj. Caguscuääzreni guidajp rebej xten guedxliuj te xhet bejdi guibi' lo guedxliuj nicla lo nisdoo niclaza yej reyajg. <sup>2</sup> Bahuiä lo stee xangl Dios, ni siäd nez cadre rliejn gubijdx, ca'ni sei xten Gueb Dios ni nabajn par tejpas. Dipduxh guniini lo guidap xangl Dios ni rajp yälrnibee te gunreni daan lo guedxliuj, näjza lo nisdoo. <sup>3</sup> Räjpni lojreni:

—Guläzsijctero, la<sub>l</sub> ni guicuaanu te seen lo cuaj reni najc xpejn<sub>l</sub> Dios, te dxej<sub>l</sub>cru sajc guntu daan lo yuj, näj loj nisdoo, näj loj reyajg.

<sup>4</sup> Dxejcti biejn diagä najreni bal bejn<sub>l</sub> guyu' seenga lo cuajreni, basa'reni tegayuu tiubitajp mi<sub>l</sub> bejn<sub>l</sub> ni bibee loj rexpejn<sub>l</sub> Israel. <sup>5</sup> Loj rexpejn<sub>l</sub> Judá bibee tzubitio'p mi<sub>l</sub>; loj rexpejn<sub>l</sub> Rubén bibee tzubitio'p mi<sub>l</sub>; loj rexpejn<sub>l</sub> Gad bibee tzubitio'p mi<sub>l</sub>; <sup>6</sup> loj rexpejn<sub>l</sub> Aser bibee tzubitio'p mi<sub>l</sub>; loj rexpejn<sub>l</sub> Neftalí bibee tzubitio'p mi<sub>l</sub>; loj rexpejn<sub>l</sub> Manasés bibee tzubitio'p mi<sub>l</sub>; <sup>7</sup> loj rexpejn<sub>l</sub> Simeón bibee tzubitio'p mi<sub>l</sub>; loj rexpejn<sub>l</sub> Leví bibee tzubitio'p mi<sub>l</sub>; loj rexpejn<sub>l</sub> Isacar bibee tzubitio'p mi<sub>l</sub>; <sup>8</sup> loj rexpejn<sub>l</sub> Zabulón bibee tzubitio'p mi<sub>l</sub>; loj rexpejn<sub>l</sub> José bibee tzubitio'p mi<sub>l</sub>; loj rexpejn<sub>l</sub> Benjamín bibee tzubitio'p mi<sub>l</sub>.

*Benguixhuj ni najcw ladnolbäj*

<sup>9</sup> Dxejcti bahuiä lo xhidalduxh bejn<sub>l</sub>, benguixhuj, nicla tej bejn<sub>l</sub> digacdi gulabreni. Garen-garen ladx-bejn<sub>l</sub> siäädreni, garen-garen najc lajdxreni, näj raz xtenreni, näj xtiidreni. Suga'reni nez loj yagxhilro xten ni rnibee, näjza nez lojni ni najc Xiil xten Dios. Najcwreni ladnolbäj, ca'zaren<sub>l</sub> zijn<sub>l</sub>. <sup>10</sup> Dipduxh rniireni, räjpreni: Dios ni rnibee lo yagxhilro, näjza nani najc Xiilre, baslaareni nuure lo xtoj<sub>l</sub>nu.

<sup>11</sup> Suga'za guiraa rexangl Dios guideb gabi yagxhilro cadre rnibeeni, näjza guideb gabi rebengool näjza guidap remanga, dxejcti bazuxhijbreni, basajbreni lojreni nez lo Dios, <sup>12</sup> räjpreni:

Sugacni si'c. Loj Xtiostisnu colye'tz sacduxhni;  
colguiliä'p xpala'n<sub>l</sub>ni;  
laatisni rajpni yäl<sub>l</sub>najn;  
lojtisni colgudeed xquixhtios, laatisni colgan,  
col<sub>l</sub>suxhijb lojni; laatisni rajpni yäl<sub>l</sub>rnibee näjza yäl<sub>l</sub>milagwr.  
Sugacni si'c par tejpas.

<sup>13</sup> Dxejc gunii te bengool loä, najni:

—Renani najcw reladnolbäjre, ¿chu najcreni? ¿Casiäädreni?

<sup>14</sup> Dxejcti räpä lojni:

—Dad, anajn Guejblu.

Dxejc najni loä:

—Redee najc renani agudejd yäl<sub>l</sub>trabajwduxh, renani abia rextoj<sub>l</sub>reni sa'csi xtiejn Xiil xten Dios agudijx xtoj<sub>l</sub>reni. <sup>15</sup> Ni'cni suga'reni nez loj yagxhilro xten Dios dxej-yääl cayujnreni xtuunni ne<sub>l</sub>n xquidooni. Ni'cni sacnä<sub>l</sub>j nani sobga' lo yagxhilroga guiraa renani suga' nez lojni, sunäjtisni laareni. <sup>16</sup> Dirureni guiliaan, niclaza jioj<sub>l</sub>reni, diza gubijdx guze'c lojreni, dizareni gacnanlaa. <sup>17</sup> Sa'csi nani najc Xiil xten Dios ni sobga' galäi loj yagxhilro xten Dios, laani cayajpnireni si'c xilbäz, sinänireni cadre yu' nisyä ni ruedeed yäl<sub>l</sub>nabajn par tejpas. Suspijdz Dios nisbee balojreni, dirureni goon par tejpas.

## 8

*Ni rajc gajdz seiiga*

<sup>1</sup> Che batiäjsni ni rajc gajdz seiiga, gucdxi xhaguibaa si'cti med or. <sup>2</sup> Dxejcti bahuiä loj guigajdz xangl Dios ni suga' nez loj Dios. Lojreni badeedreni gajdz trompe't. <sup>3</sup> Dxejctiru biääd stee angl, ca'ni te bacue ni najc ganax oor, bazujnini nez loj piändxan. Badeedreni lojni naclejn yaal te cachaagnini loj guiraa rextidx xpejn<sub>l</sub> Dios ni rniireni che rbedx-rniabreni lo Dios, te checni lo piändxan ni najc ganax oor, ni yu' nez loj yagxhilroga. <sup>4</sup> Dxejcti gujxhga nägajc rextidx rexpejn<sub>l</sub> Dios, birii ladsnaa xangl Dios ni ca' bacue, huä'preni nez loj Dios. <sup>5</sup> Dxejcti lagajc anglga cua'ni guiboo ni dzuub lo piändxanga, bachajni bacue, dxejcti baslojnini lo guedxliuj. Dxejc guyu' te guziduxh, bidinyaduxh, gujczä te xuduxh.

*Retrompe't*

<sup>6</sup> Dxejcti guigajdz rexangl Dios ni ca' guigajdz retrompe't, guzusinreni te guisloj golreni retrompe'tga.

<sup>7</sup> Che bil trompetganid, guixob naj guiboo nu'chreni rejn gusloj cayajbreni loj guedxliuj. Dxejcti huejc ni riojn la' guedxliuj, huejczä ni riojn la' reyajg najza guiralii recuaan.

<sup>8</sup> Che bil ni rojp xangl Dios trompe't ni ca'ni, ascanu yu' chu bacuaani biajb si'c te danro ni cayejc loj nisdoo. Dxejcti gujc ni riojn la' nisdoo si'c rejn. <sup>9</sup> Dxejcti gujt ni riojn la' rebajl naj guiraa reman ni yu' loj nisdoo. Gunitlojza ni riojn la' rebarcw ni sazaj lo nisdoo.

<sup>10</sup> Che bil ni riojn xangl Dios trompe't ni ca'ni, biajb te balro xhaguibaa, cayejcni si'c te balguejd. Bitejbni loj ni riojn la' regueuu, najza cadre rliejn nis. <sup>11</sup> Laj bajlga najc Ajenjo, ni säloj te cos ni nanladuxh. Ni riojn la' nis gujc nis nanladuxh. Dxejcti gujt xhidalduxh bejn xcuent nisnanlaaga.

<sup>12</sup> Che bil ni rdajp xangl Dios trompe't ni ca'ni, guxhijñ ni riojn la' gubijdx, najza ni riojn la' bäii, najza ni riojn la' rebal xhaguibaa, bicäyreni. Dxejcti dirureni guzanij ni riojn la' dxej, naj ni riojn la' yääl.

<sup>13</sup> Dxejcti bahuiä xhaguibaa, biejn diagä si'c te bisij cagutajt nez galäii xhaguibaa. Biejn diagä cabedxa'ni, caniini rediidxre:

—¡Aii! ¡Aii! ¡Aii! Riaduxhä reben guedxliuj che guisloj gol schon rexangl Dios retrompe't ni ca'reni. Sidejd reben guedxliuj trabajwduxhru.

## 9

<sup>1</sup> Che bil ni rgaii xangl Dios trompe't, bahuiä lo te bal xhaguibaa ni bitejb lo guedxliujli. Bajl xhaguibaaga cua'ni läii ni ruxhal ro' gabijl. <sup>2</sup> Baxhaltini ro' gabijl, dxejc huäjs te gujxh ro'ni si'c räjs gujxh ro' te orguiboro. Dxejcti gujxhga basäuni loj gubijdx, gudxajni lo bej. <sup>3</sup> Dxejcti lo gujxhga birii betzsu gusujreni guideb lo guedxliuj. Cua'reni yälñibee gacreni nialajz si'c nialajz renaxejb. <sup>4</sup> Cua' remanga yälñibee na'c gunreni daan loj reguixa', loj recuaan, loj reyagbajñ; rebejñtis nani xhet beedi xten Dios caj lo cuajreni, reni'c gusacsíreni. <sup>5</sup> Cua'reni yälñibee na'c ju'tni bejn, gaii bäii gusacsíreni xcälñayanreni bejn. Luxh xcälñayanreni najc si'c yälñayan cadre rauya' te naxejb te bejn. <sup>6</sup> Nen redxejga, siguiil rebejn yälgujt, luxh direni guidxälni. Luxh mase rlanjreni guetreni, sibicaj yälgujt lojreni.

<sup>7</sup> Rebetsure najc si'c recabaii ni suchee te chääreni lo guer. Yejceni yu' te ni najc si'c te coron oor; luxh lojreni rujn si'c loj rebejn. <sup>8</sup> Xquichejcreni si'c najc xquichejc gunaa; reläyreni najc si'c läjy lion. <sup>9</sup> Luxh guideb tiejxhreni caj si'c guiib ni rusäudzu'tzreni. Rubeduxh rexhigaareni, si'c rubej che ruxuñ xhidalduxh cabaii naj xcarreni che agojl chääreni guer. <sup>10</sup> Xhibaanreni najc si'c xhibaan naxejb, xcuchreni yu' yälñayan te gusacsíreni reben guedxliuj gaii bäii. <sup>11</sup> Yu'za ni rnibee lojreni, xangl bendxab ni birii gabijl. Xtidx hebreo laani Abadón, xtidx griegw, laani Apolión.

<sup>12</sup> Naj agudejd tej casionroga, naj cayäädx stio'pni.

<sup>13</sup> Che bil ni rxho'p xangl Dios trompe't, biejn diagä te xse' bejn ni lascanu siädni galäii guidajp reca'ch ni caj loj xpiändxan ni nac-chee ganax oor, ni yu' nez loj Dios. <sup>14</sup> Luxh xse' bejnga canii loj ni najc rxho'p xangl Diosga, ni ca' trompe't:

—Baslaa guidap reangl nani caduu nez rogueuu ni laa Eufrates.

<sup>15</sup> Dxejcti baslaani guidap reanglga te ju'treni ni riojn la' ben guedxliuj. Luxh gule Dios reanglga parpac dxejga, bäiiga, ijzga. <sup>16</sup> Biejn diagä bal najc guiraa resoldaad ni rbijb cabaii: najceni tio'p gayuu miyon.

<sup>17</sup> Scree bahuiä lo bacal recabaiiga najza renani bijb recabaiiga. Lastoo reni bijb recabaii caj te guiib, najcni xnäa naj zul naj gojtz. Dxejcru yejc recabaiiga najc si'c yejc te beedz. Ro'reni carii bajl naj gujxh, naj sufr. <sup>18</sup> Ni riojn cuaa bejn gujt xcuent guichon replaag nani carii ro' recabaii, xcuent bajl naj gujxh, najza sufr. <sup>19</sup> Recabaii runnaj daan ro'reni najza xhibaanreni, sa'csi xhibaanreni najc si'c bäl, yu' yejcreni, naj ni'c runnajreni daan.

<sup>20</sup> Luxh guiraa rebejn nani di replaagre nugu't, direni nusiejch lajzreni xcuent ni cayujn naareni, te rajnreni rebendxab, nájza rebanájb ni nac-chee oor, nájza pla't, nájza latón, nájza guij, nájza yajg. Luxh rebanájbga di gacdi fiireni, di diajgreni jiejn, di gacdi sareni. <sup>21</sup> Diza rebejnga nusiejch lajzreni xcuent xcälrugutreni, xcälrujnreni yälbidxaa, xcälresnájreni bejn ni di gac cháälni, niclaza xcälgubaanreni.

## 10

### *Te angl ni ca' te guijt*

<sup>1</sup> Bahuiä stee xangl Dios ni rajp yälrnibeduxh, siädjiäjtne xhaguibaa, li yu'ni nen baj, yejcni dejd xquitgubijdx, luxh lojni najc si'c gubijdx. Reni'ni najc si'c tio'p pilajr bajl. <sup>2</sup> Ca'ni te librbäze', naxhal libre'ga. Bazujni ni'ni ladbee loj nisdoo, bazujni ni'ni ladbäjgw lo yuj, <sup>3</sup> dxejc guredxaduxh anglga si'c rbedxa' beedz. Dxejcru gunii guigajdz guzii sigajcsa. <sup>4</sup> Che gulujx gunii guziiga, narä rlazä nucuaä lo guijt nani guniireni, per biejn diagä xse' tej ni gunii xhaguibaali, najni loä:

—Guluchedzu'tz rediidxga nani gunii reguzii, na'c gucuaaluni.

<sup>5</sup> Angl nani suj ni'ni loj nisdoo nájza loj yuj, guläs naani ladbee nez xhaguibaa. <sup>6</sup> Guniliini diidx con laj GuebDios ni nabajn par tejpas, ni guläxtiej xhaguibaa nájza guiraa ni tre' xhaguibaa; ni guläxtiej guedxliujre nájza guiraa ni tre' lojni; ni guläxtiej nisdoo nájza guiraa ni tre' nen nisdoo. Räjpmi:

—Diru redxejre gaclaa. <sup>7</sup> Che guidzujntis dxej ni agojl gol ni najc rgajdz xangl Dios ni ca' trompe't, dxejc abaza' rextidxxhiga'tz Dios, si'c ni basule' redade' ni gunii xtidx Dios agujc xchero.

<sup>8</sup> Dxejc gunisac xse' nani gunii xhaguibaali, stehuält biejn diagä caniini loä, najni:

—Huij, te xca'lu libre' ni naxhal ni yu' ladznaa angl ni suj te laad ni'ni loj nisdoo, stelaad ni'ni lo guedxliuj.

<sup>9</sup> Dxejcti hua'ä lo anglga, räpä lojni:

—Guniidxlu libre'ga.

Laani najni loä:

—Anire, cua'ni, gudajwni. Sun nanlaani xque'lu, niluxh ro'lu sajcn nejjh si'c dzujn.

<sup>10</sup> Dxejcti cua'ä libre'ga lo naa anglga, dxejc gudauäni. Ro'ä guyu'ni nejjh si'c dzujn, luxh che gudämäni, lacti guc nanlaani xque'ä. <sup>11</sup> Dxejc najni loä:

—Nanab chasulesaclu xtidx Dios xcuent nani churu gac loj xhidalduxh bejn, nájza guejdx, nájza renani rnii garen-garen xtiidxreni, nájza loj rereii.

## 11

### *Tio'p niguii ni rusule' xtidx Dios*

<sup>1</sup> Dxejcti baniidxni loä si'c te biquii nani rurejjh. Dxejc guyu' chu naj loä:

—Huisu te charejjhlu xquidoo Dios, nájza piändxan, balabza balti bejn rusuxhijb nenga. <sup>2</sup> Na'c gutiexhlu gabi lole' guidooga, sa'csi ni'c acua' rebenzajtne te tiubitio'p bäii chaläjsreni guedxdxan si'ctis ni rlanjreni. <sup>3</sup> Narä sudedä yälrnibee lo tio'p dade' ni guinii diidx xcuentä, luxh guideb najcwreni ladyas, susule'reni xtidxä lojreni te mił tio'pgayuu gayojn dxej.

<sup>4</sup> Guiro'preni najc si'c tio'p yag oliib, si'c tio'p gandilieer ni suga' nez lo Dios. <sup>5</sup> Palga yu' chu bejn rlanj gun latsiaj loj redade'ga, sirii bajl ro'reni te chec nani rdxe'ch lojreni. Luxh si'cpac riäjł guet chutis ni rlanj gun latsiajreni. <sup>6</sup> Guiro'p redade'ga rajp yälrnibee te gusaureni xhaguibaa te na'c jiajb nisguij guideb nen redxej nani cagusule'reni xtidx Dios, rajpzareni yälrnibee te guchaareni nis te gacni rejn, rajpzareni yälrnibee te jiädgusacsí xhitis plaag lo guedxliuj, si'ctis huält ni rlanjreni. <sup>7</sup> Che luux gusule'reni xtidx Dios, dxejcti ni najc si'c te man nialajz sirii gabijl te jiädchagdijłni guiro'preni. Sujnni gaanreni, sugu'tnireni. <sup>8</sup> Dxejcti jia'n guiro'p rebenjutga lad caii xten guejdx cadre bacuaareni Dad Jesucrist lo cruz. Guejdxroga rbälajzareni Sodoma nájza Egipto. <sup>9</sup> Chon dxej garol guiraa rebejn ni siäd guedxbäz, ni siäd guedxro,



ni najc garen-garen raz, ni rnii garen-garen xtidx guiraa rebejn guedxliuj, suhiii loj guiro'p rebengutga, direni gusaan guiga'tzreni nen baa. <sup>10</sup> Guiraa renani nabajn lo guedxliujre sibalazduxhrene sa'csi gujtreni. Luxh sa'csi rbalajzduxhrene, suxhalzreni xhi xca' sa'reni; sa'csi guiro'p redade' ni basule' xtidx Dios baxhal trabajwduxh lojreni. <sup>11</sup> Che gudejd choñ dxej garolga, baspansac Diosreni, dxejcti huitiesacreni. Guiraa reni bahiii lojreni, bidxebduxhrene. <sup>12</sup> Dxejcti biejn diajg guiro'preni xse' te ni canii dipduxh desde xhaguibaali, räjpni lojreni:

—Colchä'p jiaare.

Dxejcti huä'preni xhaguibaa lo te za, luxh guiraa renani rdxe'ch lojreni, bahuiireni huä'preni xhaguibaa. <sup>13</sup> Lagajc orga gujc te xuduxh, gurebä'n tej lo tzuu la' guejdxga, gujt gajdz mił bejn lo xu ni gujc ro'c. Rebejn ni bia'n ro'c bidxebduxhrene, guslojreni calä'preni xpala'n Dios ni yu' xhaguibaa.

<sup>14</sup> Si'cti gulujx ni rojp casioon, luxh agojl guidzujn ni riojnga.

*Ni rajc gajdz xangl Dios goł trompe't*

<sup>15</sup> Che bil ni rajc gajdz xangl Dios trompe't ni ca'ni, dxejc biejn xse' reni dipduxh canii xhaguibaa, cayäjpreni:

Xcälrnibee guedxliuj agudejd ladznaa Dad Dios näjza Jesucrist;  
luxh laani sinibeeni par tejpas.

<sup>16</sup> Galbitajp rebengool nani sobga' lo tron xtenreni cadre rnibee Dios, biabrløjreni nez loj Dios te calä'preni xpala'n Dios. <sup>17</sup> Räjpreni:

Xquixtioste Guejblu Dios, nani rajp yälrnibeduxh,  
nani najclu, nani gujclu, nani churu gac,  
sa'csi acua'lu xcälrnibeduxhlu te agusloj canibeelu.

<sup>18</sup> Bidxe'ch reben guedxliuj lojlu,  
luxh abidzujn dxej guide'chlu lojreni,  
gunlu yälguxhtis rebengut, te gudeedlu cossa'c loj rexpejnlu,  
lo renani gunii xtidx Dios, lo renani huililajz xtiidxlu, lo renani rusuxhibni nez lojlu;  
rebenproob sigajc rebenro.

Abidzujnza dxej che cuäcajlu renani bejn daan guedxliujre,  
te nitlojreni par tejpas.

<sup>19</sup> Dxejc bixal xquidoo Dios ni yu' xhaguibaa, nen guidooga bien te guijn cadre yu' guij cadre caj rediidx ni bia'n Dios loj rexpejn Israel. Dxejcti lacti bidinya', lacti guiniiza reguziro, gujc te xu, dxejc bjaib te guixobroduxh.

## 12

*Te gunaa näj te ni najc si'c te gutiatzro*

<sup>1</sup> Dxejcti guyu' te senro xhaguibaa: te gunaa ni najcw si'c gubijdx, ni'ni sojb bäii, yejcnii yu' te coron ni nac-chee tzubitio'p balxhaguibaa. <sup>2</sup> Gunaare nuxi'nni. Rbedxa'ni sa'csi agusloj cayu' yoob xque'ni te gaal xi'nni, cadejdni trabajwduxh. <sup>3</sup> Dxejcti bahuiä stee seen xhaguibaa: te manxniaa ni rujn lojni si'c loj te gutiatzro, manduxhni. Yu' gajdz bitiuvejcnii, sojb tzuu xca'chni. Tejga yejcnii yu' te coron, najcreni gajdz coron. <sup>4</sup> Dxejcti xhibaanni cagobxajxhni ni riojn la' rebalxhaguibaa, dxejcti bacuaanireni lo guedxliuj. Dxejcti biädsu manroga nez loj gunaaga ni ameer gaal xi'nni, te gauni xi'nni che gaalni. <sup>5</sup> Dxejcti gojl xi'n gunaaga, najcni te niguii, luxh te bar guuib nungäjł guinibenäjni lo guiraa reben guedxliuj. Guläsgajcreni bäzga te sanärenini xhaguibaa cadre rnibee Dios. <sup>6</sup> Dxejcti baxun gunaaga, siini nez loj reyubijdz cadre yu' te lajt ni basuchee Dios te cuääzni, te ro'c guyaannini te mił tio'p gayuu gayojn dxej.

<sup>7</sup> Dxejc guyu' guer xhaguibaa, xangl Dios nani laa Miguejl näj resa'ni bacuanäjreni gutiatzro. Gutiatzroga näjza rexanglni gudilduxhrene, <sup>8</sup> niluxh direni niujn gaan, luxh di niajcdiru nia'n manga näjza resa'ni xhaguibaa. <sup>9</sup> Dxejcti bacuaanireni manroga näjza



resa'ni lo guedxliujre. Laani najc ni gujc bäl galoroga, ni najc gueb Bēdxab, ni laaza Satanás, ni rusguee guideb guedxliujre.

<sup>10</sup> Dxejcti biejn diagä xse' te ni canii dipduxh xhaguibaali, räjpni:

—Abidzujñ yälrusläa lo dojl, näj yälmilagwr, näj yälrnibero xten Dios, näjza yälrnibee xten Jesucrist, sa'csi agulääreni bejn nani entis rbe'c xquej rexpejn Dios loj Dios dxej-yääl. <sup>11</sup> Laareni gujc bejnreni gaan loj bēdxabre, xcuent xtiejn ni najc Xiil xten Dios, näjza sa'csi huililazsa'creni xtidx Dios, dizareni nidxejb mase niejtzareni. <sup>12</sup> Ni'cni, guiraa la'tu ni yu' xhaguibaa näjza gueb xhaguibaa, colquibalazduxh. Niluxh riaduxhnu renani rbäjz lo guedxliujre, näjza lo nisdoo, sa'csi abiäjt bēdxab lo guedxliuj, luxh cadxechduxhni sa'csi anajnni guxii dxej räjpni.

<sup>13</sup> Che gucbee gutiatzroga abacuaarenini lo guedxliuj, birinajlni gunaa nani guyu' xi'ngaanni te gusacsínini. <sup>14</sup> Dxejc badeed Dios lo gunaaga tio'p xhiga xten bisiro, te gac gutajtni nez lo reyubijdz cadre nac-chee cadre cuääzni. Chon ijz garol guyu'ni ro'c, nacuatzlojni lo bälga. <sup>15</sup> Dxejcti ro' gutiatzrore birii nis si'c te gueuu te nuslo'ni gunaaga. <sup>16</sup> Dxejc gucnäj guedxliuj gunaaga, baxhal guedxliuj ro'ni, gu'ni gueuu ni birii ro' gutiatzroga. <sup>17</sup> Dxejc bidxechduxh gutiatzroga loj gunaaga, ni'c sääni te gucuanäjni sgaii rexi'n gunaaga, renani cagusoob diidx ni gunibee Dios, renani rililajzza xtidx Jesucrist.

## 13

### *Tio'p manduxh*

<sup>1</sup> Narä gusuä lo yujxh ni tre' ro' nisdoo, dxejc bahuiä carii te manro lo nisdoo. Sojb tzuu xca'chni. Dxejc lo tejga xca'chni yu' te coron. Yu' gajdz bitiuvejnci cadre caj diidx ni rniyaj Dios. <sup>2</sup> Manduxhre najc si'c te beedz, ni'ni najc si'c ni' te os, luxh ro'ni najc si'c ro' te bedzro. Gutiatzroga badeed xcälmlaagwrni lojni, näjza tron cadre rbejni, näjza xcälrnibeduxhni. <sup>3</sup> Dxejcti bahuiä te yejnci najc ascanu yu' chu batiuugni con madxed, ameer guetni, luxh biajc cadre gurujg yejnci. Ni'cni rdxeloduxh guiralii rebejn guedxliuj, sanajlni manduxhga. <sup>4</sup> Bazuxhijbreni gojnreni gutiatzroga sa'csi badeedni xcälrnibeeni lo manduxhga, dxejtiru bazuxhijbreni gojnzareni manroga, räjpreni:

—¿Chu stee najc si'c manrore, ä? ¿Chu laa ni gac guichagdijlni, gucuanäjnni?

<sup>5</sup> Yu' chu badeedza lo manroga diidx dxejcti gusloj caniini guiraloj didx-guyalajz, diidx ni rniyaj Dios. Yu'za chu badeed ga'pni yälrnibee tiubitio'p bäii, gunni si'ctis ni rlanjzi. <sup>6</sup> Baxhalni ro'ni, guniyaduxhni Dios, guniyajni laj Dios, näjza xquidoo Dios, nalajznu renani yu' xhaguibaa. <sup>7</sup> Dxejcti yu' chu basaan bacuanäj manroga rexpejn Dios. Bejn manroga gaan rexpejn Dios, dxejcti gunibee manroga guiraa reguedxbäz, näj guiraa rebejn ni rnii garen-garen xtiidxreni, näjza guiraa reguedxroduxh. <sup>8</sup> Dxejcti guiraa reben guedxliuj sazuxhijbreni, sagajlni manroga, guiraa rebejn nani di lajreni nicaj lo libr xten yäl nabajn xten Xiil nani gujt xcuentreni, sa'csi galooli guirixtiej guedxliuj cuaj lo guijtzre laj guiraa ni gac xpejn Dios.

<sup>9</sup> Palga yu' chu rlanjz cuadiajgni, sugucuadiagsa'cni. <sup>10</sup> Palga yu' chu nungäjñ jläuu nen latzguiib, siäupacni. Chutis ni ju't te bejn con te madxed, con madxedza guetni. Ni'cni renani anumbee Dios, riäjñ gunreni huant, chanuutis chalilazsa'creni xtidx Dios.

<sup>11</sup> Dxejcti bahuiä loj stee manro, cariini nen yuj. Sojb tio'p xca'chni si'c xca'ch te xiil, rniini si'c rnii te gutiatz. <sup>12</sup> Luxh rnibeezani si'cni rnibee manroga lagajc nez loj manroga, rujnzani rusuxhijb reben guedxliuj loj manrogalooga ni gurujg yejnci, luxh biajc yejnci. <sup>13</sup> Manroga ni birii nen yuj rujnzani remilagwrro, rujnni rtejb bal-guiboo xhaguibaali, rtejbni lo guedxliuj nez loj rebejn. <sup>14</sup> Rusgueeni rebejn nani nabajn lo guedxliuj xcuent remilagwrro nani rujnni nez loj manrogalooga. Guinibeeni gun reben guedxliuj te banäjñ si'c najc manroga nani batiuug madxed yejnci, luxh biajczä yejnci. <sup>15</sup> Dxejcti man ni rojppa baspajn banäjñbga te guinii banäjñbga, dxejcti gunibeeni guet guiraa rebejn nani di guzuxhijb lojni te ganrenini. <sup>16</sup> Gunibeezani chu bejn te seen lo cuajni o ñaani ladbee, guiraa rebejn ni xhet rajpdí, guiraa rebejn ni rajp, guiraa

reni najc mos, guiraa reni najc lam, guiraa reni najc benro, guiraa reni najcza benbáz. <sup>17</sup> Gunibeezani digacdi sii, digacdiza guto' bejn palga xhet seendi caj naani o lo cuajni. Seenga najc laj manga o numbr xten laj manga. <sup>18</sup> Dee rquiin yálnajn. Renani rajp yálnajn sugulabreni xseen manga, numbrga najc si'c xnumbr bejn; numbr xten manga najc xho'p gayuu gayonbixho'p.

## 14

*Dij ni ro* te gayuu tiubitajp mil

<sup>1</sup> Che bahuiä stee, bahuiä suga' Xiil xten Dios yejc dajn ni laa Sión. Suganäjni te gayuu tiubitajp mil bejn nani caj lo cuajreni laj Xiil näj laj Xtadni. <sup>2</sup> Biejn diagä rubej xhaguibaali, rubeduxh, riejnni si'c rubej xhidajl gueuro, näj te guziro; riejnzani si'cni riejn che cayol xhidajl bejn ni ro arp. <sup>3</sup> Cayolreni te dicoob nez loj tron cadro rbej nani rnibee, näjza nez loj guidap reni najc si'c man ni nabajnpac, näjza nez loj rebengool. Rutliidi gujc bisieeddi dijga, xtebtis tegayuu tiubitajp mil bejn nani guġaa lo reben guedxliuj. <sup>4</sup> Reniguiire najc renani gajd xhin con gunaa; nicla tejreni di niesnäj te gunaa, najcreni ben dxan. Laareni rinajlreni Xiil xten Dios cadrotis säani. Redee guġaa lo reben guedxliuj si'c te gojn lo Dios näjza lo Xiil xten Dios. Gojnre najc si'c gonganid ni rudeed bejn xten te cose'ch. <sup>5</sup> Nicla tej didx-xhii di guirii ro'reni, sa'csi xhetliidi xtojreni, nayareni suga'reni nez loj tron cadro rnibee Dios.

*Rediidx nani bazule' jion* rexangl Dios

<sup>6</sup> Dxejcti bahuiä loj stee xangl Dios, rutajtni nez galäi xhaguibaa, siädnäni diidx ni najc par tejpas xten Dios te gusule'nini loj reben guedxliuj, guiraa lo reguedxro, guiraa lo reguedxbáz, loj reben ni najc garen-garen raz, nani rnii garen-garen xtiidreni. <sup>7</sup> Dipduxh guniini, räjpni:

—Colguidxerb Dios, colguiliä'p xpala'n Dios sa'csi abidzujn or gunni yälguxhtis guiraa rebejn. Colguzuxhijb loj nani benchee xhaguibaa, näjza guedxliuj, näjza nisdoo, näjza cadro rliejn nis.

<sup>8</sup> Dxejcti siädnajl stee angl nani canii:

—Abiajb, abiajb guejdxroga nani laa Babilonia, sa'csi baquiilni guzojz guiraa reguejdx xten guedxliuj xcuent xcäl-latsiajni, xcuent dojl ni bejnni guideb lagaa; najcni si'c reni rä' nejp.

<sup>9</sup> Dxejc biädnajl ni riojn xangl Dios, dipduxh guniini, Räjpni:

—Palga yu' chu bejn guzuxhijb loj manroga o loj banäjb ni najc si'c manroga, o xcäjbni xca'ni xseen manro lo cuajni o lo naani, <sup>10</sup> sidxechduxh Dios lojni, di xcälguxhtisduxh Dios tedcaj lojni. Sidejpacni trabajwduxh nen balro näjza azufr nez loj rexangl Dios näjza nez loj Xiil xten Dios. <sup>11</sup> Luxh gujxh xten reni cayejc sä'p nez lojreni guixe-guixee par tejpas. Digacdi gusilajzreni dxej-yääl, renani guzuxhijb, reni gojn manroga näjza reni gojn banäjb ni najc si'c manroga, chutisza ni rca' seen xten lajni. <sup>12</sup> Ni'cni renani huililajz xtidx Dios, reni rusoobza xtidx Dios, ni rinuutis lo xnezyuj Jesucrist, nanab di guidxajgreni.

<sup>13</sup> Biejn diagä xse' te ni caniini loä xhaguibaali:

—Scree bacuaa: “Chicbaa rebejn ni guet najli nani rililajz xtidx Jesucrist.” “Guliini”, naj Sprit Dxaan xten Dios: “Te gusilajzreni, na'cru gunreni dzuun, sa'csi anancheenu xhi dzuun bejnreni.”

*Yálnasa'c ni rudeed guedxliujre*

<sup>14</sup> Dxejcti bahuiä tre' te bänol, loj bänolga sobga' te ni najc si'c Xi'n Dios ni gujc Niguii. Yu' te coron ganaxduj oor yejcn, dxejcti naani ca'ni te guiboz ni caduxh ro'ni. <sup>15</sup> Dxejcti birii te xangl Dios loj xquidoo Dios, dipduxh caniini loj ni sobga' loj bäjga, räjpni:

—Basäl xquibozlu, batiuug, te batie' yálnasa'c, sa'csi agojl or guire' yálnasa'c, guideb guedxliuj aguyajlni.

<sup>16</sup> Dxejcti nani sobga' lo bājga basniibni xquibozni, batiuugni yāl<sub>n</sub>asa'c ni caj lo guedxliujre.

<sup>17</sup> Dxejcti stee xangl Dios birii neñ guidoo ni yu' xhaguibaa, ca'zani te guiboz ni caduxh ro'ni. <sup>18</sup> Dxejcti birii stee xangl Dios nez loj piāndxan xten Dios. Laani rajpni yāl<sub>n</sub>ibee lo balro. Dipduxh guniini, rāj<sub>p</sub>ni loj ni ca' guiboz ni caduxh ro'ni, rāj<sub>p</sub>ni:

—Basāl xquibozlu nez ni' reyaguub, batiuug guiraa reresim̄ uub ni yu' lo guedxliujre, sa'csi aguyajlreni.

<sup>19</sup> Dxejc batiuug anglga guiraa reresim̄ uub ni yu' lo guedxliujre nalajznu rebenguijdx, basāl<sub>n</sub>ireni neñ tanc cadre gulājreni yej<sub>c</sub>ni sa'csi rdexchduxh Dios lojreni. <sup>20</sup> Dxejcti balājreni yej<sub>c</sub> reuub nez orii te guejdx. Biriiduxh rej<sub>n</sub> yej<sub>c</sub>reni, gutiās rejnga, bidzuj<sub>n</sub> rejnga ro'li recabaii, guj<sub>c</sub>ni si'c che riu' nisro gueuu, biāj<sub>t</sub>ni si'cti choñ gayuu mil metr guideb gabi cadre balājreni yej<sub>c</sub> reuub.

## 15

### *Guigajdz xangl Dios nāj lult xcālguxhtis Dios*

<sup>1</sup> Dxejcti bahuiā stee senro xhaguibaa, nani bascheloduxh narā. Bahuiā loj gajdz xangl Dios, tejpgareni ca' te plaag ni gusacsí reben̄ guedxliuj. Redeetis najc lult, sa'csi che ted redee ati agulujx yāl<sub>r</sub>dx'e'ch xten Dios.

<sup>2</sup> Dxejcti bahuiā loj tej ni najc si'c te nisdoo ni najc si'c biidr nu'chni bajl. Dxejcti galāii nisdoooga suga' renani bejn gaan loj manroga nājza lo banāj<sub>b</sub> ni najc si'c manroga, ni bejnza gaan di nica'reni seen xten lajni. Ca'reni arp xten Dios. <sup>3</sup> Cayol<sub>r</sub>reni dij xten toMoisés ni guj<sub>c</sub> xpej<sub>n</sub> Dios, cayol<sub>r</sub>zareni dij xten Xiil xten Dios. Scree najc dijga: Sacduxh, ruscheloj guiraa redzuun ni ruj<sub>n</sub> Guejblu, Dad Dios, ni rajp guiraa yāl<sub>n</sub>ibee. Ruj<sub>n</sub> Guejblu ganax dzunsa'c, rnii Guejblu ganax didxlii.

Guejblu rnibee loj guiralii reguejdx ni yu' lo guedxliuj.

<sup>4</sup> Bahuii, Dad, ¿chu laa ni di guidxejb Guejblu ni di guiliā'p xpala'n Guejblu?

Sa'csi Guejbtislu najc dxan, ni'cni guiraa reguejdx ni yu' guedxliuj siād<sub>r</sub>zuxhijbreni, siād<sub>r</sub>gaj<sub>n</sub>reni Guejblu, sa'csi abaluiloj guiraa rextzunsa'cpac Guejblu.

<sup>5</sup> Dxejcti bahuiā xhaguibaa, bixal ro' yu' ni najc dxanro neñ guidoo, cadre yuchee guij cadre caj xleii toMoisés. <sup>6</sup> Ro' yudxanroga birii gajdz xangl Dios ni ca' plaag te gusacsíreni reben̄ guedxliuj. Najcwreni te ladli<sub>n</sub> ni najc nolbāj, ni rdimbichaduxh. Dejd si'c te cinturon̄ lastooreni ni najc ganaxduj oor. <sup>7</sup> Dxejcti yu' tajp reni najc si'c man nabaj<sub>n</sub> ni yu' nez loj Dios xhaguibaa. Tej reni badeed loj tejga reanglga te co'p ni najc ganaxduj oor. Guidxa tejga rehxijgga xcālguxhtisro Dios nani nabaj<sub>n</sub> par tejpas. <sup>8</sup> Gudxaj guidoo ni najc yudxanroruga guj<sub>x</sub>h ni siād<sub>r</sub> xcuent xcālmilaagwr, xcāl<sub>r</sub>rdimbichaduxh xten Dios. Rut guj<sub>c</sub>di biu' neñ yudxanroruga che gulujxli guiraa replaag ni ca' guigajdz reanglga.

## 16

### *Rexhijg ni guidxa xcālguxhtis Dios*

<sup>1</sup> Dxejcti biejn diagā xse' te ni canii dipduxh xquidoolini, caniini loj guigajdz rexangl Dios, rāj<sub>p</sub>ni:

—Col<sub>ch</sub>āj, col<sub>ch</sub>asloj guigajdz rehxijgga lo guedxliuj, col<sub>ca</sub>' rehxijg ni guidxa xcālguxhtis Dios.

<sup>2</sup> Anglgaloo ni huij, baslojni ni yu' neñ xhijg ni ca'ni lo guedxliuj. Dxejc loj guiraa rebej<sub>n</sub> nani caj xseen manduxh, reni rusuxhijb, raj<sub>n</sub>reni banāj<sub>b</sub> ni najc si'c manroga, birii tiejxhni te guedxyanduxh ni najc si'c cancer.

<sup>3</sup> Dxejc ni rojp anglga baslojni ni yu' neñ xhijg ni ca'ni loj nisdoo, te bejn<sub>n</sub>i gubixhloj nisdoooga guj<sub>c</sub>ni si'c rej<sub>n</sub> xten te bengut. Dxejcti gujt guiralii reman ni yu' lo nisdoo.

<sup>4</sup> Ni rioj<sub>n</sub> anglga baslojni ni yu' neñ xhijg ni ca'ni loj regueuu nājza cadre rliej<sub>n</sub> nis. Gubixhlojreni guj<sub>c</sub>reni rej<sub>n</sub>. <sup>5</sup> Dxejcti biejn diagā gunii angl ni rajp yāl<sub>n</sub>ibee lo nis rāj<sub>p</sub>ni:

—Huenduxh najc Guejblu Dad ni najc naj sigajc gujc Guejblu galoo, dxanduxh najc Guejblu sa'csi cayujn Guejblu yälguxhtis redzunguijdx. <sup>6</sup> Sa'csi laareni baxhe'reni rejn, bagu'treni rexpejnlu näjza renani gunii xtiidxlu, luxh naj badeed Guejblu rejn cayä'reni. Si'cpac nungäjl gacreni.

<sup>7</sup> Dxejcti biejn diagä canii steeni lagajc lo piändxan, räjpni:

—Guliipacni Dad Dios ni rajp guiralii yälrnibee, xcälguxhtis Guejblu najc laaca, si'c riäjł gacni.

<sup>8</sup> Dxejcti ni rdajp anglga cua' xhijg ni ca'ni, baslojni ni yu' nen xhijgga lo gubijdx, te badeedni lo gubijdx yälrnibee guze'cnäjni rebejn guiboo. <sup>9</sup> Guiraliireni gusloj cayejcreni, lacti nanladuxh, dxejc gusloj caniyajreni Dios ni rajp yälrnibee loj recosga. Niluxh direni nusiechljazreni, niclaza niliä'preni xpala'n Dios.

<sup>10</sup> Dxejcti ni rajc rgaii anglga cua' xhijg ni ca'ni baslojni ni yu' nen xhijgga lo tron cadro rnibee manroduxh. Bicäy guideb cadro rnibee manduxhga, luxh rebejn rauya'tisreni lujdxreni sa'csi cayajcreni yälñayanduxh. <sup>11</sup> Guniyajreni Guejb Dios ni yu' xhaguibaa sa'csi rajcreni yälñayanduxh, xcuentza rexquedxnayanreni. Luxh direni nusiechljazreni xcuent xtojłreni.

<sup>12</sup> Dxejcti ni rajc xho'p anglga cua'ni xhijgni, baslojni ni yu' nen xhijgga loj gueuro ni laa Eufrates. Gueuga gubidzlii nisni te guc-chee te nezyuj xten rereii ni jiäd nez cadro rliejn gubijdx.

<sup>13</sup> Bahuiäza birii ro' gutiatzro, näjza ro' manro, näjza ro' ni najc profe't ni rusguee, birii chon spritguijdx ni najc si'c bedz, <sup>14</sup> sa'csi najcreni resprit xten bendxab, rujnreni milagwr, senro. Rijreni loj guiraa rereii loj guedxliuj te gutie'reni guiraa bejn loj guedxliuj te gac guerroduxh, te gucuanäjreni Gueb Dios ni rajp guiralii yälrnibee che guidzujni lo guedxliuj. <sup>15</sup> “Narä siädxhiga'tzä si'c riäd te gubaan. Chicbaaza renani cabäjz, cagutie'chreni bacal lojni che guibi'ä si'c rujn nani najcw guiraa xhajbni, te na'c guiga'ni xhabäälñi, jianxtujyni che guibi'ä.” <sup>16</sup> Dxejc gutie'reni guiraa rebejnre te lajt ni laa lo didx hebre “Armagedón”.

<sup>17</sup> Dxejcti ni najc rgajdz anglga cua'ni xhijgni baslojni ni yu' nen xhijgni loj bej. Dxejcti biejn xse' te ni gunii dipduxh xquidooli Dios xhaguibaali cadro yu' tron cadro rnibee Dios, räjpni:

—Agujcni, agulujxhni.

<sup>18</sup> Dxejc guyuduxh yälrdinya' näj guziro. Gujczä te xuroduxh lo guedxliuj, te xu sa' ni gajdpac gac. <sup>19</sup> Che gujc xuroga, biräjs guedxroduxhga, gujcnı chon la', dxejcti gurebä'n guiraa reguejdx guideb guedxliujre. Dxejc banaj lajz Dios guedxro ni laa Babilonia, bialoj bejn Dios yälguxhtis guedxga. <sup>20</sup> Li gubicaj, gunitloj reyuj ni tre' lo nisdoo, gunitlojza redajn. <sup>21</sup> Xhaguibaali biajb te guixhobro yejc rebejn; tejga guixhobga na' si'cti tiuu kil. Guniyaj rebejn Dios xcuent guixhobroga, sa'csi cuentroduxh gujcnı.

## 17

### *Gun Dios yälguxhtis te gunadxab*

<sup>1</sup> Lo regajdz anglga ni ca' gajdz xhijg birii tej ni gunii loä, najni:

—Gudaa ree te guluiä lojlu retrabajwduxh ni ted gunadxabre ni sobga' cadro yu sijn nis.

<sup>2</sup> Guiraa rereii lo guedxliujre bennäjreni gunaaga dojl, sigajczä guiraa reben guedxliuj bennäjreni gunaaga dojl. Gusosnäjreni gunaaga bejnreni si'ctis ni rlajzreni.

<sup>3</sup> Dxejcti huinäni narä si'c lo te bacal nez lo reyubijdz. Bahuiä loj te gunaa, bijbni dejtz te manro ni najc xnıaa, luxh guidebni caj diidx ni rniyaj Dios. Gajdz najc bitiuvejcnı, sojbza tzuu xca'chnı. <sup>4</sup> Gunaaga najcw te lad moraad con xnıaa, sucheduxh gunaaga oor, näj reguisa'c, näj perl ni sa'cduxh. Ca'ni te copro ni najc ganaxduj oor ni guidxa ganax recosguijdx, recosdxab ni bennäjni reben guedxliuj. <sup>5</sup> Caj te diidx lo cuajni, luxh rut racbeedi xhi sälojni. Scree rnıi diidxga: “Babilonro, xnan regunadxab, xnan recosdxab ni rajc lo guedxliuj.” <sup>6</sup> Bahuiä agusojz gunadxabga. Agusosnäjni xtiejn rexpejn Dios

nani bagu'tni, näj xtiejn renani basule' xtidx Jesucrist ni bagu'tzani. Che bahuiä lojni, bidxeloduxhä. <sup>7</sup> Dxejcti gunii anglga loä, najni:

—¿Xhicuent rdxelojlu, ä? Narä siniä xhi säloj gunadxabga, näjza manroga ni sojb gajdz bitiuycni näj tzuu xca'chni. <sup>8</sup> Manroga ni bahuiilu gubajñni galoo, niluxh agunitlojni naj, luxh agojl guiriini gabijl, dxejcti sinitlojni stee, sejtni par tejpas. Rebejn ni nabajñ lo guedxliuj nani di lajreni nicaj lo guijtz xten yälñabajñ xten Dios, guijtz ni guc-chee che birixtiejli guedxliuj, rebejnğa sidxeloduxhrene che fiireni loj manroga nani gubajñ galoo, ni gunitloj, niluxh naj agubansacni.

<sup>9</sup> Ree nanab ga'pni yälñajn. Gajdz rebitiuycni säloj gajdz dajn cadre sobga' gunaaga, <sup>10</sup> sälojzareni gajdz reii. Agujc gaii reii ni cayajb. Tej rereiiga canibee naj. Stee reiiiga churu jiääd. Luxh che jiääd lult reiiiga, guxii dxej guinibeeni. <sup>11</sup> Manro ni gubajñ galoo, ni agunitloj naj, ni'c rac xhujñ reii, najczani tej loj guigajdz rerei, luxh sinitlojni, sejtni par tejpas.

<sup>12</sup> Guidzoo rexca'chni ni bahuiilu säloj tzuu reii. Gajdreni guisloj guinibee naj. Laareni näjza manroga xca'reni yälñabee teb or, nalajznu guxii dxej. <sup>13</sup> Tejtis xhigab gun rereiiga, gudeedreni xcälñadipreni, xcälñabeereni lo manroga. <sup>14</sup> Laa redee ni sucuanäj Xiil xten Dios. Dxejcti sujn Xiilga gaan lojreni sa'csi laani najcni Dad ni rnibee loj guiraa redad, najcni Reii ni rnibee lo guiraa rerei. Luxh renani siädñajlni najc reni agurejdxni, reni aguleni, sisiudzu'tznajrenini.

<sup>15</sup> Dxejcti najza anglga loä:

—Reni ni bahuiilu cadre sobga' gunadxabga säloj guiraa guejdx, guiraa beñ guedxliuj, guiraa beñ ni rnii garen-garenca xtiidxreni, ni siääd garen-garen reguejdx. <sup>16</sup> Guitzoo reca'chga näjza manroga ni bahuiilu, sidxe'chreni loj gunadxabga, suro'nreni gunadxabga, susa'nreni gunadxabga xhabäälñi, sawreni bältiejxhni, suze'creni gunadxabga lo guiboo. <sup>17</sup> Sa'csi abasniib Diosreni te gunreni tejsi xhigab, te gudeedreni xcälñabeereni lo manroga che guidzujñli dxej ni chale' guira'ti ni gunii Dios gac. <sup>18</sup> Gunadxabga ni bahuiilu säloj guedxro ni rnibee loj guiraa rerei loj guedxliuj.

## 18

### *Xho jiajb guedx Babilonia*

<sup>1</sup> Dxejcti bahuiä loj stee xangl Dios ni siädyajt xhaguibaa. Siädñani yälñibeduxh, xcälrdimbicha'ni bazanij loj guedxliujre. <sup>2</sup> Dxejcti dipduxh gunii anglga, guredxa'ni:

—Abiajb, abiajb guedx Babilonia, agubixhlojni, naj najcni guejdx cadre rbäjz rebendxab, ro'c rcañzaj guiralii cuaa spritdxab, najczani xpitiäaz guiraa reman xhaguibaa ni najc mandxab, mandxuudx. <sup>3</sup> Sa'csi guiraa reben guedxliuj agusojzreni xcuent dojl ni bennäjreni gunadxabga, guiraa rerei loj guedxliuj bejn dojl guläsnäjreni gunadxabga, luxh guiraa reben guedxliuj ni ruto' abejnreni ganduxh, agujcreni ri'cw xcuent recosdxab ni rujn gunabdxabga.

<sup>4</sup> Dxejcti biejn diagä xse' stee nani canii xhaguibaa:

—Colguirii guejdxga rexpenä, te di näj la'tu gunnäjtu gunadxabga dojl, te di tedtu trabawduxh lo replaag xtenni. <sup>5</sup> Sa'csi yuduxh rextolñi, abidzujñreni xhaguibaali, luxh abanajza lajz Dios rextolñi. <sup>6</sup> Colgudeed loj gunaaga sigajc ni badeedni lojreni. Colquijx loj gunaaga tio'pli huält lo ni bejñni laani. Neñ co'p cadre badeedni gu' bejn (te trabajw ni bateedni bejn), lagajc nenga colyejn te ni najc tio'p huält maazru fuert yä gunadxabga, nalajznu tedni trabajw tio'p huält. <sup>7</sup> Lacti gulä'p gunaaga xpala'nni, gubajñni si'ctis ni rlajzni lo guedxliuj. Naj colguteed gunaaga trabajw, si'cti mediid ni gulä'pni xpala'nni; si'cti mediidza ni bibalaznäjni mood ni gubajñni, sigajcza gac-huin lastooni sa'csi bejñni xhigab neñ lastooni: “Narä sobga'ä ree si'c te reiñ, te benroduxh, dina gacä biuud, niclaza gac-huin lazä.” <sup>8</sup> Ni'cni tejsi dxej siajb yejcni guiraa replaag xten Dios: yälgujt, yälhuin lajz, näj yälrliaan, luxh sejczeni lo balguiboo, sa'csi rnibeduxh Dad Dios ni gun xcälguhtisni.



<sup>9</sup> Guiraa rereii lo guedxliujre ni bennäj gunaadxabga cosguijdx, reni cuansanäjnini, sonduxhreni, siaduxhreni che fiireni gujxh ni carii cadre cayejcni. <sup>10</sup> Zijtru sisiujreni sa'csi rdxejbreni replaag xten gunaadxabga, dxejc siniizareni:

—Aii, aii, riaduxhnu guedxrore, Babilonia, guedxdipduxh gujclu, luxh chela gubeenu, ala bidzujn yälguxhtis yejclu.

<sup>11</sup> Rebejn ni ruto' loj guedxliuj sonduxhreni, siareni guejdxga sa'csi rutru rsiidi xhixtenreni ni ruto'reni. <sup>12</sup> Laareni ruto'reni oor, pla't, guiraloj reguisa'c, perl, ladlin, ladmuraad, ladseed, näjza guiraloj baräjd yagdoo, näj guiraloj cos saru, ni nacchee läi elefant, näj cos saru ni nacchee bronz, näj guiib, näj márm, <sup>13</sup> näjza caneel, guiraloj laj comiid, näjza yalnejh, näj perfum, näjza yaal, näjza bin, näjza se't oliib, näjza arinsa'c, näjza triuu, näjza gon, näjza rexiil, näjza cabaii, näjza gare't, näjza bejn ni ruto'reni tiejxhreni, xaimreni. Guiraa reni'c ruto'reni. <sup>14</sup> Dxejc guniiza xse' ni canii xhaguibaali, najni:

—Ninexhsa'c ni rladuxhlu, agunitloj. Guiraa recossa'c, recossaruduxh agubicajreni lojtu, luxh di gacdiru guidxäl bejn reni'c.

<sup>15</sup> Reni ruto' guiraloj recosga, nani gujcreni ri'cw xcuent guedxroga, zijtru sisiujreni sa'csi rdxejbreni trabajw ni cadeed guejdxga, sonduxhreni, sac-huinduxh lajzreni, <sup>16</sup> säjbreni:

—Aii, aii, riaduxhnu guedxrore, nani gojtni ladsacduxh, guiraa ladlin, ladmuraad, ladxniaa, gusucheeni con oor, con guisa'c, con perl, <sup>17</sup> tera'tbäztis baralii recosro ni najc xhixtenni, guxhijreni.

Guiraa recapitán xte barcw, näjza guiraa remarineer, näjza rebejn ni rij biaj lo rebarcw näjza guiraa reni rujn dzuun lo nisdoo, gusujreni zijt, <sup>18</sup> näjza laareni cahuiireni cayäjs gujxh guejdxga, cabedxa'reni, caniireni:

—¿Xhi stee guejdx najc si'c najc guedxrore, ä?

<sup>19</sup> Bachajreni yuyol yejcreni sa'csi rac-huin lajzreni, binduxhreni, guredxa'reni:

—¡Aii! ¡Aii! Riaduxhnu guedxro sa'csi xcuenttis guedxduxhre gujc ri'cwduxh guiraa rebejn ni rajp barcw ni rujn dzuun loj nisdoo. Luxh naj tera'tbäzsi aguxhijn guedxrore.

<sup>20</sup> Guniiiza xse' ni yu' xhaguibaa, najni:

—La'tu ni yu' xhaguibaa, la'tu rexpejn Dios, reapost xtenni, rebejn ni gunii xtidx Dios galoo, colbalasduxh sa'csi abiajb guedxrore, abejn Dios yälguxhtis xcuent ni bejn lojtu.

<sup>21</sup> Dxejcti te xangl Dios ni rajp yälrnibee, guläs te guiro ni najc si'c te guij ni ro't dojb, bacuaanini loj nisdoo, dxejc najni:

—Screeza gac guedxro ni laa Babilonia siajbni lo trabajwduxh, sinitlojni par tejpas, dirutu fii lojni. <sup>22</sup> Diru guibi' jiejn cayel nez xladcailu reharp, reflaut, retrompe't; diru guibi' chu tej ni gun xhitis dzuun; diruza guibi' chubej molin ni cayo't. <sup>23</sup> Diru guibi' jieñ xcälrdimbicha' te bajl ni cagusanij; diruza guibi' jieñ xse' bi'n näj dxa'p loj te sa' sa'csi rexpejñlu ni ruto' gujcreni beñroduxh lo guedxliuj sa'csi basguezalu reben guedxliuj xcuent rextzundxablu.

<sup>24</sup> Neñ guejdxga bidxälza xtiejn renani gunii xtidx Dios, näjza xtiejn rexpejn Dios, näjza xtiejn guiraa reben guedxliuj ni bagu'treni.

## 19

<sup>1</sup> Che gulujx recosre, biejn diagä lascanu xse' xhidalro bejn ni canii xhaguibaa, cayäjpreni:

¡Colguiliä'p xpala'n Dios!

Xtentis Dios, xtenni najc yälrusläa lo dojl,

näj yälrdimbicha', näj yälmilagwr.

<sup>2</sup> Sa'csi xcälguxhtisni najc ganax laaca,

huentis najcni, sa'csi abejnni yälguxhtis gunaadxabga nani caguxhin reben guedxliuj xcuent xcälndxabni.

Abejn Dios yälguxhtisni,

agudijxhni xcuent xtiejn rexpejn Dios ni baxhe' gunaadxabga, che bagu'tniren.



<sup>3</sup> Guibi' guniizareni:

—¡Colguiliä'p xpala'n Dios! Gujxh xten gunadxabga sanuutis cayä'p par tejpas.

<sup>4</sup> Guiraa regalbitajp rebengool näjza guidap remanbajnga bazuxhijbreni, biabrløjreni gojnreni Dios ni rbej lo tron cadro rnibeeni, caniireni:

—Sugacni si'c. ¡Colguiliä'p Xpala'n Dios!

<sup>5</sup> Dxejcti nez lo tron cadro rnibee Dios biejn xse' tej ni canii:

Colgudeed xquixtios lo Dios,

guira'tu ni rujn xtzuun Dios,

guira'tu ni rajntu Dios, rebenro sigajc rebennadolajz.

### *Sa' xten Xiil xten Dios*

<sup>6</sup> Dxejcti biejn diagä ascanu xse' xhidalduxh bejn, riejnni si'c che cayäjt nisro xhidajl gueu, näjza si'c che caguidxaduxh guzii, caniireni:

¡Colguiliä'p xpala'n Dios!

Sa'csi Gueb Dios, Dad xtenuu ni rajp guiralii yälrnibee, ani acanibee.

<sup>7</sup> Guibalajznu, guibalazduxhnu, guiliä'pnu xpala'nni sa'csi abidzujn dxej guchnaa Xiil xten Dios, aguzucheeza dxa'p.

<sup>8</sup> Abadeedreni ladlin ni najc nuiduxh gacwni.

Ladnolni, luxh rdimbicha'ni sa'csi nayadujni.

Ladnayare säloj redzunsac ni bejn rexpejn Dios.

<sup>9</sup> Najza anglga loä:

—Bacuaa diidxre: “Chicbaa renani bidojn jiääd lo xsa' Xiil xten Dios.”

Guniizani loä, najni:

—Rediidxre najc didx-guliipac xten Dios.

<sup>10</sup> Dxejcti bazuxhibä lojni te ganäni, dxejc laani najni loä:

—Na'c gunlu si'c, sa'csi narä nacä sigajc najclu, nacä te ni rujn xtzuun Dios, näjza bejtzlu ni rusule' xtidx Jesucrist. Bazuxhijb lo Diostis sa'csi Dios rudeed gusule' bejn xcuent Jesucrist, gusule'zareni xtidx Dios.

### *Nani bijb te cabainol*

<sup>11</sup> Dxejcti bahuiä bixal xhaguibaa, biricaj te cabainol. Luxh laj nani rbijbni säloj casobsa'cpacni diidx, rniizani ganax didxgulii. Entis laaca rujnni yälguxhtis, entis laaca rucuaani che rujnni guer. <sup>12</sup> Rebalojni rbebajl, yejcni yu' xhidalduxh coron, luxh caj te laj lojni nani rutliidi racbee, luxh laatisni racbeeni xhi sälojni. <sup>13</sup> Najcwni te lajd ni nadiini rejn; lajni najcza Xtidx Dios. <sup>14</sup> Guiraa resoldaad guibaa xten Dios siädnajlni najcwreni ladnol, ladnaya, bijbzareni cabainol. <sup>15</sup> Ro'ni carii te spaad ni caduxh guiro'p laad ro'ni te ni'c tilnäjni guiralii reguejdx lo guedxliuj, te guinibeeni guiraa reben guedxliuj ca'ni si'c te barguiib. Sujnzani yälguxhtis lojni reni rdexchlajz lo Dios, si'c ruläjreni yec uub che rbääreni bin, si'c sujnzä Dios ni rajp guiralii yälrnibee. <sup>16</sup> Lo xhajbni näjza cuä' cujdni caj lajni: “Reii xten rereii, Dad xten redad.”

<sup>17</sup> Bahuiä loj te angl suga'ni galäii gubijdx, cabedxa'ni caniini loj guiraa reman ni rutajt xhaguibaa, räjpni:

—Coltaa, colguire' ree, te gautu xcheroduxh xten Dios; <sup>18</sup> te gautu xpääl rereii, näjza xpääl recapitän, näjza xpääl rebenro, näjza xpääl recabaii, näjza xpääl renani rbijb recabaii, näjza xpääl guiraasi bejn, bejn ni rdo' si'c rdo' guidxaa sigajc rebejn ni di gun xtzuun bejn, rebenbäz sigajc rebenro.

<sup>19</sup> Dxejcti bahuiä loj manro näjza loj rereii guedxliuj, abire'reni te gucuanäjreni nani rbijb cabainol näjza guiraa resoldaad xtenuu. <sup>20</sup> Biga' manroga näjza profetxhii ni bejn senro nez loj manroga te basgueeni guiraa renani cua' seen xten manroga, näjza renani bazuxhijb lo banäjb xten manroga. Guiro'p redee bacuaareni guideb nabajjnreni nen te bal guiboduxh ni recnäj sufr. <sup>21</sup> Dxejc guiraa reni bia'n bagu't spaad ni birii ro' ni bijb cabainol. Guiraa reman xhaguibaa gudajw xpäälreni.

## 20

*Te miĵ ijz*

<sup>1</sup> Dxejcti bahuiä loj te xangl Dios ni siädjiäjt xhaguibaa, siädnäni liäii ni ruxhal guedro ni laa gabijl. Ca'zani te cadenro. <sup>2</sup> Anglre gunaaz gutiatzroga, ni gujc bäl galooli, ni najcza bendxab, ni laaza Satanás. Bacuaduunini te miĵ ijz. <sup>3</sup> Basälñini nen gabijl, te ro'c basäunini, bacuaani liäii te na'cru gusgueeni reben guedxliuj laĵ ni guiza' te miĵ ijz. Che guiza' reijzga, empac sibi' lasacni bale'si dxej.

<sup>4</sup> Dxejc bahuiä retron cadro rbejreni rnibeereni, bahuiäza loj renani rbej lo retron, cua'reni yälrnibee te gunreni yälguxhtis. Dxejcti bahuiä xaim rebejn nani biru' yejcn sa'csi huililajzreni xtidx Jesucrist näjza sa'csi basule'reni xtidx Dios. Direni nuzuxhijb loj gutiatz niclaza lo banäjb ni najc si'c manroga, dizareni nica' seen lo cuajreni nicla lo naareni. Gubansacreni loj rebengut, gurenäjreni Jesucrist te laani gunibenäjreni te miĵ ijz. <sup>5</sup> Dee najc yälrbansac galoo lo rebengut. Niluxh stecuaa rebengut, direni guibansac che guisa'li te miĵ ijz. <sup>6</sup> Chicbaa rebejn nani guibansac ganiddoo, najczeni bendxan ni agubicaj xtojreni. Ni rojp yälgujt di guidzujn lojreni. Laareni sajcreni xpixhojz Dios näjza Jesucrist, sibenäjreni Jesucrist, sinibenäjreni Jesucrist te miĵ ijz.

<sup>7</sup> Che guiza' te miĵ ijzga, suslasacni Satanás nen gabijl. <sup>8</sup> Che guiriini ro'c, gusgueeni guiraa reguejdx ni tre' lo guidap laad guedxliujre. Susgueeni reben Gog näjza reben Magog te gutie'nireni te gunreni guer. Xhidalduxh gacreni, pet si'cti yujxh ni tre' ro' nisdoo. <sup>9</sup> Huä'preni lo te camp cadro gulagduxh. Gudäjyreni guideb gabig cadro rnibee rexpejn Dios nen guejdx nani sanälajz Dios. Per baxhal Dios bal guiboo xhaguibaali bitejbni, te guyejc guiragajczeni. <sup>10</sup> Dxejc bacuaareni bendxab nani biädgusguee rebejn lo bal guiboo ni cayecnäj sufr, lagajc cadro yu' manro, näjza profetxhii nani basguee; lo bal guibooga susacsirenini sidejdreni trabawduxh dxej-yääl par tejpas.

*Yälguxhtis ni gujc nez loj tronronol*

<sup>11</sup> Dxejcti bahuiä lo te tronronol näjza lo nani sobga' lojni te rujnni yälguxhtis. Nez lojni gunitlojli guedxliuj näjza guibaa, xhetru lajtdi bidxäjl par laareni. <sup>12</sup> Bahuiä lo rebengut, benro sigajc bennadolajz, tre'reni nez lo Dios. Bixal rexquijtz Dios, dxejcti bixalza stee xquijtz Dios ni najc guijtz xten xcälñabannäj Dios par tejpas. Dxejcti bejni yälgutxhtis rebengut xcuent ni bejnreni, xcuentza rediidx nani caj loj reguijtzga. <sup>13</sup> Guiranejz biääd rebengut: nisdoo batzuug rebengut ni yu' lojni, gabijl näjza yälgujt batzuugza rebengut ni yu' lojreni. Dxejcti bejn Dios yälguxhtis tejpgareni xcuent ni bejnreni. <sup>14</sup> Dxejcti bacuaani yälgujt näjza gabijl lo bal guiboo ni najc si'c te nisdoo te ro'c checreni par tejpas. Dee najc yälgujt ni rojp. <sup>15</sup> Guiraa bejn ni di lajni nidxäjl lo xlibr yälñabajn bacuaazani reni'c lo bajlga.

## 21

*Xhaguibacoob näjza guedxliucoob*

<sup>1</sup> Dxejcti bahuiä te xhaguibacoob näjza te guedxliucoob, sa'csi agunitloj guibabiejw, näjza guedxliubiejw, luxh xhettiruza nisdoo. <sup>2</sup> Narä Juan, bahuiä lo guedx Jerusaléncoob, guedxdxan, siädjiäjtñi xhaguibaali cadro rnibee Dios. Sucheduxhni si'c rsiuchee te dxa'p nani agojl guchnaa. <sup>3</sup> Dxejcti biejn diagä te xse' te ni canii dipduxh, ascanu lo tron cadro rnibee Diosli carii se'ga, scree caniiini:

—Colhuii, aguzuj xquidoo Dios galäii rebejn, anabannäj Dios rebejn, sajczareni rexpejnñi. Sibannäj lagajc Gueb Diosreni. <sup>4</sup> Sutia Dios guiraa nisbee balojreni te na'cru goonreni. Sinitloj yälgujt, xhetru xliajsdi chu, diru bejn goon, dirureni jiajn, sa'csi guiraa redee ni guyu' galoo agunitloj.

<sup>5</sup> Dxejcti ni sobga' lo tron cadro rnibeeni guniini, najni löä:

—Bahuii, najrä guscobä guira'ti.

Guniizani löä:

—Bacuaa rediidxre, sa'csi guliipacreni, sajczalilajz bejn rediidxre.

<sup>6</sup> Dxejcti najzani loä:

—Agujcni. Narä nacä A näjza Z, ni säloj nani rbaxtiej näjza nani ruluux. Lo chutis ni cayojl, sudedxlia'ä nis yäni, nalajznu yälñabajñ par tejpas. <sup>7</sup> Chutis nani gun gaan lo dojl, sica'zani guiraa dee si'c yälñasa'c, luxh narä sacä Xtiosni, laani sacni xi'nä. <sup>8</sup> Niluxh renani rdxejb, renani di chalilajz xtidxä, reni rdxe'ch loä, reni rugu't sa'reni, reni runnäj gunaa dojl, renani najc bidxaa, renani rusuxhijb lo banäjb, guiraa renani rusguee rniireni didxxhii, guiragajc reni'c sij lo nisdoo ni najc ganax bal guiboo, cadre rejc guiboo näjza sufr par tejpas. Dee ni najc yälgujt ni rojpp.

### *Guejdx Jerusaléncoob*

<sup>9</sup> Dxejcti lo guigajdz xangl Dios ni ca' guigajdz xhijg ni guidxa guigajdz reyälguxhtis xten Dios, birii tejni, najni loä:

—Gudaa, te guluiä lojlu dxa'p nani guchñaa Xiil xten Dios.

<sup>10</sup> Dxejcti bejnii gunixcalä, huinäni narä lo te danro ni jiaduxh, ro'c baluiini loä te guedxro, te guedxdxan ni laa Jerusalén, luxh xhaguibaali siädjiäjtñi nez lo Dios. <sup>11</sup> Guejdxga rdimbicha' guideb xcälrdimbicha' Dios. Luxh yälrdimbicha'ga najc si'c najc te guisacduxh ni laa jaspe, rdimbicha'zani si'c biidr. <sup>12</sup> Guideb gabi guejdxga dejd te paderro cadre caj tzubutio'p xportonroni. Te angl xten Dios suga' ro' tejsa portonga. Loj tejsa portonga, caj laj tej retzubutio'p cuaa xten rexpejn Israel. <sup>13</sup> Chon portonga caj nez cadre rliejn gubijdx, yu'za chon portonga nez ladbee, yu'za chon portonga nez ladbäwj, yu'za chon portonga cadre räaz gubijdx. <sup>14</sup> Yu' tzubutio'p guiro lo cimient xten guejdxga. Lo tejsa reguijga caj laj tej retzubutio'p apost xten Xiil xten Dios.

<sup>15</sup> Angl ni caninäj narä ca' si'c te biquii ni najc ganaxduj oor te gurejxhni guejdxga, näj reportonga, näjza padeerga. <sup>16</sup> Guejdxga najc cuadraad: sigajc ni siolni, sigajcza ni gulajgni. Dxejcti cua'ni biquii barejxni guejdxga, barejxni tio'p mił tio'p gayuu kilómetros tejsa laad. Sigajc siolni, sigajcza gulajgni, sigajcza jiaani. <sup>17</sup> Dxejcti barejxni padeerga, yu'ni gayonbitajp metr segun mediid xten bejn, sa'csi ni'c najc ni cagutiexhnäjsa anglga.

<sup>18</sup> Padeerga naccheeni guij ni laa jaspe. Guejdxga najc ganaxduj orsa'c, rdimbicha'ni si'c guihuajn. <sup>19</sup> Recimient xten padeerga nac-chee guisa'c. Guiganid najc guijaspe; ni rojppga najc zafiro; ni riojnga najc ágata; ni rdajppga najc esmeralda; <sup>20</sup> ni rgaiiga najc onix; ni rxho'pga najc cornalina; ni rgajdzga najc crisólito; ni rxhujnga najc berilo; ni rgaaga najc topacio; ni rtzuuga najc crisopraso; ni rtzubiteebga najc jacinto; ni rdzubutio'pga najc amatista. <sup>21</sup> Guitzubutio'p portonga najc tzubutio'p perl. Tejsa portonga guc-chee tej perl. Nezyuro ni rdeed galäii guejdxga najc ganaxduj oor, rienni si'c te guihuajn.

<sup>22</sup> Dina nuhuiä nicla tej guidoo nen guejdxga, sa'csi suga' Gueb Dios ni rajp guiralii yälñibeduxh, näjza Xiil xten Dios. Laani najc xquidoo guejdxga. <sup>23</sup> Guejdxga dini guiquiin gusanij nicla gubijdx niclaza bäii, sa'csi lagajc xcälrdimbicha' Dios näjza Xiil xten Dios ruzanij ro'c. <sup>24</sup> Rebejn guedxliuj ni rililajz xtidx Dios sajc sareni lo bianijga, luxh rereii ni siäd lo guedxliujre siädñazareni xcälñibeerene, näj xpala'nreni ro'c. <sup>25</sup> Di ro' reportonga jiäuu rdxej, luxh ro'c xhettiza yäl. <sup>26</sup> Ro'c chanazareni yälñasa'c näj xpala'n reguejdxro ni yu' lo guedxliuj. <sup>27</sup> Niluxh di gacdi pac jiu' nicla tej cosguijdx ro'c, niclaza te bejn ni rujn cosguijdx näj yälrusguee. Ro'c siu' ganaxduj renani caj lajni lo libr xten yälñabajñ par tejpas nani ca' Xiil xten Dios.

## 22

<sup>1</sup> Dxejc baluii anglga te gueuro loä, cadre yu' nisya xten yälñabajñ. Rdimbicha'ni si'c te guihuajn, luxh cariini lo tron cadre rnibee Dios näjza Xiil xten Dios, <sup>2</sup> rdejdnii loj nezyujro ni rdejdnii galäii guejdxga. Guiro'p laad gueuga sojb reyajg xten yälñabajñ, lojreni rcas tzubutio'p cuaa ninejxh nen tebijz, tejsa cuani tejsa bäii; luxh rebalajg ni rcas lo reyajgga najc te gusajcni reben guedxliuj. <sup>3</sup> Dxejcti ro'c xhettiru yälrdzubde, sa'csi ro'c yu' tron cadre rnibee Dios näjza Xiil xten Dios, ruzuxhijbza rexpejnii, rajnreni laareni. <sup>4</sup> Suhuiireni lojpacni si'cpac ni najcni, sicajza laj Dios lo cuajreni. <sup>5</sup> Ro'c diru yäl chu.

Luxh reni rbäjz ro'c di guiquiin nicla bajl, niclaza xhanij xten gubijdx, sa'csi Gueb Dios susanij lojreni. Luxh sinibenäjrenini par tejpas.

*Siäddzungajxh* dxej ni guibisac Jesucrist

<sup>6</sup> Dxejc naj anglga loä:

—Guliipac najc rediidxga, sajcpac chalilajzlureni. Dad Dios lagajc nani basniib lastoo rebejn ni gunii xtiidxni agujc xchero, lagajc laani baxhalni xanglni te baluilojni loj rexpejnni guira'ti nani agojl gac.

<sup>7</sup> —Sajngalu gan, siojb jiälä. ¡Chicbaa nani riu rediidx ni caj lo librrre!

<sup>8</sup> Luxh narä, Juan, biejn diagä rediidxre, bahuiäza recosre. Luxh che bahuiä, che biejn diagä bazuxhibä te ganä xangl Dios nani baluui loä guiraa redee. <sup>9</sup> Luxh laani najni loä:

—Na'c gunlu si'c, sa'csi narä runä xtzuunni sigajc rujnluni, sigajc rujn rebejn ni gunii xtidx Dios agujc xchero, sigajc rujn rebejn ni rusoob rediidx ni caj lo librrre. Bazuxhijb loj Diostis.

<sup>10</sup> Dxejc najni loä:

—Na'c gusäuulu guijtz cadro caj rediidxre xcuent nani churu gac, sa'csi asiäddzungajxh redxej ni chale'reni. <sup>11</sup> Luxh lañ ni guidzujñ dxejga, basaan suchanuu gun dojl renani cayungajc dojl; basaan suchanuu gun dzunguijdx renani cayungajc dzunguijdx. Per renani cayujñ dzunsa'c, chanuu gunreni dzunsa'c, nani najcza beñnaya, si'cza chanuu gacni beñnaya.

<sup>12</sup> Gunajtiro:

—Siojb jiälä, luxh siädnää xhi gunidxä loj tejgatu si'c ni riäjñ xca'tu xcuent dzuun ni bejntu. <sup>13</sup> Narä Jesucrist nacä si'c najcza A näjza Z, ni säloj nani rbäxtiej näjza nani ruluux.

<sup>14</sup> Chicbaa renani riu xtidx Dios, najcreni si'c ni rguuib xhajnreni te sajñ jiu'reni nez porton xten guejdxga, sajcza gauni ninejxh ni caj lo yajg xten yälñabajn par tejpas. <sup>15</sup> Per dejtñ guejdxga chajia'n reni najc si'c bä'cw, nalajznu rebidxaa, renani rusguee chälbejn, renani rugu't sa'reni, renani ruzuxhijb lo rebanäjñ, näjza ni rchagljazñ rñii didx-xhii te gusgueeni.

<sup>16</sup> Narä Jesucrist, abaxhalä xanglä lojlu te gusule'ni lojtu diidx xcuent guiraa redee, te gusule'zalu rextidxä neñ reguidoo loj rexpenä. Narä nacä te xajg to'reii David, nacäza si'c balxhaguibaa nani rdimbidxa' cäjysi che gajd jianij lo guedxliuj.

<sup>17</sup> Sprit Dxan xten Dios näjza chääñ Xiil canii, najreni:

—Cołtaa.

Suguiniiza nani riejn diajgreni diidxre, gäbreni:

—Cołtaa.

Sujiäädza chutis ni cayojñ, sujiädyañlia'ni nis yälñabajn par tejpas.

<sup>18</sup> Sa'csi narä rñiliä'ppac lojtu, guiraatu ni riejn diajgtu rediidx ni caj lo guijtzre xcuent recos ni churu gac, palga yu' chu tejtñ gutajlru diidx ni caj lo guijtzre, suteedru Dios bejnga replaag yejñni loj ni caj lo guijtzre. <sup>19</sup> Palga yu' chu gudzucaj loj rediidx ni caj lo guijtzre, sudzucajza Dios nani nica'ni lo yajg xten yälñabajn par tejpas, näjza lo guedx Dxan, ni caj xcuentreni lo guijtzre.

<sup>20</sup> Nani cagusule' diidx xcuent guiraa redee guniini, najni:

—Guliipacni siojb jiälä.

Sugacni si'c. Gudaa Dad Jesucrist.

<sup>21</sup> Sujiääd xcälracnäñ Dad Jesucrist lo guiraatu. Sugacni si'c.